


# Monoq Gotola Gosohaq



The New Testament in the Alekano (Gahuku) Language of Papua  
New Guinea

**Monoq Gotola Gosohaq**  
**The New Testament in the Alekano (Gahuku) Language of Papua**  
**New Guinea**  
**Nupela Testamen long tokples Alekano (Gahuku) long Niugini**

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Mar 2025 from source files dated 31 Aug 2023  
44bc4c3c-532b-5251-95bd-2c3cfdce78ba

## Contents

FRT . . . . .	1
Mataió . . . . .	2
Makí . . . . .	57
Luká . . . . .	89
Zoní . . . . .	144
Aposolo . . . . .	181
Loma . . . . .	226
1 Koliti . . . . .	250
2 Koliti . . . . .	271
Galesia . . . . .	285
Epeso . . . . .	293
Pilipi . . . . .	301
Kolosa . . . . .	306
1 Tesalonika . . . . .	311
2 Tesalonika . . . . .	316
1 Timotí . . . . .	319
2 Timotí . . . . .	325
Taetasí . . . . .	330
Pilemó . . . . .	333
Hípulu . . . . .	335
Zemusí . . . . .	353
1 Pitá . . . . .	359
2 Pitá . . . . .	366
1 Zoní . . . . .	370
2 Zoní . . . . .	376
3 Zoní . . . . .	377
Zutá . . . . .	378
Alikamú . . . . .	380

**MONÓ GOTOLA GOSOHÁ**  
**The New Testament in the Alekano (Gahuku) Language of  
 Papua New Guinea**  
**Nupela Testamen long tokples Alekano (Gahuku) long Niugini**

*Monó Gotola Gosohá*

The New Testament in the Alekano language of Papua New Guinea  
 [gah]

© 1973, 1986 Bible Society of Papua New Guinea

Web version

© 2013, Wycliffe Bible Translators, Inc.  
 www.Wycliffe.org

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following conditions:

- **Attribution.** You must attribute the work to *Bible Society of Papua New Guinea* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

**Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

## Izesu Kilistoni Gakó Lamaná Mataió Luhuva Gizamó

*Izesu Kilistoni avolage*

*(Luk 3:23-38)*

<sup>1</sup> Vegená utó imi itiki itiki ikago Izesu Kilistó eza agulizaki ve Tevitini agávolaho utó imó. Itó Tevití eza Avalahani agávolaho minamó. Nenémini gakoáa imane neve.

<sup>2</sup> Avalahakutí Isaká utó imó. Isakani asevalotí Zakopó utó imó. Zakoponi asevalotí Zutaki uvolage agunalagi utó imó.

<sup>3</sup> Zutani asevalotí Pelezeko Zelako utó asimó nene Tamalé getamó. Pelezeni asevalotí Hezeloná utó imó. Hezelonani asevalotí Lamú utó imó.

<sup>4</sup> Lamuni asevalotí Aminatapá utó imó. Aminatapani asevalotí Nasoná utó imó. Nasonani asevalotí Salamó utó imó.

<sup>5</sup> Salamoni asevalotí Poasini nene Lahapá getokago utó imó. Poasini asevalotí Opeteni nene Lutí getokago utó imó. Opeteni asevalotí Zesí utó imó.

<sup>6</sup> Zesini asevalotí agulizaki ve Tevití utó imó.

Agulizaki ve Tevitini asevalotí Salomó utó imó. Uliá helekago gevoná venalímo nene Tevititó vike getamó.

<sup>7</sup> Salomoni asevalotí nene Lehopoámo utó imó. Lehopoámini asevalotí nene Apiá utó imó. Apiani asevalotí nene Asá utó imó.

<sup>8</sup> Asani asevalotí nene Zehosapatá utó imó. Zehosapatani asevalotí Zolamá utó imó. Zolamani asevalotí Uziá utó imó.

<sup>9</sup> Uziani asevalotí nene Zotámo utó imó. Zotámini asevalotí nene Ahazí utó imó. Ahazini asevalotí Hezekiá utó imó.

<sup>10</sup> Hezekiani asevalotí nene Manasé utó imó. Manaseni asevalotí nene Amó utó imó. Amoni asevalotí nene Zosiá utó imó.

<sup>11</sup> \* Zosiani asevalotí nene Zekoniá itó agunalagi utó amó. Zuta vegená nagá kimiiki Papelonia mikasigú kilímiki va gamenaló nene utó amó.

<sup>12</sup> Papelonia mikasiuka kilímiki vikago nenetí nene Zekoniani asevalotí Sealitielé utó imó. Sealitieleni asevalotí nene Zelupapelé utó imó.

<sup>13</sup> Zelupapeleni asevalotí nene Apiutí utó imó. Apiutini asevalotí nene Eliakímo utó imó. Eliakímini asevalotí nene Azolá utó imó.

<sup>14</sup> Azolani asevalotí nene Zatokó utó imó. Zatokoni asevalotí nene Akimá utó imó. Akimani asevalotí nene Eliutú utó imó.

<sup>15</sup> Eliutuni asevalotí nene Eleazalá utó imó. Eleazalani asevalotí nene Mataná utó imó. Matanani asevalotí nene Zakopó utó imó.

<sup>16</sup> Zakoponi asevalotí nene Zosehé utó imó. Eza Maliani vana loló imó. Maliá nene Izesuni getamó. Eza nene Ómasímo gologí oletative loko lo mololeta ve.

<sup>17</sup> Utó iakaláa nene imanémiliki nene utó amó. Avalahakutí nene utó imi iteke lakani nene 14 utó ikago agulizaki ve Tevití utó imó. Tevitikutí nene lakani 14 utó iliki itikago nene Zuta vegená nagá kimiiki Papelonia mikasigú nene kilímiki vamó. Nene gamenalotí nene ámináminoko lakani nene 14 utó imi itikago gologí oletative loko lo mololeta vema utó imó.

*Izesu Kilistó utó imó*

*(Luk 2:1-7)*

<sup>18</sup> \* Izesu Kilistó utó itímini mogonáa lá oko neve. Izolaho Maliá nene Zoseheni ániigi milímkago ve aleve amasike hotopotó minasimó. Niasigo Ómasímini Sikalahulímimi zámuzaló Maliá nene izegipa agatupagi minamó.

<sup>19</sup> Minokago nene ániigi milíta ve Zosehé nene monolagi ve minamó nenazo, nenemú nene ahulotatomóza, vegená kogovisaló ahulotatomó nene avoza helekatzize, legesó oko nene ahulotatove.

<sup>20</sup> Loko loake agata gelekago nene, Guivahanímini ageló makolímo vamotoka utó o amike láa loko lo amimó: Zosehé geza nene Tevitini agávolagamaka, venaka Maliani nene alitohe alemitohe loko nene gagata giliko gena givisemino. Izeigipa agatupagi nominamó nene Sikalahulímimi zámuzaló neve.

<sup>21</sup> \* Eza vegenala zuha nene golesa netalímimi nagakutí gologí oketatimó nenazo, minoko gipala getatimó nene agulizá nene Izesú ave loko molatane. Ámina agulizalímimi mogonáa nene gologí olimiaká ve.

\* 1:11: 2 Kug 24:14-15:2; 2 Iki 36:10; Zel 27:20

\* 1:18: Luk 1:27

\* 1:21: Luk 1:31

<sup>22</sup> Itó netá matá lá oko utó imó nene Ómasímini agepagutí gakó loaká vernámo nene Guivahanímini gakó makó nene gihila zitive loko utó imó neve. Eza luhuva makó láa loko gizamó neve:

<sup>23</sup> \* Gilinahe. Vegi akamimó zaha mina vená makolímo izegipa agatupagi minooko gipala getatimó nene, agulizá nene Emanuelé ave liki litave.

Itó ámina agulizalímini mogonáa lelí gakokutí nene Ómasi nene lezagi makó noive loko.

<sup>24</sup> Láa loko vamotoka lo amekago Zosehé nene oteake, Maliani nene numunagú alémoko itimó.

<sup>25</sup> \* Ve aleve oko minoaká nenéminiki minamasike gipala getamó. Getokago Zosehé nene agulizá Izesú ave loko molamó.

## 2

### *Sonohí mogona gili vevesiaká a ve amó*

<sup>1</sup> Heloté nene agulizaki ve napa loló oake gizapa noigo, Izesú nene Petelehe numutoka utó imó, Zutaia mikasigú nene. Gamena nene zupa nene ho noititokatí mikasi mulalokatí sonohí mogonáa gili vevesiaká a ve makó nene Zelusale numutoka amó.

<sup>2</sup> Iake nene loká iki Zuta ve lekelí agulizaki ve gosohá nene hí apatoka utó ive. Leza numuteloka ho noitiuka nene utó itímini sonohila okulumató nego áinigokunike gupá ze amitune loko nene noune.

<sup>3</sup> Liki loká ikago nene, agulizaki ve Heloté nene gakó geleake, ininá noike agata gululusi nogiligo,

<sup>4</sup> keza Zelusale apá amelage ámináminiki ininá amó. Lá niago, Heloté nene guguni giziaká a ve napagi monó mogona apí ikimiaká a vegi kelémo nupa oake nene Ómasímo gologí oleketative loko lo mololeketa vema nene hí apatoka utó itive liki linamó neve.

<sup>5</sup> Loko loká okimikago, keza láa liki li amemó: Petelehe numutoka Zutaia mikasiuka utó itive loko Ómasímini agepagutí gakó loaká vernámo Ómasímo lo ami gakó láa loko luhuva gizonoiómá nena:

<sup>6</sup> \* Petelehe numutokatí agulizaki ve napa makó utó okoko nene Isilae vegeanáe zuha nene gizapa oketati ve nenazo, ámina apá Zutaia mikasigú noimó nenémo Zutaia mikasiuka gotó apá mukí niakutí lemeko nene nomive.

<sup>7</sup> Liki nene gakó li amikago nene, geleake, Heloté nene sonohí mogonáa gili vevesiaká a vema asugunataka kelémo nupa oake, sonohíma apí oko utó itotí gamena nanakí vive loko loká okimikago, nene gamenave liki legesó iki li amemó.

<sup>8</sup> Li amikago, Heloté nene láa loko lo kemeake kimisilimó: Lekeza nene Petelehe numutoka viki amuza miliki vitagá iki alími utó iiki iki li nimitaze. Iki li nimikiko, neza vinake ámináminoko voko gupá ze amitoze.

<sup>9</sup> Loko lokago, nivago nene, numúitoka ho noititoka ániga sonohíma utó oake nene, ale goí imó. Ale goí oko vike nene, izegipa namuni mina numuni veletó oko hizekago,

<sup>10</sup> ániagiake, multúikú lamaná giliake nene,

<sup>11</sup> numukú itiake ániagamó nene izolaho Maliaki niasigo, ániagiake kalapusa hiziki izegipa namunima gupá zi amiake góini agepáa ali vatá iake áminagutí nene henokanoni lehizitamó. Henokanoni nene goli gehani itó lokila anuvavagi iteaká i netá itó anuva hilina lamaná nene

<sup>12</sup> lehizimiake, akinago nene, Ómasímo nene vamotoka láa loko lo kimimó: Lekeza nene Heloté noigo ániagiake anite gapoló vamiki haitó gapoloka atiginá iki viki numutitoka vi anititaze. Loko lo kemekago nene vamó.

### *Izipi mikasiuka gólisi vamó*

<sup>13</sup> Nivago nene, Ómasímini ageló makolímo Zoseheni nene vamotoka utó o amike láa loko lo amimó: Helotéma gipakamú nene vitagá oko ale utó okoko nene apilitove loko lokamó nenazo, geza litá oko otekoko izolahiko gipalago nene kelémoko Izipi mikasiuka viki minataze. Viki niiki nene, nénisi gakó litokumukó gámemé iki gili minataze.

<sup>14</sup> Loko lokago, Zosehé nene litá oko oteake límugusigú nene izolahiki gipalagi kelémoko Izipi mikasiloka vamó.

<sup>15</sup> \* Neneloka viki niago Heloté nene hilimó. Lá okago, Zosehege atiginá iki Isilae mikasiló vamó nene hanuvamú negopa Ómasímini agepagutí gakó loaká ve makolímo gipáne nene Izipi mikasiuka minokago sele lo amutó noave loko Ómasímo lo ami gakó luhuva gizamó nene alévolé itive liki atiginá iki vamó.

*Izegipa namuni kipili gesá amó*

<sup>16</sup> Itó Heloté nene velesá helenamike sonohí mogona giliaká a ve nenete agoka viziake vakumú nene izapaló molamó. Izapaló golesa molokago nene, gimisigi ve nene kimiseleke-ago, keza nene Petelehe numutó itó apá alitokagi numutó namató mihina mihina iki nene izegipa namuni gipagó kilisimasi losi ali ahulinamamoláa kipili asú amó.

<sup>17</sup> Lá iki kipili asú amó nene, sonohí mogona giliaká a vete sonohíma ganá apí oko ániuhatotí gamena lá oko mota vokave liki Heloteni li ametó lá amó. Lá ikago, Lama numuni nene Petelehe numuni helegaloka minamó nenazo, Ómasímini agepagutí gakó loaká ve Zelemiá gakó láa loko limó nene alévolé imó:

<sup>18</sup> \* Lama numutoka nene ive nama nenémo haitolímínoko nominago Lahelé nene izegipa apalamú ive noigo nene alémo zou litune liki nilago, mukitó mota hili asú ikamó nenazo alími zou lamitamó ikago ive okogó minamó neve.

*Izipi mikasiukatí atiginá amó*

<sup>19</sup> Heloté helekago nene, Izipi mikasigú Guivahanímini ageló makolímó Zoseheni nene vamotoka goha utó o amike láa loko lo amimó:

<sup>20</sup> Gipaka apilitove loko li vema mota helekave. Nenemú geza otekoko izolahiko gipalago kelémoko Isilae mikasiuka atiginá oko kelémoko vozo.

<sup>21</sup> Loko lokago izolahiko gipalago nene goha kelémoko vimó. Atiginá iki Isilae mikasigú minake nene,

<sup>22</sup> Zosehé nene gakó makó láa loko gilimó: Heloteni gipala Akelaó áisi nene amelahini akilí hitoake, Zutaia mikasigú nene agulizaki ve loló oko noive. Gakó némika liki likago geleake, Zutaia mikasigú voko minatikumú alegesá ligimó. Alegesá legekago nene, vamotoka gakó makó gilimó. Geleake, Galilaia mikasiloka nene

<sup>23</sup> \* apá makó agulizá Nasalete neneloka voko minamó. Lá okago, Ómasímini agepagutí gakó liaká a ve keza Ómasímo amisilitove loko lo mololeta vemú Nasalete veve liki litave liki lina gakó nene alévolé imó.

**3***Nagamí holokimiaká ve Zonini monó*

(Mak 1:1-8; Luk 3:1-18; Zon 1:19-28)

<sup>1</sup> Gamena nene zupa monó nagamí holokimiaká ve Zoní nene Zutaia mikasigú oake, mikasi gomopalaló monó láa loko lo utó imó:

<sup>2</sup> \* Ómasímini agulizaki ve napa nene omo lokogovisaloka okaze. Likigika ali viligalo.

<sup>3</sup> \* Loko limó nene, Ómasímini agepagutí gakó loaká ve Isaiá gakó láa loko limó: Mikasi gomopalaló ve makolímó gakó napagutí nene Guivahanímini gapo vilitalo. Likigik-agú limití gapo ali hee litalo loko nolive.

<sup>4</sup> \* Loko luhuva giza gakó nene Zonitoka alévolé okago, eza Ómasímini agepagutí gakó loaká ve Ilaizani suni alike kamele iza zopovatunú lilí a gó luhoake, iza galupavatunú lilí a holotani nene gohalaló zeake, pipizá nosánetá nene ganuki himoni nozogagi nene noko minamó.

<sup>5</sup> Lá noigo, Zelusale numutotí itó Zutaia apá makotokatí itó Zota nagamí vola helega ima helegalokatí nene aitoka vi anitiake nene,

<sup>6</sup> lihimáini li utó ikago, Zota nagamikú monó nagamí holoketamó.

<sup>7</sup> \* Noholoketago nene, Palisaio monó ve itó Satukaio monó ve keza monó nagamí hlanigi ikago, láa loko lo kimimó: Gosihalímini agapilamó zuha lekeza nene golesa netalímini lihimá nene lekelitoka anitinogo noimó nene likigika ali viligamikí hanuva golisi itave loko éaho lo likimigo niave.

<sup>8</sup> Likigika nene ali viligiiki nenémini gihila ali utó iiki alo.

<sup>9</sup> \* Neza láa loko lo nolukumuve: Avalahani agapilamó zuha keza sonohikitana nene gatamoakalímini lilí itave loko lo molota gakó nene alévolé itive loko lekelisi negopa, Ómasi nenémo gakó litove loko nene lokiko, gehani imanete Avalahani agapilamó zuha lilí inigi nene lilí itamó nenazo, nenemú lukugupeliní aliki itiki Avalahani agapilamó zuha nouninazo, Ómasímo lihimatemú goní oletaminogo ive liki lamilo.

<sup>10</sup> \* Luni makó nene za mogonagú gamuni oake noive. Nenemú gihila lamaná ali utó inamitamoláa nene, hukoko lokú gizanogo ive.

\* 2:18: Zel 31:15    \* 2:23: Mak 1:24; Luk 2:39; Zon 1:45; Isa 11:1    \* 3:2: Mat 4:17; Mak 1:15    \* 3:3: Isa 40:3  
\* 3:4: 2 Kug 1:8    \* 3:7: Mat 12:34, 23:33    \* 3:9: Zon 8:33    \* 3:10: Mat 7:19

<sup>11</sup> Neza nene likigika ali viligikamómave loko nene nagamí hololikimiaká noumóza, nemegealoka noa ve áisi nene Ómasímíni Sikalahulagi likigikagú netá golesa lolímo lati loki hololeketanogo noave. Aí zámuza nenémo neni zámuza nene nivilegekave. Neza ánéámina gelekelé otoko aí gasa gó ate akisitomó oko minamuve.

<sup>12</sup> Eza nene lolopa giteaká netaki aleko oko laisi nene gesopá zeko lolopa giteko ale lamaná itove loko ale vavá okave. Nosáneta lamaná nene numunagú gizaká oko ale molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

*Izesú monó nagamí holamó*  
(Mak 1:9-11; Luk 3:21-22)

<sup>13</sup> Gamena nene zupa Izesú nene Galilaia mikasigutí vike Zota nagamitoka anitike nagamí holonetative loko Zonini voko lo amekago,

<sup>14</sup> Zoní nene géneka loake láa loko limó: Nénisi ánéama nounazo, géisi holonetatanimó nene etanogo ize. Nenitoka animó nene etamive.

<sup>15</sup> Loko lokago, Izesú nene láa loko limó: Nene gakó lamaná nolanimóza, itínasa nene nenéminoko minatíize. Hoza nene láa iki alitáive loko loletamóma nenazo, golesa aminogo ive. Loko lokago, Zoní nene gele amimó.

<sup>16</sup> Gele ameake nene alémoko lemeko Zota nagamikú nene holomikago, iteake ángamó nene, okulumá koló okago, Ómasímíni Sikalahú nenémo nama luhusimagitana oko lemeko Izesuni amupiló nolimigo ángamó.

<sup>17</sup> \* Lá okago nene, okulumakutí gakó makó láa loko limimó: Imane nigika amenou gipáne noive. Ángo lamaná okuve, loko limó.

## 4

*Satá Izesuni gimivagú molamó*  
(Mak 1:12-13; Luk 4:1-13)

<sup>1</sup> \* Lá okago, Ómasímíni Sikalahú nenémo Izesuni nene mikasi gomopalaló alémoko vimó nene Satá gimivagú molative loko geleake alémoko vimó.

<sup>2</sup> Neneloka minake gamena 40 oko novigo nosáneta mosimó nenazo, gaúna helekago,

<sup>3</sup> gimilegú moloaká ve nenémo aitoka anitimó. Aniteake láa loko limó: Geza Ómasímíni gipala noitanimó nene, gehani imane gakó lo kemekako nosáneta lílilí ikiko natanize.

<sup>4</sup> \* Loko lokago, Izesú nene Óe, monó gotolaú láa liki luhuva gizinamóma neve:

Vegená neneta nosánetaó nokoko lamaná oko minoakaláa nene nomive. Ómasímíni agepagutí gakó nolimimó nene gele alekoko lamaná oko minoakaláa neve.

<sup>5</sup> Loko lokago, Izesuni alémoko Zelusalega vike monó zagusave agoka hánaló nene alémoko iteake,

<sup>6</sup> \* láa loko lo amimó: Geza Ómasímíni gipala noitanimó nene, imanelotí ká omane mikasiló olío molozo. Gakó makó monó gotolaú láa liki luhuva gizinamó neve:

Geikumú Ómasímó aí ageló nene hoza gakó lo kemekiko gehanímó gígisagú hizekative liki keza limiki kígizani agikagú gilími milanigave, liki luhuva gizinamó nenazo, gotá gepelemínogo ive.

<sup>7</sup> \* Loko lokago, Izesú láa loko lo amimó: Óe, monokú gakó makó láa loko neve:

Guivahani Ómasímó lelémó vatí itihe loko negi netá lílilí amilo.

<sup>8</sup> Loko lokago nene, agoka hána hána makotó alémoko itimó. Neneloka itike numutó namató kugulizaki vetini apáini itó luhuvagí netáini nene nalapizike,

<sup>9</sup> láa loko limó: Geza nene galapusa hizeko negepoka lokako, gelepizu netá mukí geí loló itive.

<sup>10</sup> \* Loko lokago, Izesú láa loko limó: Satá geza nene ahulokoko vozo. Gakó makó nene monó gotolaú láa liki luhuva gizinamóma neve:

Guivahani Ómasí aikó nene lalapusa hizeko gupá ze ameko agepoka loakaláa neve. Itó aikó gelekelé omiakaláa neve.

<sup>11</sup> Loko lokago, ve golesa nenémo ahuloake vokago nene, agelolite aniteke nasahilí itiki minamó.

*Galilaia mikasiuka Izesú monó hoza apí imó*  
(Mak 1:14-15; Luk 4:14-15)

\* 3:17: Apí 22:2; Age 2:7; Isa 42:1; Mat 12:18; Mak 1:11; Luk 9:35

\* 4:1: Hip 2:18, 4:15

\* 4:4: Gapo 8:3

\* 4:6:

Age 91:11,12

\* 4:7: Gapo 6:16

\* 4:10: Gapo 6:13



12\* Zonini nene nagá numukú ahulimikago noigo nene, Izesú nene gakó geleake Galilaia mikasigú vimó.

13\* Nasaleta numutoka voko gamena hána minamike agilikaloka nene Kapanao numutoka voko minoko aleko imó. Ámina apá nene Galilaia nonohuló agataloka minamó nene Zepuloko Napataliko kei kagapilamó zuhatini mikasiloka minamó.

14 Lá okago, Ómasímini agepagutí gakó loaká ve Isaiá epoapoga li gakó nene alévolé imó. Eza láa loko luhuva gizamó neve:

15\* Zepuloni mikasigú itó Napatalini mikasigú nene, age nagamí alitó, Zota nagamí vola helegaloka nene, itó Galilaia mikasiuka numuká ve keza miniki aliki iaká niatoka nene,

16 límugusigú miniaká nia vejená keza ló liví napa ángatave.

Itó heleakalímini límugusigú mina vejená keza nene lapaná utó okiminogo ive.

17\* Nene gamenaló Izesú nene monó láa loko apí oko lo kimimó: Ómasímini agulizaki ve napa nene omo lokogovisalo okave. Likigika nene ali viligalo, loko lo kimimó.

*Izesú lagaha aliaká a ve 4-a sele lo kimimó*

*(Mak 1:16-20; Luk 5:1-11)*

18 Gamena makó zupa Izesú nene Galilaia nonohuló agataloka mohona noigo, ve lositá uvolahiko agunalago minasimó. Makó agulizá nene Saimon, agulizá makó nene Pitá, itó agunalámini agulizá nene Etulú, keza nene lagaha miliaká así ve niasinazo, nonohulukú nene lagaha gotaha ahuliki niasigo,

19 Izesú ángoake láa loko lo kimimó: Némegetiki alizo. Lagaha hoza aliki minasimóma itína vejenatoka hoza aliki kilími nenitoka milatáive loko lekelémo nomuluve.

20 Loko lokago nene, litá iki lagaha gotaha nene ahulikasike ámegetiki vasimó.

21 Itó vake Zepetaioni gipala lositá ámináminiki niasigo ángamó. Uvolahini agulizá nene Zemusí, itó agunalámini agulizá nene Zoní. Keza sipigú nene améipiki minasike, lagaha gotaha ali lamaná niasigo, Izesú ángoake sele lo kimimó.

22 Sele lo kemekago litá iki améipinigi itó nagamikú lapéinigi nene ahulikasike Izesuni ámegetiki vasimó.

*Izesú vejená mukí nasahilí oketamó*

*(Luk 6:17-19)*

23\* Izesú nene Galilaia mikasigú nene vigé vigé oko mohona ike nene, monó numuni minakú minakú nene monó lo keme keme ike Ómasímini gizapaló minoakalímini gakó lamaná lo utó moloko lo kemeká itó haitopaitó netá gizale vejená itó haitopaitó netá kivisi vejená kelémo zokoká oko minamó.

24 Lá noigo, aikumú gakoláa likago, Silia mikasigú vike numutó namató vo asú okago nene gili asú amó. Gili asú iake nene haitopaitó netá kivisi vejená itó kugupe miluma gele vejená itó kigikagú holosi mina vejená itó kigika gopa okago minamoláa itó gepili minamoláa mukí nene Izesutoka kilímiki ikago kelémo zoko asú imó.

25 Lá okago nene, Galilaia mikasiukatí taoni 10-a mina mikasi agulizá Tekapoli loko noi mikasigutí itó Zelusale numutokatí, itó Zutaia apá makotokatí, itó Zota nagamí vola helegalokatí nene vejená vai iki ámegetiki vamó.

## 5

*Izesú zopegaló monó lo kimimó*

1 Izesú nene vejená mukí alegesá ikago ángoake zopegaló iteko minamó. Noigo, izegipala zuha nene aitoka alegesá iki minamó.

2 Niago nene Izesú monó láa loko lo kimimó:

*Logoliza vizeakalímini gihila*

*(Luk 6:20-23)*

3 Kigikámini henonimú gilikago lemeko mina vejenakumú gelekugo kogoliza nivizemó geleká noive. Okulumalímini lapaná nene ali lá inigave.

4\* Itó ive nama iki miluma giliki miniaká niamó nene keikumú gelekugo kogoliza nivizemó geleká noive. Ómasímo kelémo zou litive.

5\* Itó kugupenini aliki limiki miliaká niamó nene keikumú gelekugo kogoliza nivizemó geleká noive. Mikasiuka nene Ómasímini helisa henoni mukí nene ali lá inigave.

\* 4:12: Mat 14:3; Mak 6:17; Luk 3:19-20 \* 4:13: Zon 2:12 \* 4:15: Isa 9:1-2 \* 4:17: Mat 3:2 \* 4:23: Mat 9:35; Mak 1:39 \* 5:4: Isa 61:2 \* 5:5: Age 37:11

<sup>6</sup> Itó Ómasímini avogisalo hee hee liki minatakumú miluma giliki miniaká niamó nene keikumú gelekugo kogoliza nivizemó geleaká noive. Hee liki minatamó nenémo kígika itive.

<sup>7</sup> Kígika hizi kimiaká niamó keikumú gelekugo nene kogoliza nivizemó geleaká noive. Ómasi eza agika hize kimitimó neve.

<sup>8</sup> Itó kígika gizopagi miniaká niamó nene keikumú gelekugo kogoliza nivizemó geleaká noive. Keza miniki Ómasi ániganigave.

<sup>9</sup> Itó kilími zou liaká niamó nene keikumú gelekugo kogoliza nivizemó geleaká noive. Ómasímo izegipáne zuha niave loko loketanogo ive.

<sup>10</sup> \* Itó hee lo mina mogona ámegetiaká niató miluma netá alikitiki gopoguni milikimik-ago miniaká niamó keikumú gelekugo nene kogoliza nivizemó geleaká noive. Keza nene okulumálmíni lapanató viki minanigave.

<sup>11</sup> \* Itó nenikumule liki alivi letivi iki gopoguni milikitiki kilími golesa galasa iki lotoka lataka nihizilitikoma nene lokogoliza vizitave lokogó nene gelenouve.

<sup>12</sup> \* Okulumakú meinavatini sipisi netimó nenazo, nenemú mulutikú lamaná giliki lokogoliza viziki láa liki gilitave: Ómasímini agepagutí gakó liaká a ve gozapá nene áminámini ikitamóma nenazo, Ómasímo ámina vegeñaki meinava napa kimimó nene ámináminoko liminogo ive liki lokogoliza vizilo.

*Age itó liví nenémini gakola*  
(Mak 9:50; Luk 14:34-35)

<sup>13</sup> Lekeza nene mukí vegeñalitini age líl iki niave. Agémini lagaváa asú itimó nene, nana oko goha alémo melelé itune. Ma aminogo une. Ha netá loló okamó nenazo, nenemú lekeko ale ahulokuko, ká omane mikasiló neiko nene, vegeñá nenete lisiki goihá ziki vigá igá inigave.

<sup>14</sup> \* Itó lekeza nene mikasiuka vegeñá mukilitini livíni líl iki niave. Liví napa nene agokaló ale utó molonouko, netá makolímó ale hitosá amive.

<sup>15</sup> \* Itó liví lege molokoko nene somotunú gahumá oakaláa nomive. Holomaló molokuko nene, numukú nia vegeñá hize sata o asú okimiaká noive.

<sup>16</sup> \* Lekeza miniki aliki atímo livímáminoko vegeñá nene hize sata oketatize. Lá okoko nene, lekelisi lamaná iki iki miliki itamó nene vegeñá nenete ángiiki laga kivisekiko, okulumakú ametipini agepoka litaze.

*Mosé lo hukoko li gakokumú*

<sup>17</sup> Nenikumú nene Mosé lo hukoko li gakó itó Ómasímini agepagutí gakó liaká a vete li likimina gakó ale ahulatove loko okane liki lakagata gelemilo. Ale ahulatove loko lumumó negopa, mogonáa lo utó oko lokugo gihila zitive loko lumumóma neve.

<sup>18</sup> \* Gakó lamaná lo likimitoze, gililo: Okulumaki mikasigi velesá vo tolova amoko ha nekoma nene, Mosé lo hukoko li gakokutí gakó koma ma gopa aminogo ive. Ha míno-loko voko neiko nenémini gihila utó inogo ive.

<sup>19</sup> Nenemú makó eza lo hukoko li gakokutí koma makó avutá apeleoko vegeñá lugáate ámináminiki avutá apilitave loko lo kimitimó nene, okulumakú Ómasímini avogisalo eza lemeko minanogo ive. Itó makó eza lo hukoko li gakó gelealekoko vegeñá makolite ámináminiki gili alitave loko lainim-oketatimó nene, okulumakú Ómasímini avogisalo iteko minanogo ive.

<sup>20</sup> Nénisi láa loko lo nolukumuve: Lekeza nene monó mogona apí ikimiaká nia vetini itó Palisaio monó vetini mogonáminimú gilikago hee lokogó noitive liki giliaká niamóza, lekelí hehe liki miniaká nia mogonatiní nenémo keí mogonáini kiviligemitimó nene, lekeza okulumakú Ómasímini avogisalo ma iteminigave.

*Lizapaló moloakalímini gakola*

<sup>21</sup> \* Mosé lo hukoko li gakokutí avotikini láa liki li kiminamóma neve: Geza vegeñá kepele helemo. Makolímóhe makolímóhe ve makó apele hilitimó nene, gakó hozámíni mututoni loló itive.

<sup>22</sup> Itó nénisi nene láa loko lo nolukumuve: Makolímóhe makolímóhe agivelahinimú izapaló molatimó nene gakó hozámíni mututoni loló inogo ive. Itó makolímóhe makolímóhe agivelahini ale mumusopa zeko litimó nene monó gizapa vetini kovogisalo goní napa

\* 5:8: Age 24:3-4 \* 5:10: 1 Pit 3:14 \* 5:11: 1 Pit 4:14 \* 5:12: 2 Iki 36:16; Apo 7:52 \* 5:14: Zon 8:12, 9:5  
\* 5:15: Mak 4:2; Luk 8:16, 11:33 \* 5:16: 1 Pit 2:12 \* 5:18: Luk 16:17 \* 5:21: Gá 20:13; Gapo 5:17

inogo ive. Itó makolímóhe makolímóhe agivelahinimú aleko letoko negi ve lotatimó nene, áisi nene ló apalímíni mututoni loló inogo ive.

<sup>23</sup> Nenemú geza nene guguni gizoaká netá matá aleko voko holomaló molatani zupa nene nigivénehiki logoka hotopotó igo lovaleta onousimóma nenazo, nenema ha neve loko gilitanimó nene,

<sup>24</sup> guguni gizoaká netá neneló ahulokako, neko nene, voko gigivekahiki gakó ligili hagili iki nene likigizakú aliki ali hulu itáive. Ali hulu iiki nene guguni gizoaká netáma nene goha voko Ómasímíni holomaló molatane.

<sup>25</sup> Ve makó eza geí lihimamú goní ogetanogo goní numutoka gelémoko noviko, gapoloka niviki nene lihimavaka asú itive loko netá makó amezo. Itó áminagi aleloko gopa hanuva goní ale heleaká ve noitoka anititanimó nene, goní ale heleaká vemámo pilisi vetini kigizakú gelémo molokiko keza nagá numukú ahuligimikataze.

<sup>26</sup> Neza lamaná lo nogumuve. Geza Ómasímíni nagá numuni napagú minokoko lihimakámíni meinaváa koma napa apaso asú amitanimó nene áminagú mino-loko voko minanogo ane.

*Vená loká oaká gakó*

<sup>27</sup> \* Mosé lo hukoko li gakokutí avotikini nene gakó láa liki li kiminamóma neve: Haitó vená makó loká amo.

<sup>28</sup> Itó nénisi nene láa loko lo nolukumuve: Ve makó nenémo vená makó nene ánigo amu hilitimó nene ámina vená nene agikatunú mota loká okamó nenazo, nenémíni lihima aitoka minanogo ive.

<sup>29</sup> \* Nenemú gogómula lugaloka nenémo lihima aleaká gapogú gelémo nomilikoma nene, gugupe avasavagi minoko nene meikú holokatanize. Nenemú gogómula nenémo gelémo gopa okative loko gogómula lugaloka nene hize likoko ale ahulozo. Gogómula hamoki minoko vávani oko minanogo ane.

<sup>30</sup> \* Itó gigizani lugaloka nenémo lihima aleaká gapogú gelémo nomilikoma, gugupe avasavagi minoko meikú holokatanize, nenemú gigizani lugaloka hukoko ale ahulozo. Gigizani hamoki minoko vávani oko minanogo ane.

*Vená kimisele ahuloaká gakó*

*(Mat 19:9; Mak 10:11-12; Luk 16:18)*

<sup>31</sup> \* Mosé lo hukoko li gakó makó láa loko neve: Makó eza venala ahulotatove loko nookoma nene pepa luhuva gizo ameko nene ahulotatize.

<sup>32</sup> \* Itó nénisi nene láa loko lo nolukumuve: Ve makolímóhe makolímóhe venala gumesisi mokoló mogonaló negopa hanuvamú amisele ahulatimó nene, ámina mini ezega emega oakalímíni lihima nene goí o vanaloka minanogo ive. Itó alika vegi apiziki minasítímíni lihima nene goí o vanámíni amupiló iteko minanogo ive.

*Ómasímíni avogisaló lo hukoaká gakó*

<sup>33</sup> \* Mosé lo hukoko li gakokutí nene avotikini nene gakó láa liki li kiminamóma neve: Geza nene Ómasímíni avogisaló lo hukoaká noanimó nene sozagutí ale moloko lamo. Guvahanímíni avogisaló gakó lo hukoko lanimó nene gele alekako gihila utó inogo ive. Nene gakó lekeza mota gilinamóza,

<sup>34</sup> \* nénisi láa loko lo nolukumuve: Ómasímíni avogisaló lo hukoaká gakó nene ahulalo. Okulumakutí nene Ómasímíni gizapa olimiaká noimó neve. Nenemú okulumatoka ali miliki gakó li hukamilo.

<sup>35</sup> \* Itó imane mikasiló nene Ómasímíni lisoaká noive. Nenemú mikasigú ali miliki gakó li hukamilo. Itó Zelusale nene okulumakú agulizaki ve napámíni apá neve. Nenemú Zelusale numutoka ali miliki lo hukoaká nene ahulalo.

<sup>36</sup> Itó lekeza zopovatini loí zekikoma nene gakó li amikiko anupá loló amitimó, itó zopovatini anupá nene gakó li amikiko loí zemitimó neve. Nenemú zopovatini loí ali miliki gakó li hukamilo.

<sup>37</sup> Netá nenémínáa ahuliiki lamaná oo loló itune likigó, itó óe loló amitune likigó lilo. Nenémíni amupiló gakó makó litamó nene ve gosalokatí linigave.

*Golesa netá apasoaká gakó*

*(Luk 6:29-30)*

\* 5:27: Gá 20:14; Gapo 5:18 \* 5:29: Mat 18:9; Mak 9:47 \* 5:30: Mat 18:8; Mak 9:43 \* 5:31: Gapo 24:1-4; Mat 19:7; Mak 10:4 \* 5:32: 1 Koli 7:10-11 \* 5:33: Liv 19:12; Nam 30:2; Gapo 23:21 \* 5:34: Zem 5:12; Isa 66:1; Mat 23:22 \* 5:35: Isa 66:1; Age 48:2

<sup>38</sup> \* Moseni gakó makó láa liki linamó nene giliaká niamóma neve: Makolímo gogómula hize likokikoma, ámináminoko aí agómula hize likoza. Makolímo gegépa ze letokikoma geza aí agepa ze letozo.

<sup>39</sup> Líki linamóza, nénisi nene láa loko lo nolukumuve: Likipilitune nikikoma lukugupelini ali agutó vizemilo. Nenemú ve makolímo gagamipa lugaloka zekikoma, gagamipa lugaloka nipilitive loko viligo amezo.

<sup>40</sup> Makolímo goní nogetoko nene siotika alekikoma nene, hepé gómagi gopa amezo.

<sup>41</sup> Itó kiapé makolímo henokanoni geheko gapo alínipaló vitane loko nolikoma, gapo hánagi nene hanuva geheko vozo.

<sup>42</sup> Itó makolímo geí netakumú voká nolikoma, hanuva amezo. Netá mataka gutá ale minatove lokikoma, amezo.

*Gala ve ligika kemeaká gakó*

*(Luk 6:27-28,32-36)*

<sup>43</sup> \* Gakó makó láa liki linamó nene giliaká niamóma neve: Geza gigika nene gigivekahini amezo. Gala vega nene aleko letoko mukahá apelezo.

<sup>44</sup> Líki linamóza, nénisi láa loko lo nolukumuve: Gala velini nene likigika kimiki nasahilí ikitalo. Gopoguni mililikitata vejenakumú Ómasiloka lilo.

<sup>45</sup> Lá níiki okulumakú ametipini gipala mohó gihila líli iki minatave. Áisi lokago, aí ho silikakéna nenémo vejená golesagí lamanaki mukitoka hamó lelegitó hize hanatolimiaká noive, itó áisi lokago nene aí golini nenémo golesa iki mina vejenaki hee liki mina vejenaki hamó lelegitokó ale geha zelimiaká noive.

<sup>46</sup> Lekeza nene kígika likimita vejenakó nasahilí iki likigika kimitamó nene, Ómasímitokatí meinaváa alemitamó neve. Takisi gehani aliaká ve lekeza ángi goselé iaká nia ve nenete kígika limita vejená nene ligika kimitune líki iaká niamole.

<sup>47</sup> Itó likigivetikinígó geké likitatamó nene, likigivetikiní nana netá lamaná líli ikimiaká niamó neve. Monó gilina vejenalítini suni negopa, monó gelema vejená kezagí ámina suni aliaká niave.

<sup>48</sup> \* Nenemú lekelisi okulumakú ametipo hee loko minoaká noimó nenéminikígó minalo.

## 6

*Gohogó vejená nasahilí okimiaká gakó*

<sup>1</sup> \* Lekeza monokumule líki vejená kilími lamaná iki nasahilí ikitata netá nene vejenalite lelepoka litave líli líli amilo. Lekeza vejenalite lelepoka litave líli alí minatamó nene, ehe, okulumakú ametipo meinaváa lekememinogó ive.

<sup>2</sup> Nenemú gohogó vejená nasahilí oketokoko gigivekage ángi lamaná itave loko golómeni gizamo. Genezáini losigi ve nenete soza saza gakó lake monó numukú itó vejená kovogisaló vejenalite ángi lamaná iiki lelepoka litave líli lá iaká niave. Neza lamaná lo líkimitoze, gililo. Kegepoka iaká niamó nenémo keí meinaváa loló okago mota alikago asú oaká noive.

<sup>3</sup> Gohogó vejená nasahilí oketatove lokoma gigizani lamagalokatí asugunatoka nasahilí oketozo. Lá okako gigizani sogaloka nia vejená nenete gelemítave.

<sup>4</sup> Lá okako nasahilika nene asugunatoka minative. Amekaho nene asuguná oko aleaká noani netá ángoaká noinazo, nenemú meinaváa giminogó ive.

*Ómasiloka loakakumú apí okimimó*

*(Luk 11:2-4)*

<sup>5</sup> \* Lekeza Ómasiloka nilikima nene sozaló genezáini losigi vejenalítini suni alemilo. Keza nene monó numuíkú itó vejená kovogisaló vejenalite ángi lamaná itave líli otiki Ómasiloka iaká niave. Neza lamaná lo líkimitoze, gililo. Kegepoka iaká niamó nenémo keí meinaváini loló okago mota alego asú oaká noive.

<sup>6</sup> Geza Ómasiloka litove loko nookoma nene, numukagú iteoko gahe gekoko amekaho asugunatoka ángoaká noi veloka lozo. Lá okako nene, amekaho asuguná netá aleaká noani netá ángo asú oaká noi ve nenémo meinaváa giminogó ive.

<sup>7</sup> Lekeza nene Ómasiloka niliki nene lekegepatunú goha líiki goha líiki ikiko hána hána loló okiko ha gakó loló okatize. Monó gelema vejenalite Ómasiloka loloko vova vova nouko gele limitihe líli lá iaká niave.

<sup>8</sup> Lekeza keí suni alemilo. Ómasímó netá matakumú vitagá nouko nene litá oko voká lonamuko hanuva geleaká noive.

<sup>9</sup> Nenemú lekeza nene láa liki Ómasiloka lilo:

Okulumakú ametega, geí gugulizá etó oko minatize.

<sup>10</sup> Numutó namató geí gizapaló minoakalímíni zámuza utó o asú ino. Okulumakú géisi lanitó molanitó gelekelé igímiaká niave.

Mikasiuka lezaloka áminagó oko utó ino.

<sup>11</sup> Gamena gamena nosánetate lemezo.

<sup>12</sup> Leza ligivetegini lihima nekisáini ahulokimiaká nounimó nenéminoko lihimate ale minuháma nene ale ahuloletozo.

<sup>13</sup> Gimilegú moloakakú lelémó molamo.

Ve golesámitokatí akagá oletozo.

<sup>14</sup>\* Lekeza likigivetikini lihima ahulikitatamó nene, okulumakú ametipo nene áminagó oko lekelí lihimatini ale ahuleketanogo ive.

<sup>15</sup> Itó lekeza vegeñalitini lihima ali minatamó nene ámináminoko okulumakú ametipo nene lekelí lihimatini ale minanogo ive.

*Monokumule loko nosánetá moseaká gakó*

<sup>16</sup> Itó monokumule liki nosánetá mosi keké ita zupa nene monó gelemiki genezáini losigi vegeñalitini suni alemilo. Vegená makolite mosé oaká nouni suni ániigiiki legegoka litave liki kogoka kegepaló ániigiake muhelé ahelé iaká niave. Neza lamaná lo likimitoze, gililo. Vegenalite kegegoka liaká niamó nenémo meinaváini loló okago, mota alikago asú oaká noive.

<sup>17</sup> Géisi nene monokumule loko nosánetá nomoseko nene gotoka komu aleko ale lamaná okoko gogoka gegepa nagami zezo.

<sup>18</sup> Lá okako, vegená makolite nosánetá nomosenimó nene ániigi vevesamitave. Amekaho asugunatoka noi ve nenémo gilitize. Itó asugunatoka aleaká ani netá ániigoaká noi ve amekaho nene meinaváa giminogo ive.

*Okulumakú henoni*

*(Luk 12:33-34)*

<sup>19</sup>\* Mikasigú henoni nene gaupá geakalímíni itó gúnakonite hukiakalímíni, itó vegeñalite zivi letivi iki gumina oakalímíni nenazo, nenemú mikasiuka imane ali nupa nupa amilo.

<sup>20</sup> Lekeza okulumakú henoni nene gaupá gemoakalímíni gúnakonite hukamiakalímíni itó guminaló vete zivi letivi iki gumina alemoakalímíni nene ali nupa ilo.

<sup>21</sup> Gelenape. Henokanoka lamaná neti apatoka nene gigika neinogo ive.

*Lugupémini ló liví*

*(Luk 11:34-46)*

<sup>22</sup> Gogómula nene gugupémini ló liví neve. Gogómula nenémo mumuzó oakalímíni gapogú gelémo molamitímó nene, Ómasímíni lapaná nenémo gugupe gigika mukitoka hize hanato asú inogo ive.

<sup>23</sup> Itó gogómula nenémo gelémo golesa itímó nene, gigikaloka ámina oko límugusi ze minanogo ive. Gigikagú liví lonoimó nenémo lihatímó nene, límugusi zitimóza, sipisi haitolímíni zekiko nene gopa gapo veleko minanogo ane.

*Ómasímíni hozagi moni henonímíni hozagi*

*(Luk 16:13; 12:22-31)*

<sup>24</sup> Ve hámakolímó kugulizaki ve lositosini gelekelé ma oketaminogo ive. Maga ve agika amekoko maga ve gasó amitímó onoive. Makotó gímize lamaná okoko makó ániigo goselé itímó neve. Lekeza nene ámina iki Ómasímíni hozagi moni henonímíni hozagi lelegi oko aleakaláa nomive.

*Mulute iteaká gakó*

<sup>25</sup> Nenemú neza láa loko lo likimitoze, gililo. Lekeza miniki aliki itakumú nene nosánetá hikutí noko minatupe, itó ginegane nene hikutí ale akoloko minatupe liki mulutini itemino. Lekelisi ma liléna. Miniki aliki iaká nia netá nenémo netá gihila nehe, itó nosánetá nenémo netá gihila neve. Lukugupémo netá gihila nehe lukugupeló ginegane nenémo netá gihila neve. Minoko aleko oaká itó lugupe nenémo netá gihila nene.

<sup>26</sup> Lekeza veletó vogalaló nama nene ániigalo. Keza netá matá ma zuhá isá amave. Itó minumuni o molokago nosánetá nene numúikú ali nupa iki nisá amave. Lá onoimóza, okulumakú ametipo nosánetá gopa ale utó o kemeaká noive. Nenegú nana onoive. Namamate itiki niago lekelisi nene lemeko nouni liki nigelehe. Lá oko nomive. Lekeza itiki nianazo, netá matá vitagá nia netá nene hanuva ale utó mololeketanogo ive.

<sup>27</sup> Lelikelitúti makó éaho muluna noitiko minoko aleko ititó nene ezáa agata geleko miní ameko kilisimasi makó molomo iteko minative. Ma nomive.

<sup>28</sup> Itó gineganemú nene nanamú mulutini iteaká noive. Gihisigú palauá nenetini mogona gili vevesamahe. Netá nenémináate hoza alisá amave. Itó ginegane lamanatamanakó ali luhatakumú gó isá amave.

<sup>29</sup> \* Lá onoimóza, nenemú lo likimitoze, gililo. Gozapá agulizaki ve napa Salomó nene golivagí netá akoloaká imóza, gihisigú palauá nenete Salomoni agupeló netá nene aviligikave.

<sup>30</sup> Palauá nene itínasa utó oaká noive, itó gó lokago gululupasokago hukiki ló giziaká niave. Lá onoimóza, Ómasímo lokago, ámina palauá nenémo lá oko gonanalisi lamaná oaká noimó nenazo, nenemú lekeza komáisi gili alévolé inamó neneta, ginegane nene Ómasímo hanuva ale utó oleketanogo ive.

<sup>31</sup> Nenemú lekelisi nosáneta hikutí aleko noko moloko itupe, itó ginegane ale akalatu-nimó nene hikutí ale akalatupe liki mulutini itemino.

<sup>32</sup> Monó gelema vevená keza ámina netakumú kagata gululusi giliki vitagá iaká niave. Kei suni alemilo. Okulumakú ametipo nene ámina netá makó lekelitoka minamitimó nene lukugupe lamaná amitive loko geleneimóma nena.

<sup>33</sup> Lekeza ámina netakumukopa, Ómasímo gizapa vetini loló iti gapogú itó Ómasímini hee hee loko minoaká gapogú likigika lakagata goí iki miliko vo minino. Lá ikiko nene, lukugupémimi netaki nene hagitana lehizeleketanogo ive.

<sup>34</sup> Nenemú azo utó iti netakumú nene mulutini itemino. Azo utó iti netá nenémini genaváa azogó asú inogo ive.

## 7

### *Vegenalitini lihimamú gakó li hukikitamilo* (Luk 6:37-38,41-42)

<sup>1</sup> Lekeza vegenalitini lihimáinimú gakó li hukikitamilo. Ómasímo ámináminoko lekelí lihimamú gakó lo hukolikimikatize.

<sup>2</sup> \* Lekeza vegenalitini lihimáinimú li hukikita polosava lekelí lihimamú lo hukoleketanogo ive. Itó lekeza vegenalititoka iki miliki ita polosava ámináminoko Ómasímo lekelitoka oko moloko inogo ive.

<sup>3</sup> Nenemú geza gigivekahini agómula gú gilisá onoikoma ánikokoko gezaka gogómula gú za lana vonoimó nene nanamú ángo lamaná amane.

<sup>4</sup> Gezaka gogómula gú za lana vonoimó nene hanuva nego, gigivekahini nanamú gogómula gú gilisá vonoimó nene ale ahulogetatove loko nolane.

<sup>5</sup> Sozaló ve genezaka losi minamó neneka, gezaka gogómula gú za lana nemó nene goí oko ale ahulokoko alika geza ángo vevesooko nene gigivekahini agómula gú gilisá ale ahulotatanimó nene etanogo ive.

<sup>6</sup> Lekeza nene monolímimi gakó lamaná nene galagitana vevená li kememilo. Keza gopa viligiki akohú likipilikataze. Itó monolímimi meinava iteko mina gakó nene izagitana vevená li kememilo. Keza nene monotini gili ahuliiki likilími golesa ikataze.

### *Ómasiloka loko voká loaká gakó* (Luk 11:9-13)

<sup>7-8</sup> Voká liaká nia vegenalite netá matá mota aliaká niave. Vitagá iaká nia vegenalite gihila ali utó iaká niave. Gaheló hoko-hoko likago koló okimiaká noive. Lá onoinazo, Ómasiloka liki voká litamó nene alinigave. Vitagá itamó nene gihila ali utó inigave. Gaheló hoko-hoko nilikoma, gahe koló oleketanogo ive.

<sup>9</sup> Lelikelitúti ve makolímimi gípala nenémo nosánetakumú voká lokiko, amelaho gehani mula makó amitihe.

<sup>10</sup> Itó lagahamú voká lokiko gosihá amitihe. Óe, lá aminogo ive.

<sup>11</sup> Lekeza vevená golesa minikamóza, izegipatini gizapa lamaná ikitake netá lamaná ali kegepa iaká nianazo, okulumakú ametipo voká lita vevená nene aleko iteko haitolímimi nene netá lamaná lehizeleketanogo ive.

<sup>12</sup> \* Lekeza vegenalite némini manámimi lilí ilitatave liki giliaká niamó nene lekeza ámagó iki nenémini manámimi lilí ikitalo. Ámina gakó nenémo Mosé lo hukoko li gakoki Ómasímini agepagutí gakó liaká a vete apí ikimina gakoki nenémini gotoláa neve.

*Gateni komagú iteaká gakó**(Luk 13:24)*

<sup>13</sup> Latila oaká apalímíni gatenáa napa neve, itó gapováa sipisi neve, itó neneloka vejená mukilite viaká niave. Nenemú ámina gapogú vamiki okulumá gateni komagú itilo.

<sup>14</sup> Alévolé oko minoaká apalímíni gatenía koma neve, itó gapováa koma nego génopa hoza aleko iteakaláa nenazo, vejená lughakó viaká niave.

*Gihila golesa lamaná zeakalímíni mognóa**(Luk 6:43-44)*

<sup>15</sup> Soza saza monó lili ali ve keza kugupe zou lo minamó itó hela gala kigikagi nenémináate lekelitoka anititakumú, ehe, lukugupe gizapa iki minalo.

<sup>16</sup> Keza iki míliki ita sunímó mognonataganáini ale utó okiko ániagi vevesataze. Hilipa nenémó gihila noakalímíni zitimó nehe. Itó gomogisigú nene gihila noakalímíni zitimó nehe. Óe, nenéminoko nomíve.

<sup>17</sup> Za lamaná nenémó gihila lamanakó zeaká noive. Za golesa nenémó gihila golesagó zeaká noive.

<sup>18</sup> Za lamanalímó gihila golesa zeakaláa nomíve. Za golesámó gihila lamaná zeakaláa nomíve.

<sup>19</sup>\* Lá onoinazo, vejenalitini mognonatagana hamó lelegitó neve. Gihila lamaná ali utó amitamoláa hukoko lokú gizanogo ive.

<sup>20</sup>\* Nenemú soza saza monó lili ali vete iki míliki ita suni nenémó mognonataganáini ale utó okiko, lekeza nenémíni gihiláa nene ániagi vevesanigave.

*Lekelí ániago vevesonamuve**(Luk 13:25-27)*

<sup>21</sup> Guivahaníneve guivahaníneve líki liaká nia vejenakutí lugáa avasavagi okulumá apakú iteminigave. Aménehini gakó gili aliaká nia vejenakó nene itinigave.

<sup>22</sup> Gamena napaló nene vejená lugáate láa líki li niminigave: Guivahanitemaka, leza nene geí gakotó monó lo kemeaká uháma neve. Itó geí gakotó kigikagutí holosi kepeleko kimisele ahuluháma neve. Itó geí gakotó alévolé suni mukí aleháma neve. Nenemú gahe segeletamane.

<sup>23</sup>\* Líki li nimikiko, neza nene láa loko lo kimitove: Nénisi nene lekelí ániago vevesonamuve. Goleza netatokagó mihina amó neneta aló vilo loko linogo uve.

*Numuni lapusámini gakola**(Luk 6:47-49)*

<sup>24</sup> Nenemú gakóne imane giliiki ámegetata vejená nenémináate láa iki niave: Gele veveso mína ve makolímó numuna nene mikasi alévolelaló nené oko gekago,

<sup>25</sup> nego nene, golini napa zeake nagamí velekago itó una napa alekago, mikasi alévolelaló gimó nenazo, alévolé okogó minamó.

<sup>26</sup> Itó gakóne imane giliiki gili ahulata vejená nenémináate láa iki niave: Negi ve makolímó numuna nene nagamí agataloka getatoka gekago, nego,

<sup>27</sup> golini napa zeake nagamí napa vilitímó itó una napa alitímó ake ahelú okago, numunima lemeko pou loko akamó.

<sup>28</sup> Loko Izesú ámina gakó lo keme asú okago, ali nupa iki gakola gele vejená nene Izesú monó lo kimikumú sigaga litake láa líki lamó:

<sup>29</sup>\* Monó mogona apí ikimiaká nia vete nene avotegini gakotó amegesaló milatave likigó liaká niamóza, áisi nene ezáa gakola nene gihila noikumule loko amegesa milatató neve loko lainim-olimíaká noive, líki lamó.

**8***Izesú lokago halamé gizali ve gililimó**(Mak 1:40-45; Luk 5:12-16)*

<sup>1</sup> Izesú agokagutí nolimigo, ve vená mukí nene ámegetiki vamó.

<sup>2</sup> Nivago, ve makó halamé gizaleake mína ve nenémó víke alapusa hizeko Izesuni láa loko lo amimó: Guivahanínemaka, geza nelémó gililitove loko nene hanuva nelémó gililitanimó nenazo, nelémó gililitane loko noluve.

<sup>3</sup> Loko lokago nene, Izesú nene agizani lutoko agupeloka ale nogilike gililitane loko gelekuze, halamé nene gilelezo. Loko lokago halamé netala litá oko gililimó.

\* 7:19: Mat 3:10; Luk 3:9

\* 7:20: Mat 12:33

\* 7:23: Age 6:8

\* 7:29: Mak 1:22; Luk 4:32

4 \* Gilelekago, Izesú nene láa loko lo amimó: Geza nene imane gakó avetó oko vejená makó lo kememoko voko guguni gizoaká ve nene gugupe alapizekako mota gilelekane loko ángatize. Itó gilelenikumú nene Moseni gakotó ale moloko netá makó Ómasi guguni gizo amiti netá amekako gilelenitúmini mogona nene mukí vejená lo kemekiko gili vevesatave, loko lo amimó.

*Izesú ami gizapa vémini gelekelé veva alémo zokamó*  
(Luk 7:1-10)

5 Izesú nene Kapanao numutoka itekago, Loma apatotí ami vetini gizapa ve makolímo aniteake negénegeka loko láa loko lo amimó:

6 Guivahaníemaka, gelekelé izegipáne nene netá napa avisekago helisala hulupa lo minokago miluma geleko numukuka noize, makó vitíve loko noluve.

7 Loko lokago, Izesú nénisi vinake alémo zokatove loko lo amekago,

8 ami gizapa vémo láa loko limó: Guivahaníemaka, goselé gapo okoko ve ánéamina není numukú nanamú ititane. Geza nene imaneloka nooko hanuva gegepatunú lokako gelekelé izegipáne nene zokative.

9 Nénisi nene ámináminoko kugulizaki vetini gelekeleláa nouve. Itó lovámini gala ve makó není gizapaló niave. Lá niago, ve makokumú nene vozo loko lomikugo hanuva vinogo ive. Itó ve makokumú ano loko lomikugo nene hanuva anogo ive. Itó gelekelé izegipánemú nene voko hoza alezo litomó nene hanuva voko alitimó nenazo, geí gakó ámináminoko alévolé itive loko gelenouve. Nenemú nene geza hanuva imaneloka nooko gakoláa lokako zokatihe loko lunae.

10 Loko lokago, Izesú geleake nene sigaga lotake ámegetiki va vejená nene láa loko lo kimimó: Neza lamaná lo likimitoze, gililo. Hetoka ve imanémo nenikumú gele alévolé onoiomó nene haitolímuni neve. Isilae ve lekezalokatí gele alévolé oaká nenémuni makó ángokogeleá amumóma neve.

11 \* Nenemú nene láa loko lo nolukumuve. Ho noititokatí itó ho nolimitokatí hetoka vejená ve imanegitana nia vejená mukí nenete anitiki nene Avalahá Isaká Zakopó kezagi okulumalímuni lapanalaló alegesá iki miniki nosáneta níki kogoliza vizinígave.

12 \* Lá niiko, goí oko alesa molo kimimó Isilae vejená nene límugusi apakú ahulukimikiko, limiki miniki ive nama iki miluma maluma giliki kegepa atalá iki minanígave.

13 Loko loake, ami gizapa ve nene láa loko lo amimó: Geza nene numutoka vozo. Gele alévolé animó nenémuni gihila utó inogo ive. Loko Izesú agepa ateleko noligo nene, gelekelé izegipa nene zokamó.

*Izesú vejená mukí kelémo zokamó*  
(Mak 1:29-34; Luk 4:38-41)

14 Izesú nene Pitani numukú iteake, Pitani venalámini izolahini agupegú ló lokago, akonoigo ángoake,

15 agizakú alimó. Agizakú naligo, ló la netá nene asú omikago, oteake nasahilí otamó.

16 Lá okago, únaká ho lemekago nene, kigikagú holosi mína vejená nene Izesutoka kilímiki amó. Ikago nene, kivisi vejená kelémo zokoká kigika gopa i vejená gakó noloketake holosi kepeleko kimiseleká imó.

17 \* Lá okago nene, Ómasímuni agepagutí gakó loaká ve Isaiá gakó láa loko luhuva gizamó nene alévolé imó:

Netá livisekago keé lamuni netá ezáa agohí gimole.

*Izesuni ámegetanigi gele vejená*  
(Luk 9:57-62)

18 Lá okago, ve vená mukí iki Izesutoka hizi vigikago, ángoake izegipala zuha nene sipigú nilímiki vola helegaloka vitave loko lo kimimó.

19 Lo kemekago nene, monó mogona apí okemeaká ve makolímo voko amatoka minoake Izesuni láa loko lo amimó: Tisánemaka, vitanitoka vitanitoka neza gémege gémege inogo uve.

20 Loko lokago, Izesú nene láa loko lo amimó: Gaha nene mikási koló onoiúkú itiaká niave. Itó namatini numúini nemóza, okulumakutí lumu ve gihila neza akato numúne itó gotóneló za nomigo vitagá noumó nenazo, makó vitíve loko lanimó nenémuni mogona gele hee lominoko nolape, loko lo amimó.

21 Itó ámegetiki va vejenakutí makó nenémo láa loko lo amimó: Guivahaníemaka, geza gelekako nene, neza minoko améneho helekiko vinake gale zemikinake oko gémegetatove.

22 Loko lokago, Izesú nene láa loko lo amimó: Geza nene némegetoko ano. Hilínita vejená gale zikimiaká nene kigika heleneiti vejená kezagi ámina hoza alitave, loko limó.



*Izesú lokago una napa ahulamó**(Mak 4:35-41; Luk 8:22-25)*

- <sup>23</sup> Izesú izegipala zuhagi nagamikú lapegú itiake vamó.
- <sup>24</sup> Nivago nene, una napa nene litá oko amó. Amuza moloko alekago nene, nagamí nene valahuká zeko lapegú nene ite vai inogo imó. Lá okago, Izesú nene avó akonoigo,
- <sup>25</sup> izegipala zuhate alími noteke láa liki lamó: Guivahanitemaka, nagamikú simá nanogo nounize, lugutó vizemane.
- <sup>26</sup> Liki likago, Izesú láa loko lo kimimó: Lekelisi komáisí gili alévolé iaká niatita, nanamú likigika gologolo sekave. Loko loake, oteake, unagi nagamí valahukaki nene ahulalizo loko lo kemekago nene kii nolike zou limó.
- <sup>27</sup> Zou lokago nene, vejená mukí nenete sigaga lake láa liki lamó: Ve imane haitolímíni neve. Unagi nagamí valahukaki keza aí gacoláa gili alikasive, liki lamó.

*Gatala mikasiuka holosi golesa amisele ahulamó**(Mak 5:1-20; Luk 8:26-39)*

- <sup>28</sup> Nonohuló aviligiake vola helega Gatala vejenalitiní mikasigú anitikago, ve lositá holosi golesa kigikagú mina ve minasimó. Niasike, ámepe vizikasigo, vejená nene kelegesá legekago neneló vigá igá amamó.
- <sup>29</sup> Ámina ve nenetosa geha mulikú gonosi milimiligutí lemesike Izesugegi hotu lamó. Hotu liake keza litá iti gopaga liki láa liki gamoga giki li amesimó: Ómasímíni gipalamaka nana netá golesa oletanogo noane. Gamena alitamitó nene miluma hoza liminogo noape.
- <sup>30</sup> Liki lasimó nene áminaló iza mulusi napa miliki hotó otigí iki gale níki minamó.
- <sup>31</sup> Gale níki niago nene, holosi nenete negénegeka lake láa liki lamó: Limisele ahulanogo nookoma nene iza mulusi vozane kigikagú nene limisele ahulamane.
- <sup>32</sup> Liki likago, Izesú nene vilo loko kimiselekago, viki izatini kigikagú itiake nene lemémó. Izatini kigikagú nene limikago, ámina iza mukí nene olí miliake meiniló limiake nonohulukú limiki nagamí níki hutiake hili gesá amó.
- <sup>33</sup> Hili gesá ikago nene, iza gizapa ve nenete golisi viake taoniloka gakó nene liliki vake kigikagú holosi mina vetosini gacoláa aveté iki li kememó.
- <sup>34</sup> Li kimikago, ve vená mukí nene gili asú iake mukí vejenalite Izesuni ániगतune liki limiake mikasinini ahulokoko vitive liki negénegeka liki li amemó.

**9***Izesú ve gepili alémo zokamó**(Mak 2:1-12; Luk 5:17-26)*

- <sup>1</sup> Izesuge nene nagamikú lapegú itiake numunaloka goha atiginá iki amó.
- <sup>2</sup> Ikago nene, ve gepili makó nene ukoakogú nene zaló miliki aliki amó. Alike ikago, Izesú nene ezámú gili alévolé amó nenémíni mogonáa ániagoake ve gepilima láa loko lo amimó: Gipáneve, goha gena givisemino. Lihimaka nene ahulogimikuve.
- <sup>3</sup> Loko lokago, keza monó mogona apí ikimiaká a ve lugáa nenete kigikauka nene Ómasi aviligínogo nolihé liki gelemó.
- <sup>4</sup> Liki gilikago Izesú nene Zuta vejenalite lihima ahulolimiaká itó vejená kelémo zokoaká nene Ómasimogó loló oaká netá neve liki kigikagú gelemó nenémíni mogonatagana ániagoake láa loko lo kimimó: Likigikauka nene nanamú gakó golesa nigeleve.
- <sup>5</sup> Ve makolímó Ómasi noamitimó nene lihimaka gilatoximikuve loko vávani oko lamitimóza, ámináminoko kelémo zokoaká zámuzagi ve noamitimó nene ve gepili makó geza oteoko mohona oko vozo loko litá oko lo ameminogó ive.
- <sup>6</sup> Lá onolimóza, okulumakutí lumu ve gihíla nénisi nene imane mikasiuka lihima gilatoakalímíni zámuzaga itó vejená kelémo zokoakalímíni zámuzaga nenitoka nemó nenémíni mogonatagana ániagi vevesatave loko loake ve gepilima nene láa loko lo amimó: Oteoko nene avilisaka geheko numukauka vozo.
- <sup>7</sup> Loko lokago oteake avilisala geheko numunaloka vimó.
- <sup>8</sup> Geheko vokago, vejená mukí keza ániagiake kehelele vizekago, Ómasímíni zámuzaga nene mikasigú vejená kigizakú molokamó minokave liki giliake Ómasi agepoka lamó.

*Izesú Mataioni sele lo amimó**(Mak 2:13-17; Luk 5:27-32)*

- <sup>9</sup> Gamena nene zupa Izesú nene vike takisi moni aleaká ve není nugulizá Mataiona takisi moni aleaká numúnégú minokugo ániagoake láa loko lo nimimó: Geza nene némegetoko ano. Loko lo nemekago, ámegetoko vumó.

<sup>10</sup> \* Izesugegi neni numukú iteko minunike nosáneta noko minuhá. Lá nouko, takisi aliaká a vegi netá golesa aliaká a ve lugáagi mukí keza iteke mini mini ameke minake nosáneta namó.

<sup>11</sup> Ninago Palisaio monó ve nenete ángiake ametipo nana igo takisi aliaká ve sukagi netá golesa aliaká nia ve lugáagi makó minake nosáneta nonave, liki nene Izesuni izegipala zuha loká ilitamó.

<sup>12</sup> Li limikago nene, Izesú geleake láa loko limó: Keza kivisemigo ha minamoláate lusa vemú sele lisá amave. Kivisi vegenalitegó nene lusa vemú sele liaká nia ve.

<sup>13</sup> \* Itó lekeza nene monó gotoláu Ómasímo li gakó makó lá oko nemómámini mogonáa nene gili vevesiki gililo:

Neza nene guguni gizi nimitave loko gelesá amuve.

Likigika hizi kimiakakumú geleaká nouve.

Itó kugupeninimú hee loko nounge liki liaká nia vegená kelémo otopá zitove loko lememumó neve. Neza nene lihímáinigi vegená kelémo otopá zitove loko lumumóma nena, loko limó.

*Nosáneta moseakakumú loká itamó  
(Mak 2:18-22; Luk 5:33-39)*

<sup>14</sup> Gamena neneloka monó nagamí holokimiaká ve Zonini izegipala keza Ómasímo nosáneta mosekoko lelikumú litihe liki liaká a ve nenete Izesutoka viki alegesá iake láa liki loká itamó: Leza nene Palisaio monó vegenaki monokumule loko nosáneta nene mosé mosé oaká nounge. Itó geí izegipaka zuhá keza mosísá amave. Nanamú neve.

<sup>15</sup> Liki likago nene, Izesú láa loko lo kimimó: Ve makolímo agivelagegi makó kogoliza viziki minata zupa nene agivelage aikumú miluma giliiki nosáneta mositahe. Lá oko nomive. Minoko gala vete ámina ve nene kigizakutí ipá iki apili hilikiko nene, keza miluma giliiki nosá netá mosinigave. Ámináminiki izegipáne zuhate alika nenikumú miluma giliiki mosí mosí itamóza, itína lá oko nomive.

<sup>16</sup> Makó nene lavolavo gó nene litaha lokoko hukokiko nene, lavolavo gosohá nene nagamí ziki ali koma ama lavolavo nene hukoko ale litaha lavolavoló molo apizeko akotoakaláa nomive. Akotiiki nagamí zikiko nene gosohá lavolavo nenémo litaha lavolavolotí hikelekiko litaha gó nene hukoloko voko huko napa inogo ive.

<sup>17</sup> Itó makó nene vain nagamí gituhú galakalá noigo nagamí getununi lithagú ligi milísá amave. Vain nagamí nenémo gituhú galakalá nooko giputooko litaha getununi zeko ategékiko vain nagamiki itó goni getununi nene latila okative liki vain nagamí gosohá nene goni getununi gosohakú leke moloaká nounge. Lá okuko getununi vain nagamiki lamaná oko minanogo ive. Loko limó nene litaha monó sunímíni amupiló nene ezáa gosohá monó molo apizeakaláa nomive loko nosáneta moseakakumú anoza gakó lo kimimó.

*Gizapa vémini moholagi Izesuni gotó ale gili venaki  
(Mak 5:21-43; Luk 8:40-56)*

<sup>18</sup> Izesú nene gakó lo kemeko noigo nene, monó gizapa ve makolímo oko gupá ze amike láa loko limó: Neni mohóne nene itína mota helekaze, nenemú nene voko gigizanitunú ale geleko nónohá zemikoko alémo otitane loko gelémoko vitove loko nouve.

<sup>19</sup> Loko lo amekago, Izesú nene oteake izegipala zuha lezagi nene ámegetoko vunimó.

<sup>20</sup> Novuko nene, vená makó nene ikanímó apelekago númase gapo molova molova oko noigo kilisimasi 12-a ale ahulamó.

<sup>21</sup> Eza nene agikatunú láa loko gilimó: Neza nene voko Izesuni agupeló ahe itó hanuva luhoaká gotó ale gelekinake zokatove.

<sup>22</sup> Loko geleake Izesuni amegesaló oko noike luhoaká gó agataloka ale gelekago, Izesú nene viligoko láa loko limó: Mohó geza goha gena givisemino. Gele alévolé anitímó gelémo zokokave, loko nene lo amimó. Loko agata ateleko noligo litá oko zokamó.

<sup>23</sup> Lá okago, Izesú nene vike monó gizapa vemámíni numukú iteko ángíamó nene, musikí ziaká a ve alegesá iki niago ive nama nenémo notoloni lemeko minamó.

<sup>24</sup> Nego, Izesú nene itike alémo otitove loko geleneike láa loko limó: Ahuliiki vilo. Imane mohó nene helemive. Hanuva avó akonoive. Loko lokago nene, keza nene giza gakó lihe liki giza itamó.

<sup>25</sup> Giza nitago nene, kimisele hetoka oake, mohóma ako mina holomaloka nene vimó. Vo alí loake agizató ale notigo mohó nene otimó.

<sup>26</sup> Otekago, nenémíni gakola nene mikasi nekisa vokisauka vo asú imó.

*Izesú ve losítá kogómula ale golutoketamó*

<sup>27</sup> Lá okago, Izesú nene ámina numuni apá ahuloake novigo, kogómula lika ve lositá nene ámegetiki vasimó. Ámegetiki nivasike nene gamoga giki sele liki agulizaki ve napa Tevitini agávolagataka lelikumú milumavate geleetamane.

<sup>28</sup> Liki likasigo, voko numukú itekago nene, ámina ve lositá viki amatoka minikasigo nene, Izesú loká oketake láa loko limó: Lokogómula ale goloutato zámua nenitoka nemó nene mota gili alévolé inasihe. Loko loká okimikago keza láa liki lasimó: Guivahanitemaka, mota gele alévolé omousimole.

<sup>29</sup> Liki likasigo Izesú nene kogómulaló ale nogilike láa loko limó: Gili alévolé asitúmini gihila nene utó ino.

<sup>30</sup> Loko lokago, kogómula goloutokago, Izesú nene láa loko lo kimimó: Gilinasihe. Lá oleketu netakumú viki vejená li pou lamilizo.

<sup>31</sup> Loko lokago gakó nene gililiki vasimóza, ámina gakoláa li pou likasigo, mikasi nekisa vokisauka nene puu loko vo asú imó.

### *Izesú agepa lakolí i ve alémo aká imó*

<sup>32</sup> Itó nivasigo nene, ve makó holosi makolímo agepa ze lakolí okago mina ve nene zaló miliki alikamó.

<sup>33</sup> Alike ikago, Izesú nene holosi apeleko amiseleko ale ahulamó. Alahulokago, litá oko gakó limó. Ámina netá nene vejená mukilite ániigiake sigaga lake Isilae mikasigú gozapá netá némináa makó utó igo ániagamuháma neve.

<sup>34</sup> \* Liki lamóza, Palisaio monó ve keza Izesukumú nene holositini agulizaki ve nenémo alémo vatí igo holosi nene kepeleko kimiseleaká noive, liki lamó.

### *Izesú vejená mukikumú agika hizimó*

<sup>35</sup> \* Lá ikago Izesú nene numutó namató mohona ike apá koma napa nene ániigo asú imó. Ániigo asú ike, monó numuni minakú minakú nene monó lo keme keme oko minamó. Lá ike nene, Ómasímini gizapaló minoakalímini gakó lamaná nene lo utó moloko lo kemeko mohona imó. Itó haitopaitó netá gizale vejená itó haitopaitó netá kivisi vejená kelémo zokomo vimó.

<sup>36</sup> \* Lá oake vejená mukí ániagamó nene muhelé ahelé ake gopa iki minamó. Sipsip iza gizapa venini nomigo hanuva minamó nenéminiki minikago, Izesú ániigoake agika hizekago <sup>37</sup> izegipala zuhama anoza gakó makó láa loko lo limimó: Vejená imane latila ikataze. Mikú nosánetá mukí omolokamóza, hoza aleaká ve nene lagasó minokunize.

<sup>38</sup> \* Nenemú lekeza mini amelahitoka likiko nene hozaló ve makó kimiselekiko viki hozavagú minumuni alitaze, loko limó.

## 10

### *Izesú ve 12-a kelémo etó imó*

(Mak 3:13-19; Luk 6:12-16)

<sup>1</sup> Izesuni izegipala zuha 12-a alesa molo lemekago, okuko nene, kigikagú holosi minatamó kipiliki kimisilitave loko itó haitopaitó netá gizalinita vejená itó haitopaitó netá kivisiti vejená kilími zokatave loko zámua nene limimó.

<sup>2</sup> Aposolo 12 leza lugulizate nene makó agulizá Saimon agulizá gosohá nene Pitá, itó agunala Etulú, itó Zepetaioni gipala Zemusi itó agunala Zoní,

<sup>3</sup> itó Pilipó, itó Patolomaió, Itó Tomasí, itó Mataiona neza takisi moni aleaká u ve nene, itó Alapaioni gipala Zemusi itó Tataiô,

<sup>4</sup> itó Saimoná eza Lomagatí gamani amisele ahulanogo i ve, itó Kaliotó apakutí Izesuni amimika li ve Zutá.

### *Izegipala zuha 12-a keza monó hozaló vamó*

(Mak 6:7-13; Luk 9:1-6)

<sup>5</sup> Ámina ve 12-a nene nolimisilike hoza gakó láa loko lo limimó: Lekeza nene hetoka vetini mikasigú itó Samalia vejenalítini apá makotoka ma vamilo.

<sup>6</sup> Isilae vejená lugáagutí sipsip iza vi tolova amó keitokagó nene viki ániigalo.

<sup>7</sup> \* Niviki monó nene láa liki nene lilo: Ómasímini agulizaki ve napámini zámua nene omo lokovogisaloka okave.

\* 9:34: Mat 10:25, 12:24; Mak 3:22; Luk 11:15 \* 9:35: Mat 4:23; Mak 1:39; Luk 4:44 \* 9:36: Nam 27:17; 1 Kug 22:17; 2 Iki 18:16; Izi 34:5; Zak 10:2; Mak 6:34 \* 9:38: Luk 10:2 \* 10:7: Luk 10:4-12

<sup>8</sup> Nenemú kivisimoláa kilími zokataze, itó helemoláa nene kilími otitaze, itó halamé gizalemoláa kilími gililitaze, itó kigikagú holosi golesa minatamó nene kipiliki kimisili ahulataze. Meinaváa nomimó hagitana lehizeleketumó nenazo, nenemú meinaváa nomitimó hanuva kilími lamaná ilo. Itó moni koma lagasoláagi ma gúiki alemilo, keké.

<sup>9-10</sup> \* Gapo vitatoka akiseaká gó aliki vamilo. Itó gó lositá nene luhamilo. Itó likigisalo suú nene luhamilo. Itó hánusaló nene alemiki hanuvagó vilo. Vegená makolilitoka hoza alita ve nenete ámina vegealitinigutí nosánetá aliki niki minatamó nene lamaná itive.

<sup>11</sup> Itó apá nenelokahe nenelokahe viki anitiiki nene ganá nene apá amelagini loká iki mogonáinimú gililo. Makolímimi mogona lamaná itimó nene, aí numukú itiki miniki nene ámina numukukó akiliki viki otiki vitaze.

<sup>12</sup> Itó numukú itiki niminiki nene hulu nene lekelitoka minino liki li kimilo.

<sup>13</sup> Numuni amelage kilími milikikoma, miniki ámina gakó li kiminamó nenémini gihiláa utó itimóma neve. Itó minikiko mogonáini lamaná amikoma nene, hulu gakolímimi gihiláa nene goha atiginá oko lekelitoka anogo ive.

<sup>14</sup> \* Itó apá makokú kilími lamaná iki gakotini gelemikoma nene lekemegeza vizi kimiiki niviki nene vahé miliki likigisagutí mumusopa usagamá zi ahuliki vilo.

<sup>15</sup> \* Neza lamaná lo likimitoze, gililo. Gamena napaló nene Soto apakú itó Gomola apakú mina vegeaná keza lihima koma alinigave. Itó kilími lamaná amíta vegeaná nene lihima napa itiki alinigave.

*Gopoguni mililitata gamena utó inogo ive*  
(Mak 13:9-13; Luk 12:12-17)

<sup>16</sup> \* Gilinahe. Sipsip izagítana nene hela galatini holúikú geha ziki minatave loko nolikimisuluve. Nenemú lekelisi nene gili guni i miniki hulu iki minalo.

<sup>17</sup> \* Keza nene likigizató aliki gonitó kilílmiki vinigave. Itó monó numúikú numúikú nene segi nogosani likipilinigave. Ehe, lekeza gizapa alévolé iki minalo.

<sup>18</sup> Itó není nugulizá lekelitoka minakumule liki kugulizaki vetini itó kiapegini kovogisalo kilílmiki vikiko nene gakó hoza alilikitanigave. Lá niko nene, lekeza kei kovogisalo itó hetoka vetini kovogisalo není monó li utó itave.

<sup>19</sup> Není gakónemule liki gonitó kilílmiki vita gamena nene, gakó nanave loko litupe itó gakó nana oko geleko litupe liki lakagata giliko gena amino. Gamena nene zupa nene gakó litave loko Sikalahú nenémo likigikagú mololeketanogo ive.

<sup>20</sup> Lá okiko, gakó likiko nene, lekelí gakó loló aminogo ive. Ametipini Sikalahú nenémo likigikagú gakó lo nomiliko linigave.

<sup>21</sup> \* Itó uvolaho makó nenémo agunala nene agizató alekoko goní omikiko nene agunalama apili hilinigave. Itó amelaho nene gipala nene agizató alekoko goní omikiko nene gipalama apili hilinigave. Itó izegipáini keza izóikini améikini nene goní ikimikiko izóikini améikini kipili hilinigave.

<sup>22</sup> \* Itó vegeaná mukilite není nugulizá lekelitoka minakumule liki mukahá likipilinigi niamóza, makó keza gamenaváini asú ititó monó ahulamiki alévolé iki miniliki vitamó nene Ómasímo kugutó vizinogo ive.

<sup>23</sup> Itó apá makotoka gopoguni mililitatikoma, golisi iiki apá makotoka nene vilo. Neza lamaná lo likimitoze, gililo. Lekeza monó hozaló Ísilae mikasiuka mukí apató vi asú amiko okulumakutí lumu ve gihila neza litá oko anitinogo uve.

<sup>24</sup> \* Sukulu izegipa nenémo tísala avilegeakaláa nomive. Gelekelé izegipa nenémo agulizaki veva nene avilegeakaláa nomive.

<sup>25</sup> \* Lá onoinazo, sukulu izegipa oko moloko itimó nenémo tísalamini lelegitó onoikoma etanogo ive. Itó gelekelé izegipa oko moloko itimó nenémo agulizaki vevámini lelegitó onoikoma etanogo ive. Ámináminoko ametipina nenikumú holositini gizapa ve Pelezepulole liki linamó nenazo, izegipa nugunamotamó neneta, lekelí lukugulizá aliki mumusopa ziliki viki minanigave.

*Lehelele viziti ve lelepizimó*  
(Luk 12:2-7)

<sup>26</sup> \* Nenemú gopoguni mililitata vegeanakumú lekelegesá legemino. Hitonoiti netá matá nenémo minoko tolova aminogo ive. Minoko utó o asú ititó neve. Itó asuguná ne netá nenémo minoko tolova aminogo ive.

\* 10:9-10: 1 Koli 9:14; 1 Tim 5:18 \* 10:14: Apo 13:51 \* 10:15: Mat 11:24; Api 19:24-28 \* 10:16: Luk 10:3  
\* 10:17: Luk 21:12-15 \* 10:21: Luk 21:16 \* 10:22: Mat 24:9; Luk 21:17; Mat 24:13 \* 10:24: Luk 6:40; Zon  
13:16, 15:20 \* 10:25: Mat 9:34, 12:24; Mak 3:22; Luk 11:15 \* 10:26: Mak 4:22; Luk 8:17

<sup>27</sup> Neza nene límugusigú legesó oko lo lukumu gakó nene lekelisi miniki hanató li utó itaze. Itó lakagatauka musika loko lo lukumu gakó nene lekelisi miniki numuni hetotí gakó napagutí li utó iki litaze.

<sup>28</sup> Vegená makolite lukugupegó nene apili hilinigave. Lekemeni apili hiliaká zámuzza keitoka nominazo, keikumú nene lekelegesá legemino. Itó lekemeni nemó itó lukugupe nemó ale nupa napa oko ló apakú apele heleaká zámuzagi ve Ómasimú nene lekelegesá ligino.

<sup>29</sup> Somohá nene ha netá neve. Itó golohá monitunú nene nama somohá lositá meina hizeakaláa nemóza, ametípo gelemikoma nama somohá hamokó nene nene mikasigú lememinogó ive.

<sup>30</sup> Lekelí gototini zopovatini gatoakaláa nene Ómasímó gele asú oko geleneive.

<sup>31</sup> Lekeza nene nama somohá niamave. Lekelisi nene vegená nianazo, itó Ómasímó gizapa olikimiaká noinazo, nenemú lekelisi nene netá makokumú ma lekelegesá legemino.

*Izesuni agulizá lo utó oaká gakó*

*(Luk 12:8-9)*

<sup>32</sup> Vegenalitini kovogisalo není nugulizá li utó iki nilími napa ita vegená nene neza ámina oko okulumakú aménehini avogisalo kelémo napa oko litomóza,

<sup>33</sup> \* vegenalitini kovogisalo nenikumú zivi hitivi ita vegená nene neza ámináminoko okulumakú aménehini avogisalo keikumú zevo hitovo inogó uve.

*Nonagaki lovagi ale utó itove loko limi gakó*

*(Luk 12:51-53; 14:26-27)*

<sup>34</sup> Nenikumú nene mikasiuka nonagá ale utó inogó limimóma neve liki lamilo. Neza nene nonagakigó nomive. Lovagi ale utó itove loko lumumóma neve.

<sup>35</sup> \* Neza lumumómámini gihila nene amelahiko gipalago lovaleta lavaleta iki kogoka hotó itimó neve. Itó izolahiko moholago lovaleta lavaleta iki kogoka hotó itimó neve. Itó anohúvolahiko avolahiko lovaleta iki kogoka hotopotó itimó neve.

<sup>36</sup> Itó lekelí numutikú lekelí zuhate gala velini lílí inigave.

<sup>37</sup> Itó lekeza izotikini ametikiniloka likigika kimiiki itó nenitoka koma nimitamó nene, není mututoni minata avotigila iki niamave. Itó izegipatiniloka likigika kimiiki itó nenitoka koma nimitamó nene, není mututoni minata avotigila iki niamave.

<sup>38</sup> \* Itó zohota zaló kipili hilinigi míluma netá ali gihikitatakumú gili ahuliiki nigizaka hiziki némegetiki amitamó nene není mututoni minaminigave.

<sup>39</sup> \* Itó makó keza nene kigika kemeníni ale gikitiiki ali minatamó nene, miniki gopa itamó neve. Makó keza nenikumule liki kigika kemeni vinasatamó nene alévolé kemeta-meni alinigave.

*Meinaváa alesá gakó*

*(Mak 9:41)*

<sup>40</sup> \* Vegená makó keza lekelí nasahilí ilikitatamó nene není nasahilí inimiaká niamó gelekave. Itó nasahilí initatamó nene nimisili vema nasahilí imiaká niamó gelekave.

<sup>41</sup> Vegená makó keza monó lole ale ve noikumule liki monó lole ale ve makó nasahilí itatamómámini meinaváa alinigave. Itó vegená makó nenete monolagi ve noikumule liki monolagi ve makó alími lamaná iki nasahilí itatamó nene, nenémíni meinaváa alinigave.

<sup>42</sup> Neza lamaná lo likimitoze, gililo. Lekeza nene není vegenáne zuhagutí makó limiki minatamoki keikutí makó nene není gipa noikumule liki gosohá nagamí ihiki amitamó nene, haha aminogó ive. Meinaváa alitamó neve.

## 11

*Zoní ve lositá kimiseleleago Izesutoka vasimó*

*(Luk 7:18-33)*

<sup>1</sup> Izesú nene izegipala zuha 12-a nene ámina gakó lo leme asú oake, leza voko minuhá numutó numutó monó lo kemeko apí okimínogó vimó.

<sup>2</sup> Lá okago, monó nagamí holokimiaká ve Zoní nene nagá numukú noike netá golesagutí gologí olimiaká ve Kilistó ave loko loaká nouni vémo hoza alimó nenémíni gakoláa geleake, izegipala zuha losi nene kimiseleleago Izesú noitoka vasike láa liki loká itasimó:

<sup>3</sup> Utó itive liki monó gotolau luhuva gizina vema nene géisi noape, itó alika makó utó itikumú ageva itunimó nehe, liki loká itasimó.

\* 10:33: 2 Tim 2:12 \* 10:35: Mik 7:6 \* 10:38: Mat 16:24; Mak 8:34; Luk 9:23 \* 10:39: Mat 16:25; Mak 8:35; Luk 9:24, 17:33; Zon 12:25 \* 10:40: Luk 10:16; Zon 13:20; Mak 9:37; Luk 9:48

<sup>4</sup> Loká itasigo, Izesú nene ámina vema noive loko Zoní gilitive loko láa loko lo kimimó: Lekeza nene atiginá iki viki nene loló nou netá matá imane nánigasimó nenémimi gakoláa avetó iki Zonini lí amilizo.

<sup>5</sup>\* Kogómula lilikupá molamó nene kogómula ale hanatokimiaká noive. Itó kígisaló alimó nene kígisa ale lamaná okimiaká noive. Itó halamé gizalemó nene kelémo gileleaká noive. Itó kagata molamó nene kagata ale koló okago gakó giliaká noive. Lepa gonosi nene kelémo oteaká noive. Itó limiki minamó ámemena nenete gakó lamaná nene giliaká niave.

<sup>6</sup> Lá onoinazo, není mogonomú kagata losi pasi gelemitamó nenete kogoliza viziki minanigave.

<sup>7</sup> Loko lokago, Zonini izegipala zuhama atiginá iki nivasigo, Izesú eza vejenala sii sii liki minamoláa nene Zonikumú láa loko lo kimimó: Lekeza nene mikasi gomopalaló nanámimi o mína ve ániganigi vamóma neve. Zoní nene hepelimó gihinahisi ale volaloka imaloka imómámimi noigo ániganigi vamóma nehe.

<sup>8</sup> Itó eza gola gonanalivagi luhoake noigo ániganigi vamóma nehe. Óe. Gó luhuvagi luhiaká nia ve nene kugulizaki vetini numukú akiki otiki iaká niave.

<sup>9</sup> Zoní nene Ómasímimi agepagutí gakó loaká ve noigo ániganigi vamó nehe, olo. Neza lo likimitoze, gililo. Lekeza nene ániigi mina vema nene Ómasímimi agepagutí gakó loaká ve lugáagitana minamimó neve. Eza haitolímimi okave.

<sup>10</sup>\* Monó gotolaú Ómasímimo lí gakó makó láa liki gizinamóma neve: Gililo. Neza nene gakó lole ale ve makó amiselekugo áisi voko ale goí oko kígikagú hoza aleko gapo vevegetanogo ive.

Ámina gakó nene Zonitoka voko alimó neve.

<sup>11</sup> Itó neza lamaná lo likimitoze, gililo. Mikasiuka utó ina vejenakutí makolímimo monó nagamí holokimiaká ve Zonini nene ma avilegesá amimóza, Ómasímimi gizapaló limiki niamolategi gopa Zonini aviligítigi iki niave.

<sup>12</sup>\* Zoní nene monó nagamí holokimiaká i gamenlotí minoloko iteko okulumalímimi gapo nene utó o lamaná oko utó noigo, vejená mukilite amuza miliki lovasava iki okulumalímimi lapanala ali lá iaká niave.

<sup>13</sup> Zoní velesá utó amigo Ómasímimi agepagutí gakó liaká a vegi Moseki keza mukitoka alika utó iti netakumú epoapoga liki Ómasímimo agulizaki ve napa alemó utó iti gakó liliki vamó.

<sup>14</sup>\* Itó gilitune liki nilikoma makó lo likimitoze, gililo: Ve makó Ómasímimi agepagutí gakó loaká ve Ilaizakitana ative liki lina ve nene Zoní noave.

<sup>15</sup> Lá onoinazo, lekeza lakagatagi minatamó neneta ámina gakó lonoumó nene gili vevesiki gililo.

<sup>16</sup> Oko moloko oaká nou netá ánigina vejená nene nanetató lo moloko nolugo vo guni itive. Keza gili goselé iaká nia izegipagitana niave. Izegipa keza alegesá apató niake kígivéikini nene sele liki láa liki lí kimiaká niave:

<sup>17</sup> Leza nama luható nene nanamú lisá amave. Itó helegaloka ive nama uható nene nanamú ive nama isá amave, líki liaká niave.

<sup>18</sup> Ámináminoko Zoní nene hozava apí oake nene nosánetá lamaná namike vain nagamí namike etó oko minamó. Etó oko noigo ániigiake holosi makolímimo agika ale gopa okago noihe, líki nene lamó.

<sup>19</sup> Itó helegaloka neza okulumakutí lumu ve gihila okuke iza goula zahí nagamí nosánetá lamaná nonugo, ániigiake láa líki nilave: Ve imane nene ánigalo. Áisi nene gasova ve itó nagamitó ve noihe takisi aleaká vegi itó netá golesa aliaká nia ve lugáatini zogonini noive, líki liaká niave. Lá onimóza, Ómasímimo gele guni oko netá matá aleaká noimó nenémimi gihiláa utó okago, vevesokogó minoaká noimó nenémimi mogonáa nene utó oaká noive, loko limó.

*Kígika ali viligama vejenalite miluma sipisi gilinigave.*

*(Luk 10:13-15)*

<sup>20</sup> Izesú apá lugáaloka nene hoza aleloko vike alévolé suni haitolímimi mukí ale utó imó. Ale utó okago ánigamóza, ániigi hagele gele iake kígika ali viligamago, gahá kemeko láa loko nene limó:

<sup>21</sup>\* Agae, Kolazina amelagita. Agae, Petesaita amelagita. Lekelitoka nene golivagi netá utó inogo ive. Golesa netá aliki minakumú nene Tulo apá itó Sitona apá gozapá tui loko vimóza, alévolé suni lekelitoka alumó nene ámina apá lositatoka utó imó nelina, keza nene

\* 11:5: Isa 35:5-6, 61:1 \* 11:10: Mal 3:1 \* 11:12: Luk 16:16 \* 11:14: Mal 4:5; Mat 17:10-13; Mak 9:11-13

\* 11:21: Isa 23:1-18; Izi 26:1-28:26; Zoe 3:4-8; Emo 1:9-10; Zak 9:2-4

gozapá miluma giliki kigika ali viligamó nenémini mogonáa ali utó iki ginegane línaha luhiake lánehá nene kugupeló hiliki hanuva minaline.

<sup>22</sup> Nenemú lo likimitoze, gililo. Tulo apató itó Sitona apató vejená keza gamena napaló nene lihima koma alitamóza, lekelisi nene lihima napa alinígave.

<sup>23</sup> \* Itó Kapanao amelagita lekeza lukugulizá nene okulumakú ititive liki ali otiaká niahe. Nenéminoko nomive. Lokú lekehelú inogo ive. Alévolé suni lekelitoka ale utó umó nene Soto apakú utó imó nelina, kigika ali viligikago ámina apá nene tui loko vamiline. Imane gamenaló nene hanuva minalinamó neve.

<sup>24</sup> \* Nenemú lo likimitoze, gililo. Lihima kimiti gamenaló nene Soto apatoka nene lihima lagasó keitoka utó inogo ive. Itó lekelí nene ale nupa okoko genavaló geheleketanogo ive, loko limó.

*Nenitoka atamó nene lekelémo geha zinogo uve*  
(Luk 10:21-22)

<sup>25</sup> Gamena nene zupa Izesú gakó láa loko nene limó: Aménege, geza okulumakú mikasigi keí Guivahani géisi nene noane. Sukulu lunike gele vevesokune liki liaká nia vejená keza monoka giliiki gili guni ikatave loko ale halá geko molokimikanike nene sukulu lamake izegipa namunigítana iki mina vejenalítini kigikagú molokimiaká noane. Lá oaká noanikumú gegepoka noluve.

<sup>26</sup> Aménege, nenéminoko utó oloko vitive loko gelenanimó nene etoaká noive.

<sup>27</sup> \* Loko loake, miní ameko láa loko limó: Améneho netá matá mukí nene nigizakú molo asú okave. Lá onoimóza, Ómasímini gipalámina mogona gili vevesina vejená ma niamave. Améneho hamokó geleneive. Itó aménehini mogona nene ve makolite gili vevesamave. Gipala noutímína itó nezáne lo utó oko lo kemekugo ánihi hehe litave loko gilito vejená niamoláa lezategó aménehini mogona gelenoune.

<sup>28</sup> Goselekaselé iki muhelé ahelé iki nia vejená itó haitopaitó netalímo gena likiviseaká noi vejenalita mukitoka nenitoka imi asú iki alo. Lekelémo geha zinogo uve.

<sup>29</sup> \* Neza nene zou loko nove. Itó nigika lamanaki nove. Ikiko nene nigínaloka hévetú nemó nene mololeketatoze. Mololikimikugo nene nenitokatí gakó lamaná gilitaze. Itó lekemenitini nene avasú vizeko mino lamaná oko minatize.

<sup>30</sup> Není nigínaloka hévetú nemó nene huluváa lamaná neve. Itó genavagi nomive, loko limó.

## 12

*Holisigú Izesuni vejenala zuhate kilé hisiki nimi vamó*  
(Mak 2:23-28; Luk 6:1-5)

<sup>1</sup> \* Gamena nene zupa holisi makokú Izesú ale goí igo izegipala zuha leza kilé mikú mohona oko vunimó. Novunike nene, izegipala leza gaúna helekunike kilé akutokunike gihiláa hiseko nomo novuko nene,

<sup>2</sup> Palisaio monó ve keza ánihiake gili golesa ake Izesuni nene láa liki li amemó: Ánigozo. Izegipakamate netá nalemó nenémo nene golesa okave. Lelí holisigú hoza nalemó nene lá amoakalímíni ikave.

<sup>3</sup> \* Liki likago, Ómasímo vejenala zuhate netakumú vitagá niko ezáa lo huka gakó nene hanuva molo gaheva itimó neve liki gilitave loko láa loko lo kimimó: Gozapá agulizaki ve napatipo Tevití nene vejenala zuhagi nosánetakumú gaúna hiliake netá makó alemó nenémini gakola monó gotolaú luhuva gizikago lekeza gatinamóza, mogonáa gilisá amahe.

<sup>4</sup> \* Tevití eza nene Ómasímini monó numukú itekago guguni gizoaká ve napámo Ómasímini avogisaló mila peleti nene amekago namóma neve. Itó vejenala kezagi namóma neve. Itó ámina peleti nene hanuva vejenalite namitave liki guguni giziaká vetegó natave liki monó gotolaú li hukinamóma neve.

<sup>5</sup> \* Itó Mosé nene guguni giziaká ve keza holisigú nene monó zagusaveú hoza aliki niake nene holisimú li hukina gakó nene avutá apiliaká niamóza, áminámo lihima keitoka minosá amive loko luhuva gizonaimóza, nene gatiki gilisá amahe.

<sup>6</sup> Nénisi nene lo likimitoze, gililo. Likigilikagú noutímína nene monó zagusave avilegeko nene nove.

<sup>7</sup> \* Itó monó gotolaú Ómasímo li gakó makó lá oko neve: Neza nene guguni gizi nimitave loko gelesá amuve. Likigika hízi kimiakakumú geleaká nove. Lekeza nene ámina

\* 11:23: Isa 14:13-15; Apí 19:24-28 \* 11:24: Mat 10:15; Luk 10:12 \* 11:27: Zon 3:35, Zon 1:18, 10:15 \* 11:29: Zel 6:16 \* 12:1: Gapo 23:25 \* 12:3: 1 Sam 21:1-6 \* 12:4: Liv 24:9 \* 12:5: Nam 28:9-10 \* 12:7: Hos 6:6; Mat 9:13

gakolímíni mogona gelelina nene, lekeza lihimaváini nomiti vegenalitíni lihimáinimú gako hoza alikitamaline.

<sup>8</sup> Okulumakutí lumu ve gihila neza nene holisi amelahina nounazo, izegipáne zuhate holisigú líli ita netá nene není netá neve.

*Agizani nakeseta ve  
(Mak 3:1-6; Luk 6:6-11)*

<sup>9</sup> Láa loake, nenelotí oteake vike monó numuni makokú nene itimó.

<sup>10</sup> Itimó nene ve makó agizani lugaloka nakeseta ve noigo, ve lugáa keza Izesuni loká itake lelí holisigú nene vegená kelémo zokoakaláa nene nehe nomive, líki nene lamóza, hanuva nene Izesuni imane nana gakotó ale moloko lokinake goní otatune líki, gimivagú milíki nene lamó.

<sup>11</sup> \* Lá iki gimivagú milikago, Izesú nene kigikagú emane ánego vevesoko ángoake láa loko limó: Lekelikutí makó nenémo nene sipsip iza akaleváa makó nene holisigú nene gale hánagú velehé limitimó nene, holisimagule lokoko ahulokiko áminagú minatimó nehe. Óve, ale gelelehá oko ale veletoka alahulatimó neve.

<sup>12</sup> Lá itimóza, sipsip nene ha netá neve. Itó vegená lélisi nene netá gihiláa nounge. Nenemú holisigú nene vegená kelémo lamaná oakaláa nene neve.

<sup>13</sup> Loko loake ámina ve nene gigizani lutozo loko lokago, agizani lugaloka nene lutokago, agizani magáa minamómámini oko goha lamaná imó.

<sup>14</sup> Lamaná okago nene, Palisaio monó vegená keza ámina netá ánimámó. Ánigiake limíki viake Izesuni nene nana inake apele hilitune líki lova gizamó.

*Ómasímo gelekelé izegipala Izesuni alémo etó imó*

<sup>15</sup> Lá okago, Izesú ámina gako geleake nene, numuni apá ahuloake apá makotoka vimó. Lá oko novígo mukí vegená ámegetiki vamó. Lá ikago, kivisi vegená mukí nene kelémo zokoake nene,

<sup>16</sup> aí mogonáa nene avetó iki líli ali amitave loko lo hukoko loketamó.

<sup>17</sup> Láa loko lokimikago, Ómasímini agepagutí gako loaká ve Isaiá anoza gako makó láa loko luhuva gizamó nene gihila zimó:

<sup>18</sup> \* Ómasímo láa loko nolive: Gelekelé izegipáne alémo etó umó nene ángalo. Nigika amenouke aikumú nene gele lamaná oaká nounge. Itó neza Sikalahúne nene aí amupiló molokugo alémo vávani okiko, hetoka ve numutó namató vegená nene lihimáinimú gona moloketati gako nene lo utó oko lo kimitimó neve.

<sup>19</sup> Eza lovaleta oko gopaga lamoko gapoló gako napagutí laminogo ive.

<sup>20</sup> Vegená ámemeána limíki minamó nene ma kelémo golesa o asú aminogo ive. Limíki mina vegená nenete gelemó ló guluma koma nenéminoko nemó nene ma ze lihaminogo ive. Itó lá okoko hozaváa amuza moloko aleloko voko miniko nene, ale kegesoaká nenémo netá mukí kivilegeko minanogo ive.

<sup>21</sup> Lá okiko, hetoka ve numutó namató vegenalite kigika nene aí agulizató ali miliiki aikumú kagata losi gelemíki ageva iki minanigave, loko lo hukoko limó.

*Izesuko Pelezepuloko  
(Mak 3:20-30; Luk 11:14-23)*

<sup>22</sup> Nene gamenaló ve makó nene holosi makolímó agika ale gopa oko agómula líka ve itó agepa híze lakolí okago mina ve nene Izesú noitoka alímiki vamó. Alímiki víkago, Izesú nene alémo lamaná okago, ve eza agómula goloutoake nene, gako limó.

<sup>23</sup> Gako lokago nene, vegená mukí nenete ánigiake sigaga lítake agulizaki ve Tevitini agávolaho ative líki la ve netihe.

<sup>24</sup> \* Líki líkago nene, Palisaio monó vete ámina gako giliake láa líki lamó: Pelezepuló eza holositíni agulizaki ve loló oake alémo vatí igogó holosi nene kepeleko kimiseleaká noive.

<sup>25</sup> Líki líkago, Izesú nene kigikagú gako hanuva geleake láa loko lo kimimó: Mikasi makotoka vegená keza hízi hóu líiki lova gopa hizítamó nene, keí mikasi gámé minatimó neve. Itó apá makotoka itó numuni makokú vegená keza hízi hóu líiki eza akohú apíliki eza akohú apíliki itamó nene hutíli iki vinigave.

<sup>26</sup> Itó Satá ezáa izegipala zuha kepeleko kímiseleleitimó nene, aí avogisaló nene itína mota hízi hóu líake alévolé iki minamítamó neve.

<sup>27</sup> Lekeza nenikumú Pelezepuloni zámuzatunú holosi nene kepeleko kimiseleaká noive líki líaká niave. Láa líkima nene lekelitíni izegipatíni zuha nenete nene Satá ámina oko kelémo vatí igo holosi kípilíki kímisiliaká niahe. Óe, lá oko nomive. Nenemú kéisi nene soza gakitínímini mogona hanuva ali utó itamó neve.

\* 12:11: Luk 14:5 \* 12:18: Isa 42:1-4 \* 12:24: Mat 9:34, 10:25



<sup>28</sup> Lá onoi móza, nénisi nene Ómasímini Sikalahulímo nelémo vatí igo holosi nene kepeleko kimiseleaká nounazo, Ómasímo agulizaki ve napa ale utó oleketamó nenémini zámuza lokovogisaloka mota omo ávatíha onoi mó nenémini mogona mota utó okave.

<sup>29</sup> Ve makolímo gasovagi ve amuza ve makolímini numukú nene litá oko iteko henokanona nene ma ipá oko alítihe. Nenéminoko nomive. Gasovagi ve amuza vema nene goí oko agisa agizató nagá aleakaláa nene neve. Lá okogó aí henoni ipá inogo ive. Loko limó nene Satani zámuza avilegeake holosiva kepeleko kimiseleaká nouve loko lo moloko limó neve.

<sup>30</sup> \* Loko loake makó láa loko limó: Makó keza nene nenikutí ve minamitamó nene není gala ve minanigave. Ve makó keza nilími vatí iki vegená kilími nupa amitamó nenete kilími hutilí iaká niamó geleneive.

<sup>31</sup> Nenemú lo likimitoze, gililo. Ómasímo golesa netá haitopaitó itó alivi letivi liaká haitopaitolímini nenémini lihima vala ahuloaká gapo nemóza, ve makolímo Sikalahukumú alevo letovo oko litimó nene Ómasímo ámina lihima ahulotatí gapo nomive.

<sup>32</sup> \* Makó keza okulumakutí lumu ve gihila není imane alivi letivi itamó nene Ómasímo ámina lihima nene hanuva ahulokimiakaláa nemóza, Sikalahukumú alivi letivi iki lita lihima nene mikasigú nemó itó okulumakú nemó nene ma asú amititó neve.

*Oko moloko nounitímo mogonate ale utó oaká noive*  
(Luk 6:43-45)

<sup>33</sup> \* Lekeza nene za gihila lamaná makó ániigiiki za lamanakutí neve liki litaze. Itó za gihila golesa makó ániigiiki nene ámina iki za golesagutí neve liki litaze. Za gihila nenémo zámini mogona ale utó oaká noive.

<sup>34</sup> \* Gosihalímini agapilamó zuha lekelisi nene niave. Mogonatini golesagi nianazo, gakó lamaná ma lisá amave. Ligikagú vai o minakutí legepatunú loaká nouno.

<sup>35</sup> Vegená lamanalitini kigikagú nene netá lamanakó ititimó nenazo, kigikagutí nene vatí sunigó utó itimó neve. Itó vegená golesatini kigikagú nene golesa netakó minatimó nenazo, kigikagutí ámináminoko golesa sunigó ititimó neve.

<sup>36</sup> Nenemú nénisi lo likimitoze, gililo. Lihima aleaká gamenaló nene vegená mukilite ha gakó haitopaitolímini gopa linakumú nene gakó hozava aliiki asenini hiziki lúitamó neve.

<sup>37</sup> Gakó lanimó nenémo oko moloko animómámini mogonaka lo utó molokiko, lamaná itimó nene, lihimaka nomitimó minatanimó neve. Itó golesa itimó nene, lihimaka ha minatimó neve.

*Vegená golesate alévolé suni ániगतune liki lamó*  
(Mak 8:11-12; Luk 11:29-32)

<sup>38</sup> \* Láa loko lo kemekago, monó mogona apí ikimiaká a ve itó Palisaio monó ve lugáa keza gakó láa liki li amemó: Tisatemaka, geza nene alévolé suni ma ale utó okako nene ániगतune.

<sup>39</sup> \* Liki likago, Izesú láa loko lo kimimó: Oko moloko oaká nou netá ániगतaká nia vegená lekelisi nene vegená golesave itó monó gili ahuliaká vegená niave. Lekelisi alévolé suni ale utó okugo ániगतune liki liaká niamóza, lekelisi nene haitó suni makó ale utó ugo ániगतinigave. Ómasímini agepagutí gakó loaká ve Zonatoka emane utó i suni makó nenitoka utó okiko nenegó ániगतave.

<sup>40</sup> \* Zoná nene gamena losive makole nene lagaha sipisímini agatupagú minake goha otimóma neve. Áminagó oko okulumakutí lumu ve gihila nénisi nene gamena losive makole mikasigú mininake goha otinogo uve.

<sup>41</sup> \* Itó Zoná nene Ninive vegená monó lo nokimigo kigika ali viligamóma neve. Itó nénisi ató imane nene Zonakitana minamoko Zonani avilegeko noumóza, lekeza není gakó gili ahuliake likigika ali viligamave. Nenemú Ómasímo gona mololeketati gamena nene Ninive apá amelage nene otiki miníki oko moloko nou netá ániगतaká nia vegenalitini lihimáinimú lotuva liginigave. Lá ikiko lihima alitamó neve.

<sup>42</sup> \* Itó agulizaki vená Sipá mikasi emegaló minamó nenémo Ómasímo gona mololeketati gamena nene otekoko oko moloko nou netá ániगतaká nia vegenalitini mogonatini nene lotuva legekiko lihima nene alitamó neve. Ámina vená nenémo Salomó gele vevesoko gilimómámini gihiláa gilinogo mikasi hotokatí gapo hána hána amó. Itó nénisi ató imane noumó nene Salomoni avilegeko noumóza, lekeza není gakó gelemave.

\* 12:30: Mak 9:40    \* 12:32: Luk 12:10    \* 12:33: Mat 7:20    \* 12:34: Mat 3:7, 23:33; Luk 3:7; Mat 15:18    \* 12:38: Mat 16:1; Luk 11:16    \* 12:39: Mat 16:4    \* 12:40: Zna 1:17    \* 12:41: Zna 3:5    \* 12:42: 1 Kug 10:1-10; 2 Iki 9:1-12

*Holosi golesa atiginá i gakó**(Luk 11:24-26)*

<sup>43</sup> Holosi makó nene ve makolímíni agikagutí iteoko avasú vizeko minati numunimú vitagá inogo veđená minama mikasiló voko mohona itive. Vitagá oloko novoko,

<sup>44</sup> neza numúne nene ahulukuke umóma nenazo, goí oko minu numutoka goha atiginá oko vinake minatoze lokoko nene, atiginá oko, oko ániगतimó nene, ámina numuni lolopa gitiki ali guni inakú nene numuni gizapa ve nomiko ániगतimó nene,

<sup>45</sup> goha nene ahulukoko voko holosi agivelagini 7-a nene kugupelotí sisipa anuva ovimó nene kelémoko oko áminagú nene limiki miniki aliki inigave. Lá ikiko, ámina ve nene goí oko golesa oko minamóza, íi, alika nene golesa o lamaná oko golesa inogo ive. Lá onoiže, ve golesa áimane lekelitoka utó itikumú noluze, ehe.

*Izesuni izolahiki agunamotamolagi**(Mak 3:31-35; Luk 8:19-21)*

<sup>46</sup> Izesú gakó lo kemeko noigo, amegasaloka nene izolage izegipa agunamotamola nene gakó lo amitune liki hetoka gizapa iki niago,

<sup>47</sup> ve makolímó Izesuni nene gelenape, izokage izegipa gugunamotamokama gakó lo gimitune liki nene hetoka iki gizapa niave.

<sup>48</sup> Loko lokago, Izesú nene láa loko lo amimó: Izónege nugunamotamónemú lape.

<sup>49</sup> Loko loake, izegipa apala nouni liginaloka nene agizani hisú oko láa loko limó: Ánigalo. Izónege izegipa nugunamotamóne imane niave.

<sup>50</sup> Okulumakú améneho li gakó ámegetiaká niamó kéisi nene izónege izegipa nugunamotamóne niave, loko limó.

**13***Zuha netá atilí oaká vemú anoza gakó**(Mak 4:1-9; Luk 8:4-8)*

<sup>1</sup> Izesú nene ámina gamenaló numuni minakutí lemeake nonohuló agataló lemeko noiže,

<sup>2\*</sup> gakó apí okiminogo mitó minokago, ve vená mukí nene iki sii sii liki getatoka alegesá ikago, ániogoake veđená giki akumulé loko nagamikú lape makokú nene itimó. Iteko minake nene,

<sup>3</sup> anoza gakó haitopaitolímíni lo kimimó. Lá noiže, makó láa loko limó: Gilinahe. Zuha netá atilí oaká ve makó nenémo netá gihila nene atilí inogo vimó.

<sup>4</sup> Vike mikuka atilí omo novigo nene, makó nene gapogú alemó zekago gaha namate ake ni asú amó.

<sup>5</sup> Itó lugáa nene gehani amupiló mikasi lagasó netó lemekago, mikasi hána nomimó nenazo, goloakaláa golokago litá oko itiha,

<sup>6</sup> ho nolake avagugu vizekago, luhusa hána nomigo osagava vizimó.

<sup>7</sup> Itó gihila lugáa nene lilihámíni luhusa nene mikasigú ha netó alemó zeake, goloko itekaha, lilihámo zetamó.

<sup>8</sup> Itó lugáa nene mikasi lamanakú lemeko minake goloko iteake gihila lamaná zimó. Zava makototí nene gihila 100 nene zimó. Zava makototí nene gihila 60 zimó. Zava makototí nene gihila 30 zimó.

<sup>9</sup> Lekeza lakagatagi minatamó neneta gakó imane gili vevesiki gililo.

*Anoza gajokumú lo kimimómámini mogona**(Mak 4:10-12; Luk 8:9-10)*

<sup>10</sup> Gakó láa loko lo lemekago, izegipala zuha leza amatoka voko minunike geza nene anoza gakó nenémíniáa nanamú lo nokemene.

<sup>11</sup> Loko lokuko nene, eza láa loko lo limimó: Okulumalímíni gasovaló minoakalímíni asuná gakó nene lekeza gilitave loko nene lonoimóza, lugáa keza gelemítave loko nene neve.

<sup>12\*</sup> Makó keza monó nene vatí iki gizapa iki ali minata veđená nene ámináló nene miní ameko kemekiko minumuni lamaná utó o kiminogo ive. Itó makó keza monó nene lamaná iki gizapa amita veđená nene hanuvagó ale minune liki litamóza ipá oko alekiko nene hanuva minanigave.

<sup>13</sup> Keza nene ániगतune liki ániği-likí nivamóza, ániği hehe lisá amave. Itó gilitune liki gilimi vaha vaha mogonáa nene gili vevesisá amave. Nenemú anoza gakó imane lo nokumuve.

<sup>14\*</sup> Lá okago Ómasímíni agepagutí gakó loaká ve Isaiá alika utó iti netakumú lo ami gakó nenémo keitoka voko alekave. Ómasímó li gakó nene láa loko luhuva gizamóma neve:

\* 13:2: Luk 5:1-3

\* 13:12: Mat 25:29; Mak 4:25; Luk 8:18, 19:26

\* 13:14: Isa 6:9-10

Lakagatatunú giliakaláa nene hanuva gilitamóza, gili vevesaminigave. Itó lokogómulatunú ániagiakaláa nene hanuva ániagamóza, ma ániagi vevesaminigave.

<sup>15</sup> Vegená mulusi imane niamó kigika nene hize lí oake kigika kii lo vimó niave. Itó kogómula nene liko vimó niave, itó kagata molamó niave. Nenemú netá matá hanuva ániogakaláa hanuva nánigave. Itó kagatatunú geleakaláa hanuva nigeleve. Kigikatunú nene gili lamaná iki nene ma gilísá amave. Lá iiki kigika ali viligísá amanazo, neza nana oko kelémo lamaná itomó neve.

<sup>16</sup> \* Itó Ómasímo nónohá zelikimikago, lekelisi nene lokogómulatunú ániagi vevesiake lakagatatunú gili lamaná iaká niave.

<sup>17</sup> Neza lamaná lo likimitoze, gililo. Gozapá Ómasímimi agepagutí gakó liaká ve muki kezagi itó monó gele ve muki kezagi nene oko moloko nou netá lekeza ániagiaká nia netáma ániगतune liki lamóza, ániagamómoma neve. Itó lekeza nene negepagutí gakó giliaká nia gakó gilitune liki lamóza, gelemamómoma neve.

*Zuha netakumú anoza gacolímimi mogonáa*

*(Mak 4:13-20; Luk 8:11-15)*

<sup>18</sup> Netá gihila atilí oakalímimi mogona nene lo likimitoze, gililo.

<sup>19</sup> Ómasímimi gasovaló minoakalímimi gakó giliki gili vevesama vegenalite monó nene kigikagú milikago minamó nene golesa netá amelaho Satá nene netá gihilama aleko golisi vokiko netá gihila gapoló alemó zimó nenéminiki minanigave.

<sup>20</sup> Itó gehani amupiló lemeko minamó nenéminiki minata vegená nene monó nigiliki laga kivisekago giliaká niamóza,

<sup>21</sup> kigikagú emane nene luhusa ale gilitamigo, gamena alínipa aliniko, monó gakó gilinakumule liki gopogu galatakalatá milikitata gamenaló nene litá iki ahulanigave.

<sup>22</sup> Itó lilihagú limimó nenéminiki minata vegená nene monó giliakaláa hanuva gilitamóza, imane mikasiuka gena kepeleaká noi netá itó monimú lagaváa giliaká nia netá nenémo monó zemikago, keitoka gihiláa makó utó osá amive.

<sup>23</sup> Itó mikasi lamanakú limimó nenéminiki minatamoláa monó giliiki gili vevesiki ali minata vegenatoka nene gihila zeaká noive. Makolititoka napa otigí zeaká noive, makolititoka muki zeaká noive, makolititoka vauva aleko zeaká noive.

*Lilihamú anoza gakó*

<sup>24</sup> Láa loko loake, anoza gakó makó láa loko lo limimó: Okulumalímimi avogisaló iteaká mogonamú nene ve makolimo nene minagú laisi gihiláa atilí imó neneló ale moloko litoze.

<sup>25</sup> Gihiláa atilí oake vokago nene, makó holugú nene vegená kovó aki asú iki akínago, gala veva nenémo aniteake laisi vogalaló minoake nene, liliha nene atilí oake vimó.

<sup>26</sup> Lá okago laisi goloko iteakaláa goloko iteake, gihiláa nene nozigo, liliha makó nene ámináminoko goloko itimó.

<sup>27</sup> Lá okago, izegipala zuha nenete iki láa liki li amemó: Gugulizaki velemaka, geza nene mikagú nene netá lamanaláa makó atilí animómoma nemóza, liliha muki nene nana oko itive.

<sup>28</sup> Liki likago, eza nene gala ve makolimo onoitive loko lokago, keza voko lilihama asutatupe liki likago nene,

<sup>29</sup> eza láa loko nene limó: Óe, liliha nene asuti ahulatamóza, laisigi nene asutikatave.

<sup>30</sup> Nenemú nene laisigi lilihagi hanuva minatize. Neiko nene, laisi ale moloaká gamenaló nene minumuni aliaká ve láa loko loketatove: Lekeza niviki liliha nene apí iki gizaká iiki asapú ikiko lokú gizatunize. Itó laisima nene haitó gizaká iiki ale moloaká numúnegú milataze, loko limó.

*Masteti gihilamú anoza gakó*

*(Mak 4:30-32; Luk 13:18-19)*

<sup>31</sup> Izesú nene anoza gakó makó láa loko lo limimó: Okulumalímimi avogisaló vi hilata vegená keza nene masteti gihila nenéminiki niave.

<sup>32</sup> Ámina netá nene zuha netá lugáagutí koma koma nemóza, ve makó nenémo ámina netá nene minagú atilí okago goloko iteko napa oake zamú muki kivilegeko zagitana loló onoive. Lá okago, nama nenete anitiake nenémini izanaló nene numuni giaká niave.

*Peleti lulu vizeaká netakumú anoza gakó*

*(Luk 13:20-21)*

<sup>33</sup> Anoza gakó makó láa loko lo limimó: Okulumalímimi lapanató vo holoakaláa nene peleti lulu vizeaká netá nenéminoko neve. Vená makolimo ámina netá nene polisigi ali gopa okago hutilí okago peleti nene lulu vize napa oaká noive.

\* 13:16: Luk 10:23-24

*Izesú anoza gakoímini mogona lo kimimó  
(Mak 4:33-34)*

<sup>34</sup> Vegená vai iki alegesá ikago, Izesú eza gakó mukí imane lo kimimó nene anoza gakokutí nene lo kimimó. Gakó lo kiminogo noike anoza gakokutikó lo kemeaká imó.

<sup>35</sup> \* Lá noigo, Ómasímini agepagutí gakó loaká ve makó nenémo gakó láa loko luhuva gizamó nene alévolé imó:

Negepagutí anoza gakokutí lo nokiminake mikasi emane utó amigo gakó halá geko minoloko voko minamó nene itína nene lo utó itove.

*Lilihamú anoza gakoímini mogonáa lo utó imó*

<sup>36</sup> Izesú nene vegená ahulokimiake numukú itekago, izegipala zuha leza laisi mikú liliha utó itímini mogona lokako gilitune loko loká omikuko,

<sup>37</sup> Izesú láa loko limó: Gihila lamaná atilí i vemú lumó nene okulumakutí lumu ve gihila nezánemú luve.

<sup>38</sup> Minimú lumó nene mukí mikasiukamú luve. Itó netá gihila lamanakumú lumó nene Ómasímini lapaná alina vegenakumú luve. Lilihamú lumó nene netá golesa amelaho Satani vegenala zuhamú luve.

<sup>39</sup> Gala ve aniteake netá golesa atilí i vemú lumó nene Satakumú luve. Laisi ale moloaká gamenaló minumuni aliaká vemú lumó nene, mikasiuka netá asú iti gamenaló nene hozaló ve keza hoza alitakumú luve.

<sup>40</sup> Liliha nene asutiiki lokú gizamó nene ámináminoko mikasiuka netá asú iti gamenaló nene

<sup>41</sup> okulumakutí lumu ve gihila neza nene agelóne kimiselekugo, není gizapaló vegenáne zuha niakutí kilími gohá iaká nia vegená itó golesa netá aliaká nia vegená gizaká iki kilími nupa iiki

<sup>42</sup> Ió napagú ali ahulikimikiko liminigave. Naneloka limiki miniki ive nama iki miluma maluma giliki kegepa atalá iki minanigave.

<sup>43</sup> Itó hee liki minamoláa keza nene améipini avogisaló nene ho nenémini iki lapanáinigi minanigave. Lá onoize, lekeza lakagatagi minatamó neneta gakó imane gili vesesiki gililo.

*Helisa netakumú anoza gakó*

<sup>44</sup> Okulumalímini lapanató iteakalímini meinava lá oko neve. Helisa netá makó nene za zuhagú minatimó nene etó oko apazá neiko nene, ve makó nenémo voko ángokoko nene goha ale halá gekoko agoliza vizeko voko ezáa moni henokanona nene salimí asú okoko moni aleoko ámina za zuhama meina hizeko alinogo ive.

*Lulukumú anoza gakó*

<sup>45</sup> Okulumakú iteakalímini meinaváa lá oko neve. Ve makó nenémo lulú makó meinava iteko mina netakumú nene vitagá oloko vike nene

<sup>46</sup> hozavagú molokiko neiko, lulú makó meinava iteko noitimó nene ale utó okoko nene ezáa moni henokanona salimí asú okoko moni aleoko ámina netá nene meina hizeko alinogo ive.

*Lagaha gotahamú anoza gakó*

<sup>47</sup> Okulumalímini lapanató iteaká gapováa nene lagaha gotaha nenémini oko nene neve. Vegená keza lagaha gotaha nene age nagamikú ahulikago lemeake lagaha nene haitopaitolímini nene aleaká noive.

<sup>48</sup> Gotaha nene vai okago, gelelehá iki ali getatoka iake minake nene, noakalímini nene lapegú ali milimili iaká niave. Namoakalímini nene ali etó iki ahuliaká niave.

<sup>49</sup> Mikasi gamenava asú iti zupa nene ageló nenete áminámini inigave. Ageló nenete numutó namató vetini holúikutí vegená golesa gizaká iiki

<sup>50</sup> lokú nene ali ahulikitanigave. Naneloka miniki ive nama iki miluma maluma giliki kegepa atalá iki minanigave.

*Litaha monokutí itó gosohá monokutí ale utó oaká gakó*

<sup>51</sup> Izesú láa loko lo leme asú oake nene, láa loko loká oletamó: Lekeza nene mukitoka gakó imane gili asú inahe. Loko lokago, leza mota gele asú onoune

<sup>52</sup> loko lokuko, eza láa loko limó: Ve makolimo aí henoni lithagutí itó gosohakutí gona moloko aí vegenala zuha kemeaká noimómáminiki monó mogona apí ikimiaká a ve lugáa keza okulumalímini lapanalímini mututoni lilí nia vegená nenete Ómasímini lithaha monolímini agikagutí itó gosohá monolímini agikagutí ali utó itamó neve.

*Nasalete apatoka Izesuni ánigi ahulamó*

*(Mak 6:1-6; Luk 4:16-30)*

\* 13:35: Age 78:2

<sup>53</sup> Izesú nene anoza gakó haitopaitolímíni láa loko lo leme asú oake nene, ámina numuni apá ahuloake

<sup>54</sup> ezáa gotó apalaloka vo anitimó. Vo aniteake monó numukú iteake monó lo kimimó. Monó gakó nene aveté oko lo kemekago, giliake sigaga sagaga litake láa liki lamó: Ve imanémo gele vevesoakaláa nene hikutí alive. Itó alévolé suni aleaká noimómave.

<sup>55</sup> Leza aí mognáa gelenounize. Áisi nene kapetamámini gipalama noive. Itó izolahini agulizá nene Maliáma neve. Itó agunamotamolatini kugulizámini nene Zemusiki Zoseheki itó Saimon itó Zutá nene agunamotamola niave.

<sup>56</sup> Itó mohó agunala kezagi imaneló miniki aliki iaká nianazo, áisi lezagitana ve noimóza, áisi nene haitopaitó suni nana oko aleaká noive.

<sup>57</sup> \* Liki liake aikumú gelemó nene gena okago, aí nene ali letivi iki likago, Izesú láa loko lo kimimó: Ómasímíni agepagutí gakó liaká vetini kugulizá nene numutó namató puu loko vitimóza, kezáini gotó apatokagi numúikukagi kezáini kugulizá nomitive, loko limó.

<sup>58</sup> Ámina apató vevená keza nene gili alévolé amamó nenazo, Izesú nene alévolé suni mukí neneló ale utó amimó.

## 14

*Monó nagamí holokimiaká ve Zoní hili gakó  
(Mak 6:14-29; Luk 3:19-20; 9:7-9)*

<sup>1</sup> Gamena nene zupa agulizáki ve napa Heloté nene Izesuni gakoláa likago gilimó.

<sup>2</sup> Geleake nene, gelekelé izegipala nene láa loko lo kimimó: Zoní monó nagamí holokimiaká ve áisi nene hilimómagutí oteake imane zámuza nene netá haitolímíni ale utó oake noihe loko limó.

<sup>3</sup> Nene hanuva lamimó. Heloté nene amunaloka emane uvolaho Piliponi vená agulizá nene Helotiasini ipá oko alimó.

<sup>4</sup> \* Lá okago, Zoní nene Heloteni nene uvokahini vená ipá oko alenimó nene etamive. Loko lo ame-ame oloko vokago, Heloté nene venalámo gala vizekago ve makó kimiselekago vake Zonini agizató aliake nagá numukú ahulitamó.

<sup>5</sup> Mukí vevenalite Zonikumú nene Ómasímíni agepagutí gakó loaká ve noive liki liaká amó nenazo, Heloté nene Zonini apilitomó nene Ómasímó nana onetatihe loko ahelele vizekago ahulamó.

<sup>6</sup> Lá imóza, Heloteni nene geta gamena alitokago mukí kugulizáki ve aí numukú nene iki alegesá amó. Alegesá iki niago, Helotiasini mohola nenémo kovogisaló melekeni noigo, Heloté nene ániago amu heleake,

<sup>7</sup> Láa loko limó: Neza nene Ómasímíni avogisaló lo hukoko noluve. Geza nemú manamú nivisive loko litani netá hanuva giminogo uve.

<sup>8</sup> Loko lokago nene, izolahlo lo amekago láa loko limó: Monó nagamí holokimiaká ve Zonini luvana nene hutoko lapegú moloko nemekako ániogokinake mota helekave loko litove loko noluve.

<sup>9</sup> Loko lokago nene, agulizáki vémo agepa gahava nomigo gilimó gena imóza, Ómasímíni avogisaló lo hukokumóma nenazo itó alesa molokugo iki mína vevenalitiní kovogisaló imane lo hukokunazo loake, gele ameake, gopa nene pilisi ve makó voko luvana hutoko alekative loko lomikago,

<sup>10</sup> vike nagá numukú nene luvana hutoake gotola gitegeko nene

<sup>11</sup> lapegú moloake mohóma amekago, moholámo aleko vike izolahini alemo amimó.

<sup>12</sup> Alemo amekago nene, Zonini izegipala zuha nenete ámina gakoláa nene giliake vake gonosiváa gale zemó. Gale ziake, ámina gakó nene Izesuni aveté iki lí amemó.

*Ve 5 tausén nosánétá kemeko namó  
(Mak 6:31-44; Luk 9:10-17; Zon 6:1-13)*

<sup>13</sup> Lí amikago, geleake ámina apá ahuloake izehagegi nagamikú lapegú itekunike vola helegaloka mikási gomopalaló vo anitehá. Lá okuko, vevená mukí keza giliake, numuni apáini ahulíake mikasigú ámegetiki vamó.

<sup>14</sup> Lá ikago, Izesú nene lapegutí olío lemeko ániagamó nene, vaí iki alegesá ikago ániogake, agika hizekago kivisi vevená nene kelémo zokamó.

<sup>15</sup> Lá okago, únaká ho lemekago, izegipala zuha leza aitoka unike láa loko lo amunimó: Imane apá nene ha gámetó minokaze, itó gamena mota asú okaze, vevenáma apá makotoka makotoka viiki nosánétáini meina hizitave loko kimiselemané.

\* 13:57: Zon 4:44 \* 14:4: Liv 18:16, 20:21

<sup>16</sup> Loko lo amekuko, Izesú láa loko lo limimó: Nanamú vitave. Lekezatini nene nosánetá kimiki nalo.

<sup>17</sup> Loko lokago, leza íi, peleti 5-a itó lagaha lositakó imane molonouhá lae.

<sup>18</sup> Loko lokuko, Izesú láa loko limó: Nene aliki nenitoka alo.

<sup>19</sup> Loko lo lemeake, vegená keza gihisiló minatave loko lolimiake, peleti 5-agi itó lagaha lositaki aleake, okulumatoka okenava oko nánigake, Ómasi agepoka loake, peleti gitegeko lemekago, leza vegená mukí gona moloko kemehá.

<sup>20</sup> Kemekuko, mukilite nikake kagatupa okago nosánetá lumáa ali nupa iki gosúveha 12 vai okago ali milamó.

<sup>21</sup> Nosánetá na véa 5000 nenéminiki minamó. Vená izegipáini nene gatamune.

*Izesú nagamí amupiló liso liso vimó*

*(Mak 6:45-52; Zon 6:15-21)*

<sup>22</sup> Lá okago, Izesú ezáa nene vegená nokimisilike izegipala zuhama sipigú itiiki vola helegaloka goí iki vitave loko loletamó. Lolimikago novuko nene,

<sup>23</sup> vegená kimisele asú oake ezáagó agoka makokú iteko minake Ómasiloka loko minamó. Lá noigo,

<sup>24</sup> Íimugusi zekago akovevé loló okago nene, izegipala zuha leza sipigú voko voko nonohuló holutó novuko logómulalokatí nene una napa aleko ake lehelú inogo igo, nagamí nenémo valahuká zeko lelémó ligitagani imó.

<sup>25</sup> Lá noigo, gokululuva notovoigo, Izesú nene nonohuló amupiló liso liso vike vo alí noligo,

<sup>26</sup> izegipala zuha leza ánigokunike, holosi noahe oko lehelele vizekago, gopaga lunimó.

<sup>27</sup> Gopaga lokuko, Izesú litá oko láa loko limó: Lekelegesá legemino. Nezama nouve. Mulutini lepa hizino.

<sup>28</sup> Loko lokago, Pitá nene láa loko limó: Guivahanitemaka, géisi noitanimó nene lokako nagamí amupiló imane lisokinake géisi noanitoka vitohe.

<sup>29</sup> Loko lokago amane loko lokago, Pitá nene sipigutí olío lemeake, Izesú noitó nene apí oko nagamí amupiló liso liso vimó.

<sup>30</sup> Liso liso novigo, una nalikumú geleake alegesá legekago, nagamikú velehé liminogo noike, Guivahanínemaka nelémó nugutó vizemane loko gopaga lokago,

<sup>31</sup> Izesú litá oko agizani lutoko nanukike láa loko lo animó: Geza komáisi nenikumú gele alévolé anitika, nanamú gagata losi gelenimó neve.

<sup>32</sup> Loko loake, sipigú goha itikasigo, una nene asú imó.

<sup>33</sup> Asú okago, sipigú makó minuhá ve leza Izesuni gupá ze ameko geza lamaná Ómasímini gipala noane, loko lunimó.

*Genesalete apatoka Izesú kivisi vegená kelémó zokamó*

*(Mak 6:53-56)*

<sup>34</sup> Loko lunike, vola helegaloka Genesalete apakú vo anitunimó.

<sup>35</sup> Nagamí nonohuló agataloka getatoka nene itekuko, vegená keza Izesuni ániigi vevesi-ake Izesuteho mota okave líki numuni apá alitoka gakoláa ahulikago, vegená keza giliake kivisi vegená Izesutoka kilímiki amó. Kilímiki ake

<sup>36</sup> kivisi vegená imane nene gele kemekako, gugupeló ahe itó hanuva luhoaká gó gahevalokahe imane ali giliiki nene zokatave, líki negénegeka likago, áminámini niake ale gele vegená nene zokí asú amó.

## 15

*Avóike apí a mognatagana*

*(Mak 7:1-13)*

<sup>1</sup> Gamena nene zupa Zelusalegatí Palisaio monó ve itó monó mogona apí ikimiaká a ve lugáa kezagi Izesutoka ake láa líki loká itamó:

<sup>2</sup> Izegipaka zuha keza avotegini mognatagana ali minamake nanamú ahulikave. Nosánetá natune líki ligika ale golutuva loaká suni aliki kigizani nene nagamí zemave.

<sup>3</sup> Líki likago, Izesú láa loko lo kimimó: Lekelisi nanamú avotikini gakóini gili alinigi Ómasímo lo hukoleketa gakó avutá iaká niave.

<sup>4</sup>\* Ómasímo láa loko lonoimóma neve: Izokahiko amekahiko kugulizá ale otezo. Itó makó nene láa loko lonoimóma neve: Makó eza nene izolahiko amelahiko usí vizekimiaká gakó lo kimitimó nene, apele hilitunize.

\* 15:4: Gá 20:12; Gapo 5:16; Gá 21:17; Liv 20:9

<sup>5</sup> Lá onoimóza, lekeza nene láa liki liaká niave: Makó eza nene izolahiko amelahiko hize lé oketanogo lonou netáma mota Ómasímini amekuve,

<sup>6</sup> liki liake nene izotikini ametikini nasahilí ikitata gapo hizi lí iaká niave. Itó lekeza lá iake, Ómasímini gakó nene vasá ziake lekezatini avotikini gakó alévolé iki ali miniaká niave.

<sup>7</sup> Genezatini lositaki neneta Isaiá alika utó iti netakumú gakó láa loko limó nene, lamaná lekelikumú lonoimóma neve. Ómasímo li gakó nene láa loko luhuva gizonimóma neve:

<sup>8</sup> \* Vegená mulusi imane nene kegepatunukó nugulizá ali otiaká niamóza, kígika nenitoka mili gimizinamake mili hotó inave.

<sup>9</sup> Vegenalítini gakó nene není gakokitana okago li kimi-kimi iki miniaká niake, soza miliki gupá zi nimiaká niave.

*Lígika ale gopa oaká netá*

*(Mak 7:14-23)*

<sup>10</sup> Izesú nene láa loko lo kemeake vegená lugáa mukí sele lo kemekago, aitoka ikago, láa loko lo kimimó: Neza gakó lo likimitoze. Gili vevesiki gililo.

<sup>11</sup> Ni mikilí ikago lakagatupagú lemeaká noi netá nenémo likígika ale golotuva lamitimó neve. Lekegepagutí emane itíti netalímo likígika ale golotuva litimó neve.

<sup>12</sup> Loko lo kemekago, izegipala zuha leza amatoka voko láa loko lunimó: Geza nene Palisaio monó ve imane gakó lo kemekako gili golesa ikave. Gili golesa amó nene mota gelenape.

<sup>13</sup> Loko lokuko, Izesú eza anoza gakó láa loko lo limimó: Za nene okulumakú améneho zuhá amigo hanuva goloko itimoláa nene ási asutoko luhusagi ale ahulanogo ive.

<sup>14</sup> \* Lá onoinazo, lekeza ahulikimikiko minino. Palisaio monó ve nene kogómula lika mola vegatana niave. Agómula lika ve makolímo agómula lika ve makó nene gapo alapizitihe. Kogómula lika ve losi nenetosa eza agizató aliko eza agizató aliko iiki vitáimó nene losiló galegú hilanigasive.

<sup>15</sup> Loko lokago, Pitá láa loko lo amimó: Geza nene anoza gakó itínasa lanimómámini mogonáa lo utó okako gilitune.

<sup>16</sup> Loko lokago, Izesú láa loko limó: Íi, lekelisi nene áminagó iki lakagata velesá kolosamimó niahe.

<sup>17</sup> Mogonáa gili vevesamahe. Lekegepatunú nosáneta níkago aselikú nene lemeake nene eza gapováa voaká noive.

<sup>18</sup> \* Itó lekegepagutí iteaká noimó nenémo likígikagutí utó oake lekemeni ale golotuva loaká noive.

<sup>19</sup> Vegená likígikagutí iteaká noi netá nene lá oko neve: Golesa lakagata geleaká, itó vegená kepele heleaká, ve vená huki ezega emega oaká, mokoló mogona, gumina, soza, kemegeka loaká, nene.

<sup>20</sup> Netá nenémináámo lekemeni alémo golesa oaká noive. Ligizani nagamí zemunike noaká nouhá nenémo lemeni ale golotuva losá amive.

*Kenan mikasiukatí hetoka mina venalímo gele alévolé imó*

*(Mak 7:24-30)*

<sup>21</sup> Loko loake, Izesuki makó vunike mikasi ahuloko Tulo numutoka itó Sitona numutoka apá agilikaloka voko nouko nene,

<sup>22</sup> Kenan mikasiukatí hetoka mina vená makó nene aitoka noake gamoga geko láa loko limó: Guivahanínemaka, geza Tevitini agávolagamaka golesa netakutí gologí oletatani vele-maka, milumaváne gelenetamane. Holosi golesa makolímo mohónémini agikagú minoake alémo gopa napa okago noinae.

<sup>23</sup> Loko lokago, Izesú nene geletigí gelemotigí oake novigo nene, izegipala zuha leza vená imanémo negénegeka lomo lémegetoko amó goselé ovize. Geza nene amiselekako vitho.

<sup>24</sup> Loko lokuko, Izesú láa loko lo limimó: Neza nene Isilae vegená ví tolova inakutí kelémo vatí itane lokogó nimiselekago lumumóma nena.

<sup>25</sup> Loko lokago, vená nenémo litá oko amatoka oko agisauka gupá nozike láa loko limó: Guivahanínemaka, geza nelémo vatí amane.

<sup>26</sup> Loko lokago, Izesú nene Isilae vegenalite Ómasímini lusa goí iki ali alitakumú geleneike anoza gakó láa loko lo amike limó: Izegipatini nosáneta nene ipá oko galatini kegepagú ahuloakaláa nomive.

<sup>27</sup> Loko lokago, hetoka vená nenémo Isilae vegenakó negopa, ezagí Ómasímini lusa ale alitikumú geleneike láa loko limó: Guivahanínemaka, nene lamaná lokanimóza, neza litoze.

Gala amelage nene nosánetá ninago lanáa koma alemó zimó nene galate gopa niaká niamole.

<sup>28</sup> Loko lokago, Izesú láa loko limó: Geza nene gigika ma nego lokanize. Nenemú nene lani netá utó ogetanogo ive. Loko lokago nene, ámina gamenalóisi mohola nene zokoko lamaná imó.

*Izesú vegená mukí kelémo zokamó*

<sup>29</sup> Lá oake Izesú nene numuni apáma ahuloake goha atiginá oko vike Galilaia nonohulotoka aniteake zopega makokú iteko minamó.

<sup>30</sup> Iteko noigo, vegená mulusi haitopaitolímíniki alegesá amó. Iki alegesá amó nene kigisaló alimó kogómulaló alimó itó lilikupá gepili nuvane itó gako lamamó negi ve itó kivisi vegená mukí kilímiki iki Izesuni agisauka kilími nupa ikago kelémo zoko asú imó.

<sup>31</sup> Lá okago, gako lama vegená nene kegepa alémo vávani okago gako lamó, itó kigisa kigizani nakeseta vegená nene kelémo lamaná okago lamaná iki minamó, itó kigisaló alimó nene lisi pehe liake otiki vamó. Itó kogómulaló ali vegená nene kogómula ale goloutokimikago kogómula ánígamó. Lá iki minago vegená mukí keza sigaga lake leza Isilae vegenalitiní Ómasite napa noive liki agepoka lamó.

*Ve 4 tausen nosánetá kemeko namó*

*(Mak 8:1-10)*

<sup>32</sup> Lá okago, Izesú nene izegipala zuhama sele lo lemekago, aitoka okuko, láa loko lo limimó: Vegená mukí imane nosánetá namake nenitoka nene gamena losive makole minikago milumaváini gelekuze. Itó itína gaúna hiliki niko, kimiselekugo, numúitoka niviko gapoló kovonana vizekatihe loko nenemú nagata gulugo gena nivisekave.

<sup>33</sup> Loko lokago mikasi gomopalaló nouninazo, vegená imane nosánetá nene hikutí ale utó oko kemeko natune.

<sup>34</sup> Loko lokuko, Izesú loká oletake lekelitoka peleti nanakí neve. Loko lokago, leza nene peleti 7-a, itó lagaha koma lughakó ma neve.

<sup>35</sup> Loko lokuko, áminama alikí alo loake nene aleko okuko, Izesú nene vegená mukí mikasiló minalo loko lolimiake,

<sup>36</sup> peletigi lagahagi aleake, Ómasi agepoka loake, gitegeko lemekago, leza vegená gona moloko kemekuko namó.

<sup>37</sup> Niki niki kagatupa ikago, nosánetá lumáa minamó ali nupa iki gosúveha nene 7-a vaí okago ali milamó.

<sup>38</sup> Nosánetá na ve nene 4000 nenémíniki minake namó. Vená izegipáini ma gatamune.

<sup>39</sup> Lá okago Izesú nene ámina vegená kimisele ahulokago, nivago, sipigú makó itunike Magatana mikasiuka vola helegaloka vo anitunimó.

## 16

*Alévolé suni ánígatune liki lamó*

*(Mak 8:11-13; Lúk 12:54-56)*

<sup>1</sup>\* Palisaio monó vegi itó Satukaio monó vegi keza Izesutoka iake gimivagú molatune liki loká itake láa liki lamó: Geza nene Ómasilokatí alévolé suni makó ale utó okako geí mogona ánígatune.

<sup>2</sup> Liki likago, eza láa loko lo kimimó: Lekeza nene límugusi zinogo noigo guhizakó ánígiake azo ho latimó neve, liki liaká niave.

<sup>3</sup> Itó gó lokago gó nohitago nene golini zitimó neve liki liaká niave. Itó lekelisi nene okulumató ánígiake nenémíni mogona gona miliki giliaká niamóza, itína gamenaló oko moloko oaká noutímíni mogonamú nene ma gili lamaná amake hanuva miniaká niave.

<sup>4</sup>\* Imane gamenaló nia vegená lekelisi nene ve golesave itó monó nene gili ahuliaká vegená niave. Lekelisi nene alévolé suni ale utó okugo áníganigi giliake nilahe. Lekelisi nene haitó suni makó ale utó ugo ánígaminigave. Gozapá monó loaká ve Zoná nene gamena losive makole oko vokago heleaká gapogutí oti sunígitana makó nenitoka utó iko nenegó áníganigave, loko lo kemeake ahulokimiake vimó.

*Palisaio monó vegi Satukaio monó vegi keí mogonatagana*

*(Mak 8:14-21)*

<sup>5</sup> Itó izegipala zuha leza nene peleti makó aleko vitunikumú lagatí molokago ahulunike sipigú makó itunike nonohuló avilegekunike ima helegaloka oko anitehá.

<sup>6</sup>\* Oko anitekuko, Izesú nene anozo gakovú láa loko lo limimó: Lekeza nene Palisaio monó vegi itó Satukaio monó vegi keí lulu vizeaká netalímo lekepelekatize, ehe.



<sup>7</sup> Loko lo lemekago, peletímini lulu vizeaká netakumú lihe loko lezateloka logele hagele unike peleti nene ahulokoko unikumú nene gako lo nolimize.

<sup>8</sup> Loko luni gako nene agataló holokago geleake láa loko lo limimó: Agae, lekeza komáisi gili alévolé amó neneta, peleti ahulokoko unikumú nolive liki nanamú mulutini itekago lekezatitoka ligili hagili niave.

<sup>9</sup>\* Neza nene alévolé suni aleko nosáneta henuva ale utó oleketatomómámini mogonáa velesá gili hee lamahe. Neza ve 5 tausenimú peleti 5-a gitegeko kemekugo, niake kagatupa okago lumáa ahulikago gosúveha 12 nene vaí okago aleve. Nenemú lakagatí molokago nilahe.

<sup>10</sup>\* Itó vegená nene 4 tausen keikumú peleti ligizani lugaloka losi olío molago kemekugo, nikake kagatupa okago, lumáa nene gizaká iki ali milamóma nene gosúveháa 7 ali milamó neve. Nenegi lakagatí molokago nilahe.

<sup>11</sup> Leza nene peletimú lo lemenape liki lekeza nene není mogonamú nanamú gili vevesamave. Palisaio monó vegi Satukaio monó vegi kei lulu vizeaká netalímo lekepelekatize, ehe.

<sup>12</sup> Loko gako nene lo lemekago, neneló nene gele vevesunimó. Gele vevesunike nene, peletímini lulu vizeaká netakumukopa, Palisaioite itó Satukaiote soza monó liaká akumú nene lokave loko nene gulunimó.

*Pitá Izesuni mogonamú lo utó imó*  
(Mak 8:27-30; Luk 9:18-21)

<sup>13</sup> Izesú nene Sisalia mikasiuka agulizaki ve Piliponi agulizató apá nene agilikaloka voko noike, izegipala zuha nene láa loko loká oletake limó: Vegená keza nene okulumakutí lumu ve gihila nenikumú nene éahove liaká niave.

<sup>14</sup>\* Loko lokago nene, vegená lugáa nenete Zoní monó nagamí holokimiaká vema noane liki liaká niave. Itó lugáa nenete Ilaizá gozapá okulumakú iti vema noane liki nilago, lugáa nenete Ómasímini agepagutí gako loaká ve Zelemiá ahe itó Ómasímini agepagutí gako loaká ve makó gozapá minamokitana noane liki liaká niave.

<sup>15</sup> Loko lo amekuko nene, itó lekelisia nene nenikumú éahove liki liaká niave.

<sup>16</sup>\* Loko loká olimikago nene, Saimon Pitá nene láa loko limó: Geza gologí oletatane loko lo mololeta vema alévolé Ómasímini gipala nene noane.

<sup>17</sup> Loko lokago, Izesú nene láa loko lo amimó: Zonani gipala Saimoga, geí gako nene gelekego gogoliza novizenimó geleaká noive. Vegenalite ma li gimikago lamane. Okulumakú améneho nene gelémo vavani igo lokanize.

<sup>18</sup> Nenemú lo gimitoze, gelezo. Geza gugulizaka nene Pitá noane. Itó lelí gajokutí nene gasova gehanímó. Itó nénisi nene ámina gasova gehanimámini amupiló nene monó ali amegesa milina vegená kelémo nupa okoko ahulokimikugo meikú hilatatímini zámuzáa nenémó ma kelémo amunauka aminogo ive.

<sup>19</sup>\* Itó nénisi nene okulumálímini lapanató vi hilatatímini kiiláa giminogo uve. Itó geza nene mikasiuka netá makokumú lo hoipa oketatanimó nene Ómasímó okulumakukagi ámina netakumú lo hoipa oketanogo ive. Itó mikasiuka netá makokumú lo hoipa oketamitanimó nene Ómasímó okulumakukagi ámina netakumú lo hoipa oketamítimó neve.

<sup>20</sup> Loko loake, izegipala zuhama nene lagata alike alévolé oko lo limimó: Neza gologí oleketative loko lo mololeketa vema noumóza, nene gako nene vegená keké li kememilo, loko limó.

*Izesú ezáa alika hiliti gamenamú lo kimimó*  
(Mak 8:31-9:1; Luk 9:22-27)

<sup>21</sup> Gamena nene zupa Izesú nene apí oake minomo vike netá matá aitoka utó iti gako nene izegipala zuha láa loko lo limimó: Zelusalega itekugo nene, monó gizapa ve itó guguni giziaká ve itó monó mogona apí ikimiaká vete miluma netá mukí nimiiki nipili hilikiko, gamena losive makole minokinake goha otinogo uve.

<sup>22</sup> Nene gako lo lome asú okago, Pitá nene Izesuni alémo apazá zeake géneka loko gahá amike láa loko limó: Guivahanínemaka, Ómasímó asega zegeto-loko noviko nenémini suni nene geí gumupiló utó aminogo ive.

<sup>23</sup> Loko lokago, Izesú viligoko Pitani láa loko lo amimó: Satani gako lanitika, géisi nene mino olové amane. Není gapo hize lí itani gako lokane. Gako nene lokanimóza Ómasímini gako lamanike ha vegenalítini kigikagutí gako aleko lokane.

\* 16:9: Mat 14:17-21 \* 16:10: Mat 15:34-38 \* 16:14: Mat 14:1-2; Mak 6:14-15; Luk 9:7-8 \* 16:16: Zon 6:68-69

\* 16:19: Mat 18:18; Zon 20:23

<sup>24</sup> \* Loko loake, gamena nene zupa Izesú izegipala zuhama miní ameko láa loko lo limimó: Vegená makó nenete není némegetoko vitune líki nigilikima nene, kugupémo gilítí netá gili ahuliiki zohota zaló kipili hilinigi miluma netá ali gihikitatakumú gili zagiiki némegetiki ataze.

<sup>25</sup> \* Makó keza nene kígika kemeníni aliki amánapa iki minata vegená nene kígika kemeni gopa inogo ive. Itó makó keza nenikumule líki kígika kemeni vinasatamó nene alévolé kemetameni alinígave.

<sup>26</sup> Makó keza nene mikasi amupiló ne netá ali asú iiki itó kezáini kígika kemeni gopa okoko tolova itimó nene ámina mikasigú henoni nenémo nana oko kelémo lamaná itive. Itó kígika kemeni nene nana nana iki meina hiziki goha alitamó neve. Nenéminoko nomive.

<sup>27</sup> \* Okulumakutí lumu ve gihila neza aménehini lapaná nenémo numupiló itekiko, agelova mukí nene kelémoko lemekinake vegená mukí mikasigú iki miliki iaká niamó nenémini ago helegáa lihima kimitomó neve.

<sup>28</sup> Neza lamaná lo likimitoze, gililo. Lekelisi ató nene nia vegená lekelikutí nene lugáa makó hili asú inamiki ha niko okulumakutí lumu ve gihila neza liminake agulizaki vetini loló oleketatomámámini zámua nene lamaná oko utó okiko lekelisi ániganígave, loko limó.

## 17

*Izesuni agupe haitolímíni imó*  
(Mak 9:2-13; Luk 9:28-36)

<sup>1</sup> \* Izesú hoza gamena 6-a minomo noitike Pitani Zemusini itó Zemusini agunala Zoninigi kelémoko kezáikó agoka hána makokú itemó.

<sup>2</sup> Naneloka itiake kogómulaló nene Izesú haitó agupe ale luhamó. Okulumakú agupe ale luhoake nego, agoka agepa nenémo ho silikakéna nenéminoko noigo, goláa nenémo gizopa vae loko minamó.

<sup>3</sup> Lá okago, Ómasímíni agepagutí gakó emane amunaló iaká asi ve Ilaizako Moseko nene utó i kimikasigo, keza Izesugegi gakó ligili hagili amó.

<sup>4</sup> Ligili hagili ikago, ániagiake, Pitá nene Izesuni láa loko lo amimó: Guivahanitemaka, imaneloka minuhá laga okaze. Nenemú gelekako nene imaneló gaizopa losive makole geleketatunize, makó geile, makó Ilaizanive, makó Mosenive.

<sup>5</sup> \* Loko noli agepági límusi saheheváa nene lemeko ze hitokimikago, límusigutí Ómasímo láa loko limó: Imane nigika amenou gipáne noimó nene ániigo numu helekuze, lekeza nene gakoláa gili alilo.

<sup>6</sup> Loko lokago, izegipala zuha keza nene mikasigú kogoka hiziki akiake kehelele vizekago, kígisa kígizakutí nene guli guli oko minamó.

<sup>7</sup> Lá niago Izesú nene voko kugupeloka ale nogilike láa loko limó: Lekelegesá legemiko otemave.

<sup>8</sup> Loko lokago, otiki ániagamó nene Izesú ezáagó noigo ániagamó.

<sup>9</sup> Ániagiake, Izesugegi agokagutí nilemeke Izesú láa loko lo kimimó: Agokaló lekeza netá matá ániagamó nene vegená litá iki avetó iki li kememilo. Nénisi okulumakutí lumu ve gihila heleneitokutí iteko vokugo li kimitaze.

<sup>10</sup> \* Loko lokago keza láa líki loká itake lámó: Gologí oletati vema anitemigo Ilaizá goí oko anititive líki monó mogona apí ikimiaká ve nenete nanamú iaká niave.

<sup>11</sup> Líki likago nene eza láa loko limó: Ilaizá goí oko aniteko netá matá mukí ale vavá itive líki lamaná linamóza,

<sup>12</sup> \* neza lo likimitoze, gililo. Ilaizakitana noi vema mota anitekamóza, ániagi vevesamake kezáini kagata gele netá golesa líli itiki minamó. Keza ámináminiki okulumakutí lumu ve gihila není nene miluma netá nimirigave.

<sup>13</sup> Loko Ilaizakitana vemú limó nene monó nagamí holokimiaká ve Zonikumú nolinae líki gelemó.

*Izesú holosi golesagi mína gipa alémo zokamó*  
(Mak 9:14-29; Luk 9:37-43)

<sup>14</sup> Lá iake, agokagutí limiake vegená mukí niatoka ikago nene, ve makolímó ake Izesuni amatoka alapusa hizike láa loko limó:

<sup>15</sup> Guivahanínemaka, gipánemú nene milumaváne gelemane. Eza negi hizeake sehovala veleake minake, lokú ahe itó nagamikú ahe lemeko pou loko akoaká noive.

\* 16:24: Mat 10:38; Luk 14:27      \* 16:25: Mat 10:39; Luk 17:33; Zon 12:25      \* 16:27: Mat 25:31; Age 62:12; Lom 2:6

\* 17:1: 2 Pit 1:17-18      \* 17:5: Apí 22:2; Age 2:7; Isa 42:1; Mat 3:17, 12:18; Mak 1:11; Luk 3:22; Gapo 18:15      \* 17:10:

Mal 4:5      \* 17:12: Mat 11:14

<sup>16</sup> Izegipaka zuhate alími zokatahe loko keitoka alémoko vumóza, lá imi vaha vaha alími zokamave.

<sup>17</sup> Loko lokago, Izesú láa loko limó: Lekeza ató imane gili alévolé amake mulutikú amanapa iki minamó neneta lekelikumú goselé nepelekave. Lekezagi gamena gamena minoloko voko mininake nene lokogohí gehekogó minatohe. Loko loake nene, izegipama nene nénsi noutoka alímiki alo.

<sup>18</sup> Loko lokago, alímiki ikago, Izesú nene ámina holosi nene gahá amekago ahulomioko vimó. Vokago, izegipama ámina gamenalóisi lamaná okago nene,

<sup>19</sup> izegipala zuha lezategó Izesuki makó minunike loká otoko leza nene holosima nanamú apeleko amiselemuháma neve.

<sup>20-21</sup> \* Loko lokuko, láa loko lo limimó: Lekelisi nene gele alévolé oakatini nene alínipa minokago lá amave. Lamaná lo likimitoze, gililo. Lekelisi gili alévolé niamó nenémo komá netá netimóza, masteti gihila komamámo goloko iteko napa napa oaká noimómáminoko amuzavagi netimó nene, agoka imane mino olové ozo liki litamó nene hanuva mino olové itimó neve. Itó lekelsi nene netá makó líli amitáminoko nomive, loko limó.

*Izesú ezáa alika hiliti gamenamú goha lo kimimó  
(Mak 9:30-32; Luk 9:43-45)*

<sup>22</sup> Koma minomo noiteko izegipala zuha lelémoko vike Galílaia mikasigú vo aniteake nene Izesú láa loko lo limimó: Okulumakutí lumu ve gihila neza nene mini hána amiki vegenalitini kigizakú nilími milikiko,

<sup>23</sup> nipili hilitamóza, gamena losive makole minokinake heleneitokutí goha otinogo uve. Loko lo lemekago, izegipala zuha leza mulute gitihiná imó.

*Monó zagusavémini takisi moni ahuloaká gakó*

<sup>24</sup> \* Minoko nene Kapanao numutoka atiginá oko vokuko, monó zagusavémini takisi aliaká a ve nenete Pitáni amatoka vake loká itake láa liki lamó: Monó tisatini nenémo monó zagusavémini takisi moni ahuloaká noihe.

<sup>25</sup> Líki likago, Pitá nene nana ive. Moloaká noimole. Láa loake, numunagú iteko gakó nene Izesúni velesá lo amenamigo, Izesú loká otake láa loko limó: Saimoga, geza nanave loko nogelene. Imane mikasigú kugulizaki véinite hí vegenatokatí takisi moni aliaká niave. Kezáini vegenáini zuhalokatí aliaká niahe itó gutá a vegenatokatí aliaká niave.

<sup>26</sup> Loko lokago, Pitá nene gutá a vegenatokatí aliaká niave loko lokago nene, Izesú láa loko lo amimó: Láa lokoma mikasi amelage kugupe meina hizemiki hanuva minataze.

<sup>27</sup> Itó neza ámina mono numuni napámini amelaho nounazo, ámina takisi moni ahulamoko ha minatamóza, keza nene lelikumú gilikiko golesa okatize. Nenemú geza nonohulukú lemeko lagaha aleaká nagá nene nagamí nonohulukú ahulo molokoko lagaha ganá alitani-moláa nene gelelehá o veletoka okoko agepa ale á oko ániigozo. Lagahamámini agepagú nene moni nene ániigoko alekokoma gezagi nezagi lugupe meina hizitíni moni aleko voko kemezo, loko limó.

## 18

*Vegená mukikutí éaho livilegeko noiye  
(Mak 9:33-37; Luk 9:46-48)*

<sup>1</sup> \* Gakó láa loko lo limi zupahé nene izegipala zuha leza Izesutoka vunike láa loko loká otunimó: Ómasímo agulizaki ve napa ale utó o limikiko nene lelikutí éaho livilegeko agulizaki ve loló itimó neve.

<sup>2</sup> Loko lokuko, Izesú izegipa koma makó sele loko alémoko ake holutegú hize otemiake

<sup>3</sup> \* Láa loko limó: Neza lamaná lo likimitoze, gililo. Lekelisi nene likigika ali viligiiki aliliki limiki izegipa koma imanéminki minamítamó nene Ómasímíni avogisaló nene keké ma vaminigave.

<sup>4</sup> Makó keza nene izegipa koma imanéminki kezáinimú gilikiko lemeko minatimó nenete Ómasímíni avogisaló viki kugulizaki ve líli itamó neve.

<sup>5</sup> Ve makó nenete nenikumule líki izegipa koma áimanéminki nasahilí itatamó nenete není nasahilí inimiaká niamó gelekave.

*Golesa netakumú gala vizeaká gakó  
(Mak 9:42-48; Luk 17:1-2)*

<sup>6</sup> Itó nenikumú gili alévolé i mina izegipáne limiki minamoki keikutí hamó nene ve makolímo golesa netá alítive loko gala vizeko litimó nene, agea, Ómasímo loló otati netá

\* 17:20-21: Mat 21:21; Mak 11:23; 1 Koli 13:2

\* 17:24: Gá 30:13, 38:26

\* 18:1: Luk 22:24

\* 18:3: Mak 10:15;

nene genavagi golesa neve. Ámina vémini luvanaló gehani napa nagá ziiki age nagamikú ahelú i ahulatatímini avilegeko genavagi netá golesa loló otanogo ive.

<sup>7</sup> Itó agae, golesa netá alitave loko gala vizeko loaká suni haitopaitolímini nene mikasiuka neve. Ámina netá golesa nene hanuva utó inogo imóza, ve makolímo golesa netá alitave loko gala vizeko lomo mohona itimó nene Ómasímo nana otative. Agae, netá golivagi loló otanogo ive.

<sup>8</sup> \* Nenemú nene gigizanímohe itó gigisámohe lihima aleaká gapogú gelémo nomilikoma, hukoko nene ale ahulozo. Gigizani hamokó neiko itó gigisa hámakó neiko alévolé oko minoakalímini apakú ititaninazo. Gigizani losigi itó gigisa losigi minokoko lihima alitanitímo ló apakú gelémo molokiko, ló nene lihámike lova lova oko nomina lokú vokatanize.

<sup>9</sup> \* Itó gogómulámo lihima aleaká gapogú gelémo nomilikoma, geza hanuva hize lí okoko ale ahulozo. Gogómula hamó neiko minoko alévolé oko minoaká apakú ititaninazo. Gogómula losigi minokoko lihima alitanitímo milumámini lokú gelémo molokatize.

*Sipsip iza tolova imó nenémini anoza gakola*  
(Luk 15:3-7)

<sup>10-11</sup> Lekeza ehe tináneve. Lekeza izegipa nugunamotamónemú gilíkiko lememino. Neza nenemú lo likimitoze, gililo. Ageloninite okulumakú miniaká niamó keza nene okulumakú gamena aménehini avogisalo minake gizapa ikimiaká niave.

<sup>12</sup> Nenemú lekeza nene nanave liki nigeleve. Ve makó nenémo sipsip izava nene 100-a niakutí sipsip hamokó tolova itimó nene, vitagá amitihe. Lá oko nomive. Sipsip lugáa 99-a nene agokáú ahuloketonoko hamó legesó imolamú amuza moloko vitagá oloko vinogo ive.

<sup>13</sup> Lamaná lo nolukumuve. Eza vitagá ova ova oko sipsip iza hamóma ale utó okoko agoliza vizinogo ive. Agoliza vizitimó nene sipsip iza 99 hanuva niamoláamú agoliza vizeminogo ive.

<sup>14</sup> Itó ámináminoko lekelí ametipo okulumakú noimó nenémo izegipa nugunamotamóne lekelikutí makó nene legesó itikumú ma amu helemive.

*Gigivekaho lihima suni alegetati gakó*

<sup>15</sup> \* Gigivekaho makolímo geitoka lihima suni alegimikikoma, geza voko lekezatikó miniki lihimala alapizezo. Lá noako, geí gakó gelekikoma nene, goha gigivekahini alémo geitoka itanize.

<sup>16</sup> \* Lá onoimóza, geí gakó gelemikoma, ve hamó ahe lositá ahe kelémoko lekeza ámina lihimagi ve noitoka makó vilo. Lá ikiko, monó gotolaú gakó makó láa liki luhuva gizinamó nenémo gihila zitive:

Gakó hoza alitató nene vevená losihe losive makolehe ve makolímini mogonamú gakó hoza alitamó nene voko hee hee linogo ive.

<sup>17</sup> Lá onoimóza, keí gakó gelemikoma nene, geza monó gilina vevená lo kemezo. Itó eza nene monó gele vegealitiní gakó gele ahulokikoma, aikumú gelekako eza nene mota lihimalagi ve ániagi goselé iaká nia ve loló ino.

*Lo hoipa oaká itó amoaká gakó*

<sup>18</sup> \* Neza lamaná lo likimitoze, gililo. Lekeza mikasiuka netá makokumú li hoipa ikitatamó nene Ómasímo okulumakuka ámina netakumú lo hoipa oketatimó neve. Itó lekeza netá makokumú mikasiuka li hoipa ikitamitamó nene Ómasímo okulumakukagi ámina netakumú lo hoipa oketamitimó neve.

<sup>19</sup> Makó miní ameko lo likimitoze. Lekelikutí vevená makolitehe itó lositakó ahe keza netá makokumú nene ligika mili nupa iiki hamokó loló okiko Ómasiloka litáimó nene okulumakú améneho gele kiminogo ive.

<sup>20</sup> Itó vevená makolitehe itó losive makolehe itó lositakó ahe keza apá makotoka není nugulizakumú ali nupa itamó nene nénisi holúikú minanogo uve.

*Lihima ahulamoaká nenémini anoza gakola*

<sup>21</sup> \* Loko lokago, Pitá nene Izesuni amatoka mino molake láa loko loká otake limó: Guivahanímekama, nigivéneho makolímo gamena nanakí zupa lihima netá alenimikiko ahulotatove. Gamena 7 ahe.

<sup>22</sup> Loko lokago, Izesú láa loko lo amimó: Gamena 7 nomive. Gamena 7 ahuloto-loko vova vova noako gamena 700 loló ino.

\* 18:8: Mat 5:30 \* 18:9: Mat 5:29 \* 18:15: Luk 17:3 \* 18:16: Gapo 19:15 \* 18:18: Mat 16:19; Zon 20:23

\* 18:21: Luk 17:3-4

<sup>23</sup> Nenemú nene Ómasímini avogisalo minoakalímini ago helegáa lekelepizeko gakó makó litoze. Agulizaki ve napa makolimo gelekelé izegipalatini lihímáini netimoláamú ale hehe linogo gilimó.

<sup>24</sup> Lihima milikitinitamó ale hehe linogo apí oko hozaváa naligo, ve makó nene aitoka alímiki amó. Aitoka lihima 10 milioni kina minamó.

<sup>25</sup> Lá imóza, eza nene ámina lihima apasati moni nene ma nomimó. Lá okago nene, agulizaki ve nenémo láa loko limó: Galanava apasatikumú ezáagi itó vená izegipala izava galava itó henokanonagi nene mota vegeanalite meinava hizi asú iki alikiko megusa lilí iki minatave.

<sup>26</sup> Loko lokago, gelekelé izegipa nenémo voko agulizaki vemámini agisauka alapusa hizeko láa loko limó: Asene zenetoloko voko noako, neza voko mininake moni ale utó okinake apaso asú oko gimitove.

<sup>27</sup> Loko lokago, eza ámina hozaló vémini agulizaki ve nenémo hozaló vevamú miluma gelemiake ahulotamó. Itó lihimalagi nene hanuva ahulotamó.

<sup>28</sup> Ahulomikago, ámina gelekelé izegipama numukutí olío lemeake vike hozaló ve agive-lahini makó nene moni 100 kina amunaloka emane ameneitó nenazo, ángoake luvana aleko poló noike láa loko lo ameko limó: Geza moni gumumóma nene mukí apasoko aló nememane.

<sup>29</sup> Loko lokago, agivelaho nene agisauka alapusa hizike negénegeka nolike láa loko lo amike limó: Geza asene zeneto-loko voko noako, moni alika ángokinake apasoko gimitove.

<sup>30</sup> Loko limóza, eza gele ahuloake agivelahinima nene goní omikago nagá numukú ahulitamó. Nenegu minoko lihima asú itive loko kalapusi amimó.

<sup>31</sup> Lá okago, keza agivelage lugáa nenete ámina suni ángiaki mulúikú golesa gelemó. Golesa giliake keza nene viki agulizaki veninima aveté iki li amemó.

<sup>32</sup> Lá ikago, agulizaki ve nenémo ámina gelekelé izegipa nene sele lo amekago, okago, láa loko lo amimó: Gelekelé izegipa golesa neneka, geza negénegeka lako lako lihímaka mukí nene hanuva ahulogetumóma neve.

<sup>33</sup> Neza geikumú miluma gelegetumóma nenazo, geza ámináminoko gigivekahikumú miluma geleko lihímava nene ahulotataninazo.

<sup>34</sup> Loko loake, agulizaki veva nenémo izapaló golesa molokago miluma netá aliti-liki niviko minoko lihímavala mukí apasative loko pilisí vetini kigizakú molamó.

<sup>35</sup> Loko Izesú loake, miní ameko láa loko limó: Lekeza mukitó nene likigikagú liki-givetikini lihima ahulikitamitamó nene, není améneho okulumakú noimó nenémo áminagó oko lekelitoka loló oleetanogo ive.

## 19

*Izesú vená kimisele ahuloakakumú gakó lo kimimó  
(Mak 10:1-12; Luk 16:18)*

<sup>1</sup> Izesú nene gakó lo asú oake, Galilaia mikasi ahuloake Zutaia mikasiloka Zota nagamí vola helegaloka vimó.

<sup>2</sup> Novigo, vegená mukí ámegetiki vamó. Neneloka kivisi vegená nene kelémo zoka zoka oko minamó.

<sup>3</sup> Lá noigo, Palisaio monó ve lugáa aitoka ake amekú miliki láa liki lamó: Mosé lo hukoko li gakokú nene ve makolimo netá nemú manamú venala amisele ahulosá neve loko gizonoi móza, nene etahe etamive.

<sup>4</sup> \* Liki likago nene, Izesú láa loko lo kimimó: Lekeza nene monokú gakó láa loko nemó nene gatiki gilinamóma lakagatí molokahe:

Gozapá Ómasímo ale utó ikú emane nene veki venaki kelémo utó onoi móma neve.

<sup>5</sup> \* Itó kelémo utó oake láa loko limó:

Nenemú ve makolimohe makolimohe izolahini amelahini ahulokimioko venalagi nene kugupe kigika hamokó loló okiko apiziki minatáive.

<sup>6</sup> Loko gakó imane limó nenazo, ve aleve keza lositá hóu liki nene minaminigasive. Hamó kugupe loló onoi mó gelekave. Nenemú Ómasi nenémo kelémo apizimó nenazo vegeanalita nene kelémo hotopotó oakaláa nomive.

<sup>7</sup> \* Loko lo kemekago, Palisaio monó vete láa liki lamó: Mosé nene vená kimisilinigima nene luhuva netá giziki kimiiki kimsililo loko limó nene nanamú live.

<sup>8</sup> Liki likago, Izesú nene láa loko limó: Mosé nene hanuvamú lamive. Lekelisi ánuvane negi nagi hiziki likigika gopa ovikumule loko vená kimsilitave loko gele likimimóma neve. Lá

onoimóza, netá matá apí oko kelémo utó i gamenaló emane nene nenéminoko nomimóma nenaé.

<sup>9</sup> \* Nenemú nénisi nene láa loko lo nolukumuze, gililo. Ve makolímohe makolímohe nene venala mokoló netató negopa ha netakumú amisele ahulokoko haitó vená alitimó nene, lihima napa alinogo ive.

<sup>10</sup> Loko lokago, izegipala zuha leza íi, vegi venaki nene mogona lá oko minokanazo, vená ma aleminake hanuva gohuna minatuninazo.

<sup>11</sup> Loko lokuko, Izesú láa loko lo limimó: Ve vená mukilite gako imane aleminigave. Ómasímo zámuza kemeneimoláa kéisigó nene alitamó neve.

<sup>12</sup> Ve lugáa nene izóikini kagatupagutí vená alemoakalímíni utó inamó neve. Itó veđená lugáa nene gohana netá kimiká itó sihana gako li kimiká iaká ikago hanuva miniaká niave. Itó ve lugáate Ómasímíni luhuva hutilí oko vitikumú giliake vená aleakakumú nene kezáini óe liaká niave. Makó keza nenemú nene zámuza alinitatite gako imane gili alitamó neve, loko limó.

*Izesú izegipa komakama nóhó zeketamó*

*(Mak 10:13-16; Luk 18:15-17)*

<sup>13</sup> Ámina gamenaló nene izegipa koma koma Izesutoka kilímiki vamó. Eza agizani lutoko gotóitó molonoko nóhó zeketatíve líki kilímiki nivago, izegipala zuha leza gahá kemehá.

<sup>14</sup> Gahá noluko, Izesú nene láa loko lo limimó: Lekeza izegipa koma nene ahulikimikalo. Nenitoka ataze. Ánémináate Ómasímíni avogisalo viakalímíni mututoni nianazo, lekeza li hoipa ikitamilo.

<sup>15</sup> Loko loake nene, agizanitunú ale nogilike nóhó zeketamó. Lá oake ámina apá ahuloake vimó.

*Henonavagi ve*

*(Mak 10:17-31; Luk 18:18-30)*

<sup>16</sup> Ve makó Izesú noitoka ake láa loko loká otake limó: Tísánemaka, neza nana netá lamaná alekinake alévolé nemetameni alitomó neve.

<sup>17</sup> Loko lokago, Izesú láa loko lo amimó: Geza netá lamanakumú nanamú loká none-tane. Lamanalímíni amelaho Ómasi hámakó noinazo, mogaáne gele hee noloko netá lamanakumú loká nonetape. Itó alévolé gemetameni alitove lokoma gapo lota gako gele alekoko mukí ámegetozo.

<sup>18</sup> \* Loko lokago, ámina vémo gapo lota gako kutí hí gako kumú nolane loko lokago, Izesú láa loko limó: Gapo lota gako lá oko neve: Vegená kepele helemo. Ve aleve suni ale gopa oko huko ezega emega amo. Gumina amo. Soza hakupá gako lamo.

<sup>19</sup> \* Geza nene izokahiko amekahiko kugulizá ale otezo. Gezakamú geleaká noanimómáminoko gívegekaginimú geleko gígika kemezo.

<sup>20</sup> Loko lokago, gosohá vemámo láa loko lo amimó: Ámina lo huka gako mukí nene ámegetoaká noumóma nenaé. Makó hí netakumú ligitagani okuke alemuve.

<sup>21</sup> Loko lokago, Izesú láa loko lo amimó: Geza gígika avasavagi minative loko geleokoma, voko henonika mukí meinavaló moloko moni aleoko gohogó veđená kemekoko oko némegetozo. Lá okako, okulumakú alévolé helisa henoni nene geitoka utó inogo ive. Loko lokago,

<sup>22</sup> gosohá ve nenémo ámina gako geleake henona vaí oko minamó nenazo, gona moloko kimítohe loko agata gilitímo mulunagú gena avisekago vimó.

<sup>23</sup> Novigo, Izesú nene izegipala zuha lo limike láa loko limó: Neza lamaná lo likimitoze, gililo. Henóiki ve nenete okulumá lapanató silipa iki ititamó neve.

<sup>24</sup> Goha makó lo likimitoze. Kamele iza nenémo nakasi vovónagú voakaláa nene vávani oko nomimóza, henonavagi vémo Ómasímíni lapanató voakaláa nene genavagi golesa neve.

<sup>25</sup> Loko lokago, Pítá láa loko lo amimó: Gelenape. Leza mukí netá matate ahulokunike éaho agutó vízekiko minoloko voko minative.

<sup>26</sup> Loko lokuko, Izesú gonú lepele hee lonoike láa loko lo limimó: Vegenalite nenémini itamoláa nomimóza, Ómasi nenémo loló itove loko i netá mukí hanuva loló inogo ive.

<sup>27</sup> Loko lokago, Pítá láa loko lo amimó: Gelenape. Leza mukí netá matate ahulokunike geí gémegetokune. Lá onoimó nenazo, leza alika netá makó alesá nehe.

<sup>28</sup> \* Loko lokago, Izesú láa loko lo limimó: Neza lamaná lo likimitoze. Alika netá matá mukí gosohá utó iti gamenaló nene okulumakutí lumu ve gíhila neza lapanánegi noinake gízapa okimiaká siató nougo, némegetiaká nia ve 12-a lekeza ámináminiki lapanatiki miniki

\* 19:9: Mat 5:32; 1 Koli 7:10-11

\* 19:18: Gá 20:13-16; Gapo 5:17-20

\* 19:19: Gá 20:12; Gapo 5:16; Liv 19:18

\* 19:28: Mat 25:31; Luk 22:30

gonanalivagi siá 12-a nenelô miniki Isilae vegeñalitinî mulusi 12-a gizapa ikitiki gona milikitanigave.

<sup>29</sup> Ve vená mukî nenî nugulizakumule liki numúinihe itó gouna zuhahe izóikinihe améikinihe itó izegipáinihe mînihe ahulatamó nene ahulatátimîni meinava aliliki itiki alitaze. Itó minova minova oaká kemetameni alinigave.

<sup>30</sup> Itîna goí ina vegeñakutî mukilite alika milanigave. Itó alika milina vegeñakutî mukilite alika goí inigave, loko limó.

## 20

### *Vain mikú hozaló vemú anoza gakola*

<sup>1</sup> Ómasîmîni luhuva hutilî oko vitikumú hoza aleakalîmîni meinaváa nene hamó lelegitó minatítimîni mogona lá oko neve. Ve makolîmîni mikasi napa minamó nenémo neteká holugú otekoko vain minagú hoza alitave loko hozaló vemú vitagá oko vimó.

<sup>2</sup> Vike hozaló vete aliaká amómáminiki gamena hamotó nene 1 kina alitave loko lokago gili amikago vain minagú kimiselekego hoza alitamó.

<sup>3</sup> Hoza nalego, neteká ho itekago 9 kilokumaló nene vike áñigamó nene maketiloka ve makó hanuva niago áñigamó.

<sup>4</sup> Áñoake lekezagi nene vain mikú hoza alitamó nene moni nene hoza alita avotigila oko likiminogo uve.

<sup>5</sup> Loko lokago, keza nene viki hoza alemó. Holisakaki itó únakaki 3 kilokumagi voko áñigamó nene ámináminigó imó.

<sup>6</sup> Únaká 5 kilokuló nene maketiloka voko áñigamó nene ve makó lugáa nene hanuva otinago áñigamó. Áñoake lekeza neteká únaká imane gamenaló nana okago hanuva otinave.

<sup>7</sup> Loko lokago, ve makolîmo hoza lemémive, liki likago, eza láa loko lo kimimó: Lekezagi nenî vain mikú viki hoza alilo.

<sup>8</sup> \* Loko loake únaká molokago, vain minî amelaho nene hozaló gizapa veva láa loko lo amike limó: Hozaló ve sele lo kemekako, ikiko, meinaváa kemezo. Alika hozaló a ve nene moni kemeloko novoko goí iki iki hoza alemoláa nene keme lutegezo.

<sup>9</sup> Loko lokago, gele amekago, únaká 5 kilokuló hoza ale vema nene 1 kina alikago,

<sup>10</sup> keza goí iki hoza ale ve nene meinava napa alitupe liki gelemóza, ma nomimó. Kezagi nene 1 kinasí alimi vamó.

<sup>11</sup> Naleke vain minî amelahini nene gahá amiki

<sup>12</sup> láa liki lamó: Keza alika a ve nene hoza gamena koma aletó meinava kezagi hamolîminokogó lemekane. Lá onoimóza, leza nene genavagi hoza ho napa lató itó hómo lugupeló lake govîsi lipiligo miluma geleko alekunimómave.

<sup>13</sup> Liki likago, minî amelaho nene keí holúikutî ve makó láa loko lo amimó: Nigivénega, neza gelémo golesa amuve. Leza ligika molo hamó okusike 1 kina alitane loko lokusimóma neve.

<sup>14</sup> Geza meinavaka alekoko vozo. Meina gumumó nene hamolîminokogó alika a ve nene kimitove loko gelenouve.

<sup>15</sup> Nana onoiwe. Neza ámina monînetunú netá makó loló itove loko gelenoumóza, nene ma akohenamihe. Neza netá lamaná alegetumóza, geza nenemú gelekako golesa onoihe, loko minî amelaho limó.

<sup>16</sup> \* Loko Izesú loake minî ameko láa loko limó: Ámináminiki itînasa alika milina vegeñá nene alika goí inigave. Itó itînasa goí ina vegeñakutî mukilite alika milanigave, loko limó.

### *Izesú ezáa alika hilitikumú gakó ligo losive makole imó*

*(Mak 10:32-34; Luk 18:31-34)*

<sup>17</sup> Izesugegi nene Zulusale numutoka tivinigi niake gapoló nivake izegipala zuha 12-a nene lelémo apazá zeake láa loko lo limike limó:

<sup>18</sup> Gîlîlo. Itîna nene Zulusalega notune. Neneló okulumakutî lumu ve gihila nenî nene guguni giziaká ve napagi itó monó mogona apí ikimiaká a vegi keí kigizakú milikiko, neneló gonî inítiki nipîli hilita gakó li hukanigave.

<sup>19</sup> Lá iiki, hetoka vetîni kigizakú nilîmi milikiko, gopoguka linitiki segi nogosanitunú nipîliiki zohota zaló nipîli hilingave. Lá ikiko, gamena losive makole minokinake goha otinogo uve, loko limó.

### *Zemusiko Zoniko loká itasi netá*

*(Mak 10:35-45)*

<sup>20</sup> Gamena nene zupa Zepetaioni venala nenémo gipala lositá nene Izesutoka kelémoko vike gupá ze amike netá makokumú gele nimitane loko nouve, loko limó.

<sup>21</sup> Loko lokago, Izesú nene nanetakumú givisekago nolane. Loko lokago, eza láa loko limó: Gele nemekako, gugulizaki ve napa loló okako geí gizapaló nene gipáne losi imane nene gonanalivagi siató gililika luga luga minatáive loko noluve.

<sup>22</sup> Loko lokago Izesú nene ámina ve lositá láa loko lo kimimó: Lekeza loká initasi netalímini mogona gili gopa ikasike nilasive. Nénisi nene ekesá netá natomó nene lekelisi nene áminagutí hanuva natáimó nehe. Loko lokago, keza nana ive. Hanuva natíimóma nene.

<sup>23</sup> Liki likasigo Izesú láa loko lo kimimó: Ekesá netá natomó nene lamaná lekezagi natáimóza, není nigilika luga luga minoakaláa není netá nego likimitohe. Améneho ale vavá oketa vegealitini siakumú nilasive.

<sup>24</sup> Loko lokago, izegipala zuha lugáa 10-a leza ámina gakó gelekunike ligiveteginimú mukhá kepelekuko,

<sup>25</sup> \* Izesú nene sele lo limike láa loko limó: Mikasigú kugulizaki ve keza mukí nene gelekelé izegipáini nene kagahaisiuka limitigí iki niago gizapa ikimiaká niave. Itó guivahani keza nene vege ná ámeme náa kiviligiki miniaká niave. Nene lekeza mota gilina móza,

<sup>26</sup> \* lekelitoka nene lá oko minamitize. Lekelitokatí makó nenémo nugulizaki ve minatove loko nolokoma hanuva lemetigí oko gelekelé oleketoko minative.

<sup>27</sup> Itó vege ná mukí kivilegeko minatove loko nolokoma lemeko lekelí megusa izegipa loló oletakanogo ive.

<sup>28</sup> Okulumakutí lumu ve gihila nénisi nene lekeza gelekelé initatave loko lememuve. Vege ná mukitoka gelekelé oketoko meina hízeko gologí oketatove loko minoko aleko nugupe ahulananogo lumumóma neve, loko limó.

*Izesú kogómula lika ve lositá ale goloutoketamó*

*(Mak 10:46-52; Luk 18:35-43)*

<sup>29</sup> Izesú makó vunike Zeliko apá ahulunimó. Ahulokunike novuko, vege ná mukí nenete sii sii liki lémegetiki vamó.

<sup>30</sup> Lá niago nene, ve lositá kogómulaló alimó nenetosa gapoló minasike, Izesú noave liki nilago gilikasike, Izesuni gamoga giki sele lasike láa liki lasimó: Guivahani geza agulizaki ve Tevitini agávolaagamaka gologí oletatane loko lo mololeta vetemaka, lelikumú milumate geleetamane.

<sup>31</sup> Liki nilasigo, vege ná mukí nenete legesó iki minatáive liki gahá kememó. Lá amóza, keza gili ahulikaside pigi viziki sele lasike láa liki lasimó: Guivahani geza Tevitini agávolaagamaka, lelikumú milumate geleetamane.

<sup>32</sup> Liki nilasigo, Izesú nene vike gapoló noike sele lo kemekago, ikasigo láa loko limó: Lekeza nana netá aleketatokumú nilasive.

<sup>33</sup> Loko lokago, logómula imane ale panava zeletatane loko nolusive.

<sup>34</sup> Liki likasigo, Izesú nene milumaváini gelekimiake kogómulaló ale nogiligo, ámina gamenaló kogómula goloutokago ánikikasike Izesuni ámegetiki vasimó.

## 21

*Sigaga litanigi ago Izesú Zelusalega vimó*

*(Mak 11:1-11; Luk 19:28-40; Zon 12:12-19)*

<sup>1</sup> Lá okago, keza vake Zelusale apá ali alitiake Petepage numutoka Olivi agoka agisauka nene vi anitémó. Neneloka vi anitiake, Izesú nene izegipala zuhagutí ve lositá nokimisilike

<sup>2</sup> láa loko limó: Lekeza viki helegaloka apá komaló vi anitiiki nene, toki iza izolahiko gipalago nene nagá zikitinamó nene ániigiiki vinasiki imaneló kilímiki alizo.

<sup>3</sup> Itó vinasiki aliki nisiko nene, ve makolímo loká noleketikoma Guivahanitémo hoza nego imane izamú lokago nousive liki lilizo. Láa likisiko litá oko gele lekemekiko vinasiki aliki anigasive.

<sup>4</sup> Loko lokago, vasimó nene hanuva lá amasimó. Ómasímini agepagutí gakó loaká ve makolímo anoza gakó luhuva gizamó nene haha okative loko lá asimó.

<sup>5</sup> \* Nene láa loko luhuva gizamóma neve:

Zaion agokaló vege ná láa liki li kimilo: Gilinahe. Agulizaki velini nenémo lekelitoka novive.

Eza lemetigí oko noike nene toki izámini amupiló iteake noave. Toki izámini akaleva nenémo agohí gigo húane novive.

<sup>6</sup> Itó izegipala zuhamate keza vasike Izesú li gakó nene gili alikasike,



<sup>7</sup> toki iza izolahiko gipalago nene kilimiki asim0. Kilimiki ikasike nene, luhoaká g0ini nene gololohá ikasike toki iza amegesamal0 milikasigo, Izesú nenel0 iteko minam0.

<sup>8</sup> Noigo, mukí vejená nenete g0ini nene gololohá iake gapogú nene avilisá itam0. Itó lugáa nenete kokonasi agila letiake gapogú nene avilisá itilikí vam0.

<sup>9</sup> \* Lá niago, vejená mukí goí iká alika miliká am0 nenete gakó napagutí láa liki lam0: Agae, Tevitini agávolagamaka, gegepoka litune. Guivahanitémini gakotó anitelimikane. Ómasímolo lusa gegetative. Agae, veletoka okulumakú Ómasi agepoka litune.

<sup>10</sup> Liki likago, Zelusalega ite anitekago, apá amelage keza nene mulúini itim0. Mulúini iteko séna gekago nene, éaho noago nilave liki likago,

<sup>11</sup> Ómasímimi agepagutí gakó loaká ve Izesúma Galilaia mikasigutí Nasalete numutotí ve nene noave, liki lam0.

*Monó zagusavemú lo hukoketamó*

(Mak 11:15-19; Luk 19:45-48; Zon 2:13-22)

<sup>12</sup> Izesú nene vike monó zagusave napagú nene iteko ániagoake, áminagú moni meina kona ali volaló imaló a vejenáma kimisele ahuloake, haitó mikasigutí moniló ámina mikasigú moni kimiaká a vetini holoma aleko gululupa soake, itó Ómasímimi guguni gizi aminigi nama luhusi miliaká a vejenalitini holoma aleko gululupa soake,

<sup>13</sup> \* láa loko lo kimim0: Ómasímilo li gakó makó nene monó gotolaú láa liki luhuva gizinamóma neve: Není numunimú nene Ómasiloka loaká numunive liki litave liki luhuva gizinamóma neve. Láa onoimóza, lekeza nene alími maketi numuni lilí inam0 nene guminaló vete halá giki miniaká geha mulí lilí ikam0 geleaká noive, loko lim0.

<sup>14</sup> Lá oko monó zagusaveú noigo, vejená kogómula likam0 itó kigisa kigizat0 alim0 nene aitoka ikago kelémo lamaná oko minam0.

<sup>15</sup> Lá noigo guguni giziaaká a ve napa itó monó mogona apí ikimiaká ve nene golivagi netá oko moloko im0 nene ániagiake, itó izegipa koma nenete monó zagusaveú minake gopaga lake sigaga sagaga litiki, Tevitini agávolahove gegepoka litune liki nilago giliake, kizapaló molokago,

<sup>16</sup> \* gakó nilam0 nene gelemape liki likago, Izesú láa loko lo kimim0: Imane vejenalite sigaga nilinitam0 nene gelenoumóza, lekeza nene monó gotolaú gakó makó lá oko nem0 nene gatinamóza, lakagatí molahe:

Geza lokako namuni keza aminí ninam0 nenete sigaga ligitiki gegepoka linigave.

<sup>17</sup> Láa loko lo kemeake, Zelusalega ahuloake Petania numutoka vike límugusi zekago neneloka akam0.

*Gohuna za usí vizim0*

(Mak 11:12-14,20-24)

<sup>18</sup> Akoake g0 lokago, neteká Izesú nene nene Zelusalega goha novike gaúna olam0.

<sup>19</sup> Gaúna olokago, gohuna za makó nene gapo gohalaló nego ániagoake mogonagú noike gihila zeneihe loko ániagam0. Ániagam0 nene agilag0 minokago ániagoake gohuna za nene láa loko lo amim0: Geza nene gihila makó zemoko gohuna loloko voko minatanize. Loko noli agepagi ámina za nene osagava vizim0.

<sup>20</sup> Osagava vizekago, izegipala zuha leza ániagokunike sigaga loko za imane nana okago litá oko osagava vizive.

<sup>21</sup> \* Loko lokuko, Izesú nene láa loko lo limim0: Neza lamaná lo likimitoze, gililo. Lekeza nene lakagata losi gelemilo. Gili alévolé iki minatam0 nene imane gohuna zamú lum0 nenéminiki lekeza alika lilí inigave. Itó neneg0 nomive. Lekelisi gili alévolé iminiki agoka makó nene vazane agoka litá oko zeko akutooko age nagamikú holamane liki litam0 nene gakotini gele alitim0 neve.

<sup>22</sup> Itó Ómasiloka netá makokumú voká linigi nene, gili alévolé inikig0 litam0 nene ámina netá alinigave, loko lim0.

*Zámuzamú Izesuni loká itam0*

(Mak 11:27-33; Luk 20:1-8)

<sup>23</sup> Lá oake nene vike monó zagusaveú goha itike monó lo kemeko minam0. Lo kemeko noigo, guguni giziaaká ve napa itó monó gizapa ve keza Izesutoka ake gimivagú miliki láa liki lam0: Geza imaneloka netá matá azozá alenim0 nene éahini gakotó alene. Itó éaho lokago alenim0 neve.

<sup>24</sup> Liki likago, Izesú nene láa loko lo kimim0: Nezagi gakó makó loká oleketatoze. Li nimikiko nénisi nene éahini gakotó imane netá lá oaká nouhe nenéa nene lo likimitove.

<sup>25</sup> Zoní nene monó nagamí holokimiaká hoza alimó nene hikutí ale utó ive. Ómasímini gakató alihe itó mikasiuka vegeñalitini gakató alimó neve. Loko loká okimikago kezáitoka ligili hagili niake ámina gakató nana oko ale viligoko lo amitune liki gelemó nene gopa okago, láa liki gelemó: Leza Ómasímini gakató ale utó imole losá nene, eé, lekeza nanamú aí gako nene gili alévolé amave, loko linogo inae.

<sup>26</sup> Itó vegeñá mukí nenete Zonikumú nene Ómasímini agepagutí gako loaká veve liki linamóma nenazo, hanuva vegeñalitikutí ámina hoza ale utó imole losá nene vegeñalite nana ilitatahe loko lehelele vizekave.

<sup>27</sup> Liki kezáitoka liake láa liki lamó: Zonini mogona ma gelemune. Liki likago, Izesú láa loko lo kimimó: Láa likima neza netá matá imane aleaká noumó nene, éahini gakató lá oaká nouhe nenegí ámina oko lo lekememinogo uve.

#### *Gipa lositalitini anoza gakola*

<sup>28</sup> Gakó makó láa loko lo likimitoze, giliki áñigalo. Ve makolímimi gipala lositá minasimó. Améipo nene ganá gipala nene láa loko lo amimó: Geza gipánemaka, itínasa nene voko vain mikú nene hoza alezo.

<sup>29</sup> Loko lokago eza alemitove loko loake alika nene genezala ale viligoake gopa voko alimó.

<sup>30</sup> Lá okago, alika gipala nenémo amelaho nene ámina gako lo amekago, alitove loko loake vike hoza alemoko zogozogo vizeko minamó.

<sup>31</sup> Itó lekeza nene amelahini gako éaho gele alimole liki nigeleve. Loko lokago, keza ganá gipala nenémo gele amimole. Liki likago, Izesú nene láa loko lo kimimó: Neza lamaná lo likimitoze, gililo. Takisi moni aliaká vema lekeza áñigi goselé iaká nia vegi itó gapoló vená keza nene Ómasímini avogisaló nene goí i likimiki vinigave.

<sup>32</sup> \* Zoní lekelitoka aniteko hehe loko minoaká gapo nene lekelepizekago, lekeza nene monolagi gili ahulikamóma neve. Gili ahulikago, takisi aliaká a vegi itó gapoló venaki nene iki Zonini gakola nene gili alévolé ikamóma nemóza, lekelisi nene aí monó gili alévolé amake likigika ali viligamamóma neve.

#### *Vain nagá minimú anoza gakó*

*(Mak 12:1-12; Luk 20:9-19)*

<sup>33</sup> \* Loko Izesú loake makó láa loko limó: Neza anoza gakó makó litoze, gililo. Ve makó nenémo mikasiva napa minokago, makotoka vain nagá zuhá o asú oake vego vego oko geisa hize asú oake, gihila mí zeko liliká ziti gale legeake, gizapa numuni hána geake, gizapa iki niko meinava likimitove loake vegeñá makó nene gutá kemeake, mikasi makotoka venoni vimó.

<sup>34</sup> Voko noigo, gihiláa guzá loaká gamena alitokago, gihiláa makó alinitiki atave loko agulizaki ve nenémo gelekelé izegipala nene kimisilimó.

<sup>35</sup> Kimiselekago, vi anitikago, mító gizapa iki mina ve nenete kigizató aliake, makó nene kigizanitunú apelemó, makó nene apili helemó, makó nene gehanitunú apelemó. Lá ikago, gelekelé izegipa makolite viki agulizaki véinima aveté iki li amemó.

<sup>36</sup> Li amikago, geleake, gelekelé izegipa mukí goha kimiselekago vamó nene ámináminiki kimisiliki kepelemó.

<sup>37</sup> Kimisilikago, vikago nene, agulizaki ve nenémo lá ikave loko ahulamike gipala hámakó nene láa loko geleake amisilimó: Není gipa gihila imane amiselekugo, agulizaki vemámini gipalama okaze liki áñigiiki nene alími lamaná itamole, loko geleneike amiselekago nene, vo anitekago,

<sup>38</sup> mító gizapa ve keza áñigiake kezáitoka láa liki ligili hagili amó: Imanémo nene mikasi amelahini gipala noinazo, minokoko imane hoza nene ale lá inogo ive. Nenemú nene lélisi apele helekuko helisa henoni nene lelí loló itive,

<sup>39</sup> liake nene ágizató aliake vain mikutí nene ahelú iliki vake apili helemó. Lá ikamó nenazo,

<sup>40</sup> nenemú nene mini amelaho aniteoko nagá mini gizapa ve nene nana oketatimó neve.

<sup>41</sup> Loko Izesú nene loká okago, keza láa liki li amemó: Áisi lamaná ámina ve golesa kepele gesá itimóma nene. Itó vain mini nene haitó gizapa ve gutá kemekiko, keza nene guzá lati gamenaló nene gihiláa gona miliki amitave.

<sup>42</sup> \* Liki likago, Izesú nene láa loko miní ameko lo kimimó: Monó gotolaú gakó makó lá oko neve:

\* 21:32: Luk 3:12, 7:29-30

\* 21:33: Isa 5:1-2

\* 21:42: Age 118:22-23

Numuni giaká vete gehani napa makó áni gi ahulamó nenémo ge ha lapusa alévoleláa loló oake noive. Ámina netá nene Guivahanímini gaktó utó okaze. Vegená neneta áni gokuko nene lamaná okave.

Liki luhuva gizina gakó nene lekeza gatinamóza, lakagatí molahe.

<sup>43-44</sup> Nenemú lo likimitoze, gililo: Ómasímini gizapa oli kimitakiámini lusa nene Zuta ve lekelitotó ipá okoko haitó vege ná kiminogo ive. Lá okiko lusámini gihiláa ámina vege nalite ali utó inigave, loko lo kimimó.

<sup>45</sup> Ámina anoza gakó nene lo asú oko lokago, guguni gizia ká ve napa itó Palisaio monó vema keza giliake láa liki lamó: Agae, anoza gaktó gehanimú limó nene Izesuni áni go ahulunikumú lokave, liki giliake nene

<sup>46</sup> agizató alekinake nagá amítune liki lamóza, Izesukumú nene vege ná mukilite Ómasímini agepagutí gakó loaká veve liki likamó nenazo, vege nalite lipilikatave liki kelegesá legekago ahulamó.

## 22

*Vená ale kemeaká nosakumú anoza gakó*

*(Luk 14:15-24)*

<sup>1</sup> Izesú goha miní ameko anoza gakó láa loko limó:

<sup>2</sup> Okulumalímini lapanalímini mututoni líli itakumú nene agulizaki ve makolímó netá matá oko moloko imó neneloka lo moloko avetó oko lo likimitoze, gililo. Agulizaki ve makolímó gipalaló vená alemo molanogo noike nosánetá ale vavá imó.

<sup>3</sup> Ale vavá noike gekelelé izegipala kimiselekago, goí oko alesa molo kimi vege ná nene iki nosánetá natave liki víki lí kememó. Lí kimikago, keza nene amána pa ikago,

<sup>4</sup> gekelelé izegipalama goha nokimísilike láa loko limó: Neza alesa molo kumu vege ná nene víki láa líki lí kimilo: Nosánetá nene mota ale vavá okaze. Pulumaká iza gehato minamoláama itó nosánetá haitopaitolímini nene mota ale vavá okave. Lekeza vená ale kemeaká nosató nene alo.

<sup>5</sup> Loko lokago, keza gekelelé izegipa nenete víki ámina gakó lí kememóza, keza gilikago goselé kipilimó. Gili ahuliake ha-gelegele amó. Makó nene míiniuka vamó. Itó makó lugáa nene hozagazanikú vamó.

<sup>6</sup> Itó lugáa nenete agulizaki vemámini gekelelé izegipa nene kigizató alinake ali golesa iki kepelemó. Makó lugáa nene kipili helemó.

<sup>7</sup> Lá ikago, eza agulizaki ve nenémo gele golesa oake, izapaló golesa molokago, pilisi veva kimiselekago, vake ámina gekelelé izegipala kipili hele vege náma kipili gesá iake numuni apáini nene vitú vitú iki ali golesa amó.

<sup>8</sup> Lá ikago, agulizaki ve nenémo gekelelé izegipalama láa loko lo kimike limó: Vená ale kemeaká nosá nene mota ale vavá okumóza, alesa molo kumu vege nalitini kemetameni nenémo ámina nosá nata avotigila oko minamive.

<sup>9</sup> Nenemú lekeza gapo izana koma komagú víki vege ná nánigikima alesa míli kimikiko vená ale kemeakató nosá ale vavá uhá nene iki natave.

<sup>10</sup> Loko lo kemekago, gekelelé izegipama nene víki gapo koma komagú mihina ake vege ná vóvotiki golesa lamaná mukí nene kílimiki ake nosá ale vavá i numukú nene iki vái i lamaná amó.

<sup>11</sup> Vegená mukí iki niago, agulizaki ve nenémo áni goketanogo itimó. Itike ve makó áni gamó nene vená ali keme gamenámini luhiaká nia gó lamaná luhamike noigo, áni goake,

<sup>12</sup> agulizaki vémo láa loko lo amimó: Nigivénega, nana okago vená ali kiminigi ní-amómámini luhoaká gó luhamanike imanegú iteko noane. Loko ligo, eza gakó litimoláa nomimó.

<sup>13</sup> \* Lá okago, agulizaki ve nenémo gekelelé izegipalama láa loko lo kimimó: Lekeza agisa agizató nagá aliiki ali hetó iiki lí mugusi apakú ahulimikiko lemeko minino. Neneló minoko ive nama oko míluma maluma geleko agepa atalá oko minanogo ive.

<sup>14</sup> Loko Izesú lo kemeake makó láa loko limó: Ómasímo vege ná mukí alesa molo kemeneimóza, vege ná lughakó kelémo etó okago itiaká niave.

*Lugupe meina hizeaká gakó*

*(Mak 12:13-17; Luk 20:20-26)*

<sup>15</sup> Izesú láa loko lo kemekago, Palisaio monó ve keza vake láa liki lamó: Nana gaktotunú gehehisi gekuko nenegú apilitive. Liake nene gakó gona giziki minake,

<sup>16</sup> kezáini izegipáini zuhagutí itó Heloteni izegipala zuhagutí lugáa nene kimisilikago, Izesú noitoka víake láa liki lí amemó: Tisalemaka, geí mogonaka gelenoune. Geza

\* 22:13: Mat 8:12, 25:30; Luk 13:28

gakó gihilagó loaká noane. Gakó lamanakó lanike vejená Ómasímini gapováa vevesoko kelepizeaká noane. Vegenakumú gonukonú osá amane. Vegená iti minamó limi minamó mukí nene lelegí okogó lainim-okimiaká noane.

<sup>17</sup> Lá onoinazo, geza hanuva lo limitanize. Nanave loko nogelene. Loma gamanímini agulizaki ve napa Sísani nene takisi moni ameaká nounimó nene etahe etamive.

<sup>18</sup> Líki lamó nene amemitune loko lokikoma gamaniloka alémoko voko goní otatune. Itó hanuva amitune loko lokikoma Zuta vejenalite gili golesa itave loko Izesú nene keí gakóinímini mogona golesa hanuva geleake, láa loko lo kimimó: Genezatini lositaki neneta, nanamú giminegú milanigi nilave.

<sup>19</sup> Takisi monigutí makó nelepizilo. Loko lokago, moni makó aliki aitoka vamó.

<sup>20</sup> Vikago, loká oketake vogunahana imanegi itó imane luhuvagi nene éahini neve.

<sup>21</sup> Loko loká okimikago, keza gamanímini agulizaki ve napa Sísanive líki lamó. Líki likago eza nene láa likima nene gamanímo voká loaká noi netá nene gamani amilo. Itó Ómasímo voká loaká noi netá nene Ómasi amilo.

<sup>22</sup> Loko lokago, keza nene gakó giliake sigaga limiake ahulimiake vamó.

*Hilínitakutí otiakakumú loká itamó*

*(Mak 12:18-27; Luk 20:27-40)*

<sup>23</sup>\* Ámina gamenaló Satukaio monó vejená lugáa Izesutoka amó. Keza vejená hilinakutí otisá amave líki liaká a vejená nene Izesú noitoka ake,

<sup>24</sup>\* láa líki lamó: Tisalemaka, Mosé láa loko limó: Ve makó izegipala getamoko minoko helekikoma agunalámo ámina gevoná vená nene alekoko uvolaho hili vemú izegipala geto molative.

<sup>25</sup> Láa lokamó nenazo, gozapá uvolaho agunala 7-a nene lelitoka minamó. Lá iki minake, ganá ve nenémo vená aleake, izegipa getamike helekago, agunala nenémo ámina vená alimó.

<sup>26</sup> Alekago ámina sunímo utó o amekago, lá imi imi vake vake keza ve 7-a nene ámináminigó amó.

<sup>27</sup> Keza hili asú ikago, venáini nene alika hilimó.

<sup>28</sup> Ámina ve 7-a nenete ai vanagó minikamó nenazo, nenemú hilinakutí goha otita gamena nene ámina venáma éahini venala loló itimó neve.

<sup>29</sup> Líki galegutí oteaká gajokumú amé ziki itanigi likago, Izesú nene konotó aleko láa loko limó: Lekeza monó gotolaú gakó makó nemóma nene gatinamóza, mogonáa gelemake itó Ómasímo galegutí kelémo oteaká zámuzamú nene ma gelemake gili gopa iki nilahe.

<sup>30</sup> Keza hele vejená otita gamena nene vená aleakaláa nene nomive. Itó vená aleme kemeakaláa nomive. Okulumakú ageló nenéminiki gohuna minanigave.

<sup>31</sup> Lá onoimóza, hele vejená goha otitakumú nene gohakú loká oleketatoze. Lekeza imane gakó Ómasímo lo likimimó nene gatinamóza, mogonáa gilinamahe. Emaneloka minilíki ite vemú láa loko lonoimóma neve:

<sup>32</sup>\* Neza Avalahani Isakani itó Zakoponi Ómasi minútímina mino loko voko nominuve. Láa loko limó nenazo, nenemú kemeni helenei vejenalitiní Ómasi negopa, kemenía hanuva ne vejenalitiní Ómasi noinazo, Ómasimú gili zaginake hele vejenaki hanuva mina vejenalitiní Ómasi noive.

<sup>33</sup> Loko lokago, vejená mukí keza gakoláa lo kimikumú nene sigaga sagaga lake agae, vatí oko ale viligoko lo kimive, líki lamó.

*Li míla gajokutí napáa*

*(Mak 12:28-34; Luk 10:25-28)*

<sup>34</sup> Izesú nene gakatunú Satukaio monó vetini kegepa ze letoko lokago, Palisaio monó ve keza nene gakó nigeleke aitoka iki alesesá lake,

<sup>35</sup> keí holúikutí ve makó gakó mogona geleaká i ve nenémo Izesuni amekú molanogo láa loko limó:

<sup>36</sup> Tisalemaka, Mosé lo hukoko li gajokutí nene hilímo kivilegeko napa neve.

<sup>37</sup>\* Loko lokago, Izesú láa loko lo ameko limó: Gigika itó gemeni itó geleakaka mukí nene Guivahani geí Ómasi lehizetozo.

<sup>38</sup> Nene gakó nenémo napa iteko neve.

<sup>39</sup>\* Itó napa otigí nenémo hamolíminigó oko nemó nene lá oko neve: Gezakamú geleaká noanímámínoko gígivekaginimú geleko gígika kemezo.

<sup>40</sup> Ámina lo hukoko li gakó losi nenémo Mosé lo mola gakó itó Ómasímini agepagutí gakó liaká a vete li mila gakolímini gotoláa loló onoive, loko limó.

*Gologí oketative loko lo moloketa vemú loká oketamó*  
(Mak 12:35-37; Luk 20:41-44)

<sup>41</sup> Itó Palisaio monó ve keza alegesá iki niago, Izesú loká oketake láa loko limó:

<sup>42</sup> Lekeza Ómasímo gologí oleketative loko lo mololeketa vemamú nanave liki nigeleve. Éahini agávohaho noitive. Loko lokago, keza agulizaki ve napate Tevitini agávohahove.

<sup>43</sup> Likí likago, eza láa loko lo kimimó: Láa likima Sikalahulímo nanamú Tevitini alémo vávani okago Tevití nene ámina vemú nene Guivahaníneve loko live. Tevití láa loko limó neve:

<sup>44</sup> \* Mezaú ve nenémo není Guivahani nene není nigizani zamagaloka mino-loko voko noako, gala vega nene geí gigisa lapuvauka ahuloketanogo uve loko lo amimóma neve.

<sup>45</sup> Tevití nene gologí oleketative loko lo mololeketa vemú nene Guivahaníne ve loko limó nenazo, ámina ve nenémo nana igo Tevitini agávohahogó noitive.

<sup>46</sup> Tevitini agapilamola noitimóza, Tevitini ve napagi nene noitive. Loko lokago, ve makolite Izesuni anotó aliki li amemítamó onoive. Keza ámina gamenámini veletó nene gakó makó loká itatakumú gelego gena okago, gimivagú miliki loká itamisá amó.

## 23

*Monó mogona apí ikimiaká a vemuki Palisaio monó vemuki alévolé oko lo hukonoimole*  
(Mak 12:38-39; Luk 11:43-46; 20:45-46)

<sup>1</sup> Izesú koma nominake izegipala zuhagi itó vejená mukiki gakó lo limike láa loko limó:

<sup>2</sup> Keza monó mogona apí ikimiaká vegi itó Palisaio monó vegi Moseni akilí ali hitinake lo mola gakó mukí apí ilikimiaká niave.

<sup>3</sup> Lá inake gakó mukí li likimiaká niave. Nene giliiki ámina gakotó ámegetalo. Lá onoimóza, keza iki miliki nia kemetameni nene lekezagi lá amilo. Keza gakó mukí liaká niamóza, kezáini nene ámina gakó ma ámegetisá amave.

<sup>4</sup> Mosé lo mola gakó nenémo genavagi loló okago vetini kigínagú gíhikimikago, gihinago, kezáini nene ámina genavagi netá ma kigizani hisúinitunú kilími vatí itigí iki ma alisá amave.

<sup>5</sup> \* Netá mukí aliaká niamó nene vejenalite ángi kumu hilitive lokogó neve. Monó gotola pepa nene pokisi komagú miliake golihító miliake nagá ziaká niave. Itó kigizatoki ámina iaká niave. Luhiaká gó napaló nene gonanalisivagi luhuva hána miní amikí akotiake luhiaká niave.

<sup>6</sup> Lá inake nosáneta napa ninató nene agepaló siakumukó giliaká niave. Itó monó numukú numukú nene kovogisaló minoaká holomamú kumu heleaká noive.

<sup>7</sup> Itó vejenalite maketiloka geké lilitatave likigó, itó Tisale liki lilitatave likigó giliaká niave.

<sup>8</sup> Lá onoimóza, vejenalite lekelikumú Tisale liki li likiminigi niko gili kememilo. Ómasí hamokó nene lekelí tisá noigo, lekeza aí izegipala niake hamó lelegitó niave.

<sup>9</sup> Imane mikasiuka ve makokumú nene ametehove liki lamilo. Ametipo hámakó okulumakú noive.

<sup>10</sup> \* Itó lekelikumú nene lukugulizaki veve liki li likimikatave loko noluve. Lekelí guivahani hamó nene Ómasímo gologí oleketative loko lo mololeketa ve nouve.

<sup>11</sup> Ve makolímo ve napatini loló itove lokoma nene hanuva lemetigí oko gelekelé oleketoko minative.

<sup>12</sup> \* Lekelikutí ve makolímohe makolímohe ezáa agulizala ale otitimó nene, ezáa agulizala liminogo ive. Itó ve makolímo ezáa agulizala aleko lemeko molatimó nene, Ómasímo agulizala ale napa inogo ive.

*Genezáini losigí minakumú gakó lo hukoko limó*  
(Mak 12:40; Luk 11:39-42,44,52; 20:47)

<sup>13-14</sup> Lekeza Palisaio monó ve itó monó mogona apí ikimiaká nia ve ehe tináneve. Lekeza genezatini losigi niamó neneta Ómasímini lapanató voaká gapo nene vejenalitini kovogisaló hízi lí iaká niave. Lekezatini áminagú itisá amave. Itó vejená makó itinigi niago, hanuva itikatave liki ángi ahulikitisá amave.

<sup>15</sup> Lekeza monó mogona apí ikimiaká vegi itó Palisaio monó ve lekezagi genezatini losigi neneta, ehe tináneve. Lekeza age nagamítokagi itó mikasiukagi mihina niake vejená

\* 22:44: Age 110:1 \* 23:5: Mat 6:1; Gapo 6:8; Nam 15:38 \* 23:10: Mat 20:26-27; Mak 9:35, 10:43-44; Luk 22:26

\* 23:12: Luk 14:11, 18:14

makó lekelí izegipatini zuha lilí itave liki kilími miliaká niave. Izegipatini zuha lilí ikago, lekezatinímini iki kilími miluma apakú miliaká niago, kéisi likivilegetigi iki meinímini mututoni lilí iaká niave.

<sup>16</sup> Lekeza kigikámini agómula likonoiti vema gapo kelepizinigi niamó neneta, lekeza ehe tináneve. Lekeza nene makolímóhe makolímóhe monó zagusave agulizá oko agizani iteko litimó nene nagamí pizekikoma ha netá nemóza, makolímó monó zagusaveú goli gehani agulizá oko agizani ale oteko litimó nene nagamí pizemoko litímini inogo ive liki liaká niave.

<sup>17</sup> Lekeza negi nagi likigikámini agómula likamó neneta, nana netalímó iteko neve. Goli gehani iteko nehe itó goli gehani ale etó oko moloaká monó numuni nenémó iteko neve.

<sup>18</sup> Itó ve makolímóhe makolímóhe guguni gizoaká ita veletó neti netá agulizá oko agizani noiteko litimó nene nagamí pizekikoma ha netá nemóza, ita amupiló neti netá agulizá oko agizani noiteko litimó nene nagamí pizemoko litímini inogo ive liki liaká niave.

<sup>19</sup> Lekeza likigikámini agómula lika ve neneta, guguni gizoaká nenémó iteko nehe, itó guguni ale etó oko moloaká ita nenémó iteko neve.

<sup>20</sup> Nenémú ve makolímó guguni gizoaká italó agulizá oko agizani noiteko litimó nenémó ita veletó neti netaki agulizá oko agizani noiteko litimó geleaká noive.

<sup>21</sup> Itó ve makolímóhe makolímóhe monó zagusave agulizá oko agizani noiteko litimó nenémó monó zagusavegi monó zagusaveú minoko aleko oaká noi Ómasigi kugulizá oko agizani noiteko litimó geleaká noive.

<sup>22</sup> \* Ve makolímóhe makolímóhe okulumá agulizá oko agizani iteko litimó nene, Ómasi minoaká noi holomagi holomaló minoaká noi Ómasigi kugulizá oko litimó geleaká noive.

<sup>23</sup> \* Lekeza monó mogona apí ikimiaká vegi itó Palisaio monó vegi ehe tináneve. Lekeza genezatini losigi vese, mikú noguni mupanuha itó za silogehenigitana oko anuva oaká netá haitopaitolímíni nene aliake netá 10 10 minakutí hamopamó nene Ómasíminive liki amiaká niave. Lá iaká niamóza, lo huka gakokutí iteko minamoláa napa nene hehe loko minoko vejená gona moloaká itó likigika hize kemeaká itó Ómasimú gele alévolé oaká netá nene ahulikave. Netá matá 10 10 nekutí hamopamó Ómasi ameaká netá nene ahuloakaláa nomimóza, nolu netá napa nenegi hanuva loló oaká netá neve.

<sup>24</sup> Lekeza kigikámini agómula likonoiti vema gapo kelepizinigi niamó neneta, netá koma likigika ale gopa amoaká netá nene gizaká iki ali ahuliake lekelémó gopa oaká netá napa nene hanuva gopa niki mikilí iaká niave.

<sup>25</sup> Lekeza monó gakó apí ikimiaká nia vegi Palisaio monó vegi, lekeza ehe tináneve. Lekeza genezatini losigi nene aliake monó nagamí goni itó lape hetoláa nagamí zinake agikáagú nene guminaló suni itó lukugupémó ánigo amu hili netá nene goni vizi vaí iaká niave.

<sup>26</sup> Palisaio monó ve gigikámini agómula likonoimó neneka, geza gigikaka nagamí zeko ale goni onako hetokagi nene guluvitanogo ive.

<sup>27</sup> \* Lekeza monó mogona apí ikimiaká vegi itó Palisaio monó ve neneta, ehe tináneve. Genezatini losi nego gakó losi liaká niave. Lekeza nene gonosi milimililó veganalite ánikigiko kumu hilitive liki simeniló gonanalisi iki guhí hiliaká niamó nenémímini niave. Hetoláaloka ániigi lamaná iaká niamóza, gale agikagú nene hele veganalitíni gonosi zamuza neike anuva oaká netá áminagú vaí onoive.

<sup>28</sup> Lekezagi lá ikigó niave. Veganalite hanuva lukugupeló nánigake lekeza hehe liki niave liki giliaká niave. Likigikagú nene soza loaká gakolímó itó li huka gakó pelevesava ziaká netalímó vaí oko neve.

*Lihima alika kumupiló ititikumú gakó lo kimimó*

*(Luk 11:47-51)*

<sup>29</sup> Lekeza monó mogona apí ikimiaká vegi itó Palisaio monó ve neneta, ehe tináneve. Lekeza genezatini losigi ve neneta, Ómasímini agepagutí gakó liaká a vetini gonosi milimili numuni lamaná lilí iake hee liki iki miliki a vetini gonosi milimili nene gonanalisi ikimiake,

<sup>30</sup> leza gozapá avotegini gamenaló minutilina, Ómasímini agepagutí gakó liaká a ve makó kepele hele vejená nene kelémó vatí amutiline liki liaká niave.

<sup>31</sup> Nene gakó li utó iaká niamó nene lekezatini mogonatinimú nilave. Lekeza Ómasímini agepagutí gakó liaká a ve kipili hele vetini kagapilamó zuha niave.

<sup>32</sup> Avotikíni mogona golesa nene lekelitoka vo aleko neve.

<sup>33</sup> \* Lekeza gosihalímíni agapilamó zuha neneta Ómasímini goní nenémó lekelémó ló apakú molanogo ive. Lekeza keé liki golisi aminigave.

\* 23:22: Isa 66:1; Mat 5:34

\* 23:23: Liv 27:30

\* 23:27: Apo 23:3

\* 23:33: Mat 3:7, 12:34; Luk 3:7

<sup>34</sup> Nenemô gililo. Neza Ómasímíni agepagutí gako liaká a vegi itó monolímíni mogona apí ikimiaká nia vegi itó monó pukugutí giliaká nia vegi kimiselekugo lekelitoka vinigave. Keí holúikutí nene lekeza lugáa kipili hiliiki lugáa nene zohota zaló gánava ziki apatiiki lugáa nene monó numutikú segi nogosanitunú kipiliiki apá napa makokutí nene gímiziliki viki haitó apakú ahulikitanigave.

<sup>35</sup>\* Lá ikiko, mukí hee liki nia vevená kipili helemómámíni lihíma nene lekelí lukumupiló iteko minanogo ive. Hehe loko mina ve Epoloní apele nohiligo golani leki gamenalotí nene ve lugáa kipili hiliiki nivago, Palakiani gipala Zakaliá nene monó zavusave itó guguni giziakató nenémíni holutó noigo lekeza napelego golani lekimó keí golanímíni lihíma mukí nene lekelí lukumupiló itinogo ive.

<sup>36</sup> Neza lamaná lo likimitoze, gililo. Ámina mogonámíni lihíma valáa nene imane oko moloko nou netá ániagiaká nia vevenalitini kumupiló ite asú inogo ive.

*Izesú Zelusale vevenakumú ive imó*

*(Luk 13:34-35)*

<sup>37</sup> Kee, Zelusale vevenáise, lekeza Ómasímíni agepagutí gako liaká a ve kipili hiliiká itó Ómasímo hozaló kimiselekago lekelitoka a ve gehanitunú ahuli miliki kipili hiliiká iaká niave. Neza nene lekelí izegipatini zuha nene okolohómo izegipala ale amakuka moloaká noimómáminoko kelémo mulúneuka molanogo oaká noumóza, lekeza gili nimisá amave.

<sup>38</sup> Lekeza gililo. Ómasímo viselelikimikiko, apatini nene gámé pizinogo ive.

<sup>39</sup>\* Láa loko lo nolukumuve. Není nene goha áninagamiki miniliki viki alika Guiva-hanímíni gakató anitelimikane, Ómasímíni lusaló okane liki li niminigave, loko limó.

## 24

*Alika monó zagusave ali golesa itakumú lo kimimó*

*(Mak 13:1-2; Luk 21:5-6)*

<sup>1</sup> Izesú eza monó zagusave ahuloake novigo, izegipala zuha leza monó numunima alapizinogo aitoka unimó.

<sup>2</sup> Lá unimóza, eza láa loko lo limimó: Lekeza numuni mukí imane nánigave. Agae, neza lamaná lo likimitoze, gililo. Monó numuni napámíni gehani mukí nene apiliki tele vizikiko gehani nene amupiló amupiló iki mililiki itekutí zeko gululupa so asú inogo ive. Itó ziki lana iiki ali hutilikatilí inigave.

*Miluma gilituni gamenámíni ganá netá*

*(Mak 13:3-13; Luk 21:7-19)*

<sup>3</sup> Loko loake, koma minake, Izesú eza Oliví agokaú mitó noigo, izegipala zuha lezagó aitoka itekunike láa loko loká otoko lunimó: Geza lo lemezo. Itína utó iti netakumú lanimó nene nanahé utó itive, itó mikasiuka netá matá asú iti gamena itó geza atiginá itani gamena alitokiko nana anosa utó okiko ániogokinake gele hee litune.

<sup>4</sup> Loko lokuko, Izesú nene lonotó aleko láa loko limó: Ehe, gizapa ilo. Ve makolímó atiginá oko ato gamenamú lokogoka vizekatize.

<sup>5</sup> Ve mukilite nanitiki není nugulizató liki neza Ómasímo gologí oleketative loko lo mololeketa vema nouve liki vevená mukí kogoka vizinigave.

<sup>6</sup> Lekeza haitopaitó lovámíni gakoláa giliiki itó lova hizinigi niko nenémíni gakoláa gilinigave. Lekeza ehe tináneve. Lekeza mulutini itemino.

<sup>7</sup> Ómasímo netá nenémínáa utó itive loko lonoimóza, mukí netá matá velesá asú aminogo ive. Numutó namató vevená makolite gala véini lova ali nikimiko, itó numutó namató agulizaki ve napa makolímíni zuhagi itó makolímíni zuhagi lova hizinigave. Itó haitopaitó mikasiuka gaúna gamena utó oko mino-loko noitiko mukí mikasiuka nene imimá napa omo noviko,

<sup>8</sup> miluma netá nenémínáa utó itimó nene venalite izegipa getanigi miluma giliaká niamó nenémínoko utó inogo ive.

<sup>9</sup>\* Ámina gamenaló nene likigizató aliki viki goní ilikitiki miluma netá alilikitanigave. Itó lá niiki lekelikutí makó likipili hilinigave. Není nugulizá lekelitoka minakumule liki vevená mukí nenete mukahá likipilinigave.

<sup>10</sup> Ámina gamenaló nene vevená mukilite Ómasimú gili alévolé iakáini nene ahulanigave. Keza nene eza amimí iko eza amimí iko iki gasó eza amiko eza amiko inigave.

<sup>11</sup> Lá niko, mukí Ómasímíni agepagutí gako liaká ve sozámíni utó iiki vevená mukí kogoka vizinigave.

\* 23:35: Apí 4:8; 2 Iki 24:20-21

\* 23:39: Age 118:26

\* 24:9: Mat 10:22

<sup>12</sup> Golesa mogona nenémo hutilí noiko, vejená mukí nenete kigika kemeaká netá nene geha zinogo ive.

<sup>13</sup> \* Lá onoiómoza, makó keza gamenaváini asú ititó monó ahulamiki alévolé iki minatamó nene, Ómasímo kugutó vizinogo ive.

<sup>14</sup> Itó Ómasímini gasovaló minoakalímini gakó lamaná nene mikasi nekisa vokisauka numutó namató vejená mukitoka giliiki gili alitahe liki nene li hutilí i asú inigave. Lá ikiko gamena asú inogo ive.

*Miluma geleaká gamena napámini gakola*  
(Mak 13:14-23; Luk 21:20-24)

<sup>15</sup> \* Lekeza nene mulikizapa iti netá golesa nene apá ale golesa oaká netá gozapá Ómasímini agepagutí gakó loaká ve Tanielé nenemú limó nenémo etó o mina numukú oteneiko ánganigave. (Imane gakó gatatanimó neneka nene gakokumú gele guni ozo.)

<sup>16</sup> Ámina gamenaló Zutaia mikasiuka nita vejená nene golisi iliki agokaloka ititakumule.

<sup>17</sup> \* Keza makó numuni numupitó nita vejená nene golisi iliki limiki henoníini nene numúikutí ma aliki vamitakumule.

<sup>18</sup> Vegená makó mikuka nitakutí nene numukuka luhoaká góini alitune liki atiginá iki vamitakumule.

<sup>19</sup> Kee, izegipa kagatupagi nita vená itó izegipa namuni aminí nikimita vená nene nana itamó neve.

<sup>20</sup> Lekeza nene nolu netakutí golisi ita zupa nene golini gamenagú ahe itó Ómasímo lo mololeketa holisi gamenagú ahe utó amítive liki Ómasiloka likigó minalo.

<sup>21</sup> \* Ámina gamenaló nene genavagi netá napa utó itimó nenémo mikasi nene gosohá nego nenéminoko utó amigo minoloko iteko imane gamenaló utó amive. Nolu gamenaló nene utó okoko, nenémini veletoka goha utó aminogo ive.

<sup>22</sup> Lá onoiómoza, Ómasímo ámina miluma gilita gamena ale atuhá amítimó nene vejená makó ma kavasavagi minamitamóza, Ómasímo kelémo etó i vejenakumule loko ámina gamena ale atuhá inogo ive.

*Okulumakutí limi ve gihila atiginá iti gakó*  
(Mak 13:24-27; Luk 21:25-28)

<sup>23</sup> Ámina gamenaló ve makolímo ángalo, gologí oletati vema imaneloka utó okave, itó volane noive loko lo nolikimikoma lekeza gili zagemilo.

<sup>24</sup> Ámina gamenaló gologí oleketati ve sozámíni itó soza saza Ómasímini agepagutí gakó liaká ve utó iiki Ómasímo kelémo etó onoi vejená kogoka vizitupe liki vejenalite sigaga lita netaki soza alévolé sunigi lilí iki avevezaha inigave.

<sup>25</sup> Gililo. Imane nolu netá utó onamigo mota lo lekemekuve.

<sup>26</sup> \* Itó ve makolímo ángalo, Ómasímo gologí oleketati vema nene mikasi gomopalaló noive loko lo nolikimikoma, lekeza neneloka vamiló. Itó ángalo, eza nene vozane numukú halá geko noive liki nilikoma, lekeza gili zagemilo.

<sup>27</sup> Okumató gó melevelzá itimó nene ho noitikukatí ho nolimitoka vinogo ive. Okulumakutí lumu ve gihila neza nenéminoko omo nougo lekeza není ángi asú inigave.

<sup>28</sup> \* Netá helemó gonosiváa nekú nene nama gosúveha mukilite litá iki ángiiki alegesá iaká niave. Ámináminoko okulumakutí nolumugo mukí vejenalite ángi asú inigave.

<sup>29</sup> \* Nene gamenaló ámina genavagi netá nene asú okiko, ho nene noitiko litá oko límugusi zekiko, ikanímo hize sata amiko, itó sonohí nene okumatotí atohimí niziko, okumató amuzavagi netá nene mómoká i asú inigave.

<sup>30</sup> \* Lá ikiko, okulumakutí lumu ve gihila goha ato anosa nene okumató utó noiko, imane mikasiuka není gakó gelema vejená mulusi mukí nene ive nama inigave. Lá niiki okulumakutí lumu ve gihila neza alévolé zámuzánegi itó lapanánegi nene okulumalímini límusi amupiló nolumugo ánganigave.

<sup>31</sup> Agelóne kimiselekugo, pikilí nene anó napa nomiliko kelémo etó u vejená ezega emegatí ho noititokatí ho nolimitokatí itó mikasi nekisa vokisalokatí kilími nupa inigave.

*Gohuna zámíni anoza gakola*  
(Mak 13:28-31; Luk 21:29-33)

\* 24:13: Mat 10:22 \* 24:15: Tan 9:27, 11:31, 12:11 \* 24:17: Luk 17:31 \* 24:21: Tan 12:1; Ali 7:14 \* 24:26: Luk 17:23-24 \* 24:28: Luk 17:37 \* 24:29: Isa 13:10; Zoe 2:10,31, 3:15; Ali 6:12,13; Izi 32:7; Isa 34:4 \* 24:30: Tan 7:13; Ali 1:7



<sup>32</sup> Lekeza za gohunâmini anoza gakola gili vevesiki gililo. Izanámo nene nagamila nego agila guluma sekago, lekeza ániagiake hogai gamena mota alitokave liki liaká niave.

<sup>33</sup> Áminâminoko lekeza imane nolu netá mukí utó noiko ániigiiki guivahanite anogo gatekú omo alitokave liki gilitaze.

<sup>34</sup> Neza lamaná lo likimitoze, gililo. Oko moloko oaká nou netá ániagina vejená velesá hili asú inamiko imane nolu netá mukí utó inogo ive.

<sup>35</sup> Mikasigi itó okulumaki tolova itáiha, imane lonou gakó nene ma gopa oko tolova aminogo ive.

*Gamena napamú gelemune*

*(Mak 13:32-37; Luk 17:26-30,34-36)*

<sup>36</sup> Lá onoi móza, ámina gamenamú ve hamoláate keké gelemave. Okulumakú agelogege nene ma gelemave. Gipala nezânegi ma gelemuve. Améneho hamokó áisi geleneive.

<sup>37</sup> \* Okulumakutí lumu ve gihila není gamena alí noliko Noá mina gamenaló lílí a mogona áminagó oko utó inogo ive.

<sup>38</sup> Gopezá nagamí napa velesá velenamigo, nene gamenaló zahí nagamí niki minake vená meinakona ake zuguzugu zezezege vizíki minilíki niago, Noage sipigú itemó.

<sup>39</sup> \* Ámina vejenalite Noani nagamí vilíti gakó gili ahulíake gopa niago, nagamí napa vilíike vejená mukí kepele gesá imó. Okulumakutí lumu ve gihila neza ato gamena nene lá oko utó inogo ive.

<sup>40</sup> Ámina gamenaló ve losítá nene makó mikú hoza nalisíko, Ómasímo maga ve alémokoko maga ve ahulotanogo ive.

<sup>41</sup> Vená losítalitosa nosá isíki nisíko, Ómasímo vená magáa alémokoko magáa ahulomíkíko minanogo ive.

<sup>42</sup> Nenemú Guivahanitini ati gamena nene lekeza ma gilinamamó nenazo, lekeza gizapa keké vizíki minalo.

<sup>43</sup> \* Lekeza gakó imane gili minalo: Numuni amelaho nene guminaló ve atikumú gilitimó nene, gizapa noiko guminaló ve oko numuni zeko epetooko henoni nene aleminogo ive.

<sup>44</sup> Áminâminoko okulumakutí lumu ve gihila neza atokumú negeva iki minamita gamena atomó nenazo, lekezagí ali vavá iki minalo.

*Litokó alévolé oko Ómasi gelekélé otatuni gakó*

*(Luk 12:41-48)*

<sup>45</sup> Není gelekélé izegipa makó nene gele vevesiníki gili minatamó itó hozaváini nene litokó alíki minatamó nene mognamú anoza gakó lo likimitoze. Gelekélé izegipa makolímó gizapa vevámó aí numukú netá matató gizapa oko minoko hozaló izegipa lugáa gizapa oketative loko lomíkíko nosânetá nata gamenaló gona moloko kimitive.

<sup>46</sup> Gizapa veva nene okoko ámina gelekélé izegipa nene goí oko lotatíminoko hoza nalíkoma ániगतimó nene ámina gelekélé izegipamú gulugo agoliza vizítimó neve.

<sup>47</sup> Neza lamaná lo nolukumuve. Gizapa vevámó gizapa lamaná i izegipama mukí netató gizapa ve loló otanogo ive.

<sup>48</sup> Lá onoi móza, ámina izegipama gelekélé izegipa golesa noitimó nene není gizapa ve nene litá oko aminogo ive loko mulunagú gelekoko

<sup>49</sup> hozaló izegipa lugáa nene nokepeleko itó piá nagamító ve kezagi niki minatamó neve.

<sup>50</sup> Lá iki níko, ámina izegipâmini gizapa veva nene ámina izegipama ageva oko minamiti gamenahe itó gatizá minati gamenahe okoko

<sup>51</sup> ámina gelekélé izegipa nene agupe apelevo hukovo okoko soza liaká ve genezáini losigi mina ve niakú alémo molanogo ive. Lá okíko ámina apakuka minoko ive nama oko miluma maluma geleko agepa atalá oko minanogo ive.

## 25

*Zaha vená 10 keí anoza gakola*

<sup>1</sup> \* Ato gamenaló nene okulumalímíni gasovaló vita mogona nenémíni oko neve. Vená golíló ve anogo noigo, zaha vená 10-a nenete alími vatí inígi lamu lóini alíiki víki gapoló hotu lokínake zaha venâma noitoka alemoko atune líki vamó.

<sup>2</sup> Keikutí vená 5 nene negi vená minamó. Itó vená 5 nene kagata koló onoi mó.

<sup>3</sup> Keza negi vená nenete lamu lóini alíiki vamó nene nagamilagi alíiki vamamó.

<sup>4</sup> Keza kagatagi vená nenete hela nagamí nene gonigú leki míliake lamu loki nene alíiki vamó.

<sup>5</sup> Vená goliló ve nene litá oko amigo, keza zaha venáma nene kogómula ahíhí okago aki minamó.

<sup>6</sup> Lá iki akinago, holugú akovevé nene sele makó láa loko utó imó: Vená goliló vema mota okave. Lekeza viki gapolotí alímiki ataze, vilo.

<sup>7</sup> Liki likago, keza vená nenete otiake lamu lóini nene levonaha ali ahuliake ló ligi milamó.

<sup>8</sup> Lá iake, keza negi vená nenete kagatagi mina venáma láa liki li kememó: Lekeza kalasini makó limilo. Lelí lamutegú nene nagamíma asú okago mota lihanogo noive.

<sup>9</sup> Liki likago, keza kagatagi mina vená nenete láa liki li kememó: Óe, lekeza viki situakutí meina hizemave. Lekelitokagi lelitokagi vo alemiti avotigila oko minokave.

<sup>10</sup> Liki líkago, keza negi venáma situakú kalasini meina hizinigi viki niago, eza vená goliló vema anitimó. Lá okago, keza ali vavá iki mina venámagi makó itiki numukú minake vená ali kimiaká nosakutí namó. Itó gahe nene giki etoha amó.

<sup>11</sup> Lá ikago vená lугáama alika ake láa liki sele lamó: Guivahanitemaka, guivahanite-meka, gahe segeletozo.

<sup>12</sup> \* Liki likago, eza láa loko lo kimimó: Neza lamaná lo likimitoze, gililo. Lekelí nene ma ángo hee lamú vená níaze, vilo.

<sup>13</sup> Loko Izesú nene loake, miní ameko láa loko limó: Nenemú lekeza ato gamenamú ma gilinanamó nenazo, gizapa i guni iki minalo.

*Gelekelé ve losive makolemú anoza gakó  
(Luk 19:11-27)*

<sup>14</sup> Atiginá inake není gizapaló mina vegenalite iki miliki inakumú goní oketatomó nenémíni mognamú anoza gakó makó lá onoive. Ve makolímó venoni vinogo noko gelekelé izegipala sele lo kemekago, ikago, aí netá mukí nene gizapa initatave loko kigizakú molamó.

<sup>15</sup> Eza nene gelekelé izegipalatini mogonamú itó zámuzáinimú hamopamó geleneike nenémíni avotigila oko moní nene gona moloko kimimó. Ve makó nene 5 tausen kina amimó. Ve makó nene 2 tausen kina amimó. Ve makó nene 1 tausen kina amimó. Lá oake nene, gapo hána venoni vimó.

<sup>16</sup> Vokago, ámina 5 tausen kina ami vemámo vike pisinisi ike polopeti moni 5 tausen kina makó ale utó imó.

<sup>17</sup> Itó eza 2 tausen kina ami vemámo ámináminoko pisinisi ike 2 tausen kina ale utó imó.

<sup>18</sup> Itó 1 tausen kina ali vemámo agulizaki vemámini moni nene aleko vike mikasigú gale legeake gale zimó.

<sup>19</sup> Gamena hána oko vokago, gelekelé izegipatini kugulizaki vema atiginá oake ámina moni gozapá kemeneikumú nene gakó hoza aliki ali hee lítave loko gelekelé izegipama sele lo kimimó.

<sup>20</sup> Lá okago ámina 5 tausen kina ali ve nenémo ake láa loko limó: Gugulizaki venemaka, ángo. Geza 5 tausen kina nemenimó nene neza voko pisinisi uke 5 tausen kina goha makó ale miní ameko ale utó okuke aleko nouve.

<sup>21</sup> Loko loake amekago, eza agulizaki vevámo láa loko lo amimó: Geza gelekelé ve lamaná noane. Geza vatí oko hozaló gizapa lamaná okane. Hoza komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizaki vegagi logoliza vizeko minatíve.

<sup>22</sup> Loko lo amekago, eza 2 tausen kina ami ve nenémo ake láa loko limó: Gugulizaki venemaka, ángo. Geza 2 tausen kina nemenimó nene aleko vuke pisinisi okuke 2 tausen kina makó goha ale miní ameko ale utó okuke aleko nouve, loko limó.

<sup>23</sup> Loko loake amekago, agulizaki vevámo láa loko lo amimó: Geza gelekelé ve lamaná noane. Geza vatí oko hozaló gizapa lamaná okane. Geza hozaló komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizaki vegagi logoliza vizeko minatíve.

<sup>24</sup> Loko lo amekago, eza 1 tausen kina ali ve nenémo ake láa loko limó: Gugulizaki venemaka, gei mogona mota gelenoumole. Geza gínikaha ve noane. Ve makolite miní zuhá inató minumuni omolokago géisi nosá aleko asutoaká noane. Itó ve makolite hoza alikago gihiláa utó okago géisi aleaká noane.

<sup>25</sup> Lá oaká noanikumú neza nehelele vizekago, ámina 1 tausen kina nene aleko voko mikasigú gale zenoumole. Ména. Geza netaka imane alitane.

<sup>26</sup> Loko lokago, ve napava nenémo anotó aleko láa loko limó: Geza hozaló ve golesa goselé vaseletó ve noane. Geza není mogona gelenane. Ve makolite mikú netá zuhá inató

\* 25:12: Luk 13:25

nosá aleko asutoaká nouve. Itó vegená makolite zuha netá gihila atilí inat0 minumuni omolokago netá gihila aleaká nouve.

<sup>27</sup> Nenemú není moni nene peni numukú molataninazo, nanamú neve. Lá onako neza goha inake ámina moniló miní ameke nimilinitiko voko alitonazo.

<sup>28</sup> Lá okanize, aitokatí ipá iiki 10 tausen kina ale mina vema amilo.

<sup>29</sup> \* Gililo. Vegená netá ali miniki gizapa lamaná iki minatamoláa nene goha miní ameko kiminogo uve. Lá onomóza, ve makolím0 netá koma ale minoko gizapa lamaná amitimó nene goha ipá oko alinogo uve.

<sup>30</sup> \* Itó ámina hozaló ve goekae ovimoláa nene amisili hetó ikiko límugusi apakú lemeko ive nama oko miluma maluma geleko agepa atalá oko minanogo ive, loko limó.

### *Gamena napaló gona mololetati gako*

<sup>31</sup> \* Okulumakutí lumu ve gihila neza lapanánegi noinake agelogege makó inake gonanalivagi siat0 minanogo uve.

<sup>32</sup> Lá oko nougo, keza mikasiuka vegená mukí iki novogisaló alegesá inigave. Lá niko, neza gona moloko vegená nene kelém0 losi molanogo uve. Izaló gizapa vémo meme iza kelém0 haitó noike itó sipsip iza kelém0 haitó oaká noimó nenémimi oko

<sup>33</sup> neza sipsip izagitana nia vegená nene kelém0 nigizani zamagaloka milinake, meme izagitana nia vegená nene kelém0 sogaloka molanogo uve.

<sup>34</sup> Lá okinake nugulizaki ve noumó imanémima nigizani zamagaloka mina vegená nene láa loko lo kiminogo uve: Améneho nónohá zeleketa vegená neneta, gililo.

<sup>35</sup> Neza gaúna nohulugo nosáneta nímiaká amó, itó nagamikumú nonivisigo nagamí ihimi nímiaká amó, itó veno ve loló okuke nougo numutikú nilími míliaká amó.

<sup>36</sup> Ginegane nomigo ginegane nímiaká amó. Nivisekago nougo lekeza nasahilí inimiaká amó. Nagá numukú nougo lekeza iki áningiaká amó. Lá iaká amó nenazo, gozapá mikasi apí oko ale utó inogo Ómasímimi gizapaló minata apá ale vavá oleketonoimóma nene iki alilo.

<sup>37</sup> Loko lo kemekugo, keza hee liki mina vegená nenete láa liki li niminigave: Guivahanitemaka, leza nanahé zupa gaúna nogolago ángokunike nosáneta gemehá neve. Itó nanahé zupa nagamikumú nogivisigo nagamí ihemo gemehá neve.

<sup>38</sup> Itó nanahé zupa veno ve loló oko noako numuteuka gelém0 muluhá neve. Itó nanahé zupa ginegane nomigo leza ginegane gemehá neve.

<sup>39</sup> Itó nanahé zupa givisekago noako ánguhá neve. Itó nanahé zupa nagá numukú noako ánguhá neve.

<sup>40</sup> Liki likiko, neza nugulizaki ve noumó imanémima láa loko lo kiminogo uve: Neza lamaná lo likimitoze, gili minalo: Vegenáne zuha limiki minamoki loló oketupe liki lilí amó nene není lilí initamó gelekave.

<sup>41</sup> Loko lo nokiminake nigizani sogaloka minata vegená nene láa loko lo kiminogo uve: Usilímimi mututoni lekeza gililo.

<sup>42</sup> Neza gaúna heleko nougo nosáneta makó nimisá amamó. Nagamikumú nonivisigo nagamí ihimi nímisá amamó.

<sup>43</sup> Neza veno ve loló okuke nougo lekeza numutikú nilími milisá amamóma neve. Itó gineganemú vitagá nougo ginegane ma nímisá amamóma neve. Itó nagá numukú nougo itó nivisekago nougo lekeza ma iki ánginitamamóma nenazo, není ahuliiki viki ló lihamike lova lova oko nomina ló améneho Satagegi itó agelolagi ale vavá oketonoimó nenegú limilo.

<sup>44</sup> Loko lo kemekugo, keza láa liki li niminigave: Guivahanitemaka, geza nanahé zupa gaúna heleko noako itó nanahé zupa nagamikumú nogivisigo itó nanahé zupa veno ve loló oko noako itó nanahé zupa gineganega nomigo itó nanahé zupa givisekago noako itó nanahé zupa nagá numukú noako gelém0 vatí amuhakumú lane.

<sup>45</sup> Liki likiko, neza láa loko lo kiminogo uve: Neza lamaná lo likimitoze, gililo. Imane mikasiuka limiki mina vegenaki lá ikitamamó neném0 není lá initamamó gelekave.

<sup>46</sup> \* Loko lo kemekugo, ámina vegená nene miluma apakú viki miniki miluma asú amoakalímimi alinigave. Itó hehe liki mina vegená nene alévolé kemetamenigi minova minova oaká apat0 viki mininigave.

## 26

### *Izesuni apilinigi lova gizamó*

*(Mak 14:1-2; Luk 22:1-2; Zon 11:45-53)*

\* 25:29: Mat 13:12; Mak 4:25; Luk 8:18

\* 25:30: Mat 8:12, 22:13; Luk 13:28

\* 25:31: Mat 16:27, 19:28

\* 25:46:

<sup>1</sup> Izesú nene ámina gakó lo leme asú oake ámina gamenaló izegipala zuha láa loko lo limike limó:

<sup>2\*</sup> Gamena losi oko vokiko gozapá avotikini asenini zeketakumú gele minoaká holisi utó inogo ive líki lekeza gilinave. Lá noiko, okulumakutí lumu ve gihila neza nene ve makolimo nimimika loko lova vetini kigizakú nelémo molokiko zohota zaló nipili hilingave, loko limó.

<sup>3</sup> Ámina gamenaló monó gizapa vegi guguni giziaá vegi keza Isilae veganalitini guguni giziaá ve napatini gizapa venini Kaiapani numuni napagú alegesá amó.

<sup>4</sup> Keza asuguná iki Izesuni agizató aliki apili hilita gakó ligili hagili iki li hukamó.

<sup>5</sup> Lá amóza, ámina holisigú apele helemítune. Veganalite lova napa ali utó iki lipilikataze, líki lámó.

*Petania apatoka Izesuni anuva lamanaki uveli holotamó*  
(Mak 14:3-9; Zon 12:1-8)

<sup>6</sup> Izesú nene Petania numutó nene Saimon eza halamé gizaleake minake zoka vémini numukú minamó.

<sup>7\*</sup> Lá noigo, vená makó aitoka ake agizakú anuva uveli meinava iteko mina netá nene gehanigitana gonigú aleake Izesú nosánetá noko noigo gotolaú leketamó.

<sup>8</sup> Lá noigo, izegipala zuha leza ángokunike gele golesa nounike lezateloka láa loko lunimó: Anuvagi uveli lamaná nene nanamú latila noive.

<sup>9</sup> Itó leza ámina anuvagi uveli nene hanuva minalina, vegená meina hizitave loko kemesá nene meinava napa alekunike gohogó vegená kumutiline.

<sup>10</sup> Loko noguluko Izesú nene gakote geleake láa loko lo limimó: Lekeza imane vená nana igo genavagi gakó li nameve. Eza nene netá lamaná alenimikave.

<sup>11\*</sup> Gohogó vegená keza nene lekezagi minilíki viki minatamóza, neza lekezagi gamena hána minoloko voko minaminogo uve.

<sup>12</sup> Vená imanémo gonosi milimiligú gale zinitatakumú geleake nugupeló anuvagi uveli holonimikave.

<sup>13</sup> Neza lamaná lo likimitoze. Mukí mikasiuka není gakó lamaná imane li utó iki li kimitató li kimitató nene imane venalímini mogonamú gili zagitave líki eza loló oneta sunimú li kiminigave.

*Zutá Izesuni amimika litove loko lo hutamó*  
(Mak 14:10-11; Luk 22:3-6)

<sup>14</sup> Loko lokago, ámina gamenaló izegipala zuha 12-a lelikutí Kalíotó numutotí ve agulizá Zutá áisi nene guguni giziaá ve napa niató vimó.

<sup>15</sup> Vike Izesuni amimí itotó lekeza nanetá nimitune líki nigeleve. Loko lokago, keza silivá gehani 30 alitane líki li hutiake amikago,

<sup>16</sup> eza nene Izesuni amimika linogo amapani molamó.

*Izesú izegipala zuhagi asenini zekimiaká nosá namó*  
(Mak 14:12-21; Luk 22:7-14,21-23; Zon 13:21-30)

<sup>17</sup> Lulu vizemi peleti niaká a holisímini ganá gamenagú nene izegipala zuha leza Izesú noitoka voko geza asenini zeketakumú gele minoaká nosánetá nene hikú viki ale vavá inatave loko nolane. Loko lokoko,

<sup>18</sup> eza láa loko limó: Lekeza taonigú viki ve makó noititó nene viki tisamámo není gamena mota alitokaze, geí numukú asenini zekimiaká nosá nene izegipáne zuhagi natune lokago nousive líki li amilizo.

<sup>19</sup> Loko lokago lelikutí ve lositosa nene Izesú litímini asike asenini zekimiaká nosá ali vavá asimó.

<sup>20</sup> Lá ikasigo gánavaló nene Izesuki izegipala zuha 12-a lezagi alegesá unike nosánetá nunimó.

<sup>21</sup> Nosánetá noko nounike Izesú láa loko limó: Lamaná lo likimitoze, gililo. Lekelikutí makolimo nimimika linogo ive.

<sup>22</sup> Loko lokago, leza miluma nogelego hamopamó Guivahanitemaka, nenikumú nolape, nenikumú nolape loko loká miká otunimó.

<sup>23\*</sup> Lá okuko, Izesú láa loko lo limimó: Hamó lapegú peleti nagamí zeko nonousi ve nenémo nimimika linogo ive.

<sup>24</sup> Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika liti ve agae, lihima sipisi alitimó nenazo, izolaho aí getamilina nene vávani oko minaline.

<sup>25</sup> Loko lokago, amimika liti ve Zutá nene láa loko limó: Tisalemaka, nenikumú nolape. Loko lokago, Izesú nene gezaka mota lokanimole loko limó.

*Lepa nosá apí oko kimimó*

(Mak 14:22-26; Luk 22:15-20; 1 Koli 11:24-25)

<sup>26</sup> Nosánetá nonunike Izesú nene peleti aleake Ómasi agepoka loake gitegeko izegipala zuha nolimike láa loko limó: Alikí nalo. Imane není mémeláne neve.

<sup>27</sup> Loko loake, vain goni aleake Ómasi agepoka loake nolimike láa loko limó: Lekeza mukitó nalo.

<sup>28</sup> \* Lo múnaheaká gacolímíni golaníne nene vejená mukilitíni lihimáini gilatoketative loko lekitomó imane neve.

<sup>29</sup> Lamaná lo likimitoze, gililo. Vain nagalímíni gihilagutí goha naminake minoloko vinake améneho nugulizakí velíni loló onetati gamenaló vain nagamí haitolímíni lekezagi makó natune.

<sup>30</sup> Loko loake, monó nama makó lunike lemeko Olivi agokáu itinogo vuhá.

*Izesuni Pitá egamega otatikumú lo utó imó*

(Mak 14:27-31; Luk 22:31-34; Zon 13:36-38)

<sup>31</sup> \* Agokaloka itinogo nounike Izesú láa loko lo limimó: Monó gotolaú Ómasímo li gakó makó láa liki gizinamóma neve:

Gizapa ve apelekugo sipsip iza mulusi nene hutilí iki golisi inigave.

Liki gizinamóma nenazo, itína holugú lekeza mukitó golisi iiki visilínitatamóza,

<sup>32</sup> \* helekugo, goha nelémo otekiko, Galilaia mikasiuka goí o lekemeko vitove.

<sup>33</sup> Loko lokago, anotó aleko Pitá láa loko lo amike limó: Nénisi viselegetamitove. Keza mukitó gele alévolé oakáini nene golo golo sokikoma, neza lá aminogó uve.

<sup>34</sup> Loko lokago, Izesú láa loko lo amimó: Lamaná lo gimitoze, gelezo. Itína holugú nene okolohomámó anó molonamiko nenikumú ánigamuve loko egamega onetatanimó nene gamena losive makole inogó ive.

<sup>35</sup> Loko lokago, Pitá láa loko lo amimó: Neza nene geikumú egamega ogetaminogó uve. Nipili hiliñigi niko gezagi makó helekusigoma lá ogetaminogó uve. Loko lokago, izegipala zuha mukitó leza láa kokogó lunimó.

*Izesú Gesemane zazuhagú Ómasiloka loko minamó*

(Mak 14:32-42; Luk 22:39-46)

<sup>36</sup> Loko lokuko Izesú nene izegipala zuhamagi apá makó agulizá Gesemane neneloka makó vuhá. Vo anitekunike láa loko lo limimó: Lekeza nene imaneló niko neza volaneloka vokinake Ómasiloka litove.

<sup>37</sup> Loko loake Pitani itó Zepetaioní gipala losigi nene kelémoko vimó. Nivake mulunagú peisi nozigo miluma golesa gilike

<sup>38</sup> láa loko lo kimimó: Neza mulúnegú nene gónupa geake hilitomó onoive. Lekeza imaneló miniki nenikumú gizapa iki niko makó gizapa oko minatune.

<sup>39</sup> Loko loake koma minomo novike avogisalokatí pou loko agoka hizeko nakake Ómasiloka láa loko limó: Aménege, gapo neikoma geza genavagi gihinitata netá imane ale ahulonetatane loko nolumóza, není nigikaloka ale molamoko geí gigikaloka nelémo molatane loko noluve.

<sup>40</sup> Loko loake, goha ake, izegipala zuhama kovó akinago ánigoake, Pitani alémo oteko láa loko lo amimó: Lekeza nene nana ive. Nezagi gizapa oko mininake gamena koma ma oti minamitamó nehe.

<sup>41</sup> Lekemekú milatakumú gopa ikataze, lekeza gizapa iki miniki Ómasiloka liki minalo. Ligikámo vávani noimóza, lugupémo gena noive.

<sup>42</sup> Loko loake, goha vike Ómasiloka like láa loko limó: Aménege, genavagi netá imanémó nivilege vamtimó noikoma, geí gigikaloka nelémo molozo.

<sup>43</sup> Loko loake, goha oko ánigamó nene kogómula ahilí okago, kovó akinago ánigamó.

<sup>44</sup> Ahulokimiake goha vike Ómasiloka ligo gamena losive makoki imó. Goí oko vike Ómasiloka limómámíni okogó limó.

<sup>45</sup> Loko loake, goha ake izegipala zuha lelémo otike láa loko lo limimó: Lekeza nanamú lakavasú viziki hanuva aki niminave. Gilinahe. Okulumakutí lumu ve gihila nimimika liki lihimáinigi vetini kigizakú nilími milata gamena mota okave.

<sup>46</sup> Lá onoize, lekeza otiiki vilo. Ánigalo. Nimimika liti vema alitó mota okave.

*Izesuni amimika lokago alem0**(Mak 14:43-50; Luk 22:47-53; Zon 18:3-12)*

<sup>47</sup> Izesú gako lo limi agepagi izegipala zuha 12 lelikutí makó Zutá noago, vejená mukí ámegetiki niake sopoló hánagi gelekahosigi ali minake amó. Keza nene guguni giziaká vete itó Zuta vetini monó gizapa vete emane amunaloka kimisilikago vamó.

<sup>48</sup> Nivake Izesuni amimí inogo i vémo gako makó lo kimike láa loko limó. Neza vinake ve makó nene agoka legeko nonugoma ániigiiki ámina ve noive liki nigiliki agizat0 alilo.

<sup>49</sup> Loko loake, ake, Izesú noit0 litá oko vo amatoka aniteake, oho, Tisalema, nene noape loko loake, agoka legeko namó.

<sup>50</sup> Lá noigo, Izesú láa loko lo amimó: Nigive, geza loló inogo noani netá nene litá oko loló ozo. Loko noligo, lova ve nenete ake Izesuni agizat0 ali gikitiki alemó.

<sup>51</sup> Nalego Izesuki makó minuhakutí makolím0 sopoló hána nene gologutí aleko gelelehá oake guguni gizoaká ve napámimi gelekélé izegipa apilike agata zeko isimó.

<sup>52</sup> Lá okago, Izesú láa loko lo amimó: Sopoloka nene alenikuka goha ale molozo. Lekeza sopolotunú geza okaní geza okaní liki liki likipili gesá ikataze.

<sup>53</sup> Geza nene gelemape. Neza aménehitoka litomó nene litá oko ageló nene lovámimi galaváa mulusi napa 12-a nene kimiselekiko limiki nilími vatí inigave.

<sup>54</sup> Lá itamóza, lá okugo Ómasímimi luhuva neném0 nana oko gihila zitive. Gozapá monó gotolaú nenémimoko utó itive liki luhuva gizinamóma neve.

<sup>55</sup> \* Loko loake, ámina gamenaló ali nupa ina vejená nene Izesú láa loko lo kimike limó: Lekeza nenikumú gelemó nene geligeli ve nougo sopoló hánagi gelekahosigi aliki niake nigizat0 alinigi niahe. Neza gamena gamena monó zagusaveú minuke monó lo keme keme oko minumómalo nene nigizat0 alemamó nehe.

<sup>56</sup> Lá ikamóza, Ómasímimi agepagutí gako liaká a vete emane amunaló monó gotolaú nenikumú luhuva gizina gako nene gihila zitive loko netá mukí imane utó noive. Loko lokago, izegipala zuha leza Izesuni ahulomikunike golisi hutlí oko vunimó.

*Kansoletini kogómulaló Izesuni goní itamó**(Mak 14:53-65; Luk 22:54-55,63-71; Zon 18:13-14,19-24)*

<sup>57</sup> Izesuni agizat0 aliake guguni giziaká vetini ve napa Kaiapani numukú alímiki vake keza monó mogona apí ikimiaká vegi itó monó gizapa vegi ali nupa iki minat0 alímiki vamó.

<sup>58</sup> Lá niago Pitá nene hotó otigí oko kémegetoko vike guguni giziaká vetini ve napámimi hé numunaló áneneló vo aniteake, iteake pilisi vegi minake neneló goní itatakutí nana netá utó itihe loko gizapa oko minamó.

<sup>59</sup> Lá noigo, guguni giziaká ve napagi monó kansolegi mukit0 nene Izesuni apele hilitune liki soza hakupá gakoínimú vitagá amóza,

<sup>60</sup> ma ali utó amamó. Mukilite ake Izesukumú soza hakupá gako lámóza, liki amupesamó. Lá iva iva niake ve lositá nenetosa otikasike

<sup>61</sup> \* láa liki lasimó: Imane vémo nene Ómasímimi monó zagusave zeko tele vizekinake gamena losive makolegó oko noviko goha hanuva gitomó neve loko noligo gulusimóma neve.

<sup>62</sup> Liki likasigo, guguni giziaká vetini ve napa neném0 oteake Izesuni láa loko lo amimó: Geza goní nigitasike nilasi gaktó ale viligoko lo kimitani gako ma nomihe, olo.

<sup>63</sup> Loko lokago, Izesú agepa apizeake minokago, eza ve napa neném0 láa loko lo amimó: Alévaté Ómasímimi avogisaló lo utó itane loko nologetuve. Geza Ómasímimi gipala gologí oletatane loko lo mologeta vema noape loko lo lemezo.

<sup>64</sup> \* Loko lokago, Izesú láa loko lo amimó: Nene geza mota lokanimóza, neza makó láa loko lo nolukumuve: Imane gamenámimi veletó nene okulumakutí lumu ve gihila neza amuza vémini agizani zamagaloka nougo, itó okulumalímimi límusi amupiló nolumugo ániganigave.

<sup>65</sup> \* Loko lokago, guguni giziaká vetini ve napa neném0 gele golesa oake luhoaká gola aleko polo noligike láa loko limó: Mota Ómasi aviliginogo lokave. Gakola gilinita vejená makó nanamú sele lokinake gakola makó litune. Eza Ómasi avilegeko li gako lekeza itínasa mota gilikave.

<sup>66</sup> Nenemú lekeza nana otatune liki nigeleve. Loko lokago, keza nakahunímimi gako lokaze, mota hilitive.

<sup>67</sup> \* Liki liake, lugáate Izesuni agoka agepagú gituhú nitake kigizanitunú napelego, lugáate agoka agepaló nihitake kigizanitunú napeleke

<sup>68</sup> gologí okimiaká ve neneka, geza gako mogona geleaká ve noitanimó nene éaho nogipilihe lo utó oko lo lemezo liki li amemó.

*Pitá Izesuni egamega otamó**(Mak 14:66-72; Luk 22:56-62; Zon 18:15-18,25-27)*

<sup>69</sup> Lá niago, Pitá nene hé numunaló noigo guguni giziaká vetini ve napámini gelekelé mohó makolímó Pitá noitó oake, geza Galilaia mikasigutí ve Izesuki miniaká niasi vema noane,

<sup>70</sup> Loko lo amekago, eza vejená kovogisaló egamega ike gakó lanimó nene ma gelemuve. Loko loake,

<sup>71</sup> hé numunamámini gatetó lemeko noigo, gelekelé mohó makolímó aí ániagoake áminaló mina vejená nene láa loko lo kimimó: Ve imanémo Nasaleta numutotí ve Izesuki miniaká asi vema noinae.

<sup>72</sup> Loko lokago, Pitá goha egamega ike láa loko limó: Ómasímini avogisaló nigizani ale oteko lamaná noluve. Ma ánigonamu vemú nolane.

<sup>73</sup> Loko loake, gamena komáisi noigo, áminaló oti mina ve nenete Pitá noitoka ake láa liki li amemó: Lamaná nilave, geza ámina vémini zuhagutí noane. Gonó lupámo geí Galilaia mikasiukatí mogonaka ale utó okave.

<sup>74</sup> Liki likago, Pitá nene Ómasímini avogisaló lo hutoko lamaná noluve, ámina ve nene ánigonamuve. Soza litomó nene Ómasímo usí vizenimikatize, loko limó. Loko noli agepagi litá oko okoloho nenémo anó molamó.

<sup>75</sup> Anó molokago, Pitá nene Izesú nene okoloho nenémo anó molonamiko není ánigonamuve loko egamega onetatanimó nene gamena losive makole inogo ive loko lo ami gakó goha agata geleake, lemeko hetoka ive napa imó.

**27***Izesuni Pilató noitoka alímiki vamó**(Mak 15:1; Luk 23:1-2; Zon 18:28-32)*

<sup>1</sup> Neteká ho noitigo, guguni giziaká ve napagi itó monó gizapa vegi Izesuni apili hilita gakó li hukamó.

<sup>2</sup> Lá niake nagá ziki alímiki agulizaki ve Pilató noitoka goní itanigi alímiki vamó.

*Zutá hilimó*

<sup>3</sup> Zutá eza Izesuni amimika li ve nenémo ánigamó nene Izesunima goní nitake hilitive liki gakó li hukimikago, Zutá nene goha agika ale viligoake silivá moni 30-ma nene guguni giziaká ve napagi itó monó gizapa vegi minatoka aleko atiginá oko voko kimimó.

<sup>4</sup> Lá noike láa loko limó: Neza lihima alenouve. Eza lihimavala nomi vema amimika lokugo hilinogo noive. Loko limóza, nene lelí netá nomive. Geí netaka neve.

<sup>5</sup>\* Liki likago, eza Zutá nene ámina silivá moni 30 nene aleko itike monó numuni napagú hutilí oko ahuloake, lemeake vike nagá imó.

<sup>6</sup> Lá okago keza guguni giziaká vemate ámina silivá moni 30 nene aliake láa liki lamó: Imane hutono moni nene ve makó hilinogo imómámini moni neve. Lekeza nenémi moni nene monó numukú milamilo liki li huginamóma neve.

<sup>7</sup> Liki liake, ligilí hagilí iake gakó makó li hukamó. Lá iake mikasi mulalokatí vetini gonosi milimilí minative liki mikasi agulizá nene mikasi somo lilí iaká vetini mikasi nene meina hizemó.

<sup>8</sup> Lá iake ámina mikasi agulizá nene gola mikasive liki milamó. Ámina agulizá nene itñasagi nene hanuva neve.

<sup>9</sup>\* Lá onoigo gakó makó gozapá Ómasímini agepagutí gakó loaká ve Zelemiani agepagú lo mola gakó nene gihila zimó. Láa loko luhuva gizamóma neve:

Keza ámina silivá moni 30 alemó nene Isilae vejenalite monimú li milamó imane vémini meinavamú neve liki linamóma nenazo,

<sup>10</sup> ámina moni aliake mikasi somo lilí iaká nia vetini mikasi meina hizemó nene Guivahanímo lo nimitó neve.

*Pilató Izesuni mogonamú loká otamó**(Mak 15:2-5; Luk 23:3-5; Zon 18:33-38)*

<sup>11</sup> Izesuni nene alímiki vake kugulizakí vetini ve napa Pilatoni avogisaló hizi otitamó. Lá ikago, eza agulizaki vemámo loká otake láa loko limó: Geza nene Zuta vetini kugulizakí ve napáini noape. Loko lokago, Izesú nene gezaka mota lokanimole.

<sup>12</sup> Loko lokago, guguni giziaká vemagi itó monó gizapa vemagi keza Izesunimú hizi miliki gakó nilago, eza la gakotó ma lo kememigo,

<sup>13</sup> Pilató nene láa loko limó: Geza nene mukí gakó liki goní nigitamó nene gelemape.

<sup>14</sup> Loko limóza, Pilató li gakotó ma viligoko lo amemimó. Lá noigo kugulizaki vetini ve napa Pilató nene agata gululusi gilimó.

*Izesú hilitive liki goní itamó*  
(Mak 15:6-15; Luk 23:13-25; Zon 18:39-19:6)

<sup>15</sup> Asenini zeketakumú gili mina holisi gamena meleketó meleketó nene Zuta ve vená nenete aseva zetataune liki ve makolímíni agulizá ikago agulizaki ve nenémo nagá numukú mina ve nene kimisele ahuloká ahuloká okago nene, ámina ve keitoka viaká amó.

<sup>16</sup> Ámina gamenaló nene ve makó agulizá hutilí oko vi ve nene nagá numukú minamó, Izesuni apolaho agulizá napa nene Palapasí.

<sup>17</sup> Lá okago, ve vená alegesá ikago, Pilató loká oketake lekeza éahini aseva zemikugo lekelitoka vitive liki nilave. Gologí olímiaká veve liki lina ve Izesuni aseva zetatohe, itó Izesuni apolahini Palapasini aseva zetatohe.

<sup>18</sup> Loko limó nene keza Izesukumú amekugú niki miniake gonitó alími utó amó nenemú Pilató geleneike loká oketamó.

<sup>19</sup> Itó Pilató nene goní gakó lo hukoaká siató noigo, venala nenémo aitoka gakó lo ahulake láa loko limó: Geza nene ámina hehe loko noi vemámini agupeloka gakó ma lo molotamo. Itína holugú nene vamó makó ánigo amekuke aikumule loko miluma napa gelemikuve, loko limó.

<sup>20</sup> Itó guguni giziaaká ve napamagi itó monó gizapa vemagi vegeñalítini mulúikú hiziki láa liki nilago, Palapasini aseva zetative liki Pilatotoka nilake Izesuni nene apili hilitave liki lamó.

<sup>21</sup> Liki likago, eza agulizaki vemámo ve losi imane niasimó nene éahini ahulomikugo lekelitoka vitive. Loko lokago, Palapasinive liki lamó.

<sup>22</sup> Liki likago, Pilató nene lá okinake vegeñá mukilite gologí olímiaká noi veve liki lina ve Izesuni nene nana otatove. Loko loká okimikago, keza zohota zaló nagá otamane liki lamó.

<sup>23</sup> Liki likago, Pilató eza nanamú neve limó. Eza nana netá golesa alekago nilave, loko limóza keza zohota zaló nagá otamane liki pigi viziki lamó.

<sup>24</sup> \* Liki likago, Pilató gilimó nene eza liti gakó nene ma vo alemitimó oake lova napa utó itimó okago, eza nene vegeñalítini kovogisaló nagamí aleake agizani nagamí zimó. Lá noike láa loko limó: Imane ve apili hilitatímíni lihima nenitoka ma minaminogo ive. Nene lekelí netale.

<sup>25</sup> Loko lokago, keza vegeñá mukí nenete anotó aliki láa liki lamó: Ámina lihima nene lezalokagi itó izegipa lagapilamotokagi minino.

<sup>26</sup> Liki likago, Pilató nene Palapasini gologí omikago keitoka vimó. Itó Pilató lokago, Izesuni nene segi nogosanitunú apilikago zohota zaló nilitunú ziki apili hilitave loko pilisí vetini kigizakú molamó.

*Pilisí vete Izesuni gopoguni militamó*  
(Mak 15:16-20; Zon 19:2-3)

<sup>27</sup> Lá okago agulizaki vemámini pilisí vevate Izesuni nene alímiki agulizaki vemámini numuna napagú nene iteke keza ámina pilisí ve mukitoka nene kilími nupa amó.

<sup>28</sup> Lá iake agulizaki vejitana lílí itake Izesuni ginégane nene gololohá iki ali miliake ginégane okohu gó nene luhimiake,

<sup>29</sup> gasovagi nagatunú nene akilí lílí iake gotolaló hitimiake, agizani zamagaloka nene akepa nogosani makó amikago ale minamó. Lá onoigo, pilisí vete amatoka iki kalapusa hizeke gopoguka litake láa liki lamó: Oga, mokáneve, Zuta vetini kugulizaki veninimave.

<sup>30</sup> Liki nilake agoka agepagú gituhú nitake ámina akepa nogosani nene aliake gotolaló zemó.

<sup>31</sup> Ziake gopoguka li asú itake okohu gó luhitamó nene gololohá iake ezáa ginéganeva nene goha luhitamó. Luhimiake zohota zaló nilitunú ziki apili hilitunú alímiki vamó.

*Izesuni nene zohota zaló apelemó*  
(Mak 15:21-32; Luk 23:26-43; Zon 19:17-27)

<sup>32</sup> Lá iníni nivake Apilika mikasukatí Sailini apatotí ve makó agulizá Saimon nene gapoló noago ánigiake Izesuni alémo vatí oko zohota zava gehetative liki gala vizikago,

<sup>33</sup> makó vake apá makotó vamó, agulizá Goligota, nene agulizalímíni mogona nene gotóini gonosi helisa apale loko.

<sup>34</sup> Neneló anitiake Izesú native liki vain nagamiki ekésá netaki ali gopa iake miluma gelemitive liki amemó. Amikago eza nene no geleake namike hanuva minamó.

<sup>35</sup> \* Lá okago, zohota zaló apilíki apatemó. Lá iake ginéganeva nene éaho alitíhe éaho



alitihe liake kezáini nene satu zohí amó.

<sup>36</sup> Lá niake ámalaló nene gizapa iki minamó.

<sup>37</sup> Velé gotolaloka nene goní ita gakó nene láa liki luhuva gizikago minamó: Imane ve nene Izesú ave Zuta vetini kugulizaki veninive.

<sup>38</sup> Liki luhuva giziake Izesuni amatoka nene guminaló ve geligeli ve lositá nene makó nene agizani sogaloka apatiake itó makó nene agizani zamagaloka kipiliki apatemó.

<sup>39</sup> \* Lá inake keza vejená vigá igá amó nenete gotóini goké goké nizeke amé ziki gopoguka litake,

<sup>40</sup> \* Láa liki lamó: Geza nene monó zagusave zeko tele vizekoko gamena losive makolegó oko vokíko gitomó neve loko loaká noanimóma neze, geza gugupeka alémo agutó vizemane. Geza Ómasímini gipala nouve lokoma zohota za nene ahulokoko lememané.

<sup>41</sup> Liki nilago, keza guguni giziaká ve napamagi itó monó mogona apí ikimiaká ve itó monó gizapa vemagi hamolíminki amé ziki gopoguka litake láa liki lamó:

<sup>42</sup> Vegená lugáa kelémo kugutó vizeaká imóza ezáa nene alémo agutó vizemitimó okave. Eza Isilae vetini agulizaki vema noitimó nene itínasa zohota zalotí apasokoko limitinae. Lemekiko leza aikumú gele alévolé ituninazo.

<sup>43</sup> \* Eza nene Ómasimú gele alévolé onoike neza nene Ómasímini gipala nouve loko limó nenazo, Ómasímo aikumú geleneitimó nene itína alémo agutó vizitimole.

<sup>44</sup> Liki likago, guminaló geligeli ve losi Izesuni agilika luga luga zohota zaló kipiliki apatemó nenetosagi ámináminiki amé zitigi iki lasimó.

### *Izesú hilimó*

*(Mak 15:33-41; Luk 23:44-49; Zon 19:28-30)*

<sup>45</sup> Holisaká nene mukí mikasiuka límugusi ze asú oake minoloko novigo únaká ho ale zohotá imó.

<sup>46</sup> \* Únaká ho ale zohota noigo, Izesú pigi vizeko ezáa gakokutí nene Eli Eli lema sapatatani loko limó. Lelí gakotegutí nene Ómasinemaka, Ómasinemaka, geza nanamú viselenimikane.

<sup>47</sup> Láa loko lokago amatoka mina ve lugáate ámina gakó giliake imane vémo Ilaizani sele nolive.

<sup>48</sup> \* Liki liake, keikutí makolímó ololu loko vike notunigitana netá aleake akepa lolovaló hizeake vike ekésá vain nagamikú lupizeake, Izesú native loko aminogo noigo,

<sup>49</sup> lugáate láa liki lamó: Ánigonozo, Ilaizá oko alémo agutó vizitihe, gizapa onoitune.

<sup>50</sup> Liki nilago, Izesú nene gakó napagutí nolike sikalahula ahulokago vimó.

<sup>51</sup> \* Lá noigo, áminasitó monó zagusaveú Ómasímini avogisaló iteaká gatetó zi lí ika lavolavo nene veletokatí zeko hóu loloko límike ale luga luga imó nene lelí gahe ale koló oletamó. Lá noigo mikasi imimá noike gehani napa napa nene zevo hóu lovo imó.

<sup>52</sup> Lá noigo, gonosi milimilí gale makó nene koló noigo, Ómasímini vejenala zuha lugáa gozapá hilina vejená nene otemó.

<sup>53</sup> Gonosi milimilí ahuli asú iake Izesú nene galegutí otekago viki Zelusale numutoka itikago, mukí vejenalite ánigamó.

<sup>54</sup> Itó pilisí vetini ve napagi pilisí vegi Izesuniló gizapa iki minake, mikasi nene imimá imó itó haitopaitó netá mukí utó itímo kehelele goha vizekago, imane ve nene lamaná Ómasímini gipala minamó neve liki lamó.

<sup>55</sup> \* Itó vená mukí minamó keza nene amunaló Galilaia mikasi ahuliake Izesuni izamuha hiziki ámegetiki viaká a vená nene hotó otigí iki minake ánigi minamó.

<sup>56</sup> Keikutí Magatala numutotí vená Maliá minamó itó Maliá makó nene Zemusiko Zoseheko kei izóipo, itó vená makó nene Zepetaioni venala minamó.

### *Izesuni gale zitamó*

*(Mak 15:42-47; Luk 23:50-55; Zon 19:38-42)*

<sup>57</sup> Únaká huluvaló henonavagi ve makó Alimataia apatotí ve agulizá Zosehé eza goí oko Izesuni izegipala zuha minamó.

<sup>58</sup> Eza nene Izesuni gonosiváa alinogo nene voko Pilatoni loká imó. Loká okago, Pilató nene gonosiváa ali amilo loko lokago, gili amemó.

<sup>59</sup> Gili amikago, Zosehé nene lavolavo gó gosohá mokoná lamanatunú nene asapú imó.

\* 27:39: Age 22:7, 109:25    \* 27:40: Mat 26:61; Zon 2:19    \* 27:43: Age 22:8    \* 27:46: Age 22:1    \* 27:48: Age 69:21  
\* 27:51: Gá 26:31-33    \* 27:55: Luk 8:2-3

<sup>60</sup> Lá oake gonosi nene ezáa gonosi milimiliva gosohakú aleko voko molamó. Gonosi milimili nene meikú nego mulí ezáa goló vateikamó nenegú molomiake gehani napa makó nene ahelú ahelú oko aleko vike gonosi gale agepaló nene ze lí imó.

<sup>61</sup> Lá noigo, vená lositá minasimó, makó nene Magatala numutotí vená Maliá itó Maliá makó minasike gonosi gale ávatihá ánigi minasimó.

*Gonosi galeló gizapa itamó*

<sup>62</sup> Lá ikasigo, gó lokago holisi gamenamámini nosáneta ale vavá oaká gamena vokago guguni giziaká ve napagi itó Palisaio monó vegi viki Pilatotoka alegesá amó.

<sup>63\*</sup> Ake láa liki lamó: Ve napale leza gakó ma gelekunike nounge. Ámina sozaló ve nene ha agómulagi noiike gamena losive makole vokiko neza otinogo uve loko limómámini okatize.

<sup>64</sup> Nenemú pilisí ve makó kimiselekako, viki gonosi gale agepamaló nene gamena losive makole etoha iki gizapa itave. Izegipala zuhamate gonosiváa gumina iki aliki viiki vejená nene gonosi galegutí mota otekave liki lí kimikatanaze. Goí oko soza gakó limó nene alika soza gakó litatímo avilegeikanogo ive.

<sup>65</sup> Liki likago, Pilató láa loko lo kimimó: Lekeza pilisí ve makoki kilímiki vilo. Ámina gonosi gale agepaló nene lekeza itatímini avotigila iki gehanima zi lí ilo.

<sup>66</sup> Loko lokago, keza nene vake gonosi gale agepaló zi hita gehani nene alévolé oko minative liki anosa miliki nagá makó alemó. Lá iake lovámini galaváa nene áminaló gizapa itave liki ahulikitamó.

## 28

*Izesú heleneikutí otimó*

(Mak 16:1-10; Luk 24:1-12; Zon 20:1-10)

<sup>1</sup> Holisi gamena asú okago, Sategú neteká ho itinogo noigo, Magatala numutotí vená Maliá itó Maliá makómagi gonosi galema ániganigi vasimó.

<sup>2</sup> Nivasigo genémané mikasi nene imimá napa imó nene Guivahanímini ageló makó nene okulumakutí lemeake gehani napa nene gonosi gale agepaló zi hitamóma nene ahelú oko alahulooke ámina geható nene ase hizeko noigo imimá napa imó.

<sup>3</sup> Noigo agoka agepa nene gó melevezakitana oko noigo luhoaká gola nene gizopa nukúnukú loko minamó.

<sup>4</sup> Lá okago, lovámini gala ve keza nenemú kehelele vizekago luvoluvo ziake hele vege-nakitana iki zámuzáini migelelé amó.

<sup>5</sup> Lá noigo vená lositáma tizikasigo ageló nenémo láa loko lo kimimó: Lekeza lekehelele vizemino. Lekeza zohota zaló apiliki apate ve Izesuni ániganigi niasive loko gelenoumole.

<sup>6</sup> Eza imanegú noamive. Lá okove gozapá ezáa litó mota otekave. Láa loko lekeza iki ámina ve ako mína apá ángalizo.

<sup>7</sup> Lá iiki litá iki viiki izegipala zuhama galegutí nene mota otekave. Goí o lekemeko Galilaia mikasiuka novive. Lekeza viki neneloka aí nene ániganigave liki lí kimilizo. Nene lo lekemenoumómámini okove.

<sup>8</sup> Loko lo kemekago, keza vená losi nene kehelele novizigo itó kogoliza nivizesike hetoka lemesike geha mulikutí litá iki ololu liki vasike aikumú izegipala zuhama lí kiminigi vasimó.

<sup>9</sup> Nivasigo, Izesuki gapoloka galinali hotu liake, eza nene niasihe loko lo kimimó. Loko noligo, keza nene ví alitikasike agisaló alesimó. Lá niasike gupá zi amiki agepoka lasimó.

<sup>10</sup> Nilasigo, Izesú láa loko lo kimike limó: Lekeza lekehelele vizemino. Lekeza viki nugináne nene Galilaia mikasiuka viiki keza nene není neneloka ániganigave líki lí kimilizo loko nene limó.

*Lova vete Izesú oti gakó avetó iki lí kememó*

<sup>11</sup> Keza vená losima nene gapo miliki nivasigo, gale agepaló gizapa imina ve lugáamate viake taonigú itemó. Itiake guguni giziaká ve napama nene utó i netakumú avetó iki lí kememó.

<sup>12</sup> Lí kimikago, keza guguni giziaká vemagi itó monó ve napamagi ali nupa ake gakó makó ligili hagili ake gakó makó lí milamó. Lá ake lovámini galaváama nene age nonó gehani mukí kememó.

<sup>13</sup> Nikemeke láa liki lamó: Lekeza nene láa likigó lilo: Leza ako helenouko holugú nene izegipala zuhate ake gonosiváa gumina iki aliki vikave likigó nene lilo.

<sup>14</sup> Itó agulizakí ve napamámo ámina gakoláa gelekoko nolikoma, leza gakó makó lo aminogo une. Lekezaloka gakó makó minaminogo ive.

\* **27:63:** Mat 16:21, 17:23, 20:19; Mak 8:31, 9:31, 10:33-34; Luk 9:22, 18:31-33

<sup>15</sup> Liki likago, keza lovámini gala vemate la gakotó amegesaló milamó. Lá ikago ámina gakoláa nene Zuta vetiniuka hutilí oko vo asú okago, itínasa gamenagi nene ámina gakokó liaká niamole.

*Izesú aposolo 11-a monó hozaló kimisilimó*

*(Mak 16:14-18; Luk 24:36-49; Zon 20:19-23; Apo 1:6-8)*

<sup>16\*</sup> Izegipala zuha 11 leza Galilaia mikasiuka vunike Izesú nene agoka makotoka vitave loko lo limító nene itekunike,

<sup>17</sup> Izesuni áinigokunike gupá zeko agepoka lunimóza, makó lugáate nene heleneikutí lamaná oteko áisi noihe liki kagata losi gelemó.

<sup>18</sup> Lá ikago Izesú nene omo alitoake gakó lo nolimike láa loko limó: Ómasi nenémo okulumalímíni mikasímíni zámúza nene nenikó neme asú onoimóma neve.

<sup>19</sup> Nenemú lekeza mikasi nekisa vokisauka viki vegená mukí nene kilími není izegipáne zuha lilí ilo. Lá niiki aménehini agulizató itó gipala není nugulizató itó Sikalahulímíni agulizató kilími nupa iki monó nagamí hilikitalo.

<sup>20</sup> Lá niiki nénisi loleketonou gakotó ámegetatave liki lainim-ikitalo. Gilinahe. Imane mikasímíni gamena asú onamiko neza nene lekezagi makó mino-loko voko minanogo uve, loko limó.

---

\* 28:16: Mat 26:32; Mak 14:28

## Izesu Kilistoni Gakó Lamaná Makí Luhuva Gizamó

*Nagamí holokimiaká ve Zoní Izesuni gapo veletamó*

*(Mat 3:1-12; Luk 3:1-18; Zon 1:19-28)*

<sup>1</sup> Izesu Kilistó Ómasímíni gípalamú gakó lamaná nene lá oko apí imó neve.

<sup>2\*</sup> Nenémíni gakoála Ómasímo gipala lo ami gakó nene Ómasímíni agepagutí gakó loaká ve Isaiá láa loko luhuva gizamóma neve:

Gelezo, není gakó lo keme keme iti ve amiselekugo,

áisi ale goí oko voko kigikagú hoza alitanimó nenémíni gapoga vevegetative.

<sup>3\*</sup> Mikasi gomopalaló ámina vémo gakó napagutí láa loko nolive:

Guivahanimú nene likigika ali hee litalo.

Likigikagú limití gapo ali hee litalo.

<sup>4</sup> Ámina gakó Zonitoka okago eza mikasi gomopalaló vo anitimó nene vejená makó eza noitoka ali nupa ikago likigika ali viligiiki nenémíni mogona utó itive liki monó nagamí hilitamó nene Ómasímo lihimatini ahuloleketative loko lo utó oko lo kemeko minamó.

<sup>5</sup> Lá okago, Zelusale numutokatí itó Zutaia apá makotokatí nene mukí vejená Zoní noitoka vake lihimáini lí utó ikago, Zota nagamikú monó nagamí holoketamó.

<sup>6\*</sup> Zoní nene Ómasímíni agepagutí gakó loaká ve Ilaizakitana oko kamele iza zopovatumú lílí a gó luhoake, itó iza galupavatumú lílí a holotani nene gohalaló zeake, ganukí himoni nogozagigó noko minamó.

<sup>7</sup> Noko minake, láa loko lo utó oko lo kemeko minamó: Nemegealoka noa ve aí zámuza nenémo není zámuza nivilegekave. Nénisi ánéámina aí lelegitó minamunazo, hoza lagasó aletoko aí gasa gó ate akisitomó nene etaminogo ive.

<sup>8</sup> Nénisi nagamikó nohololeketumóza, áisi nene Ómasímíni Sikalahú hololeketanogo ive, loko lo kimimó.

*Izesú monó nagamí holamó*

*(Mat 3:13-17; Luk 3:21-22)*

<sup>9</sup> Gamena nene zupa Galilaia mikasigú nene apá makó minamó, agulizá Nasalete. Izesú nenelotí Zoní noitoka anitekago Zota nagamikú monó nagamí holotamó.

<sup>10</sup> Holomikago, nagamikutí iteake ánimamó nene, okulumá koló okago, Ómasímíni Sikalahú nene nama luhusigitana oko Izesuni amupiló nolimigo ánimamó.

<sup>11\*</sup> Lá okago okulumakutí Ómasímo gakó makó láa loko limó: Geza nene nigika amenou gipáne noane. Geí ángo lamaná okuve.

*Satá Izesuni amekú moloko minamó*

*(Mat 4:1-11; Luk 4:1-13)*

<sup>12</sup> Loko lokago Sikalahulímo Izesuni amiselekago mikasi gomopalaló vimó.

<sup>13</sup> Neneloka voko noigo, gamena 40-a oko novigo Satá nene gimivagú moloko minamó. Itó Izesú eza nene hela gaha namatini holúikú noigo ageló keza nasahilí itiki minamó.

*Galilaia mikasiuka Izesú monó hoza apí imó*

*(Mat 4:12-17; Luk 4:14-15)*

<sup>14</sup> Lá okago, Zonini nene nagá numukú ahulimikago noigo, Izesú nene Galilaia mikasigú vo aníteake Ómasímíni gakó lamaná lo utó oko láa loko lo kimimó:

<sup>15\*</sup> Gamena mota alitokaze, Ómasímo gizapa oleketati gamena nene omo alitokave. Nenemú likigika ali viligiiki gakó lamaná gili alévolé ilo, loko limó.

*Izesú lagaha aliaká ve losive losive sele lo kimimó*

*(Mat 4:18-22)*

<sup>16</sup> Nominake Galilaia nonohuló agataloka mohona noigo Saimoko agunala Etuluko keza lagaha miliaká así ve minasinazo, nonohulukú nene lagaha gotaha ahuliki minasimó. Lá niasigo ángoake Izesú láa loko lo kimimó:

<sup>17</sup> Némegetiki alizo. Lagaha hoza aliki minasimóma, vejenatoka hoza nalisiko vejená není zuha lílí itave loko lekelémo nomuluve.

<sup>18</sup> Loko lokago, litá iki lagaha gotahama ahulikásike ámegetiki vasimó.

<sup>19</sup> Lá ikasigo Izesú koma makó novike Zepetaioni gipala lositá Zemusiko agunala Zoniko keza nagamikú lapegú minasike lagaha gotaha ali lamaná niasigo, ángoake,

\* 1:2: Mal 3:1 \* 1:3: Isa 40:3 \* 1:6: 2 Kug 1:8 \* 1:11: Apí 22:2; Age 2:7; Isa 42:1; Mat 12:18; Mak 9:7 \* 1:15:

<sup>20</sup> sele lo kemekago, gilikasike, améipini Zepetaioegegi gelekélé izegipalagi lapegú niago ahulikimikasike Izesuni ámegetiki vasimó.

*Holosi golesa agikagú mina ve  
(Luk 4:31-37)*

<sup>21</sup> Lá okago, keza Kapanao numutoka viki anitiaeke holisi gamena alitokago, Izesú nene monó numukú iteko monó lo kimimó.

<sup>22\*</sup> Loko kemekago, gilikago, itimó. Monó mogona apí ikimiaká a vete gakó lainim oketamó nenéminoko apí oketamimó. Ezáa monó gakola gale geheko lo kemekago, giliake sigaga sagaga litamó.

<sup>23</sup> Lá okago, gamena nene zupa monó numukú ve makó minamó nene agika ale gopa i holosi agikagú minamó.

<sup>24</sup> Eza gamoga geko Nasalete ve Izesuvo, geza nana netá golesa aleletanogo noane. Géisi lelémo golesa itove loko noape. Geí ánigo hee hee noluve. Géisi Ómasilokatí etó oko noani vema noane.

<sup>25</sup> Loko lokago, Izesú nene gahá amike gegépa apizeoko agikagutí iteko legesó oko vozo.

<sup>26</sup> Loko lomikago, agika ale gopa i holosi nenémo ale helonalo lomikago, gopaga nolike agikagutí iteko ahulomiaké vimó.

<sup>27</sup> Lá okago ve vená mukí keza ininá ake kezáitoka loká loká ake lamó: Íi, imane nana suni neve. Monó nene haitolúmini amuzavagi neve. Áisi gakola gale geheko holosima lokimikago gili amiaká niave.

<sup>28</sup> Liki likago, aikumú gakoláa likago litá oko Galilaia mikasiuka puu loko vimó.

*Izesú Pitani venalámini izolahini alémo zokamó  
(Mat 8:14-15; Luk 4:38-39)*

<sup>29</sup> Lá okago, monó numukutí limiáke, Saimon itó Etulú keí numukú Zemusigegi Zonigegi itemó.

<sup>30</sup> Saimoni venalámini izolahini agupegú ló la netá avisekago akonoigo, Izesuni litá iki li amemó.

<sup>31</sup> Li amikago, vo aniteake agizató aleko alémo otekago, agupegú ló la netá nenémo litá oko asú omikago, oteake Izesugini nasahilí oketamó.

*Ho lemekago Izesú vejená mukí kelémo zokamó  
(Mat 8:16-17; Luk 4:40-41)*

<sup>32</sup> Lá noigo, únaká ho lemekago, mukí kivisi vejenaki kigikagú holosi golesa mina vejenaki Izesutoka kilimiki ikago,

<sup>33</sup> apá amelage mukí iki gatetó alegesá amó.

<sup>34</sup> Lá ikago, haitopaitó netá kivisi vejená mukí kelémo zokoake holosi golesa mukí nene kigikagutí kepeleko kimisilimó. Lá itó nene ánigi hee hee likanazo, aí mogona lili ali amitave loko lo hukoketamó.

*Izesú monó lo kemeko mohona imó  
(Luk 4:42-44)*

<sup>35</sup> Gó lomolomo gokululuva notovo igo, línnumuvamú Izesú eza numukutí lemeake apá makotoka mikasi gomopalaló voko minake Ómasiloka limó.

<sup>36</sup> Lá noigo Saimon nene agivelagegi keza agizaka hiziki,

<sup>37</sup> alími utó iake láa liki li amemó: Vegená mukí geikumú vitagá niaze, geza imaneló nana noane.

<sup>38</sup> Liki likago, eza láa loko lo kimimó: Apá mukí vaí oko alitoka neve. Neneló monó lo utó itove loko makó vitune. Neza nene ámina hoza alitove loko omó nouve.

<sup>39\*</sup> Loko loake vike Galilaia mikasiuka mohona o asú noike, keí monó numuni minakú minakú monó lo utó oko minake, holosi nene kigikagutí kepeleko kimiseleko alahula ahula imó.

*Izesú lokago halamé gizali ve gililimó  
(Mat 8:1-4; Luk 5:12-16)*

<sup>40</sup> Lá okago, halamé netá gizali ve makolímó aitoka oake negénegeka loko alapusa hizike lo amike limó: Geza nene nelémo gililitove loko nene hanuva nelémo gililitanimó nenazo, nelémo gililitane loko noluve.

<sup>41</sup> Loko lokago, Izesuni agika hizekago agizani lutoko agupeloka ale nogilike lo amike limó: Gililitane loko gelekuze. Gilelezo.

<sup>42</sup> Loko lokago, litá oko halamé netáma asú omikago agupe lamaná okago,

<sup>43</sup> Izesú litá oko namisilike lo hukotake limó:

\* 1:22: Mat 7:28-29 \* 1:39: Mat 4:23, 9:35

<sup>44</sup> \* Gelenape. Geza imane gakó avetó oko vejená lo kememo. Gilelekane liki gili hee litave loko geza nene voko guguni gizoaká ve gugupe alapizekako mota gilelekane loko ániigative. Itó gílelenikumú nene Mosé loleketa netá Ómasi guguni gizo amitive loko amekako eza vejená mukí lo kemekiko nenémini mogona gili vevesatave.

<sup>45</sup> Loko lokago, ámina ve nenémo voko avetó avetó oko lele ale imó. Nenemú Izesú nene vejená sii sii liki alegesá ikatave loko taoni makotoka hanuva vamike apá agataloka minokago, vejená keza numutó namatotí gopa aitoka ikigó minamó.

## 2

*Izesú ve gepili alémo zokamó*

*(Mat 9:1-8; Luk 5:17-26)*

<sup>1</sup> Gamena makó oko vokago, Izesú nene Kapanao numutoka goha vo anitekago, Izesú nene numukú noive liki gakoláa giliake

<sup>2</sup> vauva aliki iki alegesá akumú gatetoki hizi lí amó. Lá okago, monó lo nokimigo,

<sup>3</sup> ve losive losive nenete ve gepili makó ukoakoló aliki niago, keitoka vejená makó kémegetiki amó.

<sup>4</sup> Lá ikago vejená giki ikago, Izesuni amatoka amitamó okago numupitó itinigi ukoakoló milimiake akaló aliki itemó. Izesuni gotolaló ali koló iake, ve gepili mína ukoakoma nagá ziki ahulikago Izesuni amatoka limimó.

<sup>5</sup> Lá okago, Izesúma gili alévolé amó nenémini mogona ániigoko geleake ve gepilima láa loko lo amimó: Gípáneve, lihimaka ahulogimikuve.

<sup>6</sup> Loko lokago, monó mogona apí ikimiaká ve neneló minamoláate láa liki kigikatunú gelemó:

<sup>7</sup> Íi, Ve makó éaho lihimate ale ahuloletatimó neve. Ómasi hamokó lihima ale ahuloaká noimó nenazo, eza agupe aleko iteko Ómasi aviliginogo nolihe.

<sup>8</sup> Láa liki kagata nigelego, Izesú nene Zuta vejenalite lihima ahulolimiaká itó vejená kelémo zokoaká nene Ómasimogó loló oaká netá neve liki gelemó nene hanuva agikatunú geleake láa loko lo kimimó: Likigikauka gakó nenémináa nanamú nigeleve.

<sup>9</sup> Ve makolímó Ómasi noamitimó nene lihimaka gilatogimikuve loko vávani oko lamitimóza, ámináminoko kelémo zokoaká zámuzagi ve noamitimó nene oteoko ukoakoka geheko vozo loko litá oko lo ameminogo ive.

<sup>10</sup> Lá onoi móza, okulumakutí lumu ve gihila neza mikasigú nene lihima gilatoakalímuni zámuzza itó vejená kelémo zakoakalímuni zámuzza nenitoka neve liki gili hee hee litave loko ve gepilima lo amike limó:

<sup>11</sup> Otekoko ukoakoka geheko numukaloka vozo loko nologetuve.

<sup>12</sup> Loko lokago, Ómasi kogovisaló ukoakoma geheko vimó. Lá okago, vejená mukí keza sigaga litake Gémasi agepoka láa liki lamó: Nene suni ániigosá amuhá gosohá utó okago ániigokune, liki lamó.

*Livaini sele lo amimó*

*(Mat 9:9-13; Luk 5:27-32)*

<sup>13</sup> Izesú lá oake goha lemeake nohuló agataloka vike vejená mukí aitoka alegesá ikago monó apí o kemeko minamó.

<sup>14</sup> Nenelotí novike, Alapaioni gipala Livaí nene takisi aleaká numukú noigo, ániigoake némegetoko ano, loko lokago, Livaí nene oteake ámegetoko vimó.

<sup>15</sup> Vike Livaini numukú itiki minasike nosáneta ninasigo, takisi moni aliaká vegi golesa netá aliaká niave liki kagata giliaká a ve makoláagi mukí keza Izesuni ámegetiki viaká a ve minamó.

<sup>16</sup> Lá niago, Palisaio monó vejenalitiní monó mogona apí ikimiaká ve nenete Izesú nene ámina ániigi goselé iaká vejenaki nosáneta ninago ániigiake nene, izegipala zuha láa liki li kememó: Íi, áisi nene golesa netá aliaká vejená nenémináagi nosáneta nana igo nonave.

<sup>17</sup> Liki likago, Izesú nene geleake anoza gakó makó láa loko lo kimimó: Keza ha minamoláate lusa vemú sele lisá amave. Kivisi vejenalitegó lusa vemú sele liaká niave. Neza hee loko nouné liki liaká nia vejená kelémo otopá zitove loko lemumómoma neve. Neza lihimáinigi vejená kelémo otopá zitove loko lumumómoma nena, loko limó.

*Nosáneta moseakakumú loká itamó*

*(Mat 9:14-17; Luk 5:33-39)*

<sup>18</sup> Zonini izegipala zuhagi Palisaio monó vejenaki keza Ómasimo nosáneta mosekuko lelikumú litihe liki mosé mosé iaká amó. Lá niago, ve lugáa keza Izesutoka vake láa liki loká

\* 1:44: Liv 14:1-32

itamó: Zonini izegipala zuhagi Palisaio monó vegeñalitiñi izegipáini zuhagi keza nosáñetá mosé mosé iaká niámóza, geí izegipaka zuha keza mosísá amave. Nanamú neve.

<sup>19</sup> Liki likago, Izesú anoza gakó láa loko lo kimimó: Ve makolímó agivelagegi makó kogoliza viziki minata zupa nene keza aikumú miluma giliiki nosáñetá mositamó nehe. Lá oko nomive. Ámina vegi apiziki minata zupa nene nosáñetá moseminigave.

<sup>20</sup> Ámina vema apili hilita zupa alitokiko, nene zupa miluma nigiliki nosáñetá mosinigave. Áminámini iki, izegipáne zuhate alika nenikumú miluma giliki mosí mosí inigave. Itína nene moseminigave.

<sup>21</sup> Itó lavolavo gó gosohá gí zenamimó nene huki koma iiki ali litaha lavolavoló miliki akotísá amave. Alike nagamí zikiko giki okiko nene gosohá gó komamámo litaha lavolavolavolotó hikelekiko lavolavoma golesa o asú inogo ive.

<sup>22</sup> Itó vain nagamí gosohá gituhú galakalá noigo nene litaha getununigú milisá amave. Vain nagamímámo giputooko getununima zeko pulutokiko vain nagamíma hutilí okatize, itó getununima ámina oko golesa okatize. Vain nagamí gituhú galakalá noimó nene litaha getununigú negopa gosohámagukó miliaká niave. Loko anoza gakó limó nene Zuta vetini litaha mogonáagi Izesuni izegipala zuhate gosohá iki miliki ita sunigi molo apizeakaláa nomive loko limó.

*Izesuni vegeñala zuhate holisigú kilé hisiki nimi vamó*

*(Mat 12:1-8; Luk 6:1-5)*

<sup>23</sup> \* Holisi gamena makokú Izesuni izegipala zuhagi kilé mikú mihina niago, izegipala zuhate gaúna hilikago kilé asutiake gihiláa hisiki nimi vamó.

<sup>24</sup> Lá niago, Palisaio monó vegeñalite gili golesa ake Izesuni li amiki lamó: Ánigozo, netá nalemó nenémo golesa okave. Lelí holisigú imane hoza lá amoakalímíni nene nanamú naleye.

<sup>25</sup> \* Liki likago, eza monolímíni li hukina gakó nenémo vegeñá kelémo vatí iti gapo nene hize lí itive loko utó amive liki gilitave loko láa loko lo kimimó: Gozapá agulizaki ve Tevitige vegeñala zuhagi nosáñetakumú gaúna hiliake netá alemó nene monokú luhuva gizinámóza lekeza ámina gakó gatiake mogonáa gelemiki nilahe.

<sup>26</sup> \* Tevití eza Ómasímíni numukú itekago guguni gizoaká ve napa Apiatalá nene Ómasímíni avogisaló mila peleti amekago noake ezagi makó mina vegeñá nene kemeko namó. Ámina peleti nene hanuva vegeñalite namitave liki guguni giziaká vetegó natave liki alévolé iki li hukinamó nene gopa namó neve.

<sup>27</sup> Loko loake, miní ameko láa loko lo kimimó: Holisi gamenamule loko Ómasímó vegeñá loló amimóza, holisi gamena nene vegeñakumule loko utó onomóló neve.

<sup>28</sup> Lá onoinazo, okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netá neve, loko limó.

### 3

*Agizani nakeseta ve*

*(Mat 12:9-14; Luk 6:6-11)*

<sup>1</sup> Minoko monó numukú nene agizani nakeseta ve makó iteko noigo, Izesú áminagú goha itekago,

<sup>2</sup> holisimagú nenazo, ámina ve imane holisimagú hoza aleko alémo zokokikoma goní otatunize liake gizapa iki minamó.

<sup>3</sup> Lá niago, Izesú nene agizani nakeseta vema láa loko lo amimó: Holutegú ote minozo.

<sup>4</sup> Loko loake vegeñá láa loko loká oketamó: Holisigú nene netá lamaná alesatímó etatihe netá golesa alesatímó etative. Vegeñá kelémo lamaná osatímóhe kepele helesatímóve.

<sup>5</sup> Loko limóza, anotó alemake niago, izapaló molago gonú nokipilike gili ámegekumú miluma geleake, agizani nakeseta vema gigizani lutozo loko lokago, agizani lutokago goha lamaná imó.

<sup>6</sup> Lá okago, Palisaio monó vegeñá keza limiki vake nana oko apele hilitune liki kezagi Heloteni patigú vegeñaki litá iki lova gizamó.

*Nonohulotó vegeñá iki mulusi milamó*

<sup>7</sup> Lá okago, Izesú eza izegipala zuha kelémoko nonohulotó lemekago, vegeñá mukí Galilaia mikasilotí kémegetiki vamó. Itó kéisigó vamamó.

<sup>8</sup> Zelusalagatí itó Zutaia apakú numuni apá makotokatí itó Itumaio mikasilotí itó Zota nagamí vola helegalotí itó Tulo numutokatí Sitona numutokatí vegeñá keza iki Izesú oko moloko imó nenémíni gakoláa giliake vai iki aitoka alegesá amó.

\* 2:23: Gapo 23:25

\* 2:25: 1 Sam 21:1-6

\* 2:26: Liv 24:9

<sup>9</sup> \* Lá ikago, Izesú alegesá iki mina vejená aitoka mununú ikatave loko izegipala zuhate nagamikú lape makó líiki nagamí getatoka milíkiko nenegú iteko minoko gakó lo kimitove loko loketamó.

<sup>10</sup> Vegená mukí kelémo zokamómave líki netá golesa gizale vejenalite agupeló ale gilitunítimo lelémo zokative líki aitoka iki mulusi milakumule loko lapemú limó.

<sup>11</sup> Lá okago, holosi golesa kigikagú mina vejenalite ánga zupa kighúna giki gamoga giki géisi Ómasímíni gipalama noane líki liaká amó.

<sup>12</sup> Láa líki líkago aí mogona aveté iki líli ali amitave loko alévolé oko lo hukoketamó.

*Izesú ve 12 hozaló ve kelémo molamó*

*(Mat 10:1-4; Luk 6:12-16)*

<sup>13</sup> Izesú nene zopegaló iteake agikatunú gili vejená sele lo kemekago aitoka víki alegesá amó.

<sup>14</sup> Lá ikago, ve 12-a ezagí minatave loko itó kimiselekiko monó gakó li kimitave loko

<sup>15</sup> itó zámuza kemekiko kigikagú holosi minatamó kipilíki kimisilitave loko kelémo etó oake kugulizá nene aposolo vemave loko molamó.

<sup>16</sup> Ve 12-a nene lá iki minamó: Kugulizá Saimon, agulizá gosohá Pitani molamó,

<sup>17</sup> itó Zepetaioni gipala Zemusi itó agunala Zoní, keza nene kugulizá Poanelekesi loko molamó, lelí gakokutí nene gó hegeaká ve.

<sup>18</sup> Itó Etulú itó Pilipó itó Patolomaió itó Mataiό itó Tomasi itó Alapaioni gipala Zemusi itó Tataiό itó Saimoná eza Loma vemú giligo ahulanogo i ve,

<sup>19</sup> itó Kaliotó numutotí ve Zutá eza minomo iteko Izesuni amimika limó.

*Izesuko Pelezepuloko*

*(Mat 12:22-32; Luk 11:14-23)*

<sup>20</sup> Izesú nene aí numutoka vimó. Vo anitekago vejená vaí iki alegesá akumú nosáneta namamó.

<sup>21</sup> Lá ikago, Izesuni vejenala zuhate áisi negi hizekave líki la gakó giliake, agizató alitune líki vamó.

<sup>22</sup> \* Lá ikago, monó mogona apí ikimiaká ve Zelusalegatí a ve keza Izesunimú láa líki lamó: Holosi golesa makó agulizá Pelezepuló nene agikagú noive, itó holositini agulizakí vémo alémo vatí igo holosi nene kepeleko kimiseleaká noive.

<sup>23</sup> Láa líki nila gakó Izesú nene geleake sele lo kemeake Satani zámuza mota avilegeneikumú anoza gakó makó láa loko lo kimimó: Íi, Satá ezáa izegipala zuha kepeleko kimisilitihe.

<sup>24</sup> Mikasi makokú vejená hizi hóu latamó nene, alévolé iki minamiko ámina apatoka gámekokó pizinogo ive.

<sup>25</sup> Itó hamó zuha nenete hizi hóu latamó nene, ámina vejená alévolé iki minaminigave.

<sup>26</sup> Lá onoinazo, Satá nene ezáa vejenala zuhagi hizi hóu latamó nene, voko alévolé oko minamitimó nenazo, tolova inogo ive.

<sup>27</sup> Itó ve makolímó gasovagí ve amuza vémini numukú litá oko iteko aí henoni mukí ipá oko aleakaláa nomive. Goí oko ámina vémini agisa agizató nagá aleoko alika nene iteko alitimó neve. Lá oko nagá aleoko alika iteko henoniva ipá inogo ive loko limó nene Satani agizató nagá aleuke holosiva nene kepeleko kimiseleaká nouve loko anoza gakokutí limó.

<sup>28</sup> Loko loake, makó láa loko limó: Neza lamaná lo líkimitoze, gililo. Netá golesa haitopaitó nenémíni lihima itó alivi letivi iaká nenémíni lihimaivaláa nene Ómasímó hanuva ahuloaká gapo nemóza,

<sup>29</sup> \* ve makolímó Ómasímíni Sikalahukumú alevo letovo oakaláa nene Ómasímó nenémíni lihímáa apasoakaláa nomive. Ámina lihima ámina vémini amupiló mino lúaló moloko minanogo ive.

<sup>30</sup> Loko limó nene Ómasímíni Sikalahulímíni zámuzatunú negopa, holosi makolímó Izesuni agikagú lemeko alémo vatí igo holosi nene kepeleko kimiseleaká noive líki lakumú nene láa loko Izesú lo kimimó.

*Izesuni izolahiki agunamotamolagi*

*(Mat 12:46-50; Luk 8:19-21)*

<sup>31</sup> Izesuni izolage izegipa agunamotamolagi anítiake numuni hetoka aikumú sele lamó.

<sup>32</sup> Sele nilago, alímí ve go iake mina vejenalite láa líki li amemó: Gelenape, izokage izegipa gugunamotamoka keza hetoka emane níake geikumú sele nilave.

<sup>33</sup> Líki líkago, Izesú láa loko lo kimimó: Izónegini nungunamotamónemú nilahe.



<sup>34</sup> Loko loake, aitoka mina veđená nene gonú nokipilike láa loko limó: Ánigalo. Izónege izegipa nugunamotamóne imane niamole.

<sup>35</sup> Ómasimo li gakotó gili amiaká nia veđená kéisi nene izónege nugunamotamóne niave, loko limó.

## 4

### *Zuha netá atilí oaká vemú anoza gakó*

*(Mat 13:1-9; Luk 8:4-8)*

<sup>1</sup> \* Izesú goha nonohuló agataloka monó lo nokimigo, aitoka veđená mukí keza sii sii liki alegesá ikago veđená gikí akumulé loko nagamikú lapegú iteko minokago, lape nene nagamikú minokago, veđená alegesá amó mukí keza getatoka minamó.

<sup>2</sup> Minikago, Izesú anoza gakó haitopaitolímíni lo nokimike makó láa loko lo kimimó:

<sup>3</sup> Gililo. Zuha netá atilí oaká ve makolímó netá gihila atilí inogo vimó.

<sup>4</sup> Mikuka atilí omo novigo, gihila makó gapoló alemó zekago, gaha namate ake ni asú amó.

<sup>5</sup> Makó nene gehani amupiló mikasi lagasó netó lemekago mikasi hána nomimó nenazo, goloakaláa litá oko golokaha,

<sup>6</sup> ho nolake avagugu vizekago, luhusa hána minamike osagava vizimó.

<sup>7</sup> Makó nene lilihámíni luhusa nene mikasigú ha netó alemó zike golokago, liliha nenémo goloko iteake zemikago gihila zemimó.

<sup>8</sup> Makó nene mikasi lamanakú lemeko minake goloko iteko gihila zimó. Zava makó nenémo gihila 30 zimó, makó nenémo gihila 60 zimó, makó nenémo gihila 100 zimó.

<sup>9</sup> Lakagatagi minatamó neneta imane gakó gili hee liki gililo, loko limó.

### *Anoza gakokú lo kemeaká itímíni mogona*

*(Mat 13:10-17; Luk 8:9-10)*

<sup>10</sup> Veđená lugáa vi asú ikago, aitoka mina veđenaki izegipala zuha 12-a kezagó minake ámína anoza gakokumú loká imikago,

<sup>11</sup> láa loko lo kimimó: Ómasímíni gasovaló minoakalímíni asuguná gakó lekeza gilitave loko lonoimóza, hetó niamoláa keza anoza gakokukó gilitave loko loaká nouve.

<sup>12</sup> \* Nenemú Ómasímíni agepagutí gakó loaká i ve Isaiá gakó makó láa loko luhuva gizonimó nene keitoka alévolé oko neve:

Kogómulatunú ániakaláa ha ánitamóza, ma ániği vevesaminigave.

Itó kagatatunú giliakaláa nene ha gilitamóza, gili vevesaminigave.

Kigika ali viligamikoma, lihimámíni ahuloketamigo, ha minanogo ive.

### *Zuha netakumú anoza gakolímíni mogonáa*

*(Mat 13:18-23; Luk 8:11-15)*

<sup>13</sup> Izesú miní ameko láa loko lo kimimó: Imane anoza gakó lumó nenémíni mogonáa gelemahe. Láa noikoma, anoza gakó mukí nene nana iki gili vevesatave.

<sup>14</sup> Netá gihila atilí oaká vémo monó nene atilí oaká noive.

<sup>15</sup> Zuha netá makó atilí noigo gapoló alemó zimó nenémíni iki minatamó keza monó gilitamóza, Satá litá oko aniteko monó nene kigikagú milikago minamó nene aleko vokago kigikagú minamimó.

<sup>16</sup> Itó zuha netá gehani hizenei mikasiló limimó nenémíni iki minatamó keza monó nigiliki litá iki laga kivisekago giliaká niamóza,

<sup>17</sup> kigikagú luhusa ale gikitamigo gamena alínipa aliniko monó gakó alinakumú gopogu galatakalatá milikitata gamenaló nene litá oko akatimó neve.

<sup>18</sup> Itó lilihagú limimó nenémíniki minatamó keza monó giliaká niamóza,

<sup>19</sup> imane mikasiuka gena kepeleaká noi netá itó monimú lagava giliaká nia netalímó itó netá haitopaitokumú kumu heleaká noi netá nenémo kigikagú minoake, monó zemikago keitoka gihila utó osá amive.

<sup>20</sup> Itó mikasi lamanakú limimó nenémíniki minatamó nenete monó giliki alinago, keitoka gihila zeaká noive. Makolititoka napa otigí zeaká noive, makolititoka mukí zeaká noive, makolititoka vauva aleko zeaká noive.

### *Liví legeakakumú anoza gakó*

*(Luk 8:16-18)*

<sup>21</sup> \* Loko loake anoza gakó makó miní ameko láa loko lo kimimó: Ve makolímó liví lege molokoko holoma sepekú ahe somotunú gahumá oakaláa nomive. Eza liví moloaká holomaló molokago, hize hanatanango ive.

22 \* Ámináminoko Ómasímini asuguná ne netá mino-loko vo tolova amitive. Minoko utó o asú inogo ive. Halá genei netá ámina oko hanato asú inogo ive.

23 Lakagatagi minatamó neneta gako imane gili hee liki gililo.

24 \* Loko loake láa loko limó: Lekeza gako imane nigiliki gili guni iki gililo. Lekeza gako gilita polosava nene Ómasímo áminagó oko nene monó lehizeleketanogo ive. Itó nenegó nomive. Aleko iteko likiminogogo ive.

25 \* Makó keza monó nene vatí iki gizapa iki ali minatamó nene Ómasímo goha miní ameko kiminogogo ive. Itó makó keza monó nene lamaná iki gizapa amitamó nene monó alenoupe gilitamóza, goha ipá oko alekiko nene hanuva minatamó neve.

*Zuha netakumú goloakakumú anoza gako*

26 Izesú gako makó láa loko limó: Ómasímini monolímo likigikagú gihila ale utó itimómámini mogonáa lá oko neve: Ve makolímo mikú zuha netá mikasigú atilí oake, noike,

27 gó lana gó lana nominagogo nenémini mogonáa ángo hee lamigo, zuha netáma goloko iteko napa noigo,

28 mikasímo ezáa lulu vizeake goloaká noive. Apí oko hosi oake goloko itike agila oake, gihila zeaká noive.

29 \* Gihila zeake zuha lokago, aleko natuni gamena alitokave loake, hukatave loko kimiselekgogo minumuni aliaká niave.

*Masteti zuha netakumú anoza gako*

*(Mat 13:31-32; Luk 13:18-19)*

30 Gako miní ameko láa loko limó: Ómasímini avogisaló vi hilata vejená hizi hutilí itakumú nene nanetalímini amupiló ale moloko litove. Nenemú litove loko nene nana gakotó anoza ale moloko litove.

31 Masteti loko nei zuha netá nenéminoko neve. Ámina netá nene mikasigú atilí inigi niago, mikasiuka gihila lugáagutí ezáa koma nemóza,

32 atilí ikago, goloko iteko iteko napa oake, zamú mukí kivilegeko izana napagi itekago, nama nenete samapalagú numuni giaká niave.

*Izesú anoza gako mogonáa lo kimimó*

*(Mat 13:34-35)*

33 Izesú anoza gako haitopaitó mukí hamolíminoko monó lo kemeko minamó nene gilita polosava lo kimimó.

34 Gako lo kiminogogo noike anoza gakokutikó lo kemeake, lo utó oko lo kememike ezagi izegipala zuhagi kezáikó minake nene, gako mogonáa mukí lo utó oko lo kimimó.

*Izesú lokago una napa ahulamó*

*(Mat 8:23-27; Luk 8:22-25)*

35 Ámina gamenalokó únaká gamena gánavaló nene Izesú eza izegipala zuhama vola helegaloka mota vitune,

36 loko loake alesesá iki mina vejená ahulokimiake sipigú iteko noigo, keza alímiki nivago, vejená makolite nagamikú lape makokú kémegetikí vamó.

37 Nivago una napa alekago, nagamí nene valahuká zitímo lapegú lemeko vaí inogogo noigo Izesú nene lape asevaló akonoike, gotolaló za moloko akonoigo,

38 izegipala zuhate alími otiake láa liki li amemó: Monó gizapa velemaka, nagamikú simá nanogogo nounize, geza nanamú lelikumú gele lememanike hanuva noane.

39 Liki likago, Izesú oteake unama gahá amekake nagamí nonohuló nene valahuká zemoko legesó oko minozo loko lokago, una nene ha okago nagamí nene kii nolike zou limó.

40 Lá okago, izegipala zuha láa loko lo kimimó: Nanamú lekelegesá ligive. Nenikumú velesá gili alévolé amahe.

41 Loko lokago, kehelele goha vizigo kezáini ligili hagili ake láa liki lamó: Agae, imane ve nene haitolímini neve. Unagi nonohuloki nenetosa gakola gili alikasive, liki lamó.

## 5

*Gelasa mikasiuka holosí golesa amisele ahulamó*

*(Mat 8:28-34; Luk 8:26-39)*

1 Nonohuló vola helegaloka viake, Gelasa vejenalitiní mikasiuka anitemó.

2 Neneló agikagú holosí golesa mina ve makó minamó.

<sup>3</sup> Ámina ve nenémo geha mulikú akoaká noigo, ve makolite agizató alisá ikago seni nagatunuki alemó nene alemimó.

<sup>4</sup> Gamena gamena agisa agizató etoha iki seni nagatunú aliaká amóza, agizató nagá nene zeko halí oake, agisaló nagá alemó nene zeko hukokago, ve makólímo amuza moloko alémo zou lamitimó imó.

<sup>5</sup> Gamena gamena únaká neteká mulikuki agokaloki minake nene, gopaga loko minake nene, gehanitunú agupeva gesopá zeko minoaká imó.

<sup>6</sup> Ámina ve nenémo Izesú nene sipigutí nolimigo geha mulikú gonosi apakú minakutí ake hototí Izesuni ángoake ololu loko oko Izesuni agisauka gupá ze amike

<sup>7-8</sup> gamoga geko láa loko limó: Izesuvo, Ómasi napámini gípalamaka, géisi nana netá golesa loló onetanogo noane. Loko lokago, Izesú nene holosi golesa neneka, ámina vémini agikagutí iteko vamane loko lomikago, holosi nenémo amanapa ike neza Ómasímini agulizá noluze, miluma hoza nememo.

<sup>9</sup> Loko lokago Izesú nene loká otake gugulizaka éagave. Loko loká omikago eza limó: Leza mukí nouninazo, lugulizá nene ami mulusi nouve.

<sup>10</sup> Loko loake ámina mikasilotí limiselemítane loko negénegeka limó.

<sup>11</sup> Loko lokago, iza gululusi mukí zopegaló gale niki niago,

<sup>12</sup> holosite negénegeka lake izatini kígikagú limiselekako limitune.

<sup>13</sup> Liki likago, gele kemekago, holosi golesa nenete agikagutí itiake iza gululusi tu tausen nenetini kígikagú itiake limikago, olíi miliake meiniló limiáke nonohulukú limiki nagamí niki hutiake hiligesá amó.

<sup>14</sup> Hilikago, iza gizapa vete golisi viake taoni napaloka iza gihiló numutokagi avetó iki li kimikago, vegená keza utó i netá ánganigi viake,

<sup>15</sup> Izesutoka anitíake holosi agikagutí kimiselekago va ve nene ginégane ale luhoake geleakala lamaná okago, mító noigo, ángiáke kelegesá ligimó.

<sup>16</sup> Lá niago, nene suni ánga vete holosi golesagi mina ve lamaná imó itó iza helemó nenémini gakoláa avetó iki li kimikago,

<sup>17</sup> mikasinini ahulokoko vitive liki Izesuni negénegeka lamó.

<sup>18</sup> Likago, Izesú eza sipigú noitigo, holosi agikagutí kimiselekago va ve nenémo Izesuki makó minatíve loko negénegeka lokago,

<sup>19</sup> Izesú gele amemike láa loko lo amimó: Numukaloka voko Guivahanímo geikumú agika hizekago loló ogeta netá lamanalímini gakola nene vegenaka zuha avetó oko lo kemezo.

<sup>20</sup> Loko lokago, Tekapoli mikasiloka atiginá oko vike Izesú loló ota netakumú lo utó oko lo kimigo, ve vená mukilíte Izesuni sigaga litiki minamó.

*Zailoni moholagi Izesuni gotó ale gili venaki*

*(Mat 9:18-26; Luk 8:40-56)*

<sup>21</sup> Lá ikago, Izesuge sipigú itiake ima helegaloka goha iake, getató limiki niago, vegená vaí iki aitoka alegesá amó.

<sup>22</sup> Lá ikago, monó numukú agulizakí ve makó Zailó loko noi vémo oko

<sup>23</sup> Izesuni ángoake, gupá ze amike negénegeka like limó: Není mohó komámini ameni nomigo, mota hilinogo noize, zokoko agómulagi minative loko, oko gigizanitunú ale geleko nónohá zetatané loko noluve.

<sup>24</sup> Loko lo amekago, geleake, makó nivasigo, vegená alegesá amó vaí iki ámegetiki nivake, aitoka sii sii liki nivakú nene

<sup>25</sup> vogaláikú vená makó nene ikanímo avutá apelekago númase gapo kilisimasi 12 oko novigo molova molova oko noi vená minamó.

<sup>26</sup> Lusa ve mukilíte miluma netá mukí amikago moni keme asú imóza, avisi netáma asú otamike alika sipisi netá gizaleko minamó.

<sup>27</sup> Eza nene Izesuni gakoláa geleake vegená alegesá amó nivakú nene Izesuni amegesaloka oake,

<sup>28</sup> agupeló ahe itó hanuva luhoaká golaló ale gelekinake zokatove loko agata geleake luhoaká golaló ale gilimó.

<sup>29</sup> Ale nogilike, litá oko sepá zekago, nivisi netá asú onimikave loko agupegú gilimó.

<sup>30</sup> Gelekago, Izesú nene zámuzala agikagutí vokago geleake, vegená alegesá akutí viligoko láa loko limó: Není luhoaká gotó éaho ale gilive.

<sup>31</sup> Loko lokago, ai izegipala zuhate láa liki li amemó: Vegená alegesá ikima sii sii likima nianazo, nugupeló éaho ale nogilive loko nolape.

<sup>32</sup> Liki likago, éaho alihe loko ánganogo ángomo mohona imóza,

<sup>33</sup> vená nenémo Izesú loló ota netakumú geleake ahelele novizigo, luvuluvo nozike ake, agihúna geko lo utó oko lo ame asú imó.

<sup>34</sup> Lo utó oko lo amekago, eza láa loko lo amimó: Mohónemaka, nenikumú gele alévolé anítimo gelémo zokokave. Mulukagú hulu iko vozo. Givisi netakutí zokoko minozo.

<sup>35</sup> Loko noligo, monó numukú agulizaki vemámini numukutí vegená makó iake láa liki li amemó: Mohókama mota helekave. Nenemú tisaka nanamú goha negénegeka nolotane.

<sup>36</sup> Liki gakó lamóza, Izesú nene gele ahuloake, monó numukú agulizaki vema láa loko lo amimó: Geza gehelele vizemino. Gele alévolé okogó minozo.

<sup>37</sup> Loko loake, vegená makó ámegetiki vemitave loko lo hukoko lokago, Pitaki Zemusiki agunala Zoniki kezagó kelémoko vimó.

<sup>38</sup> Viki monó numukú agulizaki vemámini numukú anitiki ániagamó nene, gakó napa napa liki ive nama iki hitagá hiziki niago ániagamó.

<sup>39</sup> Ániagoake Izesú nene numukú iteake ve venáma láa loko lo kimimó: Lekeza nanamú gakó akó napa napa liki ive nama niave. Mohóma nene helemive. Hanuva avó akonoive.

<sup>40</sup> Loko alémo otitove loko gelenei gakó noligo, giza napa itamóza, vegená mukí kehélú ike kimiselekago, hetoka limikago, mohómámini izolahiko amelahiko izegipala zuha losive makolemagi kelémoko mohóma akonoitó itimó.

<sup>41</sup> Iteake agizató nalike aí gakokutí láa loko lo amimó: Talíta kumi. Nenémini mogonáa lelí gakokutí nene mohó koma otitane loko noluve loko neve.

<sup>42</sup> Loko lokago, mohó nenémo litá oko oteake mohona oko minamó. Aí kilisimasi 12-a minamó. Itó vegená keza ániagiake litá iki sigaga goha lamó.

<sup>43</sup> Lá niago imane netakumú vegenalite gilikataze, avetó iki li kememilo loko lo hukoke-take nene, ámina mohó nene nosáneté amilo loko lo kimigo nosáneté aliake amemó.

## 6

### *Nasalete numutoka Izesuni ániagi ahulamó*

*(Mat 13:53-58; Luk 4:16-30)*

<sup>1</sup> Izesú nene apá ahuloake, ezáa gotó apalaloka vo anitekago, izegipala zuha keza ámegetiki vamó.

<sup>2</sup> Lá ikago holisi gamena alitokago, monó numukú monó lo keme keme oko noigo, vegená mukilite giliake sigaga sagaga litake láa liki lamó: Imane vémo nene gakó hikutí alive. Gele vevesoakaláa éaho amive. Imane ve nenémo imane alévolé suni nene hikutí ale utó oaká noive.

<sup>3</sup> Leza aí mogonáa gelenoune. Aísi numuni geaká ve nene Maliani gipala noinae. Itó Zemusí Zosé Zutá Saimonige keí uvóipoma noinae. Mohó agunala kezagi imaneló miniki aliki iaká nianazo, áisi nene hanuva lelikitana ve noive. Liki liake gelege, gena okago, aliki limiki likago,

<sup>4</sup> \* Izesú láa loko lo kimimó: Ómasímini agepagutí gakó loaká vémini agulizá nene numutó namató puu loko vitimóza, ezáa gotó apatokagi ezáa vegenala zuhalokagi ezáa numunakagi aí agulizá minamitimó neve.

<sup>5</sup> Loko loake áisi neneló Ómasímini zámuzá ale utó itove loko imóza, gena avisekago ahuloake, kivisi vegená lugáa agizanitunú ale geleko nónohá zeketake kelémo zokamó.

<sup>6</sup> Lá oake, aikumú gili alévolé amakumú giligo gena imó.

### *Izegipala zuha 12 keza monó hozaló vamó*

*(Mat 10:5-15; Luk 9:1-6)*

Lá okago, Izesú nene numutó numutó mohona oko monó lo keme keme oko minamó.

<sup>7</sup> Lá oake, minomo noitike, izegipala zuha 12 nene kelémo nupa oake, mihina iki holosi golesa vegenalitiní kigikagutí kipiliki kimisilitave loko zámuzá nokimike, losi losi oko nokimisilike láa loko loketamó:

<sup>8</sup> \* Gapo vitatoka nene netá makó alemiki hánusagó aliki viló. Itó peleti alemiki akiseaká gó alemiki gó komagú nene moni guémiki,

<sup>9</sup> likigisaló suú luhiki nene luhiaká gó lositá luhamiki viló.

<sup>10</sup> Loko loake láa loko lo kimimó: Itita numuni makokú itilikima ámina numukú aki-likí niviki ámina apatotí vitave.

<sup>11</sup> \* Itó apá makotoka likilími lamaná amikoma itó lekelí gakó gelemikoma nene, ámina apá nahulikí vahé miliki likigisalotí mumusopa nene usagamá zi ahulikí viló.

<sup>12</sup> Loko lokago, vake vegená keza kigika alí viligatave liki li utó iki li kimiake,

<sup>13</sup> \* holosi mukí kigikagutí kipiliki kimisilikí itó kivisi vegená mukí nene netupa hilikimi-ake kilími zokimi vamó.

*Nagamí holokimiaká ve Zoní hili gakó*  
(Mat 14:1-12; Luk 3:19-20; 9:7-9)

14 \* Lá ikago gakoláa hutilí oko vike agulizaki ve napa Heloteni agataló vo holokago gilimó. Ámina gamenaló nene vejená makolite Izesukumú nene Zoní monó nagamí holokimiaká vema heleneikutí oteake imane zámuza nene netá haitolímíni ale utó oaká noive.

15 Liki nilago lugáa keza Izesukumú nene Ómasímíni agepagutí loaká ve Ilaizá goha okulumakutí lemeake noive liki nilago, lugáa nenete gozapá Ómasímíni agepagutí gakó liaká a ve makokitana oko noive liki liaká amóza,

16 Heloté nene geleake Zoní eza luvana hukotu vemámo galegutí oteake ámina netá loló oaká noive loko limó.

17-18 Nene hanuvamú lamive. Heloté nene amunaloka emane uvolaho Piliponi venala Helotiasini nene ipá oko alimó. Lá okago, Zoní nene Heloteni lo ame ame oloko vike uvokahini vená ipá oko alenimó etamive. Loko lokago, venalámo gala vizekago Heloté nene ve makó kimiselekago vake Zonini agizató aliake nagá numukú ahulítamó.

19-20 Lá ikago, Helotiasí nene Zonikumú izapaló molokago apele hilinogo gilimóza, Zoní nene lihimavala nomí ve minake monolagi ve minokago, Heloté nene apilitomó nene Ómasímó nana onetatihe loko ahelele vizekago Zonini gizapa lamaná otatonazo lokago Helotiasí nene Zonini apelemítimó imó. Heloté nene Zonini gakó gamena gamena geleake agata losi goha gilimóza, Zoní li gakokumú geleake laga avisimó.

21 Minake Heloteni nene geta gamena alitokago, muki kugulizaki vegi lova gizapa vegi Galilaia mikasiuka vejená iti minamómagi kelémo nupa oake nosáneté vatá okimikago, niki niago, Helotiasí nene Zonini apiliti gamena ale utó imó.

22 Heloteki nosáneté niki niago, Helotiasini moholama iteake kovogisaló melekeni okago, keza ángi kumu hiliake agulizaki ve napa nenémo mohóma láa loko lo amimó: Geza netá nemú manamú nogilitanimó nene lokako gimitove.

23 Loko loake, Ómasímíni avogisaló lo hutoko limó: Nana nana netakumú loká onetatane. Ha giminogo uve. Gizapa nou mikasimuki loká onetatanimó nene hanuva hutoko giminogo uve.

24 Loko lokago, mohó nenémo hetoka lemeake izolahini nene gizapa vemámo láa loko lokanazo, nana netakumú loká otatove. Loko lokago, izolaho láa loko lo amimó: Mota helekave gilítokive loko monó nagamí holokimiaká ve Zonini luvana hutoko gotoláa nimitane loko lamane.

25 Loko lokago, mohómámo litá oko agulizaki ve napa noitoka goha iteake láa loko loká otamó: Monó nagamí holokimiaká ve Zonini gotola itínasa gitegeko lapegú molokoko nimitane loko noluve.

26 Loko lokago, agulizaki ve napa nenémo giligo gena imóza, Ómasímíni avogisaló lo hukokumóma nenazo itó alesa molokago iki mina vejenalítini kovogisaló lo hukokunazo loko geleake,

27 litá oko pilisi ve makó amisilike Zonini gotola gitegeko alekative loko lomikago, vike nagá numukú nene Zonini luvana hutoake gotola gitegeko

28 Iapegú moloake aleake mohóma amekago, mohó nenémo izolaho noitoka aleko voko amimó.

29 Lá okago, Zonini izegipala zuhate ámina gakoláa giliake viki gonosiváa aliki vake geha mulikú gale zemó.

*Ve 5000 nosáneté kemeko namó*  
(Mat 14:13-21; Luk 9:10-17; Zon 6:1-13)

30 Aposolo zuha nene losi losi iki mihina i asú iake, atiginá iki ake Izesú noitoka ali nupa ake netá iki miliki ake monó li kemekumú nene aveté iki li ami asú ikago,

31 vejená mukí vigá igá niago, nosáneté nata gamenagi nominazo, Izesú nene lezategó vejená niamató voko lavasú vizeko minatune.

32 Loko lokago kezáikó nagamikú lapegú itiake vake vejená niamató vamó.

33 Nivago vejená mukí keza ángi iake ángi vevesiake, taoni mukikutí nene mikasigú ololu liki vake goí ikítiki neneló vi anitémó.

34 \* Vi anitiake vejená vaí iki alegesá iki minikago, Izesú nene sipigutí olío lemeko ángimó nene sipsip iza gizapa venini nomimó nenéminiki minikago ángoake, keikumú ágika hizekago gakó mukí lo keme keme oko minamó.

<sup>35</sup> \* Lá niago, ho lemekago, izegipala zuhate aitoka ake láa liki lamó: Imane apá nene ha gámetó nouko gamena mota asú okaze,

<sup>36</sup> viki iza gihiló numutokagi luhuva numutokagi mihina iki nosánetáini meina hizitave loko kimiselezo.

<sup>37</sup> Liki likago, konotó aleko lekezatini nosánetá kimiki nalo. Loko lokago, izegipala zuhate láa liki lamó: Íi, moni gó lositatanú peleti meina hizekoko kemesá nenegi vo aleminogo ive.

<sup>38</sup> Liki likago, eza loká oketake limó: Lekezaloka peleti nanakí neve. Viki ániago. Loko lokago, viki ániagiake láa liki lamó: Ligizani helegaloka asú igo neve, itó lagaha lositá neve.

<sup>39</sup> Liki likago, mukí vejená nene hizi letiká hizi letiká iki gihisi gosoható minatave loko lokimikago,

<sup>40</sup> hizi letiki tivamoláa nene 100 nenéminiki itó amunaloka miniliki lemamoláa nene 50 nenéminiki minamó.

<sup>41</sup> Lá iki minikago, peleti ligizani helegaloka asú igo itó lagaha lositáma aleake okulumata toka okenava oko ániagoake Ómasi agepoka loake peletima gitegeake, vejená gona miliki kimitave loko izegipala zuha kemeake, lagaha losimagi vejená mukilite natave loko gona moloko kimimó.

<sup>42</sup> Lá okago vejená mukilite nikake kagatupa okago,

<sup>43</sup> peletigi lagahagi lumáa ali nupa iki gosúveha 12-a vaí okago ali milamó.

<sup>44</sup> Itó nosánetá na véa nene 5 tausen nenéminiki minamó. Vená izegipagi gatamune.

*Izesú nagamí amupiló liso liso vimó*

*(Mat 14:22-33; Zon 6:15-21)*

<sup>45</sup> Lá iki niago, eza vejenáma nokimisilike izegipala zuha nene nagamikú lapegú itiiiki vola helegaloka Petesaita numutoka goi iki nivitave loko loketamó.

<sup>46</sup> Lá oake vejená gekévaké loko kimiseleake eza nene zopega makotó Ómasiloka linogo itimó.

<sup>47</sup> Lá noigo límugusi zekago, izegipala zuha nene lapegú viki viki nonohuló holukú nivago, Izesú nene ezáagó getató minake ániagamó nene,

<sup>48</sup> una napa aleko kogómulalokatí kehelú inogo inazo, nagamí apiliaká nogosanitanú amuza miliki apeleke ligitagani amó. Lá niago gokululuva notovoigo, Izesú nene nonohuló amupiló liso liso vike keza niatoka vo anitimó. Keza kiviligitimó noike,

<sup>49</sup> nonohuló amupiló mohona noigo ániagiake, holosi noave liki giliake keza mukitó kelegesá legekago gopaga lamó.

<sup>50</sup> Lá niago, Izesú litá oko gakó lo kimike láa loko lo kimimó: Lekelegesá legemino. Mulutini lepa hizino. Nezama nouze.

<sup>51</sup> Loko loake, sipigú itekago hepé kii limóza,

<sup>52</sup> nosánetá 5 tausen vejená kimitotí Izesu haitopaitó avevezaha aleaká itímini mogonáa gili hee hee lamake sigaga liki minamó.

*Genesalete mikasiloka kivisi vejená kelémo zokamó*

*(Mat 14:34-36)*

<sup>53</sup> Keza vola helegaloka Genesalete numutoka vi anitiake, nagamikú lape ali gaheva ake nagá ziake,

<sup>54</sup> lapegutí olíi limikago, vejenalite litá iki aí ániagi vevesiake,

<sup>55</sup> ololu liki numutó numutó vi asú iake, kivisi vejená nene ukoakogú kilími miliake, Izesú mina numutó numutokumú giliake neneló kilímiki vamó.

<sup>56</sup> Minakutí minakutí nene taoniloka itó luhuva numutoka itó iza gihiló numutoka nene kivisi vejená nene alegesá apatoka kilímimi miliake láa liki li anemó: Gugupeló ahe itó hanuva gineganega gahevalokahe ali giliiki nene zokatave. Liki negénegeka likago, áminámini niake ali gele vejená nene zokí asú amó.

## 7

*Avóike apí a mogonatagana*

*(Mat 15:1-9)*

<sup>1</sup> Palisaio monó vejenaki Zelusale numutotí monó mogona apí-ikimiaká a ve lugáagi Izesutoka iki alegesá amó.

<sup>2</sup> Lá amó nene izegipala zuha lugáate kigizani nagamí zemake nosánetá ninago ániagamó.

<sup>3</sup> Palisaio monó vejenaki Zuta vejená mukitoka keza golesa okatune liki avóike la gakotó giliiki kigizani vauva aliki nagamí zemikima nosánetá nisá amamó. Avóike li hukiki la gakó ali amegesaló miliki lá iaká amó.

\* 6:35: Zak 10:2; Mat 9:36

<sup>4</sup> Itó maketilótí nosánetéa meina hiziki alikamó nene monó gelemi ve makolímo ámina nosánetéa ale geleneitímó nene ligika ale golesa iti netá loló okave liki giliake nosánetéama monó nagamí hepa hepa ikakegó niaká amó. Itó nenémíni okogó minamive. Mogonatagana haitopaitolímíni ali minamó. Nagamí gonigi somogi kapa lapegi nene ligikagú golotuva loko lelémo golesa okative liki nagamí ziaká amó nene avóike ali minató ali amegesaló amegesaló mililiki itémó.

<sup>5</sup> Lá iaká amó nenazo, Palisaio monó vegeñaki monó mogona apí ikimiaká a vegi keza Izesuni loká itake lamó: Geí izegipaka zuha nene avotegini mogonatagana ali minamake nanamú ahulikave. Nosánetéa natune liki, ligika ali golotuva liaká suni aliki kigizani nagamí zemake ninave.

<sup>6\*</sup> Liki likago, Izesú láa loko lo kimimó: Genezatini lositaki neneta Isaiá nene alika utó iti netakumú gozapá limó nene lamaná lekelikumú lokamóma neve. Ómasímó li gakó láa loko luhuva gizonoiómóma neve:

Vegená mulusi imane keza kegepatunukó nugulizá ali otiaká niamóza, kigika nenitoka mili gímizinaimake mili hotó niave.

<sup>7</sup> Vegenalitini gakó nene není gakoitana okago

li kimi-kimi iki miniaká niake soza miliki gupá zi nimiaká niave.

<sup>8</sup> Lekelisi nene Ómasímó lo hukoleketa gakó ahuliake vegenalitini mogonatagana ali miniaká niave.

<sup>9</sup> Láa loake nene láa loko lo kimimó: Avotegini mogonatagana alitune liki Ómasímó lo hukoleketa gakó lekemegeza amiake niamó nene vatí suni nego aliaká niahe.

<sup>10\*</sup> Mosé nene lekeza izokahiko amekahiko kugulizá ale otezo, itó ve makó eza izolahiko amelahiko usí vízekimiaká gakó lo kimitimó nene apele hilitune loko leketoñoimóma neve.

<sup>11</sup> Láa loko limóza, lekelisi láa liki liaká niave: Ve makó eza izolahiko amelahiko nene hize lé oketatove loko u netá mota kolopani loló okave. Nenémíni mogonáa lelí gakoití nene Ómasímíni mota amekuve.

<sup>12</sup> Loko litikumú nene izolahini amelahini nasahilí oketati gapo hize lí oaká noive.

<sup>13</sup> Lekeza lá iake nene Ómasímíni gakó vasá ziake lekezatini avotikini gakó alévolé iki lukesa ali miniaká niave. Itó nenegó nomive. Nenémíni netá mukí ali miniaká niave, loko limó.

*Ligika ale gopa oaká netá*  
(Mat 15:10-20)

<sup>14</sup> Láa loko loake ve vená mukí sele lokago, aitoka alegesá ikago, láa loko lo kimimó: Nénisi nene gakó lo likimitoze, gililo. Mukitoka giliiki gili vevesiki gililo.

<sup>15-16</sup> Ní mikilí ikago lakagatupagú lemeaká noi netá nenémo likigika ale golotuva lamitímó neve. Likigikagutí iteaká noi nentalímó likigika ale gopa itímó neve.

<sup>17</sup> Loko loake numukú iteake, ve vená ámegekimikago, izegipala zuhate ámina anoza gakoikumú loká imikago, láa loko lo kimimó:

<sup>18-19</sup> Íi, lekelisi ámináminiki lakagata kolosamimó niahe. Mogonáa gili vevesamahe. Legepatunú netá matá nokuko ligikagú lemekoko eza gapovagú voaká noinazo, lakagatupagú lemeaká noi nentalímó likigika ale gopa osá amive. Loko limó nene nosánetéa mukí nene noaká netakó minokave loko live.

<sup>20</sup> Láa loake makó láa loko limó: Likigikagutí iteaká noi nentalímó lekemeni ale golotuva loaká noive.

<sup>21</sup> Vetini kigikagutí nene golesa kagata geleaká, mokoló mogona, gumina, vegená kepele heleaká, ve vená huki ezega emega oaká,

<sup>22</sup> ániigi lamaná oaká, netá golesa aleaká, kogoka vízeaká, hokolizá itó mumuzó oaká, kemegeka loaká, kugupe aleko iteaká, zozogozo vízeaká nenemú noluve.

<sup>23</sup> Imane netá golesa mukí nagatumó nenémo likigikagutí iteake lekemeni ale golotuva loaká noive, loko limó.

*Silia mikasiukatí hetoka venalímó gele alévolé imó*  
(Mat 15:21-28)

<sup>24</sup> Nenetí ámina apá ahuloake Tulo numutoka apá agilikaloka vímó. Vo aniteake, numuni makokú iteake nenemú gelemítave loko gilimóza halá gemitímó okave.

<sup>25</sup> Vená makolímíni mohola nene holosi makolímo agikagú lemeake alémo golesa o minamó. Lá noigo ámina venámámo Izesuni gakoláa geleake litá oko ake Izesuni agisagú agihúna gimó.

\* 7:6: Isa 29:13 \* 7:10: Gá 20:12; Gapo 5:16; Gá 21:17; Liv 20:9

<sup>26</sup> Ámina vená nene Zuta vená negopa hetoka vená minake, Pinisia apá nene Silia mikasiuka getamó minatimo eza nene moholámini agikagutí holosi apeleko amisilitive loko loká omikago,

<sup>27</sup> Izesú nene Isilae vegealite Ómasímini lusa goí iki ali alitakumú geleneike anoza gakó makó láa loko lo amimó: Izegipatini nosánetá ipá oko galatini kimitunimó nene etamive. Izegipa nenete goí iki niki kagatupa itave.

<sup>28</sup> Loko lokago, ámina hetoka venámámo gele veveso minake ezáagi Ómasímini lusa ale alitikumú geleake láa loko limó: Guivahanínemaka, lamaná lokanimóza, nezama litoze. Nosánetá noaká holomalotí izegipate niki lana koma alemó zimó nene galatini netá loló oaká noive.

<sup>29</sup> Loko lokago, Izesú lo amike limó: Láa loko lanikumú gele gumuze, atiginá oko numukaloka vozo. Holosi nenémo mohokámini agikagutí mota ahulomiake vokave.

<sup>30</sup> Loko lokago, numunaloka vike ángimó nene, holosi nene moholámini agikagutí golisi okago holomaló hanuva akonoigo ángimó.

*Izesú negi ve alémo agata koló imó*

<sup>31</sup> Lá okago, Izesú nene Tulo numutotí atiginá oko vike Sitona numutoka avilegeake, vike Tekapoli mikasi avilegeake Galiláia nonohulotó vo anitimó.

<sup>32</sup> Vo anitekago, negi ve makó genezala gena imó nene alímiki Izesutoka vi anitiake, eza nene agizanitunú nónohá zemikiko lamaná itive liki negénegeka likago,

<sup>33</sup> vegeaná alegesá akutí alémo otopá zeake kezáikó minasike agizani hisulatunú agatagú hizeake gihuhú oake, agizanitunú genezalaló lupizeake, hízake okulumakú okenava oko ángigoake, ahuu lo nahulake láa loko lo amimó: Epati. Nenémini mogonáa lelí gajokutí nene koló ino loko.

<sup>35</sup> Loko lokago, agata koló okago, genezala viligoake gakó lamaná limó.

<sup>36</sup> Lá okago, Izesú nene avetó iki vegeaná li kememitave loko lo hukoketamóza, eza lo hutoko loketaha loketaha negénegeka liki li utó iliki vamó.

<sup>37</sup> Keza nene sigaga goha liki minake láa liki lamó: Netá mukí loló noimó nene lamaná okogó loló oaká noive. Kagata mola vegeaná nene ale vevesokimikago gakó giliaká niave, itó kegepa lakolí i ve ale vevesokimikago gakó liaká niave, liki lamó.

## 8

*Izesú Ve 4000 nosánetá kemeko namó*

(Mat 15:32-39)

<sup>1</sup> Gamena nene zupa vegeaná vaí iki alegesá ikago, keí nosánetá nomigo, Izesú nene izegipala zuhama sele lokago, aitoka ikago, láa loko lo kimimó:

<sup>2</sup> Vegená mukí imane nosánetá namake nenitoka nene gamena losive makole minikago milumáini gelekuve.

<sup>3</sup> Itó lugáa nene hotokatí nianazo, itína gaúna giliki niko numúitoka kimiselekugo vitamó nene gapoloka kovonana vizinogo ive.

<sup>4</sup> Loko lokago, izegipala zuhamate láa liki li amemó: Mikasi gomopalaló imane vegeaná mukí imane nosánetá hikutí ale utó oko kemeko natune.

<sup>5</sup> Liki likago, Izesú loká oketake lekelitoka peleti nanakí neve loko lokago, keza 7-a neve.

<sup>6</sup> Liki likago, vegeaná mukí nene mikasiló minatave loko lokimiake, peleti 7-a aleake Ómasi agepoka loake, gitegeake vegeaná gona miliki kimitave loko izegipala zuha kemekago, keza vegeaná gona miliki kememó.

<sup>7</sup> Lagaha lagasó minokago, nenemuki Ómasi agepoka loake imanegi gona miliki kimilo loko lokimikago kememó.

<sup>8</sup> Vegená nenete niki niki kagatupa okago, lumáagi lanahanagi ali nupa iki gosúveha 7-a vaí okago ali milamó.

<sup>9</sup> Ámina nosánetá na vegeaná nene 4 tausen nenéminiki minake namó.

<sup>10</sup> Lá ikago kimiselekago numúitoka nivago, izegipala zuhagi litá iki sipigú itiake Talamanta numutoka vamó.

*Alévolé suni ángitune liki lamó*

(Mat 16:1-4)

<sup>11</sup>\* Vi anitikago, Palisaio monó vegeaná keza iake gimivagú miliki okulumakutí ve noitihe loko gilitune liki alévolé suni ale utó okako ángitune liki Izesugegi lova leta amó. Lá ikago,

\* 8:11: Mat 12:38; Luk 11:16



<sup>12</sup> \* Izesú gele golesa oake láa loko limó: Imane oko moloko oaká nou suni ániagiaká nia ve neneta alévolé suni ale utó okugo itina ániगतune liki nanamú liaká niave. Lamaná lo likimitoze, gililo. Alévolé suni makó ale utó ugo ániगaminigave.

<sup>13</sup> Loko loake, ahulokimiake izegipala zuhagi nene sipigú goha itiake ima helegaloka amó.

*Palisaio monó vejenaki Heloteki keí mognatagana*

(Mat 16:5-12)

<sup>14</sup> Lá niago, peletimú kagatí molokago, alemago peleti hamokó nene nagamikú lapemagú minamó.

<sup>15</sup> \* Lá okago, Izesú nene Palisaio monó vegi Helotémagi soza mognáinimú anozo gakovú kagata aleko láa loko limó: Palisaio monó vegi agulizaki ve napa Heloteki keí lulu vizeaká netá ehe, lekepelekatize.

<sup>16</sup> Loko lokago, izegipala zuhamate peletímini lulu vizeaká netakumú lihe liki kezáitoka láa liki ligili hagili iki minamó: Peleti nene lagatí molokago ahulokoko unikumú lokave.

<sup>17</sup> Liki la gakovímo agataló holokago geleake láa loko lo kimimó: Peleti ahulokunike unikumú lokave liki nanamú ligili hagili iki niminave. Azozá netá oko moloko utímini mognáa giliki velesá gili hee hee lamahe. Likigika kolosamihe.

<sup>18</sup> \* Lekeza lokogómula nemóza ániगamahe. Lakagata nemóza gelesamahe. Lakagatí molokago ahe.

<sup>19</sup> Ve 5 tausen keikumú peleti ligizani lugaloka asú igo gitegekugo niake kagatupa okago lumáa ahulikago gosúveha nanakí vai iki aleve. Loko lokago, keza 12-a neve, liki lamó.

<sup>20</sup> Láa liki likago, eza vejená 4 tausen keikumú peleti 7-a kemekugo niake kagatupa okago lumáa gizaká iki ali milamó nene gosúveha napa nanakí vai iki aleve. Loko lokago, keza 7-ave liki lamó.

<sup>21</sup> Láa liki likago, eza láa loko lo kimimó: Nene ániगinamóma nemóza, goí oko loló oleketu netakitana oko goha loló itomó neve liki velesá gili vevesinamahe, loko limó.

*Petesaita numutoka agómula lika ve ale goloutotamó*

<sup>22</sup> Lá okago, vake Petesaita numutoka ví anitikago, agómula lika ve makó nene Izesutoka alímiki viake, agizanitunú ale gelekoko ale goloutative liki negénegeka likago,

<sup>23</sup> agómula lika vemámini agizató aleake símekaloka alémoko limike, agómulaló gituhú otake agizanitunú ale geleko nónohá zetake loká otake netáma nánigape.

<sup>24</sup> Loko lokago, agómula goloutoko ániгоake vejená mihina niago nánigumóza, zagitana iki niago nániguve.

<sup>25</sup> Loko lokago, goha agizanitunú agómulaló nónohá zemikago, ániго hokolotoake lamaná okago, netá mukí ániго kolosoko ániगuve loko limó.

<sup>26</sup> Lá okago, Izesú nene numunaloka namisilike limó: Numuni napaloka goí oko vamoko geza minoko aleko itanitoka vozo, loko lo amimó.

*Pitá Izesuni mognamú lo utó imó*

(Mat 16:13-20; Luk 9:18-21)

<sup>27</sup> Izesú nene izegipala zuha kelémoko Sisalia mikasiuka agulizaki ve Piliponi agulizató apatoka luhuvagi numuni numutó numutó vamó. Gapoloka nivake izegipala zuha loká oketake vejenalite nenikumú éahove liki liaká niave.

<sup>28</sup> \* Loko lokago, keza li amiki lamó: Monó nagamí holokimiaká ve Zoní nene goha utó oko noane liki liaká niave. Itó lugáa nenete Ilaizá eza gozapá okulumakú iti vema goha lemeko noane liki liaká niave. Itó lugáa nenete Ómasímini agepagutí gakó liaká a ve gozapá minamokitana noane liki liaká niave.

<sup>29</sup> \* Liki likago, Izesú goha loká oketake lekelisi nenikumú éahove liaká niave. Loko lokago, Pitá nene láa loko limó: Geza Ómasímo gologí oletatane loko lo mololeta vema noane.

<sup>30</sup> Loko lokago, aikumú aveté iki vejená láa liki li kememitave loko lo hutoketamó.

*Izesú alika hiliti gamenamú lo kimimó*

(Mat 16:21-28; Luk 9:22-27)

<sup>31</sup> Lá okago, gamena nene zupa apí oko gakó láa loko lo utó oko lo kimimó: Okulumakutí lumu ve gihila neza nene miluma netá mukí nimiiki, monó gizapa vegi guguni giziaká ve napagi monó mogona apí-ikimiaká vegi keza není ániगi ahulikiko miluma netá mukí nimiiki, nipili hilikiko, gamena losive makole minokinake heleneitokutí goha otinogo uve.

<sup>32</sup> Loko lo utó oko lo kemekago, Pitá nene alémo apazá zeake géneka like gahá amimóza,

\* 8:12: Mat 12:39; Luk 11:29      \* 8:15: Luk 12:1      \* 8:18: Zel 5:21; Izi 12:2; Mak 4:12      \* 8:28: Mak 6:14-15; Luk 9:7-8      \* 8:29: Zon 6:68-69

<sup>33</sup> Izesú viligoko izegipala zuha ángoake Pitani gahá namike limó: Satani gako lanitika mino olové omane. Geza gako gelenanimó nene Ómasímini gako lamanike vegeanalite kigikagutí liaká nia gako nene lokane.

<sup>34</sup>\* Loko loake, vejená mukí itó izegipala zuhamagi sele lo kemeake láa loko lo kimimó: Ve makolite není némegetatune liki nigilikima kugupémo giliti netá gili ahuliiki zohota zaló kipili hilingi miluma netá gihikitatakumú gili zagilki némegetatakumule.

<sup>35</sup> Makó keza nene kigika kemeníni aliki amánapa iki minata vejená nene kigika kemeni gopa inogo ive. Itó makó keza nenikumule liki itó gako lamanakumule liki kigika kemeni vinasí ahulatamó nene alévolé kemetameni alinigave.

<sup>36</sup> Ve makó keza imane mikasímini amupiló ne netá ale asú iiki itó kezáini kigika kemeni gopa okoko tolova itimó nene nenémo nana oko kelémo lamaná itive.

<sup>37</sup> Kigika kemeni nene nana netatunú meina hiziiki goha alitamó neve. Ma nomive.

<sup>38</sup> Imane vejená mukí kéisi netá golesa aliaká nia vejená itó Ómasi kemegesa amiaká nia vejená niago, holúikú ve makó keza nenikumupe monónemupe gilikiko kovoza hilitimó nene, okulumakutí lumu ve gihila neza aménehini lapaná nenémo numupiló itekiko apazá agelova kelémoko limító gamenaló nene keza kovoza hilimó nenéminoko nezagi kugulizá ale otitokumú novoza hilingo ive, loko limó.

## 9

<sup>1</sup> Láa loko loake, Izesú miní ameko láa loko lo kimimó: Lamaná lo likimitoze, gililo. Lekelisi ató nene nia ve lekelikutí lugáa makó hili asú inamiki ha niko Ómasímini gizapa olikimiakalímini zámua nene amuza moloko utó okiko ánganigave.

*Izesuni agupe haitolímini imó  
(Mat 17:1-13; Luk 9:28-36)*

<sup>2</sup> Loko loake, hoza gamena 6-a minomo noitike Izesú nene Pitá Zemusí Zoní kezagó kelémoko agoka hánaгу kezáiko ítemó. Neneló kogómulaló noike haitó agupe ale luhoake noigo,

<sup>3</sup> gineganevámo gizopa vaevae loko minokago, mikasigú vegeanalite nenéminoko ale mokoná lamoaká nenéminoko minamó.

<sup>4</sup> Lá okago Ómasímini agepagutí gako imane amunaló liakó asi ve Ilaizako Moseko utó i kimikasígo, keza Izesugegi gako ligili hagili iki minamó.

<sup>5</sup> Lá niago, Pitá nene Izesuni láa loko lo amimó: Monó gizapa velemaka, imaneló minuhá laga okaze. Nenemú gaizopa losive makole geleketatunize, makó geile, makó Mosenive, makó Ilaizanive.

<sup>6</sup> Loko limó nene kelegesá goha legekago, lo amiti gakokumú vitagá oake nene gako gopa limó.

<sup>7</sup>\* Noligo, límusi sahehevámo lemeko ze hitokimikago, límusigutí Ómasímo láa loko limó: Imane nene nigika ameaká nou gipáne noize, aí gako gili alilo.

<sup>8</sup> Loko lokago, litá iki gilipe iki ángamó nene keitoka Izesú ezágó noigo ángamó.

<sup>9</sup> Ángiake Izesugegi agokagutí nilemeke Izesú ángina netakumú avetó iki li kememitave loko, okulumakutí lumu ve gihila neza helenoitotó otekugogó li kimitave loko loketamó.

<sup>10</sup> Láa loko li gako gili alemóza, hilinakutí otiakalímini mogonamú loká loká amó.

<sup>11</sup>\* Láa liki loká itamó: Monó mogona apí-ikimiaká ve nenete gologí oletati vema velesá anitemiko Ilaizá goí oko anititive liki nanamú liaká niave.

<sup>12</sup> Liki loká imikago, eza monó nagamí holokimiaká ve Zonikumú láa loko lo kimimó: Ilaizá goí oko aniteko netá matá mukí ale vavá itive liki lamaná linave. Itó okulumakutí lumu ve gihila neza nene miluma netá numupiló miliiki gopoguni milinitatave liki nenikumú monó gotolaú luhuva gizinamómagi neve. Áminamú lakagatí molahe.

<sup>13</sup> Itó Ilaizakumú láa loko lo nolukumuve. Eza mota anitekago, aikumú monó pukugú luhuva gizina gakató kezáini kagata gele netá golesa mota lilí imikago mota helekave, loko limó.

*Izesú holosi golesagi mina gipa alémo zokamó  
(Mat 17:14-21; Luk 9:37-43)*

<sup>14</sup> Láa loko lokago, izegipala zuha lugáa niatoka vi anitiake ángamó nene, vejená vai iki alegesá iake kezagi monó mogona apí-ikimiaká vegi lova leta iki niago ángamó.

<sup>15</sup> Ángikago, vejená mukí nenete Izesuni ángiake, litá iki sigaga goha litake aitoka ololu liki vake geké litamó.

<sup>16</sup> Lá niago Izesú loká oketake lekeza nanamú lovaleta niave.

<sup>17</sup> Loko loká okimikago, keikutí ve makolímó oteake láa loko lo amimó: Monó gizapa velemaka, holosi golesa gipánémini agikagú lemeko minoake agepa aleko lakolí okago, alémoko geitoka nouve.

<sup>18</sup> Gipáne nenémo holosi nene agikagú lemeake alémo gopa napa oaká gamena nene mikasigú alémo akokago zupakopá zeko mohona oaká noive. Lá noike sehovala novilike agepagutí gelilikelilí nolike, agisa agizani pehe loake minoaká noive. Lá okago, izegipaka zuha keza holosi apiliki amisilitave loko lo kumumóza amiselemitamó okave.

<sup>19</sup> Loko lokago, Izesú láa loko lo kimimó: Lekeza ató imane gili alévolé amamó neneta, lekelikumú goselé nepelekave. Gamena gamena lekezagi minoloko voko mininake likizamuha hizekogó minatohe. Izegipama nénisi noutó alímiki alo.

<sup>20</sup> Loko lokago, gipa nene aitoka alímiki ikago, holosi golesa nenémo Izesuni ángoake gopa alémo ininá okago, mikasiló pou loko akoake, ako viligá viligá noike, sehovala vilimó.

<sup>21</sup> Lá noigo Izesú nene amelahini loká otake hí gamenaló gizalimó neve. Loko loká okago limó: Izegipa komaló gizaleneimó neve.

<sup>22</sup> Mukí gamena ámina netalímó alémo golesa inogo lokú nemó nagamikú nemó ahelú o ahuloaká onoimóma neve. Lá onoimóza, zamuza geitoka neikoma lelikumú gigika hizekiko lelémó vatí ozo.

<sup>23</sup> Loko lokago, Izesú láa loko lo amimó: Zamuza geitoka neikoma loko lanimó nene nanamú lane. Makó keza Ómasímó lelémó vatí itimó neve liki gili alévolé iki minatamó nenete mukí netá nene vávani ikigó lilí itamóma neve.

<sup>24</sup> Loko lokago gipámíni amelaho nene litá oko gamoga geko limó: Koma gele alévolé onoumóza koma miní ameko luhusáne ale kii lonimikako napa oko gele alévolé itove loko noluve.

<sup>25</sup> Loko lokago, Izesú ángimó nene ve vená mukí alegesá niago, ángoake, holosi golesama lovaga lo amíke namisilike limó: Holosi golesa geza agepa agata aleko lakolí anitika, agikagutí itekoko vozo. Lá okoko goha atiginá oko oko itemítane loko lo nohukogetuve.

<sup>26</sup> Loko lokago, gopaga like alémo ininá goha okago, agikagutí iteko vimó. Iteko vokago, gipa nenémo gonosigitana oko mikasiló ako minakumú nene vejená makolite mota helekave liki lamó.

<sup>27</sup> Láa liki lamóza, Izesú nene agizató aleko alémo otekago ote minamó.

<sup>28</sup> Lá okago, Izesú nene izegipala zuhamagi numukú itiki kezáikó minake láa liki loká itamó: Leza nene nanamú apeleko amiselemuháma neve.

<sup>29</sup> Liki likago, eza láa loko lo kimimó: Holosi imanémíni nene netá makotunú kepeleko kimiseleakaláa nomive. Ómasiloka loakatunukó kepeleko kimisilinogo une, loko limó.

*Izesú alika hiliti gamenamú goha epoapoga lo kimimó*

*(Mat 17:22-23; Luk 9:43-45)*

<sup>30</sup> Ámina apá ahuliake Galilaia mikasi aviligiki vamó.

<sup>31</sup> Nivake Izesú nene izegipala zuhama láa loko lo keme keme imó: Okulumakutí lumu ve gihila neza nilími gala vetíni kizizakú milikiko nipili hilinígave. Nipili hilikiko gamena losive makole minokinake goha otinogo uve. Loko lo kemeake vejená makolite ámina gakoláa gilikatave loko legesó oko vimóza,

<sup>32</sup> ámina gakó nene gili vevesamake loká otatune liki lamóza, kehelele vizekago loká itamamó.

*Vejená mukikutí éaho livilegeko noive*

*(Mat 18:1-5; Luk 9:46-48)*

<sup>33</sup> Kapanao numutoka vi anitiake, numunagú itiake Izesú loká oketake gapoloka nane-takumú ligilí hagilí ave.

<sup>34</sup> \* Loko loká oketamó nene gapoloka nivake lelikutí éaho livilegeko agulizaki ve noive liki kezáitoka ligilí hagilí anazo, anotó alemiki kegepa apiziki minamó.

<sup>35</sup> \* Lá niago, mító minake izegipala zuha 12-a sele lo kemeake láa loko lo kimimó: Ve makó eza nugulizaki ve napa minatove loko gilitimó nenémo lemeko minoko vejená mukilitini gelekelé oketanogo ive.

<sup>36</sup> Loko Izesú loake, izegipa koma makó nene holúikú alémoko oko hize otemiake aputá vizeneike láa loko lo kimimó:

<sup>37</sup> \* Makó keza izegipa koma imanémíniki nenikumule liki nasahilí itatamó nene, není nasahilí inimiaká niamó geleaká noive. Itó makó keza nasahilí initamó nene nenikó nasahilí initamítave. Améneho nimisilí ve aiki nasahilí itatamó geleaká noive, loko limó.

\* 9:34: Luk 22:24

\* 9:35: Mat 20:26-27, 23:11; Mak 10:43-44; Luk 22:26

\* 9:37: Mat 10:40; Luk 10:16; Zon 13:20

*Keikutí ve noamitimó nene lelikutí ve noitive*  
(Luk 9:49-50)

<sup>38</sup> Lá okago, Zoní láa loko lo amike limó: Tisalemaka, ve makolímó geí gugulizató like holosi golesa nene vegeñalitiní kigikagutí kepeleko nokimisiligo áñunimó nene, lelí lémegetamimó nenazo, géneka lotunimó neve.

<sup>39</sup> Loko lokago Izesú láa loko limó: Lekeza géneka litamilo. Makó eza nugulizató loko alévolé netá netá loló itimó nene litá oko nenikumú alevo letovo aminogo ive.

<sup>40</sup> \* Vegená makó keza lelí gala ve minamitamó nene lelikutí vegená ninigave.

<sup>41</sup> \* Neza lamaná lo likimitoze, gililo. Makó keza není vegenáne zuha niakumule liki geha nagamí kapu hamokó ihiki likimitamó nene haha aminogo ive. Meinaváa alitamó neve.

*Golesa netakumú gala vizeaká gakó*  
(Mat 18:6-9; Luk 17:1-2)

<sup>42</sup> Nenikumú gili alévolé i mina izegipáne zuha limiki minamoki keikutí ve makolímó netá golesa alitive loko agoka vizeko litimó nene, agae, Ómasímó nana otatimó neve. Ámina vémini luvanaló gehani napa nagá ziki age nagamikú ahelú i ahulatatímíni avilegeko genavagí netá golesa loló otanogo ive.

<sup>43-44</sup> \* Lá onoinazo, gigizani nenémo lihima aleaká gapogú gelémo nomilikoma gigizani hutozo. Geza nene gigizani avasavagi minokoko ló apakuka lihamiti lokú holokataninazo, gepili minoko okulumakú ititanimó nene lamaná itive.

<sup>45-46</sup> Gigisa nenémo lihima aleaká gapogú gelémo nomilikoma nene gigisa hutozo. Geza nene gigisa avasavagi nooko ló apakú gehelú ikatanazo, gepili minoko okulumakú ititanimó nene lamaná itive.

<sup>47</sup> \* Gogómula nenémo lihima aleaká gapogú gelémo nomilikoma nene gigizanitunú gogómula hize likozo. Geza nene gogómula avasavagi nooko lokú gehelú ikatanazo, gogómula hamokó minoko Ómasímíni avogisaló ititanimó nene lamaná itive.

<sup>48</sup> \* Ló apakú holoko minatanimó nene, gugupegú ginini hizitimó nene asú amiti lokú voko minanogo ane.

<sup>49</sup> Nosánetakú nene anuva amoko laga itive loko age ahuloaká nune. Nenémíni oko vegená mukitoka kigikámíni lotuva nene Ómasímíni ló nenémo latimó neve.

<sup>50</sup> \* Age nene netá lamaná nemóza, agema melelé amitimó nene nana iki goha alími melelé itave. Ma lá aminigave. Lekelisi nene age nenémíni iki minalo, itó hulu iki nene minalo, loko limó.

## 10

*Izesú vená kimisele ahuloakakumú gakó lo kimimó*  
(Mat 19:1-12; Luk 16:18)

<sup>1</sup> Izesú ámina apá ahuloake, limike Zutaia mikasi avilegeake Zota nagamí vola helegaloka vokago, vegená mukí goha aí amatoka alegesá ikago, goí oko aleaká imó nenémínoko monó lo keme keme oko minamó.

<sup>2</sup> Lá noigo, Palisaio monó vegenalite anitiake loká itake gimivagú milake lamó: Mosé lo hukoko lí gakokú nene ve makolímó venala amisele ahulatove loko hanuva amisele ahulatimó neve liki gizinámóma nene etatihe etamitive.

<sup>3</sup> Láa liki loká imíkago eza ale viligoko loká oketake limó: Mosé nene nanave loko loleketamó neve.

<sup>4</sup> \* Loko lokago, keza lamó: Vená kimisilinigima nene luhuva netá giziki kimiiki kimisilitave loko Mosé gele kemeaká imóma nena.

<sup>5</sup> Liki likago, Izesú láa loko lo kimimó: Lekelisi negi nagí hiziki likigika gopa ovimó nenemú imane lo hutoleketa luhuva gizamóza,

<sup>6</sup> \* netá matá apí oko kelémo utó i gamenaló emane nene Ómasímó vegi venakí kelémo utó imó.

<sup>7</sup> Nenemú Ómasímó láa loko limó:

Nenemú ve makolímóhe makolímóhe izolahiko amelahiko ahulokimioko venalagi nene,

<sup>8</sup> \* kugupe nemó kigika nemó hamokó loló okiko apiziki minatáive.

Loko gakó imane limó nenazo, keza lositá hou líki minaminigasive. Hamokó kugupe loló onoiimó gelekave.

<sup>9</sup> Nenemú Ómasímó kelémo apizimó nenazo, vegenalita kelémo hotopotó oakaláa nomive.

\* **9:40:** Mat 12:30; Luk 11:23    \* **9:41:** Mat 10:42    \* **9:43-44:** Mat 5:30    \* **9:47:** Mat 5:29    \* **9:48:** Isa 66:24  
\* **9:50:** Mat 5:13; Luk 14:34-35    \* **10:4:** Gapo 24:1-4; Mat 5:31    \* **10:6:** Apí 1:27, 5:2    \* **10:8:** Apí 2:24

<sup>10</sup> Loko lokago, numukú itiki niake, izegipala zuhamate ámina gakokumú goha loká imikago,

<sup>11</sup> \* Izesú láa loko lo kimimó: Ve makó eza venala amisele ahulokoko haitó vená alitimó nene, ve vená huko ezega emega imómámini lihima alinogo ive.

<sup>12</sup> Itó ámináminoko vená makolímó vana amisele ahulokoko ve makotó vitimó nene, ve vená huko ezega emega imómámini lihima alinogo ive, loko limó.

*Izesú izegipa koma kama nónohá zeketamó*

*(Mat 19:13-15; Luk 18:15-17)*

<sup>13</sup> Ve vená mukí keza agizanitunú kugupeló aleko nónohá zeketative liki izegipa koma kama Izesutoka kilímiki vikago, izegipala zuhate gahá kememó.

<sup>14</sup> Gahá kimikago, Izesú ángoake mulunagú golesa okago láa loko lo kimimó: Lekeza izegipa koma nene ahulikimikalo. Nenitoka ataze. Keza izegipa koma nenémináa nene Ómasímini avogísaló viakalímíni mututoni nianazo, li hoipa ikitamilo.

<sup>15</sup> \* Neza gakó lamaná lo likimitoze. Ve makó keza izegipa namuni monokú itiaká niamómáminiki vávani iki monokú itemitamó nene, Ómasímini avogísaló nene keké vamini-gave.

<sup>16</sup> Loko lo kemeake, izegipa komama kuputá vizike agizanitunú nónohá zeketamó.

*Henonavagíve*

*(Mat 19:16-30; Luk 18:18-30)*

<sup>17</sup> Izesú eza ámina apatotí vitove loko noigo, ve makolímó ololu loko vike alapusa hizike loká otake tísá lamanámaka, nana okinake alévolé nemetameni alitomó neve.

<sup>18</sup> Loko lokago, Izesú láa loko lo amimó: Geza nenikumú ve lamanale loko lanimó nene mognánemú gele hee lo minoko nolape itó hanuva nolane. Lamaná améneho Ómasi hamokó noize, makó nomive.

<sup>19</sup> \* Itó geza gapo lota gakó geleaká noane. Láa lokove: Geza vejená kepele helemo. Ve aleve suni ale gopa oko huko ezega emega amo. Gumina alemo. Soza hakupá gakó lamo. Vegenalitini netá hanuvamú alemo. Izokahiko amekahiko nene kugulizá ale otezo.

<sup>20</sup> Loko lokago, eza láa loko lo amimó: Tisatemaka, neza nene umakí velotí nene ámina hoza aleaká noumole.

<sup>21</sup> Loko lokago, Izesú nene gonú napilike agika aitoka moloake gakó láa loko lo amimó: Netá hamokó nemó nene ale hee litanize. Geza voko henokanoka mukí molokoko meinaváa moníma aleoko gohogó vejená gona moloko kemeoko oko némegetozo. Lá okako okulumakú helisa henoni geitoka utó ogetanogo ive.

<sup>22</sup> Loko lokago, ámina gakó geleake aí henoni vaí o minamó nenazo, gona moloko kimitohe loko agata gilitímó agoka agepa muhelé okago, mulunagú gena avisekago vimó.

<sup>23</sup> Lá oko novigo, Izesú viligoko izegipala zuhama ángoake láa loko lo kimimó: Henoníini vejená nene Ómasímini lapanató silipa iki itesá neve.

<sup>24</sup> Loko lokago, izegipala zuhamate ámina gakokumú ininá amóza, Izesú goha láa loko lo kimimó: Izegipánemata, Ómasímini amakú vo holoaká nene genavagi neve.

<sup>25</sup> Kamele izámo nakasi vovónagú voakaláa nene vávani oko nomimóza, henonavagi ve nene Ómasímini lapanató voakaláa nene áminámini oko genavagi golesa neve.

<sup>26</sup> Loko lokago, ininá goha iake li amiki lamó: Láa lokoma éaho agutó vizekiko minoloko voko minative.

<sup>27</sup> Liki likago, Izesú gonú nokipilike láa loko lo kimimó: Vegenalite nenémini itamoláa nomimóza, Ómasímo netá makó loló itove loko agata giliti netá nene vávani okogó loló oaká noive.

<sup>28</sup> Láa loko lokago, Pitá láa loko lo amimó: Gelenape. Leza mukí netá matate ahulokunike geí gémegetokuninazo, alika nene meinava alitunimó nehe.

<sup>29</sup> Loko lokago, Izesú limó: Neza lamaná lo likimitoze. Ve makó keza numúinihe gouna zuhahe izóikini améikini izegipáinihe míinihe nenikumule líki itó není gakó lamanakumule líki ahulatamó nene,

<sup>30</sup> itína imane gamenaló nene numuni gouna zuha izóikini izegipáini míini 100 nenéminiki alitamóza, vejená makolite hanuvamú gopoguni milikitanigave. Lá ikiko alika utó iti gamena keza alévolé oko mínoaká kemetamenigi minanigave.

<sup>31</sup> \* Lá onoimóza, itína goí ina vejenakutí mukilite alika milanigave, itó alika milina vejenakutí mukilite goí inigave, loko limó.

\* 10:11: Mat 5:32; 1 Koli 7:10-11      \* 10:15: Mat 18:3      \* 10:19: Gá 20:12-17; Gapo 5:16-20      \* 10:31: Mat 20:16; Luk 13:30

*Izesú ezáa alika hilitikumú gako ligo losive makole imó*

*(Mat 20:17-19; Luk 18:31-34)*

<sup>32</sup> Gapoló vake Zelusalega itinigi niake Izesú ale goí oko novigo, izegipala zuhamate ininá niago, ámegetiki va veđená alika kezáitoka utó iti netakumú kehelele vizigo minamó. Lá niago, Izesú eza izegipala zuha 12 nene kelémo otopá zeake, áitoka alika utó iti netakumú láa loko lo kimimó:

<sup>33</sup> Gililo. Leza Zelusale numutoka notune. Nenélo okulumakutí lumu ve gihila není nene guguni giziaká ve napagi monó mogona apí-ikimiaká vegi keí kigizakú milikiko goní inítiki nipili hilita gako li hukiki hetoka vetini kigizakú milanigave.

<sup>34</sup> Lá ikiko, gopoguka linitiki gituhú inítiki segi nogosanitunú nipiliiki nipili hilinigave. Lá ikiko, gamena losive makole minokinake goha otinogo uve, loko limó.

*Zemusiko Zoniko loká asi netá*

*(Mat 20:20-28)*

<sup>35</sup> Zepetaioni gipala lositá Zemusiko Zoniko nene Izesutoka asike láa liki lasimó: Tisale-maka, lélisi nene nemú manamú logimikusigo nene, ámina netá aleletatane loko nolusive.

<sup>36</sup> Liki likasigo, eza nana netá aleleketatokumú nilasive.

<sup>37</sup> Loko lokago, láa liki li amesimó: Geí lapanakaló leza geí giligika luga luga minalizo loko gele limitane loko nolusive.

<sup>38</sup> \* Liki likasigo, Izesú láa loko lo kimimó: Loká ninitasi netalímini mogona gili gopa ikasike likasive. Nénisi nene ekesá netá natomó nene lekelisi áminagutí hanuva natáimó nehe. Itó miluma netá gihitomó nene lekelisiva gihitáimó nehe.

<sup>39</sup> Loko lokago, láa liki li amesimó: Hanuva natáimó nene. Liki likasigo, Izesú láa loko lo kimimó: Ekesá netá natomó nene lamaná lekezagi nanigasive. Itó miluma netá gihitomó nene lekezagi gihitáimóza,

<sup>40</sup> není nigilika luga luga minoakaláa nene, není netá nego likimitohe. Ale vavá oketa veđenalitini holomamú nilasive.

<sup>41</sup> Loko lokago, izegipala zuha lugáa 10-a ámina gako giliake, Zemusiko Zoniko keikumú mukahá kipilikago,

<sup>42</sup> \* Izesú nene izegipala zuha mukí sele lo kemeake láa loko lo kimimó: Ve makokumú nene mikasiuka veđenalitini kugulizaki ve niave liki liaká niamó nenete gelekelé izegipáini nene alévolekutí gizapa ikimiaká niave. Itó guivahani keza nene ámina iki ámemenáa kiviligiki miniaká niamó nene lekeza giliaká niave.

<sup>43</sup> Lá onoióza, lekelitoka lá oko minamino. Lekelikutí ve makolimo nugulizaki ve minatove loko nolokoma nene hanuva lemetigi oko gelekelé oleketoko minatize.

<sup>44</sup> Makó eza mukí veđená kivilegeko minatove loko nolokoma lemeko veđená mukilitini megusa izegipa loló oko gelekelé oketatize.

<sup>45</sup> Okulumakutí lumu ve gihila neza gelekelé initatave loko lememuve. Veđená mukitoka gelekelé oketoko golesa netáini nene meina hizeko gologi oketatove oko nene minoko aleko u nugupe ahulatove loko lumumole, loko limó.

*Agómula lika ve Patimiasí goha pulusoko ángamó*

*(Mat 20:29-34; Luk 18:35-43)*

<sup>46</sup> Izesugegi Zeliko apatoka viki anitemó. Ámina apá ahulanigi niake, ezagi izegipala zuhagi vaí iki alegesá iki mina veđená makó nivago, Timeoni gipala Patimiasí eza agómula lika ve monimú voká vokató ve nene gapo agataloka minamó.

<sup>47</sup> Minake, Nasalete ve Izesúma noave liki likago geleake, gamoga geko sele loko limó: Izesuvo geza nene agulizaki Tevitini ágávolaga, gologi oletatane loko lo mololeta velemaka, nenikumú miluma gelenetamane.

<sup>48</sup> Loko lokago, veđená mukilite legesó oko minative liki agómula lika vema gahá ameke li amemóza, áisi gele ahuloake gamoga geko sele limó: Geza Tevitini ágávolagamaka, nenikumú gigika hizino.

<sup>49</sup> Loko negénegeka ligo ligo, Izesú geleake voko gapoló noiike ámina ve nene sele likiko ino. Loko lokago, agómula lika vema láa liki sele li amemó: Gogoliza vizeko otekoko ano. Geí sele nolize.

<sup>50</sup> Liki likago, hepé gola gololohá o ahuloake, moí oko oteake Izesutoka vimó.

<sup>51</sup> Vo anitekago, Izesú nana netá alegetatokumú nolane loko loká omikago, agómula lika vemámo tisánemaka, nogómula ale goloutonetatane loko noluje.

<sup>52</sup> Loko lokago, Izesú láa loko lo amimó: Geza nene vozo. Nenikumú gele alévolé anitimo gelémo zokokaze. Loko noli agepági, agómula goloutokago ángoake gapoloka Izesuni ámegetoko vimó.

## 11

*Sígaga litanigi ago Izesú Zelusale numutoka vimó**(Mat 21:1-11; Luk 19:28-40; Zon 12:12-19)*

<sup>1</sup> Keza vake Zelusalega ali ávatihá niake, Olivi agoka gohalaló nene apá lositá minamó nene Petepage itó Petania loko netoka vi anitemó. Neneloka anitiake, Izesú nene izegipala zuhagutí ve lositá láa loko lo kimike kimisilimó:

<sup>2</sup> Helega numutoka vi anitiiki toki iza akaleva nagá zinamóma nene, vejená kogohí geko mohona onamitimoláa nene, ániigiiki vinasiki aliki alizo.

<sup>3</sup> Vinasiki aliki nisiko, ve makolímo nanamú niasive nolikoma, láa liki lilizo: Guivahanitémo hoza nego ámina izamú lokago aleko vinogo nousive. Goha imaneloka litá oko amiselekiko aliki anigave, liki li amilizo.

<sup>4</sup> Loko lo kemekago, vasike ámina toki iza akaleva nene gapo gahevaloka gatetó nagá zinamó ánikikasike nivinasasigo,

<sup>5</sup> gatetó mina vejenalite ániagiake, toki iza akaleva nene nanetakumú nivinasasive.

<sup>6</sup> Liki likago, Izesú lo kimi gako nene li kimikasigo gili kememó.

<sup>7</sup> Lá ikago, keza toki iza akaleva nene Izesutoka aliki vasike, gineganéini nene gololohá ikasike toki iza akalevamámini amegesaló milikasigo, Izesú iteko amupiló minamó.

<sup>8</sup> Lá oko novigo, vejená mukilite gineganéini gapoló avilisá imi nivago, lugáa nenete kokonasi agila nene gihisigutí hutiki mililiki viki gapoló avilisá imi vamó.

<sup>9</sup> \* Lá niago, goí iká alika miliká a vejenalite gako napagutí láa liki lamó: Agae, Guivahanímini gakató anitelimikaninazo, Ómasímo nónohá zegetino.

<sup>10</sup> Avoteho Tavitikítana minati vémo gizapa oketatimoláa Ómasímo lusa geketino. Agae, veletoka okulumakú Ómasi agepoka litune, liki lamó.

<sup>11</sup> Lá imi vago, Zelusalega ite aniteake, monó zagusave napagú iteake netá makó ánigomo mohona o asú oake, gamena asú okago, ezagi izegipala zuhamagi Petania numutoka limiki vamó.

*Zuta vejenakumú lo vizeko gohuna za usí vizimó**(Mat 21:18-19)*

<sup>12</sup> Límugusi zeake gó lokago, Petania numutoka ahuliake nivake, Izesuni gaúna olokago,

<sup>13</sup> ánimamó nene gohuna za makó hotó neike agila mukí minokago ániagoake gihila zeneihe loko voko ánimamó nene, gihila zeaká gamena alitamigo, agilagó nego ániagoake

<sup>14</sup> za nene láa loko lo amimó: Geza nene gihila makó zemoko gohuna loloko voko noako geikutí nene vejenalite keké namitave. Láa loko noligo, izegipala zuhate ámina gako gili asú amó.

*Monó zagusave lo hukoketamó**(Mat 21:12-17; Luk 19:45-48; Zon 2:13-22)*

<sup>15</sup> Lá iake Zelusalega vi anitiake, Izesú nene monó zagusaveú itike áminagú moni meina kona ali volaló imaló a vejená kimisele ahuloake, hotó mikasigutí moniló ámina mikasigú moni kimiaká a vetini holoma aleko gululupa soake, Ómasímini guguni gizi amítakumú nama luhusi miliaká a vejenalitiní minoaká holoma aleko gululupa soake,

<sup>16</sup> monó zagusave napagú nene netá matá aliki tigá igá amilo loko lo hukoketamó.

<sup>17</sup> \* Lo hukoketake láa loko lo kimimó: Ómasímo li gako nene monó gotolaú láa liki luhuva gizinamóma neve: Není numunimú haitopaitó vejenalite Ómasiloka liaká numunive liki litave liki gizinamóma neve. Lá onoimóza, lekeza nene alími maketi numuni lilí inamó nene guminaló veta halá giki miniaká geha mulí lilí ikave.

<sup>18</sup> Loko lokago, guguni giziaká ve napagi monó mogona apí-ikimiaká vegi keza nenemú giliake, nana okinake apele helekuko imane suni asú itive liki lamó. Láa liki ligili hagili amóza, vejená mukilite monó lo keme keme okago laga kivisigo sigaga lita mogonamú giliake kelegesá legekago nenemú ahulitamó.

<sup>19</sup> Lá okago únaká gamena gamena Izesuge ámina apá ahuliki viaká amó.

*Gohuna za osagava vizitímini mogona**(Mat 21:20-22)*

<sup>20</sup> Neteká gó lokago, nivake, gohuna za nenémo mogonagutí osagava vizekago, ánimamó.

<sup>21</sup> Lá okago, Izesú gako limó nenemú Pitá geleake láa loko lo amimó: Tisao, ániagozo. Gohuna za azozá usí vize amenimómámo mota osagava vizeake neve.

<sup>22</sup> Loko lokago, Izesú lo kimike limó: Ómasimú gili alévolé ilo.

<sup>23</sup> \* Neza lamaná lo likimitoze, gililo. Ve makolímohe makolímohe vozane agoka litá oko zeko akutooko age nagamikú holamane loko litímó nene agata losi gelemoko nolu gakó alévolé inogo ive loko gele alévolé itimó nene, utó o aminogó ive.

<sup>24</sup> Lekelisi nene netá nemú manamú giliiki Ómasiloka voká niliki mota alekune liki gili alévolé inikigó litámó nene, alinígave.

<sup>25-26</sup> \* Itó otiki Ómasiloka lita gamena gamena nene, ve makolímini lihima ali minatamó nene ahulalo. Lá ikiko, okulumakú ametipo ámina oko lekelí lihimatini ahuleketanogó ive, loko lo kimimó.

*Izesuni zámuzamú loká itamó  
(Mat 21:23-27; Luk 20:1-8)*

<sup>27</sup> Zelusalega goha atiginá iki iake, Izesú monó zagusave napagú iteko mohona noigo, guguni giziaká ve napagí monó mogona apí-ikimiaká vegi monó gizapa vegi aitoka iake

<sup>28</sup> láa liki loká itake lamó: Geza imaneloka netá matá aleaká noanimó nene éahini gakotó lá oaká noane. Éaho lokago aleaká noane.

<sup>29</sup> Liki loká imikago, Izesú láa loko lo kimimó: Nezagi gakó hamó loká oleketatoze. Lekeza li nimikiko neza éahini gakotó imane netá ale utó oaká nouhe nenéa lo likimitove.

<sup>30</sup> Zoní monó nagamí holokimiaká hoza alimó nene hikutí ale utó ive. Ómasímini gakotó alihe, itó vegenalitini gakotó alive. Li nimikiko gilitoze.

<sup>31</sup> Loko loká okimikago, kezáitoka ligili hagili iki láa liki lamó: Okulumakutí ale utó imole loko litunimó nene, íi, lekeza nanamú Zonini gakola gili alévolé amave loko linogó inazo,

<sup>32</sup> itó mukí vegenalite Zoní nene Ómasímini agepagutí gakó loaká ve noive liki nilanazo, ámina hoza nene vetinigutí ale utó imole loko losá nene vegenalite nene nana ilitatahe loko lehelele vizekave liki kezáitoka liake,

<sup>33</sup> Izesú li gakokumú láa liki li amemó: Leza nene Zonini mogonala ma gelemune. Liki likago, Izesú láa loko lo kimimó: Láa likima nene netá matá imane aleaká noumó nene éahini gakotó lá oaká nouhe nenégi neza ámina oko lo lekememinogó uve, loko limó.

## 12

*Vain nagá minimú anoza gakó  
(Mat 21:33-46; Luk 20:9-19)*

<sup>1</sup> \* Izesú anoza gakó makó láa loko lo kimimó: Ve makolímo vain nagá nene zuhá oake, vego vego oko geisa hize asú oake, gihiláa mí zeko liliká ziti gale legeake, gizapa numuni hána geake, gizapa iki niko meinava likimitove loko vegená makó gutá kemeake mikasi makotoka venoní vimó.

<sup>2</sup> Voko minake nagá gihila guzá loaká gamena alitokago, geleake nagá gihila mikutí lugáa alenetoko ative loko gelekelé izegipala makó nene gizapa nia vegenatoka amiselekago,

<sup>3</sup> vo anitimó. Vo anitekago, vain mitó gizapa imina vete apiliake nagá gihila amemake hanuva amisilikago atiginá oko vimó.

<sup>4</sup> Lá ikago, gelekelé izegipa makó goha amiselekago keitoka goha anitekago, mini gizapa vete gotola ziki hóu nilake gopoguka litámó.

<sup>5</sup> Lá ikago, makó goha amiselekago, aí nene apili helemó. Lá ikago, goha mukí kimiselekago, vi anitikago, lugáa nene gosohá nogosani kepelemó, itó lugáa nene kipili helemó.

<sup>6</sup> Lá ikago, agika ami gipala hamokó minamó. Aí nene keitoka alika luma lama zeko láa loko geleake amisilike limó: Není gipa gihila imane amiselekago ve napámini gipalama okaze liki inigiiki nene alimi lamaná itanígave.

<sup>7</sup> Loko geleake amisilimóza, vo anitekago, mitó gizapa vete kezáitoka ligili hagili ake láa liki lamó: Imanémo nene mikasi amelahini gipala noinazo, áisi nene minokoko imane hoza ale lá inogó ive. Nenemú mota losé apelekuko helekiko, helisa henoni imane nene lelí loló itive.

<sup>8</sup> Liki liake, gipalama agizató aliake losé apili hiliake, nagá gihila mikutí hetoka nene gonosiváa ali ahulamó.

<sup>9</sup> Lá ikamó nenazo, nagá mini amelaho nene nana itive. Áisi okoko mini gizapa vema kepele ahulokoko vain mini nene haitó vete gizapa itave loko lehizeketanogó ive.

<sup>10</sup> Itó imane monó gotolaú gakó láa liki luhuva gizinamóma nene lekeza gatinamóza lakagatí molokahe:

Numuni giaká vete gehani napa makó ánigi ahulamó nenémo geha lapusa alévoleláa loló oake noive.



11 \* Ámina netá nene Guivahanímini gakató utó okanazo, vegeñalita áñigokuko lamaná okave.

12 Láa loko lo kemekago, Zuta vetini monó gizapa ve keza anoza gakoquí gehanimú limó nene Izesuni áñigo ahulunikumú lokave liki giliake, agizató alinake nagá amitune liki gelemóza, lá itunimó nene vegeñá vai iki minamó nenete nana ílitatahe liki kehelele vizekago, ahulimiake hanuva vamó.

*Lugupe meina hizeaká gako*  
(Mat 22:15-22; Luk 20:20-26)

13 Zuta ve keza Palisaio monó vegeñakutiki Heloteni patigú vegeñakutiki ve lugáa nene Izesúma gako makó lo gopa okiko agizató alítave liki aitoka kimisilikago,

14 Izesutoka vi anitiake láa liki li amemó: Tisalemaka, geí mogonaka gelenoune. Gako gihilagó loaká noane. Geza vegeñakumú gonukonú osá amane. Géisi vegeñá iti minamó limi minamó mukitoka Ómasímini gapováa vevesoko lelepizeaká noane. Nenemú lokako gilítune. Loma apatoka agulizaki ve napa Sisani nene takisi moni ameaká nouhá etahe etamive.

15 Takisi moni kimitupe kememitune. Láa lamó nene amemitune loko lokikoma gamaniloka alémoko voko goní otatune. Itó hanuva amitune loko lokikoma Zuta vegeñalite gili golesa itave liki gimivagú milikago, Izesú gako latímini mogonáa geleake láa loko lo kimimó: Nanamú giminegú milanigi nilave. Moni makó nelepizikiko áñigatove.

16 Loko lokago, makó alapizikago áñigoake láa loko loká oketake limó: Vogunahana imane itó luhuva imanegí éahini neve. Loko lokago, keza gamani agulizaki ve napa Sisanive liki lamó. Láa liki likago,

17 Izesú láa loko lo kimimó: Láa likima nene gamanimo voká loaká noi netá nene gamani amilo, itó Ómasimo voká loaká noi netá nene Ómasi amilo. Loko lokago, vatí oko ale viligoko lo kimikumú sigaga goha litiki minamó.

*Hilínitakutí otiakakumú loká ítamó*  
(Mat 22:23-33; Luk 20:27-40)

18 \* Satukaio monó vegeñá lugáa keza hilínitakutí otisá amave liki liaká a vegeñá makolite Izesutoka iake láa liki loká itake lamó:

19 \* Tisalemaka, Mosé láa loko luhuva gizo limimóma neve: Ve makolimo izegipa geto molamoko minoko helekikoma, agunalámo ámina gevoná vená alekoko uvolahini hili vemú izegipa geto molative loko loletamóma neve.

20 Lá okanazo, uvolaho agunala 7-a minamó. Lá iake, ganá ve nenémo vená aleake, izegipa getamike helekago,

21 agunalámo ámina vená aleake minake, izegipa getamike helekago, agunala makolimo ámináminoko alimó.

22 Itó lá iliki vake ve 7-a nenete ámina venakó ali volaló imaló iki minake izegipa getamake hili asú ikago, venáini nene minake alika hilimó.

23 Ve 7-a nenete ámina vená ali volaló imaló iki minamó nenazo, hilínitakutí goha otita gamena nene ámina vená nene éahini venala minative.

24 Liki galegutí oteaká gakoikumú amé ziki giza itanigi likago, Izesú láa loko lo kimimó: Lekeza monó gotolau gako gelemake itó Ómasimo galegutí kelémo oteaká zámuzagi ma gelemake gili gopa ikave.

25 Keza hele vegeñá otita gamena nene, vená aleakaláa nomive, itó vená alimi kimiakaláa nomive. Okulumakú ageló nenéminiki minanigave.

26 \* Itó hele vegeñá goha otiaká nenemú neza lo likimitoze. Gozapá nene Mosé eza zamukutí ló guluma utó okago, áñigoake noigo, Ómasimo gako láa loko limó nene gatiaká niamóza mogona gelemave. Ómasimo nene ká emane amunaló hilina vemú nene Moseni láa loko lo ameneimóma neve: Neza Avalahani Isakani Zakoponi keí Ómasi minútímina minoloko voko nominuve.

27 Loko limó nenazo, nenemú eza kemeni hele vegeñalitiní Ómasi negopa, kemeniá hanuva ne vegeñalitiní Ómasi noinazo, Ómasimú gili zaginake hele vegeñaki hanuva mina vegeñalitiní Ómasi noive. Lekeza ámina gako gili gopa goha ikave, loko limó.

*Li mila gakoquí napáa*  
(Mat 22:34-40)

<sup>28</sup> Láa liki lova-leta iki niago, monó mogona apí-okimiaká ve makolímo oake gámémé oko geleake Izesú nene ale lamaná oko ale viligoko lo nokimigo geleake, loká otake láa loko limó: Mosé lo hukoko li gakokutí hilímo kivilegeko napáa neve.

<sup>29</sup> \* Loko lokago, Izesú láa loko lo amimó: Napa nenémo lá oko neve: Lekeza Isilae vese gililo. Guivahani Ómasile nene Guivahani hamokó noive.

<sup>30</sup> Likigika lekemeni geleakatini zámuzatini mukí nene Guivahani Ómasitini-loka amilo.

<sup>31</sup> \* Itó gako napa makó nenémo lá oko neve: Gezakamú geleaká noanimómáminoko gígivekaginimú geleko gígika kemezo. Loko loketa gakokutí napáa makó iteko minamive.

<sup>32</sup> \* Loko lokago, monó mogona apí-okimiaká vemámo láa loko lo amimó: Tisalemaka, gakó nene lamaná lokane. Nene gelekego etokave. Ómasi hamokó noive, Ómasi makó nomive.

<sup>33</sup> \* Itó ligika nemó gele vevesoakate nemó zámuzate nemó mukí aitoka amitunimó itó lezatemú geleaká nounimómáminoko ligivetegikumú geleko ligika kimitunimó nenémo Ómasi guguni gizo ameaká netá haitopaitolímíni nene avilegekave.

<sup>34</sup> Loko gele vevesoko lokago, Izesú geleake láa loko lo amimó: Ómasi alémo geí gizapa ogetati ve loló itani gamena nene hotó nomive. Loko lokago, giliake, netá makokumú goha loká itatakumú kelegesá legekago, loká itamamó.

*Gologí oketative loko lo moloketa vemú loká oketamó*

*(Mat 22:41-46; Luk 20:41-44)*

<sup>35</sup> Izesú monó zagusave napagú monó lo keme keme noike láa loko limó: Monó mogona apí-ikimiaká vete nene gologí oleketative loko lo mololeketa ve nene agulizaki ve napate Tevitini agávolaho noive liki nanamú liaká niave.

<sup>36</sup> \* Tevití eza Ómasímíni Sikalahú nenémo agikagú alémo vávani okago láa loko limó: Mezaú ve eza není Guivahaníne nene není nigizani zamagaloka minoloko voko noako, mukí gala vega nene gígisa lapuvauka ahuloketanogo uve loko lo amimóma neve.

<sup>37</sup> Tevití nene gologí oleketative loko lo mololeta vemú nene Guivahaníneve lokamó nenazo, gologí oletative loko lo molota vémo nana igo Tevitini agávolahogó noitive. Tevitini agapilamola noitimóza, Tevitini ve napagi noitive. Loko Izesú noligo, alegesá iki mina vegená mukí nenete giliake laga kivisimó.

*Monó mogona apí-ikimiaká a vemú alévolé oko lo hukonoimole*

*(Mat 23:1-36; Luk 20:45-47)*

<sup>38</sup> Izesú nene monó lo nokimike miní ameko láa loko lo kimimó: Monó mogona apí-ikimiaká vemú, ehe. Kugupeló netá hána luhatakumú itó maketiloka mihina niago vegená makolite gekévaké likitatakumú,

<sup>39</sup> itó monó numukú numukú nene vegená mukilitini kovogisaló minoaká holomaló minatakumú, itó nosánetá napa ninató nene agepaló siakumukó nene netakumú kumu heleaká noive.

<sup>40</sup> Keza gevoná venalitini henokanoni gumina ali asú iká itó kegepatunú soza miliki agepoka hána liki Ómasiloka liká iaká nianazo, ámina ve nenete miniki lihima napa genavagi alinígave, loko limó.

*Gohogó vená gevonalímo ahula moni*

*(Luk 21:1-4)*

<sup>41</sup> Izesú eza monó zagusaveú nene moni miliaká pokisi gahevaloka minake, vegená mukilite ámina pokisigú moni nimilago ánigo minamó. Ánigo noigo, henóinigi vegená mukí nenete moni mukí miliva miliva niago,

<sup>42</sup> gohogó vená gevoná makolímo oake golohá moni koma lositá nene pokisimagú ahulamó.

<sup>43</sup> Lá okago, Izesú nene izegipala zuha sele lo kemeake láa loko lo kimimó: Neza lamaná lo likimitoze, gililo. Vegená mukí imanete vaí iki milina monigutí nahulamóza, gohogó vená gevoná imanémo gohogó noikutí netá matala mukí nosánetá meina hizitimoláa ahulo asú okave.

<sup>44</sup> Nenemú gohogó vená imanémo moni miliaká polisigú ahula monimámo mukí vege-nalitini moni avilegeneimó gelekave, loko limó.

## 13

*Alíka monó zagusave ali golesa itakumú limó*

*(Mat 24:1-2; Luk 21:5-6)*

<sup>1</sup> Izesú nene monó zagusavegutí nolimigo, izegipala zuhagutí makolímó láa loko lo amimó: Tisalemaka, ániгоzo. Imane geha numuni lagámíni ali tolova iki ginamó neve.

<sup>2</sup> Loko lokago, Izesú láa loko lo amimó: Áimáa numuni napa imanemú nolape. Itína nene ha nego nánigamóza, minoko lova gala ve keza imaneló gehani apilikí tele vizikiko gehani nene amupiló amupiló iki milílikí itekutí gululupaso asú inogo ive.

*Miluma gilituni gamenámini ganá netá*

*(Mat 24:2-14; Luk 21:7-19)*

<sup>3</sup> Loko loake, Izesú nene izegipala zuha Olivi agokaloka kelémoko iteake, monó zagusave helegaloka nego, neneló minake, Pitá Zemusí Zoní Etulú kezagó Izesú noitoka vake loká itake lamó:

<sup>4</sup> Itína netakumú lanimó nene nanahé gamena utó itive, itó lani gamena nene alitanogo noiko nana anosa utó okiko ániगतune. Lo lemezo.

<sup>5</sup> Liki líkago, Izesú láa loko lo kimimó: Ehe, gizapa ilo. Ve makolímó lokogoka vizekatize.

<sup>6</sup> Vegená mukilite nanítikí není nugulizató líki okulumakutí lumu ve gihíla nezama nouve líki vegená mukí kogoka vizinigave.

<sup>7</sup> Lekeza haitopaitó lovámíni gakola nígilíki itó lovatini konó nígilíki nene mulutini itemino. Ámina netá utó itimóza netá matá velesá asú aminogo ive.

<sup>8</sup> Numutó namató vegená makó nenete gala venini lova ali níkimiko, agulizaki ve makolímíni zuhagi itó makolímíni zuhagi lova hizinigave. Itó mukí mikasiuka imimá noiko gaúna gamena mukí utó itimóza, ámina netá utó itimó nene venalite izegipa getanigi miluma giliaká niamó nenémíni oko utó inogo ive.

<sup>9</sup> \* Lá onoize, lekelisi gizapa keké viziki ilo. Gakó hoza alilikimíiki gonitó líkilímiki vinigave. Itó monó numúíkú numúíkú nene segi nogosanítunú líkipilitamó neve. Není nugulizá lekelitoka minakumule líki kugulizakí ve napatini itó kíapegini kovogisaló líkilímí milílikí kei kovogisaló oti miníki není mogona lí kiminigave.

<sup>10</sup> Lá itamóza, gamena litá oko asú aminogo ive. Goí oko Ómasímíni gakó lamaná nene numutó namató puu loko vitive líki lí hutilí i asú inigave.

<sup>11</sup> Líkigizató aliki líkilímiki víki goní ilikitata gamena nene, nanave loko litupe líki laka-gata giliko gena amino. Gamena nene zupa Sikalahulímó líkigikagú gakó mololíkíimíkíko áminagó nene lílo. Lélisi lupe lamiki Sikalahulímíni gakó loló ino.

<sup>12</sup> Ámina zupahé nene uvohalo makolímó agunala agizató alekoko goní omíkíko agunala nene apilí hilinígave. Amelaho nene gípala agizató alekoko goní omíkíko nene gípala apilínigave. Izegipáini nenete izóikíni améikíni lova ali kímíiki líkíko izóikíni améikíni kípilí hilínigave.

<sup>13</sup> \* Není nugulizá lekelitoka minakumule líki vegená mukilite mukahá líkipilínigi niamóza, vegená makolite gamenáini asú amitító monó ahulamíkí alévolé iki vitamó nene Ómasímó kugutó vizinogo ive.

*Miluma geleaká gamena napa*

*(Mat 24:15-28; Luk 21:20-24)*

<sup>14</sup> \* Minoko lekeza nene mu líkizapa iti netá golesa nene minamoaká apatoka apá ale golesa oaká netá nenémó oteneíko ániगतave. [Imane gakó gatatanímó neneka imane nolu gakokumú gele guni ozo.] Ámina gamenaló Zutaia mikasiuka nita vegená nene golisi iliki agokaloka ititakumule.

<sup>15</sup> \* Keí numupitó nita vegená nene golisi iliki limiki numúíkú henoníini ma aliki vamitakumule.

<sup>16</sup> Itó míkú noiti ve nenémó luhoaká gó alitove loko numunaloka atiginá oko vamitiku-mule.

<sup>17</sup> Kee, izegipa kagatupagi nita venaki izegipa namuni aminí níkimita venaki nene ámina gamenaló nene nana itamó neve.

<sup>18</sup> Lekelisi nolu netá nene golíni gamena utó amítive líki Ómasíloka líki minalo.

<sup>19</sup> \* Ámina gamenaló genavagi netá utó itimó nenémó Ómasímó apí oko netá matá ale utó i gamenalotí emane utó osá ami netá nene minoloko itike itike imane gamenaló utó amive. Nolu gamenaló utó okoko nenémíni veletó goha utó aminogo ive.

\* 13:9: Mat 10:17-20; Luk 12:11-12

\* 13:13: Mat 10:22

\* 13:14: Tan 9:27, 11:31, 12:11

\* 13:15: Luk 17:31

\* 13:19: Tan 12:1; Ali 7:14

<sup>20</sup> Guivahanímo ámina miluma gilita gamena ale atuhá amitimó nene, vejená makó ma kavasavagi minamitamó nemóza, kelémo etó onoi vejenakumule loko ámina gamena nene ale atuhá inogo ive.

<sup>21</sup> Nene gamenaló ve makolímo ángalo, gologí oletati vema imaneloka utó okave, itó ángalo, volaneloka utó okave loko lo likimitimó nene, ámina gakó gili zagemilo.

<sup>22</sup> Ámina gamenaló nene gologí oleketati ve sozámíni itó Ómasímíni agepagutí gakó liaká ve sozámíni utó iiki vejenalite sigaga lita netaki soza avevezaha sunigi aliiki Ómasímo kelémo etó onoi vejená kogoka vizitupe liki lá inigave.

<sup>23</sup> Ehe, nolu netá nene utó onamigo mota lo lekeme asú okuve. Nenemú gizapa alévolé iki minalo.

*Okulumakutí ve gihila atiginá iti gakó*

*(Mat 24:29-31; Luk 21:25-28)*

<sup>24</sup>\* Ámina gamenaló ámina genavagi netá asú okiko, ho noiteko litá oko límugusi zekiko ikanímo hize sata amiko,

<sup>25</sup>\* sonohí nenete okulumatotí atohiki velehé nilimiko, okulumakú amuzavagi netá mómoká i asú niko

<sup>26</sup>\* okulumakutí lumu ve gihila neza zámuzánegi itó lapanánegi nene límusi amupiló nolumugo ániganigave.

<sup>27</sup> Lá okiko, agelogíni kimiselekugo, kelémo etó onou vejená ho noititokatí ho nolimitokatí itó ezega emegatí itó mikasi nekisa vokisaukatí kilími nupa inigave.

*Gohuna zámíni anoza gakó*

*(Mat 24:32-35; Luk 21:29-33)*

<sup>28</sup> Gohunagitana zamú anoza gakola nemó nene gili vevesiki gililo. Izanámo nene nagamíla nego agila guluma sekago lekeza ángiake ho gamena mota alitokave liki giliaká niave.

<sup>29</sup> Itó ámináminiki lo lukumu netá nene utó noiko ángiiki ve napate nene gatekú omo ávatíha okave liki litaze.

<sup>30</sup> Neza lamaná lo likimitoze, gililo. Imane gamenaló nia vejená velesá hili asú inamiko nolu netá mukí nene utó inogo ive.

<sup>31</sup> Okulumaki mikasigi tolova itáíha, není gakó nene ma gopa oko tolova aminogo ive.

*Gamena napamú gelemune*

*(Mat 24:36-44)*

<sup>32</sup> Lá onoi móza, ámina gamenamú ve hamoláate keké gelemave, itó okulumakú ageló keza ma gelemave, itó Ómasímíni gipala noutímíni ma gelemuve. Améneho hamokó áisigó geleneive.

<sup>33</sup> Ato gamenamú lekeza ma gelemanazo, ehe, gizapa i guni iki minalo.

<sup>34</sup>\* Lá oko neve. Ve makolímo venoni vinogo nooko numuni apala ahuloko vinogo noike gelekelé izegipala nene mukí hoza nene etó etó oko kigizakú moloko netá matalaló gizapa inítatave loko ahulokimiake gatetó gizapa ve nene gizapa oko minozo loko lomíake vímó.

<sup>35</sup> Nenemú numuni amelahoma ati gamena nene gánavaló ahe akovevé ahe gó anuva noikohe gokululuva notovoikohe lekeza ma gelemanazo, nenemú gizapa i guni iki minalo.

<sup>36</sup> Lokovó akiniko galinali oko ángolikimikatize.

<sup>37</sup> Lo nolukumu gakó nene lekelikumukó lamuve, vejená mukikumú noluze. Lekeza nene gizapa iki minalo, loko limó.

## 14

*Monó gizapa vete Izesuni apilínigi lova gizamó*

*(Mat 26:1-5; Luk 22:1-2; Zon 11:45-53)*

<sup>1</sup>\* Avóikini aseníni zeketakumú gili mína holisigú lulu vizemi peleti niaká a holisi alitokago, gamena losítá ha nego, guguni giziaká ve napagi itó monó mogona apí-ikimiaká vegi keza láa liki lámó:

<sup>2</sup> Vegenalite lova napa ali utó iki lipilikatanazo, holisigú nene Izesuni apelemítune. Lá onoinazo, asuguná oko Izesuni agizató aleko apele hilitune liki gakó liki liake nenémíni gapomú vitagá amó.

*Petania numutoka Izesuni anuva lamanaki uveli holotamó*

*(Mat 26:6-13; Zon 12:1-8)*

\* **13:24:** Zoe 2:10,31; Ali 6:12      \* **13:25:** Isa 34:14; Ali 6:13      \* **13:26:** Tan 7:13      \* **13:34:** Luk 12:36-38      \* **14:1:** Gá 12:1-27

<sup>3</sup> \* Lá noigo Izesú nene Petania numutoka noike Saimon eza halamá netá gizaleake minake zoka vémini numukú iteko nosánetá noko noigo, vená makolímo gehanigítana goni aleake, agepáa zeko ategeake áminagú nene anuva lamanakí uveli agulizá nalita nene meinava iteko mina netá nene Izesuni gotolaló leketamó.

<sup>4</sup> Lá okago, ve lugáate mulúikú golesa okago, kezáitoka lamó: Uveli lamaná nene nanamú latila ive.

<sup>5</sup> Ámina uveli nene hanuva minalina meinaváa moni 300 kina alekinake gohogó veđená kumutiline. Liki liake gahá amikago,

<sup>6</sup> Izesú geleake láa loko lo kimimó: Ahulitalo. Nana igo gena gakó li nameve. Vená imanémo netá lamaná alenimikago etokave.

<sup>7</sup> \* Gohogó veđená keza lekelitoka gamena hána miniliki viki minanigi anazo, kelémo lamaná itune liki nene kilími lamaná itamóza, neza lekezagi minoloko voko minaminogo uve.

<sup>8</sup> Ezáa loló itove loko agata gili netá nene loló okave. Alika nénisi helekugo gonosi milimligú gale zinitatakumú agata geleake nugupeló anuva lamanakí uveli holonimikave.

<sup>9</sup> Neza lamaná lo likimitoze, gililo. Makó mikasiuka neni gakó lamaná imane li utó iki li kimitató li kimitató nene imane venalímini mogonamú gili zagitave liki eza loló oneta sunimuki li kiminigave, loko limó.

*Zutá Izesuni amimika lítove loko lo hutamó*

*(Mat 26:14-16; Luk 22:3-6)*

<sup>10</sup> Lá okago, Izesuni izegipala zuha keikutí ve makó agulizá Zutá eza Kaliotó apatotí ve nenémo guguni giziaká ve napa niatoka vike Izesuni amimika loko alémoko oko likigizakú ahulatove loko lo kimimó.

<sup>11</sup> Lo kemekago, giliake, mulúikú lamaná okago, age nonó lá oko gimitune liki Zutani agómualó li hutikago, geleake Izesuni amimika linogo amapani molamó.

*Izesú izegipala zuhagi asenini zekimiaká nosá namó*

*(Mat 26:17-25; Luk 22:7-14, 21:23; Zon 13:21-30)*

<sup>12</sup> Lulu vízemi peleti niaká a holisímimi ganá gamena nene avóikini asenini zeketakumú gili minake sipsip iza akaleva apiliaká a gamenaló nene, izegipala zuhate Izesuni loká itake lamó: Asenini zeketakumú gele mínoaká holisímimi nosánetá nene hiláauka viki alí vavá inítatave loko nolane.

<sup>13</sup> Liki likago, izegipala zuhagutí ve lositá nene nokimisilike láa loko lo kimimó: Zelusalega nanitisiko ve makó eza paisele somo nagamilagi geheneike gapoló hotu nilíkima nene ámina ve ámegetiki vilizo.

<sup>14</sup> Lá iki viki ámina ve nene numukú itekiko numuni amelahini láa liki li amilizo: Tisalémo nezagi izegipáne zuhagi asenini zekimiaká nosá natuni numuni agika hiláauka neve loko lokago nousive.

<sup>15</sup> Liki likisiko, numuni agika veletó nego netá matá avilisá ohá lekelepizekiko neneló nosánetate alí vavá ilizo.

<sup>16</sup> Loko lo kemekago, izegipala losima keza gili alikasike taoniló vi anitikasike ángasimó nene Izesú lo kimimómáminoko nego ángikasike asenini zekimiaká holisímimi nosá alí vavá asimó.

<sup>17</sup> Lá ikasigo, límugusi zekago, Izesú nene izegipala zuha 12-agi alí nupa iake,

<sup>18</sup> \* nosánetá niki niake, Izesú láa loko limó: Lamaná lo likimitoze, gililo. Lekelikutí nosánetá nonuhakutí ve makolímo nimimika linogo ive.

<sup>19</sup> Loko lokago, keza miluma nigeleke hamopamó li amiki nenikumú nolape.

<sup>20</sup> Liki likago, eza láa loko lo kimimó: Ve 12 lekelikutí hamó lapegutí peleti nagamí zeko natí ve nenémove.

<sup>21</sup> Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika loko nelémoko víti vema agae, lihima sipisi alinogo ive. Izolaho aí getamilina nene vávani oko minaline, loko limó.

*Lepa nosá apí oko kimimó*

*(Mat 26:26-30; Luk 22:15-20; 1 Koli 11:23-25)*

<sup>22</sup> Nosánetá ninake Izesú nene peleti aleake Ómasi agepoka loake gitegeko nokimike láa loko limó: Aliki nalo. Imane neni mémeláne neve.

<sup>23</sup> Loko loake vain goni aleake Ómasi agepoka loake, kemekago, nenegutí mukitó ninago,

<sup>24</sup> \* láa loko lo kimimó: Lo múnaheaká gacolímimi golaníne nene veđená mukikumule loko lekitomó imane neve.

<sup>25</sup> Lamaná lo likimitoze, gililo. Vain gihilagutí goha naminake minoloko vinake Ómasímini agulizaki vetipo loló oleketato gamena nene vain nagamí haitolúmini natove, loko limó.

*Izesuni Pitá egamega otatikumú lo utó imó*  
(Mat 26:31-35; Luk 22:31-34; Zon 13:36-38)

<sup>26</sup> Láa loko lokago, monó nama makó liake limiake, Olivi agoka agísauka anitiake,

<sup>27</sup> \* Izesú láa loko lo kimimó: Monó gotolaú nene Ómasímo li gakó nene láa liki luhuva gizinamóma neve: Gizapa ve apelekugo sipsip iza nene hutilí iki golisi inigave. Liki gizinamóma nenazo, lekeza mukitó neni visilínitanigave. Lá onoitómóza,

<sup>28</sup> \* helekugo goha nelémo otekiko, Galilaia mikasiuka goí o likiminogou uve.

<sup>29</sup> Loko lokago, Pitá láa loko lo amimó: Neza viselegetamitove. Keza mukitó gele alévolé oakáini nene gologolo sokikoma nénisi nene lá aminogou uve.

<sup>30</sup> Loko lokago, Izesú láa loko lo amimó: Lamaná lo gimitoze, gelezo. Itína holugú nene okolohomámo anó losi molonamiko nenikumú ángamuve loko gamena losive makole egamega onetanogou ane.

<sup>31</sup> Loko lokago, Pitá pigi vizeko limó: Neza geikumú egamega ogetaminogou uve. Nipili hilinigi niko, gezagi helekusigoma nene lá ogetaminogou uve. Loko lokago izegipa zuha mukitó keza alími vatí ake ámina gakokó lamó.

*Izesú Gesemane zazuhagú Ómasiloka limó*  
(Mat 26:36-46; Luk 22:39-46)

<sup>32</sup> Lá ikago, apá makó agulizá Gesemane loko neneló vi anitiake, izegipala zuha láa loko lo kimimó: Lekeza imaneló niko neza voko Ómasiloka litoze.

<sup>33</sup> Loko loake, Pitaniigi Zemusinigi Zoninigi kelémoko voake, Izesú nene mulunagú peisi nozigo miluma geleake,

<sup>34</sup> Láa loko lo kimimó: Mulúnegú gónupa geake hilitomó noize, lekelisi nene imaneloka miniki gizapa iki minalo.

<sup>35</sup> Loko loake, koma minomo novike mikasigú agoka nohizike Ómasiloka láa loko limó: Aménega, genavagi gihito netá imane gelekako nivilige vitive loko noluve.

<sup>36</sup> Loko nolike láa loko limó: Aménegamaka, geza mukí netá loló itove loko gagata gilitani netá nene vávani okogó loló itanimó nenazo, genavagi gihinitata netá imane nenitokatí ale olové itane loko nogulumóza, neni nigikaloka molamoko geí gigikaloka nelémo molatane loko noluve.

<sup>37</sup> Loko loake, oake izegipala zuha ángamó nene, kovó akinago ángoake, Pitani alémo otike láa loko lo amimó: Saimon geza akonape. Geza gamena koma gizapa oko ote minamitape.

<sup>38</sup> Lekemekú milatakumú gopa ikatanaze, gizapa iki miniki Ómasiloka liki minalo. Likigikámo vávani noimóza, lukugupémo gena noive.

<sup>39</sup> Loko lo kemeake, goha vike ámina gakó like Ómasiloka loake,

<sup>40</sup> atiginá oko ángamó nene, kogómula ahilí okago kovó akinago ángamó.

<sup>41</sup> Lá okago anotó aliki li amita gakokumú vitagá amó. Goha ago nene losive makole okago, Izesú lo kimike limó: Lekeza lakavasú viziki hanuva aki niminahe. Ánesile. Gilinahe. Okulumakutí lumu ve gihila neza lihimáinigi vetini kigizakú nimimika liki nilími mlata gamena mota alitokave.

<sup>42</sup> Otilo, mota vitunize. Ángalo. Nimimika liti vema mota alitó okave.

*Izesuni amimí okago alemó*  
(Mat 26:47-56; Luk 22:47-53; Zon 18:3-12)

<sup>43</sup> Láa loko lo kemeko noigo, izegipala 12 keikutí kigivéipo makó Zutá noago, vejená mukí keza ámegetiki niake gelekahosigi sopoló hánagi ali minake amó. Keza nene guguni giziaká vegí monó mogona apí ikimiaká vegí monó gizapa vegí keza emane amunaloka kimisilikago,

<sup>44</sup> nivake amimika liti vemámo gakó makó láa loko limó: Novinake ve makó agoka legeko nonugo nene ángiiki ámina ve noive liki agizató aliki gizapa itiki alímiki vilo.

<sup>45</sup> Loko loake ake, Izesú noitoka litá oko vo amatoka aniteake, oho, tisatehove nolike agoka legeko namó.

<sup>46</sup> Lá okago lova ve nenete ake Izesuni agizató ali gikitiki alemó.

<sup>47</sup> Lá niago, amatoka mina vejenakutí makolímó aí sopoló hána nene golagutí segeake guguni gizoaká ve napámini gelekelé izegipala apilike agata zeko isimó.

<sup>48</sup> Lá okago, Izesú nene lova vema láa loko lo kimimó: Neza nene laskoli nougo sopolo hánagi itó gelekahosigi alíki niake nigizató alitune liki niahe.

<sup>49</sup> \* Gamena gamena lekezagi monó zagusave napagú minuke monó lo keme keme oko minumómalo nigizató alisá amamó nehe. Lá ikamóza, emane amunaló nenikumú monó gakó luhuva gizinamó nene alévolé itive loko netá imane utó okave.

<sup>50</sup> Loko lokago, izegipala zuha nenete ahulimiake golisi hutilí iki vamó.

*Makí golisi vimó*

<sup>51</sup> Lá ikago, gosohá ve makolímo gó gizopa agupeló likeake Izesuni nene ámegetoko novigo, ámina ve nene agizató alikago,

<sup>52</sup> góma nene gololohá oko ahulo kigizakú oake agupe zapakó golisi vimó.

*Kansoletini kogómulaló Izesuni goni itamó*

*(Mat 26:57-68; Luk 22:54-55,63-71; Zon 18:13-14,19-24)*

<sup>53</sup> Lá okago, Izesuni nene guguni gizoaká ve napa noitako alímiki vikago, guguni giziaká ve napagi itó monó gizapa vegi monó mogona apí ikimiaká vegi alegesá iki minakú alímiki itemó.

<sup>54</sup> Izesuni alímiki nivago, Pitá nene hotó otigí oko kémegetoko vike, guguni gizoaká ve napámíni hé numunagú áneneló iteko ámina vémini gelekelé izegipategi minake lotó agupe lotá oko minamó.

<sup>55</sup> Lá noigo, guguni giziaká ve napagi keí kansolegi mukitó nene Izesuni apele hilitune liki soza hakupá gakóinimú vitagá amóza,

<sup>56</sup> hakupá gakó la ve nenete gakóini hamó lamamó. Mukí liki amupesamó nenazo, ali utó amamó.

<sup>57</sup> Makolite otiki hakupá gakó aikumú láa liki lamó:

<sup>58</sup> \* Eza nene monó zagusave napa kigizanitunú ginamóma imane zeko tele vizekinake, gamena losive makole noviko goha nigizanitunú gemitoha hanuva lokugo utó inogo ive loko noligo gulunimole.

<sup>59</sup> Liki lamóza, gakóini nene hamó gapoló vamigo,

<sup>60</sup> guguni giziaká vetini ve napámíni nenémo holúikú oteake Izesuni loká otake goni nigítake nila gakotó geza ale viligoko lo kimitani gakó ma nomihe.

<sup>61</sup> Loko limóza, Izesú nene agepa apizeake minake gakó ale viligoko lo amemigo, guguni giziaká vetini ve napa nenémo goha loká otake limó: Geza gologí oletatane loko lo mola vema Ómasi agepoka loaká nouhámámíni gipala noape.

<sup>62</sup> \* Loko loká omikago Izesú limó: Oo, nene mota nolane. Itó makó lo likimitoze, gililo. Okulumakutí lumu ve gihila neza amuza vémini agizani zamagaloka nougo, itó okulumalímíni límúsígú nolomugo ániganigave.

<sup>63</sup> Loko lokago, guguni giziaká vetini ve napa nenémo gele golesa oake luhoaká gola aleko polo noligike vevenala zuha láa loko lo kimimó: Gakola gilina vevená makó nanamú sele lokinake gakó goha lokiko gilitune.

<sup>64</sup> Ómasi avilegeko li gakó mota gilikaze. Nenemú lekeza gilikago nana onoive. Loko lokago, keza mukilite nakahunímíni gakó lokaze, mota losé apilitune liki li hukítake,

<sup>65</sup> lugáate gituhú itake agoka agepaló nihítake kigizanitunú napeleke lamó: Geza gakó mogona lo utó oaká ve noitanimó nene, éaho nogipilihe lo utó oko lo lemezo. Liki likago, gelekelé izegipáinimate kigizanitunú apelemó.

*Pitá Izesuni egamega otamó*

*(Mat 26:69-75; Luk 22:56-62; Zon 18:15-18,25-27)*

<sup>66</sup> Lá niago Pitá nene hé numuni amunaloka noigo, guguni gizoaká ve napámíni gelekelé mohola makolímo oko ángamó nene,

<sup>67</sup> Pitá nene agupe ló lotá oko noigo, ángoake gonú napilike geza nene Nasalete numutotí ve Izesuki miniaká niasi vema noane.

<sup>68</sup> Loko lokago, Pitá eza egamega ike gakó lanimó nene ma gelemuve, itó mogonáa gele vevesamuve. Loko loake, gatekú nolimigo,

<sup>69</sup> ámina gelekelé mohó nenémo aí goha ángoake alegesá iki mina vevenáma lo kimike ve imane Izesuni zuhagutí noive.

<sup>70</sup> Loko lokago, goha egamega hulupaváa imó. Lá okago, gamena komáisi neigo áminaló oti mina vevenalite Pitani goha láa liki li amemó: Géisi Galílaia ve noaninazo, géisi lamaná Izesuni zuhagutí noane.

<sup>71</sup> Liki likago, eza Ómasímíni avogísalo lo hutoko lamaná noluze, soza litomó nene Ómasímo usí vizenimikatize, lekeza gakó nila ve nene ánigonamu vemú nilave, loko limó.

\* 14:49: Luk 19:47, 21:37      \* 14:58: Zon 2:19      \* 14:62: Tan 7:13

<sup>72</sup> Loko noli agepagi okoloho nenémo goha anó molamó. Anó molokago, Pitá nene Izesú lo ami gakó nene, okoloho nenémo gamena lositá anó molonamiko není áñigonamuve loko egamega onetatanimó nene gamena losive makole inogo ive loko amunaloka lo ami gakó goha geleake ive napa imó.

## 15

*Izesuni Pilató noitoka alímiki vamó*

(Mat 27:1-2,11-14; Luk 23:1-5; Zon 18:28-38)

<sup>1</sup> Neteká ho noitigo, guguni giziaká ve napagi monó gizapa vegi monó mogona apí-ikimiaká vegi monó kansole ve mukí kezagi lova gizi hutiake Izesuni nene nagá zimiake alímiki vake Pilatoni agizakú milamó.

<sup>2</sup> Lá ikago, Pilató nene Izesuni áñigoake loká otake geza nene Zuta vetini kugulizaki ve napáini noape. Loko loká omikago, eza láa loko lo amimó: Nene gezaka mota lokanimole.

<sup>3</sup> Loko lokago, guguni giziaká ve napamate mukí netakumú goní imikago,

<sup>4</sup> Pilató goha loká otake limó: Geikumú gakó genavagi nilamó nenazo, geza gakó ale viligoko lo kimitanimoláa ma nomihe.

<sup>5</sup> Loko loká omikago, Izesú gakó ale viligoko lo kememigo Pilató nene agata gululusi gilimó.

*Izesú hilitive liki goní itamó*

(Mat 27:15-26; Luk 23:13-25; Zon 18:39-19:16)

<sup>6</sup> Kiapé eza Zuta vetini avolagini asenini zeketakumú gili mina holisigú meleketó meleketó nene Zuta ve keza aseva zetatañe liki ve makolímíni agulizá ikago, agulizaki ve nenémo nagá numukú ahulikita ve kimisele ahuloká ahuloká okago, ámina ve nene numúitoka viaká amó.

<sup>7</sup> Lá imó nene gamena nene zupa ve makó nagá numukú minamó, agulizá Palapasí. Áisi nene vejená lugáa kelémo vatí ike gamaniloka lova gizakú nene ve makó kepele hilimó nenazo, nagá numukú ahulimikago minamó neve.

<sup>8</sup> Lá okago, vejená mukí nenete Pilató noitoka vake eza aleaká imómáminoko alitive liki loká imikago,

<sup>9-10</sup> guguni giziaká ve napa nenete Izezukumukó amekugú niki miniake gonitó alímiki vakumú nene Pilató geleneike láa loko lo kimike limó: Láa likima Zuta vetini agulizaki vetipo nene aseva zemikugo lekelitoka vitive liki nilahe.

<sup>11</sup> Loko limóza, guguni giziaká ve napa nenete vejená mukilitini mulúikú hizikago

<sup>12</sup> aitolí Palapasini aseva zetamane liki likago, Pilató goha lo kimike limó: Zuta vetini kugulizaki véini noive liki liaká nia vemú nene nana otatove.

<sup>13</sup> Loko loká okimikago, goha gopaga liki zohota zaló hilitikumule.

<sup>14</sup> Liki likago, Pilató nene nanamú. Nana netá golesa alekago nilave.

<sup>15</sup> Loko lokago, keza goha gopaga liki likago, Pilató nene ali nupa imina vejenalitini mulúikú hulu itive loko Palapasini gologí omikago keitoka vimó. Itó Pilató lokago, Izesuni nene segi nogosanitunú apiliake viki zaló nilitunú ziki apili hilitave loko kigizakú molamó.

*Ami vete Izesuni gopoguni militamó*

(Mat 27:27-31; Zon 19:2-3)

<sup>16</sup> Lá okago, ami vemate agulizaki ve napamámini numuni holutó nene Izesuni alímiki iteke ami ve lugáa mukí kilími nupa ake,

<sup>17</sup> agulizaki vegetana lilí itake okohu gó luhimiake gasovagi nagatunú akilí lilí iki gotolaló hitimiake,

<sup>18</sup> amé ziki geké litake oga mokáneve, Zuta vetini kugulizaki véinimave.

<sup>19</sup> Liki liake, akepa nogosanitunú gotolaló ziake gituhú nitake agisagú gupá nizeke soza miliki agoka agaka vizemó.

<sup>20</sup> Lá ake gopoguka li asú itake okohu gó luhitamó nene gololohá iki ali miliake ezáa gola luhimiake, zohota zaló nene nilitunú ziki apili hilinigi alímiki vamó.

*Izesuni zohota zaló apelemó*

(Mat 27:32-44; Luk 23:26-43; Zon 19:17-27)

<sup>21\*</sup> Lá iake gapoló nívago, ve makó agulizá Saimon eza Apilika mikasiuka Sailini apatotí ve Alesaté itó Lupú keí améipo nene minaukatí noago, hotu liake gala vizikago, Izesú geheko vi za nene alémo vatí oko gehetoko vimó.

<sup>22</sup> Lá noigo, alímiki vake apá makotoka agulizá Goligota loko, lelí gakokutí nene gotóini gonosi helisa apale loko neneloka anitiake,

\* 15:21: Lom 16:13



<sup>23</sup> Izesú native liki vain nagamikú nene miluma gelemiti lusa netá makó agulizá mulu nene miliki ali gopa iake amemóza, namimó.

<sup>24</sup> \* Namigo, zohota zaló nene apiliki apatiake gineganeva gona miliki aliki éaho alitihe éaho alitihe liki satu zohí amó.

<sup>25</sup> Lá iki apelemó nene gó loake ho ite alévolé noigo, zaló apiliki apatemó.

<sup>26</sup> Lá ikago, nakahunimini gakó luhuva nene Zuta vetini kugulizaki véinive liki giziake apatemó.

<sup>27-28</sup> Itó laskoli ve geligeli ve makó nene agizani sogaloka apatemó, itó makó nene agizani zamagaloka apiliki apatemó.

<sup>29</sup> \* Lá ikago, vegená vigá igá amó nenete gotóinitunú goké goké nizeke amé ziki gopoguka litake láa liki lamó: Oho, monó zagusave zeko tele vizekinake gamena losive makolegó oko vokiko goha gitove loko loaká anitika,

<sup>30</sup> gugutó vizeko zohota za ahulokoko lememane.

<sup>31</sup> Liki nilago, guguni gizoaká ve napagi monó mogona apí ikimiaká vegi keza hamolímíni iki amé ziki gopoguka litake kezáitoka láa liki lamó: Vegená lugáa kelémo kugutó vizeaká noimóza, ezáa nene alémo agutó vizemitimó okave.

<sup>32</sup> Eza nene Isilae ve lelí gologí olimiaká ve itó lelí agulizaki ve noitimó nene itínasa zohota zalotí apasoko lemekiko, ángokinake gakola gele alévolé ituninazo. Liki likago, keza luga luga zohota zaló kipiliki apate ve nenetosa áminámíni iki kilími vatí asike amé zitigí iki lasimó.

### *Izesú hilimó*

(Mat 27:45-56; Luk 23:44-49; Zon 19:28-30)

<sup>33</sup> Holisakatotí mukí mikasiuka limugusi ze asú oake mino-loko novigo únaká ho nene ale zohotá imó.

<sup>34</sup> \* Ho ale zohota noigo, Izesú pigi vizeko ezáa gakokutí nene Eloi, Eloi, lama sapakatani loko limó nene lelí gakokutí nene Ómasinemaka, Ómasinemaka, geza nanamú viselenimikane.

<sup>35</sup> Loko lokago, amatoka mína vegená lugáate nene gakó giliake láa liki lamó: Gililo. Ómasímíni agepagutí gakó loaká ve Ilaizani sele nolive.

<sup>36</sup> \* Liki liake ve makolímó ololu loko vike notunigitana netá legeake akepa lolovaló hizeake ekesá vain nagamikú lupizeake ale oteko Izesú native loko amimó. Namike láa loko limó: Ánigatune. Ilaizá oko apasotatihe loko gizapa onoitune.

<sup>37</sup> Loko lokago, Izesú gakó napagutí like, ahuu lo nahulake hilimó.

<sup>38</sup> \* Lá okago, monó zagusave napagú Ómasímíni avogisaló itiaká nia gatetó zi lí ika lavolavo nene velekutí zeko hóu loloko limike ale luga luga imó nene lelí gahe ale koló imó.

<sup>39</sup> Izesú nene ahuu lo nahulake helekago, ami vetini gizapa vémo Izesuni agómulaló noike imane ve nenémo lamaná Ómasímíni gipala minamó neve, loko limó.

<sup>40</sup> Itó vená lugáate hotó otigí iki otí minake ángi minamó. Keikuka nene Magatala numutotí vená Maliá minamó, itó Maliá makó eza Zemusí komáa itó Zosé keí izóipo itó Salomé nene makó minamó.

<sup>41</sup> \* Keza amunaló Izesú nene Galilaia mikasiuka noigo ámegetiki nívake izamuha hiziki minamó neve. Kezagi itó Izesugegi Zelusalega itina vená lugáa mukímagi neneló minamó.

### *Izesuni gale zitamó*

(Mat 27:57-61; Luk 23:50-55; Zon 19:38-42)

<sup>42</sup> Únaká huluvaló nene holisi gamenamámíni netá ali vavá iaká a gamena alitokago, holisi gamenama alitokago, gamena hamó ha nego,

<sup>43</sup> Alimataia numutotí ve Zosehé eza monó kansole vete agika itiake a vémo áisi Ómasímíni gizapa ve napa ale utó oketati gamenamú gizapa oko mína vémo ahelele vizimó ze hitoake Izesuni gonosiváa alinogo Pilatoni nene loká omikago,

<sup>44</sup> Izesú mota hilihe loko agata losi geleake, ami vetini gizapa vema sele loake, mota hilihe loko loká otamó.

<sup>45</sup> Loká omikago, ami vetini gizapa vemámíni gakó geleake, gonosiváamú nene Zosehé hanuva aleko vitive loko gele amimó.

<sup>46</sup> Gele amekago, Zosehé nene gonosiváa asapú otatikumú lavolavo gó mokoná lamaná meina hizeake gonosiváa nene zalotí apasoko ale mikasiló oake, gó mokoná lamanámagú asapú omiake aleko vike meikú geha mulí goló vateikamó nenegú molomiake, gehani napa makó ahelú oko geha mulilímíni agepaló ze lí imó.

\* 15:24: Age 22:18

\* 15:29: Age 22:7, 109:25; Mak 14:58; Zon 2:19

\* 15:34: Age 22:1

\* 15:36: Age 69:21

\* 15:38: Gá 26:31-33

\* 15:41: Luk 8:2-3

<sup>47</sup> Nenegú nomolago, Maliá eza Magatala numutotí vená itó Maliá makó Zoseni izolaho nene áminaló ániġ minasimó.

## 16

### *Izesú heleneikutí otimó*

(Mat 28:1-8; Luk 24:1-12; Zon 20:1-10)

<sup>1</sup> Ho lemekago, holisi mota asú okave liki liake, Magatala numutotí vená Maliá, itó Maliá makó Zemusini izolaho, itó Salomé keza Izesuni gonosiváaló anuva lamanaki uveli holotatune liki anuva uveli meina hizemó.

<sup>2</sup> Hiziki aliake, holisi napa Sategú nene gó lomolomo gonosi apakú viki nanitego, ho itimó.

<sup>3</sup> Lá okago, vake gonosi apató ali alitiake kezáini ligili hagili ake geha mulí agepalotí gehani napama nene éaho ale ámegeletative.

<sup>4</sup> Liki ligili hagili iake ániġamó nene, ámina gehani napa mota ahelú o ámegekago gale koló onoigo ániġamó. Ániġiake,

<sup>5</sup> geha mulikú itiake ániġamó nene, gosohá ve makó nene luhoaká gó mokoná hána luhoake zamagaloka noigo, ániġiake ininá goha amó.

<sup>6</sup> Ininá niago, eza láa loko lo kimimó: Lekeza ininá amilo. Lekeza nene Nasalete ve Izesuni zohota zaló apiliki apate verna ániġanigi niahe. Imanegú noamive. Mota otekave. Gonosiváa milita apáma ániġalo.

<sup>7</sup> \* Itó ániġiiki viki Pitage itó izegipala zuha lugáamagi láa liki li kimilo: Amunaló lo likimimómámini oko goí o lekemeko Galilaia mikasiuka mota vokanazo, lekeza neneloka aí ániġanigave liki li kimilo.

<sup>8</sup> Loko lokago, luvoluvo nizeke ininá anazo, hetoka limiake geha mulikutí golisi vamó. Ololu liki vake kehelele vizekago, vegená makó avetó iki li kememamó.

### *Izesú Magatala apatotí Maliatoka utó o amimó*

(Zon 20:11-18)

[  
<sup>9</sup> Izesú nene lelí holisi Sategú nene neteká holugú galegutí oteake, Magatala numutotí vená Maliá eza holosi golesa 7-a agikagutí kepeleko kimisele ámegeta vená nene ganá utó o amimó.

<sup>10</sup> Lá okago, eza vike agivelagini nene miluma maluma nigeleke ive nama iki niago avetó oko lo kimimó.

<sup>11</sup> Heleneikutí oteake hanuva noigo ániġokuve loko lo kemekago, giliake gili zagemamó.

### *Izesú izegipala losiloka utó o kimimó*

(Luk 24:13-35)

<sup>12</sup> Nnelotí keikutí ve lositá nene gihisigú nivasigo, Izesú nene ametameni haitolímimi ale luhoake utó o kimimó.

<sup>13</sup> Lá okago, keza atiginá iki taoniloka vasike vegená lugáa avetó iki li kemesimóza, gakó lasimó nene gili zagemamó.

### *Izesú aposolo 11 monó hozaló kimisilimó*

(Mat 28:16-20; Luk 24:36-49; Zon 20:19-23)

<sup>14</sup> Alika Izesú nene izegipala 11 kezáikó alegesá iki nosáneta niki niago, utó o kemeake eza galegutí oteake noigo aí ániġa vegenalitini gakó gili zagemamó nenazo, gili alévolé amakumú itó kigika hize lí ikumú nene gahá kimimó.

<sup>15</sup> \* Lá ike láa loko lo kimimó: Lekelisi nene numutó namató ho noititoka nolimitoka viki vegená mukitó niamó nene není gakó lamaná li kimilo.

<sup>16</sup> Lá ikiko gili alévolé iiki monó nagamí hilinita vegená nene okulumalímimi mututoni itamóza, gili alévolé amita vegená nene meinímimi mututoni inigave.

<sup>17</sup> Itó imane anosa nene gili alévolé iki minata vegenatoka utó oketanogo ive. Není nugulizá iki holosi golesa nene kipilikí kimisilinigave. Haitó konokutí galinali linigave.

<sup>18</sup> Gosihá nene gopa ali otikí minatamó itó gipe nagamí gopa natamó nene nenémo kelémo golesa aminogo ive. Kivisiti vegená nene kigizanitunú nónohá zikitatamó nene zokanigave, loko limó.

### *Izesú okulumakú itimó*

(Luk 24:50-53; Apo 1:9-11)

<sup>19</sup> Láa loko Guivahani Izesú lo kemekago, Ómasímo alémoko okulumakú itekago, eza Ómasímini agizani lamagaloka minamó.

<sup>20</sup> Lá noigo, keza izegipala zuha nenete numutó namató viake gakola li utó iki li nikemego, Guivahani nenémo kelémo vatí ike ámina anosa utó o kimitunú nene keí gakó hize lé oketamó.]

## Izesu Kilistoni Gakó Lamaná Luká Luhuva Gizamó

*Luká eza imane luhuva Teopiloni gizo amimó*

<sup>1</sup> Ve mukilite holutegú utó i netá nenémini gakoláa ali amegesaló miliki luhuva gizinamó.  
<sup>2</sup> Keza nene monó liaká vete mogonalotí Izesuni netá mukí ániigi hee liake li utó iki li leme gakó luhuva gizinamó nenazo.

<sup>3</sup> neza ámina oko ámina gakó lamaná nene legesó oko ale lamaná oko gele hee lokuke nene, Teopilo gugulizaki venemaka, geí nene ale etó etó oko luhuva imane gizo nogumumó nene

<sup>4</sup> géisi nene gatoko avetó gakó li gememó nene gihila lamaná neve loko gilitane loko nogizuve.

*Monó nagamí holokimiaká ve Zoní utó itikumú epoapoga limó*

<sup>5</sup> \* Zutaia mikasigú nene agulizaki ve napa Heloté gizapa oko mina zupa nene Ómasi guguni gizo ameaká ve makó minamó agulizá Zakaliá, Apiani mulusigutí. Eza Alonani agapilamokutí vená makó alimó agulizá Elisapeté.

<sup>6</sup> Keza Ómasímini avogisaló kigika lamanaki minasike gapo lota gakó Ómasímo lo hukoko li gakó lihimáini nomimó minasike gili alikigó minasimó.

<sup>7</sup> Elisapeté nene gohuna vená minokago, keza izegipáini nomimó minasike ozaha gelehosi mílasimó.

<sup>8</sup> Zakaliani mulusi keza monó numuni napagú Ómasi guguni gizi amita gamena alitokago,

<sup>9</sup> guguni giziaká vete aliaká amó nenéminiki hozanini ali etó etó iki alimi nivake, Zakaliani nene Ómasi guguni gizo amezo líki alími etó ikago, monó zagusave agikagú itike anuva lamanaki netá nene Ómasi guguni gizo namigo,

<sup>10</sup> vejená mukilite geisa agikagú minake Guivahaniloka líki minamó.

<sup>11</sup> Nilago Guivahanímini ageló makolímó utó o amike guguni gizoaká ita lamagaloka ote minamó.

<sup>12</sup> Oteneigo, Zakaliá ániigoake ininá ike alegesá ligimó.

<sup>13</sup> Alegesá legekago, ageló nenémo láa loko lo amimó: Zakaliazo, geza gelegesá legemino. Guivahanímó numuna nolanimó nene mota geleneize, venaka Elisapeté nene izegipa agatupagi minoko gipa getatimó nene agulizá Zoní ave loko molozo.

<sup>14</sup> Geza mulukagú lamaná geleko gogoliza vizinogo ane. Itó vejená mukilite gipaka utó itikumú nene laga kivisinogo ive.

<sup>15</sup> \* Eza nene Guivahanímini avogisaló nene ve napa loló oko minative. Eza vain nagamí ahe itó negi nagamí ahe nonamoko moseko nomíniko, izolahini agatupagú noikutí Sikalahulímó aí agikagú mino vaí itive.

<sup>16</sup> Lá okiko Isilae vejená mukí nene gapo golesagutí kelémo atiginá okiko, Guivahani Ómasímini kovogisa i aminigave.

<sup>17</sup> \* Eza Ómasímini agepagutí gakó loaká ve Ilaizá oaká imó nenéminoko amuza moloko Guivahanímini gapo veletoko aí gakó lo utó utó oko minanogo ive. Lá oko minoko olotiva vejenalitini itó izegipa komatini kigika ale apizeketative. Lá okiko gakó gili ahuliaká vejená nenete kigika lamanaki vete nigele monó nene kagata gámeme iki gilinigave. Itó eza ámina hoza alekiko, vejená mukí keza Guivahanímú ageva iki minanigave.

<sup>18</sup> Ageló nenémo láa loko lokago, Zakaliá eza anotó aleko láa loko lo amimó: Venánegi leza ozaha gelehosima nousinazo, nenemú geí gakó gulugo gihiláa loló amive.

<sup>19</sup> \* Loko lokago, agelómámo láa loko lo amimó: Gelenape. Neza nugulizáne Gapelienama noluve. Neza Ómasímini avogisaló minoko aleko oaká noumóma neve. Áisi nimiselekago lumuke gakó lamaná imane lo nogumuve.

<sup>20</sup> Nenemú gelezo. Gakó lo nogumumó nene gele alévolé amanimómámini lihima nene gakó lamoko negi hizeko minoloko novako, minoko gakó lo nogumumó nene gihila ziti gamena nene gakó goha linogo ane. Neza nolu gakó nene hetagá aminogo ive.

<sup>21</sup> Loko lokago, Zakaliá eza monó numuni napagú gamena hána minokago, vejená keza ageva iki minake minake gopa kagata gelemó.

<sup>22</sup> Lá iki niago, Zakaliá alika limike gakó lo kiminogo gopa imó. Gakola gopa okago, keza nene monó zagusaveú netá haitolímímini makó ániigonitíve. Líki nigelego, eza negi hizeake gakó nana oko lo kimitohe loko agizanitunú avevezaha o kimike gakó lo kememimó.

<sup>23</sup> Lá oko noigo, hoza aliti gamena asú okago Zakaliá nene numunalo atiginá oko vimó.

<sup>24</sup> Alike venala Elisapeté nene izegipa agatupagi minamó. Lá oake ikani 5 oko novigo halá geko minake,

<sup>25</sup> Guivahanímo gamena molamó nene alitokago Guivahanímo hize lé onimiake gohuna vená minukumule loko novoza hulu netá monéna ale ahulonimikave, loko limó.

*Izesú utó itikumú epaopoga limó*

<sup>26</sup> Lá okago, izegipalagi minatotí ikani 5-a ale ahulokago, Ómasímo ageló Gapelienima goha amiselekago Galilaia mikasiuka Nasaleta numutoka vimó.

<sup>27</sup> \* Neneloka izaina vená makó minamó, agulizá Maliá. Eza nene agulizaki ve napa Tevitini agapilamó zuhagutí ve makó minamó agulizá Zosehé aí ániği milimikago minamó.

<sup>28</sup> Noigo ageló nenémo Maliá noitoka utó oake láa loko lo amimó: Guivahanímo hize lé ogetago noanitika nenoape. Guivahanímo geitoka noive.

<sup>29</sup> Loko agelómámo lokago, Maliá gíligo gena okago, agikatunú nene gakó limómámini mogona nana oko netive.

<sup>30</sup> Loko nogiligo, agelómámo láa loko lo amimó: Maliazó geza gehelele vizemino. Ómasímo geí ániğokago lamaná okave.

<sup>31</sup> \* Gelenape. Geza izegipakagi minoko gipa getatanimó nene agulizá Izesú ave loko moložo.

<sup>32</sup> \* Eza nene sipisi ve loló oko noiko Ómasímini gipalave liki linigave. Itó Guivahani Ómasímo nene avolaho Tevitini akilí ale hitomikíko minanogo ive.

<sup>33</sup> Itó mino lúaló moloko Zakoponi agapilamó zuhaloka gizapa oko minanogo ive. Guivahani loló oko minatimó nene asú amoko gamena hána hána mino-loko voko minanogo ive.

<sup>34</sup> Loko agelómámo lokago, Maliá láa loko lo amimó: Neza vánegi apizeko minamusive. Nenemú nolani gakó nene nana oko alévolé itive.

<sup>35</sup> Loko lokago, ageló nenémo láa loko lo amimó: Ómasímini Sikalahulímo geí gumupiló liminogo ive, itó Guivahanímini zámuzámo hize lé ogetanogo ive. Nenemú gipa getatanimó nene etó keké vízeke noi gipa Ómasímini gipalave liki linigave.

<sup>36</sup> Itó makó lo gimitoze, geležo. Geí zuhagutí Elisapetéma nene gelehosímámo izegipa agatupagi noigo ikani 6 mota vokave. Eza nene gohuna venámave liki nilago izegipalagi minokave.

<sup>37</sup> \* Ómasímo loló amiti netala ma nomive. Loló iti netakó nenazo, nenemú Ómasímo Elisapetenimú li gakó mota gihila zekave.

<sup>38</sup> Loko lokago, Maliá nene neza Guivahanímini gelekelé mohó nounazo, nolani gakó nene ámináminoko utó ino. Loko lokago, ageló nenémo ahulomiake vimó.

*Maliá Elisapeté noitoka vimó*

<sup>39</sup> Maliá nene mino hána amike Zutaia mikasiuka agokaloka numuni makó minatoka iteko vimó.

<sup>40</sup> Iteko víke Zakaliani numukú itike Elisapeteni geké lotamó.

<sup>41</sup> Geké lomikago, Elisapeteni mulunagutí izegipalama ziginí igo gilimó. Gelekago, Ómasímini Sikalahulímo nene Elisapeteni agikagú lemeko vaí okago,

<sup>42</sup> gakó napa like láa loko lo amimó: Ómasímo eza vená mukikutí gelémo etó ike nónohá zegimikave, itó izegipa getatanimó nenegi lusa gemikave.

<sup>43</sup> Geza není Guivahanímini izolagama noane. Vená ánéama nounazo, nanamú nenitoka okane.

<sup>44</sup> Geležo. Geké nolonetako, izegipa nenémo mulúnegutí agoliza novizike ziginí okago gelekuve.

<sup>45</sup> Itó geza nene Guivahanímo lo gimi gakó vo alitive loko gele alévolé okako, Ómasímo lusa gegimikave. Nenemú gulugo lamaná okave.

*Maliá agoliza vizike Ómasi agepoka limó*

<sup>46</sup> Loko lokago, Maliá láa loko limó:

Neza nigikatunú Guivahani agepoka noluve,

<sup>47</sup> \* itó sikalahúnetunú Ómasi nugutó vízeaká vemú nogoliza vizuke agepoka noluve.

<sup>48-49</sup> Itó gelekelé mohola neza minomo lemeko minumó itínasa nelémoko noitive.

Ómasi alévolé ve nenémo nenitoka netá gihila ale utó okamó nenazo,

nenemú omolelé amalelé iki mini-liki itita vegealite  
nenikumú giliiki Ómasímo lusa geta venale liki linigave.  
Aí agulizá etó oko neve.

<sup>50</sup> Aí gili amita vegeená nasahilí okimiaká noive.

Omolelé amalelé iki minimi ite vegeená lá okimiaká noive.

<sup>51</sup> Kezáini kugupemú gelego iteaká noi vegeená nene  
ezáa alévolé zámuzá ale utó ike kelémo ahuloaká noive.

<sup>52</sup> Itó kugulizáki ve kehelú okago

keí gonanalivagi holomalotí velehé limiaká niave.

Itó vegeená limiki minamoláatini kugulizáini ale napa oaká noive.

<sup>53</sup> Gohogó vegeená itó gaúna hiliki nimina vegeená nene  
netá gihila kemekago, kagatupa igo miniaká niave.

Itó henóinigi vegeená ahulokimikago

muhelé iki miniaká niave.

<sup>54</sup> Ómasi eza gelekelé otko minuni vegeená nene hize lé olimikave.

Eza agika lamanakímove loko Isilae vegeená leza lá olimikave.

<sup>55</sup> \* Avotegini láa loko lo moloketamó nene

Avalahani itó agapilamó zuhagi lo mololetamómámini gihila utó oloko voko minanogo  
ive.

<sup>56</sup> Loko Maliá loake, Elisapeteki minasike ikani losive makole ale ahuloake, numunaloka  
atiginá oko vimó.

*Monó nagamí holokimiaká ve Zoní utó imó*

<sup>57</sup> Itó Elisapeté eza izegipa getati gamena alitokago, gipa getamó.

<sup>58</sup> Getokago, vegeená zuha agivelage keza Guivahanímo muluna ze hoú lake ale utó i  
netakumú giliake, ezagi makó mulúikú lamaná gelemó.

<sup>59</sup> \* Lá iake, gamena 8 oko vokago, gipa namunimámini agupeló Ómasímini anosa  
militanigi mukí vegeená alegesá ake amelaho Zakaliani agulizató milanigi lamó.

<sup>60</sup> Liki likago, izolaho géneka like Óe, agulizá Zoní ave loko molatune.

<sup>61</sup> Loko lokago, keza láa liki li amemó: Íi, geí zuhatini kugulizá makó nenéminoko nomive.

<sup>62</sup> Liki géneka hánaka nilake, Zakaliá nene gipalámini agulizá nanave loko molative liki  
kigizanitunú avevezaha ikago,

<sup>63</sup> eza pepamú agizanitunú avevezaha okago, pepa alimi amikago, agulizá Zoní ave loko  
luhva gizamó. Gizokago, giliake sigaga lamó.

<sup>64</sup> Lá ikago, Zakaliani genezala litá oko lamaná okago, Ómasi agepoka limó.

<sup>65</sup> Lá okago, agive lugáa keza giliake kelegesá ligimó. Lá okago, Zutaia mikasigú  
zopegaloka numutó namató nene ámina gakó aveté iki ligili hagili ikago,

<sup>66</sup> vegeená mukilite gakóini giliake ali kigikagú milake gipama nene napa okoko nana  
itíve. Líki lamó nene, Guivahanímini zámuzá nene ámina gipaloka nego giliake lamó neve.

*Zakaliá epoapoga li gakó*

<sup>67</sup> Itó amelaho Zakaliani nene Ómasímini Sikalahulímo agikagú minake alémo vávani igo  
alíka utó ití netakumú epoapoga like láa loko limó:

<sup>68</sup> Isilae ve leza Guivahanite Ómasi agepoka litune.

Eza nene vegeená zuha lelí lelémo vatí ike

netá golesagutí gologí olimikave.

<sup>69</sup> Lugutó viziti lapusa ale oteko hizekave.

Gelekelé izegipala Tevitini agapilamó zuha lelitoka neve.

<sup>70</sup> Ómasímini agepagutí gakó liaká ve kelémo vávani okago  
epoapoga gozapá láa liki liaká amóma neve:

<sup>71</sup> Lova vetiní kigizakutí gologí oletanogo ive.

Mukahá lipiliaká nia vegutí akagá oletanogo ive.

<sup>72</sup> Avotegini nígika hize kimitove loko lo moloketamole.

Lo múnáheake lo hukoko li gakó gele minake lá oketamole.

<sup>73</sup> Itó avoteho Avalahani láa loko alévolé oko lo molotamole:

<sup>74</sup> Gala vetiní kigizakutí gologí oletanogo ive.

Lá okiko lelegesá legemiko gelekelé otko minanogo une.

<sup>75</sup> Nenemú ligika avasavagi miniko gakote minamiko

gelekelé otko minoko hilitune, líki lamó neve.

<sup>76</sup> \* Itó gipa geza Guivahanímini monó gakoláa lole ale oko aí gapo veletataninazo,

geikumú nene vozaú vémini agepagutí gakó loaká veve liki linigave.

<sup>77</sup> Ómasímo vevenala zuha kugutó viziti gakó lo kemekako, keza gili zagikiko, lihimáini ahuloketanogo ive.

<sup>78</sup> Lelí Ómasile eza mílumate geleaká noimó nenazo, eza lititó nene velé okulumakutí okululuva notovoko,

<sup>79</sup> \* Ímugusigú nouhá vevená hize hanatoletanogo ive.

Ító heleakakú nominuhá vevená hize sata oletanogo ive.

Lá onoiko nonagá lamanalímíni gapova utó iko nenegú vinogo une, loko Zakaliá íimó.

<sup>80</sup> Ító ámina gipa nene agupegi agikagi napa oko alévolé okago, mikasi gomopalaló voko noigo, hoza aliti gamena alitokago, Isilae vevenatoka utó oko minamó.

## 2

### *Gipa Izesú utó ímó*

*(Mat 1:18-25)*

<sup>1</sup> Gamena nene zupa Loma vetini agulizaki ve napa minamó, agulizá Agustó. Eza numutó namató vevená kugulizá alilo loko gakó ahulokago vímó.

<sup>2</sup> Nenémíni hoza gozapá alemamó. Kilinió nene Silia mikasiuka agulizaki ve loló oko noigo ámina netá apí iki alemó.

<sup>3</sup> Lá niago, vevená mukí nene lugulizá alitave liki avóikini gotó apáitoka viká viká niago,

<sup>4</sup> Zosehé eza agulizaki ve napa Tevitini agapílamó minamó nenazo, eza ámináminoko Galilaia mikasiuka Nasaete numutoka minatotí ahuloko Zutaia mikasiuka nene Tevitini gotó apatoka Petelehe numutoka ítimó.

<sup>5</sup> Noítike ániagi mílita vená Maliáma izegipa agatupagi alémago vasimó.

<sup>6</sup> Víki minasike izegipala getati gamena alitokago, venoni vevenalitini akiaká numuni gikí okago, olovó zikasike pulumaká izatini numukú itiki minasike,

<sup>7</sup> ganá gipala getoake, gotunú asapú omiake pulumaká izatini nosánetá kimiaká lapegú molomíkago ako minamó.

### *Sipsip izaló gizapa vegi ageló vevenaki*

<sup>8</sup> Lá okago, ámina mikasiuka ve lugáa nene holugúnaka gihisiló minake sipsip izáiniló gizapa iki minamó.

<sup>9</sup> Lá niago Guivahanímíni ageló makolímó keitoka utó noigo, Guivahanímíni lapanalímó hize sata omíkago, kehelele vizimó.

<sup>10</sup> Lá okago, agelómámó láa loko lo kimimó: Gilinahe. Neza gakó lamaná aleko nolumumó nenazo, lekeza lekehelele vízemíno. Nenémíni gihiláa nene vevená mukitoka utó o líkimíko mulutikú ágila guluma inogo ive.

<sup>11</sup> Ítinasa lukugutó viziti ve Guivahani eza gologí oleketative loko lo mololeketa vema nene Tevitini gotó numutó utó o noive.

<sup>12</sup> Ító anosa makó lo líkimítóze, gililo. Izegipa namuni makó nene gotunú asapú iki izatini nosánetá lapegú mílimíkago akonoize, víki ániálogo.

<sup>13</sup> Loko lo kemekago, galinali ageló vevená mulusi napa nene okulumakutí límiki kigivéipo minató alegesá iki minake Ómasi agepoka lake nama láa liki lámó:

<sup>14</sup> Logoliza vízeko okulumakú Ómasi agepoka litune.

Mikasiuka Ómasímo ániago amu híli vevenatoka hulu utó ino.

<sup>15</sup> Líki ageló vevenámate líake atiginá iki okulumakú itíkago, sipsip izaló gizapa ve keza láa líki lígili hagilí amó: Leza Petelehe numutoka vinake Guivahanímó gakó lo limitímíni gihila ániगतune.

<sup>16</sup> Líki líake litá iki víki Maliako Zoseheko kílimi utó iake gipa namunima pulumaká izatini nosánetá lapegú akonoigo ániálogo.

<sup>17</sup> Ániagiake, agelómámó izegipamú lo kimi gakó nene avetó iki lí kememó.

<sup>18</sup> Lá íkago, izaló gizapa vetini kegepagutí gako láa gele vevená keza sigaga lí asú amóza,

<sup>19</sup> Maliá nene gakó mukí ale agikagú moloake agata geleva geleva oko minamó.

<sup>20</sup> Ító sipsip iza gizapa ve keza atiginá iki vake ageló lo kimitó utó okago ániaga netakumú nene Ómasi agepoka líki agulizá ali otiki minamó.

### *Izesuni agupeló Ómasímíni anosa militamó*

\* 1:79: Isa 9:2

21 \* Gipa Izesúma utó okago, gamena 8-ía vokago, gipamámini agupeló nene Ómasímini anosa militake agulizá Izesú ave liki milamó. Ámina agulizá nene Maliá izegipa agatupagi minonamigo ageló nenémo goi oko lo amitó nene milamó.

*Monó zavusavegú Izesunima Ómasímini gipa minative liki anosa militamó*

22 \* Gipala getakumú agupe ali lamaná itave loko Mosé lo hukoko li netá aliki lilí itái gamena alitokago, Zoseheko Maliako keza gipa Izesuni nene Zelusalega alímiki itesike, Guivahani Ómasímini gipa minative liki anosa militasimó.

23 \* Lá asimó nene Guivahanímo láa loko lo hutokago mina gako nene gili alesike lá asimó: Ganá gipa utó noiko, Guivahanímini gipa minative liki lehizitalo.

24 Itó

Nama luhusihe nama gelehová ahe lositá aliki viki není guguni gizi nimilo loko Guivahanímo lo huta gako nene gili alesike namagi aliki vasimó.

25 Lá ikasigo, Zelusalega ve makó minamó, agulizá Simeó. Eza nene hee hee loko monolagi ve minake, Isilae vejenáma miluma giliki minakutí gologí oketati vemú ageva oko minoaká imó. Af agikagú nene Ómasímini Sikalahulímo lemeko vaí oko minake,

26 gako láa loko lo amimó: Geza helemoko hanuva noako Guivahanímo gologí oleketative loko lo mololeketa vema ánganogo ane.

27 Itó Simeó nene Sikalahulímo alémo vávani okago monó zavusavegú itimó. Lá imó nene Maliako Zoseheko keza Ómasimó lo hukoko li gaktó aliki lilí itatave liki gipa Izesunima alímiki itesigo,

28 Simeó nene gipa Izesunima zanava oko geheneike Ómasi agepoka like láa loko limó:

29-30 Guivahanínemaka, imane lugutó viziti vema itínasa nene nogómula gihilatunú ángokuve.

Gakó lo molonetanimó nene gihila mota zekaze, nenemú geí gelekélé ve neza monokú nelémo molako hulu nivisiko hilitove.

31 Geza numutó namató vejenalite ángatave loko lelémo lamaná iti ve imane alémo utó okané.

32 \* Nenémo hetoka vejenalitini kigika hize hanatokimikiko monó gilinigave. Itó Isilae vejenalitini lugulizá ale otinogo ive.

33 Loko gipa Izesukumú lokago, izolahiko amelahiko gilikasike sigaga lasimó.

34 Lá ikasigo, Simeó eza lusa getake izolahini Malianima láa loko lo amimó: Gelenape. Imane gipaloka Isilae vejená hizi hoú litave loko lonoigóma neve. Ámina gipámini gaktó nene vejená lugáa keza lisiki gululú viziki akatave. Itó lugáa keza lisi gikitiiki otitave. Eza anosavagi noitimó nenazo, ve mukilite alivi letivi itatave.

35 Itó napiliko geza gipakamú miluma geleko gigika hizinogo ive. Nene suni utó noiko, vejená mukilitini kigikagú gakoíni utó inogo ive.

36 Loko lokago, Ómasímini agepagutí gako loaká vená makó minamó, agulizá Haná. Ási Panueleni mohola Aseloni mulusigutí minatímo veló voko minake kilisimasi 7 ale ahulokago, vana helekago,

37 gevoná vená loló oko minomo noitike kilisimasi 84 ale ahulake gelehosi molamó. Ási nene monó zagusave ahulamike gamena gamena únaká neteká Ómasi geké lotoko minake, nosánetá moseko minake, Ómasiloka loaká imó.

38 Eza nene ámina gamenaló anitike Ómasi agepoka like, Zelusale numutoka Ómasimó gologí oketati gamenamú ageva iki mina vejená nene gipa Izesukumú aveté oko lo kimimó.

*Nasalete numutoka atiginá iki vamó*

39 \* Lá okago, Maliako Zoseheko keza Guivahanímo lo huka gacolímimi hozaváa ali asú ikasike, Galiláia mikasiuka kei numutoka Nasalete neneloka atiginá iki vasimó.

40 Neneloka viki niasigo gipa Izesuni nene Ómasimó gizapa otake hize lé omikago, napa ike alévolé oko minake gako mukí gilimó.

*Gipa Izesú monó zagusaveú minamó*

41 \* Avóikini asenini zeketakumú gili mina holisi zupa meleketó meleketó nene Maliako Zoseheko keza Zelusalega itiaká asimó.

42 Lá iki niasigo, gipa Izesú nene kilisimasi 12 ale ahulokago ámina holisi makó alitokago goi iki aliaká asimó nenéminiki gipa Izesuni alímiki Zelusalega makó ítemó.

\* 2:21: Luk 1:31 \* 2:22: Liv 12:6-8 \* 2:23: Gá 13:2, 12 \* 2:32: Isa 42:6; 49:6; 52:10 \* 2:39: Mat 2:23

\* 2:41: Gá 12:1-27; Gapo 16:1-8



<sup>43</sup> Itiki niago, holisima asú noigo nene, keza nene gipa Izesuni nene Zelusalega taiza imikasigo, noigo, Maliako Zoseheko taiza itasikumú gelemasike atiginá iki lemesimó.

<sup>44</sup> Vegená lugáaloka gímizeko vo noitihe liki gilikasike, gapoloka nivasigo límugusi zekago, keí zuhagi itó kigivéike niakú vitagá asimó nene,

<sup>45</sup> noamigo, Zelusalega atiginá iki itesimó.

<sup>46</sup> Itiki vitagá iva iva iki niasigo, gamena losive makole oko vokago, Izesú nene monó zavirusave napagú noiike monó gakó lainim-ikimiaká vetini holúikú minake gakóini gilike itó mognamú loká oketoko noigo ángasimó.

<sup>47</sup> Itó monó ve nenete gipa Izesú gakó gilikumú itó loká atoka ale viligoko lo kimikumú sigaga litamó.

<sup>48</sup> Lá oko holúikú noigo alími utó ikasike, ininá goha asike izolaho láa loko lo amimó: Gipáne geza nanamú taiza oletane. Gelenape. Amekahiki leza geikumú mulute ze hóu loko mohona oko vitagá onousive.

<sup>49</sup> Loko lo amekago, Izesú láa loko lo kimimó: Nanamú vitagá asimó neve. Neza aménehini numukú aleko minozo loko loneta hozamagú nouve. Nene gakó gelemasike nilasihe.

<sup>50</sup> Loko limóza, keza nenémini mognáa gili vevesamasimó.

<sup>51</sup> Lá ikasigo, izolahiko amelahiko alímiliki vake Nasalete numutoka vasigo eza gelekelé oketoko minamó. Itó izolaho nene gili gakó mukí ale agikagú moloko minamó.

<sup>52</sup> \* Noigo, Izesú nene agikagi agupegi napa oko alévolé igo minamó. Lá okago niago, Ómasigi mukí vejenakí Izesukumú keza ángi kumu hiliki minamó.

### 3

#### *Zoní monó gakó lo kimimó*

(Mat 3:1-12; Mak 1:1-8; Zon 1:19-28)

<sup>1</sup> Tipelió eza Loma vejenalitati kugulizaki ve napa-napa loló oko noigo, kilisimasi 15 oko vokago, Potiasí Pilató eza Zutaia mikasiuka kiapé napa loló oko noigo, itó agunala Pilipó nene Itulaia itó Talakoniti mikasiuka kiapé loló oko noigo, itó Lisaniá nene Apilene mikasiuka kiapé loló oko noigo,

<sup>2</sup> itó guguni giziaká ve napatini gizapa ve lositá Anasiko Kaiapako niasigo, ve nenéminiki gizapa ve lilí iki niago, gamena nene zupa Zakaliani gipala Zoní nene mikasi gomopalaló noigo, Ómasímo hoza gakó lotamó.

<sup>3</sup> Lá okago, Zota nagamí vola helega ima helega mohona mohona ike, vegená kigika ali viligiiki monó nagamí hilikiko Ómasímo lihímáini ahuloketative loko lo utó oko lo kemeko minamó.

<sup>4</sup> \* Lá noigo, Ómasímini agepagutí gakó loaká ve Isaiáma epoapo gakó láa loko gizamó nene Zonitoka alévolé imó:

Mikasi gomopalaló ve makolímó gakó napagutí láa loko nolive: Guivahanímíni gapova likigikagú vilitalo. Aí gapo ali hee litalo.

<sup>5</sup> Gímuza lemeneitimó nene apiziki alími lamaná ilo. Agoka iteneitimoláa alími lasava zilo. Zová zeneitimoláa alími pehe lalo. Gapoló mikasi itesú lemesú itimó nene apiziki alími geleni lilí ilo.

<sup>6</sup> Lá ikiko, mikasigú vegená mukí keza Ómasímini kugutó vizeaká netá ánganigave.

<sup>7</sup> \* Lá noigo vegená mukilite Zoní noitoka vake monó nagamikumú likago, eza láa loko lo keme keme oko minoaká imó: Lekeza gosihalímíni agapilamó zuha neneta, golesa mognatinímíni lihímala anitino go noimó nene lekeza likigika ali viligamikí hanuva golisi itune liki niahe.

<sup>8</sup> \* Lekeza likigika ali viligiiki nenémini gihila ali utó ilo. Neza lo likimitoze, gililo. Avalahani agapilamó zuha keza sonohikitana nene gatamoakalímíni lilí itave loko lo molota gakó alévolé itive loko lekelisi negopa, Ómasi nenémo gakó litove loko nene lokiko gehani imanete Avalahani agapilamó zuha lilí inígi nene hanuva lilí itamó nenazo, lekeza lukugupetini aliki itiki Avalahani agapilamó zuhama nouninazo, Ómasi eza lihimatemú goní oletaminogo ive liki lamilo.

<sup>9</sup> \* Luni leko makó nene za mognagú gamuni oake noimóma neve. Nenemú gihila lamaná ali utó inamitamoláa nene asahizeko lokú gizanogo ive.

<sup>10</sup> Loko lo kemekago, mukí alegesá iki mina vejenalite loká itake leza nana itune.

<sup>11</sup> Likí likago, láa loko lo kimimó: Ve makó nenémo sioti losi aleminokoma agivelahini sioti nomiti ve nene magáa amino. Itó nosánetakí nene áminámíni ilo.

<sup>12</sup> \* Loko lokago, takisi aliaká vete monó nagamí hılanigi aniteke loká itake monó velemaka, leza nana itunimó neve.

<sup>13</sup> Liki likago, eza láa loko lo kimimó: Takisi moni gamanimo alilo loko molató nene aviligiki alimi itiki alemilo.

<sup>14</sup> Loko lokago, pilisi ve nene ake loká itake leza nene nana itunimó neve liki likago, eza láa loko lo kimimó: Lekeza vegealite moni limitave liki kipiliki kilími golesa amiki hakupá gakó likitamilo. Itó ikató hozalotí moni aliaká niamó nenemú goselé lekepelemino, loko limó.

<sup>15</sup> Vegená mukí keza Ómasímo gologí oketative loko lo moloketa ve atikumú gituhú niki ageva iki minake, Zonikumú nene ámina vema noihe liki kagata losi gelemó.

<sup>16</sup> Lá ikago, Zoní nene vegená mukí láa loko lo kimimó: Neza nene nagamikó hololikimiaká nouve. Není nemegealoka noa vémini zámua nenémo není zámua nivilegekave. Neza ánéama nounazo, aí gasa gó ate akisitomó nene etaminogo ive. Áisi nene Ómasímíni Sikalahuki likigikámíni pipizá netá loko loaká lóki hololeketanogo ive.

<sup>17</sup> Eza nene lolopa giteaká netaki aleko oko laisi nene gesopá zeko lolopa giteko ale lamaná inogo ive. Nosáneta lamaná nene gizaká oko ale numunagú molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

<sup>18</sup> Zoní eza lá oko vegená kagata alike ámina gakoki gakó lugáagi lo kimike Ómasímíni gakó lamaná lo kemeko minamó.

<sup>19</sup> \* Lá imóza, agulizaki ve Heloté nene uvolahini venala Helotiasini ipá oko aleake netá golesa lugáa alekago, Zoní nenemú gahá amekago, Heloté nenemú gele golesa oake,

<sup>20</sup> miní amike netá golesa goha alike Zonini nene nagá numukú ahulotamó.

*Izesú monó nagamí holamó*

*(Mat 3:13-17; Mak 1:9-11)*

<sup>21</sup> Zonini nene nagá numukú velesá ahulotamigo vegená mukí monó nagamí holokimikago, Izesú ámináminoko Zonitoka voko monó nagamí holamó. Holoake, Ómasiloka noligo, okulumá koló okago,

<sup>22</sup> \* Ómasímíni Sikalahú nene nama luhusi agupegí loló oake Izesuni amupiló lemeko minamó. Noigo, okulumakutí gakó makó láa loko utó imó: Gipáne gihila noane. Geí ániigo lamaná okuve, loko limó.

*Izesuni avolage*

*(Mat 1:1-17)*

<sup>23</sup> Izesú nene kilisimasiva 30 nenéminoko oko novigo monó hoza apí oko alimó. Naligo, vegená nenete Zosehení gipala nehe liki gelemó. Zosehé nene Helini gipala,

<sup>24</sup> eza nene Matatani gipala, eza nene Livaini gipala, eza nene Melikini gipala, eza nene Zanaini gipala, eza nene Zoseheni gipala,

<sup>25</sup> eza nene Matatiani gipala, eza nene Amosini gipala, eza nene Nahumini gipala, eza nene Eselini gipala, eza nene Nagaini gipala,

<sup>26</sup> eza nene Malatani gipala, eza nene Matatiani gipala, eza nene Semeinini gipala, eza nene Zosekeni gipala, eza nene Zotani gipala,

<sup>27</sup> eza nene Zoanani gipala, eza nene Lesani gipala, eza nene Zelupapeleni gipala, eza nene Sealitieleni gipala, eza nene Nelini gipala,

<sup>28</sup> eza nene Melikini gipala, eza nene Atini gipala, eza nene Kosamini gipala, eza nene Alimatamani gipala, eza nene Eleni gipala,

<sup>29</sup> eza nene Zosuani gipala, eza nene Eliezeleni gipala, eza nene Zolimini gipala, eza nene Matatani gipala, eza nene Livaini gipala,

<sup>30</sup> eza nene Simeoni gipala, eza nene Zutani gipala, eza nene Zoseheni gipala, eza nene Zonamani gipala, eza nene Eliakímíni gipala,

<sup>31</sup> eza nene Meleani gipala, eza nene Menani gipala, eza nene Matatani gipala, eza nene Natanani gipala, eza nene agulizaki ve napa Tevitíni gipala,

<sup>32</sup> eza nene Zesini gipala, eza nene Opeteni gipala, eza nene Poasini gipala, eza nene Salani gipala, eza nene Nasonani gipala,

<sup>33</sup> eza nene Aminatapani gipala, eza nene Ataminoni gipala, eza nene Alanini gipala, eza nene Hezelonani gipala, eza nene Pelezeni gipala, eza nene Zutani gipala,

<sup>34</sup> eza nene Zakoponi gipala, eza nene Isakani gipala, eza nene Avalahani gipala, eza nene Telani gipala, eza nene Naholeni gipala,

<sup>35</sup> eza nene Seluguni gipala, eza nene Lagauni gipala, eza nene Pelegeni gipala, eza nene Epeleni gipala, eza nene Selani gipala,

<sup>36</sup> eza nene Kenani gipala, eza nene Alapasatani gipala, eza nene Semeni gipala, eza nene Noani gipala, eza nene Lamekeni gipala,

<sup>37</sup> eza nene Metusalani gipala, eza nene Enokuni gipala, eza nene Zaleteni gipala, eza nene Mahalaleni gipala, eza nene Kenani gipala,

<sup>38</sup> eza nene Enosini gipala, eza nene Seteni gipala, eza nene Atani gipala, Atá nene Ómasilokatí.

## 4

### *Satá Izesuni gimivagú molamó*

*(Mat 4:1-11; Mak 1:12-13)*

<sup>1</sup> Izesú nene Ómasímíni Sikalahulímo agikagú leme vaí oake alémo zaú okago, Zota nagamí ahuloake mikasi gomopalaló vimó.

<sup>2</sup> Naneloka gamena ve lositosini kigisa kigizani asú igo akoko noike, nosáneta namike alika gaúna heleko minamó. Lá noigo, Satá nene oko gimivagú molake

<sup>3</sup> láa loko lo amimó: Geza Ómasímíni gipala noitanimó nene, geza lokako gehani imanémo nosáneta loló okiko noko minamane.

<sup>4</sup> \* Loko lokago, Izesú láa loko lo amimó: Óe, monó gotolaú luhuva láa liki gizinamóma neve:

Vegená neneta nosánetakó nokoko lamaná oko minoakaláa nene nomive.

<sup>5</sup> Loko lokago, Satá agoka hána makokú alémoko itike numutó namató kugulizaki ve mukilitini apáini litá oko alapize asú oake,

<sup>6</sup> láa loko lo amimó: Amuza miliki niago kugulizá novi netaki mikasigú netá lamanaláa nene gí imane geikó geme asú itove. Ámina netá nene není nigizakú molo asú onoinazo, makope makope amitove loko hanuva amitomóma neve.

<sup>7</sup> Nenemú geza není nigisauka gupá zeko negepoka lokako geikó loló o asú itive.

<sup>8</sup> \* Loko lokago, Izesú láa loko lo amimó: Óe, gakó makó monó gotolaú láa liki gizinamóma neve:

Guivahani Ómasigó lalapusa hizeko gupá ze ameko agepoka loakaláa neve, itó aikó gelekelé omiakaláa neve.

<sup>9</sup> Loko lokago Satá nene Izesuni alémoko Zelusalega vike monó zavusave napámíni agoka hánaló alémoko itike láa loko lo amimó: Geza Ómasímíni gipala noitanimó nene, imanelotí olío ká omanegú molozo.

<sup>10</sup> \* Gakó makó monó gotolaú láa liki luhuva gizinamóma neve:

Geikumú Ómasímo aí ageló nene hoza gakó lo kemekiko gizapa iki gilími vatí inigave.

<sup>11</sup> \* Itó makó láa loko neve:

Gehanímó gígí sagú hizekative liki keza limiki kigizani lukilagú gilími milanigave.

Liki luhuva gizinamóma nenazo, golesa aminogo ane. Loko lokago, Izesú láa loko lo amimó:

<sup>12</sup> \* Óe, monokú gakó makó láa loko neve:

Guivahani Ómasí nene gopa netakumú gimivagú molamítane.

<sup>13</sup> Loko lokago Satá nene lá oká lá oká ike agoka vize asú oake, ahuloko gamena makó zupave loake ahulomiake vimó.

### *Izesú Galilaia mikasiuka monó hoza apí oko alimó*

*(Mat 4:12-17; Mak 1:14-15)*

<sup>14</sup> Izesú nene Sikalahulímo hize lé otake zámuza amekago, Galilaia mikasiuka atiginá oko vimó. Atiginá oko okago, aí gokoláa helega helega vo asú igo gelemó.

<sup>15</sup> Naneloka monó numuni minakú minakú nene iteko lemeko oko monó lo kemekago, vegená mukilite laga kivisekago geké litamó.

### *Nasaleta numutoka Izesuni áni gí ahulamó*

*(Mat 13:53-58; Mak 6:1-6)*

<sup>16</sup> Lá ikago, Izesú ezáa napa i apá Nasaleta numutoka nene áminámíni oko vo anitike, holisi alitokago, monó numukú itimó. Eza holisi mína zupa zupa ámináminoko iteaká imó. Iteko monó gatoko lo kiminogo noitigo,

<sup>17</sup> Ómasímíni agepagutí gakó loaká ve Isaiá giza pepama amikago, ataloko áni goake gakó makó láa loko minamó nene ale utó ike gato kimimó:

<sup>18</sup> \* Guivahanímíni Sikalahulímo nenitoka holonetake, hoza gakó láa loko lonetamóma neve. Minimi limiki nia vegená nene gakó lamanáma lo kemezo. Kalapusi numukú nia vegená gológí oleketatove loko, itó kogómula lika vegená nene ale goloutoleketatove

\* 4:4: Gapo 8:3    \* 4:8: Gapo 6:13    \* 4:10: Age 91:11    \* 4:11: Age 91:12    \* 4:12: Gapo 6:16    \* 4:18: Isa 61:1-2

loko, itó muhelé ahelé iki minata vejená nene gologí oleketoko lekelémo molatove loko lo kemezo.

<sup>19</sup> Guivahanímo lekelémo lamaná iti gamena alitokave loko lo kemezo.

<sup>20</sup> Loko Izesú nene gatoko lo kemeake, pepama gakeko gelekelé vema goha ameake mitó minamó. Noigo, monó numukú mina vejená keza mukitoka aí gonú apíliki niago,

<sup>21</sup> gakó láa loko lo kimimó: Monó gotola gakó gatokugo gelemómámini gihila itínasa nenitoka utó okave.

<sup>22</sup> Loko lokago, keza giní i amiake, aí agepagutí gakó gilikago laga kivisimó. Lá okago, keza sigaga lake lamó: Eza nene hanuva ániagonouhá ve Zoseheni gípala nenazo, nenémini gakó nana oake nolive.

<sup>23</sup> Líki líkago, eza láa loko lo kimimó: Anozá gakó makó láa líki líaká niave: Lusa ve gezaka haitó vejená kelémo vatí aní netá aleko gezaka vejenaka zuha kelémo lamaná amane. Neza nagata gulumó lekeza ámina anozá gakó vasá zeke lí nímíiki, Kapanao numutoka hoza aleko gakoláa gulunimómáminoko imane gotó numukaloka alekako ániगतune líki lí nimitaze.

<sup>24</sup> \* Loko loake, miní ameko láa loko limó: Neza lamaná lo likimitoze, gíliilo. Ómasímini agepagutí gakó loaká vémo ezáa gotó apalaloka voko monó lo kemekago eza lelí gípate noive líki gakola gílísá amave.

<sup>25</sup> \* Nene sunimú gakó lamaná lo likimitove. Ilaizá eza monó hoza ali gamena nene okulumá gapo lí okago minake melekeni losive makolegí ikani 6-ía oko novigo golini zemimó. Golini zemigo gaúna gamena napa nene mukí apatoka utó imó. Ámina gamenaló nene Isilae mikasiuka gevoná vená mukí minamóza,

<sup>26</sup> \* Ómasímo Ilaizani nene ámina vená keitoka kelémo vatí itive loko amiselemive. Sítona mikasiuka Salepata apatoka Zuta vená negopa hetoka gevoná vená makó noitoka alémo vatí itive loko amisilimó.

<sup>27</sup> \* Itó Ómasímini agepagutí gakó loaká ve Elisá hoza ali gamena nene Isilae mikasiuka halamé gizale ve mukí minamóza, Elisá keikutí kelémo zokamike Silia mikasiuka hetoka ve makó Nemanigó alémo zokamó.

<sup>28</sup> Loko lo kemekago, ámina gakó giliake, Ómasímo lezagí ahuloletati gakó lokave líki giliake monó numukú mina vejená keza mulúikú golesa giliake, kizapaló goha molokago,

<sup>29</sup> zaú iki otiake númereloka Izesuni alímiki vake ámina apá mina agoka lusenaló agataloka ahelú i ahulanigí alímiki iteha,

<sup>30</sup> áisi nene ahulukimiake holúikutí hanuva vimó.

*Holosi golesa agikagú mina ve*

*(Mak 1:21-28)*

<sup>31</sup> Lá oake Izesú nene Galiláia mikasiuka lemeake, Kapanao numutoka anitike holisigú holisigú nene monó lo kemeko minamó.

<sup>32</sup> \* Lá noigo, monó gakola gale geheko lo kemeaká imó nenazo, nenemú keza ininá iki sigaga litamó.

<sup>33</sup> Lá niago, keí monó numukú nene ve makó minamó nene holosi makolímó agikagú minake alémo gopa okago minamó nenémo gamoga geko láa loko limó:

<sup>34</sup> Eé, Nasalete ve Izesuvo, nana netá golesa aleletanogo noane. Lelémo golesa inogo noape. Geí nene ángo hehe noluve. Geza Ómasilokatí etó keké vizeko noani vema noane.

<sup>35</sup> Loko lokago, Izesú gahá amike gegepa apizeoko legesó oko agikagutí lemeko vamane. Loko lokago, holosi nenémo vejená holúikú ámina vema nene ahelú okago puu loko akamóza, alémo golesa amike ahulomiake vimó.

<sup>36</sup> Lá okago keza vejená mukitoka ininá ake ligili hagili ake láa líki lamó: Nana ive. Monola nene haitolímíni neve. Áisi gakola gale geheko aí amuzatunú lokimiaká noigo holosi golesate ahulikimiaká niave.

<sup>37</sup> Líki líkago, Izesunimú gakó nene ámina apá helega helega puu loko vo asú imó.

*Izesú Pitani venalámíni izolahíni alémo zokamó*

*(Mat 8:14-15; Mak 1:29-31)*

<sup>38</sup> Lá okago, Izesú nene monó numukutíma lemeake Saimoní numukú itimó. Neneló Saimoní venalámíni izolahíni agupegú ló napa lo minokago, alémo zokative líki lí amemó.

<sup>39</sup> Lí amikago, áisi voko alitó oteneike agupegú ló la netáma nene gahá amekago agupegú ló la netáma asú otamó. Asú omikago, ámina venalímó litá oko oteake Izesugini nasahílí oketamó.

*Izesú únaká vešená mukí kelémo zokamó*

*(Mat 8:16-17; Mak 1:32-34)*

<sup>40</sup> Únaká ho nolimigo, haitopaitó netá kivisi vešená kilímiki Izesú noitoka ikago, agizani-tunú kugupeló ale geleko kelémo zokamó.

<sup>41</sup> Itó vešenalitiní kigikagú holosi golesa minamó nene kepeleko nokimisiligo, gopaga lake geza Ómasímni gipala noane. Liake ahulikimiake vamó. Nivago, keza Izesukumú Ómasímo gologí oletative loko lo mololeta vema noive liki gelemó nenazo, Izesú nene gahá nokimike aí mogona lili ali amitave loko lo hukoketamó.

*Izesú monó lo keme keme oko mohona oko vimó*

*(Mak 1:35-39)*

<sup>42</sup> Neteká ho noitigo, Izesú eza numuni apakutí lemeake voko mikasi amegesa vizitoka minoko numuna linogo voko minamó. Noigo, vešená keza aikumú vitagá iki iki alími utó iake, ahuloketamitive liki lamóza,

<sup>43</sup> eza láa loko lo kimike limó: Neza nene apá lugaloka mohona oko Ómasímni gasovaló minoakalímni gakó lamaná lo keme keme inogo uve. Ámina hoza alitane loko Ómasímo nimiseleneimóma neve.

<sup>44</sup> Loko loake, vike Zutaia mikasiuka monó numuni minakú minakú iteko monó lo keme keme oko mohona imó.

## 5

*Izesú litó lagaha mukí alemó*

*(Mat 4:18-22; Mak 1:16-20)*

<sup>1</sup> \* Gamena makó zupa Izesú eza Genesalete nonohuló agataloka noigo, vešená keza Ómasímni gako gilítune liki ali nupa iake aitoka sii sii liki minikago,

<sup>2</sup> lagaha aliaká ve makó nene nagamikú lapéinigitú limiake, lagaha gotaháinima nagamí nizego, itó sipi lositá nene nagamikú ha nego,

<sup>3</sup> Izesú nene ángoake magáa Saimoni nagamikú lape minakú iteake, nagamí getatokatí hilulú oloko koma vitane loko loká imó. Gele amekago sipigú minake mukí ali nupa a vešenáma monó lo kimimó.

<sup>4</sup> Lo keme asú oake Saimoni láa loko lo amimó: Hilulú oloko voko nagamí ohunágú molo-minoko nene gigivekagegi lagaha alinigi niaze, gotahalini nene ohunagú ahulalo.

<sup>5</sup> \* Loko lokago, Saimon Pitá nene anotó aleko láa loko lo amimó: Gizapa velemaka, leza itína holugúnaka gotaha ova ova oko minuháza, lagaha hamolagi ma alemune. Lá unimóza, geza lanimómave loko nene lagaha gotaha nene goha nagamí ohukú ahulatune.

<sup>6</sup> Loko lo ameeke, aliki viki gotahama ahulake lagaha mukí nalego, lagaha gotaháini nene zeko hukanogo noigo,

<sup>7</sup> kigive lugáa sipi makokú minamoláama iki kilími vatí itave liki kigizani gumí zi kimiki sele lamó. Lá ikago, keza ake sipi lositámagú lagaha ali nimilago, lagaha vaf oake nagamikú lapema nene nagamikú liminogo imó.

<sup>8-9</sup> Lá noigo, Saimon Pitakí makó mina vešenaki keza lagaha mukí alekumú ángiiake sigaga lamó nenazo, Pitá eza Izesuni agisauka gupá zeko lo amike Guivahanínemaka, neza lihímánegi ve nounazo, ahulonimioko vozo.

<sup>10</sup> Loko noligo Zepetaioni gipala losi Zemusiko Zoniko keza Saimoni agivelahiko nene-tosa ámináminiki sigaga lasimó. Sigaga nilasigo, Izesú nene Saimoni láa loko lo amimó: Geza gehelele vizemino. Itína imanémni veletó nene geza monó hoza aleloko novako mukí vešená nene není zuha líli itave.

<sup>11</sup> Loko lokago, nagamikutí lapéinima aliliki getatoka vake nene, mukí netá matáini ahuliake Izesuni ámegetiki vamó.

*Izesú lokago halamé gizali ve gililimó*

*(Mat 8:1-4; Mak 1:40-45)*

<sup>12</sup> Izesú nene apá napa makotoka voko noigo, halamé agupeló vaí oko gizali ve makó noiike, Izesuni ángoake vike agisauka gupá ze ameeke negénegeka like láa loko limó: Guivahanínemaka geza nene nelémo gililitove loko nene hanuva nelémo gililitanimó nenazo, nelémo gililitane loko noluve.

<sup>13</sup> Loko lokago, Izesú nene agizani lutoko agupeló ale nogilike gililitane loko gelekuze, gilelezo. Loko lokago, litá oko gililimó.

<sup>14</sup> \* Lá okago, ámina gako nene aveté oko vešená aveté oko lo kememitive loko lo hukomiake láa loko limó: Aló gilelekane liki gili hee litave loko geza nene voko guguni

gizoaká vémitokama gugupe alapizekako ángative. Itó gílelenikumú nene Mosé loleketa netá aleko Ómasi guguni gizo amítive loko amekako eza vejená mukí lo kemekiko nenémini mogona gíli vevesatave.

<sup>15</sup> Loko limóza, aí gakoaláa nene puu loko vokago, mukí vejenalite gili asú iake Izesuni gako gilitune liki itó kivisi netakutí kelémo zokative liki Izesú noitoka alegesá iaká amóza,

<sup>16</sup> eza mikasi gomopalaló voko minake Ómasiloka linogo voaká imó.

*Izesú ve gepili alémo zokamó*

*(Mat 9:1-18; Mak 2:1-12)*

<sup>17</sup> Gamena makó zupa Izesú eza monó gako lainim-oketoko noigo Palisaio monó vejenaki monó mogona apí ikimiaká vegi keza Galilaia apatotí itó Zelusalegatí itó Zutaia apá makotokatí nene mukí numutotí iki neneló ali nupa amó. Lá niago Izesú nene kivisi vejená kelémo zokati zámuzagi minató minamó.

<sup>18</sup> Lá noigo ukoakoló zaló mililiki a ve gepili makó nene alímiki iake Izesuni agisauka ahulitanigi niago,

<sup>19</sup> vejená mukí gíki iake gapo hizi lí ikago, alímiki numupitó itiake ali koló iake, ukoakogi nagá ziake ahulikago vejenalitiní holúikú limike Izesuni avogisaloka lemekago,

<sup>20</sup> Izesú nene ángoake gíli alévolé amó nenémini mogonáa ángigoko geleake, ve gepilima láa loko lo amimó: Vémage, lihimaka ahulogimikuve.

<sup>21</sup> Loko lokago monó mogona apí-ikimiaká vegi Palisaio monó vegi keza kagata gululusi giliake kezátoka láa liki ligili hagili amó: Makó éaho lihima gilatoaká noive. Ómasímo hamokó lá oaká noinazo, ezáa agupevamú giligo itekago, Ómasi aviliginogo limó nene etamive.

<sup>22</sup> Liki kigikatunú nigelego, Izesú nene Zuta vejenalite lihimate ahulolimiaká itó vejená kelémo zokoaká nene Ómasímogó loló oaká netá neve liki gilinave loko geleake láa loko lo kimimó: Lekeza likigikauka nanamú láa liki nigeleve.

<sup>23</sup> Ve makolímo Ómasi noamitimó nene lihimaka gilatogimikuve loko vávani oko lamitimóza, kelémo zokoaká zámuzagi ve noamitimó nene gako lokiko gihila zemitihé loko ve gepili makó nene oteoko vozo loko litá oko lo ameminogo ive.

<sup>24</sup> Lá onóimóza, okulumakutí lumu ve gihila neza mikasigú lihima gilatoaká zámuzagó negopa, lihimatini ale ahulolikimiaká zámuzáa nenitoka neve. Loko loake nenémini mogonáa gili hee hee litave loko ve gepilima lo amike nene láa loko nologetuve: Otekoko ukoakoka gehéko numukaloka vozo.

<sup>25</sup> Loko lokago, mukí vejenalitiní kogómulaló nene litá oko oteake ukoakova ale gehéko numunaloka vike Ómasímini agulizá ale oteko minamó.

<sup>26</sup> Lá noigo, vejená mukilité sigaga liake Ómasi agepoka lake mulúini otopá nizigo itínasa haitolímíni suni ángigokune, liki lamó.

*Izesú Livaini sele lo amimó*

*(Mat 9:9-13; Mak 2:13-17)*

<sup>27</sup> Alike Izesú lemeake novike takisi aleaká ve makó agulizá Livaí áisi nene hoza aleaká numunauka noigo ángoake geza nene némegetoko ano.

<sup>28</sup> Loko sele lo amekago Livaí nene netá mukí ahuloake ámegetoko vimó.

<sup>29</sup> Makó vasike Livaini numukú nosáneté napa Izesuni vatá omikago, takisi aliaká vegi ve makoki keza mukitó namó.

<sup>30</sup> \* Ninago, Palisaio monó vegi monó mogona apí-ikimiaká vegi keza Izesuni izegipala zuhamú gili golesa niake láa liki lí kememó: Lekeza nene takisi aliaká vegi netá golesa aliaká vejená makoki nanamú makó miniki nosáneté ninave.

<sup>31</sup> Liki likago, Izesú geleake láa loko lo kimimó: Hanuva lamaná iki mina vejenalite lusa vemú sele lisá amave. Kivisi vejenalitegó lusa vemú sele liaká niave.

<sup>32</sup> Neza hee loko nune liki liaká nia vejená kelémo otopá zitove loko lemumómá neve. Neza lihimáinigi vejená kigika ali viligatave loko kelémo otopá zinogo lumumómá nene, loko limó.

*Nosáneté mosiakakumú loká itamó*

*(Mat 9:14-17; Mak 2:18-22)*

<sup>33</sup> Lá okago, keza láa liki lí amemó: Zonini izegipala zuha keza gamena mukí monokumule liki nosáneté mosé mosé iki Ómasiloka liaká niave. Itó Palisaio monó vetini izegipáini zuha keza ámina suni aliaká niamóza, geí izegipaka zuha keza nosáneté gopa aliki niaká niamó nene nanamú niave.

\* 5:30: Luk 15:1-2

<sup>34</sup> Liki likago, Izesú anoza gakó láa loko lo kimimó: Vená ali amita ve ezagi agivelagegi apiziki niminiko ve makolímo nosánetá moseketatimó nehe. Lá aminogo ive.

<sup>35</sup> Gala vete vená ali amita vema kizizakutí ipá ita gamena alitokiko, nene zupa miluma nigiliki nosánetá mosinigave. Ámináminiki izegipáne zuhate alika nenikumú miluma giliki mosé mosé inigave. Itína lá oko nomive.

<sup>36</sup> Loko loake, miní ameko anoza gakó makó láa loko lo kimimó: Lavolavo gó nene litaha looko hukokiko nene, gosohá gó makó hukiiki litaha gotó molo apizeko akotoakaláa nomive. Nagamí zikiko gikí okiko lavolavo gó gosohá hukokiko gosohá lavolavo gó nenémo litaha lavolavo gotó haitolíminoko minanogo ive.

<sup>37</sup> Itó vain nagamí nene gituhú galakalá noigo nene nagamí getununi litahagú ligi milisá amave. Vain nagamí nenémo gituhú galakalá nooko giputooko litaha getununi zeko ategekiko vain nagamiki nagamí getununigi latila okatinazo,

<sup>38</sup> vain nagamí gituhú galakalá noimó nene goní getununi gosohakukó leke moloaká nounge.

<sup>39</sup> Itó ve makolímohe makolímohe vain nagamí litahagó noaká noike, áminamú laga avisekago gosohá vain nagamí natove loko gelesá amive. Litaha vain nagamí nene vatí oko neve loko loaká noive. Loko limó nene litaha monó sunímuni amupiló nene ezáa gosohá monó molo apizesá nene etamive loko anoza gakó limó.

## 6

*Holisigú Izesuni vegenala zuhate kilé hisiki nimi vamó*

*(Mat 12:1-8; Mak 2:23-28)*

<sup>1</sup> \* Holisi gamena makokú nene Izesú eza izegipala zuhagi kilé mikú mihina niake, izegipala zuhate kiléma akutiake gihiláa kigizanitunú hisiki nimi vamó.

<sup>2</sup> Lá niago, Palisaio monó ve lugáate ániagiake gili golesa ake láa liki lamó: Holisi game-nagúma nenazo, hoza nalemó nene netá golesa líli niave. Lá amoakalímuni nene nanamú naleve.

<sup>3</sup> \* Liki likago, Ómasímo vegenala zuhate netakumú vitagá niko ezáa lo huka gakó nene hanuva molo gaheva itimó neve liki gilitave loko Izesú láa loko lo kimike limó: Gozapá agulizaki ve napa Tevitige vegenala zuhagi nosánetakumú gaúna hiliake netá makó alemó nene lekeza gakó gatinamóza, mogona gelemiki nilahe.

<sup>4</sup> \* Tevití eza Ómasímuni monó numukú itekago guguni gizoaká ve napámo Ómasímuni avogisaló mila peletima ameko ezagi makó mina vegená kimigo namóma neve. Ámina peleti nene hanuva vegenalite namitave liki guguni giziaká vetegó natave liki alévolé iki lí hutinamóza ámina gamena nene hanuva vegenalite gopa namó neve.

<sup>5</sup> Loko loake, Izesú miní ameko láa loko lo kimimó: Okulumakutí lumu ve gihila neza holisi amelahina nounazo, izegipáne zuhate holisi gamenagú líli ita netá nene není netale, loko limó.

*Agizani nakeseta ve alémo lamaná imó*

*(Mat 12:9-14; Mak 3:1-6)*

<sup>6</sup> Holisi makokú Izesú nene monó numukú iteko monó lainim-oketoko noigo, agizani zamagaloka nakeseta ve makó minamó.

<sup>7</sup> Noigo, monó mogona apí-ikimiaká vegi Palisaio monó vegi keza ámina vema alémo lamaná okikoma imane holisimagú nenazo, goní otatunize liake, gizapa iki minamó.

<sup>8</sup> Lá iki kagata gelemoláa nene Izesú ániagoake, agizani nakeseta vema otekoko holutegú ote minozo loko lo amekago, eza oteake áminaló ote minamó.

<sup>9</sup> Lá oko oteneigo, Izesú láa loko lo kimimó: Netá makokumú loká oleketatoze. Holisigú nene netá lamaná alesatímo etatihe netá golesa alesatímo etative. Vegená kelémo lamaná osatímo nehe kepele helesatímo nene neve.

<sup>10</sup> Loko loake, vegená mukí gonú nokipilike agizani nakeseta ve nene gigizani lutozo loko lo amekago, agizani lutokago, goha lamaná imó.

<sup>11</sup> Lá imóza, monó mogona apí-ikimiaká vegi Palisaio monó vegi keza kizapaló molokago Izesuni nana otatune liki ligili hagili amó.

*Izesú izegipala 12 kelémo molamó*

*(Mat 10:1-4; Mak 3:13-19)*

<sup>12</sup> Gamena nene zupa Izesú nene Ómasiloka linogo agokaú itimó. Itike Ómasiloka loko minova minova noigo gó lamó.

<sup>13</sup> Gó lokago, ho noitigo, izegipala zuhama sele lo kemekago, ikago, keikutí ve 12 kelémo etó oake, kugulizá nene aposolo veve loko molamó.

<sup>14</sup> Keza lá iki minamó: Kugulizá Saimon agulizá gosohá Pitá ave loko molamó, itó agunala Etulú, itó Zemusí, Zoní, Pilipó, Patolomaió,

<sup>15</sup> Mataiό, Tomasí, Alapaioni gipala Zemusí, itó Saimoná eza Loma gamani amisele ahulanagero i ve, itó Zemusí makolímuni gipala Zutá,

<sup>16</sup> itó Kaliotó numutotí ve Zutá eza minomo noitike Izesuni amimika li ve neve.

*Izesú vevená mukí nasahilí oketamó  
(Mat 4:23-25)*

<sup>17</sup> Izesú nene izegipala zuhagi limiake apá geleni makotó neneló viki niago, aí vevenala zuha makoki ve vená mukí Zelusalegati itó Zutaia apá makotokati itó age nagami gahevaloka nene Tulo itó Sitona apatoti keza Izesuni gakó gilitune liki itó kivisi vevená kelémo zokative liki neneló alegesá iki minamó.

<sup>18</sup> Niago, holosi golesa kigikagú mina vevená nene kelémo lamaná imó.

<sup>19</sup> Itó Izesuni aguveló alí gilikago aí agupegutí zámuza nenémo netá kivisi vevenáma kelémo zoko asú imó nenazo, alegesá iki mina vevená mukilite ligizani lutoko aguveló ale gilitunitimo lelémo zokative liki gelemó.

*Okulumakú mututoni itó meikú mututoni nenémini gakola  
(Mat 5:1-12)*

<sup>20</sup> Lá ikago, Izesú nene izegipala zuhama gonukonú kepeleake láa loko limó: Lekeza gohogó vevená neneta, Ómasímuni lapaná ali lá itamó nenazo, lokogoliza nivizemó geleaká noive.

<sup>21</sup> Lekeza netá lamanakumú likivisigo mina vevená neneta, netá lamanalímo likigikagú vai itimó nenazo, lokogoliza nivizemó geleaká noive. Lekeza ive nama iki nimina vevená neneta, lekeza giza zohí itamó nenazo, lokogoliza nivizemó geleaká noive.

<sup>22</sup> \* Okulumakutí lumu ve gihila nenikumule liki vevená makolite mukahá likipiliiki visililikimíiki lekelikumú alivi letivi iiki vevená golesave liki lukugulizatini ali ahulatamó nene, lokogoliza vizitave lokogó gelenouve.

<sup>23</sup> \* Lá nilikitikoma likigisa ziki minikí lokogoliza viziki gozapá avóike keza Ómasímuni agepagutí gakó liaká a ve ámina iki lilí ikimikago Ómasímo meinava napa kimimó nenazo, okulumakú meinavatini sipisi netimó neve liki gililo.

<sup>24</sup> Lekeza henotiki vevená neneta, lekeza ehe tináneve. Lokogoliza viziki iki miliki amó mota asú okave.

<sup>25</sup> Lekeza niki lakagatupa iki nia vevenalita, ehe tináneve. Alika gaúna hilinigave. Lekeza giza zohí iki nia vevená neneta, ehe tináneve. Alika lekeza miluma giliki ive inigave.

<sup>26</sup> Lekeza vevená mukilite lukugulizá ali otiaká niamó neneta, ehe tináneve. Avóike ámináminiki soza monó lilí ali vetini kugulizá ali otiaká amóma nemóza, Ómasímo ámináminoko keikumú giligo itemimóma neve.

*Gala velini likigika kimilo  
(Mat 5:38-48)*

<sup>27</sup> Lá onóimóza, neni gakó nigele vevenáise gakó lo likimitoze, gililo. Lekeza gala velini nene likigika kimiiki nasahilí ikitalo. Vaika likamita vevená nene kilími lamaná ilo.

<sup>28</sup> Lekelikumú alivi letivi nia vevená nene nónohá zikitalo. Gopoguni mililikitata vevenakumú numuna lilo.

<sup>29</sup> Ve makolímó agizanitunú nene gagamipaló helegaloka zekikoma, helegaloka gipilitive loko velegepá ze amezo. Ve makolímó geí hepé goka ipá oko aleko novikoma, geí sioti aleko amanapa amo. Nenege aleko vitize.

<sup>30</sup> Itó ve makolímó geí netakumú voká litimó nene hanuva amezo. Itó ve makolímó geí netá aleko vitove lokikoma hanuva amekako aleko vokíko goha ale nimitive loko voká lamó.

<sup>31</sup> \* Lekeza vevená makolite némini manámini suni lilí ilitatave liki giliaká nia netá nene lilí ikitalo.

<sup>32</sup> Vevená golesate kigika limiaká nia vevená nene ligika kimitune liki liaká nianazo, ámináminiki kigika likimiaká nia vevenakó likigika kimitamó nene, Ómasímo lekegepoka lamitive. Vevená golesate kezagi ámináminiki kigika limiaká nia vevená nene ligika kimitune liki liaká niave.



<sup>33</sup> Lekeza netá lamaná lilí ilikimiaká nia vejenakó nene pekimi iki netá lamaná lilí ikitatámó nene, Ómasímo lekegepoka lamitive. Vegená golesate kezagi ámina suni aliaká niave.

<sup>34</sup> Lekeza vejená makolite netá makó limitave liki giliiki netá makó kimitámó nene Ómasímo lekegepoka lamitive. Vegená golesate alika keza ámináminiki limitave liki ve golesa makó nene moni kimiaká niave.

<sup>35</sup> Lá niamóza, lekelisi gala velini likigika kimiiki netá lamaná lilí ikitiki goha limitave liki gelemiki hagitana kimilo. Lá ikiko, alika nene meinavatini napa iteko neiko, lekeza okulumakuka Ómasímini izegipa lamaná minatave. Ómasi eza agepoka lama vejenaki vejená golesagi hanuva muluna moloketake lehizekimiaká noive.

<sup>36</sup> Lekeza lá iki ametipo miluma gelekikimiaká noimómámini iki vejenakumú miluma gilikitálo.

*Numuni lapusámini anoza gakola*

*(Mat 7:1-5)*

<sup>37</sup> Lekeza nene vejenalitini mognataganamú lotuva legemilo. Lá niko Ómasímo lekelí mognataganamú lotuva legeminogo ive. Lekeza vejenalitini lihimamú gakó li hukikítamilo. Lá niko Ómasímo lekelí lihimamú gakó lo hukoleketaminogo ive. Lekeza vejenalitini lihima ahulikitatámó nene, Ómasímo ámina oko lihimatini ahuloleketanogo ive.

<sup>38</sup> Lekeza vejenalititoka iki miliki ita polosava nene Ómasímo ámináminoko lekelitoka oko moloko inogo ive. Ómasímo lamaná oko likigikagú lehizelikimioko mí zeko hilulú oko nogúeko goha guítimó nene velemó zesá oko minanogo ive. Lekeza gona miliki kimiaká niamómámini avotigila oko Ómasímo ámináminoko gona moloko likiminogo ive.

<sup>39</sup> \* Loko loake, miní ameko netá golesáinimú anoza gakó makó láa loko lo kimimó: Agómula lilikupá mola ve makolímó agómula mola ve makó nene gapo alapizitihe. Óe, lá oko nomive. Ve lilikupá losi nenetosa eza agizató aliko eza agizató aliko vitáimó nene lositáma galegú hlanigasive.

<sup>40</sup> \* Itó sukulu izegipa makolímó litá oko tisala avilegemitive. Alike sukulu loloko voko gele asú okoko tisala nenéminoko minanogo ive.

<sup>41</sup> Geza gigivekahini agómulagú gilisá onoive loko lanimóza, gezaka gogómulagú za lana vonoimó nene nanamú ániño lamaná amoko lane.

<sup>42</sup> Gezaka gogómulagú za lana vonoimó ha nego ániñgamanimó nenazo, géisi nene nigivénega, gogómulagú gilisá vonoimó nene ale ahulogetatove loko nanamú nolane. Geza sozaló ve genezaka losi minamó neneka, gezaka gogómulagú za lana nemó nene gof oko ale ahulooko gogómulatunú ániño vevesooko alika nene gigivekahini agómulagú gilisá onoimó nene ale ahulotatanimó nene etanogo ive.

*Gihila golesa lamaná zeaká nenémini mogona*

*(Mat 7:17-20; 12:33-35)*

<sup>43</sup> Itó za lamaná makolímó gihila golesa zeminogo ive. Itó za golesa makolímó gihila lamaná zeminogo ive.

<sup>44</sup> Za gihilámámo ámina zámini lamaná imoláahe golesa imoláahe ale utó oaká noive. Hilipa nenémo gizasi apelekiko hukiki natahe. Itó gumené nenémo loisi apelekiko akutiki natahe. Lá oko nomive.

<sup>45</sup> Ámináminoko ve lamanalitini kigikagú netá lamaná minatimó nenazo, kigikagutí vatí sunigó ititimó neve. Ámináminigó oko ve golesatini kigikagutí nene golesa sunigó ititimó neve. Ligikagú vaí o minakutí legepagutí loaká nouné.

*Numuni lukesavámini anoza gakola*

*(Mat 7:24-27)*

<sup>46</sup> Lekeza nenikumú Guivahaniteve Guivahaniteve liaká niamó neneta není gakó nene nanamú ámegetisá amave.

<sup>47</sup> Nenitoka iake není gakó gili aliaká nia vejenalitini mognamú lo likimitoze.

<sup>48</sup> Ve makolímó numuni ginogo gale hána legeake gehani amupiló lapusa hizeake, numuni gekago, golini zike nagamí napa veleko una napa nenémo ake numunima ahelú imóza, numuni nene geható ginazo, mómoká amike alévolé oko minamó.

<sup>49</sup> Nenéminiki niamóza, ve makolite není gakó giliakaláa giliake není gakó gili alisá amave. Keza nenéminiki niave. Ve makolímó numuni ginogo lapusa hizemoko mikasi veletó soza moloko numuni gekago, alika nagamí veleko una napa nenémo ake ahelú okago, numunima litá oko lemeko pou loko akamó.

\* 6:39: Mat 15:14

\* 6:40: Mat 10:24-25; Zon 13:16

## 7

*Izesú ami gízapa vémini gelekelé veva alémo zokamó*  
(Mat 8:5-13)

<sup>1</sup> Izesú eza monó gakóma neneló lo keme asú oake Kapanao numutoka vimó.

<sup>2</sup> Neneló Loma apatotí ami vetini gízapa ve makolímíni gelekelé veva netá napa gízaleake helesakosá oko noigo, gízapa vevámo izegipalamú nene amekumú izegipala nenazo,

<sup>3</sup> Izesuni gakoaláa geleake, Zuta vetini ve uvóipini makó nokimisilike Izesuni li amikiko okoko není gelekelé izegipa nene avisi netáma alémo zokatíhe líki víki loká ilo loko loketamó.

<sup>4</sup> Lokimiake kimiselekago, keza Izesutoka víki anitiake amuza miliki láa líki li amemó: Lelí lova vetémíni gízapa vema oko moloko noimó nene lamaná noive.

<sup>5</sup> Eza nene agikáa nene leza Zuta vegená lemeaká noive. Itó monó numute utó itive loko nene moni napa molokago, akohekago, gilitamóma neve. Lá oaká noi vema nenazo, gakola gele amitanimó nene vevesanogo ive.

<sup>6</sup> Líki li amikago, Izesú geleake kezagi makó vamó. Víki numu ávatíha víkago, lova gízapa ve nenémo agive makó nene Izesutoka nokimisilike gakó láa loko kimiselekago vamó: Guivahanínemaka, neza ánéáminaloka goselé gapo okoko numúnégú nanamú itítane. Áminaló mínozo.

<sup>7</sup> Nezanémú gulumó vevesamigo, geitoka vamuve. Nenemú gezama hanuva neneló nooko gegapatunú lokako gelekelé izegipáne zokative.

<sup>8</sup> Neza ámináminoko kugulizaki vetíni gelekeleláa nouve. Itó ami ve makó nene není gízapaló niave. Lá niago keitokatí makokumú vozo lomíkugo hanuva vínogo ive. Itó makokumú ano lomíkugo nene hanuva anogo ive. Itó gelekelé izegipánemú nene voko hoza alezo litomó nene hanuva voko hoza alinogo ive. Nenémínoko geí gakó nene alévolé onoinazo, hanuva áminaló minoko gakó lokako avisi netá zokative loko lunaee.

<sup>9</sup> Líki li amikago, Izesú nene ámina gakó geleake, ámina ami vetíni gízapa vema sigaga lotake míno viligoake, ámegetiki va vegená láa loko lo kimimó: Neza lamaná lo likimitoze, gililo. Isílae vegená lekezalokatí gele alévolé oaká nenémínáa makó ániogoko gelesá onamumóma neve.

<sup>10</sup> Loko lokago, ami gízapa vémo kimisili vegená atiginá iki numutoka vake ámina vémini gelekelé ve ániagamó nene zokoake noigo ániagamó neve.

*Izesú Naino numutoka gohuna venalímíni gípa heleneikutí alémo otimó*

<sup>11</sup> Lá okago, Izesú míno hána amíke apá makó agulizá Naino neneloka izegipala zuhagi nívogo vegená mukí kémegetiki vamó.

<sup>12</sup> Víki numu gatetó nanítego gonosi makó zaló miliki alíki lemémó nene, gevoná vená makolímíni gípala hámakó minamó nene helekago, gale zínigi numutotí ve vená mukí nílemego,

<sup>13</sup> Guivahanímó gevoná venáma ániogoake muluna githíná okago ive amo loko loake

<sup>14</sup> víke ukoakoló ale gilimó. Ale gelekago, gíhiake otinago, Izesú gípa geza otítane loko noluze, otemane loko lokago,

<sup>15</sup> helenei netalímó oteake gakó akó limó. Noligo, Izesú nene izolahíki goha minatáive loko lotamó.

<sup>16</sup> Lomíkago vegená keza ániaga netakumú kelegesá goha legekago, Ómasi agepoka lake Ómasímíni agepagutí gakó loaká ve napa nene holutejú utó oko noive líki líkago, lugáate Ómasímó vegenala zuha lelémó vatí inogo ve imane amiselekago okave.

<sup>17</sup> Líki líkago aikumú gakoaláa nenémo Zutaia mikasiuka itó mikasi helega helegaloka voko oko imó.

*Zoní ve lositá kimiselekago Izesutoka vasimó*  
(Mat 11:2-19)

<sup>18</sup> Zoní nene nagá numukú noigo, izegipala zuhate Izesú oko moloko i gakola aveté iki li amikago,

<sup>19</sup> ámina gakó geleake, Izesukumú ágata losi geleake, keikutí ve lositá alesá moloake Guivahaníma láa líki loká itáive loko kimisilimó: Utó itive líki monó gotolaú luhuva giza vema nene géisi noape itó alíka makó utó itikumú ageva itune, líki lílizo loko kimiselekago,

<sup>20</sup> ámina ve keza Izesutoka víki lasimó: Monó nagamí holokimiaká ve Zoníma gologí oletative loko lo mololeta ve ative líki li mílamóma géisi nene noape, itó makokumú ageva itune líki loká ilizo loko limiselekago nousive.

<sup>21</sup> Líki líkasigo, ámina zupama Izesú nene mukí kivisi vegená itó netá gízale vegená kelémó zokoká itó kígakagutí holosi golesa kepeleko kimiseleká itó kogómula líkamó ale pulusoketoká imó.

<sup>22</sup> \* Lá noigo, ve losima anitiki loká imikasigo Izesú nene ámina vema noive loko Zoní gilitive loko láa loko lo kimimó: Lekeza atiginá iki viki netá imane loló nougo ániigiki miliki asimó nenémini gakola aveté iki Zonini li amilizo: Kogómula lilikupá molamó nene kogómula ale hanatokimiaká noive. Kigisaló alimó nene ale lamaná okimiaká noive. Halamé gizalemó nene gililiaká niave. Kagata molamó nene kagata ale koló okago gakó giliaká niave. Lepa gonosi kelémo oteaká noive. Itó limiki minamó ámemena nenete není gakó lamaná giliaká niave.

<sup>23</sup> Lá onoinazo, makó keza není mogonomú kagata losipasi gelemitamó nenete kogoliza viziki minanigave liki li amilizo.

<sup>24</sup> Loko Zoní kimisili vema lo kemekago, atiginá iki nivasigo, Izesú vegená sii sii liki minamoláa Zonikumú láa loko lo kimimó: Lekeza Zoní noitoka mikasi gomopalaló vamó nene nanakitana vema ániganigi vamóma neve. Ve makó akepagitana oko hepelímo aleko mómoká noiko ániganigi vamóma nehe.

<sup>25</sup> Itó ve makó gonanalivagi gó ale akoloake noigo ániganigi vamóma nehe. Gilinahe. Luhuvagi gó ali akiliki miniaká nia ve keza kugulizaki vetini numuni napagú akiki otiki minake nosá hisugú viziaká niave.

<sup>26</sup> Lekeza Ómasímini agepagutí gakó loaká ve makó ániganigi vamóma neve, olo. Itó makó lo likimitoze, gililo. Lekeza ániigi mina vema Ómasímini agepagutí gakó liaká ve lugáa keikitana minamive. Eza haitolímínoko minokave.

<sup>27</sup> \* Monó gotolaú Ómasímo gakó makó láa loko limó nene láa liki luhuva gizinamóma neve:

Gililo. Není gakó lole ale ve makó amiselekugo, ale goí oko voko kigikagú hoza alitan-ímómámini gapoga vevegetanogo ive.

Loko li gakó nene Zonitoka vo alimó neve.

<sup>28</sup> Loko loake, láa loko limó: Neza lamaná lo likimitoze, gililo. Mikasiuka utó ina vegepakutí makolímó Zonini ma avilegesá amive. Lá onoi móza, Ómasímo gizapa okimiaká noi vegená limiki niamoláa kezagi gopa Zonini aviligítigí iki niave.

<sup>29</sup> \* Loko lokago, takisi aliaká nia vegi vegená lugáagi keza ámina gakó giliake Zonitokatí monó nagamí amunaloka emane hilinamó nenazo, Ómasímini gakó hizi lé ikago gihila zimóza,

<sup>30</sup> Palisaio monó vegi monó mogona apí ikimiaká a vegi keza nene Zonini monó nagamikumú goselé iake Ómasímo veleketá gapo nene ániigi ahulamó neve.

<sup>31</sup> Loko loake, Izesú makó láa loko limó: Oko moloko nougo ániigiaká nia vegená nene nanetató lo moloko lokugo vo guni itive. Hiláagitana niave.

<sup>32</sup> Keza gili goselé iaká nia izegipagitana niave. Izegipa keza alegesá apatoka minake izegipa lugáama sele liki leza nama luható nene nanamú nama lisá amave. Itó helegaloka nene ive nama luható nene nanamú ive nama isá amave liki li kimiaká niave.

<sup>33</sup> Itó nezagi Zonímagi ámináminoko nousigo goselé lekepeleaká noive. Monó nagamí holokimiaká ve Zoní eza apí oko hozaváa nalike iza goula nosá zahí nagamí lamaná namike etó oko molokago lekeza ániigiake holosi makolímó agika ale gopa okago noive liki lamó.

<sup>34</sup> Itó okulumakutí lumu ve gihila neza lemeko iza goula zahí nagamí nosánetá lamaná noaká nougo ániigiake ve imane ániigalo. Áisi nene gasova ve nagamító ve eza nene takisi aliaká ve itó ániigo goselé oaká nouhá vegená makolitini zogonini noive liki liaká niave.

<sup>35</sup> Láa nilamóza, Ómasímo gele guni oko netá matá aleaká noimó nene vevesokogó minoaká noigo, izegipala zuha keza nenémini mogona ali utó iaká niave, loko limó.

*Izesú eza Palisaio monó ve Saimonani numukú minamó*

<sup>36</sup> Palisaio monó ve makolímó nosánetá natane loko Izesuni alesa molo amekago, numu-nagú itiki nosánetá niki minasimó.

<sup>37</sup> \* Ámina apatotí mokoló vená makolímó Izesú eza Palisaio monó vemámini numukú iteko noive liki lamóma geleake, anuva hilina gehanigitana gonigú minamó nene aleko iteko,

<sup>38</sup> amegesaloka noike ive noigo, agómula nogoza nene Izesuni agisaló lemekago, gotola zopovatunú nene agisa gilatotamó. Gilatomiake, Izesuni agisa nene agoka legeko nonake, anuvavagi meseme nene agisaló holotamó.

<sup>39</sup> Holomikago, Izesuni alesa molo ami ve nenémo ániigoake, agikatunú láa loko gilimó: Imane Izesuni agupeló ale nogili vená nenémo golesa netató vená noive. Izesú eza ató imane Ómasímini agepagutí gakó loaká ve minalina, ámina venalímíni mogonomú nene moko mogonaló venale loko gililíne.

\* 7:22: Isa 35:5-6; Isa 61:1

\* 7:27: Mal 3:1

\* 7:29: Mat 21:32; Luk 3:12

\* 7:37: Mat 26:7; Mak 14:3; Zon 12:3

<sup>40</sup> Loko agikatunú gelekago, Izesú nene Saimonao, neza gakó makó lo gimitoze loko lo amekago, tisánemaka, lokako gilitove.

<sup>41</sup> Loko lokago Izesú anoza gakó makó láa loko limó: Ve makolímo alikamule loko loake moni nene ve losi gutá kimimó. Makó nene 500 kina amimó, itó maga ve nene 50 kina amimó.

<sup>42</sup> Lá okago alika nene áminaló nene pekimitive liki monimú vitagá asimó nene nomigo, eza ahulalizo loko lokago, ali haha asimó. Keitokatí hilímo aikumú lagaváa napaló geleneitive.

<sup>43</sup> Loko lokago, Saimoná láa lo amimó: Nagata gulumó moni nekisala napaló ahulota ve nene neitive. Loko lokago, Izesú geza vatí oko lokane.

<sup>44</sup> Loko loake, venáma noitoka viligo moloake Saimonani láa loko lo amimó: Vená imane ángonape. Neza numukagú itekugo, géisi nigisa nigizani nagamí zito nagamí leke molonetamako, imane vená nenémo ive nogozatunú nigisaló holonimiake gotola zopovatunú nogilatonetave.

<sup>45</sup> Itó géisi leza Zuta vetini suni aleko nogoka negepa namanimóza, vená imanémó numukagú apí oko noitugo nigisáne amuza moloko agoka agepa nonave.

<sup>46</sup> Géisi oaká nouhá netá aleko gotónegú nene meseme holonetamanimóza, imane vená nenémo nigisáneló anuvavagi mesemetunú holonimikave.

<sup>47</sup> Neneló láa loko lo nogumuve. Imane vená eza nenikumú geleake nasahilí napa onimikago lihimala mukí ahulomikuve. Makó eza lihimavala koma ahulomikiko noitítimo nene lihimavala gilatota vema agika napa ameminogo ive.

<sup>48</sup> Loko loake, venáma láa loko lo amimó: Lihimaka ahulo asú ogimikuve.

<sup>49</sup> Loko lokago, ezagi nosá niki mina vejená keza kigikatunú láa liki lamó: Áisi haitolimínimo nolihé. Lihimavaka asú okave loko nolimó nene hí ve suka nolive.

<sup>50</sup> Liki nilago, Izesú nene venáma láa loko lo amimó: Nenikumú gele alévolé anítimo gelémo lamaná okaze, mulukagú hulu iko vozo, loko limó.

## 8

### *Izesugegi vená makó miniaká amó*

<sup>1</sup> Nene zupa velelaló nene Izesú eza apá koma napaló mohona ike vejená nene monó lo kemeko Ómasímíni gizapaló minoakalímíni gakó lamaná lo keme keme oko mohona imó. Mohona nóigo, ámegetiki mihina niamoláa nene izegipala zuha 12-a

<sup>2</sup> \* itó vená lugáa amunaló emane kigikagutí holosi kepeleko kimisilimoláa itó kivisekago niago kelémo zokamoláa keitokatí makó Maliá agulizá Magatalalo liki milamó, agikagutí holosi 7 kepeleko kimisili vená,

<sup>3</sup> itó makó agulizá Zoaná eza Heloteni hozaló gizapa ve Kuzani venala, itó Susaná itó vená lugáa keza moni henokanonigi miniake Izesugini nasahilí ikitiki minamó.

### *Zuha netá atilí oaká vemú anoza gakola*

*(Mat 13:1-9; Mak 4:1-9)*

<sup>4</sup> Numutó namató ve némitó ve Izesutoka vóvotiki alegesá iki minamó. Lá niago, ángoake anoza gakó makó láa loko lo kimimó:

<sup>5</sup> Zuha netá atilí oaká ve makolímo netá gihiláa atilí inogo vimó. Mikuka atilí omo novigo, gihila lugáa gapoló alemó zekago, vejenalite lisiki matelé zemó. Itó gaha namate ake ni asú amó.

<sup>6</sup> Itó gihila lugáa nene gehani amupiló lemeko minake, goloko iteakaláa itekamóza, mikasi nogoza minamigo osagava vizeake hilimó.

<sup>7</sup> Itó gihila lugáa nene lilihámíni luhusa nene mikasigú ha netó lemeko minake goloko itike liliha nenémo zemikago, nogotamó.

<sup>8</sup> Makó nene mikasi lamanakú lemeko minake goloake, gihila mukí zimó. Hamó zámo nene gihila 100 zimó. Loko lo asú oake, gakó napagutí láa loko limó: Lakagatagi minatamó neneta, gakó imane gili hee liki gililo, loko limó.

### *Zuha netakumú anoza gakolímini mogonáa*

*(Mat 13:10-23; Mak 4:10-20)*

<sup>9</sup> Loko lokago izegipala zuhate anoza li gakokumú loká itago,

<sup>10</sup> \* eza láa loko lo kimimó: Ómasímíni gasovaló minoakalímíni asuguná gakó lekeza gilitave loko lonoimóza, lugáa keza nene anoza gakokó gilitaze. Lá niiki netá matá kogómulatunú nene ángitamóza ángi vevesaminigave, itó kagatatunú gakoláagó gilitamóza, mogonáa gili vevesaminigave.

<sup>11</sup> Itó anoza gakó imane nolumó nenémini mognóá lá oko neve. Zuha netá gihiláa nene Ómasímini gakó neve.

<sup>12</sup> Gihiláa gapoló lemeko minamó nenéminiki minatamó keza monó gilitamó nene kigikagú limitimóza, áminasitó Satá nene gili alévolé ikiko Ómasímo kugutó vizekative loko aniteko ámina gakó nene ipá oko aleko voaká noive.

<sup>13</sup> Itó gihila lugáa gehani amupiló lemeko goloaká imó nenémini iki minatamó keza monó nigilikí laga kivisekago giliaká niamóza, kigikagú luhusáini alemigove liki gamena alínipa alinago gimínikú moloaká netá utó okago monóma ahuliaká niave.

<sup>14</sup> Gihila lugáa lilihagú lemeko minamó nenéminiki minatamó keza monó giliakaláa gilitamóza, kugupémini netakumú gelekeleláa miminiko, moni henokanonímini lagavámo kigikagú lemeake monóma zemikago, keitoka gihila utó oko guzá losá amive.

<sup>15</sup> Gihila lugáa mikasi lamanakú lemeko minamó nenéminiki minatamó keza monó giliiki kigika ali guni iiki legesó iki ali minikago, keitoka monolímímini gihila utó oaká noive.

*Liví legeakakumú anoza gakó*

*(Mak 4:21-25)*

<sup>16</sup> \* Hí vémo liví legeoko somotunú ze hitatimó neve, itó hí vémo legeoko sepekú lolosá gitimó neve. Lá oko nomive. Itita vejená nene hize hanatoketative loko legeoko holomaló molanogo ive.

<sup>17</sup> \* Ámináminoko Ómasímini asuguná onoi netá nene mino-loko voko tolova amitive. Minoko utó o asú inogo ive. Halá genei netá nemó nene ámina oko utó o asú okoko hitaminogo ive.

<sup>18</sup> \* Monó alínita vejená nene vatí iki gizapa iki ali minatamó nene Ómasímo goha miní ameko makó kimínogo ive. Itó makó keza monóma lamaná iki gizapa amitamó nenete alenoupe liki litamóza, goha ipá oko alekiko hanuva minatamó neve. Nenemú lekeza gakó imane nigilikí gili guni iki gilílo, loko limó.

*Izesuni izolahove agunamotamolave*

*(Mat 12:46-50; Mak 3:31-35)*

<sup>19</sup> Gamena makó nene mukí vejenalite Izesuni hizi vigiake niago, Izesuni izolage izegipa agunamotamolave ake vejenakumú olovó ziake miní hetó minamó.

<sup>20</sup> Lá niago, ve makolímó ángoake Izesuni nene izokage izegipa gugunamotamokama geí ánganigi amó nene hetoka niave.

<sup>21</sup> Loko lo amekago, Izesú nene vejenáma láa loko lo kimimó: Ómasímini gakó giliiki gili alitamó imanete není izónege izegipa nugunamotamóne niave, loko limó.

*Izesú lokago una napa ahulamó*

*(Mat 8:23-27; Mak 4:35-41)*

<sup>22</sup> Gamena makó zupa Izesú ave izegipala zuhagegi nagamikú lapegú ítemó. Itiake, Izesú nene nonohuló likeko vola helegaloka vítune loko lokago, giliake, vamó.

<sup>23</sup> Nivake, Izesú nene agómula ahíhí okago, avó akonoigo una napa nalike nonohulóma golesa oake valahuká nozike sipimámini agikagú lemeko vaí oake, nagamí nonohulukú hilisá amó.

<sup>24</sup> Lá niake, Izesuni alími oteke láa liki li amemó: Gizapa velemaka, leza nagamí nonohulukú simá nanogo nouhá lae. Liki likago, Izesú oteake, unamagi nagamí valahukámagi gahá kemekago, kii nolike zou limó.

<sup>25</sup> Zou lokago, lekeza gili alévolé iakatini hí neve. Loko lo kemekago, izegipala zuhate keza ámina netá ángiake, kelesaga legekago, sigaga lake ligili hagili niake, agae, ve imanémo hepeki nagamí valahukaki gakó lokimikamó nene gili alikasimó nenazo, ve imane haitolímímini netive, liki lamó.

*Gelegesa mikasiuka holosi golesa amisele ahulamó*

*(Mat 8:28-34; Mak 5:1-20)*

<sup>26</sup> Lá okago, Galilaia nonohuló helegaloka Gelegesa vejenalitini mikasiuka vi anitemó.

<sup>27</sup> Neneló anitiake nagamí gahevaloka nitego, numuni apá napalokatí ve makó ake Izesuki hotu lasimó. Ámina vémini agikagú nene holosi golesa mukí minikago gamena hána gó luhamike minake numukú akosá amigo, hanuva geha mulikú gonosi mílímiligukó akoko mohona oaká i ve minamó.

<sup>28-29</sup> Ámina holosite gamena gamena ámina vémini agikagú alévolé iki minikago, vejená keza agisa agizató seni nagatunú ziake gizapa iki minamóza, holosi nenete nagá nene apilikí hukimikago golisi mikasi gomopalaló voaká imó. Áisi nene Izesuni ángoake gopaga

\* 8:16: Mat 5:15; Luk 11:33

\* 8:17: Mat 10:26; Luk 12:2

\* 8:18: Mat 25:29; Luk 19:26

like agisauka pou loko mikasiló akoake gakó napagutí gamoga geko láa loko limó: Izesuvo, Ómasi napámini gipalamaka, géisi nene nana netá golesa onetanogo noane. Loko lokago Izesú nene holosi golesa geza ámina vémini agikagutí itekoko vamane loko lo amekago, holosi nenémo amanapa ike geza miluma hoza nememitane loko alévolé oko loká nogetuve.

<sup>30</sup> Loko lokago, Izesú loká otake limó: Gugulizaka éagave. Loko loká omikago, holosi vái iki agikagú minamó nenazo, neza nugulizáne nene ami mulusi nouve loko limó.

<sup>31</sup> Loko lokago, holosimate meikú limisele molamitane liki negénegeka lamó.

<sup>32</sup> Liki likago, ámina mikasiló iza gululusi mukí nene agokaú gale niki niago, limiselekako izatini kigikagú limitune liki negénegeka likago, gele kemekago,

<sup>33</sup> holosi golesa nenete ámina vémini agikagutí itiake vake izatini kigikagú itiake limikago, ámina iza keza olí miliake meiniló limiake nonohulokú limiki nagami niki hutiake helemó.

<sup>34</sup> Limiki hilikago, iza gizapa vemate ániagiake ololu liki taoniloka itó numuni amegesa-loka viki aveté iki li kimikago

<sup>35</sup> vegená keza ámina utó i netá ániaganí viake, Izesutoka anitiake holosi agikagutí kimiselekago va vema nene luhoaká gó luhoake itó geleakaláa lamaná okago, Izesuni agisauka gakó geleko noigo, ániagiake kelegesá ligimó.

<sup>36</sup> Lá niago, ámina netá ániaga vete holosivagi mina ve lamaná ikumú nene ániagi mina vegená aveté i kememó.

<sup>37</sup> Lá ikago, Gelegesá mikasiuka amelage keza kelegesá goha legekago, Izesú eza nene mikasinini ahulooko vitive liki li amemó. Li amikago, eza atiginá oko vinogo nagamikú lapegú itimó.

<sup>38</sup> Noitigo, holosi agikagutí kimiselekago va vemámo Izesuki minatíve loko negénegeka lokago, Izesú gele amemike láa loko lo amimó:

<sup>39</sup> Geza numukaloka voko Ómasímo loló ogeta netá lamanalímini gakoláa nene vegenaka lo kemezo loko amiselekago, ámina vemámo atiginá oko vike Izesú loló ota netakumú nene apá amelagini lo utó oko lo keme asú imó.

*Zailoni moholagi Izesuni gotó ale gili venaki*

*(Mat 9:18-26; Mak 5:21-43)*

<sup>40</sup> Lá okago, vegená keza vola helegaloka Izesukumú ageva iki niago, atiginá oko omo anitekago, ániagiake, geké vaké limikago,

<sup>41-42</sup> monó numukú agulizaki ve makó agulizá Zailó loko noi vémini mohola hamokó aí kilisimasiva 12-a mina mohó nene helesakosá oko minokago eza ake Izesuni agihúna geko numúneloka makó vittíve loko negénegeka loko limó. Lá okago, makó nivasigo, vegená keza sii sii liki nivago,

<sup>43</sup> holúikú vená makó minamó nene ikanímó apelekago nómase gapo molova molova oko noigo, kilisimasi 12 oko novigo lusa ve nene moni keme asú imóza, keza lusa geha geha asú amitimó okago ahulitamó.

<sup>44</sup> Ámina venalímó Izesuni amegesaloka oake, luhoaká gó gahevaloka ale gilimó. Ale nogiligo áminasitó nene golaniva utamó.

<sup>45</sup> Lá noigo, Izesú loká oketoko éaho nugupeloka ale gilive loko lokago, vegená keza egamega ikago, Pitá láa loko limó: Gizapa velemaka, vegená sii sii liki nivamó nenazo, makolímó noitíve.

<sup>46</sup> Loko lokago, Izesú láa loko limó: Óe, makolímó nugupeló ale nogiligo, zámuzáne makó nene nugupelotí novigo noguluke noluve.

<sup>47</sup> Loko lokago, vená eza mogaáne mota utó noinazo loko geleake, luvoluvo zeake Izesuni agihúna geake, vegenalítini kovogisaló nene avisi netalímini mogona itó ale nogilike zokamó nenémíni mogona lo utó okago gili asú amó.

<sup>48</sup> Nigelego Izesú láa loko lo amimó: Mohónemaka, nenikumú gele alévolé anitímó gelémo zokokave. Mulukagú hulu iko vozo.

<sup>49</sup> Loko noligo, monó numukú agulizaki vemámini numukutí ve makolímó oake láa loko limó: Mohokama mota helekave. Lá okanazo, tisate nene goselé gapo hanuvamú okatize, ahulikoza.

<sup>50</sup> Loko lokago, Izesú geleake Zailoni láa loko lo amimó: Geza gehelele vizemiko gele alévolé okogó minatanimó nene, mohoka goha otinogo ive.

<sup>51</sup> Loko loake, numutó vo aniteake vegená makó nene ámina numukú itemitave loko lokimikago, hetó niago, Pitá Zoní Zemusi itó mohó izolahiko amelahiko kezagó kelémoko itimó.

<sup>52</sup> Iteke ve vená keza ámina mohó ive nama itiki niago, ániagoake goha alémo otitikumú geleneike anoza gakó láa loko lo kimimó: Ive amilo. Mohóma nene helemive. Hanuva avó akonoive.

<sup>53</sup> Loko lokago, mota heleneimó nemóza liki giliake giza itamó.

<sup>54</sup> Giza imikago, Izesú nene agizató aleake sele loko mohó geza otezo loko lokago,  
<sup>55</sup> áminasító ameni atiginá okago otimó. Otekago, nosáneté aliiki mohóma amiko native loko loketamó.  
<sup>56</sup> Lokimikago, izolahiko amelahiko keza gelesimó nene golivagi netá loló imó. Lá okago, Izesú nene ámina netakumú gakó aveté iki vejená li kememitave loko lo hukoketamó.

## 9

*Izegipala zuha 12 keza monó hozaló vamó*  
 (Mat 10:5-15; Mak 6:7-13)

<sup>1</sup> Izesú eza izegipala zuha 12-pala sele lo kemeake vejenalitiní kigikagutí holosima gale gihiki kipiliki kimisilitave loko itó kivisi vejená kilími zokatave loko nenémíni zámúza kimimó.

<sup>2</sup> Kemeake, Ómasímíni gizapaló minoakalímíni gakó li kimiki kivisití vejená kilími zokatave loko nokimisiliké,

<sup>3</sup> \* gakó láa loko lo kimimó: Gapo vitatoka netá matá aliki vamilo. Hánusa akiseaká gó peleti moni nene alemiki, itó gó lositá luhamiki vilo.

<sup>4</sup> Itita numuni makokú itílikima, ámina numukú akilíki niviki ámina apatotí vitave.

<sup>5</sup> \* Apá makotoka kilílmíni lamaná amikoma, ámina apá ahulíiki niviki vahé milíki likigisalatí mumusopa nene usagamá zi ahulíiki vilo.

<sup>6</sup> Loko lo kemekago, keza numutó namató vake Izesuni gakó lamaná nene li utó i kímí kímí iká kivisi vejená kilími zokiká amó.

*Monó nagamí holokimiaká ve Zoní hili gakó*  
 (Mat 14:1-12; Mak 6:14-29)

<sup>7</sup> \* Lá niago, agulizaki ve Heloté nene aposolote alévolé netá lílí niakumú geleake, agata gululusi gilimó nene, ve makolite Zoní nene heleneikutí oteake ámina netá loló noive líki nilago,

<sup>8</sup> itó makolite nene Ómasímíni agepagutí gakó loaká i ve Ilaizá goha utó okave líki liaká niago, makolite nene gozapá Ómasímíni agepagutí gakó liaká a vegutí makóma Ómasímíno alémo oteneive líki liaká amó nene,

<sup>9</sup> Heloté geleake, láa loko limó: Zonini luvana hukumóza, ve makokumú gakoaláa nenémika líki lago nogulumó nene hí ve noitive. Loko loake, Izesuni ániganogo gilimó.

*Ve 5000 nosáneté kemeko namó*  
 (Mat 14:13-21; Mak 6:30-44; Zon 6:1-13)

<sup>10</sup> Aposolo keza monó hozaló kimisilitotí atiginá iki iake, keza iki milíki a netakumú Izesuni aveté iki li amemó. Aveté iki li amikago, eza kelémoko víke kezáiki apá makó agulizá Petesaita numutó víi anitemó.

<sup>11</sup> Lá niago, ve vená mukí keza giliake, Izesuni ámegetiki nivago, eza kelémo moloake Ómasímíni gasovaló minoakalímíni gakó lo kimíke, kivisi vejená kelémo zokamó.

<sup>12</sup> Lá noigo, únaká nene gamena asú inogo noigo, izegipala zuha 12-palamate iake láa líki li amemó: Leza mikasi gomopalaló nouninazo, vejená kimiselekako luhuva numutokagi iza gihiló numutokagi víki nosánetakumú vitagá iki níiki akatave.

<sup>13</sup> Líki likago, Izesú nene lekezatíni nosáneté kimíki nalo loko lokago, keza anotó aliki láa líki lamó: Peleti ligizani lugaloka asú igo itó lagaha lositakó molonounimó nenazo, leza imane vejenalitiní nosáneté voko meina hízeketatune loko nolape.

<sup>14</sup> Líki lamó nene áminaló mína véa 5000 nenémíniki niago giliake láa líki likago, Izesú nene izegipala zuha láa loko lo kimimó: Mukí vejená nene 50 50 nenémíniki mulusi milíki minalo líki líkitalo.

<sup>15</sup> Loko lokago, keza izegipala zuhate láa líki likimikago, vejenáma mulusi milíki niago,

<sup>16</sup> Izesú nene peleti ligizani lugaloka asú igoma itó lagaha lositámagi aleake, okulumakú okenava oko nánigake Ómasi agepoka loake peleti gitegeake, ámina nosáneté gona milíki kimitave loko izegipala zuha kimimó.

<sup>17</sup> Lá okago, vejená mukilite níkake kagatupa okago, nosáneté lumáa ali nupa iki gosúveha 12 vaí okago ali milamó.

*Pitá Izesuni mognamú lo utó imó*  
 (Mat 16:13-19; Mak 8:27-29)

<sup>18</sup> Gamena makó nene Izesú eza Ómasiloka loko noigo, izegipala zuha kezagó neneló niago, eza loká oketake vejenalite nenikumú éahove líki liaká niave.

19\* Loko lokago, keza láa liki li amemó: Monó nagamí holokimiaká ve Zoníma goha utó noane liki liaká niave. Itó lugáate nene Ilaizá gozapá okulumakú iti vema goha lemeko minane liki liaká niave, itó lugáate nene gozapá Ómasímíni agepagutí gakó liaká vegutí makó nene galegutí otekave liki liaká niave.

20\* Liki likago, Izesú loká oketoko lekelisi nenikumú éahove liki liaká niave. Loko lokago, anotó aleko Pitá nene geza Ómasímo gologí oletatane loko lo mololeta vema noane, loko limó.

*Izesú hiliti gamenamú epoapoga limó*

(Mat 16:20-28; Mak 8:30-9:1)

21 Láa loko lokago, Izesú láa loko lo hukoketoko limó: Lekeza imane gakó lo nolukumumó nene vegená makó li kememilo.

22 Okulumakutí lumu ve gihila neza nene monó gizapa vegi guguni giziaká ve napagi monó mogona apí-ikimiaká vegi keza miluma netá mukí nímíiki není ániagi goselé ikiko nipili hilikiko, gamena losive makole minokinake heleneitokutí goha otinogo uve.

23\* Loko loake, vegená mukí láa loko lo kimimó: Vegená makolite není némegetatune liki nigilikima nene kugupémo giliti netá matá nene gili ahuliiki zohota zaló kipili hilinigi miluma netá ali gihikitatakumú gamena gamena gili zagiiki némegetiki ataze.

24\* Makó keza kigika kemeníni ali amánapa iki minata vegená nene kigika kemeni gopa inogo ive. Itó makó keza nene nenikumule liki kigika kemeni vinasí ahulatamó nene alévolé kemetameni alitamó neve.

25 Makó keza mikasímíni amupiló ne netá ali asú niko kezáini kigika kemeni gopa okoko tolova itimó nene, mikasiuka henonimámo nana oko kelémo lamaná itive.

26 Ve makó keza nenikumupe monónemupe avetó itakumú kovoza hilitimó nene, okulumakutí lumu ve gihila neza lapanáne itó aménehini lapaná nenémo numupiló itekiko apazá agelova kelémoko limito gamenaló nene keza kovoza hilimó nenéminoko nezagi nene kugulizá ale otitokumú novoza hilinogo ive.

27 Neza lamaná lo likimitoze, gililo. Lekelisi ató nene nia vegená lekelikutí lugáa makó hilinamikí ha niko Ómasímo gizapa oketatimómámíni zámúza utó okiko ániaganigave, loko limó.

*Izesuni agupe haitolímíni imó*

(Mat 17:1-13; Mak 9:2-13)

28 Izesú ámina gakó lo kemeake, gamena 8-ía nenéminoko oko vokago, Pitani Zonini Zemusini kelémake agokaú Ómasiloka linogo itimó.

29 Itike Ómasiloka loko noigo, haitó agoka agepa ale noluhake noike gineganévamo gizopa vaevae loko minamó.

30 Lá noigo, galinali ve lositá Moseko Ilaizako keza okulumakutí utó ikasike Izesugegi gakó ligili hagili ake,

31 okulumalímíni gonanalivagi niasike, Izesú nene Zelusalega noheleko Ómasímo lo mola netá loló itikumú ligili hagili amó.

32\* Lá niago, Pitagegi kogómula ahihi okago, kovó akinakutí otiake ániagamó nene, Izesú eza lapanalagi noigo itó ve losima ezagi niasigo ániagamó.

33 Ánigikago, ve losima keza ahulimíiki vinigi niasigo, Pitá láa loko Izesuni lo amike limó: Monó gizapa velemaka, imaneló minuhá laga okaze. Lá okanazo, gaizopa losive makole geleketatune, makó geile, makó Mosenive, makó Ilaizanive loko limó nene gakó gele guni amike gopa limó.

34 Loko noli agepagi límusímo lemeko ze hitokimikago, límusi hitoketakumú kehelele vizimó.

35\* Lá noigo, límusigutí Ómasímo láa loko limó: Imane gipáne alémo etó onou gipáne noize. Aí gakó gili alilo.

36 Gakó láa loko utó okago, giliake ániagamó nene Izesú ezáago noigo ániagamó. Ánigiake, ámina gamenaló ániaga netakumú kegepa apiziake avetó iki vegená makó nene lí kememamó.

*Izesú holosi golesa mina gipa alémo zokamó*

(Mat 17:14-21; Mak 9:14-29)

37 Akiake gó lokago, agokagutí limiake niago, vegená mukí iake Izesugegi hotu lamó.

\* 9:19: Mat 14:1-2; Mak 6:14-15; Luk 9:7-8      \* 9:20: Zon 6:68-69      \* 9:23: Mat 10:38; Luk 14:27      \* 9:24: Mat 10:39; Luk 17:33; Zon 12:25      \* 9:32: 2 Pit 1:17-18      \* 9:35: Luk 3:22



<sup>38</sup> Hotu liake keikutí ve makolímo gakó napagutí láa loko limó: Monó gizapa velemaka, není gipa hamokó oko ángatane loko loká nogetuve.

<sup>39</sup> Holosi makolímo aleko alévolé oake noigo, galinali gopaga loaká noive. Lá noigo, holosi nenémo alémo mómoká goha okago, sehovala veleaká noive. Itó apeleva apeleva oko noike litá oko ahulotosá amive.

<sup>40</sup> Itó izegipaka zuha nene holosima apiliki amisilitave loko lo kumumóza, amiselemi-tamó okave.

<sup>41</sup> Loko lokago, Izesú láa loko lo kimimó: Lekeza ató imane gili alévolé amake mulutikú amánapa iki minamó neneta lekelikumú goselé nepelekave. Lekezagi gamena gamena minoloko iteko minokugo gili alévolé itahe. Lá ikaze, gipaka imaneló alémoko ano. Loko lokago, izegipama Izesutoka noago, holosi nenémo mikasiloka ahelú okago pou loko akonoigo, alémo mómoká imó.

<sup>42</sup> Lá okago, Izesú nene holosi golesama gahá amike namisilike, ámina gipa alémo zokoake, goha amelahitoka alémo atiginá imó.

<sup>43</sup> Lá noigo, ve vená mukí keza Ómasímíni zámuza napamú sigaga sagaga lamó.

*Izesú hiliti gamenamú goha epoapoga limó*

*(Mat 17:22-23; Mak 9:30-32)*

Lá iake Izesú oko moloko i netakumú sigaga nilago, Izesú nene izegipala zuha láa loko lo kimimó:

<sup>44</sup> Lekeza imane gakotó lakagata miliki giliki minalo: Okulumakutí lumu ve gihila neza gala vetini kigizakú nene nepele hilitune liki nilími milanigave.

<sup>45</sup> Loko limóza, nene gakolímini mogaóná gilikatave loko kigika kagata koló amimó nenazo, keza gili vevesamake, ámina gakokumú loká itanigi kehelele vizekago loká itamamó.

*Vegená mukikutí éaho livilegeko noive.*

*(Mat 18:1-5; Mak 9:33-37)*

<sup>46\*</sup> Lá ikago, izegipala zuhamate gakokumú lova hizeke lelikutí éaho livilegeko agulizaki vele minative liki lamó.

<sup>47</sup> Nilago Izesú eza kigikagú nigele gakó geleake izegipa koma makó alémoko ake amatoka alémo oteneike,

<sup>48\*</sup> láa loko lo kimimó: Makó keza nenikumule liki izegipa koma áimanémini nasahilí ikitatamó nene, není nasahilí inimiaká niamó gelekave. Itó makó keza nasahilí initatamó nene nimisili ve aménehini nasahilí itatamó gelekave. Lekelikutí ve makolímo lemeko nouve loko giliti ve nene Ómasímo alémo ve napa loló okiko likivilegeko minanogo ive.

*Lekelí gala ve noamitimó nene lekelikutí ve noinogo ive*

*(Mak 9:38-40)*

<sup>49</sup> Loko lokago, Zoní láa loko lo amimó: Gizapa velemaka, leza ve makolímo geí gugulizató like holosí golesa nene vegenalitiní kigikagutí kepeleko nokimisiligo ángunimó nene lelí lémegetami ve nenazo, géneka lotunimole.

<sup>50</sup> Loko lokago, Izesú láa loko lo amimó: Lekeza géneka litamilo. Ve makó keza lekelí gala velini niamitamó nene lekelikutí ve ninigave, loko limó.

*Samalia vegená makolite Izesuni alími milamamó*

<sup>51</sup> Ómasímo Izesuni goha okulumakú alémoko ititi gamena alitokago, Izesú nene Zelusalega vitove loko alévolé oko agata gilimó.

<sup>52</sup> Lá oake ve makó kimiselekago, vake Izesú atikumú ali vatí itanigi Samalia mikasiuka apá makotoka vi anitemóza,

<sup>53</sup> Samalia vegenaki Zelusale vegenaki kogoga hotopotó minamó nenazo, Izesú eza Zelusalega vitove loko likumú goselé kepelekago alími milamago,

<sup>54\*</sup> izegipala zuhagutí Zemusiko Zoniko keza nene suni ángikasike láa liki li amesimó: Guivahanitemaka, leza lokuko okulumakutí lolímo lemeko imane ve kepele gesá itive loko nogelepe.

<sup>55</sup> Liki likasigo, Izesú mino viligoake gahá kimimó.

<sup>56</sup> Gahá kemeake haitó apatoka makó vamó.

*Izesuni ámegetanigi miní viliga vegená*

*(Mat 8:19-22)*

<sup>57</sup> Gapoloka nivago, ve makolímo Izesuni lo amike vitanitoka vitanitoka nene neza gémege gémege oko minanogo uve.

\* 9:46: Luk 22:24

\* 9:48: Mat 10:40; Luk 10:16; Zon 13:20

\* 9:54: 2 Kug 1:9-16

<sup>58</sup> Loko lokago, Izesú láa loko lo amimó: Mikasi koló onoikú nene gahate itiaká niave, itó namatini numúini nemóza, okulumakutí lumu ve gihila neza akato numuníne itó gotóneló za nomigo vitagá noumó nenazo, makó vitíve loko nolape.

<sup>59</sup> Loko loake, ve makó nene geza oko némegetozo. Loko lokago, eza láa loko limó: Guivahanínemaka, geza gelekako nene, neza minoko améneho helekiko vinake gale zemikinake gémegetatove.

<sup>60</sup> Loko lokago, Izesú láa loko lo amimó: Hilinita vejená gale zikimiaká hoza nene kigika heleneiti vejená kezagi ámina hoza alitamó neve. Géisi nene voko Ómasímini gizapaló minoakalímini gakó lo utó oko lo kemezo.

<sup>61</sup> \* Loko lokago, makolímó láa loko limó: Guivahanitemaka, geí gémegetanogo noumóza, voko není numukú nia vejenáma kemesosoka lokinake gémegetatove.

<sup>62</sup> Loko lokago, Izesú láa loko lo amimó: Ve makolímóhe makolímóhe není hozagutí mino viligatimó nenémo Ómasímini gapogú hoza alitimóláa nomive, loko limó.

## 10

### *Ve 72 monó hozaló vamó*

<sup>1</sup> Lá okago, Guivahanímó ve 72-a kelémo etó oake, gona moloko losi losi iki ale goí iki vitave loko alika ezáa vinogo noi apatoka numutó namató kimisilimó.

<sup>2</sup> \* Lá noike aí vejenala zuha lílínigí nia vejenakumú anozá gakó makó láa loko lo kimimó: Mikú nosánetá mukí omolokamóza, hoza aleaká vejená lagasó minokunize. Nenemú lekeza miní hoza amelahitoka likiko nene hozaló vejená makó kimiselekiko hozavagú viki minumuni alitaze.

<sup>3</sup> \* Lekeza vilo. Gilinahe, hela galagitana mina vejenalitini holúikú nene likigikagú geha ziki sipsip izagitana minatave loko lekelí nolikimisuluve.

<sup>4</sup> \* Lekeza vinigí níki, moní gúeaká gó itó akiseaká gó itó likigisaló suú alemiki lekeza gapoló niviki miníki alíki amíki amúza milíki vilo.

<sup>5</sup> Numuni makokú itínigí níikima numuni amelaginí mulutikú hulu oleketino líiki itilo.

<sup>6</sup> Ámina numukú hulu ve makó noitimó nene, hulumú lina gakó nene aitoka gihila zitimóza, nenémini ve noamitimó nene hulu gacolímíni gihíláa nene lekelitoka goha atiginá oko anogo ive.

<sup>7</sup> \* Ve makolititoka hoza alita vejená nenete ámina vegutí nosánetá alíki níki minatamó nene lamaná itimó nenazo, numuni makokú itíikima ámina numukú miní-líki nivíki meinavatini nosánetá zahí nagamí líkimitamokó nene níki minalo. Lekeza haitó numukú itemiki numuni hamokukó minalo.

<sup>8</sup> Apá makokú níviko, ámina apá amelage líkilími milíkoma lekeza nosánetá líkimitamokó nene níki nímíniki

<sup>9</sup> kivísi vejená nene kílími zokíki láa líki lí kimilo: Ómasímini gizapaló minoakalímini zámuza nene lokovogisaloka okave.

<sup>10</sup> Itó apá makokú níviko, líkilími lamaná amíkoma, lekeza viki gapoló otíniki láa líki lí kimilo:

<sup>11</sup> \* Lekelí apakutí mumusopa lígisaló gímizeneimó nene lekelikumú vahé moloko atílí noute. Lá nounimóza, gakó imane gíli minalo: Ómasímó gizapa oleketatimó nenémini zámuza nene lokovogisaloka omo alitokago ángi ahulikave, líki lí kimilo.

<sup>12</sup> \* Neza gakó lo líkimitoze, gílílo. Gamena napaló nene Soto apakú mina vejenalite golesa mogonáinimú goní koma ítamóza, líkilími lamaná amíta vejenalite goní sípisi íngave.

### *Kígika ali viligama vejenalite miluma sípisi gílinigave*

*(Mat 11:20-24)*

<sup>13</sup> Agae, Kolazina amelagita, itó Petesaita amelagita, lekelitoka golvigavi netá utó inogo ive. Alévolé suni lekelitoka loló umó nene golesa netá aliaká a vejená miníaká a apá Tulo apatoka itó Sitona apakú utó ilina, keza gozapá miluma gílikí kígika ali viligamó nenémini mogonáa lí utó líkí gínegane lítaha ali akílikí ló lana nene kugupeló hílikí minalíne.

<sup>14</sup> Gamena napaló nene Tulo apakuki Sitona apakuki mina vejenalite goní ítamóza, lekeza goní napa genavagí íngave.

<sup>15</sup> Itó lekeza Kapanao amelagita, lugulizá okulumakú ítitive líki ali otiaká niahe. Nenéminoko nomive. Zunigú lekehelú inogo ive.

\* 9:61: 1 Kug 19:20 \* 10:2: Mat 9:37-38 \* 10:3: Mat 10:16 \* 10:4: Mat 10:7-14; Mak 6:8-11; Luk 9:3-5 \* 10:7: 1 Koli 9:14; 1 Tim 5:18 \* 10:11: Apo 13:51 \* 10:12: Mat 10:15; Api 19:24-28; Mat 11:24

16 \* Loko loake, goha miní ameko izegipala zuha láa loko nokimisilike limó: Ve makó keza lekegepagutí gulupe liki gilitamó nene není negepagutí gakó gilinoivo. Itó ve makó keza kemegesa likimitamó nene, kemegesa nememó gilitimó neve, itó kemegesa nimitamó nenete nimisili ve kemegesa amemó gilitimó neve.

*Ve 72 atiginá amó*

17 Láa loko kimiselekago, viki miniake, goha ake mulúikú agila guluma igo kogoliza viziki láa liki lamó: Guivahanitemaka, geí gaktó nene holosi golesa nenete kezagi gili limiki golisi iaká niave.

18 Liki likago, Izesú láa loko lo kimike limó: Satá eza gó vegitana oko okulumakutí lemekago ángokuve.

19 \* Lekeza gililo. Neza zámuzá lekemekugo lekeza gosiható itó akohú oaká gosihakitana netató lisatamó itó lelí lova gala ve Satani zámuzalaló nilisikoma nenémo lekepeleminogo ive.

20 Lá onoimóza, holosite lekeli gakó gili aliaká niakumukó giliko itemiko, lekeza Ómasímíni mututoni minakumule loko lukugulizá nene okulumakú gizonimó nenemú lokogoliza viziki minalo.

*Izesú agoliza vizimó*

*(Mat 11:25-27; 13:16-17)*

21 Loko loake áminasitó Ómasímíni Sikalahulímo agika alémo vávani noigo, mulunagú ló guluma noigo láa loko limó: Aménege geza okulumalímíni mikasímíni Guivahani géisigó nene noane. Sukulu lunike gele vevesokune liki liaká nia vegená keza giliki gili guni ikatave loko monó imane ale halá geko molokanike sukulu lamake izegipa namunigitana iki mina vegenalitiní kigikagú molokimiaká noanikumú gegepoka noluve. Aménegeamaka, geza nene nenéminoko utó oloko vitive loko gelekako nene etoaká noive.

22 \* Loko loake, miní ameko láa loko limó: Améneho netá mukí nene nigizakú molo asú okave. Itó ve makolite Ómasímíni gipala noutímíni mogona gelemave. Améneho ezagó geleneive. Itó ve makolite aménehini mogona gili vevesamave. Neza gipaka noumó itó nezáne lo utó oko lo kemekugo ángi hehe litave loko gilító vegená niamó lezategó aménehini mogona gelenoune.

23 Loko loake, izegipala zuhaloka mino viligoake keikó Izesú láa loko lo kimimó: Ómasímíno nónohá zelikimikago lekeza lokogómulatunú netá imane ángi vevesikave.

24 Neza gakó lo likimitoze, gililo. Gozapá Ómasímíni agepagutí gakó liaká a vegi kugulizaki ve napagi nenete oko moloko nou netá lekeza ángiaká niamó nene ángatune liki gelemóza, ángamamóma neve. Itó lekeza negepagutí giliaká nia gakó gilitune liki amóza, gelemamóma neve.

*Samalia ve lamanalímíni gakola*

25 \* Loko lokago, monó mogona apí-okimiaká ve makolímó oteake Izesuni amekú moloko láa loko loká otake limó: Monó gizapa velemaka, neza nana okinake alévolé nemetameni alitöhe.

26 Loko li gaktó nene Izesú lo amike limó: Mosé nanave loko lo hukoleketave. Geza nene gakó nanave loko gatoko gelene.

27 \* Loko lokago, eza láa loko limó: Geza gigika gemeni zámuzaka itó geleakaka mukí nene Guivahani geí Ómasilíno lehizetozo. Itó gezakamú geleaká noanimómáminoko gigivekaginimú geleko gigika kemezo loko luhuva gizonimóma neve.

28 \* Loko lokago, Izesú láa loko lo amimó: Lo nogumu gaktó lo vevesoko lokane. Lani gaktó amegesa molokogó loló itanimó nene alévolé oko minanogo ane.

29 Loko lokago, ámina ve nenémo ezáa mognala hize lé inogo Izesuni loká otake láa loko limó: Nigivénege keza éage nene.

30 Loko lokago, Izesú láa loko lo amike limó: Ve makó eza Zelusalega ahuloake Zeliko numutoka nolimigo laskoli vete gapoló apiliake lavolavo gola netá matala mukí gumina iki aliki vikago, hilinogo gapoló ako minamó.

31 Lá oko akonoigo, Ómasi guguni gizoaká ve makó nene ámina gapoló novike ángamó nene hilinogo akonoigo zová zeko avilegeko vimó.

32 Vokago, ámináminoko monó zagusaveú hozaló ve Livaini agapilamokutí makó nenémo áminaloka oake ángamó nene lá oko akonoigo, ángoake zová zeko avilegeko vimó.

\* 10:16: Mat 10:40; Mak 9:37; Luk 9:48; Zon 13:20 \* 10:19: Age 91:13 \* 10:22: Zon 3:35; 10:15 \* 10:25: Mat 22:35-40; Mak 12:28-34 \* 10:27: Gapo 6:5; Lív 19:18 \* 10:28: Lív 18:5

<sup>33</sup> Vokago, Samalia vegi Zuta vegi apiziki minamamóma nemóza, Samalia ve makolímo ámina gapoló novike apili ahula vema akonoító oko ángoake, muluna gitihiná okago,

<sup>34</sup> noító vike apelego golani imómalo nene hilinagi vain nagamiki holomiake asapú omi-ake, alémo oteake tokí izavámíni amegesaló ahulomiake vike veno vegeñalitini numukú itesike nasahilí otamó.

<sup>35</sup> Akikasike gó lokago ámina ve vinogo noike veno vegeñalitini numuni gizapa ve nene kina losítá namike limó: Geza imane ve gizapa lamaná otozo. Lá noako moní gumumó nene asú okikoma neza goha inake gimitove, loko limó.

<sup>36</sup> Nenemú geza nanave loko nogelene. Ve losive makole akutí nene laskoli vete apilikago gapoló ako mína vemámíni agivelaho hí ve minamó neve.

<sup>37</sup> Loko lokago, monó mogona apí-okimiaká vemámo láa loko limó: Miluma gelemiake alémo lamaná i veve. Loko lokago, Izesú nene géisi voko áminámíni ozo, loko lotamó.

*Malatako Maliako Izesuni alesa mili amesimó*

<sup>38</sup> \* Lomiake, gapoló nivake apá makokú anitemó. Nene apakú vená makó minamó agulizá Malatá eza Izesuni alémo numunagú molokago,

<sup>39</sup> mohó agunala agulizá Maliá eza nene ake Guivahanímíni agisauka minake aí gakó geleko minamó.

<sup>40</sup> Lá nojgo, Malatá eza nosáneté ale vavá i hozamú muluna itimó. Lá oake, Malatá vike Izesuni láa loko lo amimó: Guivahanínemaka, mohó nugunáne Maliá nene ahulonimikago nezánegó nosáneté ale vavá noumó ángamape. Lo amekako, oko hozaló nelémo vatí itive.

<sup>41</sup> Loko lokago, Guivahanímo lo amike láa loko limó: Malata, Malata, geza gagata gululusi nogelenike muluka itekave.

<sup>42</sup> Geza netá hámakokumú gelezo. Maliá nene netá lamanaláa ale gizaká ike nenitokatí zámua alekave. Nenémo aitoka gihila zekiko makolímo agizakutí ipá aminogo ive, loko limó.

## 11

*Izesú Ómasiloka loakakumú lainim-oketa gakó*

*(Mat 6:9-15; 7:7-11)*

<sup>1</sup> Gamena makó zupa Izesú nene apá makotoka Ómasiloka loko lo asú okago, izegipala zuhagutí makolímo láa loko lo amimó: Guivahanitemaka, Zoní nene izegipala zuha Ómasiloka litave loko lainim-oketoaká i netá aleko lainim-oletozo.

<sup>2</sup> Loko lokago, Izesú láa loko lo kimimó: Ómasiloka niliki nene láa liki lilo: Ametega, geí gugulizá etó oko minatize. Numutó namató geí gizapaló minoakalímíni zámua utó o asú ino.

<sup>3</sup> Geza gamena gamena nosate lemezo.

<sup>4</sup> Leza ligivetegini lihima nekisáini ale ahulokimiaká nounimó nenémíni oko lihimate ale ahuloletozo. Geza gimilegú moloaká netakú lelémo molamo.

<sup>5</sup> Loko loake, láa loko lo kimimó: Lekelikutí ve makolímo nene holugú akovevé zogovámíni numutoka voko sele loko zogone geza peleti losive makole nemezo.

<sup>6</sup> Zogone makó nene gapoló ake ake není numukú itínasa okago, nosáneté koma amitomó nomigo loká nove.

<sup>7</sup> Loko lokiko, zogova nenémo numukutí nene leza gahe gekunike vená izegipánegi akonouhakú goseleka lamo. Neza otekinake netá makó gememinogo uve.

<sup>8</sup> Loko litimó nene, neza láa loko lo nolukumuve. Eza není zogone minokagove loko oteoko netá makó amemitimó nene, maga ve nenémo sele lova lova okiko, eza oteoko vitagá noi netáma aminogo ive.

<sup>9-10</sup> Nenemú láa loko lo nolukumuve. Ómasiloka voká liaká niamó nenete netá mota aliaká niave. Vitagá iaká niamó nenete netá gihila ali utó iaká niave. Itó gaheló hoko-hoko likago gahe koló okimiaká noive. Lá onoinazo, lekeza Ómasiloka voká liikima ámina netá alinigave. Vitagá iikima netá gihila ali utó inigave. Gaheló hoko-hoko nilikoma gahe koló oleketanogo ive.

<sup>11</sup> Lekelikutí ve makolímini gipalámo lagahamú voká lokiko nene amelaho gosihá amitihe.

<sup>12</sup> Itó okoloho mulamú voká lokiko nene akohú gosihakahá amitihe. Lá aminogo ive.

<sup>13</sup> Nenemú lekeza vegeñá golesa neneta izegipatini gizapa lamaná ikitake netá lamaná ali kegepa iaká nianazo, okulumakú ametipo nene voká lita vegeñá nene aleko iteko Sikalahula lehizeleketanogo ive, loko limó.

\* 10:38: Zon 11:1

*Izesuko Pelezepuloko**(Mat 12:22-30; Mak 3:20-27)*

<sup>14</sup> Gamena makó zupa nene ve makolímíni agepa ale lakolí okago mina holisi nene Izesú apeleko amiselekago, vokago, agepa apizi vema nene agepa á oake gakó akó limó. Lá okago, vegená keza sigaga lamóza,

<sup>15</sup> \* lугáate láa liki lamó: Holositini agulizaki ve Pelezepuló loko noi vémo alémo vatí noigo holosi kepeleko kimiseleaká noive.

<sup>16</sup> \* Liki likago, lугáate amekú milake loká itake okulumakutí alévolé suni makó ale utó okako geí mognaka ángatunize.

<sup>17</sup> Liki likago, Izesú kigikámíni gakó hanuva geleake láa loko lo kimimó: Mikasi makokú vegená hizi hóu líiki lova gopa hizitamó nene keí mikasi nene gámekó minatimóma neve, itó numuni makokú vegená keza hizi hóu líiki eza akohú apíliko eza akohú apíliko itamó nene ámina numuni ahulíiki hutílí iki vinigave.

<sup>18</sup> Lekeza nenikumú nene Pelezepuloni zámuzatunú holosi kepeleko kimiseleaká noive liki liaká niamóza, Satá nene ezáa izegípala zuhagi hizi hóu latamó nene aí gizapaló minatamoláa nene nana iki alévolé iki minatave.

<sup>19</sup> Nenikumú nene Pelezepuloni zámuzatunú holosi golesa kepeleko kimiseleaká noive liki liaká niave. Láa likima lekelitíni izegípatíni zuhate nene ámina iki Satani zámuzatunú holosi golesa kipílikí kímisiliaká niave liki litahe. Óe, láa liki lamitamó nenazo, kéisi soza gakotínímíni mognáa hanuva alí utó itamó neve.

<sup>20</sup> Lá onoimóza, neza Ómasímíni zámuzatunú holosi kepeleko kimiseleaká nounazo, Ómasímíni gasovaló minoakalímíni zámuzatunú nenémo lokovogisaloka mota omo ávatíha okamó nenémíni mogona mota utó okave.

<sup>21</sup> Satá eza gasovagi ve amuva ve minooko gimisi magé aleoko numuna gizapa itimó nene, netá matala mukí nene avasavagi minanogo ive.

<sup>22</sup> Lá itimóza, neza alévolé ve noutímíni nene okoko ámina ve lova ale ameko aí aviligítomó nene, gimisi magé gele alévolé i netáma ipá oko vegená makó gona moloko kimitove.

<sup>23</sup> \* Itó makó keza nenikutí vegená minamitamó nene, není gala vegená ninigave. Makó keza nílímí vatí iki vegená kílmí nenitoka amítamó nenete kílmí hutílí iaká niamó gelekave.

*Holosi golesa atiginá iti gakó**(Mat 12:43-45)*

<sup>24</sup> Holosi makolímíni ve makolímíni agikagutí iteoko nene avasú vizeko minati numunimú vitagá inogo osagava apató voko mohona itive. Vitagá oloko novoko neza numúne ahulokuke umóma nenazo lokoko mohona oko vitagá itimóza, nomiko neza goha áminagú atiginá oko vinake minatove loko agata geleoko

<sup>25</sup> atiginá oko voko ángatimó nene ámina numuni agika nene lolopa gitiki alí guni ikiko itó gizapa ve makó noamíko ángatimó nene,

<sup>26</sup> eza goha ahulooko voko holosi agivelagíni 7-ía kugupelotí sisipa anuva ovimoláa kelémoko oko nene áminagú miníki alíki inigave. Lá ikiko ámina ve goí oko golesa oko minamóza, íi alíka nene golesa o lamaná oko golesa inogo ive. Ve golesa áimane lekelitoka utó itikumú noluze, ehe tináneve.

*Ómasímo lamaná nónohá zeketonoi vegená*

<sup>27</sup> Loko noligo, ve venalitíni holúikutí vená makó minamó nenémo Izesuni sele like láa loko lo amíke limó: Vená makó nenémo geí getoake aminí gemeneimó nene Ómasímo lusa getonoimóma neve.

<sup>28</sup> Loko lokago, Izesú láa loko limó: Láa loko lanimóza, Ómasímíni gakó gilíki Ómasímo líi gakotó ámegetiaká nia vegená nene Ómasímo nónohá zeketonimóma neve.

*Vegená golesate alévolé suni ángatune líki lamó**(Mat 12:38-42)*

<sup>29</sup> \* Loko loake, vegená sii sii líki alegesá niago, Izesú miní ameko láa loko lo kimimó: Oko moloko oaká nou netá ángiaká nia vegená nene vegená golesa minikave. Keza alévolé suni makó ángatune líki liaká niamóza, haitó suni makó ale utó ugo ángaminigave. Zonatoka emane utó i sunígítana makó utó iko nenegó ánganigave.

<sup>30</sup> \* Zoná nene lagaha sipisímíni agikagú lemeko gamena losive makole minake he-leaká gapogutí goha oteake Ninive vetíni kovogisaló ámina sunimú lo utó o kimimómámíni

\* 11:15: Mat 9:34; 10:25

\* 11:16: Mat 12:38; 16:1

\* 11:23: Mak 9:40

\* 11:29: Mat 16:4; Mak 8:12

\* 11:30:

oko okulumakutí lumu ve gihila neza imaneló vegeñalitini kovogisalo neni anosa ale otó oketanogo uve.

<sup>31</sup>\* Ómasímo gona mololeketati gamena nene Sepá mikasiuka agulizaki vená minamó nenémo oteoko imane gamenaló nia vegeñalitini mogonáini lotuva legekiko lihima napa alitamó oko nene neve. Ámina vená nenémo nene agulizaki ve napa Salomóma mukí netá mogona gele vevesoko gilimómámini gihiláa gilinogo mikasi hotokatí gapo hána hána amó. Itó nénisi ató imane Salomoni koma avilegeko noumóza lekeza neni gakó gilísá amave.

<sup>32</sup>\* Ómasímo gona mololeketati gamena nene Ninive apá amelage otiki oko moloko oaká nou netá ániagiaká nia vegeñalitini mogonáini lotuva liginogo ive. Lotuva legekiko lihima alitatokó oko neve. Nene hanuvamú nomive. Zoná nene monó lo nokimigo Ninive apá amelage kigika ali viligamó neve. Itó nénisi ató imane Zonakitana oko minonamuve. Zonani avilegenoumóza, lekeza gakóne gili ahuliake likigika ali viligamamó neve.

*Lugupémini ló liví*  
(Mat 5:15; 6:22-23)

<sup>33</sup>\* Hí vémo ló liví legeoko holoma sepekú molatimó neve, itó somotunú gahumá itimó neve. Lá oko nomive. Liví nene legeake numukú itita vegeñá hize hanatoketative loko holomaló molosá neve.

<sup>34</sup> Itó gogómula nene gugupémini ló liví neve. Gogómula nenémo mumuzó oakalímini gapogú gelémo molamitimó nene, Ómasímini lapaná nenémo gigikagú hize hanato asú itimóza, gogómula nenémo gelémo golesa itimó nene, gugupeló itó gigikagú límugusi ze minanogo ive.

<sup>35</sup> Nenemú gigikagú Ómasímini liví lonoimó nenémo lihokiko límugusigú minokatanize, gizapa lamaná ozo.

<sup>36</sup> Gígika makotoka límugusi zemoko hanato asú onoiko, ló livilímo hize hanatogetatimó nenéminoko gígika hanatokogó minanogo ive, loko limó.

*Izesú Palisaio monó vemuki monó mogona apí-ikimiaká vemuki alévolé oko lo hukonoimole*

(Mat 23:1-36; Mak 12:38-40)

<sup>37</sup> Izesú láa loko lo asú noigo, Palisaio monó ve makolímo nosánetakumú alesá molo amimó. Lá okago, Izesú nene numunagú iteake nosánetá makó niki minasimó.

<sup>38</sup> Ámina Palisaio monó ve nenémo Izesuni ániagamó nene, Zuta vetini suni aleko agizani nagami zemike nosánetá hanuva nonago ániagoake, etami suni nalive loko geleake, ininá oake agata gululusi gilimó.

<sup>39</sup> Lá noigo Guivahanímo láa loko lo amimó: Gelezo. Palisaio monó ve lekeza lape somogitana iki niave. Lekeza nagami goni itó lape hetolaloka nagami ziaká niamóza, likigikagú guminaló suni itó haitopaitó netá golesa nenémo vai onoive.

<sup>40</sup> Lekeza ve negi ve lamaná niave. Ómasímo netá hetoláa itó agikáa hamó lelegitó loló okamóma neve. Nene gelemaha.

<sup>41</sup> Likigikagutí vegeñá nasahilí ikitatamó nene, likigika viheletokogó minanogo ive.

<sup>42</sup>\* Lekeza Palisaio monó ve ehe tináneve. Lekelí mikutí mapánuha ekipá anuva lamanaki netá itó netá makó haitopaitolímini 10 10 nekutí nene hamopamó aliake Ómasi amiaká niamóza, lekeza nene hehe loko hamó lelegitó vegeñá gona moloakalímini itó likigika Ómasiloka moloakalímini nene ahulikave. Lekelí netá matá 10 10 nekutí Ómasi amiakalímini nene ahuloakaláa nomimóza, imane netá napa nenegi hanuva loló oakalímini neve.

<sup>43</sup> Lekeza Palisaio monó ve ehe tináneve. Lekeza monó numukú numukú nene vegeñalitini kovogisalo minoaká siató minatune liki giliaká niave, itó lekeza maketiloka mukí vegeñá nenete geké lilitatave liki giliaká niave.

<sup>44</sup> Lekeza ehe. Lekeza gonosi milimili halá geneimó nenéminiki niave. Áminaló vegeñalite mihina niake likigikagú lili okave liki gilísá amave.

<sup>45</sup> Loko Izesú lokago, monó mogona apí-okimiaká ve napa makolímo lo amike monó gizapa velemaka, geza láa loko nolanike lelikumuki gahá nolape.

<sup>46</sup> Loko lokago, Izesú láa loko limó: Oo, lekeza monó mogona apí-ikimiaká ve, lekeza ehe tináneve. Lekezatini li mila gakó nenémo genavagi loló okago vetini kiginagú gihikimiaká niago, keza silipa iki gihiaká niamóza, ámina genavagi netá nene lekezatini likigizani hisúinitunú kilími vatí itúgi iki ma alísá amave.

<sup>47</sup> Lekeza ehe. Lekeza avotike Ómasímini agepagutí gakó liaká ve kipili hilina vetini gonosi milimili numuni lamaná lili iake gonanalisi ikimiaká niave.

<sup>48</sup> Lá niago, lekeza avotike iki müliki iaká amoláa hizi lé iaká niamómámini mogona utó okave. Avotike keza Ómasímini agepagutí gakó liaká ve kipili hilikago, lekeza keikitana niake gonosi mülímili numúini lamaná líli ikimiaká niave.

<sup>49</sup> Nenemú Ómasi eza gele vevesoaká noi ve nenémo láa loko lonoimóma neve: Negepagutí gakó liaká vegi aposologi kimiselekugo, viki niiko, lugáa gopoguni milikimiiki lugáa kipili hilinigave.

<sup>50</sup> Loko lonoimó nenazo, mikasi gena oake mino-loko iteko novigo, Ómasímini agepagutí gakó liaká ve nikepelego golani lekemó nenémini lihima nene imane gamenaló nia vege-nalitini kumupiló ite asú inogo ive.

<sup>51</sup> \* Neza lamaná lo likimitoze, gililo. Atani gipala Epoloni apele nohiligo golani leki gamenalotí Ómasímini agepagutí gakó liaká a vejená lugáa kipili hililiki nivago golani lekikago, Zakalí eza Ómasi guguni gizi amiaká itagi etó onoi numunigi holutó noigo napelego golani lekímó, kei golanímini lihimavala nene imane gamenaló nia vege-nalitini kumupiló itinogo ive.

<sup>52</sup> Lekeza monó mogona apí-ikimiaká ve, ehe. Lekeza gakó gele vevesoaká gahémini kiila aliki vikave. Lekezatini áminagú itemake, vejená makó itinigi niago gapo hizi lí ikimiaká niave.

<sup>53</sup> Loko loake, numukutíma nolimigo, monó mogona apí-ikimiaká vegi Palisaio monó vegi keza gakatunú Izesuni lova ali aminigi gakó loká loká itamó.

<sup>54</sup> Izesú gakó lo gopa okiko goní otatune liki aí agepaló gizapa iki minamó.

## 12

### *Izesú soza sunimú kagata alimó*

(Mat 10:26-27)

<sup>1</sup> \* Lá niago, vejená makó iki kugupeló kugupeló iki sii sii liki alegesá ikago, Izesú nene izegipala zuhaloka láa loko lo kemeneike limó: Palisaio monó ve nenete sozaló vetini suni aliki iki müliki iaká amó nene ekesá netá neve. Lekeza nenemú ehe, gizapa ilo.

<sup>2</sup> \* Hitonoiti netá nene utó o asú ititokó neve. Itó asuguná iki lílí ina netá nene utó okiko vejená mukilite gilinigave.

<sup>3</sup> Lá niiki holugú límugusigú gakó legesó iki linamó nene hanatoka likiko mukí vege-nalite gli asú inigave, itó lekeza numuni agikagú gakó musika linamó nene numuni hetotí gakó napagutí lí utó niko gilinigave.

### *Lehelele viziti ve lelepizimó*

(Mat 10:28-31)

<sup>4</sup> Nigivénéigita, lo likimitoze, gililo. Vegená makolite lukugupegó apili hilinigave. Alika netá makó lílí ilikitatamó nomitimó nenazo, lá ita vejenakumú lekelegesá legemino.

<sup>5</sup> Lá onoimóza, lehehelele viziti ve makó lekelepizitove. Ómasi eza lukugupe apele helekoko ló apakú lekehelú o ahuloaká zámuzagi ve noive. Neza lamaná lo nolukumuze, gililo, aikumú lekelegesá liginó.

<sup>6</sup> Somohá nene ha netá nianazo, golohá moni lositatunú nama somohá ligizani lugaloka asú igo meina hizemosaláa neve. Lá onoimóza, Ómasi nene nama somohá makokumú ma agatí molosá amive.

<sup>7</sup> Lekelí gototini zopovatini gatoakaláa nene Ómasímo gele asú oko geleneive. Itó lekeza nama somohá niamave. Lekelisi nene vejená nianazo, itó Ómasímo gizapa olikimiaká noinazo, nenemú netá makokumú ma lehehelele vizemino.

### *Izesuni izegipala zuha noute loko lo utó oaká itó zeko hitoaká*

(Mat 10:32-33; 12:32; 10:19-20)

<sup>8</sup> Neza lo likimitoze, gililo. Vegenalitini kovogisalo ve makó keza není nugulizá lí utó iki nilími napa itamó nene, okulumakutí lumu ve gihila neza Ómasímini agelogini kovogisalo ámina oko kelémo napa oko linogo uve.

<sup>9</sup> Ve makó keza vetini kovogisalo nenikumú zivi hitivi itamó nene, neza ámináminoko Ómasímini agelogini kovogisalo keikumú zevo hitovo itomóma neve.

<sup>10</sup> \* Itó makó keza okulumakutí lumu ve gihila nenikumú alivi letivi itamó nene, Ómasímo ámina lihimavala ahuloakaláa nene nemóza, Ómasímini Sikalahukumú alevo letovo oakaláa nene, Ómasímo nenémini lihimavala ahuloakaláa nomive.

\* 11:51: Apí 4:8; 2 Iki 24:20-21      \* 12:1: Mat 16:6; Mak 8:15      \* 12:2: Mak 4:22; Luk 8:17      \* 12:10: Mat 12:32; Mak 3:29

11 \* Itó monó numúikupe monó gizapa vetini itó kugulizaki vetini kovogisalope goní nilikítikoma, konotó aleko nana gakó litupe itó nanave loko litupe liki lakagata giliko gena amino.

12 Ámina gamenalóisi lekeza lita gakó nene Sikalahulímo lo lekeme lekeme noiko li kimitamó nenazo, lekeza mulutini itemino.

*Negi henonagi vemú anoza gakó*

13 Loko lokago, alegesá iki mina vegeanakutí ve makolímo Izesuni lo amike láa loko limó: Monó gizapa velemaka, geza uvónehini lo amekako, ametehe nene helisa henoní mololetamó nene gona moloko lugáa nimitive.

14 Loko lokago, Izesú láa loko lo amimó: Vémage, helisa henonimú gona mololeketatane loko itó gonikumú lo hukoleketatane loko éaho nelémo etó okago nolane.

15 Loko loake, vegeená láa loko lo kimimó: Lugupémini henoní vaí oko minatimó nenémo ligikámini henoní ale utó amitimó nenazo, ániyo lukumu heleaká netakumú gizapa ilo.

16 Loko loake, anoza gakó makó láa loko lo kimimó: Moní henoní vaí oko mína ve makolímini mikasi nenémo nosáneta vaí oko ale utó imó.

17 Ale utó okago, mulunagú nene ale moloaká numukú nene nosáneta vaí okanazo, nosáneta lugáa nene nana itove.

18 Loko geleake, láa loko gilimó: Nosáneta ale moloaká numunima lukokinake napa napa gitove. Lá okinake nosáneta negi netá matánegi nene ámina numukú ale molatove.

19 Ale molokinake, nezánemú láa loko litove: Nezáne netá matá vaí oko minokamó nenazo, asú amiko melekeni mukí oko vinogo ive. Nenemú navasú vizinake nosáneta noko zahí nagamí noko nogoliza vizeko minanogo uve.

20 Loko gelekago, Ómasímo láa loko lo amimó: Negi ve neneka, itína holugú geí sikalahuka alekugo hiliinogo ane. Lá okiko nosáneta henokanoka ale molanimó nene hutilí inogo ive.

21 Loko lo amitimó nenazo, netá matá vaí oko minati ve makó eza Ómasímini agómulaó gohogó ve minatimó nene, ámina suni aitoka utó inogo ive.

*Mulute iteaká gakó*  
(Mat 6:25-34)

22 Loko loake, izegípala zuha láa loko lo kimimó: Lá onoigo láa loko lo nolukumuve. Lekeza miniki aliki itakumú nene nosáneta hikutí noko minatupe itó ginegane nene hikutí ale akalatupe liki mulutini itemino.

23 Nosáneta nene netá gihila nomive. Lekelisi miniki aliki itamó nenémo netá gihila neve. Itó lukugupeló ginegane nenémo netá gihila nomive. Lukugupe nenémo netá gihila neve.

24 Namamú lakagata giliki gili vevesalo. Keza netá matá zuhá isá amave, itó minumuni o molokago nosáneta nene numúikú ali nupa iki nisá amave, itó nosáneta ali mílata numuni gisá amamóza, Ómasímogó nosáneta gopa ale utó o kemeaká noive. Itó lekeza nama minamave. Vegená nianazo, itó nama mukí nene limiki niago lekeza itiki niamó nenazo, Ómasímo netá matá hanuva ale utó mololeketatimó nene.

25 Lekelikutí makó éaho muluna noitiko minoko aleko ititó nene ezáa agata geleko kilisimasi makó miní ameko molomo iteko minative. Ma nomive.

26 Itó nene netá koma nemóza, lekeza ámina netá alisá amamó nenazo, netá makokumú nanamú mulutini iteaká noive.

27 \* Lekeza palauá guvava oko minoaká noimó nenémini mogona gili vevesamahe. Palauá kéisi nene hoza makó alisá amave, itó ginegane lamanatamanakó ali luhatakumú gó isá amave. Lá onoimóza, neza lo likimitoze, gililo. Gozapá agulizaki ve napa Salomó nene gonanalivagi netá ale luhoaká imóza, palauá nenete Salomoni agupeló netá aviligikave.

28 Palauá nene itínasa utó oake gó lokago gululupasokago hukiki ló giziaká niave. Itó Ómasímo lokago ámina palauá nenémo gonanalivagi netá ale koloaká noinazo, nenemú lekeza komasí gili alévolé inamó neneta ginegane nene Ómasímo hanuva ale utó oleketanogo ive.

29 Lekeza lakagata gululusi nigiliki leza nana netá natunimó neve, itó nana zahí nagamí natunimó neve liki mulutini itemilo.

30 Keza numutó namató monóini nomi vegeená nenete ámina netakumú kagata gululusi giliki vitagá iaká niave. Lá niamóza, ametipo nene ámina netá lekelitoka minamitimó nene minamitave loko geleneive.

\* 12:11: Mat 10:19-20; Mak 13:11; Luk 21:14-15

\* 12:27: 1 Kug 10:4-7; 2 Iki 9:3-6



<sup>31</sup> Lekeza ámina netakumukopa Ómasímo gizapa vetini loló iti gapogú likigika lakagata goí iki miliko vo minino. Lá ikiko nene, lukugupémini netaki nene hagitana lehizeleketanogo ive.

*Okulumakú henoni ale nupa oaká gakó*  
(Mat 6:19-21)

<sup>32</sup> Lekeza vegehá luguhá nupa inamó neneta lekehelele vizemino. Ametipo gizapa omiaká noi netá matá mukí lehizeleketanogo agoliza vizeko nogilive.

<sup>33</sup> Nenemú nene henokanotini salimiiki áminalotí meinava moni aliiki gohogó vegehá kimilo. Lá iiki moni gúeaká gó haitolímíni hulupa lamitímíni alilo. Lekeza lá iki okulumakuka asú amiti henoni ali nupa itamó nene, neneló guminaló vete mihina aminigave, itó gúnakonímó hutamitimó neve.

<sup>34</sup> Henokanotini lamaná neti apatoka nene, likigika neinogo ive.

*Gelekelé izegipate gizapa iki minata gakó*

<sup>35</sup> \* Lekeza lavolavo gotini ali likiiki gohatitó leti ziiki lamu ló ligi miliiki ali nené iki minalo.

<sup>36</sup> \* Ve makó keza gizapa venini nene vená alimi ame gamenaló amisi gitatotí numutoka atiginá oko atikumú ageva iki minake, eza oko gaheló okohá zekiko litá oko gahe segetatune liki gizapa iki minamó. Lekeza ámináminiki gizapa iki minalo.

<sup>37</sup> Gizapa venini nenémó oko gelekelé izegipala nene akamiki gizapa iki minikiko ángatimó nene kogoliza viziki minanigave. Neza lamaná lo likimitoze, gililo. Gizapa venini nenémó okoko hoza aleaká lavolavo likeoko nosánétá iki miniki nalo loko lo kemeoko, ezáa oko nosánétá vatá oketoko gona moloko kiminogo ive.

<sup>38</sup> Eza nene holugú akovevé ahe itó gó lomolomohe oko ángatimó nene, gelekelé izegipala gizapa iki niko ángatimó nené, keza kogoliza viziki minanigave.

<sup>39</sup> \* Itó lekeza imanemú gililo. Numuni amelaho nene guminaló ve ati gamenamú gililina, guminaló vemule loko gizapa onoitimó nenazo, guminaló ve nene oko numuni zeke epetamitimó neve.

<sup>40</sup> Ámináminoko okulumakutí lumu ve gihila neza negeva iki minamita zupa anogo unazo, lekezagi ali nené iki minalo.

*Amegesa moloko Ómasi gelekelé otatuni gakó*  
(Mat 24:45-51)

<sup>41</sup> Loko lokago, Pitá láa loko limó: Guivahanitemaka, anoza gakó lo nolemenimó nene lelikumukó nolape itó ve makokumuki nolane.

<sup>42</sup> Loko lokago, Guivahanímó láa loko limó: Hozaló ve makó nene gele vevesonoko gele minatimó itó hozaváa nene amegesa moloko minati ve nene gizapa vevámo aí numukú netá matató gizapa oko minoko hozaló ve makó lugáa gizapa oketative loko lomikiko nosánétá nata gamenaló nene gona moloko kimiti vémini mogonamú lo likimitove.

<sup>43</sup> Gizapa veva nene okoko ámina hozaló ve nene goí oko lotamómámini oko hoza naliko ángatimó nene, ámina hozaló vemú giligo nene lamaná itimó neve.

<sup>44</sup> Lá onoinazo, neza lamaná lo nolukumuze, gililo. Gizapa vevámo lá oko gizapa lamaná i vema nene mukí netató gizapa ve loló otanogo ive.

<sup>45</sup> Lá itimóza, ámina hozaló ve nenémó není gizapa vema nene gamena hána minokaze, litá oko aminogo ive loko mulunagú gelekoko, hozaló ve vená makó lugáa kepeleká itó nosánétá nene hanuva noko minoká itó zahí nagamí noko itó ekesá nagamí noko negi nagi hizeko minoká itimó nene,

<sup>46</sup> ámina hozaló vémini gizapa veva nene okoko ámina hozaló ve nene gizapa vevamú ageva oko minamiti gamena eza gatizá minati gamena okoko ámina hozaló ve nene agupe apelevo hukovo ooko amisele ahulokiko, hozamú mulúikú gili alévolé inamita vegehá niakú voko minanogo ive.

<sup>47</sup> Hozaló ve makolímó nene gizapa vevámini agepagutí gakó gelekoko netá ale vavá oko minamoko gizapa vemámo li gakotó amegesa molamitimó nene, gizapa veva nenémó vauva aleko napiliko goní hoza napa alitimóza,

<sup>48</sup> hozaló ve makolímó gizapa vevámini agepagutí gakó gelemoko nogosani nati suni alitimó nene, gizapa veva nenémó hana okogó apilinogo ive. Ómasilokatí helisa henoni vaí iki alinita vegehá nene Ómasímo ali atiginiki nimitave loko goha lokiko aminigave. Itó Ómasímo ve makó nene netá vaí oko kemeneitimó nene, ali atiginiki nimitave loko lokiko goha aminigave. Itó amemitamó nene, nana oketative.

*Izesuni monokumú hize hóu latuni gakó  
(Mat 10:34-36)*

<sup>49</sup> Neza mikasiuka ló gizoleketatove loko lemekumóma neve. Itó mukí veenalitini golesa netáini ló gizatove loko itína lalina, mulúnegú lamaná gululine.

<sup>50</sup> \* Miluma netá gihinitanigave. Velesá gihiniti asú inamiko mulúne gitihiná iko minoloko novugo alika gihinitanigave.

<sup>51</sup> Nenikumú nene imane mikasiuka nonagá ale utó itane loko lemekane liki nigelehe. Óe, lo likimitoze, gililo. Není monokumú hize hóu loaká netá ale utó inogo lumumóma neve.

<sup>52</sup> Itína gamenalotí veletó nene numuni makokú vejená ligizani lugaloka asú igo nitamó nene, není monokumú hizi hóu liiki, ve losive makole nenete ve losimú nene gala ve lilí ikitanigave, itó ve losi nenetosa ve losive makolemú gala ve lilí ikitanigasive.

<sup>53</sup> \* Lá iiki, lá iki hizi hóu lanigave. Amelahiko gipalago mini luga luga iki hóu lanigasive, itó izolahiko moholago mini luga luga iki hóu lanigasive, itó anohúvolahiko avolahiko mini luga luga iki hóu lanigasive.

*Itína gamenámini mogona gele vevesoaká gakó  
(Mat 16:2-3)*

<sup>54</sup> Loko Izesú loake, alegesá a vejená láa loko lo kimimó; Lekeza límusi makó ezegalokatí noitiko ániagiake, golini mota zinogo ive liki liaká niave. Láa liki linató nene gihila zeaká noive.

<sup>55</sup> Itó okulumá nene anupakó utó noiko, ániagiake, hogafí napa lanogo ive liki liaká niató nene gihila zeaká noive.

<sup>56</sup> Lekeza sozaló vejenáise, mikasímini mogona gona miliká itó okulumalímini mogona gona miliká iaká niamóza, itínasa gamena oko moloko noumómámini mogona nanamú gili vevesisá amave.

*Goní ogetati ve amekú molozo  
(Mat 5:25-26)*

<sup>57</sup> Itó lekezatini nene mogona makó hee lo noitimoláa nanamú gona milisá amave.

<sup>58</sup> Lá niake, ve makolímó goní ogetanogo goní numutoka gelémoko novoko goní napa ale heleaká veló gelémoko noviko, gapoloka makó niviki mulunagú hulu itive loko netá makó amitanize. Lá amoko áminagi aleloko gopa hanuva goní ale heleaká ve noitoka anititanimó nene, goní napa ale heleaká ve nenémo pilisi vetini kigizakú gelémo molokiko nagá numukú ahuligimikataze.

<sup>59</sup> Neza lamaná lo nogumuve. Zunigú nagá numuni napagú minokoko lihimakámini meinaváa koma napa apaso asú amitanimó nene, áminagú ahulogimikiko mino-loko voko minanogo ane, loko lo kimimó.

## 13

*Tolova ikatave liki likigika ali viligalo*

<sup>1</sup> Ámina gamenaló neneló mína vejená lugáate Galilaia vejená makolitini gokoláa nene Izesuni láa liki li amemó: Keza Ómasímini guguni gizi namego, Pilató nene kepele nahulake Ómasímini guguni gizi ame netalímini golanigi keí golanigi ale gopánapa imó.

<sup>2</sup> Liki li amikago, eza konotó aleko láa loko lo kimike límó: Galilaia vejenakutí lá iki hele veenalitini lihimaváini napa napa nego lá iki kemeni vami gapo vikave liki nigelehe.

<sup>3</sup> Lá oko nomive loko lo nolukumuve. Lekelisi ámináminiki likigika ali viligamitamó nene, lekezagi lá ikigó tolova inigave.

<sup>4</sup> Itó Siloama apatoka numuni napa makó nene lemeko akake vejená 18 kepele hilimó nene, Zelusalega mína vejenakutí lá iki hele veenalitini lihimaváini napa minamole liki nigelehe.

<sup>5</sup> Lá oko nomive loko lo nolukumuve. Lekelisi ámináminiki likigika ali viligamitamó nene, lekezagi lá ikigó tolova inigave.

*Zuta vejenalite kigika ale viligamosá nenémini anoza gakó*

<sup>6</sup> Loko loake, Ómasímo Zuta vejenakumú goselé apilikumú anoza gakó makó láa loko límó: Ve makolímó nene gohuna za makó zuhá oake, minake, alika ake gihilamú vitagá imó. Oko ániagamó nene gihiláa nomigo,

<sup>7</sup> mikú hozaló véa láa loko lo amimó: Ánigozo, melekeni losive makole oko novigo imane gohuna zámimi gihiláa liginogo umóza, gihiláa nomive. Mikasi nogozáa hanuvamú ale asú okatize, apele ahulozo.

<sup>8</sup> Loko lokago, mikú hozaló vemámo láa loko lo amike limó: Golohá venemaka, itína meleketó mogonauka hoza aleko mikasi ale viligokinake, pulumaká izatini ase makó nene molatove.

<sup>9</sup> Lá okugo, alika kilisimasiló nene gihila zitimó nene, lamaná itive. Gihila zemikoma, apelezo loko lokako, apele ahulatove, loko live loko Izesú limó.

*Holisigú helisala zová zi vená alémo zokamó*

<sup>10</sup> Holisi makokú Izesú nene monó numukú iteake monó gakó lainim-oketamó.

<sup>11</sup> Lá noigo, vená makó minamó nene holosi makó agikagú noigo melekeni 18-ía oko novigo netá napa gizaleko minoaká imó. Lá noike, helisagí zová zekago, hee loko ote minamitimó imó.

<sup>12</sup> Lá noigo, Izesú nene ánigoake, gakó napagutí láa loko lo amimó: Vená geza givisi netá apasogimikuve.

<sup>13</sup> Loko nolike venámámini gotolaló agizanitunú nónohá zetago áminasitó litá oko ámina vená nenémo ote vevesoake Ómasi agepoka limó.

<sup>14\*</sup> Lá noigo, monó numuni gizapa ve napámo holisigú Izesú alémo zokakumú mulunagú golesa geleake, áminaló mina vejená láa loko lo kimimó: Hoza aleaká gamena nene 6-así nenazo, livisi vejená lelémo zokative liki nigilikima nene holisi gamenagú amiki hoza gamenagukó alo.

<sup>15</sup> Loko lokago, Guivahanímo láa loko lo amimó: Lekeza sozaló ve genezatini losigi minamó neneta, holisigú nene pulumaká izatini numukú viiki nagamí natave liki toki iza pulumaká izatini nene hoza aliki vinasiki kilímiki viaká niamó neve.

<sup>16</sup> Lá onoinazo, Zuta venáma imane nene Satá alémo golesa okago, noigo, melekeni 18-ía oko vimó nene avisi netalímimi mogonáa nene holisi gamenagú apasotatomó etamihe.

<sup>17</sup> Loko noligo, gala veva nenetini kovoza napa hilimó. Lá noigo, ve vená mukí keza golvagi netá lamanalímimi loló ikumú nene kogoliza vizeke geké lamó.

*Masteti zuha netakumú anoza gakó*

*(Mat 13:31-32; Mak 4:30-32)*

<sup>18</sup> Lá niago, Izesú láa loko lo kimimó: Ómasímimi avogisáló vi hilata vejená nene nanámimiki niave. Nanetalímimi amupiló ale moloko litove.

<sup>19</sup> Masteti gihila nenémimiki niave. Ve makolímó ámina gihila hamó alekoko minagú zuhá imó nene goloko iteake zagitana okago, nama nenete ake izanaló numuni gemóma neve.

*Peleti lulu vizeaká netakumú anoza gakó*

*(Mat 13:33)*

<sup>20</sup> Loko loake, goha láa loko limó: Ómasímimi lapanató vo holoakaláa nene nanetalímimi amupiló ale moloko litove.

<sup>21</sup> Peleti lulu vizeaká netá nenémimiki neve. Vená makolímó nene peleti lulu vizeaká netá nene talam losigú polisigi ale gopa okago, hutilí okago, peleti nene lulu vize napa imó neve loko Izesú limó.

*Gateni komagú iteaká gakó*

*(Mat 7:13-14,21-23)*

<sup>22</sup> Izesú nene Zelusalega vinogo noike apá kománapagú vike, gakó lainim-oketomo mohona noike vimó.

<sup>23</sup> Lá noigo, ve makolímó lo amike Guivahanínemaka, Ómasímó vejená luguhakó kugutó vizitihe. Loko lokago, Izesú láa loko lo kimike limó:

<sup>24</sup> Gateni komagú itinigíma lekeza helisatini ali alévolé iniki ititave. Neza láa loko lo nolukumuve. Vegená mukilite ititune liki gilitamóza, iteminigave.

<sup>25</sup> Lá niiko, numuni amelaho nene oteoko numuni gahe ze lí okoko gahe lopena hizekiko, lekeza hetoka otiniki gaheló okohá ziki sele liki Guivahanitemaka, gahe segeletozo. Liki likiko, neza lekeli ángo hehe lamuve. Hí numutoti vejená niave.

<sup>26</sup> Loko lo lekemekugo, lekeza láa liki li niminigave: Gezagi makó minunike nosáneta noko zahí nagamí noko nounike, geza nene lelí numute gapoló vanike numuteló monó gakó lainim-oletanimóma neve.

<sup>27\*</sup> Liki li nimikiko, neza láa loko lo likimitove: Lekeza hí apakú vejená niahe loko gelemuve loko mota lo lekemekuve. Lekeza golesa netatokagó mihina amó neneta aló viló loko lo likimitoze.

\* 13:14: Gá 20:9-10; Gapo 5:13-14 \* 13:27: Age 6:8

<sup>28</sup>\* Loko lokugo, lekeza ániगतamó nene, Avalahá Isaká Zakopó itó Ómasímíni agepagutí gako liaká a ve mukí nene Ómasímíni gizapaló niiko itó lekezatini likimisele ahulokiko hetó niiki ániigiiki ive nama iki miluma maluma giliki lekegepa atalá iki minanigave.

<sup>29</sup>Lá niiko, vejená ho noítitokatí itó ho nolimitokatí ezegalokatí emegalokatí iki alegesá iiki Ómasímo gizapa okimiakató nosáneta niki kogoliza vizinigave.

<sup>30</sup>\* Lekeza gililo. Itína gamenaló limiki mína vejenakutí makolite alika itiki minanigave. Itó itína itiki mína vejenakutí makolite alika limiki minanigave, loko limó.

*Izesú Zelusale vejenakumú ive imó*  
(Mat 23:37-39)

<sup>31</sup>Ámina gamenalóisí Palisaio monó ve makó iake láa liki li amemó: Geza imane apá ahulokoko vozo. Agulizaki ve napa Heloté gepele hilinogo ive.

<sup>32</sup>Liki likago, eza hoza aleloko voko ale asú okoko alika hilitikumú anoza gako láa loko lo kimimó: Lekeza víki ámina gala amekí ve láa liki li amíkiko gilino: Itínagi azogi mininake holosi golesa kepeleko kimisele ahuloká itó kivisi vejená kelémo zokoká okinake okozá hozane nene ale lutigitove.

<sup>33</sup>Lá onoimóza, haitó apá makotoka Ómasímíni agepagutí gako loaká ve makó apili hilitamó nene etamitive. Zelusalega lá itave liki linamóma nenazo, itínagi azogi okozaki nene neza gaponeuka vinogo nouve.

<sup>34</sup>Kee, Zelusale vejenáise, Ómasímíni agepagutí gako liaká ve kipili hiliká itó Ómasímo lekelitoka hozaló kimisili vejená nene lekeza gehanitunú ahuli míliki kipili hiliká iaká niave. Neza lekelí izegipatini zuha nene okolohómo izegipala ale mulunauka moloaká noimómáminoko gamena gamena kelémo mulúneuka molanogo oaká noumóza, lekeza gili nimísá amave.

<sup>35</sup>\* Nenemú gililo. Ómasímo viselelikimíkiko apatini nene gámé numuni vizinogo ive. Neza lo likimitove, gililo. Lekeza neni nene goha ma áninagamiki mini-liki nivíki alika nene Guivahanímíni agulizató anitelimikane. Ómasímo lusa gegimikave liki li niminigave, loko limó.

## 14

*Izesú agisa agizani lulu vizi netá gizali ve alémo zokamó*

<sup>1</sup>Holisi makokú Izesú nene Palisaio monó vetini kugulizaki ve makolímíni numukú iteko nosáneta noko noigo, Izesú netá ale gopa itihe liki gizapa iki minamó.

<sup>2</sup>Lá niago, áminaló ve makó minamó nene, agisa agizani lulu vizi netá gizali ve nene Izesuni avogisaló minamó.

<sup>3</sup>Noigo, Izesú nene monó mogona apí-ikimiaká vegi Palisaio monó vegi loká oketake leza kivisi vejená nene holisi gamenagú kelémo zokosá nehe kelémo zokamosá neve.

<sup>4</sup>Loko lokago, keza nene kegepa apiziake minamó. Lá niago, ámina avisi vema alémo zokoake amiselekago, vimó.

<sup>5</sup>\* Vokago, Izesú láa loko lo kimimó: Lekelikutí ve makolímíni gipalahe pulumaká izaha gale hánagú holisi gamenagú vелеhé limitimó nene, holisimagule lokoko ahulokiko áminagú minatimó nehe. Itó litá oko gelelehá oko galegutí alémo otitimó neve.

<sup>6</sup>Loko lokago, anotó aliki li amemisá amó.

*Nosáneta alesa molo kemeakakumú gako*

<sup>7</sup>Lá ikago, alesa molo kemekago a vejená nene nosáneta nanigi niake, siá lamanaláló minatune liki niago, Izesú ániagoake, anoza gako makó láa loko lo kimimó:

<sup>8</sup>\* Ve makolímó nosáneta napaló atane loko alesa molo gemekiko nookoma, siá lamanató minamo. Ámina nosáneta alesa molo gemekiko nookoma, siá lamanató minamo. Ámina nosáneta alesa molo gemekiko nookoma, siá lamanató minamo.

<sup>9</sup>alesa molo likimíni ve nenémo okoko geza imane noani siá ahulokoko imane ve amezo. Loko lo gemekiko, geza govoza helekiko kemegejaloka ne siá golesaló minokatanize.

<sup>10</sup>Nosáneta napaló alesa miligimikikoma, geza vokoko kemegejaloka siató noako, alesa molo gemeneiti ve nenémo okoko zogone geza kovogisaloka ne holomaló voko minozo. Loko lo gemekiko, nosáneta níki nia vejenalitini kovogisaló gugulizá oteko vinogo ive.

<sup>11</sup>\* Ve makolímóhe makolímóhe ezáa agulizá ale otitimó nene, ezáa agulizala liminogo ive. Itó ve makolímó ezáa agulizala aleko lemeko molatimó nene, Ómasímo aí agulizala ale napa inogo ive.

\* 13:28: Mat 8:11-12, 22:13, 25:30 \* 13:30: Mat 19:30, 20:16; Mak 10:31 \* 13:35: Age 118:26 \* 14:5: Mat 12:11

\* 14:8: Ano 25:6-7 \* 14:11: Mat 23:12; Luk 18:14

<sup>12</sup> Loko loake, Izesú alesa molo ami vema láa loko lo amimó: Geza nosáneté napa ale vavá nooko nene, zogoga itó gugunaka itó geza zuha itó geza numukaloka vejená itó moniini vaí onoiti vejenakó alesa molo kememo. Keza nosáneté napa ali vavá niiki alesa mili gimiiiki, nosáneté kemenitó goha akú gimikataze.

<sup>13</sup> Geza nosáneté napa ale vavá nooko nene, gohogó vejenaki kigisa kigizani nakeseta vejenaki kigisa genisi ina vejenaki kogómula lika vejenaki alesa molo kemezo.

<sup>14</sup> Lá okako, keza niiki nene, alika goha akú nosáneté pekimi iki gimitamoláa nominazo, geza gogoliza vizeko minanogo ane. Lá oko noako, Ómasímo vejená lamanaláa hilinitakutí kelémo otíti gamena nene meinaváa giminogo ive, loko limó.

*Nosáneté napamú anoza gakó*  
(Mat 22:1-10)

<sup>15</sup> Nosáneté noko mina ve makolímo Izesú láa loko noligo geleake, láa loko lo amimó: Keza Ómasímo gizapa okimiaká onoító miniki nosáneté niki minata vejená kogoliza viziki minanigave.

<sup>16</sup> Loko lokago, Izesú nenemú anoza gakó makó láa loko lo amimó: Ve makó nenémo nosáneté napa ale vavá inogo vejená mukí alesa molo kimimó.

<sup>17</sup> Alesa molo kemekago, nosáneté nata gamena alitokago, nosánetató atave loko hozaló veva amiselekago, alesa molo kimi vejenatoka vike lekeza alo, nosáneté mota ale vavá okave.

<sup>18</sup> Loko lo kemekago, keza mukitó vitakumú goselekaseleka lake makolímo nene láa loko lo amike limó: Neza mikasi makó meina hizenounazo, neneloka voko ániganogo novuze, agulizaki vema láa loko lo amezo.

<sup>19</sup> Loko lokago, makolímo láa loko limó: Itínasa pulumaká iza ligizani luga luga asú igo meina hizenoumó nenazo, hanuva nitahe loko ániganogo nouze, agulizaki vema láa loko lo amezo.

<sup>20</sup> Loko lokago, makó nenémo láa loko limó: Neza itínasa vená alekuke nouke, nenemule loko vaminogo uze, loko limó.

<sup>21</sup> Láa liki likago, ámína hozaló vemámo nene goha atiginá oko vike keza la gakó nene gizapa veva aveté oko lo amekago, geleake, izapaló molokago, hozaló vema láa loko lo amike limó: Geza litá oko taoniloka voko gapo napagú komagú novoko neneló gohogó vejená kigisa kigizani nakeseta vejená kogómula lika vejená kigisa genisi ina vejená kelémoko ano.

<sup>22</sup> Loko lokago, hozaló vevámo gele ameko mohona oake okoko láa loko lo amimó: Gizapa venemaka, hoza gakó lonetanímó mota gele alekumóza, siá makó nene hanuva minokave.

<sup>23</sup> Loko lokago, golohá veva nenémo hozaló vema láa loko lo amimó: Geza nene pilipilí gapoló itó mí gapoló novoko není numukú gikí iki minatave loko vejená gala vizeko kelémoko ano.

<sup>24</sup> Neza láa loko lo nogumuve. Neza goí oko alesa molo kumu vejená amanazo, není nosánetakutí keké naminigave, loko lo kimimó.

*Izesuni ámegetoko vinogo gele vevesatuni gakó*  
(Mat 10:37-38)

<sup>25</sup> Vejená mukí nene Izesuni ámegetiki nivago, eza viligoko láa loko lo kimimó:

<sup>26</sup> \* Makó eza nezagi minatíive lokokoma izolagini amelagini vená izegipala eza zuhamú gelekiko itekikoma, itó ezáa minoko aleko itimó nenemú gelekiko itekikoma nene, itó nenikumú gelekiko lemetigí oko noikoma nene, není izegipa loló oko minaminogo ive.

<sup>27</sup> Makó ezáa zohota zaló apili hilingi miluma netá gihitatakumu gele zageoko némegetamitimó nene, není izegipa loló oko minaminogo ive.

<sup>28</sup> Lekelikutí makolímo numuni napa makó ginogoma ganatiliisi meinaváa gelekoko moni mota akohihe akohemihe loko molo geleko ángokoko, giti avotigí nehe nenémini mogonáa geleko ániganogo ive.

<sup>29</sup> Itó lá amoko litávátá oko gopa numuni ale hizeko gitimó nene, monima asú okiko vítagá okoko numunima ahulokiko, vejená keza ángiiki nene giza itiki,

<sup>30</sup> imane vémo sozáa moloko numuni napa ale hizeake lá iha iha ahulokago lá onoive liki linigave.

<sup>31</sup> Itó agulizaki ve napa makolímo agivelahini agulizaki ve makó apilitove loko oko lova agoka ameminogo ive. Áisi ganá láa loko agata gilino ivo: Leza áimane luguhakó 10 tausen minokune, itó kéisi mukí 20 tausen minikanazo, kepelesá nehe kepelemosá nehe lokoko,

\* 14:26: Mat 16:24; Mak 8:34; Luk 9:23

<sup>32</sup> ezáagi izegipa agunamotamolagimú giliko akohemikoma, gala veva nene numunaloka ha noiko, litá oko hutono netá ameko ve makó amiselekiko voko itína nonagá itune loko nimiselekaگو nouve.

<sup>33</sup> Loko litimó nenazo, nenemú lekelitokatí makó eza ámina oko netá matala mukí ahulo asú amitimó nene nana oko není izegipa loló oko minative.

*Age melelé amitikumú anoza gakó*

*(Mat 5:13; Mak 9:50)*

<sup>34</sup> Age nene netá lamaná nemóza, agema laga amitimó nene, nana oko goha alémo melelé itune. Ma lá aminogo une.

<sup>35</sup> Némini manáminoko ale melelé itunimoláa nomive. Hanuva lepe ahulanogo une. Nenemú lakagatagi minatamó neneta gakó imane gili hee liki gililo. Lekezagi melelé iki minalo, loko limó.

## 15

*Sipsip iza tolova imó nenémini anoza gakola*

*(Mat 18:12-14)*

<sup>1</sup> \* Takisi aliaká vegi moko mogonaló vege naki mukí iki monó gakola gilinigi Izesutoka alegesá iaká amó.

<sup>2</sup> Lá niago, Palisaio monó vegi monó mogona apí-ikimiaká vegi keza nenemú gelego, golesa imó. Goleša okago, Izesukumú láa liki liaká amó: Imane ve eza mokoló vege námagi kelémo molokago nosánetá noaká noimó nene etamive.

<sup>3</sup> Liki likago, Izesú geleake, anoza gakó makó láa loko lo kimimó:

<sup>4</sup> Lekelitokatí makolímó sipsip iza va 100 minatakutí nene hamó tolova itimó nene vitagá amithé. Lá oko nomive. Lugaá 99 hanuva minamoláa makotoka kelémo nupa onoko ahuloketonoko mohona oko tolova imoláamú vitagá inogo ive.

<sup>5</sup> Vitagá oko oko ale utó okoko, mulunagú lamaná geleko agohí geko numutoka alekanogo ive.

<sup>6</sup> Aleko oko agivelagini kelémo nupa okoko láa loko lo kiminogo ive: Sipsip izáne tolova imóma ale utó molokuze, logoliza vizitune loko litimó neve.

<sup>7</sup> Nenemú neza lo likimitoze, gililo. Vatí oko nune liki litamoláa 99 asite kígika ali viligamita vege nakumú nene okulumakú kogoliza aminigave. Ve golesa hámakolímó agika ale viligokagoma nene okulumakú kogoliza napa viziaká niave.

*Moni tolova imó nenémini anoza gakola*

<sup>8</sup> Itó vená makolímó silivá gehani 10-ía molo ikakutí hámakó alemó zitimó nene ma ahulaminogo ive. Eza liví legeko lolopa giteva giteva oko ale utó molokoko,

<sup>9</sup> vená agivelagini kelémo nupa okoko gehanínema alemó zimóma vitagá oko ale utó okuze, nezagi makó logoliza vizitunize loko lo kiminogo ive.

<sup>10</sup> Nenemú neza lo likimitoze, gililo. Ómasímíni ageloge keza ámina iki mokoló ve hámakolímó agika ale viligokagoma kogoliza napa viziaká niave.

*Gipa makó latila inogo imó nenémini gakola*

<sup>11</sup> Izesú nene gakó makó láa loko lo kimimó: Ve makolímíni gipala losi minasimó.

<sup>12</sup> Miníkí alika nanasi nenémo amelahini lo amike ahóno, geza moni henokanoni molo netanimóma nemezo. Loko lokago, moni henokanoni gona moloko gipa lositáma kimimó.

<sup>13</sup> Kemekago, alika nanasi eza mino hána amike henokanona ale nupa oake, gita oko aleko vimó. Voko mikasi gohauka minake, gumesisi gamasisi ike, iza goula nosató henokanona ahulo asú imó.

<sup>14</sup> Ahulo asú oake noigo, ámina mina mikasiló nene gaúna sipisi helemó. Hilikago, nosánetakumú vitagá oake,

<sup>15</sup> mikasi amelaho makotoka voko lokago, eza iza gizapa oko minatane loko lomikago, neneloka voko izama gizapa noike,

<sup>16</sup> nosá makó amemake mosimikago izatini nosánetakutí natove loko imóza, nenegi mositamó.

<sup>17</sup> Lá ikago, minake agata kolosokago, láa loko agata gilimó: Aménehini gelekélé izegipala mukí minake, goula nosánetá lamaná níki nitamóza, neza imaneloka gaúnamú hilinogo nounazo,

<sup>18</sup> numúneloka atiginá oko vinake aménehitoka láa loko lo amitove: Ahóno, golesa netá loló okugo, lihimavánémo Ómasiloka itó geitoka gena okaze,

<sup>19</sup> goha gipakave loko minamitove. Hanuva gelekélé izegipaka nelémo molokako minatove. Loko geleake, oteko amelahitoka vimó.

\* 15:1: Luk 5:29-30

<sup>20</sup> Voko numu gatetó anitigo, amelaho ángoake, milumavala geleake, lolu loko vike anukeake agoka agepa nonago,

<sup>21</sup> gipalamámo láa loko lo amimó: Ahóno netá golesa loló okugo, lihimaváne Ómasiloka itó geitoka gena okaze. Nenemú goha gipakave loko minamitove.

<sup>22</sup> Loko noligo, amelaho nene gelekelé izegipala lo kimike limó: Lekeza litá iki gó lamaná aliiki goló vizitalo. Ana lamaná ali vizitiki suú ali militiki ali namiki,

<sup>23</sup> pulumaká iza akaleva geható minamó makóma apiliki gitalo. Leza ninake logoliza vizeko minatune.

<sup>24</sup> Gipáne nene heleneikutí goha otekave, itó eza tolova onoikutí goha utó okave. Loko lokago, kogoliza viziki gehani giziki namó.

<sup>25</sup> Lá niago, ganá gipalamámo hozauka minakutí ake, númaseloka anitike gilimó nene, kogoliza viziki meleketaakeni niago, geleake,

<sup>26</sup> gelekelé izegipa makó sele lo ameake, okago, loká otoko nuvane nana niave,

<sup>27</sup> loko lokago, ási limó: Gugunakama gozapá vimóma avasavagi omo anitekago, ametipo pulumaká iza akale geható minamóma nene apelego gizo vatá nune.

<sup>28</sup> Loko lo amekago, ganá gipalamámo izapaló molokago, mesaha oake áminaló vo anitemigo, améipo geleake, lemeko alémo hulu iha,

<sup>29</sup> gele ahuloake láa loko lo amimó: Gelezo. Melekeni mukí ale ahulukuke gelekelé ogetoko minuke, gakoka makó gele ahulosá amumóma nemóza, geza nene meme iza akaleva makó nemeko nigive nagavegi ma apeleko namuháma neve.

<sup>30</sup> Itó gipaka alika nanasima geí moni henokanonima moko netató ahulo asú okave. Ánenémini okago, geza lokako pulumaká iza akale geható minamóma apiliki gizi vatá nitahe.

<sup>31</sup> Loko lokago, améipo láa loko lo amimó: Gipánemaka, geza gamena hána nezagi minanimóma nenazo, není netá mukí nene geíma neve.

<sup>32</sup> Itó gugunaka nene heleneikutí oteko okave, itó tolova onoikutí goha utó okave. Nenemú mulutegú lamaná geleko logoliza vizuko lamaná noive, loko limó.

## 16

### *Heno gizapa ve golesámini anoza gakola*

<sup>1</sup> Izesú nene izegipala zuhama gakó makó láa loko lo kimimó: Henonavagi ve napa makolímíni gizapa ve makó minamó. Mínoko gizapa vemámíni gakó makó nene gizapa vemámo henoni ale gopa oaká noive liki lamó nene geleake,

<sup>2</sup> sele lo ameake, láa loko lo amimó: Geí gakó nanave liki lago guluhe. Ve nenéminaka není gizapa ve goha minamítane loko noluve. Hoza tiketima alekano. Moni henokanoníne gizapa anítímíni mogonáa ale utó molatune.

<sup>3</sup> Loko lokago, henoni gizapa vemámo agikatunú láa loko gilimó: Imane golohá venémo hozanema ipá okíko nana itómó neve. Govisi hoza alítómó nene goselé nepelekave. Gapoló monimú voká vokató mohona itómó nene novozáne helekative.

<sup>4</sup> Loko gelekunazo, neza golohá venémo nimiselekíko ve nigivénege nilími lamaná niko numúikú mínoko aleko itomoláamú netá lamaná makó oketatoze.

<sup>5</sup> Loko loake, golohá vevámíni nekisáa ali mína vegenáma hamopamó alesa molamó. Moloake, makó láa loko loká otamó: Golohá venémini nekisa geitoka nanakí neve.

<sup>6</sup> Loko lokago, ási meseme nogoza talam 100 neve. Loko lokago, litá oko tiketi imane alekoko 50 loko gizamane.

<sup>7</sup> Loko loake, makóma loká otake golohá venémini nekisáa geitoka nanakí neve. Loko lokago, ási laisi gó 1 tausen neve. Loko lokago, litá oko tiketi imane alekoko 800 loko gizamane.

<sup>8</sup> Loko lokago, golohá vevámo geleake, henona ale gopa napa gizapa vema gele veveso minake alikumú geké lotamó. Itó monóini nomí vegenalite netá matá inígi gili vevesi minake napaló gili kimiaká niave. Monotinígi vegená lekeza nenémini suni lekelítoka ma minamíve.

<sup>9</sup> Nenemú litoze, gilílo. Lekeza ámina iki moni henokanoni ha netale liiki vegená kimíkíko keza likígíve lílí ikíko, ámina netá ali mínata gamenaváa asú okíko nene alévolé apatoka molo lekemekíko áminagú míniki meinavatíni alinígave.

<sup>10</sup> Makó eza netá koma kamaló nene ale guni oko gizapa itímó ási nene netá napaloka ámina oko ale guni oko gizapa lamaná inogo ive. Itó makó eza netá koma-kamaló ale gopa napa itímó ási nene netá napagi ámina oko ale gopa napa inogo ive.

<sup>11</sup> Lekeza henokanoni ha netá nene ali lamaná iki gizapa amitamó nene, netá gihila nene éaho likímitive.

<sup>12</sup> Itó netá hagitana likimimó nene gizapa i guni amitamó nene, lekelí alévolé henoni nene alika éaho lehizeleketative.

<sup>13</sup> \* Ve hámakolímó kugulizaki ve lositalitini gelekelé ma oketaminogo ive. Lá itimó nene maga ve agika amekoko maga ve mukahá apilitimó onoive. Itó maga veloka gímize lamaná okoko maga ve ángo goselé inogo ive. Lekeza ámináminiki Ómasímíni hoza nemó itó moni henokanonímíni hoza nemó ganagana lelegí oko aleakaláa nomive.

*Mosé lo hukoketa gakoki Izesú gosohá lo hukoketa gakoki*

<sup>14</sup> Loko lokago, Palisaio monó ve keza moni henokanonimú lagaváa gili miniaká a ve nenete giliake, gakola gili hazutazu amó.

<sup>15</sup> Lá ikago, Izesú láa loko lo kimimó: Lekeza nene vegená kovogisalo veveso nune liki amuza miliki mihina iaká niamóza, Ómasímó nene likigikámíni mogonáa geleká noive. Vegenalite ángamó nene vevesonoi netá geleaká noigo, Ómasímó ángigoko gilimó nene muzipa oaká noive.

<sup>16</sup> \* Mosé lo hukoko li gakó itó Ómasímíni agepagutí gakó liaká a vetini gakó minoloko ova ova ike ike Zonitoka anitimó. Nenelotí veletoka nene Ómasímíni gizapaló minoakalímíni gakó lamaná hutilí oko vokago vegená mukilite lovasava iki Ómasímíni avogisagú vinigi lá iaká niave.

<sup>17</sup> \* Okulumaki mikasigi keza vo tolova itíve liki vi tolova itáimóza, Mosé lo hukoko li gakó nenémíni lotonáa hamokó ma haha aminogo ive.

*Izesú vená kimisele ahuloakakumú gakó lo kimimó  
(Mat 5:31-32; 19:19; Mak 10:11-12)*

<sup>18</sup> \* Ve makolímóhe makolímóhe venala amisele ahulokoko haitó vená alitimó nene, ve vená huko ezega emega oakalímíni lihima alinogo ive. Itó ve makolímóhe makolímóhe ahulinita vená makó alitimó nene, ámina netalímíni lihima alinogo ive loko Izesú limó.

*Lasaloki henonagi ve napagi keí gakó*

<sup>19</sup> Izesú anoza gakó makó láa loko limó: Henonavagi ve napa minamó. Eza gó luhuvagigó meinava iteko minamokó ale akoloko minamó. Itó gamena gamena ló gehaka like agoliza vizé vizé oko minoaká imó.

<sup>20</sup> Lá noigo, gohogó ve makó agulizá Lasaló eza agupeló halamé gizaleake henonagi vemámíni numuni sepekuka ako minake,

<sup>21</sup> nosá nakutí litimotila alemó zimoláa ma nimiko natonazo loko geleko minoaká imó. Lá oko noigo, galate aniteke halamelalotí génimiaká amó.

<sup>22</sup> Lá oko minake, gohogó vema helekago, ageló keza alímiki itiki Avalahani amatoka ahulimikago minamó. Itó alika nene henonavagi vema helekago, gale zitamó.

<sup>23</sup> Gale zimikago, meikú lemeko miluma maluma geleko minake, okenava oko ángamó nene Lasaló nene Avalahani amatoka noigo ánikagamó.

<sup>24</sup> Ánikogoake, sele loko láa loko limó: Avalahazo, aménegamaka, nenikumú milumaváne geleoko Lasaloni amiselekako agizani gosavatunú nagamikú lupizeoko oko genezáneloka naliko hulu nivisitho. Neza lokú imane miluma maluma golesa geleko nouho.

<sup>25</sup> Loko lokago, Avalahá láa loko limó: Gipánemaka, gelenape. Geza mikasiuka lagámíni amupiló minanimómá nene mota asú okamole. Itó Lasaló nene miluma malumámíni amupiló minamómá ámina oko asú okave. Itína nene Lasaloni alími hulu niago, géisi miluma maluma geleko noane.

<sup>26</sup> Itó ligilikagú nene zuni napa aleko hukokamómá nenazo, imanelokatí lemeakaláa nomive. Itó nenelokatí iteakaláa nomive.

<sup>27</sup> Loko lokago, henonavagi vemámo láa loko limó: Aménegamaka, makó litoze, gele nemezo. Elane není numutoka

<sup>28</sup> izegipa nugunáne ligizani lugaloka asú igo niave. Keza miluma apakú imane ikataze, Lasaloni amiselekako voko kagata alitive.

<sup>29</sup> Loko lokago, Avalahá láa loko limó: Óve, Moseni gakó itó Ómasímíni agepagutí gakó liaká a vetini gakóma nemole. Nenema gilinitanae.

<sup>30</sup> Loko lokago, eza limó: Óe, Avalahazo, aménegamaka, mokáne, lá oko nomive. Heleleitikutí ve makolímó oteoko voko lo kemekiko, kigika ali viliganigave.

<sup>31</sup> Loko lokago, láa loko limó: Keza Mosele itó Ómasímíni agepagutí gakó liaká a vetini gakó gili ahuliaká nitamómá, ve makolímó heleneikutí oteoko voko lo kimitimóza, nene ámina iki gili ahulanigi anae, loko limó.



## 17

*Golesa netakumú gala vizeaká gakó  
(Mat 18:6-7,21-22; Mak 9:42)*

<sup>1</sup> Izesú eza izegipala zuhama gakó makó láa loko lo kimimó: Golesa netakumú gala vizeaká nene ha minanogo imóza, golesa netakumú gala vizé vizé iti ve nene agae, Ómasimo nana otatimó neve.

<sup>2</sup> Izeqipáne koma koma minakutí ve makolímó netá golesa alitive loko gala vizeko litimó nene Ómasimo nana otatimó neve. Gehani napa nene luvanaló nagá ziki age nagamikú ahelú itamola avilegeko Ómasimo genavagi netá golesa loló otanogo ive.

<sup>3</sup> \* Ehe, lekeza likigika gizapa iki minalo. Likigive makolímó galana alekikoma, gahá ameko agata alezo. Lá okako, geí gakó gelekikoma lihimavala ahulotozo.

<sup>4</sup> Itó gamena hámakó zupa lihima netá alegetoloko vitimó nene gamena 7-ia geitoka oko nigivénege, némini ogetutímó mulúne githiná okave loko lo gimitimó nene, nenemú geza ámina oko lihimavala ahulotoko minozo, loko limó.

*Gele alévolé oakate ale hutilí oletati gakó*

<sup>5</sup> Aposolo keza Guivahanima nene geza gele alévolé oakate ale hutilí oletozo.

<sup>6</sup> Liki likago, Guivahanímó láa loko limó: Masteti gihila komámo goloko iteko zamú geleaká noive. Nenémínoko gele alévolé oakatinía ma minatimó nene, nimuza za volane asutooko age nagamikú omane lemeko ote minamane liki li amitamó nene, gakatini gele lekemekoko hanuva lá inogo ive.

*Gelekelé izegipa loleta hoza*

<sup>7</sup> Lekelikuti ve makolímíni gelekelé izegipala makó nene mikasigú hoza aleko minatikutí itó iza gizapa oko minatikutí únakala anitekiko, gizapa veva nenémó geza litá oko numukuka iteko nosánataka noko minozo loko hanuva lo amitihe.

<sup>8</sup> Lá oko nomíve. Áisi nene láa loko lo aminogo ive: Géisi hoza aleaká lavolavo likeoko únaká nosá vatá onímikako, nonugo, hozaka asú okiko, alika gezaka vatá oko natane.

<sup>9</sup> Loko lo amekiko, gelekelé izeqipama eza gizapa vevámo leta hoza nene alekogó noiko, gizapa vevámo gele lamaná itíhe. Ma alémo napa aminogo ive.

<sup>10</sup> Itó mognatipogi ámina oko neve. Lekeza hoza gakó loleketumó nene lilí i asú iikima leza gelekelé izegipa ánéa nene oletani hozagó alekune, miní ameko makó loló amune liki lilo, loko limó.

*Izesú lokago halamé gizale ve 10 gilelemó*

<sup>11</sup> Izesú Zelusalega vinogo Galilaia mikasigi Samalia mikasigi holúíukí novike,

<sup>12</sup> apá makotoka aniteake noitigo, halamé vegená ligizani luga luga asú igo keza ániagiake, zuha kemeaká netá nenazo liake hotokatí sele liki

<sup>13</sup> láa liki lámó: Gizapa vele Izesugama, lelikumú milumavate gelezo.

<sup>14</sup> \* Liki likago, ánikogoake, láa loko lo kimimó: Lekeza viki gililitamolámú lukugupetini nene guguni giziaká ve nene kelepipzilo. Loko lokago, keza nivago, kugupeló gizale netá gililí asú amó.

<sup>15</sup> Gililí asú ikago, keitokatí hámakolímó gileleake, ániogoake, atiginá oko gakó napagutí Ómasi agepoka lomo lomo,

<sup>16</sup> Izesutoka vike agihúna geko akoake, agepoka limó. Ámina ve nene Zuta ve negopa, Samalia mikasigutí vémo lá imó.

<sup>17</sup> Lá okago, Izesú láa loko limó: Ve ligizani luga luga asú igo gililikamóza, ve 9-ia keza hitoka vave.

<sup>18</sup> Keza atiginá iki iki Ómasi agepoka linigi lamake, hanuva gatizá nivago, Samalia mikasigutí hetoka ve imane eza hámakó noahe.

<sup>19</sup> Loko loake, ámina ve láa loko lo amimó: Gele alévolé anitímó gelémo zokokaze, nenemú oteoko vozo, loko lo amimó.

*Ómasimo gizapa oketati gamena utó iti gakó  
(Mat 24:23-28,37-41)*

<sup>20</sup> Palisaio monó ve keza Izesuni loká itiki Ómasimo gizapa olimiaká ve napa hí zupa utó o lamaná itive liki likago, eza láa loko lo kimimó: Ómasimo gizapa olikimiaká netá nene lekeza ániníniko gonanalivagi utó aminogo ive.

<sup>21</sup> Nenemú lekeza anosa makó ániigiiki, eé, imaneloka utó okave, itó eé, elaneloka utó okave liki laminigave. Gilinahe. Ómasimo gizapa olikimiaká netá nene likigilikagú utó oko nemole, loko limó.

<sup>22</sup> Itó izegipala zuhama láa loko lo kimimó: Minoko gamena makó alitati zupa nene, okulumakutí lumu ve gihila neza gamena hamokó zupa utó ugo ániyanigi lagava gilitamóza, ma ániyaniginigave.

<sup>23</sup> Nene zupahé eé, imane lelitoka utó onoive, itó eé, keitoka utó onoive liki li likimikikoma kémegetiki vamilo. Itó giliko, lamaná aminó.

<sup>24</sup> Gopisína nene okulumá nekisalokatí melevezá okago, vo lutegeaká noive. Ámináminoko okulumakutí lumu ve gihila neza ato gamena alitokiko mikasi nekisa vokisaloka nene vejená mukitó keza neni áni asú inigave.

<sup>25</sup> Lá oko nemóza, oko moloko oaká nou netá ániyáká nia vejenalite neni áni golesa iiki miluma netá mukí nimitave liki linitinamóma neve.

<sup>26</sup> \* Noá mina zupa nene vejená keza miniki aliki amó ámina iki okulumakutí lumu ve gihila neni gamena alí noliko ámina inigave.

<sup>27</sup> \* Keza iza goula nosá nake vená meina-kona ake, zuguzugu zezezege viziki miniliki nivago, Noá eza vená izegipala kelémo sipigú itekago, nagamí napa veleko anitike kepele gesá imó.

<sup>28</sup> \* Itó Lotí mina zupa áminagó amó. Keza iza goula nosá nake meina-kona ake, hozagaza aliki zuhaina zahaina ake, numuni luki giká lá iká iki Lotini gakó gelemiki niago,

<sup>29</sup> Lotí eza Soto apá ahuloake novigo, okulumakutí nene lánihakó netá ló gulumavagi limike vejená kepele gesá imó.

<sup>30</sup> Okulumakutí lumu ve gihila neza minoko utó ito zupa nene mukí vejená keza ámina inigave.

<sup>31</sup> \* Ámina zupa nene numuni numupitó nita vejená nene atiginá iki numúitokatí henóini ma aliki vamítakumule. Itó vejená hozáitoka minatatotí henonimú giliki atiginá iki numutoka amitakumule.

<sup>32</sup> Lekeza Lotini venalámitokagó gili minalo.

<sup>33</sup> \* Makó keza nene kigika kemeníni ali gikitiiki ali minata vejená nene kigika kemeni gopa inogo ive, itó makó keza kigika kemeni vinasí ahulatamó nene alévolé kemetamenigi minanigave.

<sup>34</sup> Neza lo likimitoze, gililo. Ámina holugú nene ve losi keza hamó holomaló akinitáikuti maga ve alémokoko maga ve ahulomikiko minative.

<sup>35-36</sup> Vená losi ámina iki nosá isiki minatáitotí Ómasi nenémo vená magáa alémokoko magáa ahulomikiko minanogo ive.

<sup>37</sup> Loko Izesú lokago, izegipala zuhamate loká itake Guivahanitemaka, nene netá hitoka utó itive. Liki likago, eza láa loko limó: Anuva i netalímo nama gosúveha maú zigo alegesá iaká niave. Ámina oko kigika anuva i vejená minató minató goní napa inigave, loko lo kimimó.

## 18

### *Goní ale heleaká vegí gevoná venaki keí anoza gakó*

<sup>1</sup> Izesú nene izegipala zuhama viki akamiki gamena gamena goselekaselé amiki Ómasiloka liliki viki minikoma nene Ómasímo gele kimitikumú anoza gakó makó láa loko lo kimimó:

<sup>2</sup> Apá makotó nene goní ale heleaká ve makó minamó. Áisi nene Ómasi noimó itó vejená niamó keikumú ma gelesá amimó.

<sup>3</sup> Lá onoigo, ámina apató nene gevoná vená makó minamó. Áisi nene goní ale heleaká ve noitoka gamena gamena vike láa loko lo ameká imó: Geza gala venémo nelémo golesa inogo igo nugutó vizitane loko noluve.

<sup>4</sup> Loko lo ameká noigo, goní ale heleaká vemámo gevoná venámámini gakó gamena hána gele ahuloake minoaká imóza, minoko agikatunú láa loko limó: Neza Ómasi noimó vejená niamó keikumú ma gelesá amumóza,

<sup>5</sup> gevoná vená imanémo negénegé gakó loaká noive. Lá oko loloko ova ova oko nominiko, goselé nepelekatize, nenemú alémo vatí oko ámina gakó apele hilitove loko limó.

<sup>6</sup> Loko Guivahanímo lo asú oake, láa loko limó: Goní ale heleaká ve ginikahámo gakó limó nene mota gilinahe.

<sup>7</sup> Olile. Lekeza Ómasimú nanave liki liaká niave. Eza kelémo etó i vejenala zuhamate gamena gamena negénegeka liki niiko ale vevesoketamitimó neve liki nilahe. Itó gele ahulokoko minatimó nehe. Lá oko nomive.

\* 17:26: Apí 6:5-8 \* 17:27: Apí 7:6-24 \* 17:28: Apí 18:20-19:25 \* 17:31: Mat 24:17-18; Mak 13:15-16 \* 17:33: Apí 19:26; Mat 10:3, 16:25; Mak 8:35; Luk 9:24

<sup>8</sup> Neza láa loko lo nolukumuve. Eza ale akutoko ale vevesoketanogo ive. Lá itimóza, okulumakuti lumu ve gihila neza minoko atiginá oko imane mikasiuka ato zupa nene, není gelegele minatamoláa nene ma nitahe minamitahe loko nagata gululusi noguluve, loko limó.

*Palisaio monó vegi kugupe meina aleaká vemuki anoza gakó*

<sup>9</sup> Ve lugáate kezánimú gelego vevesokago, kigivéikínimú gelego lemeaká noigo, Izesú ániogoake keikumú anoza gakó makó láa loko limó:

<sup>10</sup> Ve losi keza Ómasiloka linigi monó numuni napagú itesimó, makó nene Palisaio monó ve, itó makó nene takisiló mohona oko moni gumina aleaká ve.

<sup>11</sup> Palisaio monó vemámo ote hee lonoike ezámú lá oko gelegele láa loko limó: Kee, Ómasizo, ve lugáa keza laskoli miniki guminatamina iki vená loká iki miniaká niave. Neza keikitana ve minamuve, itó takisi ale ale ve hé melanegitana minamuve. Nenemú gegepoka noluve.

<sup>12</sup> Neza holisigú holisigú gamena lositá nene monokumule loko nosánetá mosekuke minoaká nouve. Itó moni henokanoni nániguke 10 10 nekutí hamopamó nene monokumule loko moloaká nouve.

<sup>13</sup> Loko lokago, takisi ale ale vemámo nene akelepauka minake okenava oko ániganogo avoza helekago, gasinamake minake, láa loko agepoka limó: Kee, Ómasinemaka, ve golesa není gigika híze nemezo loko limó.

<sup>14</sup> \* Gillinahe. Takisi ale ale vemámini lihimauala ahulo asú omikago numunaloka atiginá oko vimó. Palisaio monó vemámini lihima nene ha minamó. Lá onoinazo, kezáini kugulizáini ali otita vegeanalitini kugulizá liminogo ive. Itó makó keza kezáini kugulizáini aliki limiki milatamó nene Ómasímo kugulizáini ale napa inogo ive, loko limó.

*Izesú izegipa koma kama nónohá zeketamó*

*(Mat 19:13-15; Mak 10:13-16)*

<sup>15</sup> Itó ve vená keza izegipáini nene Izesú noitoka agizanitunú kugupeló aleko nónohá zeketative liki kilímiki viaká amó. Lá niago, izegipala zuhamate gahá kimikago,

<sup>16</sup> Izesú nene sele lo kimike limó: Lekeza izegipa koma ahulikimikiko nenitoka atave. Nenémináa keza Ómasímini avogisaló viakalímimi mututoni nianazo, li hoipa ikitamilo.

<sup>17</sup> Neza lamaná lo likimitoze, gililo. Makó keza izegipa namuni monokú vávani iki itiaká niamó nenéminiki monokú itemitamó nene, Ómasímo gizapa okimiakakú keké iteminigave, loko limó.

*Henonavagi gizapa ve*

*(Mat 19:16-30; Mak 10:17-31)*

<sup>18</sup> Itó monó gizapa ve makolímo Izesuni loká otoko Tisá lamanámaka, neza nana okinake alévolé nemetameni alitomó neve.

<sup>19</sup> Loko lokago, Izesú láa loko lo amimó: Geza nenikumú ve lamanale loko nanamú nolane. Lamaná améneho Ómasi hámakó noize, makó nominazo, není mogonamú gele hee lominoko nolape.

<sup>20</sup> \* Itó geza gapo lota gakó gelenane. Láa lokove: Ve aleve suni ale gopa oko huko ezega emega amo. Geza vevená kepele helemo. Gumina amo. Geza soza hakupá gakó lamo. Geza izokahiko amekahiko kugulizá ale otezo.

<sup>21</sup> Loko lokago, gizapa vemámo láa loko limó: Neza ámina lo huka gakó mukí nene izegipa namutotí apí oko ámegetoaká noumóma neve.

<sup>22</sup> Loko lokago, Izesú gelegele, láa loko lo amimó: Netá hámakó velesá loló amanimó nene ale hee litanize. Geza voko henokanoka mukí nene meinaló moloko moni alekoko gohogó vevená kemekoko, oko némegetozo. Itó lá okako okulumakú helisa henoni utó ogetanogo ive.

<sup>23</sup> Loko lokago, ve eza henokanona vaí oake minamó nenazo, gona moloko kimitohe loko giligo gena imó.

<sup>24</sup> Lá okago, Izesú ániogoake limó: Henokanóiki vevená keza Ómasímini lapanató silipa iki ititamó neve.

<sup>25</sup> Kamele izámo nakasi vovónagú voakaláa vávani oko nomimóza, henokanóiki vevená nene Ómasímini lapanató voakaláa nene ámina oko genavagi golesa neve.

<sup>26</sup> Loko noligo gele vegeanalite láa liki lamó: Íi, láa lokoma éahinima Ómasímo agutó vizekiko minoloko voko minative.

\* 18:14: Mat 23:12; Luk 14:11      \* 18:20: Gá 20:12-16; Gapo 5:16-20

<sup>27</sup> Liki likago, Izesú lo kimimó: Vegenalite nenémini itamoláa nomimóza, Ómasímo loló itove loko agata gili netá nene vávami okogó loló oaká noive.

<sup>28</sup> Loko lokago, Pitá láa loko lo amimó: Gelenape. Leza mukí netá matate ahulo asú okunike geí gémegetokuninazo, alika nene meinava alesá nehe.

<sup>29</sup> Loko lokago, Izesú Pitaginima láa loko lo kimimó: Lamaná lo likimitoze, gililo. Makó keza numúini apáini nehe vená izegipáinihe gouna zuhahe izíokini améikinihe Ómasímini lapanakumule liki ahulikítiki iki nemegeosaló atamó nene,

<sup>30</sup> nenémini meinava nene mikasiuka napaló alinigave, itó miniki okulumakuka alévolé kemetameni alinigave, loko lo kimimó.

*Izesú ezáa alika hiliti gamenamú epoapoga ligo gamena losive makole imó*  
(Mat 20:17-19; Mak 10:32-34)

<sup>31</sup> Izesú nene izegipala zuhama amegesa vizitoka kelémo moloake láa loko lo kimimó: Gililo. Leza Zelusalega noitune. Itekuko, Ómasímini agepagutí gakó liaká a vete okulumakutí lumu ve gihíla nenikumú epoapoga linamó mukí nene alévolé inogo ive.

<sup>32</sup> Hetoka vetini kigizakú nilími milikiko, keza gopoguka linitiki galaná milinitiki, gituhú initanigave.

<sup>33</sup> Lá iiki uheni nagatunú nipiliiki nipili hilikiko, gamena losive makole minokinake heleneitokutí goha otinogo uve.

<sup>34</sup> Loko lokago, keza gelego ligitagani imó. Mogonáa hitokimikago, ámina gakó gilínigi gili vevesamamó.

*Zeliko numutoka agómula lika ve monimú voká vokató ve ale pulusotamó*  
(Mat 20:29-34; Mak 10:46-52)

<sup>35</sup> Izesú eza vike Zeliko numutó ale alitamó. Ale alitokago, gapo agilikaloka nene agómula lika ve makó minake, monimú voká vokató minoaká imó.

<sup>36</sup> Lá oko noiike, mukí vegená vigá igá niago, mogonamú loká okimikago,

<sup>37</sup> keza Nasalete numutotí ve Izesúma noave.

<sup>38</sup> Liki likago, gakó napagutí sele loko Izesuvo, geza Tevitini agávologamaka akagá oletatane loko lo mololeta vetemaka, nenikumú miluma gelenetamane.

<sup>39</sup> Loko lokago, goí iki niva vegenalite legesó oko minative liki gahá amemóza, áisi nene gele ahuloake gamoga gike sele like geza Tevitini agávologamaka, nenikumú gigika hizino.

<sup>40</sup> Loko lokago, Izesú geleake, gapoló noiike lekeza nenitoka alímiki alo. Loko lokimikago, agómula lika vema Izesutoka alímiki ikago, loká otake limó:

<sup>41</sup> Geza nana netá alegetatokumú nolane. Loko lokago, agómula lika vemámo Guivahanínemaka, nogómulané ale goloutonetatane loko noluve.

<sup>42</sup> Loko lokago, Izesú láa loko lo amimó: Gogómulaka goloutino. Nenikumú gele alévolé anítimo gelémo zokokaze.

<sup>43</sup> Loko noligo, áminasitó agómula goloutamó. Goloutokago ániagoake Izesuni ámegetoko vike Ómasi agepoka limó. Lá noigo, ániaga vegená keza ámina iki Ómasi agepoka lamó.

## 19

*Izesuko Zakiasiko*

<sup>1</sup> Izesú nene Zeliko numutoka aniteake, avilegeko vinogo igo,

<sup>2</sup> ámina apató ve makó minamó, agulizá Zakiasí, áisi nene takisi aliaká a vetini agulizaki venini. Eza henokanonámo vai o mina ve minamó.

<sup>3</sup> Áisi nene ve alínipa nenazo, Izesuni agupeló ániगतove lokoko vegená mulusigú minake Izesuni ániagamike,

<sup>4</sup> ololu loko vegená kivilegeake, vike zaló iteko noiike imaneló nougo Izesú imaneloka okiko ániगतove.

<sup>5</sup> Loko geleake noigo, Izesú eza áminaló vo aniteake, okenava oko ániagoake láa loko lo amimó: Zakiasizo, litá oko lemeno. Itína neza geí numukuka vitíve loko nouve.

<sup>6</sup> Loko lokago, litá oko lemeake, mulunagú lamaná geleko numunauka alémoko vimó.

<sup>7</sup> Vi itikasigo mukí vegená keza ániagiake, gili golesa iake áisi nene nanamú ve golesámini numukú iteko noiive.

<sup>8</sup> Liki likago, Zakiasí áisi nene Guivahanímini avogisaló oteko láa loko limó: Guivahanínemaka, gelezo. Moni henokanóne lelegí oko gona molokinake lugáa nene gohogó vegená kiminogo uve. Itó vegená lugáatini moni henokanóni soza saza luke avilegeko aleaká umó nene neko, aleko iteko hamó alutó nene losive losive kimitove.

<sup>9</sup> Loko lokago, Izesú limó: Nenémini hoza aliaká nia vemú nene monóini nomi vegená niaive liki liaká niamóza, imane ve Zakiasí nene ezagi Avalahani agávolahó Zuta ve gihíla noiive. Itína aí numukú oko ániagumóma agutó vizeaká netá mota utó okave.

<sup>10</sup> \* Okulumakutí lumu ve gihila neza tolova inita vejenakumú vitagá oko kugutó vizitove loko lumumóma neve, loko limó.

*Moni gó ligizani luga luga asú igo nenémini anoza gakó (Mat 25:14-30)*

<sup>11</sup> Izesú Zelusalega ale alí noligo, gakola gele vejenalite itína Ómasímo gizapa olimiaká ve napa alémo utó iti gamenava alitokave liki nigelego, gili hee litave loko Izesú anoza gakó makó láa loko lo kimimó:

<sup>12</sup> Agulizaki ve makolímo agulizaki ve napaloka voko lokugo mikasi gizapa ve nenémini akilí hitonimikiko atove loake, mikasi gohauka vinogo noike,

<sup>13</sup> gelekelé izegipala ligizani luga luga asú igo sele lo kemeake, moni gó hamopamó nokimike láa loko limó: Lekeza imanetunú lilí iki ali hutilí iki niko, atiginá oko ángigatove.

<sup>14</sup> Loko loake, vokago, aí gizapaló mina vejená lugáate gili golesa imiake, vejená kimisilikago, ámegetiki vake agulizaki ve napama láa liki li amemó: Géisi nene mikasi gizapa vele minamitane loko nolune.

<sup>15</sup> Liki likago, agulizaki ve napamámo nene gopa voko minake mikasi gizapa vémini akilí amekago, atiginá imó. Atiginá oko vike nene gelekelé izegipala moni kimi vejená láa loko alesá molo kimimó: Moni lukumumóma nene hozaváa alikago, nanakí akohekahe, alikalo loko alesá molokago,

<sup>16</sup> gelekelé izegipa makolímo anitike limó: Guivahanínemaka, geza moni gó hámakó nenenimó nenetunú hoza aleko gó gosohá ligizani luga luga asú igo ale utó molokuve.

<sup>17</sup> Loko lokago, láa loko lo amimó: Geza gelekelé ve lamaná noane. Vatí oko hozaló gizapa okane. Geza ha netalímini hozaváa ale guni oko gizapa okanize, nénisi numuni apá ligizani luga luga asú igo nenetini gizapa ve loló ogimikugo minatane.

<sup>18</sup> Loko lokago, gelekelé izegipa makolímo anitike limó: Guivahanínemaka, geza moni gó hámakó nenenimó nenetunú hoza aleko gó gosohá ligizani lugaloka asú igo ale utó molokuve.

<sup>19</sup> Loko lokago, láa loko lo amimó: Vatí okove. Geza numuni apá ligizani lugaloka asú igo nenetini gizapa ve minatane, loko lotamó.

<sup>20</sup> Itó gelekelé izegipa makolímo aniteake láa loko limó: Guivahanínemaka, moni gó hámakó nenenimó nene gotunú asapú oko otoa oko ale molonoumó imane aleko nouve.

<sup>21</sup> Geza gínikaha ve minokaninazo, ve makolite hoza alikago gihiláa utó okago aleaká noane. Itó ve makolite mini zuhá inató gihila omolokago nosánetá aleko asutoko noaká noane. Nenemú gelekuke geikumú nehelele vizekago monika nene gizapa oko alenoumole.

<sup>22</sup> Loko lokago, gizapa vemámo láa loko lo amimó: Gelekelé izegipa golesa gezaka lani gakó nene ale viligoko goní nogetuve. Geza gínikaha ve noutímini mogona gelenane. Ve makolite hoza alikago gihiláa utó okago aleaká nouve, itó ve makolite mini zuhá inató gihila omolokago nosánetá aleaká nouve.

<sup>23</sup> Nene mogaanáne gelekani móza, moníne nene peni numukuka molokako ámina moniló miní amiki nimilinitiko neza goha inake voko alitonazo. Nanamú neve.

<sup>24</sup> Loko loake, aí amatoka oti mina vejená láa loko lo kimimó: Moni gó aleneimó nene aliiki moni gó ligizani luga luga asú igo alenei vema nene amilo.

<sup>25</sup> Loko lokago, keza ininá iake Guivahanítemaka, eza nene moni gó ligizani luga luga asú igo mota alekamole.

<sup>26</sup> \* Liki likago, eza limó: Neza gakó makó lo likimitoze, gililo. Ve makolímo Ómasilokatí netá makó alenokoma gizapa lamaná itimó nene Ómasímo goha miní ameko aminogo ive. Itó netá makó gizapa lamaná amiti ve nenémo ale nouhe loko agata gilitimóza, Ómasímo goha ipá oko alinogo ive.

<sup>27</sup> Itó není gala ve nene nenikumú Guivahanite loló amitane liki liaká a vema kilímiki iki není nogómualó kipili hililo, loko limó.

*Sigaga litanigi ago Izesú Zelusale numutoka vimó (Mat 21:1-11; Mak 11:1-11; Zon 12:12-19)*

<sup>28</sup> Izesú láa loko lo kemeake, Zelusalega vinogo ale goí o kemeko novike,

<sup>29</sup> Oliví agoka gohalaló numuni apá lositá nene Petepage itó Petania minasitó ale alí nolike, izegipala zuhaguti ve lositá nokimisilike,

<sup>30</sup> láa loko lo kimimó: Lekeza helega numutoka viki anitiiki toki iza akaleva nagá zinamóma nene vejená kogohí geko mohona onamitimoláa nene ángiiki vinasiki aliki alizo.

<sup>31</sup> Vinasiki aliki nisiko, ve makolímo nanamú nivinasasive loko nolikoma, Guivahanímo hoza nego ámina izamú limiselekago nousive, liki li amilizo.

<sup>32</sup> Loko loake kimiselekago, keza vasigo, Guivahanímo goí oko lo kimi gakotó ámina netá utó imó.

<sup>33</sup> Utó okago, toki iza akalevámíni nagá nivínasasigo, iza amelage lekeza nene toki iza akalevama nanamú nivínasasive,

<sup>34</sup> liki likago, keza láa liki li kemesimó: Guivahanímo hoza nego imane izamú lokago oko novínasusive.

<sup>35</sup> Liki likasigo, iza amelage gili kimikago, toki iza nene Izesutoka aliki vikasike, hep-ekumú luhoaká góini gololohá iki ámina toki iza akalevámíni amegesaló milikasike Izesú nene iza amegesaló ahulimikasisigo,

<sup>36</sup> toki izámíni amegesaló minoake novigo, vejená keza hepekumú luhoaká góini nene gololohá iake gapoló nene avilisá itimi vamó.

<sup>37</sup> Lá niago, Zelusalega ale alitoake, Olivi agokalotí lomo noi gapoló vo alí noligo, izegipala zuha mukilite kogoliza nivizeke alévolé suni aligo áinigakumú nene gakó napagutí Ómasi agepoka lake,

<sup>38</sup> \* láa liki lamó: Guivahanímini gakotó agulizakí ve napa anitelimikane. Ómasímo nónohá zegetatize. Okulumakú nonagá oletino. Ómasímíni mogaána nene lapanalagi minino.

<sup>39</sup> Liki likago, vejená alegesá iki minakutí Palisaio monó ve makolite holúikú niake láa liki lamó: Gizapa ve geza izegipaka zuha imane láa liki lamilo loko lo hukoketamane.

<sup>40</sup> Liki likago, eza láa loko lo kimimó: Neza lo likimitoze, gililo. Keza gakó lamiki ha minatamó nene, gehani imanete gakó napagutí negepoka linigave, loko limó.

*Izesú Zelusale vejenakumú ive imó*

<sup>41</sup> Lá oake, omo anítike Zelusale apá nánigake, agika nohizigo ive napa ike,

<sup>42</sup> láa loko limó: Lekeza nonagá iki minata gakó gili ahuliaká niámó nene itína gamena gili alitanazo. Lá onoi móza, mogaána halá geneimó nenazo, lokogómulatunú áni gi vevesamini-gave.

<sup>43</sup> Gamena makó lekelitoka noiko, gala velinite iki numutini apatini hizi vigiiki mikasi amumú iki geisa hiziiki, likilími vigiiki

<sup>44</sup> vená izegipatinígi lekehelú iki likipili gesá inigave. Lá niiki numutini zivi akúvasivi niiki geha numuni nene ziki akúvasikiko gehani nene amupiló amupiló iki mililíki itekutí gululupaso asú inogo ive. Lekeza Ómasímo lukugutó vizinogo lekelitoka amómámíni mogona gili vevesamamó nenazo, ámina suni lekelitoka utó oleketanogo ive.

*Monó zavusave lo hukoketamó*

*(Mat 21:12-17; Mak 11:15-19; Zon 2:13-22)*

<sup>45</sup> Loko Izesú loake, monó zagusaveú itike netá matá meina konaló vejená kimisele nahulake,

<sup>46</sup> \* láa loko lo kimimó: Ómasímo li gakó nene monó gotolaú láa liki luhuva gizinamóma neve: Neni numunimú Ómasiloka loaká numunive liki litave. Láa liki gizinamóza, lekeza guminaló veta halá giki miniaká nia geha mulí lilí ikave.

<sup>47</sup> \* Loko lo kemeake, gamena gamena monó zagusaveú nene monó gakó lainim-oketamó. Lá noigo, guguni giziaaká ve napagi monó mogona apí-ikimiaká vegi itó Zuta vejenalitiní monó gizapa vegi keza apili hilita gapováamú vitagá amóza,

<sup>48</sup> vejená mukilite Izesú li gakó nene gámeme iki gili minikago, Izesuni apili hilita gapo ali utó amamó.

## 20

*Izesuni zámuzamú loká itamó*

*(Mat 21:23-27; Mak 11:27-33)*

<sup>1</sup> Lá niago, nene gamenaló Izesú nene monó zagusaveú itike monó lainim-oketoko gakó lamaná lo utó oko lo nokimigo, guguni giziaaká ve napagi monó mogona apí-ikimiaká vegi monó gizapa vegi iki anitíake,

<sup>2</sup> imaneloka azozá loló ani netá nene éhini gakotó lá ane, itó éaho litó loló ape, lo lemezo.

<sup>3</sup> Liki loká imikago, eza láa loko lo kimimó: Nezagi ámina oko gakó hamó loká oleketanogo uze, lekeza li nimilo.

<sup>4</sup> Zoni monó nagamí holokimiaká hoza alimó nene, hikutí ale utó ive. Ómasímíni gakotó alihe itó vejenalitiní gakotó alive.

<sup>5</sup> Loko loká okimikago, kezáitoka ligili hagili ake nene gakotó nana oko lo viligoko lo amitune liki gelemó nene gopa okago, láa liki gelemó: Leza Ómasilokatí ale utó imole loko litunimó nene, íi, lekeza nanamú Zonini gakoláa gili alévolé amave loko linogo noimó.

<sup>6</sup> Itó vegená mukí nenete Zonikumú nene Ómasímini agepagutí gakó loaká veve liki linamóma nenazo, hoza alimó nene hanuva vetinigutí ale utó imole loko litunimó nene gehanitunú lipili hilingave.

<sup>7</sup> Liki nigeleke Izesuni láa liki li amemó: Zoní éahitotí hoza ale utó ihe loko nenémini mogonáa gele vevesamune.

<sup>8</sup> Liki likago, Izesú láa loko lo kimimó: Láa likima nene netá matá imane loló oaká nougo ániagiaká niamó nene éahini gakotó lá oaká nouhe nenegi nezagi áminagó oko lo lekememinogo uve.

*Vain nagá minimú anoza gakó*  
(Mat 21:33-46; Mak 12:1-12)

<sup>9</sup>\* Loko loake, anoza gakó makó nene Izesú láa loko vegená lo kimimó: Ve makolímo vain nagá mini nene zuhá oake, gizapa iki nitiko meinava likimitove loko vegená makó gutá kemeake, haitó mikasiloka hotó voko gamena hána minamó.

<sup>10</sup> Noigo gihila guzá lati gamena alitokago, gizapa nia vegená nenete mikutí nagá gihila lugáa alinítiki atave loko gelekelé izegipa makó amiselekago, vo anitekago, keza mini gizapa vemate ámina ve apiliake nagá gihila amemake hanuva amisilikago golohá veva noitoka vimó.

<sup>11</sup> Lá okago, gelekelé izegipala makó goha amiselekago vimó. Vo anitekago keza mini gizapa vemate popoguka litake apiliake, hanuva amisilikago vimó.

<sup>12</sup> Lá okago, makóma amiselekago vimómámini agupe apilivi hukivi iake, hetoka alími ahulamó.

<sup>13</sup> Lá ikago, mini amelaho láa loko limó: Neza nana itove. Ma alími lamaná itahe loko nigika amenou gipáne amiselekago vitize.

<sup>14</sup> Loko geleake, amiselekago voko áminaló anitekago, mitó gizapa vemate ániagiake kezáitoka láa liki ligili hagili amó: Imanémo nene mikasi amelahini gipala nenazo, áisi nene minokoko olopa ve molokoko imane hoza ale lá itimó nenazo, helisa henonima lelí loló itive loko mota apele hilitune.

<sup>15</sup> Liki liake, nagá gihila mikutí ahelú iliki vake losé apili helemó. Lá inamó nenazo, nagá mini amelaho aniteoko ámina mikú hozaló vema nene nana oketative.

<sup>16</sup> Áisi okoko gizapa vema kepele heleoko ámina vain mini nene haitó gizapa ve lamaná lehizeketanogo ive. Loko Izesú lokago, giliake, keza eé, lá oko nomive lamané. Liki likago,

<sup>17</sup>\* geleake, gonú nokipilike láa loko lo kimimó: Láa likima monó gotolaú gakó láa liki luhuva gizinamóma nenémini mogonamú lekeza nanave liki nigeleve: Numuni giaká vete gehani napa makó ániagi ahulamó nenémo geha lapusa alévoleláa loló oake noive.

<sup>18</sup> Ve makó nenete ámina geható vелеhé limitamó nene ziki nogotanigave. Itó ámina gehani nenémo ve makolímini amupiló alemó zitimó nene, ámina ve nene zeko lanahana inogo ive.

*Kugupe meina hizeaká gakó*  
(Mat 22:15-22; Mak 12:13-17)

<sup>19</sup> Loko lokago, monó mogona apí-ikimiaká vegi guguni giziaká ve napagi keza ámina anoza gakokutí gehanimú limó nene Izesuni ániagi ahulunikumú lokave liki giliake, ámina gamenaló agizató alekinake nagá amitune liki lamóza, lá itunimó nene vegenalite nana ilitatave liki kehelele vizimó.

<sup>20</sup> Kehelele vizekago, Izesuni apilita gamenamú gizapa iki niake keikutí ve makó kimisilikago, vake amamaka miliki minake, Izesú gakó lo gopa itikumú amamaka moloko noinake gakó makó lokiko hee lamikoma agulizaki ve napámini agizakú molokoko nagá amitave liki vevesina vegetana lilí iki minake,

<sup>21</sup> Izesuni láa liki loká itamó: Tisalemaka, geza ve vená lainim-okimiaká noani gakó nene hee lokogó nego geleaká nounce. Geza vegená mukí ániagi hamó lelegí oko ániagokanike, Ómasímini gapo kelepize vevesoaká noane.

<sup>22</sup> Geza nanave loko nogelene. Loma apatoka gamanímini agulizaki ve napa Sisani nene takisi moní ameaká nouhá nene etahe etamive.

<sup>23</sup> Liki lamó nene etamive loko lokikoma gamaniloka goní otatune itó vatí okove loko lokikoma Zuta vegenalite gili golesa itave liki amekú miliki la gakó nogilike, láa loko lo kimimó:

<sup>24</sup> Lekeza moni makó nelepezilo. Ámina moniló noi vogunahana imanegi itó luhuva imanegi éahini neve. Loko lokago, gamani ve napa Sisani neve.

<sup>25</sup> Liki likago, láa likima nene, gamanimo voká loaká noi netá nene gamani amilo, itó Ómasímo voká loaká noi netá nene Ómasi amilo.

<sup>26</sup> Loko Izesú limó nene gámemé iki linamómámini gelehugitú lá oko avilegekago, sigaga liake kegepaló gena okago, vegenalítini kopogisaló agizató alemisá amó.

*Hilinitakutí otiakakumú loká itamó*

*(Mat 22:23-33; Mak 12:18-27)*

<sup>27</sup> Lá okago, Satukaio monó vegená keza hilinitakutí otisá amave liki liaká a vegená lugáate Izesutoka iake,

<sup>28</sup> \* lÁa liki loká itamó: Tisalemaka, Mosé nene luhuva lÁa loko gizo lemeneimóma neve: Ve makolimo vená alitimó nene, izegipa getamoko mino-loko voko helekikoma, agunalámo ámina gevoná vená alekoko uvolaho hili vemú izegipala geto molative loko luhuva gizamó neve.

<sup>29</sup> Lá okanazo, uvolaho agunala 7-a minamó. Lá iki niake ganá ve nenémo vená aleake, minoloko novike izegipa getamike helekago,

<sup>30</sup> agunala makolimo áminámini okago,

<sup>31</sup> agunala makolimo áminámini okago, keza ve 7 nenete ámina vená ali volaló imaló iki minake izegipa getamake hili asú ikago,

<sup>32</sup> ámina gevoná vená nene minake alika hilimó.

<sup>33</sup> Ámina ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éhini venala minative.

<sup>34</sup> Liki likago, Izesú lÁa loko lo kimimó: Lekeza imane gamenaló vená aliká itó vená alimi kimiká iaká niamóza,

<sup>35</sup> Ómasímo vegená makokumú nene alika gamenaló hilinitakutí otitátimíni mututoni niave loko loketonoimóma nenete vená alisá amave, itó vená alimi kimsá amave.

<sup>36</sup> Keza ageló nenéminiki goha hilisá amave. Hilinitakutí otita vegená nene Ómasímíni mututoni miniki gosohá kemetamenigi minanigave.

<sup>37</sup> \* Itó helekakutí oteakakumú nene lo likimitoze, gililo. Mosé ámina netakumú gakó makó lo lemeneimóma neve. Eza zamukutí ló guluma i gakó gizake hele vegenalítini mogonamú gilike Guivahanimú nene lÁa loko limóma neve: Eza Avalahani Isakani Zakoponi keí Ómasi minamó nominave.

<sup>38</sup> Loko limó nenazo, hele vegenaki ha nia vegenaki nene Ómasímíni agómulaló nene ha nia vegenakó niave loko áni go nominamó nenazo, nenemú kemeni helenei vegenalítini Ómasi negopa, kemenia hanuva ne vegenalítini Ómasi noinazo, Ómasimú gili zaginake hele vegenaki hanuva nia vegenaki keí Ómasi noive.

<sup>39</sup> Loko lokago, monó mogona apí-ikimiaká ve lugáate tisalemaka, gakó lamaná lokane.

<sup>40</sup> Liki liake, goha gámemé iki loká itakumú kehelele vizekago, loká itamisá amó.

*Gologí oketative loko lo moloketa vemú loká oketamó*

*(Mat 22:41-46; Mak 12:35-37)*

<sup>41</sup> Lá niago, eza lÁa loko lo kimimó: Gologí oleketative loko lo mololeketa vemámo agulizaki ve napa Tevitini agávolaho noive liki nanamú liaká niave.

<sup>42</sup> \* Tevití eza Ómasi agepoka liká nama liká a gakokutí lÁa loko luhuva gizonoimóma neve: Mezaú ve eza není Guivahaníne nene není nigizani zamagaloka minoloko voko noako,

<sup>43</sup> gala vega nene gigisa lapuvauka ahuloketanogo uve loko lo amimó neve.

<sup>44</sup> Tevití ámina vemú nene Guivahaníneve lokamó nenazo, gologí oleketative loko lo mololeketa vemámo nana igo Tevitini agávolahogó neitive. Tevitini guivahanigi neitive.

*Monó mogona apí-ikimiaká a vemú alévolé oko lo hukonoimole*

*(Mat 23:1-36; Mak 12:38-40)*

<sup>45</sup> Loko Izesú loake, vegená mukilite nigelego, izegipala zuha lÁa loko lo kimimó:

<sup>46</sup> Monó mogona apí-ikimiaká vemú lekeza, ehe. Keza nene luhiaká gó hána luhatakumú, itó maketiloka vegená makolite geké vaké likitatakumú, itó monó numukú numukú vegená kopogisaló minoaká holomaló minatakumú, itó nosáneta napa ninató agepaló iti mína siató minatakumú kumu heleaká noive.

<sup>47</sup> Keza gevoná venalítini henokanoni gumina i asú iká itó kegepatunú soza miliki Ómasi agepoka hána liki Ómasiloka liká iaká niave. Ámina ve nenete lihima napa genavagi alinigave, loko limó.

## 21

*Gohogó vená gevonalímo moni ahulamó*

*(Mak 12:41-44)*



<sup>1</sup> Izesú nene monó zagusaveú minake okenava oko ánígamó nene henóiki vegenalite moni moloaká pokisigú moni nimilago ánígamó.

<sup>2</sup> Lá noigo, gohogó vená gevoná makolímo golohá moni lositá nene áminagú nomolago, ángoake,

<sup>3</sup> Izegipala zuha láa loko lo kimimó: Neza lamaná lo likimitoze, gililo.

<sup>4</sup> Vegená imanete vai o mina monigutí ahulamóza, vená gevoná imanémo gohogó noikutí nosá meina hizitimoláa ahulo asú okamó nenazo, áisi moni ahulamó nenémo keza moni ahulamó kivilegekamó gelekave, loko limó.

*Monó zavirusave ali golesa itakumú epoapoga limó*

*(Mat 24:1-2; Mak 13:1-2)*

<sup>5</sup> Izegipala zuha makó nenete monó zagusave nánigake gehani lamanaláatunú ginamó itó gonanalísi lamanaláa áminaló minamó nene ánígiake sigaga nilago, Izesú láa loko lo kimimó:

<sup>6</sup> Lekeza imane netá itína nánigamó nene alika gamena atitó nene lova ve makolite imaneló gehani mukí apiliki tele vizikiko, gehani nene amupiló amupiló iki mililiki itekutí gululupa so asú inogo ive.

<sup>7</sup> Loko lokago, keza loká itiki monó gizapa velemaka, itína lani netá nene nanahé gamena utó itive, itó nana anosa utó okiko ánígokinake lani netá nene mota alévolé inogo ive loko litune.

<sup>8</sup> Liki likago, eza láa loko limó: Ehe, lokogoka vizitakumú gizapa ilo. Vegená mukilite nanitiki nugulizató liki okulumakutí lumu ve gihila nezama nouve nilikoma, itó gamena mota ávatiha okave nilikoma, kémegetiki vamiló.

<sup>9</sup> Itó mikasi makotokatí lova napa hiziki niiko, itó holutikutí lova utó noiko, lekehelele vizemino. Nenémini suni nene goí oko utó itive loko lonoimóza, mukí netá matá litá oko asú aminogo ive.

*Gopoguni nimilikitiko anosa napa utó itive*

*(Mat 24:3-14; Mak 13:3-13)*

<sup>10</sup> Loko loake, miní amike láa loko lo kimimó: Numutó namató ve mukí nenete gala venini lova ali nikimiko, agulizaki ve makolímini zuhagi makolímini zuhagi lova hizinigave.

<sup>11</sup> Itó mukí mikasiuka imimá napa noiko haitopaitó mikasiuka gaúna gamena napa utó oko minoloko noitiko, itó vegená mukí kivise asú iti netá napa utó noiko, okulumató mulutini pou liti netaki utó noiko, anosa napa napa makó utó inogo ive.

<sup>12</sup> Lá itimóza, ámina suni utó onamiko likigizató aliiki gopoguni mililitiki monó numukuki nagá numukuki goní ilikitatave. Lá niiki není nugulizá lekelitoka minakumule liki likigizató aliki kugulizaki ve napatini itó kipegini kovogisalo likilími milikiko,

<sup>13</sup> lekeza není mogonamú gili alévolé inamó nenémini gakoláa li utó iki li kimitave.

<sup>14</sup> \* Nenemú itína lakagata gili nivevesiki láa liki li hukalo: Goní nilikitikoma nila gakotó nanave loko lo kimitupe liki goí iki lakagata gululusi geemilo.

<sup>15</sup> Nénisi lekegepa ale vávani okinake gakó loakatini lekemekugo litamó nenazo, gala velinite ma lekehelú aminigave.

<sup>16</sup> Izotike ametike uvotike lekeli zuhagutí makolite likigivetike kezagi likigizató aliiki goní ilikimikiko, lekelikutí makó lugáa likipili hilitave.

<sup>17</sup> Lá niiki není nugulizá lekelitoka minakumule liki vegená mukilite mukahá likipili-tamóza,

<sup>18</sup> likigika makó gopa aminogo ive. Avasavagi hanuva minanogo ive.

<sup>19</sup> Lá itimó nenazo, lekeza alévolé iki oti minatamó nene, alévolé lekemetamenigi minanigave.

*Zelusale apá ali golesa itakumú epoapoga limó*

*(Mat 24:15-21; Mak 13:14-19)*

<sup>20</sup> Lá iki niiki, Zelusale apatoka lova vetini gimisigi vete iki hizi vego niikoma, lekeza nene netá matá otuhá apatekiko, gámé loló iti gamena alitokave liki gililo.

<sup>21</sup> Lá niiki nene Zutaia mikasigú nita vegená nene agokaló golisi nitiko, Zelusalega vegená nene, ámina apá nahuliko, Zelusale numutoka gahevaloka nia vegená nene nenegú iteminigave.

<sup>22</sup> \* Ámina gamenaló nene netá golesáinímini lihímaváini kimiti gamena nenazo, monó gotolau luhuva gizinamóma utó oko alévolé o asú inogo ive.

<sup>23</sup> Kee, izegipa kagatupagi nita venaki izegipa namuni aminí nikimita venaki, ámina gamenaló nene nana itamó neve. Imane mikasiuka genavagi netá utó okiko, Ómasímini izapaló molati netá nenémo imane mikasiuka vegená hize viginogo ive.

<sup>24</sup> Lá okiko, lugáa sopolotunú likipili hiliiki lugáa nene nagá likimiiki numutó namató likilími milikiko, hetoka vete nene Zelusale apá lisiki nogotikí miniliki víki niiko, hetoka veenalitini gamenaváini lutiginogo ive.

*Okulumakutí limi ve gihila atiginá iti gakó*  
(Mat 24:29-31; Mak 13:24-27)

<sup>25</sup> \* Okulumató ho sonohí ikani nenémo haitopaitó avevezaha noiko, age nagamí valahuká zeko sasa loko noiko mikasiuka vejená mukí keza anó nigiliki ininá niiki mulúini pou noliko,

<sup>26</sup> okulumató amuzavagi netá mukí nene mómoká i asú iki haitó suni alitamó nenazo, lá itakumú kehelele vizititímo kovonana noviziko, mikasiuka alévolé suni utó inogo noitímo mulutini itinogo ive.

<sup>27</sup> \* Lá okiko, okulumakutí lumu ve gihila neza zámuzánegi itó lapanánegi nene límusi amupiló nolumugo ániaganigave.

<sup>28</sup> Nenemú ámina suni utó noiko, lekeza oti hee liiki okenava iki ániigiiki, gologí oletati gamena nene mota alitokave liki gililo.

*Gohuna zámuni anoza gakó*  
(Mat 24:32-35; Mak 13:28-31)

<sup>29</sup> Loko Izesú loake, anoza gakó makó láa loko lo kimimó: Gohuna zahe za makó ahe ániigiiki gililo.

<sup>30</sup> Za agila nene guluma sekago lekeza ániagiake hogái gamena mota alitokave liki giliaká niave.

<sup>31</sup> Ámináminoko nolu suni utó noiko Ómasímo gizapa oleketati gamena mota alitokave liki gilinigave.

<sup>32</sup> Neza lamaná lo likimitoze, gililo. Imane gamenaló nia vejená velesá hili asú inamikó imane nolu netá mukí utó inogo ive.

<sup>33</sup> Okulumakí mikasigi tolova itáiha, není gakó nene, ma gopa oko tolova aminogo ive.

*Gizapa iki minalo loko loketamó*

<sup>34</sup> Ehe, lekeza lekemeni gizapa lamaná ilo. Negi nagi hizeaká sunímo itó negi nagamí vauva aleko noaká sunímo itó lakagata gululusi geleaká nenémo gena likivisekiko, gamena napa lekelitoka galinali utó olimikatize.

<sup>35</sup> Ámina gamena napa nenémo gelehúsígú nenéminoko imane mikasiuka numutó namató vejená mukí likipilinogo ive.

<sup>36</sup> Lekeza Ómasímo amuza lekemekiko ámina utó iti netá olové noinake okulumakutí lumu ve gihila není novogisaló ote minatune liki Ómasiloka liki gizapa iliki víki minalo.

<sup>37</sup> \* Loko Izesú lo kemeake, gamena gamena nene monó numuni napagú gakó lo kemeake, holugú nene ámina apá ahuloake, zopega makó agulizá Olivi agoka nenegú iteko akoaká imó.

<sup>38</sup> Lá noigo, vejená mukí nenete neteká holugú ake monó zavusavegú nene Izesutokatí gakó gilinigi alegesá iaká amó.

## 22

*Izesuni apilinigi lova gizamó*  
(Mat 26:1-5; Mak 14:1-2; Zon 11:45-53)

<sup>1</sup> Lulu vizemi peleti niaká a holisi agulizá napa nene avóikini asenini zeketakumú gili mina holisi nene alitokago,

<sup>2</sup> \* guguni giziaká ve napagi monó mogona apí-ikimiaká vegi keza vejená mukikumú kehelele vizekago, Izesuni apili hilingi gapováamú hanuva gizapa iki minamó.

*Zutá Izesuni amimika litove loko lo hutamó*  
(Mat 26:14-16; Mak 14:10-11)

<sup>3</sup> Lá niago, Satá nene Izesuni vejenala zuha 12 keikutí Kaliotó numutotí ve Zutani mulunagú lemeake alémo vávani igo,

<sup>4</sup> eza víke guguni giziaká ve napagi itó monó zavusavegú pilisí vegi gakó akó lake, Izesuni amimika loko keitoka alémoko atitímini gakola ligili hagili amó.

<sup>5</sup> Lá niake, keza kogoliza vízeke hutono gehani nene Zutani amitune liki li hutamó.

<sup>6</sup> Li hutikago, Zutá nene konotó aleko mukí vejená alegesá inamikó keitoka amimika linogo amapani molamó.

*Izesú izegipala zuhagi asenini zekimiaká nosá namó**(Mat 26:17-25; Mak 14:12-21; Zon 13:21-30)*

<sup>7</sup> Lulu vizemi peleti niaká a gamena asenini zeketakumú gele minoaká holisimule liki sipsip iza akaleva apiliaká a gamenama alitokago,

<sup>8</sup> Izesú nene izegipala zuhagutí lositá nene Zonímagi Pitámagi nokimisilike láa loko limó: Lekeza víki asenini zekimiaká nosá ali vavá ikisiko leza natune.

<sup>9</sup> Loko lo kemekago, keza nosánetá híkú ale vavá onetatiive loko nolane.

<sup>10</sup> Líki likasigo, Izesú láa loko lo kimimó: Gililizo. Lekeza nene taoniloka víki nanitisiko ve makolímó paisele somo nagamilagi geheneiko, gapoló hotu nilikima ámina ve ámegetiki víiki eza ititi numukú nene itilizo.

<sup>11</sup> Itiki numuni amelahini láa líki li amilizo: Tisalémo nezagi izegipáne zuhagi avotegini asenini zeketakumú gele minoaká nosá natuni numuni agika nene hiláauka neve líki loká ilizo loko lokago lo nogumusive.

<sup>12</sup> Líki likisiko, numuni agika veletó nego netá matá avilisá ohá lekelepizitive. Neneló nosánetate ali vavá ilizo.

<sup>13</sup> Loko lo kemekago, vasike ángigasimó nene, lo kimimómáminoko nego ángigikasike, asenini zekimiaká nosánetáma ali vavá asimó.

*Lepa nosá apí oko kimimó**(Mat 26:26-30; Mak 14:22-26; 1 Koli 11:23-25)*

<sup>14</sup> Lá ikasigo, nosánetá nata gamena alitokago, Izesúma aposologegi minake nosánetá níki minamó.

<sup>15</sup> Lá iki niake Izesú láa loko lo kimimó: Imane asenini zeketakumú gele minoaká nosá nene miluma velesá gelenaminake lekezagi natune loko mulúnégú lamaná geleloko voko minumó neve.

<sup>16</sup> Lá onoimóza, makó lo likimitoze, gili minalo. Nosánetá imane goha naminake minoloko voko Ómasímó gizapa oleetatitímíni gapováa utó okiko nanogo uve.

<sup>17</sup> Loko loake, vain goni makó aleake, Ómasi agepoka loake láa loko limó: Lekeza imane gona miliki nalo.

<sup>18</sup> Gakó makó lo likimitoze. Imane gamenalotí veletó nene vain nagalímíni gihilagutí goha naminake, minoloko vinake Ómasímó nugulizaki vetipo loló onetati gamena utó okiko natove.

<sup>19-20</sup> Loko loake, peleti makó aleake, Ómasi agepoka loake gitegeko gona moloko nokimike láa loko limó: Imane není mémeláne neve.

<sup>21</sup> \* Lá onoimóza, ángigalo. Není nimimika liti vegi holoma hamotó minusike, ligizani ahuloko nosánetá aleko noko nousive.

<sup>22</sup> Okulumakutí lumu ve gihila neza vozo loko loneta gapoloka hilito gapogú novumóza, není nimimika liti vema nene agae, lihima genavagi alinogo ive.

<sup>23</sup> Loko lokago, izegipala zuha keza éaho lá itikumú nolihe líki liake kezáitoka lokatoká amó.

*Éaho agulizaki ve loló itive líki lova sava amó*

<sup>24</sup> \* Lá iake, izegipala zuhamate lelikutí éaho agulizaki ve loló itive líki lova sava amó.

<sup>25</sup> \* Lá ikago, Izesú láa loko lo kimimó: Mikasiuka hanuva vegeanalite gelekelé ikimiake kagahisiuka limitigí iki niago kugulizaki véinite alévolekutí gizapa ikimiaká niave. Itó kugulizaki vete legepoka litave líki liaká niamóza,

<sup>26</sup> \* lekelitoka nene lá oko minamino. Lekelitokatí itiki minamoláate nene limiki mina vegeaná nenémíniki minataze. Itó lekelí gizapa ve nenete hanuva lemetigí iki gelekelé ve nenémíniki minataze.

<sup>27</sup> \* Lekelisi lilo. Éaho agulizaki ve noive. Nosánetá hanuva minoko natimó nenémohe, itó nosánetá vatá oko ale vavá otati ve nenémo agulizaki ve noihe. Hanuva minoko natimó nenémo agulizaki ve noitimóza, nénisi nene lekelí holutikú nene agulizaki ve suni alemoko gelekelé izegipagitana loló oko minoaká nouve.

<sup>28</sup> Lekeza nene gasova netalímíni agikagú nougo lekeza áminagú nilími vatí iki miniaká niave.

<sup>29</sup> Améneho vegeaná mukí gizapa oketatane loko lonetamó áminámíni oko neza hoza gakó nololeketuve.

\* 22:21: Age 41:9 \* 22:24: Luk 9:46 \* 22:25: Mat 20:25-27; Mak 10:42-44 \* 22:26: Mat 23:11; Mak 9:35

\* 22:27: Zon 13:12-15

<sup>30</sup> \* Lekeza gizapa okimiaká noutó miniki nosáneta niki lokogoliza vizitave loko itó gonanalivagi siató miniki Isilae vegejalitini mulusi 12 gizapa ikitiki gona milikitanigave loko nololeketuve.

*Izesú Pitá egamega otatikumú epoapoga limó*  
(Mat 26:31-35; Mak 14:27-31; Zon 13:36-38)

<sup>31</sup> Saimon, Saimon, laisi lotuva lake gizaká iki alími etó iaká niamómáminoko Satá nene lekeza aí agizakú hilikiko gizaká oko lekelémo etó inogo lonoimóza,

<sup>32</sup> nénisi nene gele alévolé animó nene gologolo samitive loko Ómasiloka loaká nouve. Lá onoumó nenazo, geza monó gapoló goha atiginá oko voko minokoko, gigivekagini hize lé oketozo.

<sup>33</sup> Loko lo amekago, Pitá láa loko lo amimó: Guivahanínemaka, geza kalapusi numukupe itó gipili hilinitamope nezagi áminagú vinogo uve.

<sup>34</sup> Loko lokago, Izesú láa loko lo amimó: Pítaga neza lo gimitoze, gelezo. Itína holugú nene okoloho nenémo velesá anó molonamiko geza nenikumú ánigonamuve loko egamega onetatanimó gamena losive makole inogo ive.

*Gopoguni mililitatamó nenémini amupiló minatunikumú ale vatí ituni gakó*

<sup>35</sup> \* Loko loake, láa loko lo kimimó: Goí oko nolikimisuluke, moni gúeaká gó itó akiseaká gó itó likigisalo suú aliki vamilo loko lo lukumu gamenaló nene nivake netá makokumú vitagá amó nehe. Loko lokago, keza óve liki likago,

<sup>36</sup> eza láa loko lo kimimó: Lá ikamóza, itína gamenaló moni gúeaká gó ahe akiseaká gó ahe ale neiti vemámo aleko vitive. Itó sopoló hána alenamiti vémo nene hepé golalotí moni alekoko sopoló hána meina hizitive.

<sup>37</sup> \* Neza lamaná lo nolukumuve. Monó gotolaú gakó makó láa liki luhuva gizinamó nene nenitoka utó inogo noive:

Netá golesa aliaká nia vetini kigivéipo noive liki aiki gatamó.

Itó monó gotolaú luhuva muki nenikumú gizinamó nene nenitoka utó oko alévolé noive.

<sup>38</sup> Loko lokago, keza nene Guivahanítemaka, ánigozo. Sopoló hána losi imane neve. Liki likago, eza není gakó gelemaze, áminasile loko lo kimimó.

*Izesú zazuhaú Ómasiloka loko minamó*  
(Mat 26:36-46; Mak 14:32-42)

<sup>39</sup> Neneti hetoka lemeake vike, eza goí oko aleaká imómámini oko alinogo Olivi agokau noitigo, izegipala zuhamate ámegetiki vamó.

<sup>40</sup> Olivi agokaloka vo alí nolike izegipala zuha láa loko lo kimimó: Lekeza imaneló miniki lekemekú milatakumú gopa okatune liki Ómasiloka liki minalo.

<sup>41</sup> Loko ahulokimiakae, alitóisí minomo novike, alapusa nohizike Ómasiloka láa loko limó:

<sup>42</sup> Aménege, geza lá itove loko gelekokoma genavagi gihinitata netá imane nenitokatí ale olové itane loko nogulumóza, není nigikaloka molamoko géi gigikaloka molatane loko noluve.

<sup>43</sup> Loko noligo, okulumakutí ageló makó limike utó o amike hize lé otamó.

<sup>44</sup> Lá okago, miluma alévolé oko nogilike, amuza moloko Ómasiloka noligo, govisi apilimó nene golani nenéminoko mikasiuka aleloko limimó.

<sup>45</sup> Lá noigo, Ómasiloka loko minatotí oteake, izegipala zuha niató goha oake, netá golesa utó itikumú miluma giliki kovó akinago oko ángoake,

<sup>46</sup> kelémo oteake láa loko lo kimimó: Lekeza nanamú lokovó akinave. Lekeza otiiki lekemekú milatakumú gopa okatune liki Ómasiloka liki minalo.

*Izesuni amimí okago alemó*

(Mat 26:47-56; Mak 14:43-50; Zon 18:3-11)

<sup>47</sup> Loko lo kemeko noigo, Izesuni vejenala zuhagutí ve makó Zutá áisi nene goí o kimigo vejená muki iki Izesutoka iki alegesá amó. Lá ikago Zutá nene Izesuni agoka agepa legeko nanogo noitoka omo alí noligo,

<sup>48</sup> Izesú láa loko lo amimó: Zutazo, geza okulumakutí lumu ve gihila není nogoka negepa legeko nanogo nimimika linogo noape.

<sup>49</sup> Loko lokago, Izesuni amatoka mina vete nene utó inogo i netá nánigake Guivahanítemaka, sopolotunú kípilitupe.

<sup>50</sup> Liki nilake, keikutí ve makolímó nene guguni gizoaká ve napámini gelekelé izegipala nene sopolotunú apilike agata zamagaloka zeko isimó.

\* 22:30: Mat 19:28

\* 22:35: Mat 10:9-10; Mak 6:8-9; Luk 9:3, 10:4

\* 22:37: Isa 53:12

<sup>51</sup> Lá okago, Izesú nenémini suni alemo loake, agizani lutoko ámina vemámini agataló ale nogilike agata alémo lamaná otamó.

<sup>52</sup> Alémo lamaná omiake, guguni giziaká ve napagi monó zavusavegú pilisí vegi monó gizapa vegi Izesuni agizató alitune liki a vema láa loko lo kimimó: Lekeza nenikumú gelemó nene laskoli nougo sopoló hánagi gelekahosigi aliki niake nigizató alinigi niahe.

<sup>53</sup>\* Gamena gamena lekezagi monó zavusave napagú minoaká umó nene, nigizató alisá amamó neve. Lá ikamóza, itína nene lekelí gamena nego, límugusi amelahini Satani amuza netá mota utó okave.

*Pitá Izesuni egamega otamó*

*(Mat 26:57-58,69-75; Mak 14:53-54,66-72; Zon 18:12-18,25-27)*

<sup>54</sup> Loko lokago, Izesuni agizató aliake, alímiki vake guguni giziaká vetini gizapa vémini numukú alímiki itemó. Lá niago, Pitá nene hotó otigí oko kémegetoko novigo,

<sup>55</sup> ámina numukú hé numunaló holutó nene ló giziake minamó. Lá iki niago, Pitá kezagi makó minamó.

<sup>56</sup> Eza ló hanatolaloka ló lotá oko noigo, gelekelé vená makolímó ániagoake, gonukonú napilike imane ve nene Izesuki miniaká asi ve noive.

<sup>57</sup> Loko lokago, eza egamega ike venáage, neza ániagonamu vemú nolane.

<sup>58</sup> Loko lokago, koma noigo, ve makolímó Pitani ániagoake geza nene ámina vémini zuhagutí noane. Loko lokago, Pitá nene vémage, neza noamuve.

<sup>59</sup> Loko lokago, gamena koma novigo, ve makó nenémo pigi vizeko ezagi Galilaia anoki ve noinazo, lamaná ezagi makó minasimó neitive.

<sup>60</sup> Loko lokago, Pitá nene vémage, geza nolani gakoka ma gelemu gakó nolane. Loko noli agepagi okolohomámo anó molamó.

<sup>61</sup> Anó molokago, Guivahanímó mino viligake avogisa o amike Pitani ániagamó. Ániogago, Pitá eza Guivahinímó amunaló lota gakó nene itína okoloho nenémo anó molonamíko egamega onetatanimó nene gamena losive makole inogo ive loko lo ami gakóma goha nogilike,

<sup>62</sup> agika hizekago, lemeko hetoka ive napa imó.

*Izesuni gopoguka nilitake kigizanitunú apelemó*

*(Mat 26:67-68; Mak 14:65)*

<sup>63</sup> Lá okago, Izesuni agizató ali mina vete gopoguka nilitake kigizanitunú napeleke,

<sup>64</sup> agómulaló lavolavo gotunú zi hitimiake láa liki lamó: Geza lo utó oko lo lemezo. Éaho nogipilive.

<sup>65</sup> Liki liake, alivi letivi iki haitopaitó gakó litiki minamó.

*Kansoletini kogómulaló Izesuni goní itamó*

*(Mat 26:59-66; Mak 14:55-64; Zon 18:19-24)*

<sup>66</sup> Niago, neteká gó lokago, Isilae mikasiuka gizapa ve keza guguni giziaká ve napagi monó mogona apí-ikimiaká vegi alegesá iake, monó kansoletini niatoka Izesuni alímiki viake

<sup>67</sup> geza gologí oletative loko lo mololeta vema nookoma lo lemezo. Liki likago, eza láa loko lo kimimó: Neza lo likimitomó nene lekeza gili alévolé aminigave.

<sup>68</sup> Itó áminamú loká oleketatomó nene lekeza nonotó aliki li nememinigave.

<sup>69</sup> Lá onoi móza, imane gamenalotí veletó nene okulumakutí lumu ve gihíla neza amuza ve Ómasímini agizani lamagaloka minanogo uve.

<sup>70</sup> Loko lokago, keza li amiki nilake láa lokoma geza Ómasímini gipala nouve loko nolape, olo. Liki likago, eza lá onoi ve liki lekezatini mota likave.

<sup>71</sup> Loko lo kernekago, keza láa liki lamó: Aí gakola gilina vejená makó nanamú sele lokinake gakó makó gilitune. Aí agepagutí láa loko lokago mota gelekunimóma neve, liki lamó.

## 23

*Izesuni alímiki Pilató noitoka vamó*

*(Mat 27:1-2,11-14; Mak 15:1-5; Zon 18:28-38)*

<sup>1</sup> Láa liki liake, keza mukitó otiake Izesuni alímiki Pilató noitoka vamó.

<sup>2</sup> Alímiki viake, apí iki goní itake láa liki lamó: Imane vémo leza Zuta vejená lelémó gopa oaká noi ke, takisi moni nene Loma vegejalitini gamani agulizaki ve napa Sisani amemilo loko loake, ezámú nene nugulizaki ve napa gologí oleketatove loko lo mololeketa vema nouve loko loaká noi ve.

\* 22:53: Luk 19:47, 21:37

<sup>3</sup> Liki likago, Pilató eza Izesuni loká otake geza nene Zuta vetini kugulizaki ve napáini noape. Loko loká omikago, Izesú nene gezaka lokanimole.

<sup>4</sup> Loko lokago, Pilató nene guguni giziaká ve napamagi mukí vejenámagi láa loko lo kimimó: Neza imane vémini lihimaivalamú vitagá umó nomive.

<sup>5</sup> Loko lokago, keza pigi vizeke láa liki lamó: Eza mukí vejená kelémo otopá zemo novike Galilaia mikasiuka apí oake, Zutaia mikasiuka vo asú okoko gakó lainim-oketomo novike imaneló omo anitekave.

*Izesuni Heloté noitoka alímiki vamó*

<sup>6</sup> Liki likago, Pilató nene gakóini geleake, imane ve nene Galilaia mikasiuka ve noihe.

<sup>7</sup> Loko loká okimiake, Izesúma Heloté gizapa onoi mikasiukatí ve noigo geleake, itó Heloté nene ámina gamenaló Zelusalega minamó nenazo, Izesuni nene Heloté noitoka alímiki vilo loko amiselekago, alímiki vamó.

<sup>8</sup> Lá ikago, Heloté nene Izesuni gakó gozapá geleko minamó nenazo, Izesú nene avevezaha makó okiko ánigatonazo loko agata gelekelé oko noitotí nene Izesuni ángoake agoliza goha vizimó.

<sup>9</sup> Lá oko noihe nene, Heloté nene Izesú oko moloko i netá mukikumú loká otamóza, Izesú nene Heloté li gakotó ma anotó aleko lo amemimó.

<sup>10</sup> Lá noigo, guguni giziaká ve napamagi itó monó mogona apí-ikimiaká vemagi keza aí amatoka otinake amuza miliki goní itamó.

<sup>11</sup> Lá ikago, eza ve golesa noigogitana Helotege itó gimisigi véate gopoguka litamó. Gopoguka limiake, agulizaki ve napámini luhoaká gó lamanaláa luhimiake, Heloté nene Pilató noitoka goha amiselekago vimó.

<sup>12</sup> Lá okago, Heloteko Pilátoko keza nene gozapá gala ve lilí iki minasimóza, nenelotí goha zogo milasimó.

*Izesú hilitive liki goní itamó*

*(Mat 27:15-26; Mak 15:6-15; Zon 18:39-19:16)*

<sup>13</sup> Lá ikasike, Pilató nene ve vená mukí itó guguni giziaká ve napagi monó gizapa vegi kelémo nupa oake,

<sup>14</sup> Láa loko lo kimimó: Lekeza imane ve nenitoka alímiki iake, vejená kelémo otopá zeaká noive liki lamóza, lekelí lokovogisaló aí mogonamú vitagá umó nene, gililo. Lekeza netá matá golesa alikumú goní notune liki lamóza, neza nene vitagá umó ma ale utó amuve.

<sup>15</sup> Heloteki eza ámina oko lihimaivalamú vitagá imó nene nomigo lelitoka amiselekago okave. Lá onoihe, gililo. Eza nene netá golesa makó alilina, apele hulutilinamóza, lá oko nomimó nenazo,

<sup>16-17</sup> neza lokugo uheni nagasunitunú apiliiki amisilikiko hanuva vitive. Loko lokago,

<sup>18</sup> keza ganaganagó gamoga giki láa liki lamó: Imane ve nene agoka legesó itize. Palapasini nene gologí omikako lelitoka ino.

<sup>19</sup> Liki lamó nene Palapasí nene Zelusale apakuka gamaniloka lova gizoko kipili vémo lova hizeko ve makó apele helekago, nagá numukú ahulikago mina vemú lamó.

<sup>20</sup> Lá noigo, Pilató nene Izesuni gologí otatove loko geleake, gakó goha lo kimimóza,

<sup>21</sup> keza pigi viziki malipo zaló hilitikumule, zohota zaló hilitikumule.

<sup>22</sup> Liki likago, Pilató goha láa loko lo kimimó: Nanamú. Nana netá golesa alekago nilave. Aí apele hilituni mogona makó ale utó amuve. Lá onoinazo, neza lokugo, uheni nogosanitunú apiliiki amisilikiko hanuva vitive.

<sup>23</sup> Loko lokago, keza Pilató li gakó zivi hitivi ake pigi viziki gakó napagutí zohota zaló nagá otamane liki la gakolimo Pilatoni gakó alémo amunauka imó.

<sup>24</sup> Lá ikago, Pilató nene keza negénegeka liki lakumú keí gakó lá itove loko lo hutamó.

<sup>25</sup> Lo hukoake, amunaló emane gamaniloka lova gizake lova ale utó oko ve makó apele heleake nagá numukú mina vemú gologí otative liki loká ita vema nene gologí omiake, Izesuni nene kezáini kagata gele netá lilí itave loko gimisigi vetini kigizakú kimimó.

*Izesuni zohota zaló apelemó*

*(Mat 27:32-44; Mak 15:21-32; Zon 19:17-27)*

<sup>26</sup> Lá okago, Izesuni nene apilinígi alímiki nivago ve makó agulizá Saimon eza Apilika mikasiuka Sailini apatotí ve nene minaukatí taoniloka novike gapoló noigo ániagiake, agizató aliake zohota zama gihimikago, aginagú geheake Izesuni ámegetoko vimó.

<sup>27</sup> Lá iki nivago, mukí ve vená kémegetiki nivake, vená nenete miluma gilitake ive nama itimi vamó.

<sup>28</sup> Lá iki nivago, Izesú nene mino viligoake láa loko lo kimimó: Lekeza Zelusale venáise, nenikumú ive amiki lekezatinimú itó lekezatiní izegipatinimú ive ilo.

<sup>29</sup> Gamena makó alitonoimó nene utó okiko láa liki litaze: Izegipa getinama vená itó izegipa nene aminí kiminama vená keza gohuna vená nene vatí iki minikave.

<sup>30</sup> \* Líki líiki ámina gamenaló nene agoka napamú nene agae, agoka vozaneka, zeko akutooko oko hitoletatapo, liki linigave. Itó agoka komamú iki zi hitilitalo liki linigave.

<sup>31</sup> Loko loake, láa loko lo kimimó: Neza gosohá lokitana noumóza, neni nene hanuva lokú gizatamó nenazo, lekeza osagava lokitana vejená nene nana ilikitatave.

<sup>32</sup> Loko lokago, netá golesa aliaká asi ve losigi Izesunigi kipili hilingi kilímiki vamó.

<sup>33</sup> Kilímiki vake, apá makó agulizá gotóini gonosi helisa apale liki latoka anitiake, neneló Izesuni nene zohota zaló apiliki apatiake, netá golesa aliaká asi ve losima makó nene agizani sogaloka hizeke itó makó nene agizani lamagaloka apiliki apatemó.

<sup>34</sup> \* Lá ikago, Izesú nene aménega, gili vevesamake gopa netá nalemó nenazo, geza lihímáini ahuloketozo, loko limó. Loko lokago, keza nene Izesuni luhoaká gola nene éaho alitihe éaho alitihe liki satu zohí amó.

<sup>35</sup> Lá noigo, vejená mukí alegesá iki ánigi minamó. Lá niago, Zuta vetini gizapa ve nenete gopoguka litake láa liki lamó: Vegená kugutó vizeaká i vema eza Ómasímo alémo etó onoi ve nene gologi oleketative loko lo mololeketa vema nouve loko loaká i vema nenazo, ezáa agutó vizino.

<sup>36</sup> Líki liake, gimisigi ve nenetegi gopoguka nilitake ekésá vain nagamí natihe liki agokáú miliake,

<sup>37</sup> geza Zuta vetini kugulizaki ve nookoma, gezaka gugutó vizezo.

<sup>38</sup> Líki li namego, velé gotolaloka luhuva makó nene imane ve nene Zuta vetini kugulizaki veninive liki gizikago minamó.

<sup>39</sup> Lá onoi, netá golesa aliaká asi vegutí magáámo láa loko Izesuni alevo letovo oko limó: Geza gologi oletative loko lo mololeta vema noitanimó nene, gezaka gugutó novizeko lezagi lugutó vizemane.

<sup>40</sup> Loko lokago, maga véa nenémo gahá amike láa loko lo amimó: Ezagi lezagi goní nilitake, hilitave liki lilitinamóma nenazo, nohelenike geza Ómasimú gehelele vizemíhe.

<sup>41</sup> Loko loake, leza nene lihimatemaló apasiki lipili nihelemó nene vevesonoimóza, imane ve nene lihimavala nomi ve hakupá netá aliki apili niheleve.

<sup>42</sup> Loko loake, Izesuni láa loko lo amimó: Izesuvo geza gugulizaki ve loló ooko gizapa okimiaká hoza alitani zupa nene nenikumú gele minatane loko noluve.

<sup>43</sup> Loko lokago, Izesú láa loko lo amimó: Neza lamaná lo gimitoze, gelezo. Itína nene Palatisi zazuha apakú gezagi apizeko minanogo usive.

### *Izesú hiliimó*

*(Mat 27:45-56; Mak 15:33-41; Zon 19:28-30)*

<sup>44</sup> Loko noligo, holisaka gamena nene hómíni silikakéna gopa noi ke mukí mikasiuka nene límugusi ze asú oake mino-loko novigo únaká ho ale zohota imó.

<sup>45</sup> \* Lá noigo, monó zavusavémíni gatetó Ómasímíni avogisaló iteaká gatetó zi lí ika lavolavo nene zeko hou lo losi imó nene lelí gahe ale koló imó.

<sup>46</sup> \* Lá noigo, Izesú nene gakó napagutí nolike aménega, neni nemeni nene geí gigizakú nomuluve. Loko loake, ahuu lo nahulake hiliimó.

<sup>47</sup> Lá noigo, lovámini gala vevatini gizapa vemámo utó i netáma ániagoake, Ómasímíni agulizá ale otike lamaná imane ve nene hee loko noi ve minamó neve.

<sup>48</sup> Loko lokago, ámina suni ániganigi alegesá ina vejená nenete ániagiake, miluma napa giliake, kolómusaló zimi zimi atiginá iki numúitoka vamó.

<sup>49</sup> \* Lá niago, aí agivelagegi itó Galilaia mikasigutí ámegetiki a venaki keza nene hotó otigí iki otinake ámina suni ániagamó.

### *Izesuni gale zitamó*

*(Mat 27:57-61; Mak 15:42-47; Zon 19:38-42)*

<sup>50</sup> Lá ikago, ve makó minamó, agulizá Zosehé. Áisi nene Zutaia apá makó agulizá Alimataia loko noi numutó ve minamó. Eza ve lamaná itó veveso mina ve Zuta vetini monó kansole ve makó minamó.

<sup>51</sup> Lá imóza, kansole lugáate Izesuni apilitune liki kagata giliake lova gizi hukakumú nene gele kememi ve nenémo Ómasímo gizapa okimiaká ve alémo utó iti gamenamú gizapa oko mina ve minamó.

<sup>52</sup> Áisi nene Izesuni gonosiva alinogo Pilató noitoka vike loká omikago, gele amekago,

<sup>53</sup> zalotí apasoko aleko lemeake, gizopa gó lamanakú asapú omiake, aleko voko meikú geha mulí goló vatinakú nenegú ve vená makó gale zikitinamakú gale zetamó.

<sup>54</sup> Palaitegú gale zetamó, avóikini asenini zeketakumú gili mina holisi gamena alí noligo nene.

<sup>55</sup> Lá noigo, Galilaia mikasigutí Izesuni ámegetiki a vená nenete Izesuni gonosiváa nana oko gale zetatihe liki ániganigi Zoseheni ámegetiki vake gonosi milimilimagú viki ánigamó.

<sup>56</sup>\* Ánigiake, numúitoka atiginá iki vake gonosiváaló holotatune liki anuva hilina ali vavá amó.

*Izesú heleneikutí otimó*

*(Mat 28:1-10; Mak 16:1-8; Zon 20:1-10)*

Lá iake, ámina vená nenete holisigú Zuta vete li hukinamómalo nene kavású viziki minamóza,

## 24

<sup>1</sup> Sategú neteká hologú nene gonosiva mola apató vinigi anuvagi hilina ali vavá iki milamóma nene aliki vamó.

<sup>2</sup> Vi anitiake ánigamó nene, geha mulí agepaló gehani napa zi hitamó nene aló ahelú i ámiginago ánigamóza,

<sup>3</sup> keza áminagú itiake ánigamó nene Guivahani Izesuni gonosiváa ánigamamó neve.

<sup>4</sup> Lá iake ámina netakumú negi nagi hiziki niago, ve lositá galinali utó ikasike, iki holúikú minasimó nene, luhoaká góini nenémo gizopa vaevae loko minamó.

<sup>5</sup> Lá noigo ánigiake ámina vená nenete kehelele novizigo, mikasiuka gupá zemó. Lá niago, ámina ve losi nenetosa láa liki li kemesimó: Hele vegealitiní apakú amenigi oteko noi vemamú nanamú vitagá niave. Eza imanegú noamive. Mota otopá zeko otekave.

<sup>6-7</sup>\* Lekeza Galilaia mikasiuka minake okulumakutí lumu ve gihila neza netá golesa aliaká nia vetini kigizakú nilími milikiko, zohota zaló nipili hilikiko, gamena losive makole minokinake goha otinogo uve loko lo likimi gakokumú goha lakagata giliki minalo.

<sup>8</sup> Liki likasigo, keza gozapá láa loko lo kimi gakómalo goha kagata giliake,

<sup>9</sup> geha mulikú gonosi mola apáma ahuliake, goha atiginá iki vake, ai izegipala zuhagutí ileveníagi vegeená lugáagi nene ániga sunimú aveté iki li kememó nene,

<sup>10</sup> Maliá eza Magatala apatotí vená itó Zoaná itó Maliá magáa eza Zemusini izolaho itó vená makó lugáa nenete ámina gakó aveté iki aposoloma li kememóza,

<sup>11</sup> aposolomate gakó imane gihila nilave liki gili alévolé amamó.

<sup>12</sup> Lá niago, Pitá nene oteake gonosi mola apámalo ololu loko vike geha mulikú gupá zeko ánigamó nene, lavolavo gó gizopa lamaná lositáma hanuva nego ángoake, eza nene goha atiginá oko numutoka vike, ámina suni utó ikumú agata gululusi geleko minamó.

*Emause numutoka nivasigo Izesú kémegetoko vimó*

*(Mak 16:12-13)*

<sup>13</sup> Lá noigo, ámina gamenaló izegipala zuhagutí ve losi nene Emause numutoka vinigi gapoló vasimó. Emause apá nene Zelusalegati hotó otigí oko 11 kilomita nenéminoko minamó.

<sup>14</sup> Lá iki nivasike, Izesutoka utó i netakumú ligili hagili iki nivasigo,

<sup>15</sup> Izesú nene vogaláikutí utó oake makó vamóza,

<sup>16</sup> kogómulo hitonoigo, Izesú noive liki áni vevesamasigo,

<sup>17</sup> eza gakó nene nana onoigo ligili hagili iki nivasive loko lokago, keza nene viki notesike kogoka kegepa muhelé noigo,

<sup>18</sup> keikutí maga ve agulizá Kiliopá ave loko noi vémo anotá aleko láa loko lo amimó: Veno ve mukí iki Zelusale apakú ali nupa niamó nenete imane gamenaló utó i sunimú gili asú inamóza, géisi ve hamó nene gelemape.

<sup>19</sup> Loko lokago, eza nana suni utó ikumú nilasive loko loká okimikago, keza láa liki li amesimó: Nasaleta numutotí ve Izesuni sunimú nolusive. Eza nene Ómasímini agepagutí gakó loaká ve minake, Ómasímini agómulo itó vegealitiní kogómulo alévolé gakó loaká ve itó alévolé suni aleaká ve minamó neve.

<sup>20</sup> Lá imó nemóza, leli guguni giziaká vete napagi leli monó gizapa vetegi apili ahulatave liki goní imikago, zohota zaló apiliki apeteke apili hele vemú nolusive.

<sup>21</sup> Itó goí oko Isilae mikasiuka gala vetini kigizakutí lelémó atiginá itithe loko gele-nounimóza, gakó makó láa loko neve. Ámina suni utó ikutí nene gamena losive makole mota vokave.

\* 23:56: Gá 20:10; Gapo 5:14 \* 24:6-7: Luk 9:22, 18:31-33



<sup>22</sup> Lá onoimóza, lelí zuhagutí vená makó lugáate iki likago ininá okune. Keza neteká holugú nene gonosi milimilimaló vake,

<sup>23</sup> gonosiva ániagake, ageló losi utó ikasike Izesú nene oteko agómulagi noive liki lasi gakokumú nene ámina vená nenete vamokitana ániagiake, atiginá iki iki avetó iki li lemémó.

<sup>24</sup> Lá ikago, lelikuti makolititosa viki geha mulikú gonosi milimilima ániagisike, venalite iki avetó amómáminoko nego ániagasimóza, ámina ve nene agupeló ániagasimó.

<sup>25</sup> Liki likasigo, Izesú láa loko lo kimimó: Lekeza ve negi niasive. Mulutini lepa hizetigi onoigo Ómasímini agepagutí gakó liaká a vete gakó mukí luhuva gizinamóma nene gili zagemasive.

<sup>26</sup> Ómasímo gologí oleketative loko lo mololeketa vema nene ámina miluma netá ali gihimikiko helekoko alika nene oteoko lapanala goha alitive likigó gizinamóma neve.

<sup>27</sup> Loko loake, Moseki itó Ómasímini agepagutí gakó liaká a vetegi gizina gakó lo kemeloko novike, ezáamú monó gotolaú gizina gakó mukí nenémini mogonamú ale hee loko lo kimimó.

<sup>28</sup> Lo kemeloko novike, Emause apá ali ávatihá iake, eza nene ámina apá avilegeko vinogo noigo,

<sup>29</sup> keza agata aliki ho mota lemeake límugusí zinogo noize, lezagi makó akatune liki li amikasigo, Izesú nene gele kemekago, numukú nene makó itemó.

<sup>30</sup> Itiki minake, nosá nanigi niake, eza nene mitó minake peleti aleake, Ómasi agepoka loake, gitegeake kimimó.

<sup>31</sup> Lá noigo, kogómula panava zekago, Izesuni nene ániagi hee hee lasimó. Ániagi hee hee nilasigo, litá oko legemage imó.

<sup>32</sup> Lá okago, keza láa liki ligili hagili asimó: Gapoloka gakó lo limike monó gotolámini mogona lo utó oko lo nolimike lelémó zaú okave.

<sup>33</sup> Liki ligili hagili asike, litá iki otiki Zelusalega atiginá iki vasimó. Vi anitikasike, aí izegipala zuhá 11-imagi agive lugáagi alegesá iki niago ániigasigo,

<sup>34</sup> ámina ve lositá nene litá iki avetó iki Guivahanitema nene lamaná oteko noike Saimoni utó o amekave.

<sup>35</sup> Liki li kimikago, keza lá iki Izesúma gapoloka kémegetoko vike nosánetá nanigi peleti gitigitó ániagi hee lasi gakó nene avetó iki li kemesimó.

*Izesú izegipala zuhaloka utó o kimimó*

*(Mat 28:16-20; Mak 16:14-18; Zon 20:19-23)*

<sup>36</sup> Izegipala zuhamate ámina gakó ligili hagili niago, Izesú nene galinali utó oake, ote minake hulu nene lekelitoka minino.

<sup>37</sup> Loko lokago, keza ániagiake, ininá iake holosi utó okahe liki kehelele vizimó.

<sup>38</sup> Lá iki kagata nigelego, eza láa loko lo kimimó: Lekeza nanamú ininá iki lakagata losi nigeleve.

<sup>39</sup> Imane nezama lamaná utó nouve. Lekeza nigisa nigizatoka nuhúma ániigalo. Itó ániigiiki iki nugupeló ali giliiki ániagi hee lilo. Neza nugupegi vegená lahaní utó okuve. Holosi nene nenéminiki niamave.

<sup>40</sup> Loko lo kemeake, agisa agizani nene kelepipimó.

<sup>41</sup> Lá okago, keza mulúikú ágila guluma itímo velesá gili alévolé amake kagata losi nigelego, Izesú nene lekelitoka nosánetá ma nehe.

<sup>42</sup> Loko loká okago, keza lotó gizina lagaha makó amiake,

<sup>43</sup> ániiginago aleko namó.

<sup>44</sup> Itó Izesú láa loko lo kimimó: Neza lekezagi minunike Mosé lo hukoko li gakokú itó Ómasímini agepagutí gakó liaká a vetini gakokú itó Ómasi agepoka liká nama liká a gakokú nenikumú epoapo gakó luhuva gizamóma nene gihila ze asú inogo ive loko lo lekemeaká umóma neve.

<sup>45</sup> Loko loake, monó gotolaú luhuva gizikago mina gakó nene gili vevesatave loko kigika kagata ale koló oake,

<sup>46</sup> láa loko lo kimimó: Monó gotolaú gologí oleketative loko lo mololeketa vemú nene miluma geleko heleoko gamena losive makole galegú minooko heleneitikutí otopá zeko otinogo ive liki luhuva gizinamóma neve.

<sup>47</sup> Itó aí agulizá nene numutó namató vegenatoka vo asú oko vokiko, vegená keza giliiki kigika ali viligikiko lihimáini ahuloketative loko lonoive. Itó ámina hoza nene Zelusale numutoka apí iki lihimi vitave liki luhuva gizinamóma neve.

<sup>48</sup> Ámina netá ániagakumú avetó iki li kimita vegenáma lekelisi niave.

<sup>49</sup> \* Gilinahe. Améneho Sikalahula lehizeleketatove loko lo mololeketamó nene amiselekugo liminogo ive. Lá itomó nenazo, lekeza imane apá litá iki ahulamiki ageva iki niiko velé okulumakutí zámuza lekemekiko vitave.

*Izesú okulumakú itimó*

*(Mat 16:19-20; Apo 1:9-11)*

<sup>50</sup> Loko loake, minake, numutotí kelémoko vike Petania numuni ali alitiki viake, agizani ale otike nónohá zeketamó.

<sup>51</sup> Nónohá nozeketake ahuloketoko okulumakú itimó.

<sup>52</sup> Lá okago, keza mulúikú agila guluma goha igo, Zelusalega atiginá iki vake,

<sup>53</sup> guguni giziaká zavusavegú nene gamena gamena Ómasi agepoka liki minamó.

---

\* **24:49:** Apo 1:4

## Izesu Kilistoni Gakó Lamaná Zoní Luhuva Gizamó

*Ómasímini agepagú gakotó mina vema vejená loló imó*

<sup>1</sup> Netá matá apí oko utó i gamena nene, Ómasímini agepagú gakotó mina vémo nene hanuva minake, mino-loko iteko minamó. Lá noiike, Ómasímini amatoka minamó. Itó agepagú gakotó mina ve nenémo Ómasi minamó.

<sup>2</sup> Áisi nene apí oko Ómasiloka minamó.

<sup>3</sup> Minoake nene, netá mukí ale utó o asú imó. Netá hámakoláa áisi minamigo utó osá amimó neve.

<sup>4</sup> Eza nene alévolé oko minoakalímini amelaho loló oko minake, alévolé oko minoaká nenémo vejená hize hanatoketamó.

<sup>5</sup> Lapaná nenémo límugusigú hize hanatokago, límugusi nenémo lapaná nene apele helemimó.

<sup>6\*</sup> Ómasímo ve makó alémo etó oake, amiselekago, voko utó imó, agulizá Zoní.

<sup>7</sup> Áisi nene vejená mukí keza aí gakó giliiki gili alévolé itave loko lapaná nenémini gakoláa lo utó oko minamó.

<sup>8</sup> Lá imóza, Zoní ezáa nene lapaná amelaho minamive. Eza hanuva lapaná amelahini gakoláagó lo utó oaká imó.

<sup>9</sup> Lapaná amelaho eza numutó namató vejená hize sata okimiaká noi vémo gamena nene zupa mikasigú utó oake minamó.

<sup>10</sup> Áisi nene mikasigú utó oakaláa nene utó imóza, mikasigú netá mukí nene áisi ale utó imó. Ale utó oake mino-loko novike lemeko mikasigú utó okago, mikasigú vejená keza aí ángi hee hee lamamó.

<sup>11</sup> Lá ikago, ezáa ale utó i apakú utó imóza, vejenala zuhate lelikutí noiye liake alími kamatoka amamó.

<sup>12</sup> Kigikagú aí alí gúemoláa nene Ómasímini izegipala zuha líl itave loko gapo veleketamó nene aikumú gili alévolé ina vejená nenémini itave loko gele kemeaká noiye.

<sup>13</sup> Keza nene izóike getakutí Ómasímini vejenala líl iki gosohá utó amave, itó lugupegú golanímini gapogú víki gosohá utó isá amave. Ómasilokatí gosohá utó iaká niave.

<sup>14</sup> Ómasímini agepagú gakotó mina ve nenémo vejená loló oake, vogalategú minoko aleko ike, nasahílí asapulagi gakó gihilagi ale-loko límigo, ánguhá. Aí okulumakú lapaná ángunimó nene, amelahini gipala hamokó minake amelahini lapanala lelepizigo ángunimóma neve.

<sup>15</sup> Aí mogonáa nene Zoní gakó napagutí láa loko lo utó imó: Nénisi ámina vemú goí oko nene neza utó amugo emane amunalotí mino-loko iteko mina ve nenazo, ámina ve alika nemegesaló noamó áisi nene není nivilegeko noave loko lo lukumumóma neve.

<sup>16</sup> Áisi nene vejená mukitoka netá mukí asapulagi nasahílí olimikago, hagitana alekogó minoaká noune.

<sup>17</sup> Ómasímo lokago, Mosé eza lo hukoko li gakokó luhuva gizo limimóza, Izesu Kilistó áisi aleko iteko nasahílí nene hagitana oletake gakó gihiláa lehizeletamóma neve.

<sup>18</sup> Ómasi nene ve makolímóhe makolímóhe ángonamive. Gipala hamokó ezáa nene Ómasi noiye. Eza amelahini amatoka minake, amelahini mogonáa aleloko limike lo utó oko lo lemekave.

*Monó nagamí holokimiaká vémo lo utó i gakó*

*(Mat 3:1-12; Mak 1:7-8; Luk 3:15-17)*

<sup>19</sup> Zelusale numutokatí Zuta vejenalítini monó gizapa vete guguni giziaká vegí monó zavirusvegú gelekelé ve makoki kimisilikago, Zonitoka vi anitíake, géisi éaga noane, gologí oletative loko lo mololeta vema noape líki loká imikago,

<sup>20</sup> ezáa mogona egamega amike lo kimike lo utó ike neza gologí oleketative loko lo mololeketa vema minamuve.

<sup>21\*</sup> Loko lokago, keza miní ameke goha loká itake itó géisi éagama noane. Gologí olimiaká vema velesá anitemiko okulumakutí goha ative líki lína ve Ilaizagama noape. Líki líkago, eza nene Ilaizá noamuve lokago, géisi nene Ómasímini agepagutí gakó loaká ve makó Mosekitana noi ve ageva oko nominuhá vema noape. Líki líkago, eza óve lokago,

<sup>22</sup> láa lokoma geza éahoma noane. Geitoka limisilikago uhá vejenáma voko nanave loko lo kimitune. Gezacamú nanave loko nolane.

\* 1:6: Mat 3:1; Luk 3:1-2 \* 1:21: Mal 4:5; Gapo 18:15,18

23\* Liki likago, Zoní láa loko lo kimimó: Ómasímini agepagutí gako loaká ve Isaiá luhuva makó láa loko gizamóma neve: Mikasi gomopalaló ve makolímó gako napagutí Guivahanímini gapo nene likigikagú ali hee liki vilitalo, loko nolive

loko giza gako nene nenitoka alévolé okave.

24 Loko lokago, Palisaio monó vete kimisilikago Zonitoka viki anite ve nenete

25 áminamú goha loká itake lamó: Geza gologí oletative loko lo mololeta vema minamane, itó Ilaizaga minamane, itó Ómasímini agepagutí gako loaká ve ageva nominuhá vema minamanimó nenazo, nanamú vegená nene monó nagamí holokimiaká noane.

26 Liki likago, Zoní láa loko lo kimimó: Neza vegená nagamikó holokimiaká noumóza, holutikú ve makó utó oake noimó nene lekeza áni guni isá amave.

27 Áisi nene némegetoko ova ova noive. Ámina veloka akohemunazo, aí gelekélé otoko hoza lagasó aletatomoki akohemuve.

28 Loko li netá nene Petania apatoka Zota nagamí vola helegaloka Zoní monó nagamí holokimiaká noitó utó imó.

*Ómasímini sipsip iza akaleva áni galo*

29 Akiake gó lago, Izesú nene Zoní noitoka anitekago, hotó otigí oko volane noago áni goake, láa loko vegenáma lo kimimó: Áni galo. Volane áisi nene Ómasímini guguni gizoakalímíni sipsip iza akaleva gíhla nene numutó namató vegenalitíni lihíma váini aí amupiló itekago ago hí geaká noive.

30 Neza aikumú nene neza utó amugo emane amunalotí mino-loko iteko mina ve nenazo, ámina ve alika nemegesaló noamó áisi nene není nivilegeko noive loko lo lukumumóma neve.

31 Neza nene gozapá aí nene áni go hee hee lamumóza, lekeza Isilae vegenalita ámina vémini gakola lo lukumugo gilitave loko aniteuke monó nagamí apí oko hololeketumóma neve.

32 Loko Zoní nene loake, goha láa loko aveté ike lo kimimó: Neza Sikalahulímó oku-lumakutí nama luhusigitana oko lemeko ámina vémini amupiló aleneigo áni gumóma neve.

33 Neza gozapá aí nene áni go hee hee lamumóza, monó nagamí holokimiaká hozaló nimisili vémo Sikalahú limike amupiló aleneiko áni gatani ve áisi nene vegená nene není Sikalahú holoketanogo ive loko lo nimimóma neve.

34 Loko litoka lemeko noigo áni gumole loko mogonamú nene áisi nene Ómasímini gipala noive, loko limó.

*Izesuni ganá izegipala zuha*

35 Akiake gó lago, Zoní ave itó izegipala zuhagutí ve lositá ámina mikasiló minamó.

36 Niago, Izesú nene apá makotoka novigo, áni goake, izegipala losima nene láa loko lo kimimó: Ómasímini sipsip iza akaleva áni galizo.

37 Loko lokago, keza nene gako gilikasike, Izesuni ámegetiki vasimó.

38 Vikasigo, Izesú nene viligoko áni goake, lekeza nanamú niasive loko lokago, kezáini gakokutí Lavi velemaka, lelí gakokutí nene monó gizapa velemaka, geza hí numukú minoaká noane.

39 Liki likasigo, iki áni galizo loko lokago, keza ámegetiki vasike, numunáa áni gasike, ho ale zohota okago, áminaloka makó miní mílasimó.

40 Zonini gako gilikasike Izesuni ámegetasi vegutí nene makó agulizá Etulú, eza Saimon Pitani agunala.

41 Áisi nene litá oko uvolahini Saimoni áni goake, láa loko lo amimó: Leza Mesiani mota áni gokune. (Mesía nene Zuta vetini gakokutí, itó Kilistó nene Kiliki gakokutí, ámina agulizalímíni mogonáa nene gologí oletative loko lo mololeta ve loko neve.)

42 Loko loake, Izesutoka alémoko vokago, Izesú nene áni goake, láa loko lo amimó: Geza Saimoga Zonini gipalamaka, geí gugulizá Sipasí ave loko nomuluve. (Sipasí nene Zuta vetini gakokutí, itó Kiliki gakokutí nene Pitá, agulizalímíni mogonáa nene geha sepepizámo.)

*Pilipoko Natanaeko Izesuni ámegetiki vasimó*

43 Akiake gó lago, Izesú nene Galilaia mikasiuka vitove loko agata geleake, Piliponi áni goake, geza némegetozo.

44 Loko limó nene, Pilipó ave Etulú ave Pitá ave nene Petesaita apatokatikó minamó.

45 Itó Pilipó nene Natanaeni áni goake láa loko lo amimó: Mosé lo hukoko li gakoki itó Ómasímini agepagutí gako liaká a vete la gakoki luhuva giza vema mota áni gokune. Nasaleta apatokati Zoseheni gipala Izesunima.

\* 1:23: Isa 40:3

<sup>46</sup> Loko lokago, Natanaé nene Nasaleta apatokatí nana netá lamaná makó utó itive. Loko lokago, Pilipó nene láa lokoma oko ániгоzo,

<sup>47</sup> Loko lokago, Natanaé nene Izesutoka vo anitekago, ániгоake, Ánigalo. Imane ve Isilae ve gihiláa nenazo, agikagú soza gakó minami ve noive.

<sup>48</sup> Loko lokago, Natanaé loká otake geza hitóma nougo ániganimó neve. Loko lokago, Izesú nene Pilipó velesá gelémoko amigo, nímuza za mogonaló noako ániгumóma neve.

<sup>49</sup> Loko lokago, Natanaé láa loko limó: Monó gizapa venemaka, geza lamaná Ómasímini gipala noane. Isilae ve lelí gugulizaki ve noane.

<sup>50</sup> Loko lokago, Izesú láa loko limó: Nímuza za mogonaló noako ániгumóma neve loko lo gumutó gelekanike nenikumú gele alévolé onoape. Gelezo. Oko moloko umó imane nene avevezahaváa neve. Netá gihila gohaláa nene alíka ániгoko gilinogo ane.

<sup>51</sup> \* Loko loake, miní ameko láa loko limó: Neza lamaná lo likimitoze, gililo. Lekeza okulumá koló okiko, Ómasímini ageló keza okulumakutí lumu ve gihila nenitoka tigá limigá niko ániganigave, loko limó.

## 2

### *Kana numutó ve vená losima ali agizakú vizemó*

<sup>1</sup> Numuni lositá akiake, Kana numutó Galilaia mikasiuka nene ve vená losima ali agizakú vizinigi nosánetá ali vavá niago, Izesuni izolaho áminaló noigo,

<sup>2</sup> Izesú ezagi izegipala zuhagi alesa milikimikago, viki makó miniki nosánetá ninago,

<sup>3</sup> áminagú mina vegealite vain nagamíma ní asú ikago, Izesuni izolaho nene vain nagamíma mota ní asú ikave loko lo amimó.

<sup>4</sup> Loko lokago, Izesú láa loko lo amimó: Vená geza nenemú nanamú nenitoka nolane. Nene není netáma neve. Neza alévolé netá loló ito gamenaváne velesá alitonamive.

<sup>5</sup> Loko lokago, izolaho nene gelekelé izegipalama nene netá makokumú lo nolikimikoma ilo, loko lo kimimó.

<sup>6</sup> Itó Zuta vegealite litá litá iki kugupe nogokalavó iaká amó nenazo, ámina numukú nene nagamí goni sipisi gehanitunú lilí amó nene 6-ia minamó. Ámina goni napa hamopamó vaí itikumú nene somo ligizani luga luga asú igo ihiki lekiaká amó neve.

<sup>7</sup> Lá okago, Izesú eza gelekelé izegipala nene lekeza nagamí ihiki nagamí goni napamagú lekilo. Loko lo kemekago, keza nagamí ihimi leki leki ago ago, goni napama nene vaí oake agepagó minamó.

<sup>8</sup> Lá ikago, Izesú nene lekeza lugáa ihiki aliki viki nosánetá gizapa vema amilo. Loko lokago, keza ihiki aliki nivago,

<sup>9</sup> ámina ha nagamilímo vain nagamí loló okago, nosá gizapa vemámo no gilimó nene laga imóza, hikutí utó itímini mogona gele vevesamimó. Gelekelé izegipama kezáikó gili hee hee lamó. Lá igo nosá gizapa vemámo vená alimi ame vema sele loake,

<sup>10</sup> láa loko lo amimó: Ve mukitoka nene vain nagamí lagaváa nene goí iki kimikago, niki niki kigikauka gopa okago, alíka nene vain nagamí golesáa nene ihiki kimiaká niave. Nenéminokoma nemóza, géisi nene senisim okanike vain nagamí lamaná imane halá gekanike minanike minanike alíka ale utó molokanimó nene vatí sunive, loko lo amimó.

<sup>11</sup> Izesú nene Kana numutoka Galilaia mikasigú nene ámina alévolé suni apí ike, ezáa hazana kelepezekago, izegipala zuha keza nene ániгiake, aikumú gili alévolé amó.

### *Monó zavusave lo hukoketamó*

*(Mat 21:12-13; Mak 11:15-17; Luk 19:45-46)*

<sup>12</sup> \* Lá ikago, Izesú nene Kana numutó ahuloake Kapanao apatoka lemeko novigo, izolahove agunala izegipala zuha mukí keza ámegetiki vamó. Viki neneló gamena hána minamake,

<sup>13</sup> \* Zuta vetini avóikini asenini zeketakumú gili mina holisi alitokagove loko, Izesú nene Zelusalega iteko vimó.

<sup>14</sup> Neneló Izesú ániгamó nene monó zavusave hé numunaloka pulumaká iza itó nama luhusi nene Ómasi guguni gizi amitave liki aliki ake, haitó mikasigutí moniló ámina mikasigú moni kimiaká a ve keza moni holomaló gatiká iki niago, ániгоake,

<sup>15</sup> lepa nagá límegeake nakahuni loló oake, vegeená niamó sipsip iza pulumaká iza niamó kepeleko kimisele ahula ahula igo, nivago, haitó mikasigutí moniló ámina mikasigú moni kimiaká a vetini holoma aleko gululupa soake gatiki mina moni aleko tulu ahuloake,

<sup>16</sup> nama luhusi miliaká a vema láa loko lo kimimó: Aménehini numuni imane ali meina numuni lilí amilo. Imane netá hatoka aliki vilo.

17\* Loko Izesú lokago, izegipala zuha leza nene geí numunimule loko mulúne githiná imó nenémo nepele hilitimó okave liki monó gotolaú gizikago mina gakó goha gulunimó.

18 Lá okago, Zuta vetini monó gizapa vete láa liki li amemó: Geza némini manámini noanimóma éahini gakotó nalene. Haitó suni makó ale utó moloko mognaka lelepizemane.

19\* Liki likago, konotó aleko láa loko lo kimimó: Lekeza monó zavusave imane tele vizikiko, nénisi nene gamena losive makole oko noviko, ge lutiginogo uve.

20 Loko lo kemekago, keza lamó: Avotege keza monó zavusave imane kilisimasi 46 oko novigo gi lutiginamóma neve. Itó géisi nene gamena losive makolegó noviko ge lutigitove loko nolape.

21 Liki lamóza, Izesú nene ezáa agupémimi zavusavegú lo vizike limó.

22 Minoko heleneikutí gamena losive makole minake mómoká oko otekago, izegipala zuha leza ámina netakumú Izesú li gakómagi monó gotolagutí gakó nenegi mota alévolé okago gelekunike, gele alévolé unimó.

### *Izesú ve mukilitini mogona gelekave*

23 Izesú nene avóikini asenini zeketakumú gili mina holisigú nene Zelusalega noike, ezáa mogona utó itive loko alévolé suni haitopaitolimini loló okago, mukí vejená keza ángiake, agulizaláa gili alévolé amóza,

24 Izesú ezáa nene mukí vejenalitini mogona ángo asú okamó nenazo, keitoka voko ale akisemimó.

25 Eza ve makolímimi mogona gilinogo voko vejenatoka loká miká oketosá amimó. Ezáagó vejená kigikagú ángo asú oaká imó neve.

## 3

### *Izesuko Nikotemoko*

1 Palisaio monó vetini kigivéipo makó minamó, agulizá Nikotemó. Áisi nene Zuta vetini monó gizapa venini makó minamó.

2 Ámina ve áisi límugusigú Izesú noitoka vike láa loko lo amimó: Monó gizapa velemaka, leza mognaka geleká nune. Géisi monó apí o lemeaká ve gihila minokanike, Ómasilokatí lemenimóma neve. Ve makó nenémo Ómasi aitoka minamiko loló oaká noani suni aleko alévolé netá loló oakaláa nene nomive.

3 Loko lokago, Izesú láa loko lo amimó: Neza lamaná lo gimitoze, gelezo. Makó nenémo okulumakutí gosohá utó amitimó nenémo Ómasímo alévolé oko gizapa olikimiaká apá ángaminogo ive.

4 Loko lokago, Nikotemó láa loko limó: Íi, móta napa okatímo nana oko gosohá utó itive. Nana oko izolahini agatupagú itekiko goha getatikumú lane.

5 Loko lokago, Izesú láa loko lo amimó: Neza lamaná lo gimitoze. Makó eza monó nagamí holoko Sikalahulímimi agikagú vo holokoko gosohá utó amitimó nenémo Ómasímo alévolé oko gizapa olikimiaká apakú iteminogo ive.

6 Vegenalititokatikó utó itamó nenete vejenalitini kemetamenigi utó inigave. Sikalahulímitokatí utó itamó nenete Sikalahulímimi ametamenigi utó inigave.

7 Lá onoinazo, lekeza okulumakutí gosohá utó itave loko lumó nene geza gelekako gena amino.

8 Hepé nene gopa aleaká noive. Lá noigo hepélímimi anó giliaká niamóza, mognáa hitotí apí oake aleaká noive itó vike hitoka lutegeaká noihe nene gelemave. Itó Sikalahulímitokatí utó ita vejenalitini mognáa ámináminoko nene neve.

9 Loko lokago, Nikotemó nene gakó lanimó nene mogonaló gelemu gakó laninazo, nana oko utó itive.

10 Loko lokago, Izesú láa loko lo amimó: Géisi nene Isilae vetini gakó apí o kemeaká ve noanimó nenazo, gakó nolumómámimi mogona nanamú gele gopa okane.

11 Neza lamaná lo gimitoze, gelezo. Leza nene ángokoko gele nuni netá áminagó lo lekemeaká nounimóza, lekeza nene gakote gili ahuliaká niave.

12 Neza mikasigú utó oaká noi netakumú lo lekemekugo, gili seketigí amanazo, nenemú okulumakú utó oaká noi netakumú lo likimitomó nene, nanatitotí gili seketigí itave.

13 Lekelikutí ve makolímimo okulumakú iteko okulumakú noi netá nene keké ángonamimóma neve. Okulumakutí lumu ve gihila nénisi Ómasilokatí lumumó nenazo, neza okulumakú noi netá nene ángonoumóma neve.

14 \* Mosé nene gozapé mikasi gomopalaló gosihakitana avevezaha netá loló oake zaló ale otimó nene gosihámate kepele vegealite áminaló ániigiiki goha lamaná itave loko lá imó nene nenémíni okulumakutí lumu ve gihila není nene malipo zaló nilími otinigave.

15 Nilími otikiko nene, nenikumú gili alévolé itamoláa keza alévolé kemetamenigi minanigave, loko limó.

16 Ómasímo numutó namató vegená lelikumú milumavate gilimó nene napa napa nego gipala hamokó lehizeletamó nene aikumú gili alévolé ita vegená keza latila amiki alévolé kemetamenigi minanigave loko lá imó neve.

17 Gipala nenémo mikasiuka vegená lihima kimitove loko nomive. Kelémo kugutó vizitive loko Ómasímo amiselekago limimó neve.

18 Makó keza Ómasímini gipalamú gili alévolé itamó nene, Ómasímo lihima kememinogo ive. Makó keza gili alévolé amitamó nenete Ómasímini gipala hamokó aí agulizá gili alemamó nenazo, nenemú Ómasímo mota lihima kiminogo ive.

19 Lihima kemeaká nenémíni mogonáa lá oko neve: Okulumakutí lapaná nene mikasiuka vegealitiní kovogisaló ale utó okugo, keza nene netá golesa aliki miniaká amó nenazo, keza lapaná nene ahuliake, limugusímini mututoni mini etó amó neve.

20 Makó keza netá golesa aliki minatamó nenete Ómasímini lapaná kemegeza amiiki kezáini miniki aliki amó nenémíni mogonáa utó okative liki Ómasímini lapanató isá amave.

21 Makó keza netá gihila aliki minatamó nenete Ómasímo hize lé okimikago iki miliki amó nenémíni mogonáa utó itive liki lapanalámini avogisaló anigave.

*Áisi minomo iteko minatimóza nénisi minomo lemeko minanogo uve*

22 Lá iki miníki, Izesú nene izegipala zuha lelémoko Zelusaalega ahulokunike, Zutaia mikasiloka voko minuhá. Neneloka makó minunike nagamí holoketoko minuhá.

23 Ámina zupa nene Zonini nene velesá nagá numukú alími milamago, Zoní nene Salima apá agilikaloka minake, Aeno loko noi numutoka minamó.

24 \* Neneló nagamí mukí minokagove loko vegená anitikago, monó nagamí holoketoko minuhá.

25 Lá okago, Zuta ve makolímó Zonini izegipala zuhagi nagamí holokimiaká sunimú pevelesava zemó.

26 Lá iake, Zonitoka viki láa liki li amemó: Tisalemaka geza Zota nagamí vola helegaloka noako, gezagi makó minasi ve mogonáa lo utó moloko lo lemeni ve nenémo itína gamena nene vegená nagamí noholoketago, mukí vegená ahuligitiki aitoka vi asú niamole.

27 Liki likago, Zoní láa loko lo kimimó; Ve makó nenémo okulumá amelaho netá matá amemikoma ezáa hagitana alitíhe.

28 \* Neza gologí oleketative loko lo mololeketa vema minamuve loko lo lukumumóma neve. Ámina ve ale goí otoko gapova veletatane loko Ómasímo nimiselekago umóma neve.

29 Vená ániigi milíta ve áisi vená ve loló okoko agoliza noviziko, agivelaho gelekoko alémo vatí oko mulunagú lamaná gilinogo ive. Nenémínoko mukí vegená nene Izesutokagó nivago gelekuke mulúnégú ágila guluma itimó nenémo hutilí oko vaí oko minative.

30 Ámina vémini agulizá nene minomo iteko minatimóza, nénisi minomo lemeko minanogo uve.

*Okulumakutí limi ve*

31 Veletokatí limimó áisi livilegeko noive. Makó nene mikasigutí utó amó nenete mikasímini mututoni líli inigave. Lá iki mikasigutí gakó linigave. Itó okulumakutí limi ve nenémo livilege asú onoive.

32 Áisi nene netá matá geleko ániiga netakumú loaká noimóza, aí gakó giliake amegesaló mila vegená mukí niamave.

33 Gakoláa gili alitamó keza Ómasímo lokago alévolé oaká noi veve liki nene gakó hize lé iaká niave.

34 Ómasímo amiselekago limi ve áisi nene Ómasímini Sikalahula gúe vaí omiake Ómasímini gakokó loaká noive.

35 \* Amelaho eza gipala ániigo amu heleake, mukí netá nene gipalámini agizakú molo asú okave.

36 Makó nenete Ómasímini gipalamú gili alévolé itamó keza alévolé kemetameni mota alikave. Itó makó keza gipalámini gakó gili ahuliiki mihina itamó keza alévolé kemetameni aleminigave. Nenémíni amupiló Ómasímini mesaha ititokó minanigave, loko limó.

## 4

*Izesuko Samalia venako*

<sup>1</sup> Palisaio ve keza Izesukumú láa liki gelemó: Zoní nene vejenala zuha luguhakó kelémo moloko monó nagamí holokimiaká noimóza, Izesú nene vejená mukí kelémo moloake holokimiaká noive.

<sup>2</sup> Nene gakó nene hanuva lamó. Izesú nene izegipala zuha lo lemekago lezategó monó nagamí holoketunimó. Lá okago, Izesú nene gakó geleake,

<sup>3</sup> Zutaia mikasi nene ahuloake, Galilaia mikasigú goha vimó.

<sup>4</sup> Novike nene, Samalia mikasiuka vo anitimó.

<sup>5</sup>\* Samalia mikasigú apá makó agulizá Sika loko neneloka anitimó. Ámina apá nene ká emane amunaló Zakopó eza mikasi makó nene gipala Zoseheni amimómámini agilikaloka minamó.

<sup>6</sup> Lá okago, áminaló nene Zakoponi nagamí gale minokago, Izesú nene áminaloka holínaka vo aniteake, gapo vike vitimo agizamuha zekago, ámina nagamí galeló minamó.

<sup>7-8</sup> Noigo, aí izegipala zuha leza nosánetá meina hizinogo numutoka itekuko, Izesú ezágó noitoka Samalia vená makó nagamí ihitove loko amó. Oko anitekago, Izesú nene nagamíma ihe nemezo loko lokago,

<sup>9</sup>\* Zuta vegi itó Samalia vegi nene otopá ziki miniaká amó nenazo, ámina vená nenémo geza Zuta ve neneka nanamú Samalia vená nenitoka nagamikumú voká nolane.

<sup>10</sup> Loko lokago, Izesú láa loko lo amimó: Geza Ómasímo gimiti netalímíni mogona gelemane. Itó nagamí ihe nemezo loko nolu ve není mogona gelemane. Geza není mogona getilina, itó alévolé oko mino-loko voakalímíni nagamikumú loká atilina, gumuline.

<sup>11</sup> Loko lokago, vená nenémo láa loko limó: Ve lamanámaka, gale hána nenazo, itó geí nagamí iheaká netá nominazo, alévolé oko mino-loko voakalímíni nagamí hikutí iheko nimitane.

<sup>12</sup> Avoteho Zakopó eza nagamí gale imane ligimó nenazo, ezáagi gipalagi iza galavagi keza áminagutikó niaká amó. Itó géisi nene Zakoponi avilegeko nagamí makó haitolímíni ale utó inogo nolape.

<sup>13</sup> Loko lokago, Izesú láa loko lo amimó: Nagamí imane natamóza, goha nagamikumú likivisinogo ive.

<sup>14</sup> Není nagamí nene lakagatupa oaká nagamí neve. Makó keza nenitokatí nagamí natamó nene, goha nagamikumú kiviseminogo ive. Nénisi nene nagamí kemekugo nene kigikagú agómula minatí nagamí minokiko alévolé kemetamenigi minimí itiki minanigave.

<sup>15</sup> Loko lokago, vená nenémo ha nagamikumú nolihe loko láa loko lo amimó: Ve lamanámaka, geza ámina nagamí nemekako, nokinake nagamikumú goha nivisemiko, imaneloka gamena gamena oko nagamí iheva iheva oaká noumó nene ahulokinake navasú vizeko minatoha.

<sup>16</sup> Loko lokago, Izesú ezáa mognamú gele hee litive loko láa loko lo amimó: Voko vaka nene alémoko ano.

<sup>17</sup> Loko lokago, vená nenémo váne nomimó nena. Loko lokago, Izesú láa loko limó: Geza váne nomive loko lamaná lokanimóza,

<sup>18</sup> géisi nene veló vanimó nene ligizani lugaloka asú igo vokanike animóma neve. Itó itúnasa vonani ve nene geí vaka nomive. Nenemú geza soza lamane.

<sup>19</sup> Loko lokago, vená nenémo láa loko limó: Ve lamanámaka, itúnasa mota gelekuve. Geza Ómasímíni agepagutí gakó loaká ve noane.

<sup>20</sup> Leza Samalia vejenalitimíni avotege nene imaneló Gelizim agokaló Ómasi geké limiaká amó. Itó Zuta ve lekeza Zelusalega Ómasi geké lotatune liki liaká niamóma neve.

<sup>21</sup> Loko lokago, Izesú láa loko limó: Vená geza lo gimitoze, geleko alezo. Gamena makó alitokaze. Nene alitokiko nene, aménehini imane agokalokó negopa, itó Zelusale numutokagó negopa, mukí apatoka gupá zi amiki monola litave.

<sup>22</sup> Lekeza gili gopa iki nene gupá zi amiaká niave. Lukugutó vizeaká nene Zuta ve lelitokatí utó itúnazo, Zuta ve lélisi gele hee lo nounike Ómasi gupa ze ameaká nouné.

<sup>23</sup> Gamena makó alitanogo ive. Itó imane litá oko mota alitokaze. Nenemú vejenala zuha lamaná keza kigikatunú itó gakó gihilatunú aménehini gupá zi aminigave. Améneho nenémíni gupá zi amita vejenakumú vitagá noive.

<sup>24</sup> Ómasi nene sikalahú nenazo, leza Ómasímíni Sikalahulímíni zámuzatunú itó gakó gihilatunú gupá ze amitune.

\* 4:5: Apí 33:19; Zos 24:32 \* 4:9: Eze 4:1-5; Nia 4:1-2



<sup>25</sup> Loko lokago, vená nenémo láa loko lo amimó: Gologí oletative loko lo mololeta ve (leza Kilistó ave loaká nouhá ve) utó itive liki likago gelenoumó nenazo, nene mota gelekuve. Eza utó okoko netá matá mukí nene lo utó o asú inogo ive.

<sup>26</sup> Loko lokago, Izesú gako lo nogumu ve nénisi nene noumole, loko lo amimó.

<sup>27</sup> Loko noligo, izegipala zuha leza okunike, ámina Samalia venaki gako lasimó nenemú sigaga lomikunike, nanetakumú nolihe itó nanamú gako lo namihe loko loká otanogo gena livisekago ahulunimó.

<sup>28</sup> Lá okago, vená nenémo nagamí goni nene ahuloake, ololu loko taoniloka vike mukí vegená láa loko lo kimimó:

<sup>29</sup> Lekeza iki imane ve ángalo. Ánigonamu ve áisi nene asugunatoka oko moloko umó nene gako lo utó molo asú onimikave. Lá imó nenazo, eza gologí oletative loko lo mololeta vema noitihe.

<sup>30</sup> Loko lokago, numutokatí lemeke Izesú noitoka anitikago,

<sup>31</sup> izegipala zuha leza gala vizeko monó gizapa velemaka, nosánetá nozo.

<sup>32</sup> Loko lokuko, eza láa loko lo limimó: Nosánetá haitolimíni nenitoka nemóza lekeza gelemave.

<sup>33</sup> Loko lokago, lezatetoka logele hagele unike makolímó nosánetá makó ale ma amekago lihe.

<sup>34</sup> Loko lokuko, eza limó: Nimisilimó eza lititoka molatitoka oko hoza gako lonetamó nene nalumó nenémo nosánetáne neve.

<sup>35</sup> Lekeza ikani losive makole goloko helekiko nosánetá omolanogo ive liki liaká niamóza, lo likimitoze, gililo. Lokogómula pulusiki aménehini mini nene ángalo. Nosánetá mota omolamó nenémíni iki vegená kígika mota ali vavá iki niminave.

<sup>36</sup> Loko lo nolukumu gako nenémíni hozaváa alita ve nenete meinaváa alinigave. Alikiko vegená makolite alévolé kemetameni ali luhánigave. Lá ikiko, kígikagú monó zuha atilí a vegi gihila lege vegi ali apiziiki kogoliza vizinigave.

<sup>37</sup> Lá okiko, makolímó zuhá okago, makolímó gihila lege moloaká noive liki liaká nia gakóma alévolé inogo ive.

<sup>38</sup> Lekeza ali zuhá amíkima gihiláa ligitave loko likimiselekumóma neve. Vegená makolite hozo aliki ali zuhá ikago mota omolokago, lekeza hozanímíni gihila hanuva milikave.

<sup>39</sup> Loko lokago, Samalia vená nenémo netá matá oko moloko umóma lo utó molo asú onimikave loko lo kemekago, ámina apakú vegená mukilite Izesukumú gili alévolé amó.

<sup>40</sup> Lá iake, Izesutoka vi antiake, makó minatune liki alesá milikago, gamena lositá kezagi makó minamó.

<sup>41</sup> Kezagi minake monó lo kimigo, mukilite gili seketigí amó.

<sup>42</sup> Lá iake, ámina vená nene láa liki li amemó: Leza ganáma nene géisi aveté okoko geleháma neve. Lá unimó nemóza, itínasa nene ezáa agepagutí gako ligo gelekunike gele alévolé okune. Áisi lamaná numutó namató ve lelí lugutó vizeaká ve noive loko mota gele alévolé okune, liki lamó.

#### *Izesú kiapé makolímíni gipala alémo zokamó*

<sup>43-44</sup> \* Izesú ganá nene Ómasímíni agepagutí gako liaká ve kezáini numuni apáitoka miníkikoma nene, ma kilími napa aminigave loko likumú nene Izesú eza kezagi gamena losíma mínoake, Galilaia mikasiuka vimó.

<sup>45</sup> \* Galilaia mikasiuka vo anitekate, Galilaia vegená keza amunaloka Zelusalega viake avóikini asenini zeketakumú gele mínoaká holisigú eza hoza aligo ángamó nenazo, nenemú Izesuni alími milamó. Lá ikago, Kana numutoka Galilaia mikasigú nene amunaló emane Izesú lokago hanuva nagamílímó vain nagamí loló i numutoka atiginá oko vimó.

<sup>46</sup> \* Voko noigo, Kapanao numutoka kiapé makolímíni gipala avisekago, noigo,

<sup>47</sup> Izesú eza Zutaia mikasi ahuloko goha atiginá oko Galilaia mikasiuka oko nanitive liki likago, geleake ámina kiapé nene gipala helesakosá oko noigove loko Kapanao numutoka alémoko vitove loko Izesutoka vike negénegeka limó.

<sup>48</sup> Negénegeka lokago, Izesú nene lekeza lu avevezaha la avevezaha nougo, ángiake gako nene gili aliaká niahe.

<sup>49</sup> Loko lokago, ámina vémo limó: Ve lamanámaka, gipáne helekatzite, litá oko lomano.

<sup>50</sup> Loko lokago, Izesú nene geza hanuva vozo. Gipaka mota zokokave. Loko lo amekago, ámina vemámó Izesuni gako gele aleake, atiginá oko vimó.

<sup>51</sup> Novigo, gó lokago, gelekelé vemate gapoló anitiki gipaka mota zokoake noive.

<sup>52</sup> Liki likago, zoka gamenamú loká oketago, keza azozá ho luseteló nego agupegú govísi alike hakalotave.

<sup>53</sup> Liki likago, gipámíni amelaho nene mogonamú lá oko gilimó: Ámina gamenaló Izesú nimisilike gipaka mota zokokave loko limóma neve. Loko geleake, ezáagi vená izegipalagi Izesukumú gili alévolé amó.

<sup>54</sup> Izesú nene Zutaia mikasiukatí oko Galilaia mikasiuka atiginá ike lu avevezaha la avevezaha nene i go, losi imó.

## 5

### *Nonohulotó ve makó alémo zokamó*

<sup>1</sup> Minoko Zuta vetini holisi napa makó alitokago, Izesú nene Zelusalega itimó.

<sup>2</sup> Neneól sipsip izatini gatetó nene nonohuló makó minamó, agulizaláa Petezata. Agilikaloka gaizopa numuni ligizani lugaloka asú igo minamó.

<sup>3</sup> Ámina numukú nene kivisi vejená, kogómulaló ali vejená, kigisaló ali vejená, kigisa kigizani nakeseta vejená mukí aki miniaká amó.

<sup>4</sup> Lá amó nene Guivahanímíni ageló makolímó gamena makó zupa lemeaká noike ámina nagamí ale heipeí oaká itotí ámina nonohulukú ganá limi ve nene avisi netakutí zokoaká imó nenazo, keza nagamíma heipeí itikumú gizapa iki minamó.

<sup>5</sup> Lá iki minakú nene ve makó agisa genisi í ve izolaho getakutí kilisimasi 38 oko novigo alímiki áminaló ahulikago minamó.

<sup>6</sup> Noigo, Izesú eza ámina ve ángoake, gamena hána hána minokave loko geleake, loká otake geza zokatove loko ma gelenape.

<sup>7</sup> Loko lokago, agisa genisi í vemámo limó: Ve lamanámaka, hí ve noitímó nagamí nonohulóma heipeí noiko nagamikú nelémo molokiko zokatove. Liminogo nougo, makolímó litá oko nivilegeake lemeaká noive.

<sup>8</sup> Loko lokago, Izesú láa loko lo amimó: Geza oteoko avilisaka geheko gapo moloko vozo.

<sup>9</sup> Loko li agepagi agisa golesa i vemámo agisa pehe lo ahuloake, oteko avilisala geheko gapo moloko vimó.

Ámina hoza nene holisi zupa alimó.

<sup>10</sup> \* Nenemú Zuta vejenalitini monó gizapa vete ve zokamó nene itína holisimagú nenazo, avilisaka ale nogehenimó nene amosá suni alekane.

<sup>11</sup> Liki li amikago, eza láa loko lo kimimó: Nelémo zoka vemámo avilisaka geheko gapo moloko vozo loko loake nimiselekago aleko nouve.

<sup>12</sup> Loko lokago, keza láa loko lo gimi ve agulizá éhoma neve.

<sup>13</sup> Liki lamóza, Izesú nene mulusi ikú holúikú legesá oko vimó nenazo, alémo zokago mina vemámo agulizaláa gelemimó nenazo,

<sup>14</sup> gelemuve loake, monó zavusavegú iteko noigo, Izesú minoko aí ángoake láa loko lo amimó: Gugupega mota lamaná okaze. Nenemú alika genavagi netá gizalekatanize, lihimá netá goha alemo.

<sup>15</sup> Loko lokago, ámina ve eza Izesuni ángo hee loake, vike Zuta gizapa vema ángoake nelémo zoka vémíni agulizá Izesúma neve, loko lo kimimó.

<sup>16</sup> Holisigú holisigú hoza nenémináa aleaká ikumú nene Zuta vejenalitini monó gizapa vete nenelotí apí iki gopoguni militake lovaga li amemó.

<sup>17</sup> Lá ikago, Izesú láa loko lo kimimó: Améneho hoza aleaká noimó nene holisi gamenagi miní ameko aleaká noive. Itó nezagi áminagó oko aleaká nouve.

<sup>18</sup> Loko lokago, Izesú nene Zuta vetini holisi ale gopa ikumú, itó Ómasimú nene aménehove like Ómasigi nezagi lelegí oko nousive loko likumú nene Zuta vetini monó gizapa vemate ámina netá lositakumú nene gili golesa goha ake, apele hilitune liki amuza golesa miliaká amó neve.

### *Ómasímíni gipalámo lihimamú lo hukoketanogo ive*

<sup>19</sup> Lá okago, Izesú nene gakó láa loko lo kimimó: Neza lamaná lo likimitoze, gililo. Neza Ómasímíni gipala noumóza, nezáne nagata geleko hoza alitomóláa nomíve. Améneho alimó nene ángouke áminagó oko aleaká nouve. Améneho oko moloko noimó nene gipala neza ángouke, áminagó oko oko moloko oaká nouve.

<sup>20</sup> Améneho nene gipala není ángo amu heleaká noike, hoza nalamó nene nelepize asú oaká noive. Itó lekeza hoza nalugo ángiaká niamó nenegó nomíve. Lekeza ángiiki sigaga linitatave loko améneho eza hoza napa lekelepizitove loko neve.

<sup>21</sup> Améneho eza hele vejená kelémo otike kelémo lamaná oaká noimó ámináminoko gipala neza aipe aipe kemetameni gosohá kimitove loko hanuva kimínogo uve.

<sup>22</sup> Améneho eza vejenalitini lihimamú lo hukoketosá amíve. Ámina hoza mukí nene gipala není nigizakú molokamó nene

<sup>23</sup> vejená mukilite aménehini agulizá ali otiaká niamó nenémíni iki gipala není nugulizá ali otítave loko neve. Makó keza gipala není nugulizá ali otema vejenalite gipala nimisilímó aménehini agulizá ali otemamó geleká noive.

<sup>24</sup> Neza lamaná lo likimitoze, gililo. Makolímohe makolímohe není gakó gelekoko nimisili vemú gele alévolé onoimó nenémo alévolé ametameni mota alekave. Alike lihimalamú goha goní aminogo ive. Heleaká ametameni nene ahuloake alévolé ametameni mota aleake noive.

*Izesuni mogonala li utó a ve*

<sup>25</sup> Neza lamaná lo likimitoze, gililo. Gamena makó alitanogo ive. Itó imane litá oko mota alitokave. Neneloka helemó nenete Ómasímini gipala není nonó lupa giliiki otiiki minanigave.

<sup>26</sup> Améneho eza alévolé oakalímíni mogonáa neve. Gipala neza áminagó oko alévolé oakalímíni mogonáa minatane loko nimisilímó.

<sup>27</sup> Lá okago, neza okulumakutí lumu ve gihila nounazo, améneho nene mukí vejenalitini lihimáinimú lo hukoketane loko lonetamóma neve.

<sup>28</sup> Imane nolu gakó giliiki nene ininá amilo. Gamena makó molamó nene hanuva neze. Nene alitokiko, gonosi apakú akinamó keza nonó lupa giliiki,

<sup>29</sup> \* galegutí otinigave. Lá iiki netá lamaná aliki minamoláa keza alévolé kemetamenigi otinigave. Itó netá golesa aliki minamoláa keza otikiko, lihimá kiminogo uve.

<sup>30</sup> Lá itomóza, nezáne nagata geleko hoza alitomoláa nomive. Améneho lokiko nene, lihimamú lo hukoketango uve. Lá inake, lihimamú hoza alekugo, etanogo ive. Ámina hoza alitomóza, nezáne nagata geleko alemoko nimisilímó áisi lititoka molatitoka oko alinogo uve.

<sup>31</sup> Nezáne mogonáne lo utó itomó nene, gihila zemitinazo,

<sup>32</sup> makolímo mogonáne lo utó okiko gihila zinogo ive loko nene gelenouve.

<sup>33</sup> \* Lekeza Zonitoka ve makó kímisilikago, keza loká imikago, eza gakó gihila lo utó onoimóma neve.

<sup>34</sup> Vejená neneta mogonáne ániigiiki hizi lé inítatave loko lamuve. Hanuva giliiki alévolé lekemetameni aliiki alévolé gapogú vitave loko lekelikumú nene noluve.

<sup>35</sup> Zoní eza lamaná liví napa loló oake, hize hanatoleketonoigo, lokogoliza viziki minamó neve.

<sup>36</sup> Ómasímo není hize lé onimiaká noimó nene Zonini avilegeko haitolímínoko neve. Améneho haitopaitó hoza alitane loko hoza gakó lonetamó nene ámina hozámíni gihila ale utó okugo, améneho nimiselekago lumumómámíni mogonáa utó oaká noive.

<sup>37</sup> \* Améneho nimisilímó áisi mogonáne lo utó oaká noimóza, lekelisi nene aí anó lupa gilísá amamóma neve, itó aí ánisá amamóma neve.

<sup>38</sup> Lekeza améneho nimisili vemú gili alévolé amanazo, aí gakó nene likigikagú minamive.

<sup>39</sup> Lekeza nene monó gotola mota alenoune liake, alévolé oko minoakalímíni gakoláa nenegú neve liki giliake, agizaka hiziki miniaká niave. Itó není mogona nene ámina luhuvagú utó noimóza,

<sup>40</sup> lekelisi nene nenitoka iki gímiziiki alévolé lekemetamenigi itanazo, gopa ahulinimiaká niave.

<sup>41</sup> Itó vejenalita nugupe aliki ititave loko losá amumóza,

<sup>42</sup> lekelí mogonáa nene lamaná gelenouve. Likigika nene Ómasiloka milísá amave.

<sup>43</sup> Nénisi nene aménehini gakotó moloko lekelitoka lumumopa, lekelisi nene geha zi nimísá amave. Minoko ve makó ezáa agata geleko anitekikoma nene, geha zi aminigave.

<sup>44</sup> Lekeza nene vejenalite lilími napa itave liki giliake, Ómasi hamokolímo lelémó napa itive liki makó lisá amave. Lá ikanazo, nana iiki Ómasímú gili alévolé itave.

<sup>45</sup> Lekeza nenikumú nene Ómasi amelahini avogísalo goní oletatímó nehe liki lamilo. Lá oko nomive. Lekelisi nene Moseni gakotoka leheta iaká niave. Ámina ve Moseni gakó nenémo goní oleketanogo ive.

<sup>46</sup> Áisi nene luhuva gizamó nene nenikumú gizonóimóma neve. Nenemú lekeza aí gakó gili alemó nelina nezamuki gili alévolé aline.

<sup>47</sup> Lá onóimóza, Moseni luhuva gakó gili ahulikamó nenazo, není gakó nene nana iki gili guni itamó neve, loko lo kimimó.

## 6

*Ve 5000 nosáneta kemeko namó*

*(Mat 14:13-21; Mak 6:30-44; Luk 9:10-17)*

<sup>1</sup> Izesú eza ámina gakó lo asú oake, Galilaia nonohuló agulizá makó Tipelia loko noi nonohuló likeko vo helega imó.

<sup>2</sup> Voake kivisi vejená mukí kelémo zoka zoka ike, lu avevezaha la avevezaha igo, vejenalite ániagiake, ámegetiki víki minamó.

<sup>3</sup> Lá niago, Izesú nene izegipala zuha lelémoko agokaú iteko minunimó.

<sup>4</sup> Gamená nene zupa Zuta vetini avóikini asenini zeketakumú gili mína holisi alitokago,

<sup>5</sup> Izesú nene vejená mukí aitoka nanitego, ánikogoake, Piliponi nene loká otake nosáneta hikutí meina hizeko kimitune. Láa vejená alegesá amó imanete niko vo holoma itimó neve.

<sup>6</sup> Loko limó nene Izesú eza netá matá oko moloko itimó nene nego, hanuva gimivagú moloko limó.

<sup>7</sup> Lokago, Pilipó nene moni gó ligizani lugaloka asú igo ahuloko nosáneta meina hizeko kimitunimóza, ma vo alemnogo ive.

<sup>8</sup> Loko loká okago, Izesú nene lekeza vejenáma li kimikiko mikasiló mini gesá iki minino loko lo limimó. Ámina apató nene tau lamaná minamó nenazo, neneló ve 5 tausen ale alitoko nenéminiki limiki mini gesá ikago,

<sup>9</sup> Imaneuka izegipa makó noimó áisi peleti ligizani lugaloka asú igo itó lagaha lositá aleneimóza, vejená mukí nianazo, ánenéatunú nana itune.

<sup>10</sup> Loko loká okago, Izesú nene lekeza vejenáma li kimikiko mikasiló mini gesá iki minino loko lo limimó. Ámina apató nene tau lamaná minamó nenazo, neneló ve 5 tausen ale alitoko nenéminiki limiki mini gesá ikago,

<sup>11</sup> Izesú nene ámina peleti aleake, Ómasi agepoka loake, alegesá iki mína vejená gona moloko kemeake, ámina oko lagahama kimimó.

<sup>12</sup> Kemekago, niki niki kagatupa okago, Izesú nene izegipala zuha lo limike lumatamáa minoko latila okatize, gizaká ilo.

<sup>13</sup> Loko lokago, leza peleti ligizani lugaloka asú igo kemekuko namó nenémini lumatamáa ale nupa oko gosúveha 12 vaí okago ale mulunimó.

<sup>14</sup> Lá okago, golvagí alévolé netá lá oko loló igo, vejená keza ániagiake, imane lamaná Ómasímini agepagutí gakó loaká ve napa makó mikasigú utó itive liki lína vema noitive.

<sup>15</sup> Liki liake, Izesuni hizi vigiake, agulizakí venini lílí itanigi ago, ániogoko geleake, ahulukimiake ezáagó agoka makotoka itimó.

*Izesú nagamí amupiló liso liso vimó*

*(Mat 14:22-33; Mak 6:45-52)*

<sup>16</sup> Iteko noigo, únaká molokago, izegipala zuha leza nonohuló agilikaloka lemehá.

<sup>17</sup> Lemeko Kapanao numutoka atiginá oko vinogo nagamikú lapegú noituko, límugusi litihokago, Izesú velesá amigo, lezategó vunimó.

<sup>18</sup> Novuko, ohuhú napa alike, nagamíma valahuká napa nozigo, vunimó.

<sup>19</sup> Leza nene kilomita 5-ahe itó 6-ahe ahulukunike novuko, Izesú nene nonohuló amupiló liso liso vike lugupeló naligo, ániogokunike, lehelele vizimó.

<sup>20</sup> Lehelele novizigo, Izesú nene lekelegesá legemino. Nénisima nouze.

<sup>21</sup> Loko lokago, sipigú alémo molanogo nouko, áminasitó vitune loko luni apatoka nene vo anitunimó.

*Vegenalite Izesukumú vitagá amó*

<sup>22</sup> Akunike gó lago, vejená mukí nonohuló vola helega minamoláa keza láa liki lamó: Holugú sipi hamokó imaneló nego ániGUNIMÓ. Nenegú izegipala zuha kezáikó Izesuni ahuliake víkamó nenazo, Izesú hitoka vonoitive.

<sup>23</sup> Liki kagata gululusi gliiake niago, Tipelia apatokatí vejená makó nene sipi makokú itiake Guivahanímo Ómasi agepoka loake peleti kemekago namómalo imi anitemó.

<sup>24</sup> Anitiake, mukí vejenalite Izesuge izegipala zuha niamago, vitagá iake, ámina sipigú itiake, Izesukumú vitagá itune liki Kapanao numutoka atiginá iki vamó.

*Izesú alévolé oko minoakalímini nosáneta noive*

<sup>25</sup> Nonohuló imane helegaloka vitagá iki iki alími utó miliake Monó gizapa velemaka, geza nana oko ane.

<sup>26</sup> Liki likago, Izesú láa loko lo kimimó: Neza lamaná lo likimitoze, gililo. Lekeza lu avevezaha la avevezaha ugo ániagiake, nenikumú vitagá niahe. Lá oko nomive. Peleti lukumugo, niki niki lakagatupa okago vitagá niave.

<sup>27</sup> Lekeza hozaváa alilo. Haha iti nosá nenemukopa, alévolé oko minoaká nosánetá nenémini hozaváa alilo. Okulumakutí lumu ve gihila neza Ómasi aménehini anosa alenou ve neza alévolé oko minoakalímini nosánetá lamaná likiminogo uve.

<sup>28</sup> Loko lokago anotó aliki Ómasímo giliko lamaná itive loko nana hoza alitune.

<sup>29</sup> Liki loká ikago, láa loko lo kimimó: Ómasímo hoza alitave loko loleketonoimóma nene nimisili ve nenikumú gili alévolé itave lokoma nena.

<sup>30</sup> Loko lokago, láa liki li amemó: Alévolé suni makó ale utó okako, áinigokinake, geikumú gele guni itune. Nana hoza makó alitane.

<sup>31</sup> \* Avotege keza gozapá mikasi gomopalaló minamómalo nene mana nosakó niki minamóma neve. Nenémini luhuva gakó nene Okulumakutí nosá kimigo niki minamó neve liki gizinamóma neve.

<sup>32</sup> Liki likago, Izesú láa loko lo kimimó: Lamaná lo likimitoze, gililo. Mosé nene okulmakutí nosá lekememimóma neve. Améneho nene likimimó. Itó okulmakutí nosá gihila lekemeaká noive.

<sup>33</sup> Nosánetá nene okulmakutí mikasigú limimó nenémo alévolé oko minoaká nene ale utó olekemeaká noive. Nenémo nene Ómasilokatí nosánetá gihila neve.

<sup>34</sup> Loko lokago, Guivahani geza nosánetakumú lanimó nene gamena gamena limitanize.

<sup>35</sup> Liki li amikago, Izesú láa loko lo kimimó: Alévolé oko minoakalímini nosánetá nénisi nene nouve. Makó keza nenitoka iki gímizitamó nene gaúna helemingave. Itó nenikumú gili alévolé itamó keza nagamikumú kiviseeminogo ive.

<sup>36</sup> Neza nene lo lekemeaká noumóza, lekeza nene gili ahuliake, gili alévolé amave.

<sup>37</sup> Mikasiuka vejená nene améneho nemeaká noi vejená keza mukí nene nenitoka anitinigave. Nenitoka anitita vejená nene ma kehelú aminogo uve.

<sup>38</sup> Okulumakutí lumumó není nepegagú gakó hize lé itove loko lememuve. Nimisili vémo lititoka molatitoka oko hoza alitove loko lumumóma neve.

<sup>39</sup> Améneho nene nenitoka kelémo mola vejená latila ikatave loko kelémo nupa okinake gamena napaló avasavagi kelémo otekugo, otinigave. Nimisili vémini agepagutí gakó láa oko neve.

<sup>40</sup> Gipala ánihi hee li miniki aikumú gili alévolé itamó keza alévolé kemetameni alikiko, gamena napaló kelémo ote asú inogo uve. Aménehini gakó nenéminoko neve.

<sup>41</sup> Loko Izesú nene okulmakutí nosánetá nénisi nouve loko likumú nene Zuta vetini monó gizapa vete gili golesa iake géneka lake, Izesukumú láa liki lamó:

<sup>42</sup> Imane ve nene Zoseheni gipalama neve. Itó izolahiko amelahiko nene ánihi nouháma nenazo, neza okulmakutí lumumóma neve loko nanamú loaká noive.

<sup>43</sup> Liki likago, Izesú láa loko lo kimike limó: Lekeza gilikiko golesa amino.

<sup>44</sup> Ve makó nene kezání kigikatunú gilliki nenitoka iki gímizeminigave. Améneho nimisilimó eza kelémoko okiko, iki anitinigave. Lá okiko, neza nene vejená nenémináa gamena napaló kelémo otinogo uve.

<sup>45</sup> \* Ómasímini agepagutí gakó liaká a vete gakó láa liki luhuva gizinamóma neve:

Ómasi ezáa vejená mukí nene monó lo kemeko apí okiminogo ive.

Liki gizinamó nenazo, améneho monó lo kimiko gilitamó keza nenitoka anitinigave.

<sup>46</sup> Ve makolímohé makolímohé aménehini ánihi nosá aminomóma neve. Ómasilokatí lumumó nénisi hamokó nounazo, nezagó ánihi nouve.

<sup>47</sup> Neza lamaná lo likimitoze, gililo. Nenikumú gili alévolé ina vejená kéisi nene alévolé kemetameni mota alikave.

<sup>48</sup> Alévolé oko minoakalímini nosá nénisi nene nouve.

<sup>49</sup> Avotike keza mikasi gomopalaló mana nosakó niliki nivake alika helemó.

<sup>50</sup> Itó okulmakutí nosá nokoko helemoakalímini imane nenitoka nene neve.

<sup>51</sup> Alévolé nosá okulmakutí limimó nene nénisi nene nouve. Nenemú makó keza nenitokati nosánetá natamó nene, alévolé iki mini lúaló miliki viki minanigave. Mémelánémo nene nosánetá loló onove. Numutó namató vejená lekeza alévolé lekemetamenigi minatave loko likiminogo uve.

<sup>52</sup> Loko lokago, Zuta ve keza pelevesava zeke áisi nana okoko mémeláa limiko natunikumú live.

<sup>53</sup> Liki likago, Izesú ezáa zohota zaló hilitimó nenémini gihila ali lá itakumú anzoa gakó láa loko lo kimimó: Neza lamaná lo nolukumuve. Lekeza okulmakutí lumu ve gihila není mémelagi golanigi namitamó nene, alévolé lekemetameni aleminigave.

<sup>54</sup> Makó keza není mémelagi golanigi natamó nene, alévolé kemetameni mota alikago gamena napaló kelémo otinogo uve.

<sup>55</sup> Není mémela nenémo nosá gihila neve. Itó není golani nenémo nagamí gihila neve.

<sup>56</sup> Není mémelagi golanigi ninamó nenete neniki ali akisikave. Neza ámina oko keí ale akisekuve.

<sup>57</sup> Améneho alévolé vémo nimiseleka, lemekumole loko aí gelegele nominuve. Ámina iki není mémeláne nata vegealite není gelegele minanigave.

<sup>58</sup> Okulumakutí limi nosalímíni mogonáa lá oko neve. Avotike gozapá namómáminoko nomive. Kéisi mana nosánetakó niliki vake alika helemóma neve. Itó není nosá imane natamó nenete mini lúaló miliki alévolé kemetamenigi minanigave.

<sup>59</sup> Loko Izesú eza Kapanao numutoka minake monó numukú itike, ámina monó nene lo kimi gakó neve.

*Alévolé oko minoaká gakó*

<sup>60</sup> Lá okago, aí vegejala zuha keikutí mukilite ámina gakó nene giliake, kezáitoka nene gakó imane gelehá nene gena okanazo, nene éaho gele hee loko amegesa molative. Liki goseleka likago,

<sup>61</sup> Izesú nene agikatunú geleake, láa loko limó: Gakó nene gilikago golesa okahe.

<sup>62</sup> Okulumakutí lumu ve gihila neza goí oko minu apató atiginá oko noitugo, lekeza ángatamó nene, nana itamó neve.

<sup>63</sup> Lugupémíni mémela nenémo alévolé lemetameni ale utó oakaláa nomive. Alévolé lemetameni loló oaká nene Sikalahulímíni hoza neve. Itó gakó lo nolukumumó nenémo alévolé lekemetameni ale utó oaká gakó neve.

<sup>64</sup> Láa loko lo lukumumóza, lekelikutí lugáa nenete gili alévolé amave, loko limó. Izesú nene monola gili ahulata vegejala nene hozava apí i zupa mota geleneimó neve. Itó amimika liti ve ámina oko geleneimóma neve.

<sup>65</sup> Nenemú ámina gakó lo kemeake, miní ameko láa loko lo kimimó: Neza nenemú láa loko lo nolukumuze, gililo: Makolímó améneho alémo vávani amiko nenitoka omo aniteakaláa nomive.

<sup>66</sup> Loko lokago, ámina zupa nene vegejala zuha mukilite ezagi minanigi goselé kepeleka, kemegesa amiake vikago,

<sup>67</sup> Izesú nene izegipala zuha 12-ama loká oletake lekezagi ámina iki ahulinimiiki vitune liki nílaha.

<sup>68</sup> \* Loko lokago, Saimon Pitá láa loko lo amimó: Guivahani geza ahulogimikinake éahitoka vitune. Geza hamokó alévolé oko minoaká gakó loaká noane.

<sup>69</sup> Leza nene geikumú mota gele alévolé onoune. Geza Ómasilokatí apazá keké vizeko noani ve noane loko gelenoune.

<sup>70</sup> Loko lokago, Izesú láa loko lo kimimó: Neza izegipa 12-a lekelémo etó okumóza, lekelitokatí makó nenémo Satatoka mino molokave.

<sup>71</sup> Loko limó nene Kalitót numutotí Saimoni gipala Zutá eza Izesuni vegejala zuha 12 lelikutí vémo minoko amimika litikumú limó neve.

## 7

*Izesuni agunamotamolate gili alévolé amamó*

<sup>1</sup> Lá okago, Zelusalegati Zuta vegejalitini monó gizapa ve keza Izesuni apele ahulatune liki amuza milikago, Zutaia mikasi nene ahuloake Galilaia mikasigukó vogá ogá oko minamó.

<sup>2</sup> \* Lá oko noigo, avóike minumuni gekumú gili mina holisi alitokago,

<sup>3</sup> Izesuni agunamotamolate láa liki li amemó: Vegejaka zuha keza lu avevezaha la avevezaha oaká noanimó nene ángatave loko imane apá ahulokoko voko Zutaia mikasiloka loló okako ángatave.

<sup>4</sup> Makó nenémo omo utó itove lokoma asuguná minoko hozaváa ma alesá amive. Geza hoza nenémínáa alitove lokoma, voko vegejá kovogisaló utó okoko aliko ángatanazo,

<sup>5</sup> liki izegipa agunamotamola keza lamó nene, aikumú gili alévolé amake láa liki likago,

<sup>6</sup> Izesú nene láa loko lo kimimó: Lekeza netá matá loló itune liki litá iki lili itamóza, Zutaia apató vito gamenaváne velesá alitamive.

<sup>7</sup> Monó gelema vegejalite mukahá lekepeleminigave. Neza nene miniki aliki ago golesa imoláa lo utó oaká nou netató gasó nimiaká niave.

<sup>8</sup> Lekeza nene holisigú vilo. Neza nene gamenáne alitaminazo, itínasa ma tovamínogo uve.

<sup>9</sup> Loko loake, Galilaia mikasiuka minamó.

*Izesú minumuni holisi minamó*

<sup>10</sup> Minokago, agunamotamolote goí iki holisi minatune liki Zelusalega tivikago, ezagó nene alika olío hízeko tovo imó.

<sup>11</sup> Notovo igo, holisi nene alitokago, Zuta ve keza aikumú lokatoká iki hiláauka voko noitive liki vitagá amó.

<sup>12</sup> Lá iki mihina iki vitagá niago, mukí vegealite aikumú musímusika liki nilake lugáate Izesú nene ve lamanáma neve liki likago, lugáate géneka liake ahulalo, áisi nene vegeaná kelémo gopa napa oaká noive.

<sup>13</sup> Liki lamóza, Zuta vetini monó gizapa vemú kehelele vizekago, gakó napagutí lamake asugunatoka lamó.

<sup>14</sup> Lá ikago, holisi holulagú Izesú nene monó zagusavegú itike monó apí okímike limó.

<sup>15</sup> Lá oko noigo, Zuta ve keza sigaga lake áisi nene lelí sukulu lamimóma nemóza, monó mogona hiláaukatí geleaká imó nolive.

<sup>16</sup> Liki likago, Izesú láa loko lo kimimó: Neza monó apí olikimiaká noumó nene nezáne geleko lo lekemesá amuve. Nimisili vémitokatí geleko lo lekemeaká nouve.

<sup>17</sup> Makó nenete Ómasímo lititoka molatitoka oko alítune liki gilitamó nene, alika Ómasílokatí nehe nenitokatí nehe nene ámina monokumú gili hee linigave.

<sup>18</sup> Makó nenete kezáini kagata gilitató litamó nene kugupe aliki itiki linigave. Makó nenete kimsili ve hoza amelahikumukó agupe aleko ititune liki hozava alita ve nenete ve huluva, sozagi nomi vegeaná niave loko litune.

<sup>19</sup> Lekelikutí Mosé eza lo hukoko lo likimi gakó amegesa mila vegeaná ma niamave. Nenemú lekelisi nene nanamú nipilitune liki liaká niave.

<sup>20</sup> Loko lokago, vegeaná mukilite lamó: Geza matuka gopa okago nolape. Éaho gipilitove noligo nolane.

<sup>21</sup> Liki likago, Izesú láa loko lo kimimó: Neza holisi zupa avevezaha hamokó loló umó nene ániagiake sigaga linamó neve.

<sup>22</sup> \* Nenemú gililo. Mosé nene izegipatini kugupeló Ómasímini anosa milikitatave loko loleketamó nene, Mosé apí amimó. Avotike kezáini apí amóma neve. Lá okago, ámina hoza alita gamena alitokago, holisima neve liki lamiki ámina hoza hanuva aliaká niave.

<sup>23</sup> \* Nene Mosé lo hukoko li gakó haha okative liki Ómasímini anosa nene izegipatini kugupeló nene holisi gamenaló milikimiaká nianazo, nénisi nene holisi zupa ve gepili alémo lamaná ukumú lekeza nanamú gilí golesa iaká niave.

<sup>24</sup> Lekeza ániagi lamaná amikima gakó galinali lamilo. Mogonaló gili hee hee likigó lilo.

#### *Ómasímo gologí oletative loko lo mololeta ve*

<sup>25</sup> Loko lokago, Zelusale apá amelage luguhate láa liki lamó: Apilitune liki liaká nia vema imane nehe.

<sup>26</sup> Nana okago gakó utó nolitó imane kugulizaki vele nenete géneka litamave. Keza aí mogonáa gilíki gili vevesamó Ómasímo gologí oletative loko lo mololeta vema noigo niahe.

<sup>27</sup> Lá oko nomive. Imane vémini getamoláa mota gelenoune. Gologí oletative loko lo mololeta vema utó itimómámini mogona ma gele vevesaminogo uhe.

<sup>28</sup> Liki lamó nene Izesú Nasalete numutoka utó ihe like giliake láa liki likago, Izesú monó zagusavegú nene monó apí oketoko noiike gakó napagutí láa loko limó: Íi, lekeza mogonánegi není getamó mogonáagi gelenoune liki linamóza, lumumó nene nezáne nagata geleko lememuve. Lamanalímini amelaho noive. Áisi nimiselekago lumumóza, lekeza aikumú nene gelemave.

<sup>29</sup> Nénisi nene aí amatoka minutotí nimiselekago lemekumó nenazo, aí mogona gele vevesonouve.

<sup>30</sup> Loko lokago, Ómasílokatí lumumó neve loko likumú nagá aminigi amóza, gamenaváa alitamigove liki kígitató gena okago ahulamó.

<sup>31</sup> Lá ikago, keitokatí vegeaná mukilite aikumú gili alévolé iake láa liki lamó: Imane vémo lu avevezaha la avevezaha oaká noinazo, gologí oletative loko lo mololeta vema anititive liki lina vemámo Izesuní aviligitihe. Óve, avilegeminogo ive.

#### *Nagá numukú Izesuní alími milatave liki pilisi ve kimiselemó*

<sup>32</sup> Alegesá iki mina vegealite láa liki nilago. Palisaio monó vegealite gliiake, keza guguni giziaká a ve napagi ligili hagili iake Izesuní nene nagá numukú alími milatave liki pilisi ve kimiselemó.

<sup>33</sup> Lá ikago, Izesú láa loko limó: Neza gamena koma lekelitoka mininake nimisili veloka atiginá oko vinogo uze.

\* 7:22: Liv 12:3; Apí 17:10

\* 7:23: Zon 5:9

<sup>34</sup> Lá okugo lekeza nenikumú vitagá itamóza, ma áinigaminigave. Voko minatotoka nene nana iki ititave. Ma iteminigave.

<sup>35</sup> Loko lokago, Zuta vete kezáitoka láa liki ligili hagili amó: Imane ve hitoka voko noiko vitagá itunikumú live. Zuta veđená Kiliki mikasiuka hutilí iki viki niamoláa keitoka voko minoko monó gako apí o kemeko noiko vitagá itunikumú lihe.

<sup>36</sup> Lekeza nenikumú vitagá itamóza, ma áinigaminigave loko limó itó voko minatotoka ma iteminigave loko limó nene nana itikumú live, liki lamó.

*Ligikagutí nagamí lisani nenéminoko lemeko minanogo ive*

<sup>37</sup>\* Zuta veđenalitini holisi napa nene asú inogo noigo, alegesá napa iki niago, Izesú oake gakó napa like láa loko lo kimimó: Makó keza nagamikumú kivisekikoma, nenitokatí iki natave.

<sup>38</sup>\* Itó monó gotolaú nenikumú gili alévolé ita veđenakumú nene kigikagutí monó nenémo nagamí lisani nenémini oko zeko minanogo ive liki luhuva gizinamóma neve.

<sup>39</sup> Loko Izesú limó nene ezámú gili alévolé ita veđená nene Sikalahú lehizeketatove loko limó neve. Eza okulumakú gonanalisi lapanalámíni agikagú velesá itenamikeve loko Sikalahú velesá lehizeketamike limóma neve.

*Vegenalite Izesukumú hizi hóu lamó*

<sup>40</sup> Ámina gakó nene veđenalite giliake, lugáate Izesukumú nene lamaná Ómasímíni agepagutí gakó loaká vele gakoláa gelekunike ageva nouhá ve imane noive.

<sup>41</sup> Liki likago, lugáate áisi nene Ómasímo gologí oletative loko lo mololeta vema noive liki likago, lugáate Izesukumú Galilaia mikasiuka utó ihe liki giliake pevevesava ziki láa liki lamó: Gologí oletati vema nene nana oko Galilaia mikasigutí utó itive.

<sup>42</sup>\* Monó gotolaú nene gologí oletative loko lo mololeta ve eza Tevitini apá gotola Petelehe apakú itó Tevitini agapilamó zuhagutí utó inogo ive liki luhuva gizinamóma neve.

<sup>43</sup> Liki liake, aikumú miní luga luga amó.

<sup>44</sup> Lugáate nagá amitune liki amó nene kigizató gena okago ahulamó.

*Monó gizapa vete gili alévolé amamó*

<sup>45</sup> Lá iake, monó zagusaveló pilisi ve minamó keza atiginá iki vikago, guguni giziaká a vegi Palisaio monó vegi keza loká ikitake lekeza nanamú alímiki amave.

<sup>46</sup> Liki likago, pilisi vete áisi gakó nolimó nenémini iki ve makolite lisá amave.

<sup>47</sup> Liki likago, Palisaio ve keza láa liki lamó: Lekezagi ámina oko lokogoka vizekago nilahe.

<sup>48</sup> Monó gizapa ve lugáagi Palisaio ve lugáagi aikumú gelemó alévolé okago nilahe.

<sup>49</sup> Óve. Imane li huka gakó gelema veđená alegesá iki niamó nene usí vize kemenei veđenakó niave.

<sup>50</sup>\* Liki likago, keikutí ve makó Nikotemó nene amunaló emane Ímugusigú Izesutoka vi vemámo láa loko lo kimimó:

<sup>51</sup> Lekeza lilo. Ve makó nene mogaonáa giliki lihimavala áinigamiki apilitune liki liaká niahe. Monó gotolaú lá oko nomive.

<sup>52</sup> Loko lokago, agivelage gahá amiki láa liki lamó: Gezagi nene ámina oko Galilaia mikasiukatí numuká ve noape. Monó gotolaú vitagá ova ova oko Galilaia mikasiukatí Ómasímíni agepagutí gakó loaká ve makó utó itive loko keké nomive loko gilitanize. [

<sup>53</sup> Liki liake, hutilí iki numúitoka vi vi amó.

## 8

*Moko mogonaló noigo ániaga vená*

<sup>1</sup> Ikago, Izesú nene Oliví agokau itimó.

<sup>2</sup> Akiake gó lokago, ho siki noligo, monó zagusavegú goha iteko noigo, veđená mukí áisi noitoka alegesá ikago, mitó minake monó apí o kimimó.

<sup>3</sup> Lainim-noketago, monó mogona apí ikimiaká a vegi Palisaio monó vegi keza vená makó moko mogonaló noigo ániagiake Izesutoka alímiki viki alími holukú miliake láa liki lamó:

<sup>4</sup> Tisalemaka, imane vená mokoló noigo áni gokunike alémoko nounimó lae.

<sup>5</sup>\* Itó Mosé eza lo hukoko li gakokú vená nenémináa gehanitunú kipili ahulalo loko loletonoimóma nenazo, géisi nanave loko nogelene.

<sup>6</sup> Liki lamó nene gakó lo gopa itihe liki gimivagú miliki lamó. Gakó nana oko litihe gelekínake neneló alémo moloko lokínake goní otatune liki agoka viziki lamó. Likago, Izesú gupá zeake mikasiló nene agizanitunú luhuva gizamó.

\* 7:37: Liv 23:36

\* 7:38: Isa 58:11; Zak 14:8

\* 7:42: Mik 5:2

\* 7:50: Zon 3:1-2

\* 8:5: Liv 20:10; Gapo



<sup>7</sup> Nogizago, keza loká imiake goha loká itago, oteake láa loko lo kimimó: Lekelitokatí ve makó lihimavala nomiti vémo apí oko gehanítunú apelekiko apililo.

<sup>8</sup> Loko loake, goha gupá zeake mikasiló agizanítunú luhuva makó gizamó.

<sup>9</sup> Nogizago gakola giliake, améipo ale goí oko vokago, hamopamó viká viká iki vi asú amó. Vikago, ámina venáma Izesuni amatoka noigo,

<sup>10</sup> Izesú okena oko gonú napilike loká otake vená geza gilímiki a vegená hitoka vave. Makolímo lihimakamú goní ogetamihe.

<sup>11</sup> Loko lokago, vená nenémo Guivahanínemaka, lá amave. Loko lokago, Izesú limó: Nezagi ámina oko lihimakamú goní ogetamuve. Nenemú voko lihima netá goha alemo, loko lo amimó.]

*Izesú numutó namató vegenalitini livi noive*

<sup>12</sup> \* Alika Izesú eza vegená nene gakó miní ameko láa loko lo kimimó: Neza mikasiuka vegená lekelí livi nouve. Makó není némegetata vegená keza límugusi gapogú viki minaminigave. Alévolé lapaná aliiki minanigave.

<sup>13</sup> \* Loko lokago, Palisaio monó ve keza láa liki li amemó: Gezaka mognonaka lo utó moloko lanimó nene leza gelekuko gihila nomive.

<sup>14</sup> Liki likago, Izesú láa loko lo kimimó: Nezánéne mognonáne lo utó mulumó nene, neza hitokatí umó itó hitoka vitohe nenémíni mognonáa gelenouke, gakó nolumó nene gihiláa neve. Lekelisi nene nemú manamú makó gilísá amave.

<sup>15</sup> Lekeza ha vegenalite lotuva ligiaká niató liaká niave. Neza mognonataganamú lotuva legeko hozaváa itína alemumóza,

<sup>16</sup> neza mognonatagana lotuva legeko alulina nene nezánegó alitomoláa oko minamiline. Nimisili ve améneho nelémo vatí oaká noinazo, alitomoláa oko nene lotuva legeko hozaváa alitomó nene gihiláa zinogo ive.

<sup>17</sup> Mosé lo hukoko li gakokutí láa loko nemóma neve: Ve lositalitosa ve makolímini mognona lo utó iki litái gakó nene hamó gapoló vokikoma lasi gakó nene gihiláa neve loko litune.

<sup>18</sup> Nezáne mognonáne nolugo, nimisili ve améneho nene ámina oko lo utó molonimiaká noive.

<sup>19</sup> Loko lokago, keza loká itiki amekaho hí noive liki likago, eza láa loko lo kimimó: Lekeza není mognona gili guni amake aménehinigi mognona gili guni amave. Lekeza není mognona gelelina, aménehini mognonagi ámina iki gili guni aline.

<sup>20</sup> Loko Izesú limó nene eza monó zagusavegú moni miliaká a pokisi mina agilikaloka minake, monó lainim-oketoko ámina gakó limóza, gamenaváa alitamigo ve makolímo oko nagá numukú alémo molamimó neve.

*Nénisi voko minatotoka ma aminigave*

<sup>21</sup> Izesú miní ameko láa loko lo kimimó: Neza ahulolikimikinake vokugo, lekeza vitagá iiki lihimatinigi ha miniko hilingave. Lá iki hiliiki nénisi voko minatotoka ma aminigave.

<sup>22</sup> Loko lokago, Zuta vetini monó gizapa vete neza voko minatotoka ma aminigave loko limó nene nanamú live. Ezáa agupe ale golesa oko hilingo lihe.

<sup>23</sup> Liki likago, eza láa loko lo kimimó: Lekelisi nene amunalokatí niave. Nénisi veletokatí nouve. Lekeza mikasiukatí niamóza, neza mikasiukatí minamuve.

<sup>24</sup> Lá onoiomó nenazo, neza nenemú lihimatinigi ha miniko hilingave loko lo leke-mekuve. Neza imane minoko mognonáne lo nolukumumóza, lekeza Ómasilokatí lemeni ve noane liki gili alévolé amitamó nene, lihimatinigi ha miniko hilingave.

<sup>25</sup> Loko lokago, loká itiki Olo, éahoma noane. Liki likago, Izesú láa loko lo kimimó: Apí oko mikasiuka lumutotí lo lekeme-loko voaká noumó lae.

<sup>26</sup> Neza lekelí lihima gakó mukí alenoumóza, nimisili vémini gakó imane lo utó moloko lo lekemeaká nouve.

<sup>27</sup> Loko amelahikumú láa loko lo kemekago, keza gili hee lamamó.

<sup>28</sup> Nenemú Izesú miní ameko láa loko lo kimimó: Lekeza okulumakutí lumu ve gihila není nene zaló nilími otíiki, lo lekemeaká noumómámini oko noive liki gili guni inigave. Itó nezáne nagata geleko alemuke, améneho lo nimitokó loaká noive liki gili guni inigave.

<sup>29</sup> Nimisili ve eza nezagi makó noive. Neza gamena gamena netá matá oko moloko ukumú amu helekago, ma ahulonetosá amive.

<sup>30</sup> Loko lokago, vegená mukilite Ómasilokatí limi ve noive liki aikumú gili alévolé amó.

*Gakó gihiláa nenémo gologí oletanogo ive*

<sup>31</sup> Zuta ve gili alévolé iminamoláa nene Izesú láa loko lo kimimó: Lekeza není gakotokó minatamó nene, není izegipáne gihila minanigave.

<sup>32</sup> Lá iiki gakó gihiláa gili guni ikiko, ámina gakolímo nagakutí gologí olikimikiko, vatí iki minatave.

<sup>33</sup> \* Loko lokago, makolite láa liki li amemó: Leza Avalahani agapilamolá nouko makolímo ezáa gopoguna lelémó molosá aminazo, geza gologí olimikako, vatí oko minatune loko nolape.

<sup>34</sup> Liki likago, Izesú láa loko lo kimimó: Neza lamaná lo likimitoze, gililo. Makó keza lihima netá aliki minatamó nene lihima netalímini gopogu izegipa minanigave.

<sup>35</sup> Gopogunáte gizapa véimímini numukú miniki aliki aminigave. Gipalámogó nene amelahíni numukú míno lúaló moloko minanogo ive.

<sup>36</sup> Nenemú Ómasímini gipala áisi gologí olikimikiko, lekeza lamaná nagakutí gologí olikimikiko minanigave.

<sup>37</sup> Lekeza Avalahani agapilamolá niave loko mota gelenoumóza, gakónémó likigikagú minamigo, nepele hilitune liki liaká niave.

<sup>38</sup> Neza aménehini amatoka minuke ánigonou netakumukó loaká nouve. Lekeza nene lekezatini ametipitokatí ángiki gele netakó líli iaká niave.

<sup>39</sup> Loko lokago, ametehe nene Avalahá noinae. Líki likago Izesú láa loko lo kimimó: Lekeza Avalahani agapilamolá minalina, aí avevezahaló iki míliki minaline.

<sup>40</sup> Ómasilokatí gakó gihiláa gulumó nene lo lekemenoumóza, nepele hilitune liki liaká niave. Avalahá nenémíni osá amimole.

<sup>41</sup> Lekelisi nene ametipo imó imó nene iaká niave. Loko lokago, leza gapoló izegipa minamune. Ómasi nene ametehe hamokóma noive.

<sup>42</sup> Liki likago, Izesú láa loko lo kimimó: Neza Ómasi minutotí vejená nemetamenigi loló okuke lemenouve. Neza nagata geleko lumumó negopa, Ómasímo nimiselekago noumó nenazo, ametipo nene Ómasi minalina, likigika nenitoka milaline.

<sup>43</sup> Není gakó nana okago gili vevesamave. Neza gakó nolugo gena likivisekago gilísá amamó, nenemú.

<sup>44</sup> Lekelisi ametipo Satá amu hiliti netá alitune liki giliaká niave. Áisi gozapá nene kepelenó kepelenó oko míno-loko noave. Agikagú gakó gihila nomigo, amegesa ameká noive. Soza gakolímíni amelaho eza soza saza gakó nene nosánetala loló okago, áminaló gelekelela mínoaká niave.

<sup>45</sup> Nénisi nene gakó gihiláa lo lekemeaká noumóza, lekelisi nene gili ahuliaká niave.

<sup>46</sup> Lekelitokatí makolímo není lihima ma lo utó okiko alévolé itihe. Neza gakó gihiláa lo lekemeaká noumó nenazo, nanamú gili alísá amave.

<sup>47</sup> Makó keza Ómasímini gipa minatatite Ómasímini gakó gilinigave. Lekeza Ómasímini izegipala minamake, aí gakó gili ahuliaká niave.

*Avalahá utó oko minamigo Izesú minamó nominave*

<sup>48</sup> Loko lokago, monó gizapa ve keza láa liki li amemó: Geza Samalia numuká ve matuka gopa okago nolape loko gelekunike gakó lamaná loaká noune.

<sup>49</sup> Liki likago, Izesú láa loko lo kimimó: Neza matúne gopa okago lamuve. Aménehini ale napa oko loaká nouve. Lekelisi nene není aliki mumusopa ziaká niave.

<sup>50</sup> Neza nugulizá vitive loko losá amuve. Nene aménehini hoza neve. Áisi nene gakó lo hukoaká ve nenémó vejenalitini mogonataganáinimú lo hukanogo ive.

<sup>51</sup> Neza gakó lamaná lo likimitoze, gililo. Makó keza není gakó gili alitamó nene kigikáa ma helemínogo ive.

<sup>52</sup> Loko lokago, Zuta vete láa liki li amemó: Matuka lamaná gopa okave. Avalahá gozapá helekamóma neve. Itó Ómasímini agepagutí gakó liaká a ve keza ámina iki hilikamóza, makó keza není gakó gili alitamó nene kigikáa ma helemínogo ive loko nolape.

<sup>53</sup> Avoteho Avalahá iteko mína ve helekamóma neve. Géisi Avalahani aviliginogo nolape. Itó Ómasímini agepagutí gakó liaká a ve keza ámina iki hilikave. Geza hí ve suka loko gugupe aleko noitene.

<sup>54</sup> Liki likago, Izesú láa loko lo kimimó: Nezáne nugupe aleko ititomó nene etaminogo ive. Améneho Ómasíleve liki liaká nia ve áisi nene nelémó napa oaká noive.

<sup>55</sup> Lekeza aikumú gili vevesísá amave. Nezáne nene aikumú gelenouve. Aikumú gelemuve loko lulina nene, lekelikitana oko sozaló ve minulinamóza, lá oko nomive. Amenehikumú gelenouke gakoláa gele aleaká nouve.

<sup>56</sup> Avotipo Avalahá neza mikasiuka lumu gamena nene vamotoka ángoake, agoliza vizeko minamóma neve.

\* 8:33: Mat 3:9; Luk 3:8

<sup>57</sup> Loko lokago, ámina gizapa ve keza li amiki geí kilisimasi 50-a vaminazo Avalahani ma ániigonape.

<sup>58</sup> Liki likago, Izesú láa loko lo kimimó: Neza lamaná lo likimitoze, gililo. Avalahá nene utó onamigo, minumó nominuve.

<sup>59</sup> Loko lokago, gehani aliake apili hilinigi ago, Izesú nene unamaha oake monó zagusaveguti lemeko vimó.

## 9

### *Izolaho getakutí agómula lika ve alémo goloutotamó*

<sup>1</sup> Gamena makó zupa nene Izesú eza gapoló novike, ve makó izolahini agatupagutí agómula liko vimó geta ve ániagamó.

<sup>2</sup> Nánigago, vegenala zuha leza loká otoko monó gizapa velemaka, éhini lihimámo agómula likamó getave. Ezáa lihimámo nehe itó izolahiko amelahiko lihimámo neve.

<sup>3</sup> Loko loká omukoko, Izesú láa loko lo limimó: Nenémo amive. Itó izolahiko amelahiko lihimámogi amive. Ómasímíni zámuzá aitoka utó itive loko nenémináa getamó neve.

<sup>4</sup> Mikasiuka vegená niamó keza holisakasanagó hoza aliake, holugú nene hoza alisá amave. Ámináminoko leza nimisíli vémini hoza itína alekinake, lelí hoza asú iti gamena nene hoza aleminogo une.

<sup>5</sup> \* Neza mikasigú minato gohala mikasiuka vegenalitini liví minanogo uve.

<sup>6</sup> Loko loake, mikasiuka gituhú oake, mikasi aleko lukená zeake agómula lika vemámíni agómualó holomiake,

<sup>7</sup> Láa loko nolike amisilimó: Geza voko Siloama nonohulukú golotuvaka nagamí zezo. Ámina nagamí agulizalímíni mogonáa nene apili mila nagamíle. Láa loko lokago, ámina ve vike nagamí zeake, agómula goloutokago, atiginá oko amó.

<sup>8</sup> Lá okago, agivelage ániagiake, goí oko monimú voká vokató ve minoaká imómave liki giliake, monimú voká vokató mumuzó mumuzó oko minoaká i ve imane nehe.

<sup>9</sup> Liki likago, lugáate ámina vema nenaé liki likago, lugáate óve, ámagitana haitó noinogo ive. Liki likago, ámina vemámo neza ámina vema nounae.

<sup>10</sup> Loko lokago, loká itiki nana okanike gogómula goloutane.

<sup>11</sup> Liki likago, láa loko lo kimimó: Ve makó agulizá Izesú áisi goihá loló oake nogómualó holonimiake, Siloama nonohulukú voko nagamí zezo loko lo nemekago, neza voko novogisa nagamí zeuke nogómula pulusokave.

<sup>12</sup> Loko lokago, keza loká itake ámina ve hikuka noive liki likago, neza ma ániagumve loko limó.

### *Palisaio monó vete agómula goloutamó nenémini mogonamú vitagá amó*

<sup>13</sup> Láa loko lokago, agómula ale goloutota vema nene Palisaio monó vegenatoka alímiki vamó.

<sup>14</sup> Itó Izesú nene goihatunú agómula ale goloutamó nene holisi zupa lá imó.

<sup>15</sup> Lá okago, Palisaio monó ve keza ámina iki agómula goloutakumú goha loká itiki likago, láa loko lo kimimó: Izesú nogómualó goihá holonimikago, nagamí zekugo, nogómula goloutokamole.

<sup>16</sup> Loko lokago, Palisaio ve lugáate Izesunimú nene lelí holisigú hoza lá oko alike ale golesa oaká noinazo, ámina ve eza Ómasílokátí noamive. Liki likago, lugáate lamó: Eza ve golesa minalína, golvagí hoza nenémináa nana oko aliline. Liki liake, pelevesava ziki mini luga luga amó.

<sup>17</sup> Lá iake, agómula lika vema loká itiki gogómula ale lamaná i vemú gezaka nanave loko nolane. Liki likago, eza limó: Eza Ómasímíni agepagutí gakó loaká ve noitive.

<sup>18</sup> Loko lokago, Zuta vetini monó gizapa ve keza agómula lika ve minámoma agómula goloutokave liki gili seketigí amake, izolahiki amelahiki sele li kimiake,

<sup>19</sup> Loká ikitiki gipatini agómula liko minamó getusimole liki nilasihe. Itó ámina gipa imane nehe. Nana oake agómula goloutave.

<sup>20</sup> Liki likago, izolahiko amelahiko láa liki lasimó: Gipatema noive loko gelenousive. Itó agómula likamó getusimómave loko gelenousimóza,

<sup>21</sup> eza nana oake itína agómula goloutahe, itó éaho agómula ale goloutave nene gelemusive. Eza olotiva netá nenazo, ezáa loká itiko lo likimitimole.

<sup>22</sup> Liki lasimó nene, Zuta vetini monó gizapa ve keza gozapá amunaló nene ve makolímó Izesukumú nene gologí oletative loko lo mololeta vema noive lokikoma monó mosetatune liki li hukamú nenazo, nenemú izolahiko amelahiko keza Zuta vetini gizapa vemú kelegesá legekago,

\* 9:5: Mat 5:14; Zon 8:12

<sup>23</sup> olotiva netá nenazo, loká italo liki lasimó.

<sup>24</sup> Likasigo, agómula lika vema goha sele li amiake, láa liki li amemó: Geza Ómasímini avogisalo gako lamaná lamane. Leza ámina vemú nene lihima netá aleaká ve noive loko gelenounimó nenazo, aí agulizá ale otemo.

<sup>25</sup> Liki likago, áisi láa loko lo kimimó: Eza nene lihima netá aleaká ve nehe nene gelenamumóza, netá hámakó gelenouve. Neza goí oko nogómula likamó minumómaha itína nogómulanema áinigokave loko lamaná gelenouve.

<sup>26</sup> Loko lokago, goha loká itiki nana ogetave, gogómulaka nana oko ale goloutogetave.

<sup>27</sup> Liki likago, láa loko lo kimimó: Mota lo lekemekumole. Nene gelemahe. Goha litaha gako nanamú lugo gilinigi nilave. Lekezagi aí izegipala zuha loló itune liki nilahe.

<sup>28</sup> Loko lokago, lekesava amiake lamó: Géisi nene aí izegipala noane. Lélisi nene Moseni izegipala nune.

<sup>29</sup> Ómasímo nene gako makó Moseni lo amimó neve loko gelenounimóza, imane ve nene getamoláa nene gelemune.

<sup>30</sup> Liki likago, ámina vémo gako láa loko lo kimimó: Nogómula ale goloutoneta vémini getamoláa gelemahe. Neza giza lo noleketuve.

<sup>31</sup> Ómasi eza vejená golesatini gakoíni geleko kelémo vatí osá amimóza, makó nenémo Ómasi geké lotoko gakola gele alitimó nene, Ómasímo alémo vatí inogo ive loko geleaká nune.

<sup>32</sup> Itó ganá apí oko mikasi utó itotí ká emane ve makolímó agómula likamó getamó agómula ale golouta gako ma lago gelemuháma neve.

<sup>33</sup> Nenemú imane ve Ómasilokatí lemémimó nelina, hoza nenémináa ma alemiline.

<sup>34</sup> Loko lokago, láa liki lamó: Golesa gupilizá utó animó ánenéminaka monó lo lemesaláa noape. Liki liake, ahelú i ahulamó.

#### *Kigikámini agómula lika gako*

<sup>35</sup> Izesú nene amisili ahula gako geleake, koma minake ámina ve ániagoake, loká otoko geza okulumakutí limi ve gihilamú gele alévolé onoape.

<sup>36</sup> Loko lokago, ámina vémo ve lamanámaka, lani ve nelepizekako, ángo lamaná okinake, aikumú gele alévolé itove.

<sup>37</sup> Loko lokago, Izesú nene geza áningonoako gako lo nogumu ve neza imane noumole.

<sup>38</sup> Loko lokago, ámina vémo Guivahanínemaka, neza mota gele alévolé onouve. Loko loake, agihúna geko akamó.

<sup>39</sup> Lá okago, Izesú limó: Neza vejenalitini mognáini ale vevesatove loko mikasiuka lumumó nene kigikámini agómula nomimó nenete pulusiki ánigataze, itó ligikámini agómula likamimó neve liki liaká nia vejenalitini kogómula likokiko, ámináa minilikí viki minatave loko neve.

<sup>40</sup> Loko lokago, Palisaio monó ve minamoláa lugáa keza giliake, loká itiki Olo, ligikámini agómula likamó nouko nolape.

<sup>41</sup> Liki likago Izesú láa loko lo kimimó: Lekeza likigikámini agómula likakumú gatizá minalina, lihimatini minamilinamóza, lekeza nene ligikámini agómula goloutonoive liki liaká nianazo, lihimatini ha minanogo ive, loko limó.

## 10

### *Sipsip izatini geisamú anoza gako*

<sup>1</sup> Izesú gako makó láa loko limó: Neza lamaná lo likimitoze, gililo. Makó eza sipsip izatini geisagú itinogo gatekú itemoko geisa gohalaló itekikoma, gumina vaukaló ve noive loko litune.

<sup>2</sup> Gatetó ititi vemú nene iza gizapa ve noive loko litune.

<sup>3</sup> Áisi nene anitekiko gatetó gizapa ve nenémo gahe segetanogo ive. Itó sipsip izava keza gizapa vémini anó lupamú gilinigave. Nigiliko sipsip izavatini kugulizá oko sele noloko geisa mikutí kelémoko liminogo ive.

<sup>4</sup> Ezáa mututoni kelémoko lemeko ale goí noigo, anó lupamú gelekune liki ámegetanigave.

<sup>5</sup> Haitó ve makolímíni anó lupamú gelemitamó nenazo, ámegetaminigave. Kelegesá legekiko, gólisi inigave.

<sup>6</sup> Loko Izesú anoza gako láa loko lo kemekago, keza nanamú lihe liake, gili vevesamamó.

### *Izesú nene sipsip izatini gizapa ve lamaná noive*

<sup>7</sup> Lá ikago, Izesú eza miní ameko lo kimimó: Lamaná lo likimitoze, gililo. Sipsip izatini geisagú itiaká gateni nénisi nene nouve.

<sup>8</sup> Nénisi noamugo soza monó liaká ve utó amó mukitó nene gumina vaukaló ve minamó. Nenemú sipsip iza keza gakoíni gili alisá amamó neve.

<sup>9</sup> Gateni nénisi nene nouve. Makó keza není nivilegemiki miniki geisagú ititamó keza latila aminigave. Némegé némegé iki minumuni lamanakú mihina inigave.

<sup>10</sup> Guminaló ve eza voko sipsip iza vauka apeleko aleko vinogogó geisagú iteaká noive. Není sipsip izate alévolé kemetamenigi minumuni lamanakú mihina iki minatave loko lumumóma neve.

<sup>11</sup> Nénisi nene sipsip izatini gizapa ve lamaná nouve. Gizapa ve lamanalímina sipsip izamule loko minoko aleko oakaláa ahulatimó neve.

<sup>12</sup> Gelekelé izegipa nene iza amelaho minamive, itó gizapa lamaná oko amitimó neve. Nenemú hela gala anitekiko, ániigooko sipsip iza ahulokimioko golisi inogo ive. Lá okiko, hela gala nenémo sipsip izama kepeleko kelémo hutilí inogo ive.

<sup>13</sup> Eza monimukó hoza aleaká noinazo, sipsip izamú makó gelesá amike ahulokimioko golisi voaká noive.

<sup>14</sup> Nénisi nene sipsip izatini gizapa ve lamaná nouve. Aménehiki nezagi ániigoko gele-nousive.

<sup>15</sup> \* Ámina oko vegeáne zuhagi nezagi ániigoko gelenoune. Nenemú není sipsip izamule loko minoko aleko oakánéa ahulanogo uve.

<sup>16</sup> Itó sipsip izáne mulusi makó niave. Keza imane mikasigú vegeenalitini geisa mikutí niamave. Neza kelémoko okugo, nonó lupamú gilinigave. Lá ikiko, sipsip iza mulusi hamokó minanigave, itó ámina oko gizapa ve hamokó minanogo uve.

<sup>17</sup> Neza minoko alekóne ahulanogo noukumule loko améneho agika nemeaká noive. Ahulokinake, gosohá goha alinogo uve.

<sup>18</sup> Minoko alekónéa makolímó ipá aminogo ive. Nene nezáne nagata geleko ahulanogo uve. Neza minoko alekóne ahulatove loko itó goha alitove loko nenémíni zámúza nenitoka neve. Nenémíni itane loko améneho lonetonimóma neve.

<sup>19</sup> Loko Izesú némika loko lokago, Zuta vegeaná keza gliiake, goha ligí ahuligí iake, mini luga luga amó.

<sup>20</sup> Lá okago, mukilite holosi makó nene agikagú minokago gakó gopa nolinazo, nanamú gilinigí nilave.

<sup>21</sup> Liki likago, lugáate láa liki lamó: Holosi makolímó agikagú minatimó nene, gakó nenémína makó laminogo ive. Itó holosi makolímó kogómula lika vegeenalitini kogómula ma ale goloutoketaminogo ive, liki lamó.

### *Zuta vete Izesuni ániigi ahulamó*

<sup>22</sup> Zuta vetini monó zagusave lusa gemó nenémíni holiváa hepé gamena alitonoigo minamó.

<sup>23</sup> Izesú eza monó zagusave gaizopa agika makó agulizá Salomoni nenegú olío vogá ogá oko noigo,

<sup>24</sup> Zuta vetini monó gizapa ve keza iki alími vigiake, láa liki li amemó: Geza gamena hána nanamú mogonaka ale halá gekako, gele gopa oaká noune. Geza gologí oletative loko lo mololeta vema noitanimó nene lo utó moloko lo lememane.

<sup>25</sup> Liki likago, Izesú láa loko lo kimimó: Neza lo lekemeaká noumóza, lekeza gili seketigí iki gilísá amave. Aménehini gakotó alévolé suni loló oaká noumó nenémo mogonáne lo utó moloaká noimole.

<sup>26</sup> Lekeza nene sipsip izáne lilí iki minamakeve liki gakóne gili seketigí amave.

<sup>27</sup> Sipsip izáne lilí iki nia vegealite nonó lupamú giliaká niago, neza ániigoko geleketonougo némegeatiaká niave.

<sup>28</sup> Neza alévolé kemetameni kemekugo, latila amiki mini lúaló miliki minanigave. Není nigizakutí ve makolímó keí ipá aminogo ive.

<sup>29</sup> Améneho nenitoka kelémo mola ve áisi nene netá matá mukí kivilegeko noigo, aménehini agizakutí makolímó ipá aminogo ive.

<sup>30</sup> Nezagi aménehiki leza hamokó nousive.

<sup>31</sup> Loko lokago, Zuta vetini monó gizapa ve keza gehani goha aliake, apili hilingi niago,

<sup>32</sup> Izesú láa loko lo kimimó: Hoza lamaná haitopaitolímíni nene aménehini gakotó aleaká noumóza, lekeza hí hoza ániagamó golesa okago gehanitunú nipili hilingi niave.

<sup>33</sup> \* Loko lokago, Zuta gizapa ve keza anotó aliki láa liki lamó: Hoza lamaná aleaká noanikumú lamune. Geza lelikitana vema noanimóza, geza Ómasi avilegekanike geza-kamú Ómasi nouve loaká noanikumú gehanitunú gipilinogo noune.

<sup>34</sup> \* Liki likago, Izesú láa loko lo kimimó: Lekelí monó gotolaú Ómasímó goní hoza aliaká a vemú nene lekeza ómai netá niave loko lumole loko li gakó nene luhuva gizinámoma neve.

\* 10:15: Mat 11:27; Luk 10:22

\* 10:33: Liv 24:16

\* 10:34: Age 82:6

<sup>35</sup> Nene Ómasímini gako utó okimi vejenakumú ómai netá niave loko limó nenazo, itó monó gotolaú luhuva gizinamoláa nene lemeko akatimóláa oko nomive.

<sup>36</sup> Nenemú améneho nelémo otopá zeake nimiselekago mikasiuka lumu ve neza Ómasímini gipala nouve loko lumó nenazo, nenemú lekeza nanamú Ómasi avilegeaká noane líki nílave.

<sup>37</sup> Hoza aleaká noumó nene ánígikiko, aménehini avotigí amikoma, gakoéne gili ahulatamó nene lamaná onoiwe.

<sup>38</sup> Itó ánígiko, není hozagi aménehini hozagi hamó lelegító onoikoma, gakoénemukopa alévolé suni loló oaká noumó nene ánígalo. Ánigi guni itamó nene, améneho není nene akiseneive, itó neza ámina oko aménehini akiseneive líki giliiki mogonáa gili lamaná inigave.

<sup>39</sup> Loko loake, goha nagá aminigi niakutí ahuloake vimó.

<sup>40</sup> \* Vike Zota nagamí vola helega Zoní apí oko monó nagamí holoketa apató goha voko minamó.

<sup>41</sup> Neneló noigo, vejená mukí aitoka anitiake, láa líki lamó: Zoní nene golivagi netá makó alemimóza, imane vemú gakola limóma mukí mota gihila zekave.

<sup>42</sup> Líki liake neneló vejená mukilite Izesukumú gili alévolé amó.

## 11

### *Lasaló hilimó*

<sup>1</sup> \* Petania numutoka ve makó avisekago ako minamó, agulizá Lasaló. Aí atolage lositá áminaló minasimó, kugulizáini Maliako Matako.

<sup>2</sup> \* Maliá nene Guivahani Izesuni nene anuva lamanaki netupa holomiake gotola zopovatanú agisa gilatoko ale lamaná ota venalímini agunala Lasaloni avisekago,

<sup>3</sup> keza Izesutoka gako láa líki ahulasimó: Guivahanitemaka gelezo. Zogova vema netá napa avisekago akonoive.

<sup>4</sup> Líki likasigo Izesú nene gako geleake, láa loko limó: Monéna hilitove loko gizalemive. Ómasímini lapaná utó itive loko, itó Ómasímini gipala není luhuva gegemá itive loko aviseneive, loko limó.

<sup>5</sup> Izesú nene Lasaloki atolage Mataki Maliakimú agika kemenei vejená minamó nenazo,

<sup>6</sup> nenemú Lasaloni avisi gako geleake, ako mina numutó gamena lositá miní ameko minoake,

<sup>7</sup> izegipala zuha láa loko lo limimó: Alo, Zutaia mikasiuka atiginá oko vitunize.

<sup>8</sup> Loko lokago, izegipala zuha leza láa loko lo amunimó: Monó gizapa velemaka, Zuta vetini monó gizapa ve keza goí okoma vanitó gehanitanú gepele hilitune líki linamóma nenazo, goha vitune loko nolape.

<sup>9</sup> Líki likago, Izesú láa loko lo limimó: Hoza gamena netekaki holisakaki únakaki vai onoiwe. Makó keza holisakaláa lapanató gapo niviko, netá matá hanuva lotohá kepeleminogo ive. Neza hoza alito gamenaváne ha neve.

<sup>10</sup> Makó keza lapaná nomiko holugú gapo vitamó nene, lotohá kipilinogo ive.

<sup>11</sup> Loko lo lemeake, miní ameko láa loko limó: Zogole Lasaló mota ako helekamóza, neza voko alémo otinogo uve.

<sup>12</sup> Loko lokago, izegipala zuha leza Guivahanitemaka, avó akonoitimó nene zokanogo inae.

<sup>13</sup> Loko luhá nene, Izesú eza heleakakumú anoza gako lo limitó leza hanuva akonoikumú líhe loko gele hee lamunike lokuko,

<sup>14</sup> Izesú lo utó moloko láa loko lo limimó: Lasaló mota helekave.

<sup>15</sup> Neza neneloka vamuke imaneloka nougo hilikumú nene lekelikumule loko gele alévolé oakatinímini gihila líl itave loko mulúnégú lamaná noguluve. Nenemú áminaloka vitune.

<sup>16</sup> Loko lokago, Tomásí agulizá makó Lopé áisi nene agivelagini láa loko lo limimó: Leza mukitoka voko ezagi hilitune.

### *Izesú helenosakutí oteoko alévolé oko minoaká amelaho noiwe*

<sup>17</sup> Loko lokago, makó vunimó. Vunike Lasaloni gale zimikago gamena losive losive oko vokago, Izesú nene Petania numutoka vo aniteake, ámina gako gilimó.

<sup>18</sup> Petania apá nene Zelusalegatí 3 kilomítasi minamó.

<sup>19</sup> Nenemú Zuta vejená mukilite Matako Maliako kugunáini helekagove líki ive nama ikitanigi vamó.

<sup>20</sup> Lá ikago, Matá eza Izesú noave lamó geleake, Maliá nene numukú noigo, vike gapoló hotu lasimó.

<sup>21</sup> Izesuki hotu likasike, láa loko lo amimó: Guivahaníнемaka, geza imaneló minatilina, nugunáne nene helemiline.

<sup>22</sup> Itó itinasagi nene nemú manamú Ómasiloka voká lokako, gele gimitimóma neve loko gelenouve.

<sup>23</sup> Loko lokago, gugunaka nene mómoká oko otinogo ive.

<sup>24</sup> Loko lokago, Matá láa loko lo amimó: Minoko gamena napaló Ómasímo vejená mukí lelémó otitító nene ezagi otitimóma neve loko gelenouve.

<sup>25</sup> Loko lokago, Izesú láa loko lo amimó: Nénisi helenosakutí oteoko alévolé oko minoaká amelahina nouve. Makó keza nenikumú gili alévolé itamó nenete hiliiki goha otiki miniki aliki inigave.

<sup>26</sup> Itó makó keza kogómulagi miniki nenikumú gili alévolé itamó nenetini kigika ma helemínogo ive. Minoloko voko minanogo ive. Geza imane nolu gakó mota gele seketigí onoape.

<sup>27</sup> Loko lokago, Matá limó: oo, Guivahaníнемaka, geza gologí oletatane loko lo mololeta vema Ómasímini gipala mikasigú lemenane liki lina ve noane loko nigikatunú mota gele alévolé onouve.

### *Izesú ive imó*

<sup>28</sup> Loko loake, mohó agunala Maliani nene sele lo ameake, musika loko monó gizapa vema oake, geikumú nolive.

<sup>29</sup> Loko lo amekago, Maliá nene geleake, litá oko oteko Izesutoka vimó.

<sup>30</sup> Novigo, Izesú nene numutoka velesá vo anitemike, Malatani gakó lo ami apatoka minamó.

<sup>31</sup> Lá noigo, Maliá eza litá oko oteko nolimigo, Zuta vejená numunagú makó miniki ive nama itiki mína vejenalite Lasaloni militamómaloa ive inogo novihe liki ámegetiki vamóza,

<sup>32</sup> Maliá eza Izesú noitoka aniteake ángoake, agihúna geko akoake, Guivahaníнемaka, imaneloka noako nelina, nugunáne helemiline.

<sup>33</sup> Loko loake, ive imó. Ive noigo, Zuta vejená ámegetiki vamoláa keza ámina iki alími vatí iki ive niago, Izesú nene ángoake, mulunagú miluma napa geleake, agika hizekago,

<sup>34</sup> Loká oketake hikuka gale zinave. Loko lokago, Guivahaníнемaka, oko ánigatane.

<sup>35</sup> Liki likago, Izesú nene agómulagutí leke leke lokago ive imó.

<sup>36</sup> Ive okago, Zuta vejenalite ánigiake lamó: Ánigalo. Agika nene aí ame gikitoko amenei ve neinogo ive.

<sup>37</sup> Liki likago, keikutí lugáate lamó: Goí oko agómula lika ve makóma ale goloutotamóma nenazo, imane ve hanuva alémo zokaline.

### *Lasaló heleneikutí alémo otimó*

<sup>38</sup> Liki likago, Izesú goha miluma napa geleake, matimatiló anitemó nene geha mulí minamó, itó agepaló nene gehani napa míli lí amóma nene

<sup>39</sup> Izesú ángoake, gehanima ali ahulalo loko lokago, hili vémini atolaho Matá láa loko lo amimó: Guivahaníнемaka, gamena losive losive minokanazo, mota anuva noinogo ive.

<sup>40</sup> Loko lokago, Izesú láa loko lo amimó: Nenikumú gele alévolé itanimó nene Ómasímini zámuzalámíni luhuva utó iko ániganogane loko lo gumu gakó mota gagatí molokahe.

<sup>41</sup> Loko lokago, gehanima akili ahulikago, Izesú nene okena oko velekuka ángoake, láa loko limó: Aménega, geitoka lonoumó nene geleanikeve loko gegepoka noluve.

<sup>42</sup> Itó gamena gamena geitoka loaká noumó nene gelenane loko gelenoumóza, imane ali nupa nia vejenalite géisi nimiselekako limimole liki gili zagiki gilitave loko láa loko lo nogumuve.

<sup>43</sup> Loko loake, gakó napagutí sele loko Lasalo, geza oteoko lemeno.

<sup>44</sup> Loko lokago, helenei vémo agisa agizatoka nagá likita netá akoheminago lemekago, Izesú vinasiki ali ahulitalo loko lokago, vinasiki ali ahulitamó.

### *Izesuni apili hilinigi gohoni milamó*

*(Mat 26:1-5; Mak 14:1-2; Luk 22:1-2)*

<sup>45</sup> Lá ikago, Zuta vejená Maliatoka anitemoláa keitokatí mukilite Izesú oko moloko i netá ánigiake, aikumú gelego alévolé imóza,

<sup>46</sup> lugáate Palisaio monó vejenatoka vake Izesú oko moloko i gakó aveté i kememó.

<sup>47</sup> Aveté iki li kimikago, kezagi guguni giziaká a vegi monó kansole kilími nupa iake láa liki lamó: Imane lu avevezaha la avevezaha mukí okanazo, leza nana itune.

<sup>48</sup> Leza nene amanapa oko nouko, eza lá oloko vova vova noiko, mukí vegeanalite lugulizaki ve napa noive liki gili zaginigave. Lá ikiko, Loma gevenalitati ami vete iki lova ali limiiki monó zagusavele nemó vegeenate niamó ali tolova inigave.

<sup>49</sup> Liki likago, keitokatí makó agulizá Kaiapá ámina kilisimasi oko novigo guguni giziaká vetini gizapa ve loló i vémo láa loko lo kimimó: Lekelisi negi nagi niaze.

<sup>50</sup> Leza Zuta ve mukitoka latila o asú okatuninazo, ve hamokolímo lelémo nupa napa oko helekiko nenémo netá gihila ale utó oletative liki gilísá amave.

<sup>51</sup> Loko limó nene ezáa agata geleko ligopa, eza ámina kilisimasiló nene guguni giziaká vetini ve napa minoakeve loko Izesú eza vegeaná mukikumule loko hiliti gako lo kimimó.

<sup>52</sup> Nene Zuta vegeanakumukó lamimó. Ómasímini vegejala zuha numutó namató nia vegeaná kelémo nupa okiko mulusi hamokó miliki minatave loko hilitikumú limó neve.

<sup>53</sup> Láa loko lokago guguni giziaká a ve keza ámina zupa nene Izesuni apili hilinigi apí iki lova gizamó.

<sup>54</sup> Lá ikago, Izesú eza Zutaia apakú vegeanalitati kogómulaló goha vo utó amike mikasi gomopalaló minamó. Nenémini agataloka apá makó minamó, agulizá Epalaima neneloka izegipala zuhagi makó minunimó.

<sup>55</sup> Nouko, Zuta ve avotegini asenini zeketakumú gele minoaká holisi alitokago, apá koma kamalokatí vegeaná mukilite kugupe kigikáni ali guluvitanigi goí iki Zelusalega tivamó.

<sup>56</sup> Viki monó zagusave napagú itiki niake Izesú noamigo vitagá ake, ligili hagili niake lekeza nanave liki nigeleve. Áisi nene holisigú atimó nehe amitimó neve.

<sup>57</sup> Liki lamó nene guguni giziaká a ve napagi Palisaio monó vegi keza ve makolímo Izesú minoko aleko noiti apá ánigoko geleko onoitimó nene oko lo lemekiko, gelekinake voko nagá amitune, liki amunaló li miliki lató nene ámina gako lamó.

## 12

*Petania numutoka Izesuni anuva lamanaki netupa holotamó*  
(Mat 26:6-13; Mak 14:3-9)

<sup>1</sup> Asenini zeketakumú gele minoaká holisi gamena alitokago gamena 6-a veletoka ha nego, Izesú eza Petania numutoka vo anitimó. Ámina apató nene emane amunaló Lasaloni heleneikutí alémo otimó.

<sup>2</sup> Áminaló nene nosáneta gizi vatá ikago, Matá nene hizeko gona moloko ale nokimigo, Izesú nene Lasalologi makó minake nosáneta namó.

<sup>3</sup> \* Niki niago, Maliá nene anuva lamanaki netupa agulizaláa nalita loko meinava iteko mina netá nene hapu lita potologú minamó nene Izesuni agisaló holomiake, gotola zopovalatunú gilatoko ale lamaná otamó. Lá okago, numukuka anuvámo moloake minamó.

<sup>4</sup> Lá okago, izegipala zuhagutí ligive makó Kaliotó numutotí ve agulizá Zutá eza minoko Izesuni amimika liti ve nenémo láa loko limó:

<sup>5</sup> Anuva lamanaki netupa hanuva minatinazo. Nenémini meinava moni gó losive makole hizekoko gohogó vegeaná kemekuko etatinazo.

<sup>6</sup> Loko limó nene gohogó vegeanakumú geleko limó negopa, áisi nene lelí moniló gizapa oko noigo moni alimi namego, ale halá halá geko minoaká inazo, nenemú limó.

<sup>7</sup> Loko lokago, Izesú nene limó: Ahulikalo. Helekugo gale zinitanigi anuvavagi netupa nene nugupeló hilinitatakumú geleake loló onimikave.

<sup>8</sup> \* Gohogó vegeaná keza nene lekezagi miniliki viki minaniganae. Neza nene lekezagi mino-loko voko minaminogo uve.

*Lasaloni apilinigi lova gizamó*

<sup>9</sup> Loko lokago, Zuta ve mukilite Izesú neneloka noive liki nila gako giliake áminaló anitemó nene Izesukumukó nomimó. Lasaloni emane amunaló heleneikutí alémo oti vegi ánganigi amó.

<sup>10-11</sup> Ikago, Lasaloni alémo otikumú nene Zuta vegeaná mukilite Zuta vetini monó gizapa ve ahulikimiake Izesutoka viki gímiziki aikumú gili alévolé amó. Nenemú guguni giziaká a ve napa keza Lasaloni apele hilitune liki lova gizamó.

*Sigaga litanigi ago Izesú Zelusalega vimó*  
(Mat 21:1-11; Mak 11:1-11; Luk 19:28-40)

<sup>12</sup> Akiake gó lokago, hohisiló a vegeaná mukilite Izesú Zelusalega noave gako giliake,

<sup>13</sup> \* kokonasi agila letiki Izesú ati gapoló militanigi aliki vamó. Hotu liake sigaga litimi nivake agae, Guivahanímini gakotó anitelimikane. Ómasimo lusa gegetatize. Isilae ve lelí gugulizaki vele noane.



<sup>14</sup> Liki nilago, Izesú eza toki iza akaleva makó ániogoake, amupiló iteake vimó. Nene monó gotolaú gako láa loko minató gele minake lá imó:

<sup>15</sup> \* Zaion agokaú vejená lekeza lekelegesá legemino. Gilinahe. Agulizaki velini nene toki iza akalevámíni amupiló iteake noave.

<sup>16</sup> Ámina gako nene izegipala zuha leza goí oko gele vevesamunimóza, alika Izesú nene okulumá lapanalagú atiginá oko itekago, nene gako goha gelekunike, ámina gako aikumú gizi milámómalo ámina avevezaha itake lá amó neve loko gele vevesunimó.

<sup>17</sup> Itó Izesú nene Lasaloni sele lo amekago heleneikutí gonosi galegutí limigo ániaga vejená mukilite keza ámina sunimú vejená lugáa aveté iki li kimiki minamó.

<sup>18</sup> Ámina sunímíni gako giliake, mukilite gapoloka hotu lanigi vamó.

<sup>19</sup> Lá ikago, Palisaio monó vete kezáini ligilí hagilí niake lekeza gilinahe. Hizi lí itata hoza nalemó nene gihila nomigo, vejená mukitoka aitoka gimizi asú niave, liki lamó.

*Kiliki ve makolite Izesunimú vitagá amó*

<sup>20</sup> Ámina holisigú Ómasí geké lotatune liki Zelusale numutoka tiva vejenakutí Kiliki ve lugáa minamó.

<sup>21</sup> Keza nene Galilaia mikasiuka Petesaita numutotí ve Pilipó noitoka vake, ve lamanámaka, Izesuni ániगतune loko noune.

<sup>22</sup> Liki likago, Pilipó nene Etuluni lo amekago, ezagi makó viki Izesuni li amikasigo,

<sup>23</sup> ezáa hilitikumú anoza gako láa loko limó: Okulumakutí lumu ve gihila není lapanánegi luhuváa utó iti gamena mota alitokave.

<sup>24</sup> Lamaná lo likimitoze, gililo. Kilé zuha makó nene mikasigú hizemitunimó nene hanuvagó minanogo ive. Mikasigú hizekuko, lemeko nenegú helekoko mikasímíni nosáneta loló okoko gihila mukí zinogo ive.

<sup>25</sup> \* Áminámíni oko makó keza kigika kemeníikumú gilikiko ititimó nene, alikaloka kigika kemení gopa inogo ive. Makó keza mikasigú miníki nenikumule liki kigika kemeníikumú gilikiko limitimó nene alévolé kemetameni ali luhanigave.

<sup>26</sup> Ámina Kiliki vehe itó vejená makó ahe není gelekelé izegipa minatune liki gilitamó nene némegetiki ataze. Lá ikiko neza minomo ititotoka gelekelé izegipánegi makó minanogo une. Itó nasahilí initata vejenalitiní kugulizá nene améneho ale otinogo ive.

*Izesú ezáa hilitikumú lo kimimó*

<sup>27</sup> Nígika loló oake, luvoluvo zekave. Lá okazo, nenemú nanave litove. Aménega, gamenaváne alitokaze, nugupeló ititi netá molo hotó onetozo litomó nene etamitinazo, láa loko lamitove. Miluna gilito netá mota numupiló itinogo noigo, gamenaváne okaze.

<sup>28</sup> Nenemú aménega, geza lokako, gugulizalímíni luhuva utó itive. Loko lokago, okulumakutí gako láa loko limimó: Nugulizalímíni luhuva mota gonanalivagi utó okamóza, utó oloko voko utó okogó minanogo ive.

<sup>29</sup> Loko ligo, vejená mulusi miliki minamó keza giliake, ageló makolímó gako lo amekave.

<sup>30</sup> Liki likago, Izesú láa loko lo kimimó: Gakóma nene nenikumule loko nomive. Lekelikumule loko utó okave.

<sup>31</sup> Itína Ómasímo imane mikasigú vejenalitiní lihimáinimú meina kimiti gamena mota alitokave. Itína imane mikasigú agulizaki Satani amisilinogo uve.

<sup>32</sup> Imane mikasigutí zaló nilímí otikiko, numutó namató vejená alesa molo kemekugo, nenitoka imi asú inigave.

<sup>33</sup> Loko limó nene zohota zaló hilitikumú anoza gako limó.

<sup>34</sup> \* Loko lokago, mukí mina vejenalite láa liki li amemó: Leza monokú nene gologí oletative loko lo mololota ve eza nene helemoko mino lúaló moloko minanogo ive liki luhuva gizina gako gelenounimó nenazo, geza okulumakutí lumu ve gihila nene zaló nilímí otikiko hilitove loko nanamú nolape. Okulumakutí limi ve haitolimínimú nolane.

<sup>35</sup> Liki likago, Izesú láa loko lo kimimó: Ló liví nene gamena komásí holutikú hanatanogo ive. Nenemú limugusi nenémo lekelitoka sinitokatize, ló livíma lekelitoka lapaná noliko aliiki minalo. Ve makó keza limugusi gapogú vitamó nene, gapo ániagi hee laminigave.

<sup>36</sup> Nenemú livíma lekelitoka miniko, alilá ilo. Lekelisi livilímíni mututoni loló itune likima nenikumú gili alévolé ilo, loko limó.

*Zuta vete gili alévolé amamó*

Izesú nene gako láa loko loake vo halá geko minamó.

<sup>37</sup> Izesú eza haitopaitó suni kogómulaló ale utó okago ániagamóza, aikumú gili alévolé amamó.

38\* Lá amó nene Ómasímini agepagutí gako loaká ve Isaiá li gako nene alévolé itive liki lá amó. Eza lo goselé ike gako láa loko luhuva gizamóma neve; Guivahanínemaka, gakoka lokuko vegená nanakilite gili alévolé inave. Itó Guivahanímini zámuzá éahitoka utó okago gele zageneive.

39 Itó Isaiáni gako makó láa loko luhuva gizató keza gili alévolé amató neve:

40\* Áisi kogómula gahaga like kigika ale gopa okago, keza kogómulatunú netá matá ánihi hee lisá amave. Kigika ali viligamago, kelémo lamaná itomoláa nomíve.

41 Loko Isaiá limó nene Izesuni lapaná okulumakú nego ániagoake limó neve.

42 Lá okago, Zuta vetini gizapa vegutí lugáa nenete Izesukumú gili alévolé amóza, lo utó itunimó nene, Palisaio monó ve nenete monó gapo hizi lí limikatave liki kehelele vizekago, li utó amamó.

43 Keza vegená makolite legepoka litave likigó iki miliki iaká amó neve. Ómasímo lelémó napa itive liki iki miliki isá amamó neve.

*Izesú lo molonoí gako límo alika goní oletanogo ive*

44 Lá okago, Izesú nene gako napagutí láa loko limó: Makó keza nenikumú gili alévolé itamó nenete nenikumukó negopa, nimisili ve aménehinimuki gili alévolé inamó geleneive.

45 Makó keza není ánihi hee litamó nenete nimisili vegi ánihi hee hee linamó geleneive.

46 Nenikumú gili alévolé ita vegenalite límugusigú minamítave loko mikasiuka vegenalitini liví minanogo lemenoumóma neve.

47 Makó keza gakoíne imane giliiki gili ahulatamó nene, nénisigó goní oketaminogo uve. Nénisi nene mikasiuka vegená lihima kimitove loko negopa, numutó namató vegená kugutó vizitove loko lumumóma neve.

48 Makó keza není ahuli hotó inimiiki není gako ahulatamó nene, gako lo mulumó nenémo gamena napaló goní oketanogo ive.

49 Nezáne nagata geleko losá amuve. Améneho nimisili vémo lo utó itane loko lonimikago loaká nouve.

50 Lá nouke, neza agepagutí gako nenémo alévolé oko minoaká mogona ale utó oaká noive loko gelenouve. Gako nolumó nene améneho litokó loaká nouve, loko Izesú limó.

## 13

*Izesú izegipala zuhatini kigisa nagamí zeketamó*

1 Avotegini asenini zeketakumú gele minoaká holisi alitokago, gamena hamokó veletoka ha nego, Izesú nene imane mikasi ahulokinake aménehitoka atiginá oko itito gamena mota alitokave loko geleake, imane mikasiuka aí mututoni líl a vegená agika lemeneike agika limítimíni mogona lelepizinogo netá makó alimó.

2 Nosánetá nanogo alegesá okuko, netá makó láa oko utó imó. Kaliotó numutotí ve Saimoni gipala Zutani agikagú nene Satá iteake alémo vávani okago, Izesuni amimí inogo gilimó.

3 Lá okago, Izesú nene améneho eza netá matá mukí nene nigizakú molonoimóma neve loko, itó Ómasilokatí lumutímina goha nene Ómasiloka atiginá oko itinogo uve loko geleneike,

4 nosánetá noko minuhakutí oteake, luhoaká gola hána nene gololohá oake, tauli aleko gohalaló likeake,

5 nagamí nene lapegú leke moloake, izegipala zuhatini ligisa nagamí zelimiká taulitunú gilatulimiká oloko vike,

6 Saimon Pitá noitoka vokago, eza láa loko lo amimó: Guivahanínemaka, není nigisa nene géisi nagamí zenetatove loko nolape.

7 Loko lokago, Izesú láa loko lo amimó: Imane loló nou suni nenémini mogonáa itínasa gelemané. Alike minomo iteko gilino ane.

8 Loko lokago, Pitá nene není nigisa nagamí zenetaminogo ane. Loko lokago, Izesú nene nénisi nagamí zegetamítomó nene, gezagi nezagi apizeminogo usive.

9 Loko lo amekago, Saimon Pitá láa loko lo amimó: Guivahanínemaka, láa lokoma nigisagó negopa, nigizanígi gotónegi mukí nagamí zenetatane.

10 Loko lokago, Izesú anoza gako makó láa loko lo amimó: Makó keza nagamikú akiiki alika nene kigisagó nagamí zikiko nene, kugupe nene guluvito asú inogo ive. Lekeza nene áminagó iki likigika guluviti asú inamóma nemóza, lekeza mukitoka guluviti asú ikigó minamave.

11 Loko limó nene ve makó hí vémo amimika litikumú geleneike, lekeza mukitoka guluviti asú ikigó minamave loko lo limimó.

12 Ligisa nagamí zeletó asú oake, gola nene goha ale luhoake, mitó minake láa loko lo limimó: Imane loló oleketu netafímini mogonáa mota gili hee linahe. Olile.

13 Lekeza nenikumú nene Guivahaniteve itó tisaleve liki liaká niamóma vatí iki liaká niave.

14 \* Itó neza Guivahanitini itó tiscalinímina gelekelé oleketuke likigisa nagamí zelikimikumó nenazo, lekezagi ámináminiki lukugupe alimi limiki likigisa nagamí eza zetiko eza zetiko iliki viki minalo.

15 Imane gelekelé olikimiaká suni naleleketumó nene lekezatini ámináminiki aliliki vitave loko apí o nolukumuve.

16 \* Neza lamaná lo likimitoze, gililo. Gelekelé izegipa makó nenémo golohá veva avilegeakala nene nominazo, lukugupe aliki itikatave loko noluve.

17 Itó gako nolumó nene gilinamó nenazo, áminama amegesaló milatamó nene Ómasímo nónohá zeleketa vejená minanigave.

18 \* Gako nolumó imanémo lekelí mukitoka ale asú amive. Neza nene lekelémo etó onou vetini mogonatiní gelenoumóza, monó gotolagutí gako makó láa loko neve:

Nosáneta noko minusi ve nenémo není nehélú okave liki luhuva gizina gako nene ve makotoka alévolé inogo ive.

19 Itó ámina netá utó okiko, lekeza lo lekemeaká nou ve noive liki gili seketigí itave loko ámina netá velesá utó onamigo lo nolukumuve.

20 \* Neza lamaná lo likimitoze, gililo. Makó keza amisilito ve makó nasahilí itatamó nene, hoza amelahina neniki nasahilí initamó gilinogo ive, itó makó keza nasahilí initatamó nene nimisili vegi nasahilí itamó gilinogo ive.

*Izesú aí amimí iti vemú lo utó imó*

*(Mat 26:20-25; Mak 14:17-21; Luk 22:21-23)*

21 Itó Izesú ámina gako láa loko lo asú oake, muluna gitihiná okago, láa loko lo utó oko lo limimó: Neza lamaná lo likimitoze, gililo. Lekelikutí ve makolímó nimimika linogo ive.

22 Loko lokago, izegipala zuha leza gonú gimisi okunike nene, éhikumú live lokunike nene, gele gopa unimó.

23 Lá okuko, eza Izesú agika nemeaká i veve liki lina vémina amatoka nougo,

24 Saimon Pitá agizanitunú avevezaha ike éhikumú nolihe loká okako lo gimino loko lokago,

25 neza Izesuni amatoka nouke loká otuke Guivahanímema, éhikumú nolane.

26 Loko lokago, Izesú láa loko limó: Nosáneta nagamikú lupizeoko amekugo nati vemú noluve. Loko loake, nosáneta lupizeake, Kaliotó ve Saimoni gipala Zutani nene amimó.

27 Amekago, nokago, Satá nene agikagú itekago, Izesú láa loko lo amimó: Geza netá mata loló itove loko lanimó nene litá oko loló ozo.

28 Láa loko lo ami gako nene agivelage leza makó minuni vete gele hee lamunimó.

29 Lá unike, lugáa nenete Zutá nene moni gotó gizapa oaká imó nenazo, nenemú holisigú nosáneta meina hizitive loko namisilihe loko nene gelehá. Itó lugáa nenete gohogó vejená nene moni gona moloko kimitive loko namisilihe loko gulunimó.

30 Lá okuko, Zutá nene nosáneta noake, agupegú lúmugusi zekago hetoka lemeko vimó.

*Gosohá lo hukoketa gako*

31 Hetoka lemekago, Izesú láa loko limó: Itína okulumakutí lumu ve gihila není nugulizalímíni luhuva mota gonanalivagi utó inogo ive.

32 Ómasímíni agulizalímíni luhuva gonanalivagi utó noiko, Ómasímo lokiko, nugulizalímíni luhuva nene litá oko gonanalivagi utó inogo ive.

33 \* Izegipánemata, gililo. Lekezagi gamena koma mininake vitove. Vokugo, lekeza nenikumú vitagá itamóza, amunaloka Zuta vejená lo kumumómámíni oko itínasa láa loko lo nolukumuve. Neza voko minatotoka nene lekeza aminigave.

34 \* Itó itínasa gosohá láa loko lo nohukoleketuve. Likigika eza amiko eza amiko ilo. Neza nigika lekemenoumó nenémíni iki likigika eza amiko eza amiko iliki vilo.

35 Likigika eza amiko eza amiko itatímó nene, vejená mukilite lekelikumú nene není izegipáne zuha niave liki gilinigave.

*Izesú Pitá alika egamega otatikumú limó*

*(Mat 26:31-35; Mak 14:27-31; Luk 22:31-34)*

36 Láa loko lokago, Saimon Pitá nene Guivahanitemaka, hitoka vitane. Loko lokago, Izesú láa loko limó: Apá makotoka vitomó nene itínasa némegetamitanimóza, alika némegetanogo ane.

\* 13:14: Luk 22:27 \* 13:16: Mat 10:24; Luk 6:40; Zon 15:20 \* 13:18: Age 41:9 \* 13:20: Mat 10:40; Mak 9:37; Luk 9:48, 10:16 \* 13:33: Zon 7:34 \* 13:34: Zon 15:12,17; 1 Zon 3:23; 2 Zon 5

<sup>37</sup> Loko lokago, Pitá láa loko lo amimó: Guivahanitemaka, itína neza nanamú gémegetaminogo uve. Geikumule loko minoko alekóne ahulatove loko ale vatí okumóma nenaé.

<sup>38</sup> Loko lokago, Izesú lo amike limó: Nenikumule loko minoko alekóne ahulatove loko nolape. Íi, lamaná lo gimitoze, gelezo. Azo neteká nene okoloho nenémo anó velesá molonamiko, nenikumú nene áñigonamuve loko egamega onetatanimó nene gamena losive makole inogo ive, loko lo amimó.

## 14

### *Izesú nene Ómasiloka voaká gapo noive*

<sup>1</sup> Izesú gakó makó láa loko limó: Mulutini lepa hiziko minalo. Lá iki miniki Ómasimú gili alévolé iki nenikumuki gili alévolé iki minalo.

<sup>2</sup> Aménehini numukú numuni agika vaí oko neve. Lá oko nomilina neza voko apá makó ale vavá oleketatove loko lamuline.

<sup>3</sup> Neza voko apá makó ale vavá olikimioko mininake, atiginá oko oko lekelémoko vokugo, nenitoka minatave. Lá niiki neza minato apakú nene lekezagi makó minanogo une.

<sup>4</sup> Neza voko minato apalímini gapováa lekeza áñiginave.

<sup>5</sup> Loko lokago, Tomasí lo amike limó: Óe, Guivahanitemaka, geza voko minatani apaláa gelemune. Nenemú gapováa nana oko gilitune.

<sup>6</sup> Loko lokago, Izesú láa loko lo amimó: Gapovagi itó gakó gihilagi itó alévolé oko minoakalímini amelahina nénisi nene nouve. Není niviligiki aménehitoka vikí antiakala nene ma nomive.

<sup>7</sup> Lekeza nenikumú gili vevesalina, aménehikumuki gili vevesaline. Itína aikumú gili vevesiake, aí mota áñigikave.

<sup>8</sup> Loko lokago, Pilipó nene Guivahanitemaka, ametehini lelepizekako, netá makokumú loká ogetamitune.

<sup>9</sup> Loko lo amekago, Izesú láa loko lo amimó: Pilipo, gamena hána lekezagi minumóza, geza není velesá áñigo hee hee lamape. Ve makolímó není áñigonoiti vémo aménehinigi áñigo noimó gelekave. Nenemú geza nanamú ametehini lelepizezo loko nolane.

<sup>10</sup> Améneho nene není ale akiseneive itó neza nene aménehini ale akisenouve loko géisi nene gele zagemape, olo. Gakó lo nolukumumó nene neza nagata geleko lo lekemesá amuve. Alévolé suni aleaká noumó nene nigikagú noi ve aménehini zámuzaló utó oaká noive.

<sup>11</sup> Améneho nene není akiseneive liki, itó neza aménehini akisenouve liki gili zagitave loko nolumóza, ámina gakó nigiliki gihila zemikoma alévolé suni aleaká noumó nenemú nenikumú gili alévolé ilo.

<sup>12</sup> Neza lamaná lo likimitoze, gíliilo. Nenikumú gili alévolé itamó nenete alévolé suni aleaká noumó áminagó iki alinigave. Itó nenegó nomive. Neza aménehitoka itekinake Sikalahú amisilitomó nenazo, aí zámuzatunú alévolé suni lílí itamó nene není hoza aviligiki alinigave.

<sup>13</sup> Itó lekelisi nene není nugulizá ali miniki netá makokumú voká litamó nene, aménehini agulizá ale hutilí itove loko gele lekemekogó minanogo uve.

<sup>14</sup> Není nugulizá ali miniki netá makokumú voká litamó nene gele likiminogo uve.

### *Sikalahula amisilino lo hutamó*

<sup>15</sup> Likigika nenitoka miliaká niamó nekoma nene není gakó gili alinigave.

<sup>16</sup> Lá níiko, nénisi aménehitoka lokugo, izotipo loló oko luhusatini ale kii liti ve amiseleleko, lemeko lekezagi mino lúaló moloko minanogo ive.

<sup>17</sup> Gakó gihila gotóláa nene Sikalahukumú noluve. Nene monó gelema vegenalite aí áñigi hee hee lamamó, itó mogonalamú gili hee hee lamamó. Nenemú aí aleminigave. Lá onoimóza, lekezagi minake likigikagú lemeko minoaká noimó nenazo, mogonala nene lekelisi gilinamóma neve.

<sup>18</sup> Neza ahulolikimikugo, megusa lílí iki minikatave loko neza lekelitoka goha anogo uve.

<sup>19</sup> Gamena alínipa makó neize. Nene gamena asú noiko, monó gele zagemita veg-ená nenete není goha áñigamitamóza, lekelisi nene áñiganigave. Neza gosohá minoloko iteakalímini amelaho nounazo, lekeza áminagó iki gosohá miniliki itinigave.

<sup>20</sup> Gamena nene zupa lekeza nene améneho není ale akiseneive itó lekelí neza ale akiseneive itó lekelisi není ali akisinaive liki gili hee hee linigave.

<sup>21</sup> Makó keza negepagutí gakó ali miniki gili aliaká nia vegená nene lamaná kigika nimiaká nia vegená niave. Itó kigika nimitamó nene, améneho agika kiminogo ive. Itó nezánegi nigika kiminake mogonáne lo utó oko lo kiminogo uve.

<sup>22</sup> Loko lokago, Kaliotó numutotí ve Zutani apolaho loká otake Guivahanitemaka, geza nana okoko mogonaka lelitokagó lo utó okoko monó gelema vegeatoka halá gitane.

<sup>23</sup> Loko lokago, láa loko lo amimó: Ve makolímohé agika nimitimó nenémo gakóne nene gele alekiko, améneho áminagó oko agika aminogo ive. Lá okoko nezagi lositá aitoka voko anitekisinake agikagú minoko aleko inogo usive.

<sup>24</sup> Makó keza gígika nememitamó nene, gakóne gili aleminigave. Itó gakó imane lo nolukumumó nene není gakó nomive. Améneho nimisili vémini gakó lo nolukumuve.

<sup>25</sup> Neza nene lekezagi minuke gakó imane lo lekemeaká noumóza,

<sup>26</sup> izotipo loló oko luhusatini ale kii liti ve Sikalahú nene améneho není nugulizató amiselekiko, lemeko netá mukikumú apí o lekemeko nénisi lo lukumu gakó nene ale gosohá oleketoko lo lekemeko minanogo ive.

<sup>27</sup> Není helisa nene hulu nolukumuve. Hanuva vegealitini hulu lekememuve. Nezáne hulu nene nolukumuve. Nenemú likigika nene lololó okoko lekehelele vizemino.

<sup>28</sup> Neza voko nomininke lekelitoka goha atiginá itove loko lo nolukumugo gilinamóma neve. Likigika nenitoka miliiki minamó nelina nene, améneho nivilegeko noinazo, aménehitoka ititokumú giliiki mulutikú lamaná geeline.

<sup>29</sup> Imane netá utó okiko lekeza ángiki nenikumú gili alévolé itave loko ámina netá utó onamigo goí oko lo nolukumuve.

<sup>30</sup> Neza nene gakó mukí miní ameko lo lekememitove. Imane mikasigú agulizaki ve Satá nenitó oko nehelú itove loko ale vatí okave. Áisi nene okoko ma nehelú aminogo imóza,

<sup>31</sup> monó gelema vegealite nígika aménehini ameaká noumó itó hoza gakó lonetamó nene aleaká noumó nene ángi hee hee litave loko imane suni aleaká nouve. Lekeza otilo. Mota vitunize, loko limó.

## 15

### *Izesú nene vain nagá mogonáa lamaná noive*

<sup>1</sup> Izesú miní ameko láa loko lo limimó: Neza nene vain nagá mogonáa lamaná nouve. Itó améneho nene vain miní amelaho noive.

<sup>2</sup> Nenitokatí izana makolímó gihila zemitimó nene hukoko alahulanogo ive. Itó hupena makolímó gihila zekiko, gihila vauva aleko zitive loko golesa itimoláa huko ahuloaká noive.

<sup>3</sup> Lekeza nene monó lo lukumugo gili alévolé niatímó likigikagú mota guluvitiaká niave.

<sup>4</sup> Lekelisi nene nenitoka iki apiziki minatamó nene, neza lekelitoka voko apizeko minanogo uve. Izana makolímó mogonaló apizeko minamitimó nene gihila zeakaláa ma nomive. Lekeza nene nenitoka iki apizemitamó nene, lekelitoka áminagó oko gihila ma zeminogo ive.

<sup>5</sup> Vain nagá mogonáa nénisi nene nouve, itó lekeza nene izanáa niave. Makó keza nenitoka iki apiziki minatamó nene, neza áminagó oko keitoka voko apizekugo, keitoka gihila mukí zinogo ive. Lekeza nene nenitoka gímizemiki netá gihila lilí iakaláa ma nomive.

<sup>6</sup> Makó keza nenitoka iki gímizemitamó nene, izanagitana oko gulugulu vizekiko, hukoko alahulanogo ive. Izanáa nene gulugulu vizekago, hukiki lokú giziaaká niave. Nenitoka iki gímizema vegeatoka ámina suni utó inogo ive.

<sup>7</sup> Lekeza nene nezagi apiziki minatamó itó gakóne likigikagú minatimó nene, netá nemú manamú voká litamó nene, utó olikiminogo ive.

<sup>8</sup> Lekelitoka gihila mukí zekiko, lekeza lamaná není vegeanáe zuha lilí iki minatamó nenémo aménehini lapaná nene gonanalivagi utó inogo ive.

<sup>9</sup> Améneho nene agika nemeaká noive. Neza ámináminoko nígika ameaká nouve. Lá okago, lekeza nene nígika lekemeaká noutímíni agikagú minalo.

<sup>10</sup> Neza améneho loneta gakó gele alekuke, agika nemeaká noitímíni agikagú noumó neve. Ámináminiki loleketonou gakó gili alitamó nene nígika lekemeaká noutímíni agikagú minanigave.

<sup>11</sup> Není mulúnegú agila guluma oaká noi netá nene mulutikú minative loko, itó mulutikú agila guluma itimó nenémo hutilí oko vaí oko minative loko gakó imane lo lekeme asú nouve.

<sup>12</sup> \* Láa loko nololeketuve. Nígika lekemeaká noumó nenéminiki lekezagi likigika eza amiko eza amiko iliki víki minalo.

<sup>13</sup> Makó eza agivelaginimule loko minoko aleko imoláa ahulatimó nene, agika kímimómáminí mogona utó inogo ive. Haitoliminoko agika kemeaká nenémo lá oko agika kimi suni avilegemitimó neve.

<sup>14</sup> Lekeza loleketonou gakó ámegetatamó nene zogone milanigave.

<sup>15</sup> Gelekelé izegipa makolímo gizapa vevámo oko moloko i netakumú gelemínazo, neza goha lekelikumú nene gelekelé izegipáneve loko lamitove. Neza nene aménehitokátí gako gulumó nene lo utó oko lo lekeme asú okumó nenazo, itína lekelikumú zogone niave loko litove.

<sup>16</sup> Lekelisi není nene nilími etó amave. Nénisi nene lekelémo etó okugo, lekeza víki gihila ali utó ikiko alévolé oko minova minova oko minative loko loleketumóma neve. Lá iiki není nugulizá ali miníki netá nemú manamú aménehitoka voká litató likiminogo ive.

<sup>17</sup> Likigika eza amiko eza amiko itave loko nololeketuve.

*Monóini nomí vegenalite Izesuni lova ali amiaká niave*

<sup>18</sup> Monó gelema vegenalite lova ali likimikikoma Guivahanite mikasigú noigo goí iki lova ali amemóma neve líki gili minalo.

<sup>19</sup> Lekeza monó gelema vegenalitiní mulusigutí minalina, keza kigika lekemeline. Neza nene holúikutí lekelémo etó okugo, keza iki miliki a netá nene lekeza ahulikamóma nenazo, nenemú lova ali likimiaká niave.

<sup>20</sup> \* Gelekelé izegipalaló lílí itatamó nenémo gizapa véa lílí ita netá avilegeminogo ive loko lo lukumu gako nene lakagatí molamino. Keza není gopoguní milinimiaká nianazo, lekezagi áminagó iki gopoguní mililikitanigave. Není gako ali gúemamó nenazo, lekelí gako ámináminiki ali gúeminigave.

<sup>21</sup> Nimisili ve ániigi hee lamamó nenazo, nenemú není nugulizá lekelitoka minakumule líki lá ilikitanigave.

<sup>22</sup> Neza keitoka lemeko utó oko gako lo kememumó nelina, lihímáini minamíline. Lá okamóza, lo kemenoumó nenazo, lihímaváini nana iki ahulatamó neve.

<sup>23</sup> Lova ali nimiaká nia vegenalite aménehinigi áminagó iki lova ali amiaká niave.

<sup>24</sup> Neza holúikú haitó suni golivagi nene vegenalite ali utó amatímíni ale utó amumó nelina, keitoka lihíma nomimó minaline. Itó imane alekugo, keza ániginamó ániigi ahulínake, není lova ali nimiaká niake aménehini áminagó iki lova ali nameve.

<sup>25</sup> \* Lá ikago monó gotolá gako makó láa líki luhuva gizinamó nene alévolé oko neve: Keza nene hanuvamú není lova ali neveve.

<sup>26</sup> Izotipo loló oko luhusatini ale kíi líti ve gako gihilámíni amelaho Sikalahú nene aménehitoka noive. Aí amiselekugo, aménehitokátí lemeko mogonáne lo utó inogo ive.

<sup>27</sup> Itó lekelisi nene hoza apí ukutí nezagi miníliki itinamó nenazo, lekezagi áminagó iki mogonáne lí utó inigave.

## 16

*Sikalahulímíni hoza*

<sup>1</sup> Alikaloka netá golesa nalilikitikoma, monó ahulikatave loko gako imane lo nolukumuve.

<sup>2</sup> Lá iiki monó numutini hizi lí lílikitanigave. Itó gamena makó alitanogo ive. Lá noiko, Ómasi nasahílí notupe líki líkipili hílinigave.

<sup>3</sup> Keza nene aménehinigi nezagi ániigi hee hee lamiki nene suni alinigave.

<sup>4</sup> Neza goí oko imane lo nolukumu gako nene alévolé okiko, ametehe gozapá lo lími gako gihila zekave líki gílinigave. Hoza apí u gamenaló lekezagi minoko aleko ituni gamena hána ha nego lo lekememumóma nemóza,

<sup>5</sup> itína nene nimisili vémitoka atiginá oko vinogo ugo, lekelikutí ve makolímo hitoka vitane loko loká onetamíve.

<sup>6</sup> Gako imane lo lekemekugo miluma netalímo líkigikagú vaí noize.

<sup>7</sup> Lá noimóza, neza gako gihila litoze, gililo. Neza atiginá oko aménehitoka ititomó nenémo netá gihila ale utó oleketanogo ive. Ahulolikimioko ítemulina, híze lé oleketati ve izotipo nene lemimíline. Itekinake amiselekugo, lekelitoka líminogo ive.

<sup>8</sup> Lemeko mikasiuka monóini nomí vegenalitiní lihímáinímíni mogona itó hee loko minoko aleko oakalímíni mogonamú itó lihíma límitítímíni mogonamú lo utó okiko gili hee hee línigave.

<sup>9</sup> Keza nenikumú gili alévolé amanazo, lihímáinímíni mogonamú lo kemekiko gilitave.

<sup>10</sup> Neza aménehitoka atiginá oko itekugo, goha není ángaminigi anazo, hee loko minoko aleko oakalímíni mogonamú lo kemekiko gílinigave.

<sup>11</sup> Imane mikasiuka agulizaki ve Satani lihínamú mota goní okamóma nenazo, goní oakalímíni mogonamú lo kemekiko gílinigave.

<sup>12</sup> Gako lo líkimitomó mukí nemóza, itína lítá oko lo lekeme asú okugo, gena lekepelekatize.

\* 15:20: Mat 10:24; Luk 6:40; Zon 13:16

\* 15:25: Age 35:19, 69:4

<sup>13</sup> Gakó gihilámíni amelaho Sikalahú áisi lemekoko gakó gihilagú lekelémoko vinogo ive. Nene ezáa agata geleko lo likimitigopa, nenitokatí itó aménehitokatí gakó geleoko lo likiminogo ive. Lá okoko alika utó iti netakumú lo lekeme lekeme oko minanogo ive.

<sup>14</sup> Gakó nene nenitokatí alekoko lo nolikimioko není nugulizá ale napa inogo ive.

<sup>15</sup> Aménehitokatí netá matá nene nenikó neme asú onoimó neve. Nenemú Sikalahulímo nenitokatí gakó alekoko lo likiminogo ive loko mota lo lekemekuve.

*Miluma gilitamóza miníiki mulúikú agila guluma inogo ive*

<sup>16</sup> Lekeza gamena koma niminiki není goha ángaminigave. Nenémíni veletó koma miníiki není goha ánganigave.

<sup>17</sup> Loko lokago, vejenala zuha lugáa leza logele hagele unike gakó imane nana gakó nolive. Gamena koma niminiki není ángaminigave, itó nenémíni veletó koma miníiki není goha ánganigave, itó aménehitoka atiginá oko ititove loko nolimó nene nana gakó nolive.

<sup>18</sup> Loko lunike, gamena komamú nolimó nene nana gamenamú nolive. Gakó limó nenémíni mogona gelemune.

<sup>19</sup> Loko lokunike, loká otanogo nouko Izesú geleake láa loko lo limimó: Gamena koma niminiki není ángaminigave, itó nenémíni veletó koma miníiki není goha ánganigave loko lo lukumómamú lígíli hagíli niahe.

<sup>20</sup> Lamaná lo likimitoze, gililo. Lekeza nene ive nama iki niminiko, monó gelema vejená nenete kogoliza vizinigave. Itó lekeza miluma giliki minanigave. Lá níiko, ale viligokiko mulutikú agila guluma inogo ive.

<sup>21</sup> Vená makolímó izegípa getati gamena alitokiko, miluma gilinogo ive. Minoko getoake, izegípala utó ikumú mulunaú agila guluma itímó miluma gilikumú agatí molanogoive.

<sup>22</sup> Lekezagí ámináminiki itína miluma gilitamóza, goha ángolikimikugo, mulutikú agila guluma inogo ive. Lá okiko, ve makolímó ipá oko ale ahulaminogo ive.

<sup>23</sup> Ámina gamenaló netá matakumú není voká linitaminigave. Neza lamaná lo likimitoze, gililo. Lekeza netá nemú manamú aménehitoka voká litamó nene, áisi není nugulizató likiminogo ive.

<sup>24</sup> Lekeza amunaloka miníiki itetó nene není nugulizá ali minake netá matakumú loká amamóma neve. Mulutikú agila guluma itimó nenémo hutilí oko napa oko minative líki voká líiki alinigave.

*Míkasiuka netá mukí nene avilegeko nouve*

<sup>25</sup> Gakó imane lo lekemeve lekemeve omo iteko minumó nene, anoza gakokutí lo lukumómoma neve. Gamena makó alitanogo ive. Nenekola anoza gakó goha lo lekeminogogo uve. Aménehini mogona lo utó oko lo likiminogogo uve.

<sup>26-27</sup> Gamena nene zupa není nugulizá ali miníki voká litave. Neza aménehitokatí lumu gakó mota gili alévolé iake, líkígika nimikakeve loko aménehiki agika lekemekave. Nenemú lekelikumú aménehitoka voká litove loko nene lo lekememuve.

<sup>28</sup> Neza aménehini ahulomikuke mikasiuka lumumó neve. Itó imane mikasi ahulokinake aménehitoka itinogogo uve.

<sup>29</sup> Loko lokago, izegípala zuhate leza láa loko lo amunimó: Imane anoza lamanike lo utó oko lo lemekane.

<sup>30</sup> Nenemú itínasa geikumú nene vejená keza loká miká igitamago geza netá matá mukikumú gele asú onane loko nogulune. Geza Ómasilokatí lemenimó neve loko gele alévolé onoune.

<sup>31</sup> Loko lokuko, Izesú láa loko lo limimó: Lekeza itínasa gele alévolé okune líki nilahe.

<sup>32</sup> Gamena makó alitanogogo uve. Alitokiko, není ahulinimíiki hutilí iki numutitoka ví asú inigave. Vikiko, nezánégó minanogogo uve. Lá itómóza, aménehiki minanogogo usive. Nenemú nezánégó minaminogogo uve. Ámina gamena itína mota alitokave.

<sup>33</sup> Není hulu nenémo lekelitoka minative loko gakó imane lo nolukumuve. Lekeza mikasiuka niminiko gopoguní milílikitatamóza, mulutikú golesa gelemilo. Nénisi nene imane mikasiuka mukí netá avilege nou vema nouve.

## 17

*Izesú izegípalamú Ómasiloka limó*

<sup>1</sup> Izesú nene gakó lo asú oake, okulumakuka ángo nomolake láa loko limó: Aménegamaka, gamena mota alitokave. Geza gipakámíni lapaná ale utó molokako, gipakámína neza geí lapaná ale utó molatoze.

<sup>2</sup> Géisi numutó namató vejenalitíni améipína nelémo loló animó nene nenitoka kelémo molani vejená nene alévolé kemetameni kimitove loko lá animó neve.

<sup>3</sup> Alévolé kemetamenímini mogona lá oko neve: Ómasi gihila hamokó geí mogonaka itó nimiseleni ve gipaka Izesu Kilistó není mogonáne gilíniko, alévolé kemetameni nene utó o kiminogo ive.

<sup>4</sup> Hoza nememimó nene, ale lutegekuke, mikasiuka geí lapaná ale utó okuve.

<sup>5</sup> Kee, aménega, mikasi velesá utó amigo gezagi makó okulamá lapanánegi minumó nene itína govogisalo nougo ámina netá goha nemekako ale minatove loko noluve.

<sup>6</sup> Mikasiuka vejenakutí makó nenitoka kelémo molanimoláa nene mogonaka aveté oko lo kemenoumóma neve. Geí mututoni nenitoka kelémo molokako, keza geí gakó gili alikave.

<sup>7</sup> Itó nenitoka netá nemó nene geitokatikó neve liki mota gilínave.

<sup>8</sup> Itó gakó lo nemenimó nene lo kemekugo, mota gili asú inave. Itó géisi nimiselekako geitokatí lumumó neve liki mota gili seketigí ikave.

<sup>9</sup> Neza keikumule loko geitoka noluve. Monóini nomi vejenakumú lamuve. Nemenimó keza geí mututoni niamó keikumú noluve.

<sup>10</sup> Itó není mututoni nene geí mututoni niave, itó geí mututoni nene není mututoni niave. Itó iki miliki niamó nenémo není lapaná ale utó moloaká noive.

<sup>11</sup> Neza mikasiuka minato gamena mota asú noive. Kéisi nene miní amiki niko, neza geitoka mota itinogo uve. Etó keké vizeko noani aménega, geí gugulizá kumumó nenémini zámuzatunú ale gilítokimikako, nenémini agikagú avasavagi minatave. Lá okiko leza ligika hámakó nemómáminoko keza kigika hámakó minatize.

<sup>12</sup>\* Kezagi makó minuni zupa nene, nenitoka kelémo molani vejená nene gugulizámini zámuzatunú gizapa oketoko minugo, nenémini agikagú minamó. Lá okago, gizapa okimikugo, gopa amamóma neve. Monó gotoláú luhuva gizina gakó makó alévolé itive loko lolímini mututoni hámakó nene latila imó neve.

<sup>13</sup> Itína geitoka vinogo nouke, imane mikasiuka vejenáne zuhatini mulúikú agila guluma itimó nenémo hutilí oko napa oko minative loko láa loko lo nogumuve.

<sup>14</sup> Neza gakoka lo kemenoumóma neve. Neza mikasiuka mututoni minamuve. Kezagi ámina iki mikasigú mututoni minamanazo, monó gelema vejená nenete lova ali kimiaká niave.

<sup>15</sup> Géisi není vejenáne zuha mikasiukatí kelématane loko lamuve. Ve golesa Satakumú geisa hizeko gizapa oketatane loko lo nogumuve.

<sup>16</sup> Neza mikasigú mututoni minamuve. Itó ámina iki keza mikasigú mututoni minamave.

<sup>17</sup> Gakó gihila kigikagú limitimoláatunú kelémo etó ozo. Geí gakó nene gihila neve.

<sup>18</sup> Géisi nene mikasiuka hoza gakó lonetoko nimiselenimó nenéminoko mikasiuka hoza gakó lokimikuke nokimisuluve.

<sup>19</sup> Geí gakó gihilámo kigikagú lemekoko kelémo etó okiko minatave loko nezáne nigikáne nugupéne ale etó oko nomuluve.

<sup>20</sup> Itó neza keikumukó geitoka lamuve. Keza li kimikiko nenikumú gili alévolé ita vejenakumuki geitoka noluve.

<sup>21</sup> Kigika hamokó miniko minatave loko lo nogumuve. Aménega, geza není akisenane, itó neza geí akisenoumó nene kezagi ámina iki akisikisiko, monóini nomi vejená keza nimiselekako lumumó neve liki gili seketigí itave loko noluve.

<sup>22</sup> Leza ligikate hamokó neve. Ámina oko keí kigika hamokó miniko minatave loko lapanaka nemenimó nene ámina oko kemekuve.

<sup>23</sup> Lá umó nene neza nemeni kumugo, itó geza gemeni nemekako, keza kigikatunú múnahiiki hamokó lilí iki minatave loko, itó lá iki niko, monóini nomi vejená kéisi nimiselekako lumumó neve liki gili seketigí itaze, itó gígika nenitoka moloaká noanimó nene ámina oko keitoka moloaká noane liki gili lamaná itave loko neve.

<sup>24</sup> Aménega, nenitoka kelémo molani vejená nene keza nénisi minatotoka minatave loko noluve. Neneló nüki nene mikasi utó amigo gígika nenitoka molanike okulamá lapaná lehizenetanimó nene ániigi guni itave.

<sup>25</sup> Aménega gehaváamaka, monóini nomi vejená keza geí mogona gili guni amamóza, nénisi nene gelenouve, itó vejenáne zuha nenete géisi nimiselekako lumumó neve liki gilínave.

<sup>26</sup> Neza gígika není nemenimó ámina oko keitoka minative loko itó neza ámina oko kigilikaloka minatove loko keí holúikú nene mogonaka lo kemeko minanogo uve.

## 18

*Izesuni amimí okago alemó*  
(Mat 26:47; Mak 14:43; Luk 22:47)

\* 17:12: Age 41:9; Zon 13:18



<sup>1</sup> Izesú eza gakó láa loko lo asú oake, ezagi vevenala zuhagi leza Kitilona nagamí gímuza vola helegaloka vunike, zazuha makokú itunimó.

<sup>2</sup> Ámina zazuahagú Izesugegi gamena gamena alegesá oaká unimó nenazo, itó amimika liti ve Zutá ezagi ámina apakumú ángonoimó nenazo, Izesú neneló noinogo ive loko geleneike,

<sup>3</sup> guguni giziaká a ve napagí Palisaio monó vegi niatoka vike Izesuni nene kígizakú molatikumú loká okago, mulusi makokú ami vegi itó monó zagusavegú pilisi ve lugáagi kimsilikago, keza ló ligiki aleke lova hiziaká netá aleke, Zutá kelémo goí goi ámina zazuhaloka Izesú noitoka vamó.

<sup>4</sup> Vi anitikago, Izesú nene aí amupiló utó iti netá mukikumú geleake, keitoka vike loká oketake lekeza éahikumú vitagá niave.

<sup>5</sup> Loko lokago, keza Nasaleta ve Izesunimamú vitagá nounge liki likago, Izesú nene nezama imane nouve loko lo kimimó. Loko lokago, amimika li ve Zutá nene holúikú minake,

<sup>6</sup> ezagi kezagi Izesú li gakokumú kemegesalokatí nivake mikasiló pou liki akimi vamó.

<sup>7</sup> Lá ikago, goha loká oketake lekeza éahikumú vitagá niave. Loko lokago, keza Nasaleta ve Izesunimú vitagá nounge liki likago,

<sup>8</sup> Izesú láa loko lo kimimó: Nezama imane noumole loko mota lo lekemekuve. Nenemú nenikumú vitagá niikima, izegipáne zuha imane ahulikimikiko hanuva vitaze.

<sup>9</sup> Loko lokago, nenitoka kelémo molani vegutí makó tolova amitive loko amunaloka li gakó nenémo alévolé imó.

<sup>10</sup> Lá okago, Saimon Pitá eza sopoló aleneimó nene golagutí aleko segeake, guguni gizoaká vetini ve napámimi gelekelé izegipala agulizá Malakusini apilike, zamagaloka agata zeko isimó.

<sup>11</sup> \* Lá okago, Izesú nene Pitani láa loko lo amimó: Sopoló nene goha golagú ale gúezo. Améneho míluma netá gihítane loko lonetonamóma nenazo, gehemitane loko lá noape, loko limó.

*Guguni gizoaká veloka Izesuni alímiki vamó*

<sup>12</sup> Lá okago, ami vegi monó gizapa veninigi Zuta vetini pilisi vegi keza Izesuni agizató aliake nagá alemó.

<sup>13</sup> Nagá aliake, apí iki alímiki viki Kaiapani venalámimi amelaho Anasí noitoka alímiki vamó. Kaiapá nene ámina kilisimasi oko novigo Zuta vetini guguni giziaká vetini gizapa ve minake,

<sup>14</sup> \* amunaló emane Zuta ve kagata alike leza mukitó helekatunize, ve hamokolímo lelémo nupa napa oko helekiko nenémo netá gihila ale utó oletative loko li ve minamó.

*Pitá Izesuni egamega otamó*

*(Mat 26:69,70; Mak 14:66-68; Luk 22:55-57)*

<sup>15</sup> Lá okago, Saimon Pitako Izesuni izegipala zuhagutí ve makó Izesuni ámegetoko vusi ve nene guguni giziaká vetini ve napa nenémo není ángonoimó nenazo, Izesuki makó vusike guguni giziaká vetini geisa mikú nanitusigo,

<sup>16</sup> Pitá nene geisa gatetoka oteneigo, neza vuke gatetó gizapa noi venáma lo amekuke, Pitani alémoko geisa mikú itusimó.

<sup>17</sup> Itekusigo, ámina venalímo Pitani loká otake geza nene ámina goní nita vémini izegipa zuhagutí makó noape. Loko lokago, Pitá nezama noamuve loko limó.

<sup>18</sup> Lá okago, hepé legekago, gelekelé vegi gimisigi vegi keza lóo lotá itune liki ló lokunusa ló gízikago, Pitá nene kezagi ote minake lóo lotá oko minamó.

*Guguni gizoaká ve napa nenémo Izesuni loká otamó*

*(Mat 26:59; Mak 14:55; Luk 22:66)*

<sup>19</sup> Lá noigo, guguni giziaká vetini ve napa nenémo izegipala zuhamuki apí o kemeaká i gakokumuki Izesuni loká otamó.

<sup>20</sup> Loká omikago, Izesú láa loko lo amimó: Neza numutó namató vevená lo utó okogó lo kemeaká umóma neve. Neza nene lekelí monó numutikú itó monó zagusave napagú lekeza Zuta ve alegesá laká niató nene gakó apí o kemeaká onouve. Neza nene asugunatoka gakó makó lo kemesá amuve.

<sup>21</sup> Geza není nene nanamú loká nonetane. Není gakó gilina vevená nene lo kumu gakokumú nanave loko limó neve loko loká oketozo. Lo kemeaká nou gakó nene keza gilinave.

<sup>22</sup> Loko lokago, pilisi ve makó áminaló ote minamó nenémo agizanitunú Izesuni napilike guguni gizoaká ve napama nene geza gakó nenémináa nanamú lo namene.

<sup>23</sup> Loko lokago, Izesú láa loko lo amimó: Neza gakó golesa makó lonoitomóma lo utó ozo. Gakó lamaná lo nolukumugo nanamú nonepelene.

<sup>24</sup> Loko lokago, Anasí nene nagatunú nene Izesuni agizató goha nagá zeake, guguni gizoaká vetini ve napa Kaiapá noitoka amiseleka go alímiki vamó.

*Pitá Izesuni goha egamega otamó*

*(Mat 26:71-75; Mak 14:69-72; Luk 22:56)*

<sup>25</sup> Lá noigo, Saimon Pitá nene lóo lotá oko oteneigo loká itake gezagi ámina vémini izegipala zuhagutí noape. Liki likago, eza egamega ike neza aí zuhagutí noamuve.

<sup>26</sup> Loko lokago, guguni giziaaká vetini ve napámini gelekélé izegipala Pitá agata zeko isi vémini zuhagutí ve makolímó loká otake gezagi zazuhagú niasigo ángo noumóma neve, olo.

<sup>27</sup> Loko lokago, Pitá goha egamega okago, áminaló litá oko okoloho nenémo anó molamó.

*Izesuni Pilató noitó alímiki vamó*

*(Mat 27:1-2; Mak 15:1-5; Luk 23:1)*

<sup>28</sup> Lá okago, Izesuni nene Kaiapani numukutí alími hetó iake, alímiki agulizaki vémini numutoka vamó. Viake, neteká holugú nego, avóikini asenini zeketakumú gili mína nosá nanigi niake Zuta veta amosá suni aleko hetoka ve makolímíni numukú itekinake ligika ale golotuva lokatune liki kezáini nene agulizaki vemámini numukú itemamó.

<sup>29</sup> Lá ikago, Pilató nene hetoka lemeake, loká oketake lekeza iki imane ve nanamú goní nitave.

<sup>30</sup> Loko lokago, keza láa liki lamó: Imane ve eza netá golesa aleaká ve minamilina, leza agizató aleko geitoka alémoko amutiline.

<sup>31</sup> Liki likago, Pilató láa loko li kimimó: Lekezatini agizató aliiki lekezatini li huka gakotinímaló ali milikí goní italo. Loko lokago, Zuta vetini monó gizapa vete zohota zaló hilitive liki giliake láa liki li amemó: Óe, lezetate ve makó apele helesakumú nene lekeli gamanímó óe loko lo hukonómóma neve.

<sup>32\*</sup> Liki likago, zohota zaló vejená kepele heleaká nene Loma vetini mogona minokago, Izesú nenéminoko hilitove loko amunaloka lo kimi gakó nene alévolé inogo imó.

<sup>33</sup> Lá okago, Pilató goha kugulizaki vetini numukú iteake Izesuni sele lo ameake loká otake geza nene Zuta vetini kugulizaki ve napa noape.

<sup>34</sup> Loko lokago, Izesú láa loko lo amimó: Gezaka gagata geleko nene gakó nolape, itó ve makolite nenikumú láa liki li gimikago nolane.

<sup>35</sup> Loko lokago, Pilató láa loko lo amimó: Neza Zuta ve nougo nolape. Gezaka vejenakagi itó guguni giziaaká ve napagi gilímiki nenitoka iminamóma neve. Geza nana netá golesa loló okako neve.

<sup>36</sup> Loko lokago, Izesú láa loko lo amimó: Neza nugulizaki ve napa noumóza, nenémini mogona nene imane mikasigó vetini suni nomive. Imane mikasiuka netá minalina, Zuta vetini kigizakú nilími milikatave liki izegipáne zuhate lova aí utó alinamóza, nugulizaki ve minato mogona nene imane mikasigó vetini suni nomive.

<sup>37</sup> Loko lokago, Pilató láa loko lo amimó: Láa lokoma geza nugulizaki ve napa nouve loko nolape. Loko lokago, Izesú láa loko lo amimó: Nene nugulizaki ve nouve loko gezaka mota lokane. Neza gakó gihila lo utó itove loko imane mikasiuka lemekuke, izóneho getokago nouve. Gakó gihila giliaaká nia vejená mukilite negepagutí gakó giliaaká niave.

<sup>38</sup> Loko lokago, Pilató nene gakó gihila nene nana gakó neve.

Loko loake, Zuta vejenatoka hetoka lemeake, láa loko lo kimimó: Imane vémini lihi-mavalamú vitagá umó nomive.

<sup>39</sup> Lá onomóza, lekezatini mogona lá oko neve. Avotikini asenini zeketakumú gili mína holisígú kilisimasiló kilisimasiló nene lekezatini ve makolímíni agulizá ikago, nagá numukutí ve hamopamó kimisele ahulo ahulo oaká nougo lekelitoka viaká niave. Itó imane gilíkiko etokíkoma, Zuta ve lekeli agulizaki velini aseva zemikugo lekelitoka vitihe.

<sup>40</sup> Loko lokago, keza nene negénegeka lake gakó napagutí nene Óe, aí nomive. Palapasini aseva zetamane. Liki lamó nene Palapasí nene laskoli ve nenaé.

## 19

*Izesú hilitive liki goní itamó*

*(Mat 27:15; Mak 15:6; Luk 23:13)*

<sup>1</sup> Lá okago, Pilató lokago, segi nogosanitunú nene Izesuni apiliake,

<sup>2</sup> agulizaki vema nenaé liki anosa netá lilí itiake ami vete uhenagi nagatunú akilí lilí iki gotolaló hitímiake, ginégane hána luhuvagi okohu gó luhitamó.

\* 18:32: Zon 3:14, 12:32-33

<sup>3</sup> Lá iake, amatoka hizi letiki niake, ganimakilisi i ameke Oga, mokáne, Zuta vetini kugulizaki véinimave. Nilake, kigizanitunú Izesuni agokaló zemó.

<sup>4</sup> Lá ikago, Pilató nene Zuta ve niatoka goha limike láa loko limó: Ánigalo, lihimavalamú vitagá umó nene nomive liki gilitave loko lekelitoka alémoko nouve.

<sup>5</sup> Loko lokago, Izesú nene uhenagi akiliki okohu gó luhooke keza niatoka lemeko noigo, Pilató nene nokelepizike imane ve ánenémináa ánigalo.

<sup>6</sup> Loko lokago, guguni giziaká a ve napa keza vegeánigí Izesuni ániagiake, gakó gamoga geke zohota zaló apele helemane. Zohota zaló hilitinae. Liki likago, Pilató nene konotó alike láa loko limó: Neza nene lihimavalamú vitagá umó nomize. Nenemú lekezatini alímiki viki zohota zaló apililo.

<sup>7</sup> Loko lokago, Zuta vetini monó gizapa ve keza láa liki lamó: Ezáamú Ómasímini gipala nouve loaká noimóma nena. Nenemú ve nenémináa nene hilitave liki li hukilita gakokú luhuva gizinámoma nenazo, mota hilitive.

<sup>8</sup> Liki likago, Pilató nene Ómasímini gipala noive liki lakumú alegesá goha ligimó.

<sup>9</sup> Alegesá legekago, Izesuni nene goha numukú alémoko itike loká otake géisi hikutí útó animó neve. Loko lokago, Izesú nene anotó alemimó.

<sup>10</sup> Anotó alemigo, Pilató láa loko lo amimó: Geza gakó nene lo nememane. Neza lokugo hanuva minanogo ane, itó nénisi lokugo zohota zaló hilinogo ane. Nenémini zámua niminámoma nena. Nene gelemape.

<sup>11</sup> Loko lokago, Izesú láa loko lo amimó: Není gakó litane loko veletokatí Ómasímo zámua gememilina geza není gakó nana oko latiline. Nene nolanimole. Nenemú nene geitoka nelémo mola vémini lihima givilegeko napa napa neve, loko lo amimó.

<sup>12</sup> Pilató nene gakó geleake, Izesuni nene aseva zetatove lokago, Zuta vete ganimakilisi ake láa liki lamó: Geza nene imane ve aseva zetatanimó nene, Loma apatoka agulizaki ve napámíni agivelaho minaminogo ane, itó asú ígitanigave. Itó makó eza ezáamú nugulizaki ve napa nouve loko litimó nene Loma apatoka agulizaki ve napa Sisani aviligitohe loko lova gizo aminogo ive.

<sup>13</sup> Liki likago, Pilató nene geleake, lokimikago, Izesuni alímiki limikago, gakó lo hukoaká holomaló lemeko minamó agulizá nene Hipulu gakokutí nene Gapatave liaká amó, lelí gakokutí nene geha holomave loko.

<sup>14</sup> Itó avotegini asenini zeketakumú azo holisi minatune liake, netá matá ali vatí niago, holisaká gamena noigo, Pilató nene holomavaló noike, Zuta vetini gizapa ve nene agulizaki velini imane ánigalo.

<sup>15</sup> Loko lo kemekago, keza ganimakilisi ake zohota zaló apele helemane liki likago, Pilató láa loko limó: Í, agulizaki velinima lekelisi likiko zohota zaló hilitive liki nilahe. Loko lokago, guguni giziaká a ve napa keza gakó láa liki li amemó: Leza nene agulizaki vele makó nomive. Loma apatoka agulizaki ve napa Sisá hámakó noive.

<sup>16</sup> Liki likago, Pilató nene ake, Izesú nene zohota zaló nilitunú ziki apili hilitave loko kizakú molamó.

<sup>17</sup> Lá okago ami vemate Izesuni alímiake, zohota za amikago, gihigo, apá makó agulizá nene gotóini gonosi helisa apale loko, itó Hipulu gakokutí Goligota loko neneloka alímiki vamó.

<sup>18</sup> Alímiki vake zohota zaló apiliki apatemó. Lá iake, ve golesa lositá luga luga kipiliki apatemó. Izesuni nene holukú hizi otítamó.

<sup>19</sup> Lá ikago, Pilató lokago nene, Izesuni gotolaló zaló luhuva láa liki gizikago minamó: Nasaete numutotí Zuta vetini agulizaki venini Izesú ave.

<sup>20</sup> Nene mikasi Zelusale numuni símekaló minanazo, Zuta vege ná mukí vigá ígá niake ámina luhuva gatamó. Nene luhuva nene Hipulu gakokutí itó Loma gakokutí itó Kiliki gakokutí luhuva gizikago minamó.

<sup>21</sup> Lá ikago, Zuta vetini guguni giziaká a ve napa keza Pilatoni láa liki li amemó: Zuta ve lelí agulizaki veve loko luhuva gizamoko, neza Zuta vetini nugulizaki ve nouve loko limó neve loko gizamane.

<sup>22</sup> Liki likago, Pilató nene mota luhuva gizokutó neze, ha minatize, loko limó.

### *Izesuni zohota zaló apelemó*

*(Mat 27:32-44; Mak 15:21-32; Luk 23:26-43)*

<sup>23</sup> Lá okago, ami ve keza Izesuni nene zohota zaló apiliki apatiake, gineganeva gona miliake, losive losive okago, amelaho ve lilí i asú amó. Lá ikago, gola hána miní amiki akotamamó mukipa gó minokago,

24 \* nenemú láa liki lamó: Hukoko alesá golesa okatize, nenemú zohikú molokuko winititímó nene amelaho ve loló itive. Liake lá ikago, monó gotolaú nene neni ginegane ali gona miliki, nugupeló netá nene zohikú milikamó neve liki luhuva giza gakó nene alévolé imó.

25 Ami ve keza nene lá niago, Izesuni zohota za mogonagú nene vejená lá iki minamó: Izolahiki atolahiki itó Kolopani venala Maliaki itó Magatala numutotí Maliá makoki.

26 Neneló Izesú agika ameká i veve liki lina ve nezagi makó nouko, Izesú nene izolahini láa loko lo amimó: Vená geza ángo. Ve imane gipaka loló noive.

27 Loko loake, láa loko lo nimimó: Vená imane ángo. Geí izokahove. Loko lokago, ámina gamenaló Izesuni izolahini alémoko vuke numúneuka minoko aleko usimó.

### *Izesú hilimó*

(Mat 27:45-56; Mak 15:33-41; Luk 23:44-49)

28 \* Izesú nene mota hoza ale asú okuve loko geleake, gihila zitive loko monó gotolaú mina gakó makó láa loko limó: Nagamikumú nivisekave.

29 \* Loko lokago, neneló lape makokú ekésá vain nagamí lagasó ma nego, nenegú notunigitana netá nagamí ziake, zokaitunú hiziake agepagú amikago, namó.

30 Vain nagamí nene noake, sele like mota hozane ale lutegekuve. Loko loake, gotola nene gupá zeake sikalahula ahuloake hilimó.

### *Izesuni alómusagú zokaitunú hizemó*

31 Lá okago, Zuta vetini monó gizapa ve keza gó lokiko avóikini asenini zeketakumú gili miniaká a holisigú minanigi netá alí vatí niake, ámina holisi nene napa napa nenazo, itó Mosé ve makolímíni gonosiva nene límugusigú zaló minatimó etamitive loko lo mola gakó gili minake, Pilatoni láa liki li amemó: Ami ve makó kimiselekako, víki ámina vetini kígisa helisáini zi letiki gonosíini nene zalotí aliliki limiki gale zikitatave loko noune.

32 Liki likago, gele kemekago, ami ve keza golesa netá alesí ve Izesuki makó kepele vetosini kígisa helisa zi letiake,

33 víki Izesuni ángamó nene mota helekago, ángiake, agisa helisa nene zi letamamó.

34 Lá okago ami ve makolímó zokaitunú nene alómusagú hizekago, golanigi nagamiki nene áminagutí litá oko limimó.

35 Nene suni nene nogómula gihilatunú ángokuke lo utó noumó nene soza nomive. Gakó gihila neve loko gelekuke lekeza ámina gakó gili seketigi itave loko gizo nolukumuve.

36 \* Monó gotolaú anoza gakó makó lá oko nemó nene, gihila zitive loko ámina suni utó imó:

Lekeza nene helisa nene ma zi letaminigave.

37 \* Itó monó gotolaú gakó makó lá oko neve:

Keza nene zokaitunú hiziki hokolota ve nene ánganigave.

### *Izesuni gale zitamó*

(Mat 27:57-61; Mak 15:42-47; Luk 23:50-56)

38 Lá okago, Alímataia numutotí ve Zosehé áisi Zuta vetini monó gizapa vemú ahelele vizigo minake, asuguná okó Izesuni izegipala mina vémo Izesuni gonosiváa aleko vitohe loko Pilató noitoka voko lolá okago, Pilató gele amekago, gonosiváa nene zohota zalotí apasoko aleloko lemekago,

39 \* Nikotemó nene amunaló emane límugusigú Izesutoka vi vemámo anuva netupa meseme lamanalímíni lositá ale gopa oake, sigelílo molamó genava nene 35 kilo okago, geheko vimó.

40 Lá oake, Zosehé alémo vatí igo, Izesuni gonosiváa nene ámina netupa meseme hilimikasike, gó gizopa lamanatunú asapú itasimó nene Zuta vete gonosí miliaká a suni alesimó.

41 Itó Izesuni apele mikasi agilikaloka zazuha makó minamó. Nenegú geha mulí makó goló vatikago, nego, vejená nenegú gale zikitamago hanuva gosohá minamó.

42 Lá okago, holisi gamena mota alitokamómave loko hoza alita gamena asú okago, itó ámina geha mulí nene alitó minamó nenazo, nenegú Izesuni gonosiváa milasimó.

## 20

### *Izesú heleneikutí otimó*

(Mat 28:1-8; Mak 16:1-8; Luk 24:1-12)

\* 19:24: Age 22:18 \* 19:28: Age 22:15 \* 19:29: Age 69:21 \* 19:36: Gá 12:46; Nam 9:12; Age 34:20 \* 19:37:

Zak 12:10; Ali 1:7 \* 19:39: Zon 3:1-2

<sup>1</sup> Holisi napa Sategú nene gó lo mikasiló amigo, Magatala numutotí vená Maliá nene gonosi apató vo aniteake ánimamó nene agepaló gehani napa mili lí amóma ahelú ali ahulinago ángoake,

<sup>2</sup> ololu loko vike Saimon Pitanigi nezagi ángolimiake, láa loko lo limimó: Guivahanímini gonosiváa mota aliki vikave. Itó nene hikú milamó netive. Leza gelemune.

<sup>3</sup> Loko lokago, Pitaki nezagi gonosi apatoka makó vusimó.

<sup>4</sup> Gapoló ololu loko nevusike, neza nene Pitani avilegeuke litá oko gonosi galeló vo anituke,

<sup>5</sup> gava hizeko ánimamó nene, nagá like gokó nego ánimamóza, áminagú itemuve.

<sup>6</sup> Lá okugo, Saimon Pitá nene alika oake geha mulí agikagú iteko ánimamó nene, mokoná lavolavo asapú amóma nene nego,

<sup>7</sup> itó gotolaló asapú ita gó nene haitó gakeko nego ánimamó.

<sup>8</sup> Lá okago, nénisi goí oko anitumóma nemóza, alika áminagú itekuke, ámina netakó nego ángouke, lamaná oteko iteko vokave loko gele seketigí umó.

<sup>9</sup> Amunaloka nene monó gotoláu Izesú heleneikutí oteko ititive liki gakó gizamó nene gele hee lamusimó.

<sup>10</sup> Itó leza nene goha numutoka atiginá oko vusimó.

*Izesú Magatala numutotí vená Maliatoka utó o amimó*

*(Mak 16:9-11)*

<sup>11</sup> Vokusigo, Magatala numutotí vená Maliá eza nene gonosi galeló goha vike hetoka ive oko minatotí nene galegú ánganogo gava hizeko ánimamó nene,

<sup>12</sup> ageló lositá Izesuni gonosiváa goí oko mina galeló gó gizopa luhiki minasike mitó niasigo ánimamó. Makolímó gotolaló minamó. Makolímó agisaloka minamó.

<sup>13</sup> Minasike vená geza nanamú ive noane liki likasigo, iza láa loko limó: Není Guivahanímini gonosiva aliki vikago, hitoka aliki vahe loko vitagá nouve.

<sup>14</sup> Loko loake, mino viligoko ánimamó nene Izesú noigo ánimamóza, agoka agepa ángo vevesamimó.

<sup>15</sup> Ángo vevesamigo, Izesú loká otake vená geza nanamú ive noane itó éhikumú vitagá noane. Loko lokago, eza nene zazuhagú hoza aleaká ve noihe loko láa loko lo amimó: Ve lamanámaka, géisi nene gonosivama aleko voko makokuka molonoitanimó nene, lo nemekako aleko vitove.

<sup>16</sup> Loko lokago, Izesú nene Maliazó lokago, eza viligoko Zuta gakokutí laponi, lelí gakokutí nene monó gizapa venemaka.

<sup>17</sup> Loko lokago, Izesú láa loko lo amimó: Neza nene aménehitoka velesá itemumó nenazo, nenemú nunukemo. Geza nene voko izegipa nunganomotamónema není améneho nene lekelí ametipove, itó není Ómasi nene lekelí Ómasi noitoka itinogo uve loko lo kemezo.

<sup>18</sup> Loko lokago, Magatala numutotí vená Maliá eza atiginá oko vike Izesuni vegenala zuha nene neza Guivahani ángokugo gakó láa loko lo nemekave, loko lo limimó.

*Izesú izegipala zuha niatoka utó o kimimó*

*(Mak 16:14-18; Luk 24:36-49)*

<sup>19</sup> Loko lokago, ámina holisi napagú límugusi zekago, izegipala zuha leza Zuta vetini monó gizapa vemú lelegesá legekego, numukú itekunike gahe etoha oko gekunike nouko, Izesú nene holutegú utó oake ote minake hulu nene lekelitoka minino.

<sup>20</sup> Loko lo lemeake, agizani lositá nolelepizike, alómusagú hize ahúma lelepizekego, izegipala zuha leza Guivahanima ángokunike mulutegú lamaná gulune.

<sup>21</sup> Lá okuko, goha láa loko limó: Hulu lekelitoka minino. Améneho nimisilimó áminagó oko lekelí nolikimisuluve.

<sup>22</sup> Loko loake, huhu loletake, láa loko limó: Ómasímini Sikalahú alilo.

<sup>23</sup> \* Lá iiki vegenalitini lihímáini liki ahulatamó nene, asú itive. Liki ahulamitamó nene hanuva minative, loko limó.

*Tomasí Izesú goha otikumú gele alévolé amimó*

<sup>24</sup> Ligiveteho makó agulizá Tomasí agulizá makó Lopé áisi nene makotoka noigo Izesú utó o limimó.

<sup>25</sup> Utó o lemekago, ve agivelage leza makó zupa Tomasini ángokunike aveté oko leza Guivahanima ángokune. Loko lo amekuko, eza limó: Nezáne nogómulatamú agizató ahúma ánimamoko itó nigizanitunú ahúmaló ale gelemoko, itó alómusalokama ale geleko ánimamine, gakotini nene gele alévolé aminogo uve.

<sup>26</sup> Loko lokago, holisi makó alitokago, izegipala zuha leza Tomasigegi nene numuni makokú goha ale nupa unike gahe gekunike nouko, Izesú nene ligilikagutí utó oake noike, hulu lekelitoka minino.

<sup>27</sup> Loko lo lemeake, Tomasini láa loko lo amimó: Gigizani hisukatunú nigizatoka nuhúma ale geleko ángofo. Itó gigizani ahuloko nolómusaloka ale gelezo. Lá okoko gagata losi gelemoko gele alévolé ozo.

<sup>28</sup> Loko lokago, Tomasí nene Guivahaníнемakave, itó Ómasinemakave.

<sup>29</sup> Loko lokago, Izesú láa loko lo amimó: Géisi ángokanike gele alévolé okane. Není ángamake gili alévolé iaká nia vejenakumú gulugo lamaná okave, loko limó.

*Zoní giza luhuvámíni mogonáa*

<sup>30</sup> Itó Izesú nene izegipala zuhatini lovgisalo lu avevezaha la avevezaha mukí loló imó nene imane luhuvagú gizo asú amumóza,

<sup>31</sup> imane gizonoumoláa lekeza gatiki güliiki Izesú nene gologí oletative loko lo mololeta vema Ómasímíni gipalave liki aikumú gili alévolé i miniki alévolé lekemetameni alitave loko gizonoumole.

## 21

*Izesú izegipala zuha makoláaloka utó o kimimó*

<sup>1</sup> Itó minoko izegipala zuha leza Tipelia nonohulotó voko nouko, Izesú nene haitó suni aleko utó o limimó.

<sup>2</sup> Saimon Pitakí lopé izegipa Tomasiki Galilaia mikasigú Kana apatotí ve Natanaeki nezagi uvónehiko losigi aí izegipala zuhagutí makó losimagi leza alegesá oko nouko,

<sup>3\*</sup> Saimon Pitá nene neza lagaha alinogo novuve. Loko lo lemekago, lezagi makó vitune loko lokunike, sipigú itekunike vunimó. Voko minunike ámina holugú lagaha alemunike lá ova ova oko nouko,

<sup>4</sup> gokululuva notovo igo, Izesú nene getatoka melane minamóza, izegipala zuha leza Izesuni ameni ángo guni amuko,

<sup>5</sup> Izesú loká oletake izegipaguvo, lagaha ma alehe. Loko lokago, leza Óe, alemune.

<sup>6\*</sup> Loko lokuko, láa loko lo limimó: Gotaha ali zamagaloka miliki ahulatamó nene lagaha alinigave. Loko lokago, gotaha ale zamagaloka molokunike, lagaha vauva aleko alunimó nene gelelehá unimóza, vai okago, keé loko ale otemuhá.

<sup>7</sup> Lá okuko, Izesú ameni nemeaká i veve liki lina ve neza nene Guivahanima nenaé loko Pitani lo amekugo, Saimon Pitá není gakó geleake, agupe zapakó minatotí ginéganeva ale luhoake, nagamikú olío lemeake, galanogosa zeko 100 mitagítana oko voko nagamí getatoka vo anitekago,

<sup>8</sup> ve lugáa leza nagamikú lapegú lagaha gotaha gelelehá oko aleko vuhá.

<sup>9</sup> Voko getatoka itekunike netá makó lá oko ángunimó. Ló nokusa ale hitikakú lagahagi peleti makoki nego ángunimó.

<sup>10</sup> Nániguko, Izesú nene lagaha itína alemómagutí lugáa alikaló.

<sup>11</sup> Loko lo lemekago, Saimon Pitá nene sipigú iteake gotaha gelelehá oko getatoka ale moloake lagaha napa 153 nene gotahagú vai líki minamóza, gotaha nene alegetá vizezimó.

<sup>12</sup> Lá okago, Izesú nene iki neteká nosá nalo. Loko lo lemekago, izegipa leza Guivahanimave loko mota gelenounimómaló nenazo, geza éagama noane loko loká otamune. Loká otamuko,

<sup>13</sup> Izesú oake, peletigi lagahagi aleake gona moloko limimó.

<sup>14</sup> Lá imó nene Izesú heleneikutí oteake izegipala zuha lelitoka utó o limigo ánguni gamena neneló losive makole loló imó.

*Není sipsip izaló nosánetá kemeko gizapa oketozo*

<sup>15</sup> Neteká nosá no asú okuko, Izesú nene Saimon Pitani láa loko loká otamó: Zonini gipala Pitao, gigive keza kígika nimiaká niamó nene kivilegeko gígika nemeaká noape. Loko lokago, Pitá nene Guivahaníнемaka, geikumú geleaká noumó nene gelenanimole. Loko lokago, Izesú nene vejenáne zuha kígikámíni nosánetá mí zeko kemeko nozo.

<sup>16</sup> Loko lo ameake, goha lo amike Zonini gipala Pitao, geza lamaná gígika nemeaká noape. Loko lokago, Pitá nene Guivahani neza geikumú geleaká noumó nene gelenane. Loko lokago, Izesú nene vejenáne zuha lamaná oko nasahilí oketozo.

<sup>17</sup> Loko loake, miní ameko loká otake Zonini gipala Pitao, geza nenikumú geleaká noape. Némika loko loká otamó nene gamena losive makole imó nenemú Pitá agika hizekago lo amike limó: Guivahaníнемaka, mukí netakumú gelenanimole. Neza geikumú geleaká

noumó nene gelenane. Loko lokago, Izesú láa loko lo amimó: Geza nene vegeanáe zuha lamaná oko gizapa oketozo.

<sup>18</sup> Lamaná lo gimitoze, gelezo. Geza gosohá ve minanike holotaka nene gohakaló ze gilitokanike, gapo neloka manaloka vitove loko gagata geleanike voaká animóma neve. Lá onoimóza, minoko ozaha molokoko gigizani lutooko noako, ve makolimo holotaka zegimioko vamtive litanitoka gelémoko vinogo ive.

<sup>19</sup> Loko Izesú nene Pitá minoko nenémini oko zohota zaló noheleko Ómasímini agulizá alémo kegesative loko anoza gakó limó. Loko loake, miní ameko némegetoko ano loko lo amimó.

*Izesuni izegipala gihiláa*

<sup>20\*</sup> Loko lokago, Pitá viligoko Izesú ameni nemeaká i veve liki lina ve není áinigamó. Neza amunaló nosá nuni zupa Izesuni amatoka minuke nene Guivahanínemaka, éaho gimimika litikumú nolane loko lu ve minumó nenazo,

<sup>21</sup> Pitá nene nenikumú Izesuni loká otake imane ve nana itimó neve.

<sup>22</sup> Loko loká omikago, Izesú láa loko lo amimó: Áisi hanuva agómulagi noiko nénisi atiginá itove loko lokugoma, geí netá nehe, olo. Geza nene hanuva némegetoko ano.

<sup>23</sup> Loko li gakolimo hutilí oko vokago, vegejala zuha keza nenikumú nene helemingogo ive liki gelemóza, Izesú nene gakó némika loko lamike, áisi hanuva agómulagi noiko nénisi atiginá itove loko lokugoma geí netá nehe lokogó limó.

<sup>24</sup> Itó Izesuni izegipala neza ámina netá áinigoko gelekuke, lo utó moloko aí mogonamú luhuva imane nogizuve. Leza mukilite nene imane luhuva gizonou gakó nene gihilave loko gelenoune.

<sup>25</sup> Itó Izesú oko moloko imó nene nana oko gizo asú itune. Ha nenazo, gizo asú uhá minalina, nagata gulumó mikasiuka ma asú amiline.

---

\* 21:20: Zon 13:25

## Aposolote Iki Miliki Amoláa

*Sikalahú amisilitove loko lo hutamó*

1\* Teopilo, goí okoma luhuva netá gizo gumumó nene Izesú apí oko hoza alimoláa itó apínapi o kimike aleloko vimoláa ale lutigike okulumakú itimoláagi nene gizo gumumóma neve.

2 Okulumakú velesá itemike aposolo lilí itave loko kelémo etó imoláa nene Ómasímini Sikalahulámo litó hoza gakó lo kimimó.

3 Zaló itike míluma geleake heleneikutí oteake nene, hanuva agómulagi minake aleloko novive liki gili hee litave loko alévolé suni mukí loló ike gamena 40-a utó okemeká tolova oká noike, Ómasímo gizapa okimiaká gakó lo kemeko minamó.

4\* Lá oake alika nene kezagi minake, láa loko lo kimimó: Lekeza Zelusalega nene litá iki ahulamiki améneho Sikalahúne amisilitove loko lo mololikimikago lo lukumu vemú nene ageva iki minalo.

5\* Zoní nene hanuva nagamíláa holokimiaká imóma nemóza, améneho nene gamena hána minamoko Sikalahú hololeketanogo ive, loko lo kimimó.

*Izesú okulumakú itimó*

*(Mak 16:19-20; Luk 24:50-53)*

6 Gamena makó zupa keza alegesá iake, Izesuni láa liki loká itamó: Guivahanitemaka, kugulizaki ve goí iki lelitoka gizapa iaká amómámini oko geza itína gamena nene gugulizaki ve loló okoko Ísilae veđená lelitoka gizapa itape.

7 Liki likago, eza láa loko lo kimimó: Nugulizaki ve napa loló ito gamena nene améneho ezáa zámuzalaló molo gilike gamena hánahe alínipape ezáa lo hukonoimó nenazo, lekelisi ma geleminigave.

8\* Lá onoimóza, imane gilitave. Ómasímini Sikalahú eza lekelitoka lemeko zámuzá lekemekiko, gakóne nene Zelusalega apí iki liiki nene lilí ali iki Zutaia apá makokuka itó Samalia mikasiuka viiki, nenetí mikási nekisa vokisauka vi asú itave, loko lo kimimó.

9 Láa loko lo kemekago, keza gonú napelego, vávani oko iteko novigo Ílmusi nenémo molo hitokago, vo tolova imó.

10 Okulumakú teho lokago, izegipala zuhate okenava iki gonú inago, ve lositá nene gineganéini mokonaki keitoka galinali utó ikasike,

11 láa liki li kemesimó: Galiláia mikasiló vese, lekeza nanamú okulumakuka gonú iki niave. Izesutípo nene áninigago ahulolikimiake okulumakú iteka ve nene okulumakú itimómáminoko alika liminogo ive, liki li kemesimó.

12 Lá okago, keza Oliví agokalotí atiginá iki limiake gapo alínipa viki Zelusalega vi antiake,

13\* numuni amupiló makó gikakú miniaká a numukú nene itiki minamó. Keí kugulizáinía Pitá Zoní Zemusí Etulú Pilipó Tomasí Patolomaió Mataiú itó Alapaioni gipala Zemusí makó itó Saimoná eza Loma vemú giligo goselé apeleaká i ve itó Zemusí makolímíni gipala Zutá.

14 Nene ve itó Izesuni izamuha hiziki miniaká a venámagi Maliá Izesuni izolahiki itó Izesuni agunamotamolagi kigika mili hamó iki Ómasiloka liki minamó.

*Zutani hoza agepaló aliti ve alími etó amó*

15 Gamena nene zupa Izesuni veđenala zuha nene veđená 120 nenéminiki minikamó nene alegesá iki niago, Pitá nene oteake gakó láa loko lo kimimó:

16 Nigivénegita, Zutá eza ale goí igo Izesuni agizató ale vemámini mogonala nene lo likimitoze, gililo.

17 Ámina ve nene monó hoza leza nolimike ezagi amimó neve.

18\* Ámina ve nene mikási makó gomulusi gehanítunú meina hizikago, áminaloka voko minake gotalalokatí velehé limike agatupa zeko pou lokago mí aseva akúvalomó zímó.

19 Lá i gakó nene Zelusale veđená mukílite giliake ámina apá agulizá keí gakokutí Akeletama liki mílinamóma neve. Itó lelí gakokutí nene gola mikasive neve.

\* 1:1: Luk 1:1-4    \* 1:4: Luk 24:49    \* 1:5: Mat 3:11; Mak 1:8; Luk 3:16; Zon 1:33    \* 1:8: Mat 28:19; Mak 16:15; Luk 24:47-48    \* 1:13: Mat 10:2-4; Mak 3:16-19; Luk 6:14-16    \* 1:18: Mat 27:3-10



20 \* Itó Ómasímini Sikalahulímo agulizaki ve napa Tevitini alémo vávani okago, alika Zutá nene loló iti netakumú gako límó nene alévolé imó. Ámina netá nene Zutatoka utó itikumú nene Ómasi agepoka líká nama líká a gakokutí láa loko luhuva gizonoiómoma neve: Numuni apala nene gámé vizekiko, numutagalagú nene ve makolímo minamitive, loko gizamó. Itó makó lá oko neve:

Aí hoza agepaló nene ve makolímo alitive.

21-22 \* Luhuva láa loko gizonoiómó nenazo, Guivahani Izesú nene holutejú minoko aleko noigo, ve lugáa nenete Zoní eza Izesuni nene nagamí holota gamenaló apí iki lehelukalú imi nivago Ómasímo Izesuni alémoko okulumakú itimó. Ámina vegutí nene Zutani hoza agepaló alitive loko ve makó alémo etó okuko, Izesú nene galegutí otimó nene ezagi lezagi makó ániguháma nenazo, ezagi makó avetó oko lo kimitune loko noluve.

23 Loko Pitá lo kemekago, ve lositá, makó Zosehé, agulizá koma Pasapá, agulizá makó Zustó, itó ve makó agulizá Matatiá nene kilími utó miliake,

24-25 Ómasiloka láa liki agepoka lamó: Kee, Guivahanitemaka, ligika ániogoá ve noane. Zutá nene aposolo hoza ahuloake heleake, Ómasímo ale vavá ota apatoka vokave. Lá okago, aí hoza agepaló aliti ve imane ve lositakutí alémo etó itanimoláa lelepizezo.

26 Liki agepoka liake, kugulizá nene luhuva giziki ali nupa iki milakutí makó ali otiki ániagamó nene Matatiani agulizá nego, aposolo hoza amemó.

## 2

### *Sikalahú limimó*

1 \* Zuta vetini avóikini asenini zeketakumú gili mína holisi asú okago, gamena 50 oko vokago, holisi makó alitokago, Izesuni vegenala zuha keza apá makokú alegesá iki niago,

2 okulumakutí anó makó ohuhú nenémínoko moloko galinali lemeake, mína numuni agikagú nene iteko mino vaí imó.

3 Lá okago, ló gulumagitana netá makó utó oake mukilitini gotóitó hamopamó mino asú okago,

4 Ómasímini Sikalahú nene lemeko kigikagú mino vaí oake nenémíni zámuza kemekago, haitopaitó konokutí apí iki gako lamó.

5 Lá niago, gamena nene zupa Zuta vegená monóimigi vegená nene vaí iki ake Zelusale numutoka minamó neve.

6 Niake guu guu loko okulumakutí limi netalímini anola giliake alegesá ake, konóikutí konóikutí gako lí kimi kimi ago giliake,

7 kegepa gahava minamigo, sigaga likitake láa liki lamó: Gako nila ve imane Galilaia mikasigutí vegó niamóza,

8 keza nana iake gakotegutí gakotegutí likago nogulune.

9 Leza nene Patia ve nouhá, itó Mítia ve nouhá, itó Elame ve nouhá, itó Mesopotamia mikasiuka ve nouhá, itó Zutaia ve nouhá, itó Kapatosa ve nouhá, itó Potu ve nouhá, Asia ve nouhá,

10 itó Pilisia ve nouhá, Pamapilia ve nouhá, Izipi mikasiuka ve nouhá, itó Lipia mikasigutí Sailini ve nouhá, itó Loma apatotí venove nouhá Zuta vegi monokumú gutá amoláagi nene,

11 itó Kiliti ve itó Alapia ve leza nene ve minunike nene, Ómasímini suni alévoleláa nene lá iki lonokutí lonokutí likago gelekune.

12 Liki liake, kigika gopa okago, gili gopa iake ligili hagili iki Agae, imane nana suni naleve.

13 Liki likago, lugáate gopoguka likitake vain nagamí gosohá niake matúini gopa okago lutuka nilave, líki lamó.

### *Pitá monó gako lo kimimó*

14 Liki likago, Pitá ave agivelage ileven-amagi oti minake gako napagutí láa loko lo kimimó: Zelusale apá amelagita itó Zuta vegená lugáa neneta, neza gako lo likimitoze, gili vesesiki gililo.

15 Lekeza lelikumú nene vain nagamí niake kigika gopa okago nilave liki nilamóza, gó izoha nolanazo, lá oko nomive. Sipaki gamena nomive.

16 Imane sunimú Ómasímini agepagutí gako loaká ve Zoelé láa loko luhuva giza gako nene mota gihila zekave:

17 \* Minoko gamena napa asú iti zupa nene

Sikalahúne numutó namató vegená mukitó lehizelikimikugo,

\* 1:20: Age 69:25, 109:8 \* 1:21-22: Mat 3:16; Mak 1:9; Luk 3:21 \* 2:1: Liv 23:15-21; Gapo 16:9-11 \* 2:17: Zoe 2:28-32

izegipatini lakagapilamolite Ómasímini agepagutí gako li nimiliko,  
 gosohá velinite vamómáminiki nánigiko,  
 ozahatini keza vamó ániganigave.

<sup>18</sup> Itó ámina zupa Sikalahúne nene lehizekimikugo,  
 není gelekelé ve vená kezagi alikamú gako li milanigave.

<sup>19</sup> Lá niko, okulumatokagi mikasilokagi golivagi netá haitopaitolímini nolekelepizugo  
 ániganigave.

<sup>20</sup> Guivahanímini golivagi gamena napa velesá utó amigo,  
 mikasiuka nene golanigi loki lokilagi utó inogo ive,  
 itó okulumató nene hómíni agómulaló hitanogo ive,  
 itó ikani nene ámina oko golakó loló inogo ive.

<sup>21</sup> Lá okiko, Guivahanímini agulizá iki sele li amita vejená nene  
 kugutó vizinogo uve, loko Ómasímo lokave  
 liki luhuva gizamóma neve.

<sup>22</sup> Isilae mikasigú vese, lo likimitoze, gililo. Nasalete numutotí ve Izesú eza holutikú  
 minake, Ómasílokatile liki litave loko Ómasímo hize lé otago, zámuzalaló molo gilike golivagi  
 netá mukí ale utó molamó nene lekeza gilinave.

<sup>23</sup> Ámina ve nene Ómasímo gozapá molo hukake gili netá aleko likigizakú molokago,  
 lekelisi gala vevatini kigizakú milikago alími-likí vikí zaló nilitunú apilikago hilimóma neve.

<sup>24</sup> Lá ikamóza, gonosi matimatigú minamítimó okago, miluma gilike heleneikutí Ómasímo  
 alémo otimó.

<sup>25</sup> \* Agulizaki ve Tevití nene aikumú nene láa loko luhuva gizamóma neve:  
 Neza Guivahani ángo gisili hizekuke minoaká nouve.

Voko gopa okatove loko nigizani zamagaloka noive.

<sup>26</sup> Nenemú nigikagú laga noike,  
 mulúnegú ágila guluma noigo noluve.

Itó nugupemú nene gele hamokó oko  
 gegeva oko minanogo uve.

<sup>27</sup> Není ahulonimikako nigika lamanaki nou vémina nugupéa anuva aminogo ive.  
 Nemenía nene hele vejenalitiníuka ahulonetamitanikumú noluve.

<sup>28</sup> Geza alévolé nemetameki mohona ito gapo nelepizenitika,  
 govogisaló mulúnegú ágila guluma igo minanogo uve, loko limó.

<sup>29</sup> Uvónegita aménegita, neza avoteho Tevitikumú ale akutoko lo likimitoze. Eza helekago,  
 gale zimikago, gonosi matimatí galeva itína ha nego ángiaká niave.

<sup>30</sup> \* Eza Ómasímini agepagutí gako loaká ve minoake, nénisi helekugo Ómasímo nene není  
 izegipa nugunamotamokutí makolímó není hoza agepaló agulizakí ve napa alémo loló itove  
 loko alévolé oko lo huta gako nene geleake,

<sup>31</sup> gologí oletative loko lo mololeta vema galegutí otitikumú geleake, agika lamanaki veva  
 agupéa anuva okative loko hele vejenalitiníuka amenía ahulotamimó neve loko limó.

<sup>32</sup> Itó Izesuni nene Ómasímo galegutí alémo otekago, leza logómula gihilatunú  
 ángonouháma neve.

<sup>33</sup> Itó Ómasímo agizani zamagaloka alémo moloake, amelaho lo mololetató nene Sikalahú  
 molomíkago, ámina Sikalahú itína nene lehizelimíkago, ámina netá giliká ángiaká niave.

<sup>34</sup> \* Itó Tevití nene okulumatú itemimóza, eza gako makó láa loko limó neve:

Mezaú ve eza není Guivahaníne nene není nigizani lamagaloka minoloko voko noako,  
<sup>35</sup> gala vega nene gigisa heumaaka ahulokimikugo minanigave, loko lo amimóma neve.

<sup>36</sup> Lá onoize, Isilae vejená mukí lekeza alévolé iki gililo. Ámina ve apilikago hili ve Izesú  
 nene Guivahanite gologí oletative loko lo mololeta vema noive loko Ómasímo alémo apazá  
 noive, loko limó.

<sup>37</sup> Láa loko lo kemekago, miluma giliake Pitá ave itó aposolo lugáave loká ikitake ligivese,  
 leza nana okuko lamaná itive.

<sup>38</sup> Liki likago, Pitá láa loko lo kimimó: Ómasímo lihimatini apaso ahuloleketative liki  
 likigika ali viligalo. Lá ikiko, leza Izesu Kilistoni agulizató monó nagamí hololikimikuko,  
 Ómasímo Sikalahula lehizeleketanogo ive.

<sup>39</sup> Lekezagi izegipatinigi itó hetoka nia vejenaki sele lo kemekiko ata vejená mukí nene  
 Sikalahú lehizeleketanogo lo mololeketonoimóma neve.

<sup>40</sup> Loko Pitá loake, mukí gako miní ameko kagata aleko itína gamena ve neginagi keí  
 holúikí ahulikimiiki ikiko Ómasímo lukugutó vizitive, loko lo kimimó.

*Izesukumú gili alévolé a vegeñalitini suni*

<sup>41</sup> Láa loko lo kemekago, aí gako gili alemoláa goha 3 tausen nene Ómasímo Izesuni vegeñalaló miní ameketago, monó nagamí hilikitámó.

<sup>42</sup> Lá ikago, gamena gamena amuza miliki alegesá iake gili hamó iki aposolo apí i keme gako giliake, hanuva nosaki lepa nosaki niki Ómasiloka liki miniaká amó.

<sup>43</sup> Lá niake, aposolomate haitopaitó alévolé suni aleke golivagi netá alikago, vegeñá mukí kehelele vizigo minamó.

<sup>44</sup> \* Izesunimú gili alévolé iki mina vegeñalite nene netá matá ali minamó nene mukitó netáini ali minake,

<sup>45</sup> henokanóini makó ali minamó nene maketiló miliake moni aliake netakumú vitagá a vegeñá nene gona miliki ali volaló imaló ake,

<sup>46</sup> gamena gamena kígika mili hamó ake monó numuni napagú monó líká ító numúikú hanuva nosaki lepa nosaki níká iki kígika mili apiziki nosánetá gona miliki ali volaló imaló iki niake,

<sup>47</sup> Ómasi agepoka liki miniaká niago, vegeñá mukilite áñigi kumu helemó. Lá noigo, Guiv-ahanímó gamena gamena vegeñá makó kugutó vizike Izesuni vegeñalaló miní ameketámó.

**3***Monó zagusave gatetó ve gepili alími zokasimó*

<sup>1</sup> Gamena makó zupa Pitako Zoniko nene ho ale zohota noigo Ómasiloka loaká gamena nene monó zagusave napagú itinigi nivasigo,

<sup>2</sup> ve makó izolaho getakutí gepili minamó nenémó numuni gatetó minoko monó numukú tigá limigá a vegeñáma monimú voká loko minoaká imó. Ámina ve nene gamena gamena monó zagusave gatenáa agulizá lamanapani loko netó nene alimi ahulimikago,

<sup>3</sup> monimú voká loko minoaká imó. Ámina ve nene áminaló minake Pitako Zoniko monó zagusave napagú itinigi nivasigo, áñigoake, monimú voká limó.

<sup>4</sup> Voká lokago, Pitako Zoniko keza gonú napelesike, Pitá nene gonú lepelezo.

<sup>5</sup> Loko lo amekago, ve gepili nenémó netáma niminigi nilasihe loko gihuhú noake gonú kipilimó.

<sup>6</sup> Lá noigo Pitá láa loko lo amimó: Moni lelitoka nomimóza, netá hamokó lelitoka nemó nene gimitoze, alezo. Nasaleta numutotí ve Izesu Kilistoni gaketó oteoko gapo moloko VOZO.

<sup>7</sup> Loko lo namike agizani lamagaloka aleko alémo otekago, litá oko agisaguki agisa gehanaguki alévolé okago,

<sup>8</sup> moí oko oteake gapo moloko olío ite ite oko Ómasi agepoka lomo lomo vike Pitako Zoniko monó zagusave napagú nene makó itemó.

<sup>9</sup> Lá okago, gapo mohona noike Ómasi agepoka noligo, vegeñá mukilite áñigiake,

<sup>10</sup> goí oko monó numuni gateni agulizá lamanapaniveló minake monimú voká voká loko minoaká i ve noive líká áñigi hee liake, agisa lamaná ikumú ininá iake sigaga lamó.

*Pitá monó zagusavegú gako lo kimimó*

<sup>11</sup> Ámina vémo Pitako Zonikoló gímizekago, vegeñá mukí keza monó zagusaveló gaizopa makó agulizá Salomonive liki atagamó nenegú ololu liki víki alegesá iake kegepa gahava nomigo minamó.

<sup>12</sup> Lá niago, Pitá nene áñigoake láa loko lo kimimó: Isilae mikasigú vese, ve imane áñigiake sigaga sagaga nilamóza, lelí zámuzatunú ító lelí lamanatetunú oko alémo otemusinazo, gonukonú lepelemilo.

<sup>13</sup> \* Avotege Avalahá Isaká Zakopó keí Ómasímini gelekelé gipala Izesuni zámuza utó igo nánigave. Agulizakí ve Pilató eza Izesuni aseva zetatove loko noligo lekelisi nene Pilatoni agómualó Izesuní áñigi lá iake apilitave liake ami vetini kizizakú milámó.

<sup>14</sup> \* Lekelisi ámina vevesoko nomina ve agika lamanaki vema áñigi lá iake, ve makó kepele hili ve noimóma aseva zetative liake,

<sup>15</sup> minoaká amelahinima apilikago hilimóza, Ómasímo heleneikutí alémo otekago, áñigonouháma neve.

<sup>16</sup> Ámina ve Izesuní agulizá gele alévolé ominusitímó áñigina vema imane alémo lamaná usigo, eza Izesukumú gíligo alévolé okago zokokave.

<sup>17</sup> Nigive nagavese, lekezagi gizapa velinigi gili hee lamake Izesuní apilinámóma neve loko gelenouve.

<sup>18</sup> Ómasímíni agepagutí gako liaká a vetini kegepa ale vávani okimikago gologí oletative loko lo mololeta vema miluma geleko hilitive loko nenémíni gakola lili ali vetini kegepauka lo molokago gizi mila gako má itína mota alévolé okave.

<sup>19</sup> Lihimavatini gilatoleketative liki likigika ali viligiiki golesa netatini ahuliiki Ómasiloka gímizilo. Lá ikiko Guivahanilokatí likigikámíni nosáneta ame íi liti gamena anogo ive.

<sup>20</sup> Lá okiko, Ómasímo eza gologí oleketative loko lo mololeketa ve Izesuni alémo etó oleketonoi vema amiselekiko goha mikasiuka liminogo ive.

<sup>21</sup> Izesú nene okulumalímo asapú okago noiko, Ómasímo lu netá la netá mukí goha ale lamaná iti gamena Ómasímíni agepagutí gako liaká a vetini kegepagú lo molokago gako lí mila gamena nene alitokiko liminogo ive.

<sup>22</sup> \* Itó Izesukumú nene Mosé gako makó láa loko limó neve:

Guivahani Ómasímo likigivetikini holúikutí nene agepagutí gako loaká ve makó nenikitana oko alémo etó oleketatomó nenazo, némíni manámíni lo likimítí gako mukí nene ámegetalo.

<sup>23</sup> Itó ámina monó lole ale véminí gako gili alemita vegená nene, Ómasímo kehelú inogo ive, loko limó neve.

<sup>24</sup> Itó Samuelé minatotí Ómasímíni agepagutí gako liaká a ve miniliki itemoláa mukilite imane gamenamú nene alika utó itive líki minamó.

<sup>25</sup> \* Lekeza ámina vete alika utó itive liki lí mila vema ali lá inamó nenazo, itó Ómasímo avotikitoka lo mola gako nene Avalahani nene gagapilamó makolímó numutó namató vegená mukí lusa geketanogo ive loko lo ami vema ali lá inamó nenazo, likigika ali viligiiki golesa netatini ahulalo loko noluve.

<sup>26</sup> Ómasi eza gelekelé gípala alémo etó í vema lusa gelikimioko gapo golesagutí lekelémo atiginá itive loko lekeza Zuta vegematoka amisilímoma neve.

## 4

### *Pitako Zoniko kansoletini holúikú minasimó*

<sup>1</sup> Pitako Zoniko keza vegená gako láa liki lí kimiki niasigo, guguni giziaká vegi monó zagusavegú gizapa vegi itó Satukaio monó vegenaki keitoka ake,

<sup>2</sup> vegená nene Ómasímo Izesuni nene heleneikutí alémo otimómámíni oko vegená makó kelémo otitive liki apí ikimiki lasi gakokumú gili golesa iake,

<sup>3</sup> kigizató aliake, límugusi mota zekago, azozá goní oketatune liki kilími kalapusi numukú mílamó. Lá ikago numuni hamó akasimóza,

<sup>4</sup> gakóini gelemoláagutí gili alévolé a véa 5 tausen minamó.

<sup>5</sup> Akiake gó lago, Zuta vetini kugulizaki vegi monó ve lunáagi monó mogona apí ikimiaká a vegi

<sup>6</sup> guguni gizoaká í ve napa Anasí itó Kaiapá itó Zoní itó Alesaté itó guguni giziaká a zuha makoki mukí nene Zelusalega alegesá iki minake,

<sup>7</sup> aposoloma kilími holúikú miliake, loká ikitake hí véminí zámuzaló itó hí véminí agulizató ve imane alími zokasive.

<sup>8</sup> Liki likago, Ómasímíni Sikalahulímó lemeko Pitani agikagú mino vaí onoigo, láa loko lo kimimó: Uvónegita aménegita,

<sup>9</sup> lekeza ve gepilima nana ikasike alími zokasimó neve liki itína netá gihila alusikumú goní hoza nilememóza,

<sup>10</sup> lekezagi mukí Isilae mikasigú vegená neneta, gako lo likimitoze, gililo. Nasaleta numutotí ve Izesu Kilistoni nene lekelisi zaló apili hilikago Ómasímo heleneikutí alémo oti vemámíni zámuzaló ve imane lokogómulaló zokoake nene noive.

<sup>11</sup> \* Aí mogonamú nene monó gotolaú luhuva makó láa liki gizinámoma neve:

Numuni giaká vete gehani napa makó ángi ahulamó nenémo

gehani lapusa alévoleláa loló oake noive,

líki gizinave. Lekeza ámina numuni giaká ve niave, itó Izesukumú gehani lapusa golesave líki liake ángi ahulamóma neve.

<sup>12</sup> Numutó namató vegenakutí lugutó viziti ve makó noamive, itó aí agulizató lamaná itunimoláa neve, ve makó imane mikasiuka minamive, loko limó.

<sup>13</sup> Lá okago, Pitako Zoniko keza kehelele vizemigo ali akutiki gako likasigo, sukulu lamasi vematosave líki giliake nene, sigaga liake Izesuni amatoka minasi vematosá lasinae líki gelemó.

<sup>14</sup> Lá niago, alími zokasi ve nene keí kamatoka noigo, ve lositosini konotó aliki li kimita gakoláa nomigo, vitagá amó.

<sup>15</sup> Vitagá iake, gakó numukutí kimisili hetoka iake, kezáikó láa liki ligili hagili amó:

<sup>16</sup> Imane ve losítama nana oketatune. Kéisi nene netá golvivagi alikasive liki Zelusale numutoka vegená mukilite gili asú ikanazo, leza nana okiko egamega oko lá oko nomive loko litune.

<sup>17</sup> Lá onimóza, ámina gakó hutilí okiko vegená gili asú ikatave liake, Izesuni agulizató gakó goha li kememitáive liki kagata alitune liki liake,

<sup>18</sup> goha sele li kimiake, Izesuni agulizató gakó li kimi kimi iki vegená goha apí i kememitáive liki kagata alemó. Lá ikago,

<sup>19</sup> Pitako Zoniko keza láa liki li kemesimó: Lekeza giliki ángalo. Vegená lekelí gakó gele alekoko Ómasímini gakó gele ahulatunimó nene Ómasímo gele lamaná itihe.

<sup>20</sup> Leza ángoko geleko uní netá nene hitooko minaminogo une.

<sup>21</sup> Liki likasigo, keza goha kehelele viziti gakó li kimiake, kipilita gapomú vitagá amó nene nomigo, hanuva kimisili ahulikago vasimó.

<sup>22</sup> Lá amó nene ámina netá golvivagi aliki alími zokasi vema nene kilisimasiva 40-a alahuloko minamó nenazo, vegená mukilite ámina netakumú Ómasi agepoka liki minikago, ve losima kipilitunimó nene vegenalite nana ilitatahe liki giliake gapomú vitagá iake ahulikimikago vasimó.

*Izesuni vegenala zuhate genezáini ale vávani oketative liki Ómasiloka lamó*

<sup>23</sup> Kimisili ahulikago, limikasike kigivéike niatoka vasike, guguni giziaká ve napate itó monó ve lunáate li keme gakó nene aveté iki li kimikasigo,

<sup>24</sup> \* giliake, kegepa hamó ake Ómasiloka láa liki lamó: Mezaú ve Guivahani geza okulumakuka ito mikasiuka itó age nagamikú lamó lamimó molanitika,

<sup>25</sup> \* Sikalahuka nenémo gakola nene aveteho geí gelekelé ve Tevitini agepagú lo molokago, gakó láa loko limóma neve:

Hetoka vegená nene kizapaló molokago gopaga lamó neve.

Itó Zuta vegenalite netá golesa loló otatune liki gilikamóza,

hanuva geleakaláagó gelemó neve.

<sup>26</sup> Mikasiuka kugulizaki ve napa nenete ali vavá iake,

itó gizapa vete ali nupa iake,

némimi manámimi iki Guivahanigi gologi oletative loko lo mololeta vevagi lova ale kimitune liki gona gizamole,

loko limó.

<sup>27</sup> \* Lapanalagi gelekelé gipaka Izesúma lugutó vizeaká hozamú alémo etó ani vema lova ali aminigi Heloté ave Potiasi Pilató ave itó hetoka vegenaki Isilaeló gizapa vegi keza lamaná imane apatoka alegesá iake,

<sup>28</sup> géisi gosohá utó itive loko lo molani netá mukí alemóma neve.

<sup>29</sup> Lá ikamóza, Guivahanitemaka geza lehelele viziti gakó gelekoko gakó ale akutoko litune loko genezate ale vávani olimioko,

<sup>30</sup> zámuzá lemekako vegená kelémo zokinake lapanalagi gelekelé gipaka Izesuni agulizató golvivagi hoza alitune loko nolune.

<sup>31</sup> Liki Ómasiloka likago, alegesá iki mína numunima guliguli oko mómoká okago, Ómasímini Sikalahú nene lemeko kigikagú mino vai oake kelémo vávani igo, limiake Ómasímini gakó ali akutiki li kimi kimi iaká amó.

*Netá matá nene mukitó netámi ali minamó*

<sup>32</sup> \* Lá niake, Izesunimú gili alévolé iki mína vegená keza kigika mili hamó iake, geí netá není netá lamake netá matá ali minamó nene mukitó netale liki ali minamó.

<sup>33</sup> Lá niake, aposolote Guivahani Izesú galegutí otekago ángune liki gakó nene alévolé iki aveté iki li kimi kimi iki minikago, Ómasímo hize lé okimikago niave liki mukí vegenalite gili minamó.

<sup>34</sup> Nenémimi gihila nene numunihe mikasihe zazuhahe netá amelage meinaváa aliake,

<sup>35</sup> aliki víki aposolo kimikago, ve lugáate netakumú vitagá niago nene gona miliki kimikago, ve makólímo netakumú vitagá osá amimó.

<sup>36</sup> Nenémi suni nene ve makó agulizá Zosehé eza aposolote agulizá makó Panapasí ave liki míla ve, nene agulizalímimi mogonáa lelí gakoquí nene kelémo kii lokimiaká ve eza Livaini agávolohe Saipalasi mikasi pokolagú getamó nenémo

\* 4:24: Gá 20:11; Nia 9:6; Age 146:6

\* 4:25: Age 2:1-2

\* 4:27: Mat 27:1-2; Luk 23:7-11

\* 4:32: Apo 2:44

<sup>37</sup> zazuha apala makó ale minamó nene meinava moni aleake aleko voko aposolo kimimó.

## 5

### *Ananiasiko Sapailako*

<sup>1</sup> Lá okamóza, ve makó agulizá Ananiasí itó venala Sapailá keza ligili hagili ikasike, zazuha apá makó salimikasike, moni alikasike,

<sup>2</sup> lugáa nene ali halá gikasike, Ananiasí nene lugalokatí aleko voko aposoloma nene áminasí alusimó neve loko lo kimimó.

<sup>3</sup> Lá okago, Pitá láa loko lo amimó: Ananiasio, geza nanamú Satá gigika ale gopa okago Ómasímini Sikalahú soza gakó lo amekanike mikasímini meinava lugalokatí ale halá gekane.

<sup>4</sup> Mikasiga nene gezakaloka minatinazo, gezaka gagata geleko kemenimóma neve. Itó salimokanike meinava alenimó nene geza monikama nenazo, lélisi voká logetamune. Nenelotí meinava aleokoma nenetunú netá mataka meina kona itove loko itaninazo, geza nana okago gezaka gígikámo gogoka vizekago nenémini ane. Vegená soza lo lumuhe loko Ómasi soza lo amekane.

<sup>5</sup> Loko noli agepagi, Ananiasí nene nogilike pou loko akoake hilimó. Helekago, ángiake, kelegesá ligimó.

<sup>6</sup> Itó lá oko helekago gosohá ve minamoláate otiki gonosiváa nene gotunú asapú iake aliki viki gale zitamó.

<sup>7</sup> Gale zimikago, koma nominake, venalámo ámina gakó gelemike hanuva noihe loko anitimó.

<sup>8</sup> Anitekago, Pitá nene loká otake Olo, mikasilotí meinava áminasí alesimó nehe. Loko lokago, eza oo, áminasíma nene.

<sup>9</sup> Loko lokago, Pitá láa loko lo amimó: Lekeza nanamú Guivahanímini Sikalahulímo ángimative líki agoka vizinigi ligili hagili ikasike asihe. Gelezo. Vakama nene gale ze vema gatetoka líti líti líki níki laze, gezagi nene áminámini iki aliki viki gale zigitanigave.

<sup>10</sup> Loko noli agepagi nene eza galinali agisagú pou loko akoake hilimó. Helekago, ámina gosohá ve nenete iteke gonosiváa ángiake, aliki víli vana gale zitató nene gale zitamó.

<sup>11</sup> Gale zikago, monó gele vegená itó gakóini gele vegená mukí keza kelegesá ligimó minamó.

### *Alévolé suni haitopaitolúmini ali utó amó*

<sup>12</sup> Aposolo keza alévolé suni haitopaitolúmini mukí nene vegenalitini holúikú ali utó iminikago Izesuni vegenala zuha mukí nene monó zagusave napámini gaizopa numuni makó agulizá Salomonive líki atagamó nenegú kigika mili hamokó iki alegesá iaká amó.

<sup>13</sup> Lá niago, vegená lugáate kugulizáini ali otemóza, ve vená mukilite kelegesá legekago monó gele vegenatoka viki gímizemamóza,

<sup>14</sup> ve vená mukilite vauva aliki Guivahanímú gili alévolé iake keitoka miní amiki miniaká amó.

<sup>15</sup> Lá iake, kivisi vegená nene gapoló kilími miliki Pitá tizokoko kugupeló ale gelekikohe itó hanuva vogunámo avutá kepelekiko zokatave liake, ukoako nene líli iake ámina vegená nene miliki kilími-líki iki agisauka nene ahulikimiaká amó.

<sup>16</sup> Lá niago Zelusalega alitoka minilíki va vegenalite kivisi vegenaki kigikagú holosi golesa mina vegenaki kilímiki ikago, kilími zokí asú amó.

### *Aposolo gopoguni milikitamó*

<sup>17</sup> Lá niago, guguni gizoaká i ve napagi izegipala zuhagi itó Satukaio monó vegená kezagi ámina suni ángiake, kemekugú niake kizapaló molokago,

<sup>18</sup> aposoloma kigizató aliake kalapusi numukú kilími milamó.

<sup>19</sup> Lá ikago, akinago, holugú akovevé nene Guivahanímini ageló makolímó kalapusi numukutí gahe segekimiake, kelémoko limike láa loko lo kimimó:

<sup>20</sup> Lekeza viki monó zagusavegú itiki alévolé kemetamenigi minata gakó li kimi kimi iki minalo.

<sup>21</sup> Loko lo kemekago, giliake, neteká ho noitigo monó zagusavegú itiki monó li kimi kimi iki minamó.

Lá niago, guguni gizoaká i ve napa nenémo izegipa agunamotamalagi Isilae vegenalitini monó gizapa vegi monó kansolegi kilími nupa iake gakó ligili hagili iake, aposoloma kilímatave líki pilisi ve makó nene kalapusi numukuka kimiselemó.

<sup>22</sup> Kimisilikago, viki kalapusi numukú ángimó nene, niamago, vitagá iake, atiginá iki ake lamó:

<sup>23</sup> Leza voko ánguhá nene kalapusi numuni gahe lopena alinago gizapa vema gatetó ha minamóza, leza gahe segekunike, iteko ángunimóza, ámina vegená niamago vitagá okune.

<sup>24</sup> Gakó láa liki likago, monó zagusave gizapa vegi guguni giziaká ve napagi keza gelemó gena okago, alika netá makó utó itimó nehe liake, kagata losi gelemó.

<sup>25</sup> Nigelego, ve makolímó anitike kalapusi numukú kilími mila vemate viki monó za-zusavemagú monó li kimi kimi iki nianae.

<sup>26</sup> Loko lo kemekago, monó zagusave napa gizapa ve nenémo pilisi ve kelémoko vike aposoloma kipilitunimóza ha veenalite gehanitunú lipili hilikatave liki kehelele vizekago, hana ikisi kilímiki amó.

<sup>27</sup> Kilímiki iake monó kansoletini holúikú kilími milikago niago, guguni giziaká vetini ve napámo láa loko lo kimimó:

<sup>28</sup> \* Leza nene ámina vémini agulizá iki li kimi kimi amilo loko lo lekememuhá nehe, olo. Lekeza pelevesava ziake, nene gakó nene Zelusale numutoka li hutilí ikave. Lá iake, aí apili helemómámini lihima nene lelí lumupiló molatune liki nilahe.

<sup>29</sup> Loko lokago, Pitá ave aposolo lugáa kezagi anotó aliki láa liki li amemó: Vegenalitini gakó gele aleoko Ómasímini gakó gele ahuloakala nomive.

<sup>30</sup> Lekeza Izesuni nene zohota zaló apili hilikago, avotegini Ómasímo alémo otekago otimó neve.

<sup>31</sup> Ómasímo Isilae veđená lekelisi likigika ali viligikiko lihimatini apasoleketative loko ámina ve nene agulizaki vele itó lugutó vizeaká vema alémo etó oake, galegutí alémo otekago, Ómasímini amatoka noive.

<sup>32</sup> Lá okago, Ómasímini gakó gili aliaká niamoláa kemeaká noi Sikalahulímó itó lezagi ániogoko gelekunike ámina gakó lo lekemeaká noune, loko lo kimimó.

<sup>33</sup> Loko lo kemekago, giliake, kizapaló golesa molokago, aposolo kipili hilinigi li hukamóza,

<sup>34</sup> Zuta vetini kansolegutí Palisaio monó ve makó minamó, agulizá Gamaliele. Áisi nene Mosé lo hukoko li gakó lainim-okimikago veenalite ániigi lamaná a ve minamó. Áisi nene oteake aposoloma kilími hetó itave loko lokago, aposolo keza olíi hetó limiki niago,

<sup>35</sup> agivelagini láa loko lo kimimó: Isilae vese, lekeza imane vemú gili hee liiki netá matá ikitalo.

<sup>36</sup> Gozapá ve makó minamó, agulizá Teutá ave loko mina vemámo nugulizaki ve napa nouve loko lokago, ve 400 aitoka gímizemóza, alika nene Teutoni apili ahulikago, veđená aitoka gímizemoláa kimisili ahulikago, hutilí iki viake apí a hoza nene ahulamó.

<sup>37</sup> Itó alika nene Galilaia mikasigutí ve makó agulizá Zutá eza lugulizá aliaká a gamenaló nene oteake, veđená gala vizeko ale goi ike lova mogoka ligo, lova apí amóza, ámina ve nene apili ahulikago, izegipa agunamotamola hutilí iki vamó neve.

<sup>38</sup> Nenemú gakó imane lo likimitoze, gililo. Lekeza imane ve ahulikimikiko hanuva minatave. Keza gakó akó liki hoza nalemó nene kezáini kagata giliki nalitamó nene, gopa oko haha inogo ive.

<sup>39</sup> Itó Ómasímo hize lé oketago nalitamó nene, lekeza Ómasímini hozava ali golesa itiki lova ali amikatave loko lou noko likipilino ive. Nenemú lakagata aleko noluve.

<sup>40</sup> Loko lo kemekago, keza gili aliake aposoloma kilímiki itiake segi nogosanitunú kipiliake, Izesuni agulizá nene goha avetó iki veđená li kememitave liki li hukikimiae kimiselemó.

<sup>41</sup> Kimisilikago, nivake, Guivahanimule loko lovoza hili netá aliki lepelemóza, Ómasímo nenemú gilimó etokave liki liake, kogoliza viziki kansoletini kovogisalokatí limiake vamó.

<sup>42</sup> Vake, gamena gamena monó zagusave napagú itó numúikú nene gologi oletative loko lo mololeta ve Izesuni gakó lamaná ahulamake miní amiki li kimi kimi iki minamó.

## 6

### *Monó ve seven kilími etó amó*

<sup>1</sup> Gamena nene zupa Izesuni veđenala zuha hizi hutilí niago, keikutí Zuta veđená makó Kiliki gakokutí liaká a ve nenete getó venalitini nosánetá nene gamena gamena gona miliki kememóma vo alemikumule liki Zuta gakokó liaká a ve nene gahá kememó.

<sup>2</sup> Lá ikago, aposolo 12 keza Izesuni veđenala zuha sele li kimiake láa liki li kememó: Leza Ómasímini gakó lo utó aminake lugupémimi hozagó alesá etaminogo ive.

<sup>3</sup> Nenemú ligivetegita, lekeza lekelí holutikutí ve 7-a gotóini lamanaki itó Ómasímini Sikalahuki kigikagú mino vaí oko neiko veenalite ániigi lamaná iaká nia ve kilími etó ikiko, leza ámina hoza kemekuko alitaze.

<sup>4</sup> Lá ikiko leza nene Ómasi agepoka loaká itó monola loaká hoza goselekaselé aminake aleko minatune.

\* 5:28: Mat 27:25

<sup>5</sup> Liki likago, Izesuni vejenala zuha mukilite gili lamaná iake ve makó kilími etó amó, kugulizá Setepanó eza agikaturú gele alévolé oko minokago Ómasímini Sikalahú lemeko agikagú mino vaí oko mina ve, itó Pilipó, itó Polokoló, itó Nikanoló, itó Timoná, itó Palamená, itó Nikolaó eza Atiokia numutotí Zuta vejenatoka monokumule liki gutá a ve.

<sup>6</sup> Nene vete aposolotini kamatoka hizi letiAKE niago, aposolote kigizani nene gotóitó milake Ómasiloka lake kilími etó amó.

<sup>7</sup> Lá ikago, Ómasímini gakó hutilí oko vogá ogá oko minago, Izesuni vejenala zuha nene Zelusalega miní amiká amiká ago, guguni giziká a vegutí lugáate Izesuni monokumú gili alévolé amó.

### *Setepanoni agizató alemó*

<sup>8</sup> Lá okago, Ómasi eza Setepanoni hize lé omiAKE zámuzá mukí amekago, alévolé suni haitopaitolimíni nene vejenatoka mohona oko aleko minamó.

<sup>9</sup> Lá okago, monó numuni makokutí miluma hozagutí asenini zikitamoláate Sailini apatotí itó Alesatalia apakutí itó Silisia ve itó Asia ve nenete ali nupa iake, Setepanoni pelevesava zitamóza,

<sup>10</sup> Sikalahulímó alémó vávani okago, monó limó nenémó keí gakó satamó. Satokago nene loú noko kipilimó.

<sup>11</sup> Lá okago, vejenatoka asuguná gomulusi gihikago, Setepanoni amimika lake gakó láa liki lamó: Ámina ve nenémó Moseki Ómasigi alevo galatovo okago gelekune.

<sup>12</sup> Liki liake, numuká vejenaki olopa napagi monó mogona apí-ikimiaká a vegí gala vizikago, galinali Setepanoni gohoni milake agizató aliAKE kansoletini numukú alímiki vamó.

<sup>13</sup> Alímiki viake soza sazalo ve kilími numukú milikago, láa liki lamó: Ve imanémó lelí monó apakumú itó Mosé lo huka gakokumú alevo galatovo oko loaká noive.

<sup>14</sup> Makó nene láa loko noligo gelenouháma neve: Nasalete numutotí ve Izesúma imane apá ale golesa okoko oko moloko oaká nouhá sunimú Mosé gizo molamó nene ale gopa napa inogo ive, liki lamó.

<sup>15</sup> Láa liki liake ámina numukú mina ve mukitó keza Setepanoni agoka agepauka ángigamó nene, ageló makolímíni agovisagitana oko lapanalagi noigo ángigamó.

## 7

### *Setepanó ezáa mognáamú lo kimimó*

<sup>1</sup> Lá okago, guguni giziaká a vetini ve napa nenémó loká otake gakó nilamó imane mota lamaná nilahe.

<sup>2</sup>\* Loko lokago, Setepanó láa loko limó: Avónegita aménegita, gakó litoze, gililo. Avoteho Avalahá eza Halana mikasiuka velesá vonamike Mesopotamia mikasiuka noigo, Ómasi eza lapanalagi vemámo utó o amike

<sup>3</sup> Láa loko lo amimó: Numuka apaka itó vejenaka zuha ahulokimioko nénisi mikasi makó gelepizitoze, neneló voko minatane.

<sup>4</sup>\* Loko lokago, nene gakó geleake, Kalatia mikasi ahuloake, Halana mikasiuka voko minamó. Neneloka noigo, amelaho helekago, gale zemiAKE Ómasímo litó nene ámina mikasigutí goha gá logoko léisi nouhatoka amóma neve.

<sup>5</sup>\* Gá logoko okago, mikasi ma alemimóma neve. Ómasímo mikasi koma makó keké amemimóma neve. Izegipa geto molamike noigo, minoloko notike ezáagi agapilamoki minilíki itiki ámina mikasi alitave loko lo molamó.

<sup>6</sup>\* Ómasímo láa loko lomíake, gakó makó láa loko limóma neve: Gagapilamoka keza mikasi makotoka gutá miníki gelekelé ikitiki miluma hoza aliki goselekaselé iki niko, kilisimasi 400 oko vinogo ive.

<sup>7</sup> Loko loake, Ómasímo gakó makó miní amike láa loko limó: Lá oko noviko, miluma hoza kiminita vejená nene goní hoza kiminogo uve. Lá okogo, gagapilamoka kimisilí milikíko, imane mikasiloka iki nugulizá ali otiki gupá zinimiki minanigave, loko lo amimó.

<sup>8</sup>\* Láa loko lo ameake, Avalahani izegipa agapilamolotini kugupeloka Ómasímini anosa minative loko lo hukotamó. Loko lomikago, Avalahá eza gipala Isakani getoake, gamena 8-a oko vokago, ámina anosa nene agupeló molotamó. Molomikago, Isaká minoloko noitike Zakoponi getamó. Lá okago alika Zakopó nene izegipala 12-a getamó nene lelí avotege zuha minamó.

\* 7:2: Apí 12:1    \* 7:4: Apí 11:31    \* 7:5: Apí 12:7, 15:18, 17:8    \* 7:6: Apí 15:13-14    \* 7:8: Apí 17:10-14, 21:2-4, 25:26; 29:31-35:18



9 \* Lá okago, avotege keza kugunáini Zosehekumú amekugú niake, aí nene Isimaeli vegeatoka salimi iki agupelotí meina alemó. Alikago, Izipi mikasiuka alímiki vikago, neneloka voko noigo, Ómasímo Zosehé noitoka minake,

10 \* miluma geleko mina netá ale ahulomiake nasahilí omikago, netá mukikumú gele vevesoko minokago, Izipi mikasigú agulizaki ve Palaó ángo lamaná oake, Izipi mikasiló itó aí numuni apá izegipa agunamotamola mukitoka gizapa ve napa minative loko alémo molamó.

11 \* Lá okago, noigo, Izipi mikasigú itó Kenan mikasigú mukí nene gaúna napa giliki minikago, avotege ámina iki nosánetakumú vitagá amó.

12 Minake Zakopó nene Izipi mikasiuka nosánetá neve liki lamó nene geleake, izegipala kimiselekago vamó.

13 \* Viake atiginá ikago, goha kimiselekago, goha vikago nene, Zosehé nezama noumó lae loko uvolaginí nene agoka kelepizekago Palaoki ámina gakó gilimó.

14 \* Lá okago, Zosehé eza amelaho Zakoponi itó izegipa agunamotamolagi alo loko Izipi mikasiuka alesa molokago, ve vená 75 nene vamó.

15 \* Zakopó voko Izipi mikasiuka minake hilimó. Helekago, izegipa agapilamola avotege keza ámina iki miniake hili asú ikago,

16 \* gonosiváini nene Sekeme apatoka aliki ake Hamoleni agapilamó zuhagutí gonosi apá Avalahá goí oko meina hizikú nene gale zikitamó.

17 \* Lá ikago, Ómasímo Avalahani gakó lo molotamó nene alévolé iti gamena alitokago, Zuta vege ná keza Izipi mikasiuka hizi hutilí amó.

18 Lá iki niago, Izipi mikasiuka agulizaki ve gosohá utó imó. Áisi nene Zoseheni mogona gelemimó.

19 \* Áisi nene avoteginimú lotoka hizike kelémo golesa galasa ike avotegini gipa getatamó nene hilitave loko leti ahuli ahuli ilo lokago, avotege ámina gipa koma leti ahuli ahuli iaká amó.

20 \* Nene zupa nene Moseni nene izolaho getamó. Agoka agepa lamanaki utó okago, Ómasímo ángo lamaná okago, amelahini numukú ali halakipalaki iki alinago, ikani losive makole golamó.

21 \* Alika nene apilikatave liki halá gitinago Palaoni moholámo ángoake, gipáneve loake alémo lá imó.

22 Lá okago, Palaoni vegejala zuhate Izipi gakó li ami ami ago, gele asú oake, oko moloko ike monó anoka like alévolé oko minamó.

23 \* Lá oko minake, kilisimasi 40 ale ahuloake, Isilae vege ná nigivénegini voko ángatove loko geleake, mulunagú lamaná geleko vimó.

24 Voko ángamó nene, Izipi ve makolimo nene Isilae ve makó napiligo ángoake, agive-lahini alémo vatí oko miluma gele minamó apasoko Izipi vema apele hilimó.

25 Neza nigivénegini nene Palaoni agizakutí ipá itane loko Ómasímo nelémo etó onoimóma neve liki gili guni itahe loko Izipi vema apilimóza, keza gili hee lamamó.

26 Akiake gó lago, goha nene vimó. Voko ángamó nene, Isilae ve losi nenetosa lova nihizesigo, ángoake alata moloketake ve loe lekeza gounama niasinazo, nanamú lova niasive.

27 Loko lo kemekago, lova apí oko agivelahini apili vemámo láa loko lo amimó: Éhao gelémo gugulizaki ve loló ogimikago gonitó lelémo molanogo nolane.

28 Lá okanike azozá Izipi ve makó apelenanimóma nenazo, itína ámina oko není nipilino go nolape, olo.

29 \* Loko lokago, Mosé nene geleake ahelele vizekago golisi oko Mitiana mikasiuka voko kugupeló ve minamó. Voko minake vená aleake, gipala losima getamó.

30 \* Minake, kilisimasi 40 goha ale ahuloake, vike mikasi gomopalaló Sinai agoka agisauka nene zamukutí loló guluma ikú ángamó nene Guivahanímo ageló loló oake lemeko utó o amekago,

31 Mosé ángoake, ininá oake nana netá utó noive loake, ángo hee hee linogo vo alitó noigo, Guivahanímimi anó lupa láa loko utó imó:

\* 7:9: Apí 37:11; 37:28; 39:2,21      \* 7:10: Apí 41:39-41      \* 7:11: Apí 42:1-2      \* 7:13: Apí 45:16      \* 7:14: Apí 45:9-10,17-18, 46:27      \* 7:15: Apí 46:1-7, 49:33      \* 7:16: Apí 23:2-20, 33:19, 50:7-13; Zos 24:32      \* 7:17: Gá 1:7-8  
\* 7:19: Gá 1:10-11,22      \* 7:20: Gá 2:2      \* 7:21: Gá 2:3-10      \* 7:23: Gá 2:11-15      \* 7:29: Gá 18:3-4      \* 7:30: Gá 3:1-10

<sup>32</sup> Neza avokage Avalahá Isaká Zakopó keí Ómasi minumó minoloko voko nominuve. Loko lokago, Mosé geleake, ininá oake luvoluvo zeko minake ahelele vizekago okenava oko ániagamimó.

<sup>33</sup> Lá oko noigo, Guivahanímo láa loko lo amimó: Mikasi nolisanimó nene lo hutokugo etó oko nei mikasi neve. Nenemú geí suú gololohá ozo.

<sup>34</sup> Vegenáne zuha Izipi mikasiuka niamó nene gopoguni milikitago, ive nama iki niago gelemo iteva iteva noumó mota asú okave. Itínasa nene gologí oketatove loko lemekuve. Nenemú geí nene Izipi mikasiuka nogimisuluze, vozo, loko lo amimó.

<sup>35</sup> Itó ámina ve nene éaho gelémo gugulizaki ve loló ogimikago lelémo gonitó molanogo noane liki ániagi ahula ve Moseni nene zamukutí Ómasímíni agelóma utó o amekago, Ómasímíno nene gizapa ve itó kugutó vizeaká ve minative loko amisilímó.

<sup>36</sup> \* Amiselekago, vike vegená kelémo vike Izipi mikasiuka itó age nagamí makó agulizá golohá nagamitoka, itó mikasi gomopalaló nene alévolé suni haitopaitolímíni ale utó moloko noigo, kilisimasi 40 oko vimó.

<sup>37</sup> \* Ámina ve Mosé eza Isilae vegená nene Ómasímíno likigivetikini holúikutí nene ezáa agepagutí gakó loaká ve makó nenikitana ve alémo etó oleketanogo ive, loko lo kimimó.

<sup>38</sup> \* Itó avotege keza Ómasímíni monokumule liki mikasi gomopalaló alegesá iki niago, Sinai agokaloka Ómasímíni ageló itó agivelagíni holúikú minake loloko vogá ogá ve minake, alévolé lemetamenímíni gakó lehizeletatove loko Ómasilokatí alimó.

<sup>39</sup> Alekago, avotege keza Moseni gakola gili ahuliake, aí nene vasá ziake Izipi mikasiuka atiginá iki vinígi kígika neneloka minokago,

<sup>40</sup> \* Moseni uvolaho Alonani nene láa liki li amemó: Geza avevezaha netá makó loló olimikako ámina netalímó ale goí iko leza atiginá oko Izipi mikasiuka vitune. Mosé nene Izipi mikasiugutí lelémo a ve eza voko gopa ihe itó hela hízíhe leza gelemunize. Liki liake,

<sup>41</sup> \* nene zupahé pulumaká akalevámíni vogunahana avevezaha netá lílí iake, guguní gizi amiki kiziganitunú lílí a netakumú kogoliza viziki minamó.

<sup>42</sup> \* Lá ikago Ómasímíno viselekímikago, kígika gopa okago, okulumatoka hanatoaká netá mukí golíva gílikí agepoka liki minamó. Nene sunimú Ómasímíno lí gakó nene ezáa agepagutí gakó loaká ve makolímó láa loko luhuva gizonóimóma neve:

Isilae vegená lekeza mikasi gomopalaló minake

kilisimasi 40 oko novigo gaha nama kipilíki guguní giziaká amóza, neni makó gizi nimísá amamóma neve.

<sup>43</sup> Lekeza soza ómasilíni agulizá Molokoni seli numuni komagú lílí i miliake

itó makó nene Lapanani sonohikitana makó lílí i miliake, ámina netalímíni vogunahana golíva geleko agepoka litune liki soza ómai netá lílí inamó nenazo,

nénisi lokugo, Papelonia apá hotoka líkilímiki vinigave, loko luhuva gizonóimóma neve.

<sup>44</sup> \* Mikasi gomopalaló nene Ómasímíno Moseni nene monó numuni lá oko gitane loko litokó gekago avotegitoka minamó nene seli numunigó minamó.

<sup>45</sup> \* Lá okago, ámina seli numuni nene omolelé amalelé iki alíki tiva tiva niago, Ómasímíno ale goí ike numuká ve kimisilikago, nivago, avotege nene iki ámina mikasi aliake ámina seli numuni nene Zosuagegi alíki amó. Lá iki ámina numuni alilíki viva viva iki niago, agulizaki ve Tevití utó imó.

<sup>46</sup> \* Ómasímíno Tevitíni ániagamó lamaná okago, Tevití nene monó numuni nene avolaho Zakoponi Ómasi getatove loko loká imóza,

<sup>47</sup> \* Ómasímíno géneka loake gipaka Salomó genetative loko gele amekago eza Ómasímíni numuni getamó.

<sup>48</sup> Lá imóza, okulumakú ve napa nene vegenalite ge numukú nene minoko aleko osá amive. Nenémíni gakola Ómasímíni agepagutí gakó loaká ve makolímó láa loko luhuva gizamóma neve:

<sup>49</sup> \* Guivahanímo láa loko nolive:

Okulumá nene neni numuni apá neve.

Itó mikasiuka nene nigisa liso minuke gizapa oaká nouve. Lá oaká nounazo, numuni nanámíniki ginímíkiko etative.

\* 7:36: Gá 7:3, 14:21; Nam 14:33 \* 7:37: Gapo 8:15,18 \* 7:38: Gá 19:1-20:17; Gapo 5:1-33 \* 7:40: Gá 32:1

\* 7:41: Gá 32:2-6 \* 7:42: Emo 5:25-27 \* 7:44: Gá 25:9,40 \* 7:45: Zos 3:14-17 \* 7:46: 2 Sam 7:1-16; 1 Iki

17:1-14 \* 7:47: 1 Kug 6:1-38 \* 7:49: Isa 66:1-2

Itó hí holomaló navasú vizeko minatove.

<sup>50</sup> Neza nigizanitunú okulumakí mikasígi netá mukí kelémo utó okumóma neve, loko luhuva gizamóma neve.

<sup>51</sup> \* Gínikaha golesa lekeza likígika lakagata koló amimó neneta, nénisi negopa, lekelisi nene avotike iki miliki amómáminiki niminake, Ómasímíni Sikalahú nene lova ali amiaká niave.

<sup>52</sup> Avotike Ómasímíni agepagutí gako liaká a ve gopoguni milikitamiki asenini zikitamó nehe. Ma nomive. Mosé itó ve heeváa utó itive liki gako li miliki la ve lugáagi nene kipili asú ikago, minoko lekelisi ámina ve heeváa nene utó okago amimí iki alímiki viake apilikago hilimóma neve.

<sup>53</sup> Ómasímíni ageló nenete Ómasímo lo huka gako ma Moseni amemó nene lekelitoka anitekamóza, lekelisi ámina gako aliake gizapa iki gili alísá amave.

*Setepanoni gehanitunú apilikago hilimó*

<sup>54</sup> Setepanó láa loko lo kemekago, giliake, mulúikú golesa okago, kizapaló golesa molamóza,

<sup>55</sup> Setepanó nene Ómasímíni Sikalahulímo lemeko agikagú mino vaí okago, áni go okulumakuka moloake, Ómasímíni lapaná nego itó Izesú eza Ómasímíni amatoka noigo áni goake láa loko limó:

<sup>56</sup> Neza okulumá koló okago áni gumó nene Ómasilokatí limi ve gihila Ómasímíni amatoka noigo áni gokuve.

<sup>57</sup> Loko lokago, keza kagataló hitinake valala ziki hitimiake viki anukemó.

<sup>58</sup> Anukiake ahelukulú iliki vake alími númaseloka miliake gehanitunú apilinigi goláa vizakiake, gosohá ve makó agulizá Sauloni agisauka milamó.

<sup>59</sup> Lá iake Setepanoni nene gehanitunú napelego, hilinogo noike Ómasiloka nolike Guivahani Izesúnegamaka, neni sikalahú alezo.

<sup>60</sup> Loko loake, alapusa hizeake sele loko limó: Guivahani geza imane lihimáini ahuloke-tozo. Loko loake, hilimó. Apili hilikago, Sauló nene mulunaú lamaná gilimó.

## 8

*Sauló monó gele vejená gopoguni moloketamó*

<sup>1-2</sup> Setepanoni apili hilikago, monó ve lugáa keza Setepanoni ive nama goha itiki gale zitamó. Ámina zupa nene Zelusale numutoka monó gele vejená apí iki gopoguni napa milikitamó. Milikimikago hutilí iki nivake Zutaia mikasiuka itó Samalia mikasiuka vi asú ikago, aposoloma kezáikó Zelusalega minamó.

<sup>3</sup> \* Lá niago, Sauló nene monó gele vejená lova ale kimike numúikú iteká lemeká noike ve vená gelelehá oloko leme leme ike nagá numukú ahuloketomo vimó.

*Samalia mikasiuka monó gako li kimimi vamó*

<sup>4</sup> Lá noigo, hutilí i va vejenámate Ómasímíni gako li kimi kimi iki mihina iki minamó.

<sup>5</sup> Minake, Pilipó nene Samalia apalímíni taoni napaló lomoko anitike Ómasímo gologí oletative loko lo mololeta ve Izesuní gako lo keme keme oko minamó.

<sup>6</sup> Lo kemekago, vejená mukilite Pilipó lo kimi gako gili hamó iki amegesaló miliake, Pilipó alévolé suni haitopaitólimini loló igo áni gamó.

<sup>7</sup> Lá noike vejenalitiní kigikagú holosi golesa minamoláa kepeleko kimisele ahulokago, gopaga liki vamó. Itó gepili napili itó genisi vejená mukí kelémo zokamó.

<sup>8</sup> Lá okago ámina apakú vejená keza kogoliza vizemó.

<sup>9</sup> Lá niago, ámina taoniló ve makó minamó, agulizá Saimon. Áisi gamena hána soza saza lusa geko minake, neza nugulizakí ve nouve like Samalia vejená mukí kogoka vizeaká imó.

<sup>10</sup> Lá noigo, iti minamó limi minamó keza gelemó lamaná okago, aikumú nene Ómasímo zámua amekago, netá matá loló okago gihila zeaká noive liki liaká amó.

<sup>11</sup> Lá iake, gamena hána ai avevezaha netakumú sigaga limiake, ai gako gili aliake aitoka viki gímizemó.

<sup>12</sup> Lá iki niago, Pilipó eza Ómasímíni gasovaló minoakalímíni gako lamaná itó Izesu Kilistoni gakola lo kemekago, gili alévolé iake, ve vená mukí nene monó nagamí hilamó.

<sup>13</sup> Lá ikago, Saimon eza ámina oko monó gele alévolé oake nagamí holoake Pilipotoka voko gímizekago, Pilipó golivagi netá haitopaitó ale utó okago, áni goake sigaga sagaga loko minamó.

<sup>14</sup> Itó aposolomate Samalia vegeanalite Ómasímini gako gili alemo nene gilikago, Zelusale-gati nene Pitaki Zoniki áminaloka kimisilikago vasimó.

<sup>15-16</sup> Neneloka anitikasike ángasimó nene Izesuni agulizatoko monó nagamí hilinamóza, Ómasímini Sikalahú nene monó nagamí hila vegeatoka limitive liki Ómasiloka linamamó nenazo, Sikalahú nene keitoka velesá lememigo hanuva niago ángasimó.

<sup>17</sup> Lá okago, aposolo keza gotóitó kigizani milikasigo, Sikalahú nene keitoka limimó.

<sup>18</sup> Lá okago, Saimon nene ángoake, keitoka moni alitáihe loko aleko vike,

<sup>19</sup> ve makolímíni gotolaló nigizani molokugo Sikalahú limitive liki zamuza lekelitoka nekoma makó nimilizo.

<sup>20</sup> Loko lo kemekago, Pitá láa loko lo amimó: Ómasímini zamuza hanuva lemeaká netá nemóza géisi monitonú meina hizitove loko nolape. Nenemú geza monikagi voko lokú latila inogo ane.

<sup>21</sup> Ómasímo geí gigika ángamó nene monó nominazo, monó hoza nalusimó nene aleminogo ane.

<sup>22</sup> Golesa netaka ale ahulokoko gigika ale viligoko Guivahanímo gigikatunú netá golesa alitove loko nogeleni netá ahulogetative loko amuza moloko aitoka lozo.

<sup>23</sup> Gigikagú golesa netá ekosalagi minoake gelémo golesa okago gelekuve.

<sup>24</sup> Loko lokago, Saimon nene nenikumule liki nilasi netá nenitoka utó amitive liki Ómasiloka lilizo, loko lo kimimó.

<sup>25</sup> Aposolo nenetosa Guivahanímini gako liki Guivahani oko moloko i gako li kimikasike, Zelusalega atiginá iki nivasike Samalia apá mukitoka nene gako lamaná li kimi kimi iki mihina asimó.

*Pilipoko Etiopia mikasigutí agulizaki vego*

<sup>26</sup> Lá niasigo, Guivahanímini ageló makolímó Piliponi láa loko lo amimó: Geza Zelusale numutoka ahulokoko ezega agilikaloka Gaza apatoka lomo noi gapoló mikasi gomopalaloka nene lomoko vozo.

<sup>27</sup> Loko lo amekago, Pilipó nene oteake lomoko vimó. Novigo, Etiopia mikasigutí agulizaki ve makó minamó. Eza Etiopia vegeanalitini agulizaki vená napa Kataké ave liki liaká a vená nene gelekelé otoko minake aí moniló gizapa otoko minoaká imó. Eza Zelusalega Ómasímini monó linogo iteake,

<sup>28</sup> atiginá oko nolimike hosi izate gelelehá iaká a kaligú iteake novike, Ómasímini agepagutí gako loaká ve Isaiá luhuva giza gako nagatago,

<sup>29</sup> Sikalahulímó Piliponi nene voko kali volane vo agupeló vozo.

<sup>30</sup> Loko lokago, Pilipó nene ololu loko áminaloka vimó. Vike Isaiá giza gako nagatago geleake loká otake gako nagatanimómámini mognáa gelenape.

<sup>31</sup> Loko lokago, ve makolímó lo utó oko lo nememitimó nene, mognáa nana oko gilitove. Loko loake, imanegú iteko minoko lo nimitane loko Piliponi lo amekago, kaligú itekago, makó minasimó.

<sup>32</sup> \* Lá niasigo monó gotolagutí gata gako lá oko minamó:

Sipsip iza kipilínigi alilíki nivago zohenené lisá amave.

Sipsip izatini zopova nihukago gopaga lisá amave.

Ezagi ámináminoko géneka loko gopaga lamive.

<sup>33</sup> Míluma netá alimiake avozagi netá lílí imiake

aí lihima nomitó hanuvamú goní hoza amemole.

Mikasigú minoko aleko i gamena nene hukitamó nenazo,

oko moloko noigo ángi mina vegeanalitini lihimáini nene ve makolímó gato asú aminogo ive.

<sup>34</sup> Loko mina gako nene gatoake, agulizaki vemámo Piliponi láa loko loká otamó: Geza lo nemezo, gilitoze. Ómasímini agepagutí gako loaká vemámo éahikumú nolive. Ezámú nolihé itó ve makokumú nolive.

<sup>35</sup> Loko lokago, Pilipó nene ámina monó gotolaú gako apí oko loloko vike Izesuni monó gako nene miní ameko lo utó oko lo amimó.

<sup>36-37</sup> Lá ikasike viki nagamitó anitesimó. Anitikasike agulizaki vemámo láa loko limó: Ángozo. Nagamí imane nenazo, hize lí ogetati netá nomikoma monó nagamí holonetatane loko noluve.

<sup>38</sup> Loko loake, hosi izama pasimozo lokago, pasimikasike, Pilipoki agulizaki vegi keza nagamikú lemesimó. Lemesike Pilipó nene nagamí holotamó.

\* 8:32: Isa 53:7-8

<sup>39</sup> Lá ikasike nagamikutí itesimó. Itikasigo, Guivahanímini Sikalahú nenémo Piliponi alémoko vokago, agulizaki vemámo goha aí ángamimóza, gapoló novike agoliza vizítimo Pilipó legesó ikumú nene miluma gelemimó.

<sup>40</sup> Itó Pilipó nene galinali Azoto numutoka nouve loko geleake, monó gakó nene numutó namató lo keme keme oko vike Sisalia numutoka anitimó.

## 9

### *Sauló agika ale viligamó*

(Apo 22:1-16; 26:12-18)

<sup>1</sup> Lá noigo, Sauló eza Guivahanímini vejenala zuha kipilinogo lovaga lo kimike guguni giziaká a vetini ve napa noitoka vike láa loko lo amimó:

<sup>2</sup> Izesú vi gapoló amegesaló miliki vina vejená vehe venape nániginake kalapusi kemeko kelémo-loko Zelusale numutoka atove loko luhuva netá gizokoko nemekako nene aleko vinake Tamasiko numutoka monó numukú gizapa vejená kimitove loko noluve.

<sup>3</sup> Loko lokago, luhuva netá gizokoko amekago, aleko Tamasiko numutoka vimó. Voko ámina apá ale alitokago, okulumakutí lapaná galinali aitoka limike hízekago,

<sup>4</sup> mikasigú pou loko akoake gakó makó lá oko gilimó: Saulo, Saulo, nanamú gopoguni nomolonetane.

<sup>5</sup> Loko lokago, eza Guivahani geza éagama nolane loko lokago, eza lo amike limó: Gopoguni molonimiaká noani ve neza Izesunama noluve.

<sup>6</sup> Otezo, taoni napagú itekako, netá matá loló itanimó nenémini gakola li giminigi aze, oteoko aló tovozo.

<sup>7</sup> Loko lokago, Sauloki makó va vejenalite vejenaláa agupeló ángamamóza, gakola ligo anoláagó giliake kegepa gahava nomigo minamó.

<sup>8</sup> Lá okago, Sauló eza oteake ángamó agómula mota golesa okago, netá matá ángamimó. Lá oko ángamigo, vejenala zuhate agizató aliki alími Tamasiko numutoka vamó.

<sup>9</sup> Lá ikago, neneloka gamena losive makole nene agómula pulusamigo nosánetaki nagamiki namike, hanuva ako minamó.

<sup>10</sup> Lá okago, Tamasiko numutoka nene Izesuni gelekelé veva makó minamó, agulizá Ananiá. Guivahanímo vamotoka sele lokago, eza Guivahanínemaka, imane nouve lokago,

<sup>11</sup> Guivahanímo miní ameko láa loko lo amimó: Geza otekoko gapo makó agulizá hee lo mina gapoló voko Zutani numukú iteko Taliso numutotí ve makó agulizá Sauló loko noi vemú nene vitagá oko ángozo. Eza Ómasiloka agepoka loko noive.

<sup>12</sup> Áisi nene vamokitana netá lá oko ángokave. Ve makó agulizá Ananiá ave loko noi vémo numunagú iteake goha agómula goloutative loko agizani nene gotolaló moloko Ómasiloka noligo ángoake Ómasiloka nolive.

<sup>13</sup> Loko lo amekago, Ananiá láa loko limó: Guivahanínemaka, ámina vemú gakola aveté iaká niago gelenou vemú nolaninae. Áisi nene Zelusale numutoka vejenaka zuhama kelémo golesa palasa oaká noive.

<sup>14</sup> Itó imaneloka guguni giziaká a ve napa nenete geí gugulizá alina vejená nene nagá zeko kelémoko Zelusalega nagá numukú ahuloketative líki lítina vema nena.

<sup>15</sup> Loko lokago, Guivahanímo láa loko lamoko hanuva vozo loko limó. Ámina ve nenémo nigizani luhuva nene hetoka vejenaki kugulizaki ve napagi Isilae vejenaki keitoka lole ale oko minative loko alémo etó okuve.

<sup>16</sup> Lá noiko nénisi nene nugulizakumule loko miluma netalímini amupiló iteko minative loko alapizinogo uve.

<sup>17</sup> Loko lo amekago, Ananiá nene vike Zutani numunagú vo aniteake numukú itike Sauloni ángoake agizani nene gotolaló moloake Sauló nigivénege, gapoló noako Guivahani Izesú utó o gimi vemámo goha gogómula goloutokiko Ómasímini Sikalahú nene lemeko gigikagú mino vai itive loko nimiselekago nouve.

<sup>18</sup> Loko noli agepagi galavizakitana netá nene agómulagutí alemó zekago, agómula goloutokago oteake monó nagamí holamó.

<sup>19</sup> Holokago, nosánetá noake amuza goha molamó.

### *Sauló Tamasiko apatoka monó gakó lo kimimó*

Lá oake, Sauló nene Izesuni vejenala zuhagi gamena lagasó Tamasiko numutoka nominake,

<sup>20</sup> litá oko Zuta vetini monó numukú iteko Izesuni gakola like Izesú nene lamaná Ómasímini gipala noive.

<sup>21</sup> Loko lo kemekago, ámina gakó gele vejená mukilite láa líki lamó: Zelusale numutoka ámina agulizá noli ve amegesaló mila vejená kelémo golesa galasa i vema nehe. Áisi ámina

oko imaneloka nagá kemeko kelémo-loko Zelusale numutoka guguni giziaká a ve napa niatoka vinogo noamóma neve. Nana oake ale noviligave.

<sup>22</sup> Liki kagata losi nigeleke lamóza, Sauló nene amuza moloko vova vova oko minake Izesú nene gologi oletative loko lo mololeta vema noive loko Tamasiko numutoka Zuta ve minamoláa ale guni oko lo kemekago, kegepa gahava nomigo minamó.

*Apilínigi niago Sauló golisi vimó*

<sup>23-24</sup>\* Lá iake Zuta vete Sauloni apili hilingi li hukiake, únaká neteká numuni gatetó nene gohoni gohoni nimilago, Sauló nene gakó geleake lokago,  
<sup>25</sup> vejenala zuhate nene holugú gosúveha makó aliake lohusi iake áminagú Sauloni ahulimiae geisa hetoka ahelú i ahulikago, lemeake mikasi makotoka golisi vimó.

*Sauló Zelusalega anitimó*

<sup>26</sup> Alike Sauló vike Zelusalega aniteake Izesuni vejenala zuhaloka miní amitove lokago, Izesuni izegipala loló imó nene gili guni amake aikumú kehelele vizimó.

<sup>27</sup> Lá okago, Panapasí nene ale gímizeake alémo-loko aposolo niatoka vike Sauló nene gapoló Guivahani ánga gakó itó Guivahanimo lo ami gakó itó Tamasiko numutoka Izesuni gakola ale akutoko lo kimi gakó nene avetó oko lo kemekago, giliake

<sup>28</sup> kezagi Zelusale numutoka miniki aliki amó.

<sup>29</sup> Lá ake, Sauló eza Izesuni gakola nene alegesá legemigo vejená lo kemeaká imó. Lá oake, ezagi Zuta ve lugáa Kiliki gakokutí liaká a vejenaki monó ligili hagili ake pelevesa ziake ámina ve nenete Sauloni apele hilitune likago,

<sup>30</sup> agive keza giliake, alímiki Sisalia apatoka limiki ahulimikago, eza vike ezáa gotó apatoka Taliso numutoka anitimó.

<sup>31</sup> Lá okago, monó gele vejená Zutaia itó Galilaia itó Samalia mikasiuka minamoláaloka nene nonagá iki minamó. Hulu utó okago minake, Ómasimo zámuza kemekago, gakola gili aliaké, némini manámini amake Ómasimini Sikalahulimo hize lé okimikago, hizi hutilí iki minamó.

*Pitá Aeniasini alémo zokamó.*

<sup>32</sup> Pitá nene Izesuni vejenala zuha ániganogo mohona oko vike, Lita numutoka lomo voko anitimó.

<sup>33</sup> Aniteake, neneloka ve makó ánigamó, agulizá Aeniasí. Áisi ve gepili loake, holomaló akonoigo, kilisimasi 8-ía oko vimó.

<sup>34</sup> Lá okago, Pitá láa loko lo amimó: Aeniasizo, Izesu Kilistó gelémo nozokaze, oteoko, avilisaka gakezo. Loko li agepagi oteake avilisalagi gakeko aleko vimó.

<sup>35</sup> Lá okago, Lita numutoka itó Salona numutoka nia vejená mukilite ángiaki kigika ali viligiaki, Guivahaniloka viki gímizemó.

*Tolokasini heleneikutí alémo otimó*

<sup>36</sup> Lá ikago, Zopa numutoka Izesuni vejenala zuhagutí vená makó minamó, agulizá Tapitá, itó Kiliki gakokutí nene agulizá Tolokasí. Eza netá gihila mukí loló ike vejená ámemena ámamana nasahilí oketoko minamó.

<sup>37</sup> Lá oake, nene gamenaló netá makó avisekago hilimó. Helekago, gonosiváa nene nagamí ziake, aliki itiki numuni amupiló makó ginakú nene ahulamó.

<sup>38</sup> Lá amó nene Lita numuni nene Zopa numutotí alitó nego, Izesuni vejenala zuha keza Pitáma Litaga noive lamó giliake, ve lositá kimisilikago, áminaloka vasingó. Vasike Pitani nene voká liki gezagi litá oko lelí numutoka vitune loko nolusive.

<sup>39</sup> Liki li amikasigo, Pitagegi makó vamó. Viki gonosima milinakú nene alímiki itemó. Iteko ángamó nene, getokó getokó ali nupa iake ive nama ake, Tolokasí nene agómulagi minake gó haitopaitolimíni akotoketamó nene alapizi asú amó.

<sup>40</sup> Lá amóza, Pitá nene kimisele hetoka oake alapusa hizike Ómasiloka limó. Numuna lo asú oake, gonosima agovisa o amike Tapitazo, geza otemane. Loko lokago, agómula goloutoake, Pitani ángoake, ote minamó.

<sup>41</sup> Noigo, Pitá nene agizakú aleko alémo otimó. Lá oake, vená getoki Izesunimú gili alévolé a vejená lugáagi sele lo kemekago, itiki ánigamó nene heleneikutí oteake noigo ánigamó.

<sup>42</sup> Lá ikago, nenémini gakola nene Zopa numutoka hutilí oko vokago, mukí vejenalite Guivahanimú gili alévolé amó.

<sup>43</sup> Lá ikago, Pitá nene ve makó pulumaká iza galupava ale lamanatamaná oaká i ve Saimoni numukú voko minamó.

\* 9:23-24: 2 Koli 11:32-33

## 10

*Pitako Koneliasiko*

<sup>1</sup> Sisalia numutoka ami vetini gizapa ve makó minamó, agulizá Koneliasí. Eza Italia mikasigutí ami ve 100 keí gizapa véini minamó.

<sup>2</sup> Eza Ómasimú alévolé oko geleko minoaká i ve monó gizapa ve minake, izegipa agunalagi Ómasi geké litiki minake, Zuta ve ámemena hize lé oketoko minake, Ómasiloka gamena gamena loko minamó.

<sup>3</sup> Koneliasí eza nenéminoko minokago, gamena makó zupa nene ho ale zohota noigo, Ómasímíni ageló makolímó vamotoka agulizá oko sele noligo, eza ánigo hee loko ánigamó.

<sup>4</sup> Gisili hizeko ánigoake, ininá oake Guivahanínemaka, nana ive loko lokago, áisi lo amike limó: Ómasiloka loaká ani netá itó ámemena hize lé okimiaká ani netáma Ómasiloka itekago gele lamaná okave.

<sup>5</sup> Nenemú geza ve makó kimiselekako Zopaga viki ve makó Saimon agulizá gosohá nene Pitani alímiki atave.

<sup>6</sup> Aí apolaho iza galupava ale lamanatamaná oaká véini numuni age nagamí gaheval-oka nekú noimóma alímiki atave.

<sup>7</sup> Loko agelolímó lo ameake vokago, gelekelé izegipala losi itó ami vegutí nasahilí otoko mina ve Ómasimú alévolé oko geleko minoaká i ve nene sele loake,

<sup>8</sup> gakó akó lo kemeake kimiselekago, Zopa numutoka vamó.

<sup>9</sup> Akiake gó lokago, vake apáma ali alitanigi ago, holisaká Pitá nene numuni amupiló ginakú iteko Ómasiloka loake,

<sup>10</sup> gaúna olokago, avonana vizekago akonoike nosánetakumú lokago, vatá iki ali vatí nitago, agómula molatohe loko noike netá makó lá oko ánigamó.

<sup>11</sup> Okulumá koló okago, netá makó lavlavo gizopa napa lohusi oake nagá alehá nene mikasigú ahelú okago nolimigo ánigamó.

<sup>12</sup> Áminámíni agikagú nene gaha nama iza gala haitopaitolímíni Zuta veganalite namó namamó gopánapa netá nego ánigamó.

<sup>13</sup> Lá okago, áminagutí nene gakó makó láa loko utó imó: Pitazo, litá oko kepeleko namane.

<sup>14</sup> Loko lokago, Pitá limó: Guivahanínemaka, lá oko nomive. Neza mosehá netá ligika ale golotuva loaká netá nene gopa nosá amuve.

<sup>15</sup> Loko lokago, anotó aleko láa loko limó: Ómasímó loko nagamí zenei netá nene géisi ma moseminogo ane.

<sup>16</sup> Loko lokago, ámina gakó nene gamena losive makole likasigo, litá oko lohuvagi gelelehá oko okulumakú iteko vimó.

<sup>17</sup> Lá okago, Pitá nene nogómula molatohe loko nouke vamó itína ániguhe loko giligo gena imó. Lá okago, noigo, Koneliasí kimisili ve keza Saimoni numunimú lokatoká iki vake, ali utó iake, gateté minake,

<sup>18</sup> sele liki lamó: Saimon agulizá gosohá Pitá loko ne vema imane numukú noihe.

<sup>19</sup> Liki loká niago, Pitá eza vamotoka gosohá netá ánigamó nene agata geleva geleva oko noigo, Sikalahulímó láa loko lo amimó: Ve losive makolette geikumú vitagá niave.

<sup>20</sup> Nénisi kimiselekugo niaze, geza lemeko Zuta ve niagopa hetoka ve niakumú gagata losi gelemoko kezagi makó vilo.

<sup>21</sup> Loko lokago, Pitá ve niatoka lemeake nenikumú vitagá nitamó nene imane nouze, nanamú niave.

<sup>22</sup> Loko lokago, ve keza láa liki li amemó: Ami ve 100 keí gizapa ve Koneliasí áisi agika lamanaki ve Ómasimú alévolé oko geleko minoaká i ve nene Zuta veganá mukilite ánigi lamaná nia ve noihe. Ómasímíni ageló makolímó gakó makó lo amekago eza limiselekago, géi gelémoko ai numutoka vokuko, gegepagutí gakó lo lemekako gilítune loko noune.

<sup>23</sup> Liki likago, Pitá nene kelémo numunagú molokago akamó.

Akiake gó lago, Pitá nene Zopa numutokatí agivegi makó vamó.

<sup>24</sup> Viki gapoló akiake, gó lokago goha viki Sisalia numutoka anitiake, Koneliasí nene veganala zuhagi zovovagi kelémo nupa oake kegeva iki niago, ánigamó.

<sup>25</sup> Lá iake, Pitá nene numunagú itimó. Itekago, Koneliasí ake agisauka agihúna geake gupá zeko gekévaké lotamó.

<sup>26</sup> Lá omikago, Pitá alémo oteake lá amoko otezo, neza nene veganáma nouve.

<sup>27</sup> Loko lo amekago, ligili hagili ikasike, veganá mukí alegesá iki mina numukú itesike

<sup>28</sup> Pitá nene láa loko lo kimimó: Lekeza Zuta ve lelí mogona mota gilinave. Lezagi Zuta veganá niamamolagi nonagá oko apizeko minamitune liki li hukinámoma nemóza, veganá makokumú móina ve loko loketamo loko Ómasímó mogona nelepizeko lo nemekago gelekuve.

<sup>29</sup> Nenemú lekeza nenikumú sele-sele likago, gena amuke okuve. Itína sele lamó nenémini mogonáa likiko gilitove.

<sup>30</sup> Loko lokago, Koneliasí lo amike limó: Neza sene ho ale zohota noigo, Ómasiloka noluke ángumó nene, ve makó ginegane agovisámo lapetapé oko minamó nenémo nenitoka omo anitekago, ánguive.

<sup>31</sup> Nánigugo láa loko lo nimive: Koneliasizo, Ómasiloka lanimó itó vejená ámemena hize lé oketanike noanimó nene Ómasímo mota gele lamaná okave.

<sup>32</sup> Nenemú geza vejená kimiselekako, Zopa numutoka viki Saimon agulizá gosohá Pitani alímikatave. Aisi nene apolahini numukú pulumaká iza galupava ale lamanatamaná oaká vémini numukú age nagamí gahevaloka noinogo ive.

<sup>33</sup> Loko lo nemekago, nenemú litá oko kimiselekago, geitoka vikago geza gakóne gelekanike okako mulúnegú lamaná gelekuve. Itínasa nene Guivahanímo logeta gakó nene lokako gilitune loko Ómasímíni avogisalo alesesá oko imane noune.

*Pitá Koneliasini numukú monó lo kimimó*

<sup>34</sup>\* Loko lo amekago, Pitá láa loko limó: Ómasímo mukí vejená lelí lugupelokamú giligo iteká lemeká osá amive. Nene mota gelenouve.

<sup>35</sup> Numutó namató vejenalite Ómasímú goliva giliki etati netá aliki minata vejená mukikumú giligo hamó lelegitokó neve.

<sup>36</sup> Isilae vejenatoka gakó lamaná amisilimó nene lekeza mota gilinaive. Izesu Kilistó eza vejená mukilitini Guivahani noi vemú gelekuko ligikagú hulu iti gakó nene,

<sup>37</sup> Zoní apí oko monó nagamí hilatave loko lo utó oko lo kemekago, Zutaia mikasiloka li hutilí amóma neve.

<sup>38</sup> Itó Ómasímo eza Sikalahula amiselekago, Nasaleta numutotí ve Izesuni amatoka minake zámua amekago, Ómasímo alémo vatí igo, Izesú nene mohona mohona ike hoza gihila alike Satá kelémo golesa galasa oko minoaká i vejená kelémo lamanatamaná oko mina gakó nene lekeza mota gilinaive.

<sup>39</sup> Itó Zuta ve lelí mikasiukagi itó Zelusale numutokagi oko moloko ike alimó nene ángoko gelekune. Lá onouko, zohota zaló apilikago hilimóza,

<sup>40</sup> heleake noigo, gamena losive makole oko vokago, Ómasímo galegutí goha alémo otimó. Alémo oteake alémo utó molake lelepizigo, ángonouháma neve.

<sup>41</sup> Mukí vejenalite Izesuni ángamamóza, heleneikutí oteake ezagi apiziki gítigiki niki miniaká a vejená Ómasímo lelémo etó i vejenaláagó leza ángonouháma neve.

<sup>42</sup> Itó Ómasímo lo molató gipala Izesú nene logómulagi vejenaki hele vejenaki gona mololetati ve loló i gakó nene vejená li utó iki li kimitave loko Ómasímo loletonimóma neve.

<sup>43</sup> Ómasímíni agepagutí gakó liaká a ve mukilite ámina vémini gakoláa luhuva gizinamó nene lá oko neve: Aikumú gili alévolé ita vejená nene Ómasímo Izesukumule loko lihimáini ahuloketanogo ive, loko limó.

*Ómasímíni Sikalahú hetoka vejenató limimó*

<sup>44</sup> Pitá láa loko noli agepagi giliki mina vejenatoka Ómasímíni Sikalahú limimó.

<sup>45</sup> Lá oko limimó nene Ómasímo Sikalahú nene hetoka vejenatokagi lehizekimikago, <sup>46</sup> haitopaitó konokutí liki Ómasi agepoka nilago, giliake Zuta vejenakutí Izesukumú gili alévolé a ve Pitakí makó a vete sigaga likitamó. Lá ikago, Pitá láa loko lo kimimó:

<sup>47</sup> Goí oko lelitoka Sikalahú limimó ámina oko imane hetoka vejenatoka lemekave. Nenemú monó nagamí holoketamítunimó nene etaminogo ive.

<sup>48</sup> Loko loake, lo kemekago, Izesu Kilistoni agulizató kilími milake monó nagamí hilikitamó. Hilikimiake, Pitá nene gamena luguhá kezagi minoko aleko itive liki likago, makó minamó.

## 11

*Pitá Zelusale numutoka gakó aveté oko lo kimimó*

<sup>1</sup> Lá okago, hetoka vejenalite Ómasímíni gakotó miní ame gakó nene puu loko vokago, aposolo lugáagi kigive Zutaia mikasiuka minamoláagi keza gelemó.

<sup>2</sup> Nenemú Pitá nene Zelusalega atiginá oko tovokago, Zuta vejenakutí Izesuni nagá minamoláate aikumú gelemó gena okago, gahá nameke,

<sup>3</sup> láa liki li amemó: Geza nanamú Ómasímíni anosa kugupeloka minami vejenatoka voko kigizakutí nosá noaká noane.

\* 10:34: Gapo 10:17



<sup>4</sup> Liki likago, Pitá nene Koneliasitoka utó i gako nene mogonagutí apí oko ale mesamá oko lo kimike limó:

<sup>5</sup> Goí oko neza Zopa numutoka Ómasiloka loko nougo, novonana vizekago, vamó netakutí lá oko ánimómó: Netá makó lavolavo napagitana nene lohuvagi nekisaloka nagá aliake okulumakutí ahelú ikago lemeko nenitoka anitimó.

<sup>6</sup> Anitekago, áni go gisili hizeko ánimómó nene, agikagú gaha nama iza gala haitopaitolímini agisa agizani nemó nomimó nego ánimómó.

<sup>7</sup> Lá okago, nenitoka gako láa loko anitimó: Pitazo, otekoko kepeleko nozo.

<sup>8</sup> Loko lokago, neza láa loko lumó: Guivahanínemaka lá oko nomive. Neza ligika ale golotuva loaká netá nene gopa nosá amuve.

<sup>9</sup> Loko lokugo, okulumakutí Ómasímo gako makó miní ameko láa loko limó: Ómasímo loko nagamí zenei netá nene géisi ma moseminogo ane.

<sup>10</sup> Loko gamena losive makole nene ámina gako lokusigo, gelelehá oko okulumakú iteko vimó.

<sup>11</sup> Ma gilinagalo. Ámina netá asú noigo, áminasító Sisalia numutokatí ve losive makole lélisi nouhatoka alesa iki anitemó.

<sup>12</sup> Anitikago, Sikalahulímo láa loko lo nimimó: Geza ámina vegi hetoka ve niakumule loko makó vinogoma gena givisemino. Loko lokago, kigive 6-a kezagi vunike ámina ve kimisili vémini numukú itekuko,

<sup>13</sup> gakola láa loko lo limimó: Není numukú agelolímo iteko utó oake geza ve makó kimiselekako Zopa numutoka viki Saimon agulizá makó Pitá ave loko noi ve alímiki ikiko,

<sup>14</sup> gezagi izegipa gugunamotamoki Ómasímo lukugutó viziti gako lo lekemekiko, lamaná inigave, loko lo nimimó.

<sup>15</sup> Nene gako lo nemekago, monó nene apí oko lo nokumugo, Ómasímini Sikalahú goí oko lelitoka limimómáminoko keitoka limimó.

<sup>16</sup> \* Lemekago, áni gouke, Guivahanímo Zoní nene hanuva nagamí hololeketamáza Ómasímo nene Sikalahula hololeketanogo ive loko amunaloka li gako nene goha nagata gulumó.

<sup>17</sup> Leza Guivahani Izesu Kilistokumú gele alévolé okuko Sikalahú lehizeletamómáminoko keitoka limimó nenazo, neza ánéámina Ómasi pelevesava zetamosala nouve.

<sup>18</sup> Loko lo kemekago, keza giliake, kigikaú hulu okago, Ómasi agepoka liki láa liki lamó: Oho, Ómasi eza hetoka vejenaki kigika ali viligiúki alévolé kemetameki lílí itave loko gapo velekimikámoma neve, liki lamó.

#### *Atiokia numutoka gili alévolé amoláa*

<sup>19</sup> \* Setepanoni apili hilikago, Izesukumú gili alévolé a vejená nene gopoguni milikimikago, keza golisi hutílí iki vake Pinisia mikasiuka itó Saepalasi mikasi pokolaloka itó Atiokia numutoka viki Zuta vejenakó monó li kimi kimi iki mínamo.

<sup>20</sup> Lá niago, holúikú Saepalasi pokolagutí itó Sailini apatokatí gili alévolé amoláa lugáate nene Atiokia numutoka aniteke Guivahani Izesuni monola nene Zuta vejenaki hetoka vejená lugáagi li kememó.

<sup>21</sup> Li kimikago, Guivahanímo zámuza kemekago, vejená mukilite giliake kigika ali viligiake Guivahaniloka viki gímizemó.

<sup>22</sup> Lá ikago, ámina gako nene Zelusalega vokago, monó gele vejenalite giliake, Panapasini amisilikago, Atiokia numutoka vimó.

<sup>23</sup> Vo aniteake, Ómasímo hize lé oketámó nene áni goko lamaná geleake, Guivahaniloka kigika mili alévolé itave loko kagata alimó.

<sup>24</sup> Panapasí nene agika lamanaki ve Sikalahú nene lemeko agikagú mino vaí okago, vejená mukilite giliake, Guivahaniloka miní amemó.

<sup>25</sup> Lá ániago, Panapasí eza Sauloni áni ganogo Taliso numutoka vimó.

<sup>26</sup> Voko áni goake, Atiokia numutoka alémoko vokago, monó gele vejenaki ali nupa iki minikago, vejená mukí nene monó apí i kimi kimi iki niasigo, kilisimasi hamó oko vimó. Oko novigo, Atiokia numutoka Izesuni vejenala zuhamú nene Kilistoni zuhave liki apí iki kugulizá milamó.

<sup>27</sup> Gamena nene zupa Ómasímini agepagutí gako liaká ve makó nene Zelusalegatí Atiokia numutoka lemeke,

<sup>28</sup> \* keitokatí ve makó agulizá Agaponi nene Ómasímini Sikalahulímo alémo vávani okago, oteake, numutó namató gaúna napa hilita gako lo utó oko lo kimimó. Lo kemekago, alíka

nene agulizaki ve napa Loma apatoka minamó, agulizá Kalautió nene, gizapa oketonoigo, ámina gakó nene alévolé imó.

<sup>29</sup> Lá okago, Atiokia numutoka Izesuni vegenala zuhamate ámina gakó giliake, kigive Zutaia mikasiloka minamoláaloka moni mina avotígila oko ale nupa oko kimitune liki li hukiake,

<sup>30</sup> ali nupa iake Panapasinigi Saulonigi nene kimikago, keza aliki viki Zelusalega monó olotiva ve nene kemesimó.

## 12

### *Zemusini apili hiliake Pitani kalapusi amemó*

<sup>1</sup> Gamena nene zupa agulizaki ve napa Heloté nene Izesuni vegenala zuha lugáa nene lova ale kimike,

<sup>2</sup> eza lokago, Zonini uvolaho Zemusini luvana hukamó.

<sup>3</sup> Lá ikago, Zuta vegenalitini monó gizapa vete gili lamaná ikago ánigoake, lá itave loko lokago, Zuta vetini avóikini asenini zeketakumú gili mina holisigú Pitani nene nagá numukú alími milamó.

<sup>4</sup> Ámina holisi asú okiko Zuta vetini kigizakú molokugo goní imiiki apili hilitave loko geleake, agizató aleko nagá numukú alémo moloake, losive losive iki gizapa itatave loko pilisi ve 16 kelémo molamó.

<sup>5</sup> Lá okago, Pitá noitó nene alévolé iki gizapa iki niago, Pitá nene nagá numukú akonoigo, Izesuni vegenala zuha keza Ómasiloka alévolé iki numuna nilago, te te oko minamó.

### *Nagá numukutí Pitani gologí otamó*

<sup>6</sup> Lá onoigo, Heloté eza gó lokiko Pitani nene Zuta vegenalitini kigizakú molati gamena alitokago, ámina holugú Pitani agizani lugaloka pilisi vémini agizatoka seni nagatunú zemó, itó agizani lugaloka nene maga vémini agizató zemó. Lá iake akinago, gizapa ve lugáa nene gatetó gizapa iki minamó.

<sup>7</sup> Lá niago, Guivahanímini ageló makolímó galinali utó oake noigo, nagá numuni agikagú nene lapaná lo asú imó. Lá okago, ageló nenémo Pitani agahaisiló zeko alémo oteko litá oko otezo loko lokago, Pitá otimó nene agizakú seni nagá apasomó zekago,

<sup>8</sup> ageló nenémo holotakama ale zekoko gigisaló suú ale luhozo. Loko lo amekago lá okago, goha lo amike limó: Goka hánama ale luhokoko némegetoko ano.

<sup>9</sup> Loko lokago, agelolímó oko moloko imó nene gele guni amike vamó nániguhe loko nogilike ámegetamó.

<sup>10</sup> Lá iki limiki gateni makotó pilisi ve niago kiviligikasike gateni makotó ámina iki niago kiviligikasike, apá nupaló vegegisa aenitunú atagamó nene ezáa gahe segeake koló okago, limikasike gapoloka nivasike, agelóma tolova imó.

<sup>11</sup> Lá okago, Pitá nene agata kolosokago, láa loko limó: Mota gelekuve. Guivahanímó ageló makó amiseleokago, limike, Heloteni agizakutí itó Zuta vegenalitini gizapa vetini mukahakutí gologí onimikave.

<sup>12</sup> Loko Pitá nene geleake, Zoní agulizá napa nene Makí ave loko noi vémini izolaho Maliani numutó vo anitimó. Ámina numukú vejená mukí alegesá iki minake Ómasiloka liki niago,

<sup>13</sup> Pitá nene gatetó hoko-hoko lokago, gelekelé mohó makó agulizá Loté nene éaho hoko-hoko nolihe loko lemeko

<sup>14</sup> gatetó nene Pitani anó lupamú geleake, gahe segemike agoliza napa vizítimo lolu loko iteko Pitá nene oko gatetó noive loko lo kemekago,

<sup>15</sup> áminagú mina vegenalite giliake gigika hize lí okago nolape. Liki li amikago, áisi nene Óe, negiga lamuve, áisima gatetó noigo noluve, loko lokago, keza vogunámo noitive.

<sup>16</sup> Liki nilago, Pitá nene hoko-hoko lokogó noigo, gahe sigiake ánigamó nene Pitá noigo ángiake, kegepa gahava nomigo ininá amó.

<sup>17</sup> Ininá ikago, gakó lamitave loko agizanitunú avevezaha o kemeake, numukú ítemike, Guivahanímó nagá numukutí gologí oko alémo hetó i gakó nene aveté oko lo kemeake láa loko limó: Lekeza imane gakó viki Izesui agunala Zemusini itó monó gele vejená lugáa li kimilo loake, olío hizeko apá makotoka vimó.

<sup>18</sup> Lá okago, akiake, gó lokago, pilisi ve keza Pitakumú vitagá amó nene nagá numukú noamigo, Pitani nana itave liake, negi-nagi hizeke lova leta lava leta iki minamó.

<sup>19</sup> Lá ikago, Heloté nene vitagá itave loko lokago, vitagá iha iha alími utó milamago, pilisi ve nagá numuni gizapa vema loká miká okimiake, kipili ahuli ahuli itave loko lo hukoketamó. Lá oake, Heloté nene Zutaia mikasi ahuloake Sisalia numutoka lemeko minamó.

*Heloté hilimó*

<sup>20</sup> Nene zupa nene Tulo vešená itó Sitona vešenakumú Heloté izapaló molokago, lova ale kimimó. Lá okago, ámina apá amelage keza Heloté noitoka imi asú iake, Heloteni gizapa veva makó agulizá Pilasitó ave loko noi ve agata aliki likago, eza agulizaki ve napamaloka voko gakóini nene láa loko lo amimó: Keza nosánetá ale nómonó ituni gapo hukokaninazo, gelémo hulu itune liki ikave.

<sup>21</sup> Loko lokago, Heloté nene gakó lo kimitove loko gamena molamó nene alitokago, vešená mukí iki niago, eza kugulizaki vetini gonanalivagi gó ale luhoake, golvivagi siató iteko minake, gakó hána hána like gakó lo kimimó.

<sup>22</sup> Gakó lo nokimigo, vešená mukilite gakó napa lake vešenalitini konó lupa nomive. Ómasi makolímíni anó lupa neve.

<sup>23</sup> Liki likago, géneka lamike nenikumú gekévaké lamiki Ómasi hamokó geké litalo loko láa loko lamigo, Guivahanímíni ageló makolímó galinali anitike lokago, ámina vémini agupegú ginini hizekago hilimó.

*Panapasiko Sauloko*

<sup>24</sup> Itó Ómasímíni gakó nenémo hutilí oko puu loko mukí apatoka vimó.

<sup>25</sup> Lá okago, Panapasiko Sauloko keza Zelusalega goí iki moni kimiki kimisele hoza kememó nene ali asú ikasike Atiokia apatoka atiginá iki vinigi niasike Zoní agulizá napa Makini nene alímiki makó vamó.

**13**

<sup>1</sup> Atiokia numutoka Ómasímíni vešenala zuhatini holúikú Ómasímíni agepagutí gakó liaká a vegi monó apí i kimiaká vegi minamó, kugulizá Panapasí itó Simeó agulizá makó Anupavé, itó Lukió eza Kulena apatoti ve, itó Manaé, ezagi gizapa ve Heloteki ganagana minimi nitiki napa asi ve, itó Sauló.

<sup>2</sup> Gamena makó zupa monokumule liki nosánetá mosiki minake monó numukú alegezá iki numuna nilago, Sikalahulímó gakó láa loko limó: Panapasiko Sauloko keza monó hoza alitáve loko loketumó nene nenikumule liki kilímí gapo ilo.

<sup>3</sup> Loko lokago, nosánetá mosiki minake Ómasiloka lake kigizani nene gotóitó milake lusa gikimiake, monó hozaló kimisilikago vasimó.

*Aposolote Saepalasi mikasi pokolagú monó li kimimi vasimó*

<sup>4</sup> Ómasímíni Sikalahulímó lá okimiake kimiselekago, vasike Selusia numukú limiviki vasimó. Vi anitikasike sipigú itikasike viki Saepalasi mikasi pokolagú anitesimó.

<sup>5</sup> Apá gotola Salamisi neneló viki Zuta vetini monó numukú itiki Zoní agulizá napa Makí áisi kelémo vatí igo Ómasímíni gakó li utó asike li kemesimó.

<sup>6</sup> Lá ikasike pokolagú mihina i asú iake Papo numutoka anitemó. Neneloka Zuta ve soza saza lusa geaká i ve soza monó lole ale ve minamó, agulizá Pala-Izesú.

<sup>7</sup> Nene vémo kiapé makó Selegí Paulóni apolaho agata koloso mina veloka hoza aleko minamó. Kiapé nenémo Ómasímíni gakó gilinogo Panapasiko Sauloko alesa molo kimimó.

<sup>8</sup> Alesa molo kemekago, soza saza lusa geaká i vémo agulizá makó nene Elimasi eza kiapémo giliko alévolé okative loko zevo hukovo oketamó.

<sup>9</sup> Lá okago, Sauló agulizá gosohá Pauló eza Sikalahulímó lemeko agikagú mino vaí oake alémo vávani igo, Elimasini gisili hize agupe oake,

<sup>10</sup> Láa loko lo amimó: Géisi nene Satani gipalamaka netá lamaná lova ale ameaká ve neneka, soza saza gakolímó gigikagú vaí oko minamó geza Guivahanímíni gapo hize lí okanike ale gopa napa oaká noani netá nene nanahé ahulatane, olo.

<sup>11</sup> Nenemú imane Guivahanímíni zámuzámíni mogona ángiganize. Geza gogómula likokiko gamena makotó lapaná ángigamoko minatane. Loko noli agepagi agómulagú límugusi zekago, likatiká ike akaká akaká oko mohona noike nigizató alitave loko vešená sele loiaká imó.

<sup>12</sup> Lá okago, kiapé nenémo ámina netá utó imó nene ángoake Guivahanímíni monokumú gilimó nene goliva hizekago, gele alévolé imó.

*Pauloko Panapasiko Pisitia mikasiuka Atiokia numutoka anitesimó*

<sup>13</sup> Lá okago, Pauló agivelagegi keza Papo apá ahuliake sipigú itiake viki viki Pamapilia mikasiuka Pelega numutoka anitemó. Neneló Zoní ahulokimiake atiginá oko Zelusalega vimó.

<sup>14</sup> Lá okago, keza Pelega numutotí viki Pisitia mikasiuka nene Atiokia numutoka anitesimó. Neneló niasike Zuta vetini holisigú keí monó numukú itiki niasigo,

<sup>15</sup> Keí gizapa ve keza Mosé giza gakokutiki Ómasímíni agepagutí gakó liaká a vete giza gakokutiki gati kemeke gati asú iake, alesa miliake láa liki li kememó: Ligivese, lelémo kii loletati gakó makó likigikagú netimó nene likisiko gilitune.

<sup>16</sup> Liki likago, Pauló oteake, legesó iki minatave loko agizanitunú avevezaha ike láa loko lo kimimó:

Isilae vese, lekezagi Ómasimú goliva giliaká nia vejená lugáa lekelí nene lo likimitoze, gililo.

<sup>17</sup> \* Isilae ve lelí Ómasi áisi nene avotege keza Izipi mikasiuka niago, kelémo napa napa igo, hizi hutilí amó. Lá ikago, zámuzalaló molo gelekelé ike nenelokatí kelémoko oake,

<sup>18</sup> \* mikasi gomopalaló keikumú goselé apelemimó nene hanuva geheake nasahilí oketoloko novigo, kilisimasi 40 oko vimó.

<sup>19</sup> \* Oko novigo, Kenan mikasigú vejená mulusi 7-a kelémo tolova oake, mikasini nene avotegini gona moloko kemekago, alí etó etó ake alemó. Lá ikago, kilisimasi 450 oko vokago,

<sup>20</sup> \* Ómasi eza gizapa ve kelémo etó omo novigo, miniliki nivago, Ómasimini agepagutí gakó loaká ve Samuelé utó imó.

<sup>21</sup> \* Utó oake mino-loko itekago, vejená keza agulizaki ve napamú loká miká ikago, Ómasimo Pezamini agapilamó keikutí Kisini gipala Sauloni alémo etó okago, kilisimasi 40-a ale nahulake gizapa oketamó.

<sup>22</sup> \* Lá okago, Ómasimo Sauloni viselemiake Tevitini nene agulizaki ve napa alémo otimó. Lá oake aí gakola láa loko limó: Zesini gipala Tevitikumú lagava gelekuke áního mulumó. Áisi nene litotoka molatotoka oko moloko inogo ive, loko limó.

<sup>23</sup> Itó Ómasimo utó itive loko lo molató Tevitini agapilamola zuhagutí Isilae ve lelitoka lugutó viziti ve Izesuni amisilimó.

<sup>24</sup> \* Vegená holúikú omo utó itive loko Zoní nene Isilae vejená kigika ali viligiiki monó nagamí hilatave loko lo utó oko lo kimimó.

<sup>25</sup> \* Lá oake, Zonini ami hoza nene ale lutegeake láa loko lo kimimó: Gologí oletative loko lo mololeta vema noape liki loká inimiaká nia ve nene neza minamuve. Áisi nene alika nemegeza moloko ova ova noize, neza ánéamina hoza makó alemioko aí gasa gó ate akisitotó vo akohemuve.

<sup>26</sup> Nigive nagavese, Avalahani agapilamola lekezagi itó hetoka vejená lugáa Ómasimú geké limiaká nia vese, gakó litoze, gililo. Lugutó viziti gakó nene lelitoka molonoimóma neve.

<sup>27</sup> Zelusale numutoka kugulizaki vegi vejená lugáa mukí keza Izesuni ánihi hee lamake, Ómasimini agepagutí gakó liaká a vete gizi mila gakó holisi zupa zupa gatoaká nouháma gili hee lamake, Izesuni apilitave liki li hukitamó. Lá ikago, Ómasimini agepagutí gakó liaká a vete aikumú luhuva gizina gakó nene alévolé imó.

<sup>28</sup> \* Lá okago, Izesuni apilita gakokumú vitagá iake, gakola nomigo, gopa Pilatotoka viki negénegeka lago lago gele kemekago, apili helemóma neve.

<sup>29</sup> \* Lá ikago, monó gotolaú aikumú luhuva gizi mila netá nene lilí i asú ikago, zohota zalotí vinasiki aliki viki gonosi matimati geha mulikú militamóza,

<sup>30</sup> Ómasimó heleneikutí alémo otimó.

<sup>31</sup> \* Alémo otekago, Galilaila mikasiukatí Zelusale numutoka ezagi makó tiva vejenatoka gamena gamena utó okemeká tolova oká igo ánihiaká a vejená nenete aí gakó nene li utó iaká ve lilí iki niave.

<sup>32</sup> Itó avotegini nene Ómasimó lehizeketatove loko lo moloketa netakumú mulutikú lamaná gilita gakó láa loko lo nolukumune: Ómasimó Izesuni alémo otitove loko li gakó nenémo kagapilamó lelitoka nene mota gihila zekave.

<sup>33</sup> \* Alémo otikumú Ómasi agepoka liká nama liká a gakokutí lakani losigú láa loko luhuva gizonoiomóma neve:

Geza nene gipáne noanize,  
neza itínasa gelémo utó molokuve.

<sup>34</sup> \* Itó Izesuni nene heleneikutí alémo otekago, alikaloka goha helemingó ive. Nenemú Ómasimó láa loko lokago luhuva gizo molonoimóma neve:

Neza Tevitini lehizetatove loko lo molotu netá nene lamaná lehizeketanogo uve.

<sup>35</sup> \* Nenemú Ómasi agepoka liká nama liká a gakokutí gakó makó lá oko neve:

\* **13:17:** Gá 1:7, 12:51 \* **13:18:** Nam 14:34; Gapo 1:31 \* **13:19:** Gapo 7:1; Zos 14:1 \* **13:20:** Gon 2:16; 1 Sam 3:20 \* **13:21:** 1 Sam 8:5, 10:21 \* **13:22:** 1 Sam 13:14, 16:12; Age 89:20 \* **13:24:** Mak 1:4 \* **13:25:** Zon 1:20,27; Mat 3:11; Mak 1:7; Luk 3:16 \* **13:28:** Mat 27:22-23 \* **13:29:** Mat 27:57-60 \* **13:31:** Apo 1:3 \* **13:33:** Age 2:7 \* **13:34:** Isa 55:3 \* **13:35:** Age 16:10

Neza nigika lamanaki ve nounazo,

geza lanitoka nugupéa anuva aminogo ive, loko limó.

<sup>36</sup> Tevitini mogaána mota geleaká nounge. Ái nene Ómasímo hoza gakó lotamó nene vevenala zuhaloka hoza aleloko vike ale asú oake hilimó. Helekago, avolagini gonosíni milikimiakakú milimikago, agupéa anuva oko gelesa imó nenazo, nugupéa anuva aminogo ive loko li gakó nene Tevititoka gihila zemimóza,

<sup>37</sup> Ómasímo alémo oti vémini agupe anuva oko gelesamimó.

<sup>38</sup> Nenemú nigive nagavese, hehe loko lo likimitoze, gililo. Ámina vémo ale utó molokamómave loko gakolímo omo lokogovisaloka noave.

<sup>39</sup> Lihimatini nagakutí nene Mosé lo hukoko li gakolímo gologí oletosá amimóza, Izesukumú gili alévolé itamó nene lihimavatini nagakutí gologí o asú oleketanogo ive.

<sup>40</sup> Ómasímini agepagutí gakó liaká a vete gakó makó luhuva gizinamóma nene, lekelitoka alévolé okative loko lakagata aleko lo nolukumuze, ehe, gizapa iki minalo. Láa liki luhuva gizinamóma neve:

<sup>41</sup>\* Agae, monó gili ahuliaká ve lekeza sigaga liki liki hili minalo. Lekelí gamenavatini nene hoza haitolímini alinogo uve. Nenémini gakola li likimikiko gilitamóza, gili vevesiki geleminigave,

liki luhuva gizinamóma neve.

<sup>42</sup> Itó Pauloko Panapasiko láa liki li kimikasigo, monó numukutí limiake alika holisigú ámina gakó goha litáihe liki loká ikitamó.

<sup>43</sup> Láa liki liake, alegesakutí limiake Zuta vevená mukí itó hetoka vevená keza Zuta vetini monokumú gutá iki mina vevená kezagi makó Pauloko Panapasiko kémegetago, Ómasímini nasahilikú alévolé iki minatave liki kagata alesimó.

<sup>44</sup> Lá ikasigo, holisi makó alitokago, ámina apá amelage Ómasímini gakó gilinihi vóvotiki anitemó.

<sup>45</sup> Anitikago, Zuta vete keza ánihiake, kemekugú niake, Pauloni gakola pevevesava ziake Pauloni alivi galativi amó.

<sup>46</sup> Lá ikago, Pauloko Panapasiko ali akutiki láa liki li kemesimó: Zuta ve lekelisi ató nene Ómasímini gakó ganá apí iki gilitave liki linamóma neve. Itó imane lekezatini ahuliake alévolé lekemetamenígi itune liki lamanazo, ahulolikimioko Zuta ve niamamoláa hetoka vevenatoka vinogo usive.

<sup>47</sup>\* Guivahani eza nenemú nene láa loko lo letonoimóma neve:

Kugutó vizeaká gakó nene numutó namató mohona oko lo kemeloko voko mikasi nekaloka vo asú itane loko nénisi hetoka vevenalitini liví minatane loko gelémo etó onoumóma neve.

<sup>48</sup> Liki likasigo, hetoka vevenalite giliake, mulúikú lamaná okago, Ómasímini gakokumú sigaga litamó. Lá ikago, alévolé kemetameki minatave loko Ómasímo geleake kelémo gizaká i vevená keza Izesunimú gili alévolé amó.

<sup>49</sup> Lá ikago, ámina apatoka Guivahanímini gakó puu loko vo asú imó.

<sup>50</sup> Lá okago, Zuta vevenalite apá neneloka monó vená iti minamoláagi numuni gizapa vegí gala viziake, ali apiziake, Pauloki Panapasiki gopoguka likitake, numuni apáinigutí kimisili ahulikago, vasimó.

<sup>51</sup>\* Vinigi nivasike vahé miliki kigisagutí mumusopa hopó ahulikasike, Ikonio numutoka vasimó.

<sup>52</sup> Nivasigo, Sikalahú nene lemeko Izesuni vevenala zuhatini kigikagú mino vaí okago, mulúikú agila guluma igo minamó.

## 14

*Pauloko Panapasiko Ikonio numutoka anitesimó*

<sup>1</sup> Lá ikago, Ikonio numutoka anitesike ámina iki Zuta vetini monó numukú itiki monó lasimó nene gihila utó imó. Lá okago, Zuta vevenaki Kiliki vevenaki mukilite Izesunimú gili alévolé amó.

<sup>2</sup> Lá amóza, Zuta vevená lugáate monó gili ahuliake, ámina numutó nene hetoka vevená gala viziake Izesuni vevenala zuhamú gili golesa itave liki kagata alemó.

<sup>3</sup> Lá ikago, Pauloko Panapasiko neneló gamena hána minasike, Guivahaniloka leheta inasike kehelele vizemigo ali akutiki monó li kimi-kimi iki minasimó. Lá niasigo, Guivahanímo hize lé okimiaká gakolámini mogaána ale utó molake zámuza kemekago, golivagi netá haitopaitó alesimó.

<sup>4</sup> Lá ikasigo, ámina taoni napaló veđená hizi hóu liake, lugáa nene Zuta veđenatoka gímizemó, itó lugáa keza aposololoka gímizemó.

<sup>5</sup> Lá ikago, alika nene hetoka veđenaki Zuta veđenaki gizapa vegi ali nupa iake aposolo alivi letivi iki gehanitunú kepele hilitune liki li hukamó.

<sup>6</sup> Li huka gakó nene gilikasike, golisi iki Likaonia mikasigú Listela numutokagi Telepe numutokagi apá lugáalokagi viki,

<sup>7</sup> monó gakó lamaná lili ali iki minasimó.

*Listela numutoka gehanitunú Pauloni apele hilitune liki amó*

<sup>8</sup> Lá niasigo, Listela numutoka agisa luga luga nakeseto vi ve makó minamó. Eza nene izolaho ámináa getokago, gapo mohona osá amike húmege húmege oko minamó.

<sup>9</sup> Áisi nene Pauló nene monó noligo, geleko noigo, Pauló nene gonú apeleake, minokago, Ómasimo nelémo zokative loko gele alévolé okago, Pauló nene geleake,

<sup>10</sup> gakó napagutí like geza ote hee lokoko minozo. Loko lokago, moí oko ote hee loake gapo mohona imó.

<sup>11</sup> Lá okago, mukí veđenalite Pauló loló i netá nene ániagiake, kegepagutí gakó napa lake Likaonia gakokutí nene ómasi keza veđená lili ikasike lelitoka limiki netá imane lili niasive.

<sup>12</sup> Liki lamó nene Panapasikumú nene Kiliki veđenalitini ómai netá napa agulizá Zusí ave liki milamó, itó Pauló eza gakó akó loaká imó nenazo, aikumú nene ómai netá makó agulizá Helemé ave liki milamó.

<sup>13</sup> Lá ikago, taoni napa amegesaloka Zusikumule liki ge numuni minamó. Zusini guguni gizo ameká i vémo gonanalisi netá loló oake pulumaká izatini luváikú milikimiake, numuni gatetó aleloko viake, pulumaká apiliki guguni gizikitani niago,

<sup>14</sup> aposolo losima Pauloko Panapasiko keza gilikasike, ininá golesa ikasike, lihima alikataze likasike, gineganéini nene hikilikasike ololu liki veđená holúikú vasike láa liki lasimó:

<sup>15</sup> Náa veguvo, lekelisi nene nanetá naleve. Lélisi nene lekelikitana nousive. Lekelisi nene ómailini soza sazámimi netá nene lekemegeza kimiiki alévolé Ómasiloka gímiziki minatave loko imane gakó lamaná lo nolukumusive. Ómasi nene okulumaki mikasigi age nagamikí itó áminagú mina netá mukí haitopaitolímimi kelémo utó i ve noive.

<sup>16</sup> Lá noiike, omolelé amalelé iliki ite gamenaloka hetoka veđená mukí gele kemekago, kigikatunú geleke haitopaitó gapo ale utó iake miniki aliki amó.

<sup>17</sup> Lá amóza, ániago ahuloketamimó nenazo, límugusigú minamamóma neve. Aí mogonáa gilitave loko geha zelikimike golini gamena hogái gamena minumuni gamena likimigo, niva niva iki niake lokogoliza viziaká niave.

<sup>18</sup> Liki li kimikasigo guguni gizi kiminigi amó nene hana iki ahulamó.

<sup>19</sup> Lá ikago, neneló niasigo, Atiokia numutokatí itó Ikonio numutokatí Zuta ve aniteke mukí veđená gala vizikago, ali nupa iake Pauloni nene gehanitunú apiliake, mota hilihe liki gelelehá iliki númaseloka vamó.

<sup>20</sup> Neneló ahulimikago, akonoigo, Izesuni veđenala zuhate iki hizi vegiake niago, oteake taoni napaloka itimó. Akiake gó lokago, Panapasigegi Telepe numutoka vasimó.

<sup>21</sup> Viki taoni napaloka Izesuni gakó lamaná li kimikasigo, veđená mukilite gili aliake Izesuni veđenala zuha lili amó. Lá ikago, keza asi gapoloka atiginá iki vasike, Listela numutoka Ikonio numutoka Atiokia numutoka vi anitiká limi anitiká asike,

<sup>22</sup> Izesuni veđenala zuhate monokú alévolé iki minatave liki kagata alimi alimi mihina asike kigikagú ali etoha ikasike láa liki li kemesimó: Gasovagi netalímimi amupiló minokogó Ómasímimi avogisáló vo holatune loko loletonoimóma neve.

<sup>23</sup> Liki li kimikasike, monó numutó numutó ve lunáa kilími etó etó imi vasike, monokumule liki nosánetá mosiki minasike, Ómasiloka likasike Guivahanimú gili alévolé ikanazo, áisi gizapa oleketino liki Guivahanímimi agizakú ahulikitasimó.

*Silia mikasiuka Atiokia numutoka atiginá iki vasimó*

<sup>24</sup> Lá ikasike, Pisitia mikasi aviligikasike viki Pamapilia mikasiuka anitesimó.

<sup>25</sup> Neneló anitesike Pelega numutó nene monó li kimikasike, Atalia numutoka limiki vasimó.

<sup>26</sup> Neneloka limiki sipigú itikasike, viki Atiokia numutoka anitesimó. Neneló goí iki ámina alesí hoza lumaló vinigi niasigo, Izesuni veđenala zuhate Ómasimo nónohá zeketative liki Ómasiloka lamó.

<sup>27</sup> Itó anitesike monó gele veđenáini zuha kilími nupa ikasike, Ómasimo hize lé oketago hoza alesí gakó itó hetoka veđená gahe segekimikago gili seketigí a gakó nene avetó iki li kimi asú asimó.

<sup>28</sup> Lá ikasike gamena hána otigí nene Izesuni veđenala zuhagi makó minamó.

## 15

*Zelusale numutoka monokumú alegesá amó*

<sup>1</sup>\* Zutaia mikasiukatí ve lugáa keza Atiokia numutoka lemeke Izesuni vegenala zuha Zuta ve minamamoláa láa liki li kimi-kimi iki minamó: Lekeza Mosé loleketamómáminiki lukugupeló Ómasímíni anosa milamitamó nene Ómasímo lukugutó vizeminogo ive.

<sup>2</sup> Liki lamó nene Pauloko Panapasiko gilikasike kezagi ámina vegenaki gakotunú lova napa hizemó. Lova hizikago, Zelusalega tivíiki ámina gakokumú likiko aposolo itó ve olotivate kegepagutí gakóini gilitave liki Pauloki Panapasiki ve lugáa makoki kilími etó amó.

<sup>3</sup> Kilími etó iake, monó gele vegenalite kilími gapó miliake, nónohá zikimikago, vamó. Viki Pinisia mikasigú itó Samalia mikasigú nene Zuta vegená minamamoláate litaha netá ahuliake, monokú viki gímize gakó li kimimi nivago, kigivéike mukilite giliake kogoliza viziki minamó.

<sup>4</sup> Lá ikago, viki Zelusalega anitikago, monó gele vegenaki aposologi ve olotiva napagi kogoliza vizikimikago, Ómasímo kelémo vatí igo monó hoza nalego nene gihila zi gakó nene aveté iki li kememó.

<sup>5</sup> Li kimi asú ikago, Palisaio monó vegenakutí Izesukumú gili alévolé a ve lugáate otiki láa liki lamó: Hetoka vetini kugupeló Ómasímíni anosa mínosá itó Mosé lo hukoko li gakó gele alesá neve. Lá amitamó nene monokú vaminigave.

<sup>6</sup> Liki likago, aposologi ve olotiva napagi ámina gakó litune liki alegesá amó.

<sup>7</sup>\* Alegesá iake gakó ali viligá aligá ake, Pitá nene oteake láa loko lo kimimó: Nigivénegita, hetoka ve keza gakó lamaná imane není negepaguti giliiki gili alévolé itave loko holutegutí Ómasímo gozapá likigivetipina není nelémo etó imó nene mota gilinave.

<sup>8</sup>\* Lá okago, ligikagú ánigoaká ve Ómasímo Zuta vegená lelitoka Sikalahú limimó ámina oko hetoka vegená nokimike nenémíni mogonáa lelepizimó.

<sup>9</sup> Keza aí gakó gili alévolé ikago, kígika nagamí zeketoko kelémo lamaná imó. Leza nagamí zeletamómáminoko kezagi nagamí zeketamó.

<sup>10</sup> Nenemú lekeza Ómasi gimivagú miliki genavagi netá napa aleaká unimó lezagi avotegegi Moseni gakó ale amegesaló moloaká netalímíni genavagi netá ale otunimó ligitagani uhá nene ámina oko hetoka vegená Izesuni vegenala zuhatini kumupiló molatune liki nilahe.

<sup>11</sup> Nenémíni amitune. Leza láa loko geleaká nouháma neve: Guivahani Izesú eza nasahilí olimike lugutó vizimó ámina oko hetoka vegenaki kugutó vizinogo ive.

<sup>12</sup> Loko Pitá nene lokago, alegesá a ve mukí nene gahá lamake kegepa apiziake niago, Pauloko Panapasiko keza Ómasímo hozaló ve niasigo hetoka vegetatoka golivagi netá haitopaitó ale utó imó nene aveté iki li kemesimó.

<sup>13</sup> Li kimi asú ikasigo, gizapa véipo Zemusí láa loko lo kimimó: Nigivénegita, gakó makó litoze, gililo.

<sup>14</sup> Ómasímo vegenala zuha lilí itave loko hetoka vegená gapo veleketake lugáa kelémo etó imó. Ámina gakó nene Saimon aveté oko lo lemekago geleháma neve.

<sup>15</sup> Ámina gakó itó Ómasímíni agepagutí gakó liaká a vete luhuva gizi milina gakó vo milisegeko neve. Ómasímíni agepagutí gakó loaká ve makolímíni luhuva gakó makó láa loko neve:

<sup>16</sup>\* Zuta vegenalite monó liaká niamó nenémo Tevitini monó seli numuni hulupa ligimokitana noigo,

nenísi minoko atiginá oko inake ámina numutagalaló agomá aleko goha ginogo uve.

<sup>17</sup> Lá okugo, vegená lugáate Guivahanimú sele liki vitagá itave,

itó hetoka vegená nugulizá iaká nia vegená mukí áminagó itave.

<sup>18</sup> Guivahanímíni gakó nenémínáa gozapakutí lo utó omo notu vémina noluve.

<sup>19</sup> Láa liki luhuva gizinamó nenazo, neza láa loko noguluve. Hetoka vegenakutí Ómasi gili amiaká nia vegená nene genavagi netá geheketamítune.

<sup>20</sup>\* Soza ómai netáini guguni gizi kimitakutí nene namiki mokoló netá alemiki nagá itata iza namiki iza golanigi namiki mosiki keké itave loko luhuva netá gizatune loko noguluve.

<sup>21</sup> Ámina mosiaká netakumú nene Mosé gakó mukí gizo molokago, gozapakutí avotege omolelé amalelé iki leza Zuta vetini monó numutegú holisigú holisigú Mosé lo hukoko li gakó gatiki li limiaká niago geleaká nounge.

*Monó kansole vetini gakó*

\* 15:1: Liv 12:3      \* 15:7: Apo 10:1-43      \* 15:8: Apo 10:44      \* 15:16: Emo 9:11-12      \* 15:20: Gá 34:15-17; Liv 18:6-23, 17:10-16

<sup>22</sup> Láa loko Zemusi lokago, aposologi monó ve olotivagi monó amegesaló mila vejenaki mukí keza gili lamaná iake, keitokatí ve losi kilími etó amó, makó agulizá Zutá agulizá makoláa Pasapá, itó makó Sailasí eza monokú olotiva ve. Kilími etó iake, Pauloko Panapasiko kezagi Atiokia numutoka makó vitave liki kimisili milamó.

<sup>23</sup> Lá niake, luhuva netá makó láa liki giziake kimikago, aliki vamó: Ligive lagavese, leza aposologi monó ve olotivagi lekeza ligive hetoka ve lugáa Atiokia numutokagi Silia mikasigú itó Silisia mikasigú numuni apá makotó niamó nene geké lo leketoko luhuva imane gizo nolukumune.

<sup>24</sup> Leza gelemuko, imanelokatí ve lugáate lekelitoka viki gako li likimiki kilími gopa ikago, gili gopa amó.

<sup>25</sup> Lá ikago, leza gelekunike alegesá okunike, ve makó kelémo etó okunike ve losi ligika kemenouni ve Panapasiko Pauloko kezagi kimiselekuko húnane nivave.

<sup>26</sup> Ámina ve lositá keza Guivahanite Izesu Kilistokumule liki kepelemitagigitana monó hoza alesimó.

<sup>27</sup> Nenemú Zutako Sailasiko kimiselekuko, viki kegepagutí ámina gako nene li likimikisiko gilinigave.

<sup>28</sup> Sikalahuki itó lezagi nene hoza genavagi lekememinake, lá okosí hoza gako loleketatune loko lonoune.

<sup>29</sup> Lekeza soza ómai netámi guguni gizi kimitakutí namilo. Itó nagá itata izagutí namilo. Itó iza golani namilo. Itó mokoló netá alemilo. Nene netá lekemegeza amiiki mosi keké itamó nene lamaná iki minanigave. Ánesile.

<sup>30</sup> Luhuva netá láa liki gizi kimiake, kilími gapo ikago, vamó. Viki Atiokia numutoka aniteke, monó gele vejená kilími nupa iake ámina luhuva netá kememó.

<sup>31</sup> Kimikago, gatiki giliake, luhuva giza gako nenémo kelémo kii lokimikago, kogoliza viziki minamó.

<sup>32</sup> Lá ikago, Zutako Sailasiko Ómasímini agepagutí gako liaká ve minasinazo, gako mukí lasike, kilími huluga liki kilími kii lasimó.

<sup>33-34</sup> Lá ikasike, makó minata gamena asú okago, kimisele veloka atiginá iki vinigi mulúikú gili lamaná iminasigo, kigivete kemesosoka liki kilími gapoló amó.

<sup>35</sup> Pauloko Panapasiko keza Atiokia numutoka miní amiki minasike, kezagi ve lugáagi Guivahanímini gako li utó miliki li kimi-kimi iki minamó.

#### *Pauloko Panapasiko otopá zesimó*

<sup>36</sup> Gamena makó oko vokago, Pauló nene Panapasini láa loko lo amimó: Leza monó gapo vusike Guivahanímini gako lo kumusitó numutó namató ligive lagave utó amó keza nana nana iki niahe voko ángiketative.

<sup>37</sup> Loko lokago, Panapasí nene Zoní agulizá napa Makí makó vinigi limóza,

<sup>38\*</sup> Makí goí oko Pamapilia mikasiuka gosohá hozagú aniteake ahulokimiake atiginá imó nenazo, nenemú Pauló nene áisigi vinigi giligo goselé apilimó.

<sup>39</sup> Lá okago, Panapasiki pelevesava zikasike lova leta konó imó. Lá okago, mini ezega emega asimó. Panapasí nene Makini alémoko vike sipigú itikasike Saepalasi mikasi pokolauka vasimó.

<sup>40</sup> Pauló nene Sailasini alémo etó okago, Izesuni vejená keza Guivahanímo nasahilí oketative liki Ómasiloka likago, vasimó.

<sup>41</sup> Vasike, Silia mikasiuka itó Silisia mikasiuka anitesike Izesuni vejenala zuha kilími kii lasimó.

## 16

#### *Pauloko Sailasiko Timotini alímiki vasimó*

<sup>1</sup> Pauloko Sailasiko keza Telepe apatoka vasike, Listela apatoka anitesimó. Nenele nene Izesuni vejenala zuha makó minamó, agulizá Timotí, izolaho nene Zuta vená nagamí hola vená, amelaho nene Kiliki ve.

<sup>2</sup> Listela apatokatikí Ikonio apatokatikí monó nigele vejená keza Timotikumú gelego, itekago, Pauló nene Timotiki makó mohona itíve loko gilimóza,

<sup>3</sup> ámina apatoka Zuta vejená mukilite Timotini amelaho nene Kiliki mikasigú ve minamó nene gako gili asú amó nenazo, Pauló nene mukahá ikatave loko Timotini alémoko vike Ómasímini anosa nene agupeló molotamó.

<sup>4</sup> Lá oake, numutó namató vake aposologi monó ve olotivagi keza Zelusale apatoka netá matá mositakumú li huká gako nene gili alitave liki likitimi likitimi vamó.

\* 15:38: Apo 13:13



<sup>5</sup> Lá iki hoza nalego, Izesuni vejená mulusi mulusi milamó keza gili alévolé amó nene kígika okago, gamena gamena keitoka viki gímizi gímizi ago, mukí hizi hutlí amó.

*Pauloge Masetonia mikasiuka vamó.*

<sup>6</sup> Lá ikago, Asia mikasiuka monó gakó loloko vitune liki niago, Ómasímini Sikalahulímo gapo hize lí okimikago, Pilikia mikasiukagi Galesia mikasiukagi li kimi-kimi imi vamó.

<sup>7</sup> Vake Misia mikasi nekasaló anitiake, Pitinia mikasiuka vitune liki niago, Izesuni sikalahulámo áminagó oko gele kememigo,

<sup>8</sup> Misia mikasi aviligiake limi viki age nagamí agataloka Toloa apató anitemó.

<sup>9</sup> Neneló anitiake, holugú nene Pauló agika ale viligokago vamó lá oko ánigamó: Masetonia ve makolímó áisi noitoka anitike sele like geza Masetonia mikasiuka oko lelémó vatí ozo loko lo amimó.

<sup>10</sup> Láa loko noligo, ángoake, keza Ómasímo gakó lamaná lo kimitune loko lolimikave, liake, vinigi ali vatí amó. Ali vatí niago, neza Lukana vo gímizekugo,

<sup>11</sup> sipigú itekunike, Toloa apá ahulokunike hee hee loko vunike Samotalake mikasi pokolaló anitunimó. Akokunike, gó lago, voko voko Neapoli apatoka age nagamí gahevaloka anitehá.

<sup>12</sup> Neneloka sipigutí lemekunike, mikasigú voko Pilipi numutó anitunimó. Nene Masetonia mikasigú apá gotolaló Loma ve keza apá amelaho líl iake gizapa amó. Ámina numutoka nominuko, gamena makó oko vimó.

<sup>13</sup> Oko vokago, holisi nene alitokago, vegegisagutí lemekunike nagamí napaló Ómasiloka liaká apá nehe loko gelekunike, lemeko vunimó. Neneló vená makó alegesá iki niago, kelémó utó okunike, mitó minunike monó lo kununimó.

<sup>14</sup> Lo kemekuko, keikutí Ómasímini gupá ze ameká vená minamó agulizá Litiá. Eza Tiatila numutó vená nene okohu gó molonoigo meina híziaká vená minamó. Guivahanímó agika ale koló igo, Pauló li gakó nene gele alimó.

<sup>15</sup> Gele aleake, ezagi vejenala zuha ai numukú mina vejenaki monó nagamí hiliake, eza láa loko lo limimó: Lekeza áninagago Guivahanímini mututoni okugoma není numukú itiki miniki aliki itave loko negénegeka ligo itunimó.

*Pilipi numutoka nagá numukú ahulikitamó*

<sup>16</sup> Gamena makó zupa Ómasiloka liaká apatoka nolumuko, sihele mohó makó noigo hotu lunimó. Nene moholímíni agikagú holosi golesa minokago, anó lupa ale haitolímíni ike kogoka vizeaká i mohó alika utó iti netakumú lo utó ike meinava moni henokanoni alike ai agupe meina hize ve kemeaká imó.

<sup>17</sup> Nene mohoki hotu lokunike, Pauloge leza lémegetoko noake gamoga gemo gemo vike sele like láa loko limó: Ve imane Ómasi iteko mina vémini gelekelé izegipala minake, lukugutó vizeaká gapo lekelepiziaká niave.

<sup>18</sup> Nene gakó gó lanama gó lanama gakó napagutí loaká igo, Pauló nene holosi golesámini anó lupa geleake goselé apelekago, viligoko holosi golesa láa loko lo amimó: Neza Izesu Kilistoni agulizató mohó agikagutí itekoko vozo loko nologetuve. Loko noligo litá oko iteake vimó.

<sup>19</sup> Lá okago, agupémíni meinávaa aliaká a vemate aí hozalotí moni goha aleminogo uninazo liki giliake, Pauloko Sailasiko kigizató aliake, hugumatoka gelelehá iki kiapetoka kilímiki vake,

<sup>20</sup> goní ikítake láa líkí lamó: Imane Zuta ve nenetosa numuteló ikasike mulutegú hizeseke, lílímíni golesa galasa iaká niasive.

<sup>21</sup> Leza Loma ve amuhá suni li hukilita netá alitave liki lagata aliaká niasive.

<sup>22</sup> Líkí líkago, ve mukí mulusi mílki mina vete keza kízapaló molokago, lovaga ali kimiake, kiapé keza góini ali alegeté vízi ahuliake, gala vizikago, segi nakahunitunú kepelemó.

<sup>23</sup> Vauva aliki zivi hutivi iki kipiliake, nagá numukú kilímíni miliake, gizapa ve nene alévolé oko gizapa oketative líkí litamó.

<sup>24</sup> Limíkago, nagá numuni makó holukú nene kelémó moloake, kigisaló za moloko nagá alekimíkago, akasimó.

<sup>25</sup> Holugú akovevé Pauloko Sailasiko keza Ómasiloka numuna liki nama nilasigo, nagá numukú mina ve lugáate konó lupamú nigelego,

<sup>26</sup> imimá napa galinali alimó. Alekago, nagá numuni lukesávaa mómoká okago, galinali gahe nene zeko apasoake koló okago, nagá numukú mina ve mukilitíni nagá alikitamó nene vínaso asú imó.

<sup>27</sup> Lá okago, nagá numuni gizapa ve ako heleneikutí epenape zeko oteake, gateni koló o asú onoigo ángoake, nagá numukú vema mota vi asú ahe loake, sopoló gelelehá oake ezáa agupegú galutá inogo noigo,

<sup>28</sup> Pauló nene gakó napagutí like gugupega ale golesa amo, leza avasavagi nune, loko limó.

<sup>29</sup> Loko lokago, gizapa vemámo livikumú lokago, amikago, numukú ololu loko itike luvuluvo nozike Pauloko Sailasiko keí kighúna geake,

<sup>30</sup> numukutí kelémoko limike loká oketake uvónegitosa, nana okinake lamaná itove.

<sup>31</sup> Loko lokago, keza láa liki li amesimó: Guivahani Izesu Kilistokumú gele alévolé itanimó nene, gezagi mina vevenaki lukugutó vizinogo ive.

<sup>32</sup> Liki likasike, Guivahanímini gakó nene ámina numukú mina vevenaki ezagi li kemesimó.

<sup>33</sup> Li kimikasigo, gizapa vemámo ámina holugukó kelémoko vike segi nogosanitunú kepelemó nene, nagami zekimiake, ezagi vená izegipalagi monó nagami hilamó.

<sup>34</sup> Lá iake, aí numuni agikagú kelémo moloake, nosánetakumú lokago gizi vatá i kememó. Lá ikago, ezáagi vená izegipalagi Ómasimú gili alévolé akumú kogoliza viziki minamó.

<sup>35</sup> Akiake gó lago, kipege keza pilisi ve láa liki kimiselemó: Ve losima gologí ikitalo.

<sup>36</sup> Liki likago, gizapa vemámo gealeake, Pauloni aveté oko lo amike limó: Neza gologí olikimikugo vitáive liki kipege keza gakó ahulikago noaze. Nenemú lekeza limiiki viki zou liki minalizo.

<sup>37</sup> Loko lokago, Pauló nene láa loko lo amimó: Leza nene Loma vetini mulusigutí getamóma nemóza, lekeza lá amoaká netá aliki gonitó lilími milamiki vevená kovogisaló lipiliake nagá numukú lilími milamó nemóza, itínasa nene asugunatoka limisiliníngi nilahe. Lá oko nomive. Kezáini iki lilímiki vikiko vitímóma neve.

<sup>38</sup> Loko lokago, pilisi vete atiginá iki vake kipege ámina ve losi keza Loma vetini mulusigutí getakutí nousive liki lasi gakó giliake, ininá amó.

<sup>39</sup> Ininá iake, ve losiloka vake kilími hulu iake, kilími hetó iake, numuni apáini ahuliiki vitáive liki loká iki kagata aliake kimiselemó.

<sup>40</sup> Kimisilikago, keza nagá numukutí limikasike, Litiani numukú vasike, Izesuni vevena luha ángikasike, monokú ali kii likimikasike vasimó.

## 17

### *Tesalonika numutoka gopaga lamó*

<sup>1</sup> Keza viki Amapipoli numutoka itó Apolonia numutoka aviligikasike Tesalonika numutoka vi anitesimó. Neneló Zuta vetini monó numuni makó minamó.

<sup>2</sup> Pauló eza aí suni alike holisi losive makole oko novigo, monó numúkú itike minake, kezagi monó gotolagutí gatiki ligili hagili amó.

<sup>3</sup> Lá iake, monó gakó luhuva gizamó lugáa nenémini mogonáa like, láa loko lo kimimó: Gologí oletative loko lo mololeta vema helekoko otitive liki monokú luhuva gizi minamóma neve. Lo nolukumu ve nene agulizá Izesú eza gologí oletative loko lo mololeta vema noive.

<sup>4</sup> Loko lokago, vevená lugáa nenete gili seketigí iake Pauloko Sailasiko keitoka viki gímizemó. Itó Kiliki ve keza Ómasi gelekelé itiki minamoláagi vená iti minamoláagi mukí kezagi viki gímizemó.

<sup>5</sup> Lá ikago, Zuta vetini monó gizapa vete giliake kemekugú ninake, gohogó vevená golesa kilími nupa iake, gala vizikago, Zasoni numukutí Pauloko Sailasiko vevená kogovisaló kelémo molokinake nagá kimitune liki aí gahe zivi tele vizivi amó.

<sup>6</sup> Lá amó nene ve losima numukú niamasigo ángiake, Zasoni itó agivelagini lugáagi kigizató aliake, gelelehá iki aliki lemeke apá gizapa veloka kilímiki milake, láa liki gopaga limi vamó: Numutó namató ve kilími gopa napa iaká niasi vema anitesigo,

<sup>7</sup> Zasóma kelémo guni okave. Itó keza Loma vetini agulizaki ve napámini gakó ali ahulikasike agulizaki ve gosohá makó Izesú utó okave liki liaká niasive.

<sup>8</sup> Liki liake, apá amelagegi gizapa vegi gala vizemó.

<sup>9</sup> Lá iake, Zasoki agivelagegi sele li kimiake, Pauloko Sailasiko vitáive liki kugupe meina hizilo likago, moni kememó. Kimikago, kimsili ahulamó.

### *Pelea numutoka vasimó*

<sup>10</sup> Lá ikago monó gele vevenalite ámina holugú Pauloko Sailasiko kimsili ahulikago, Pelea numutoka vasimó. Neneló anitesike Zuta vetini monó numukú itiki monó li kemesimó.

<sup>11</sup> Lá ikasigo, ámina apató Zuta ve keza zouváa Tesalonika numutoka vevenakitana minamake, kiviligiki minake monó vávani iki giliake, Pauloko Sailasiko lasi gakó lamaná

nehe soza nehe liake, gamena gamena monó gotolagutí monó mogonamú agizaka hiziki vitagá iki minamó.

<sup>12</sup> Lá iake, keitokatí mukilite Kiliki vená iti minamoláa lugáagi ve lugáagi keza Izesukumú gili alévolé amó.

<sup>13</sup> Lá ikago, Pauló nene Pelea numutokagi Ómasímini gako lo hutilí okago, ámina gako nene Tesalonika numutoka vokago, Zuta vegenalite giliake, Pelea numutoka ake gala vizeke lovaga lamó.

<sup>14</sup> Lá ikago, monó gele vegená keza Pauloni alími gapo ikago, ámina apá ahuloake vike age nagamí agataloka anitimóza, Sailasiko Timotiko keza Pelea numutoka minasimó.

<sup>15</sup> Niasigo, Pauloni alímiki va vegenalite Atena numutoka ahulitamó. Ahulimikago, lekeza atiginá iki vikí likiko, Sailasiko Timotiko litá iki isino. Loko lokimikago, vegená keza atiginá iki vamó.

*Pauló Atena numutoka monó lo kimimó*

<sup>16</sup> Lá ikago, Pauló nene Atena numutoka kegeva minake ániagamó nene soza ómai netá mukí vaí oko nego, ániagoake, agikagú ló lokago,

<sup>17</sup> Zuta vetini monó numukú itike Zuta vegenaki hetoka vegená Ómasimú goliva giliki minamoláa kezagi monó ligili hagili amó. Lá iake, gamena gamena maketiloka nene vegená nánigake áminagó oko monó lo kimimó.

<sup>18</sup> Lá okago, ámina apatoka vegená makó minamó. Makolite Epikuleani monó giliaká amó itó makolite Sitoiki vegenalitiní monó giliaká amó. Ámina vegená kezagi Pauloki gako viligá aligá iake, lugáa nenete Paulokumú nene goselé gako goha li ve imanémo nanave loko lo lemeaká noive. Liki likago, makolite láa liki lamó: Áisi nene ómai netá makolímíni gakola nolimó gelekave. Liki lamó nene Pauló eza Izesunimuki helenosakutí oteakakumuki lo utó oko lo kimikumú nene gako lamó.

<sup>19</sup> Láa liki liake, Pauloni agizató aleke, hugumá makó agulizá Aleopago neneló alímiki iteke lamó: Géisi gosohá gako loaká noanímoma nene, nana gakokumú loaká noane.

<sup>20</sup> Ma gelemuni gako neze, mognagi lokako gilitune.

<sup>21</sup> Liki lamó nene Atena apakú vegenaki veno vegi keza gako gosohá giliake ámina gakotokó miniaká amó.

<sup>22</sup> Lá ikago, Pauló eza Aleopago gako hugumató voko minake, vegená láa loko lo kimimó: Atena apakú vese, neza mogonatiní lá oko nániguve. Lekeza ómai netá mukikumú goliva goha gilikilí iaká niave.

<sup>23</sup> Netá makó lá oko nego ániogueke noluve. Neza numutitoka vogá ogá oko ómai netatiní ániagamó nene, nama holoma makotó luhuva makó nene gelemuni ómai netá makó noitikumú neve liki gizinago gatuve. Ámina ómai netá lekeza gelemiki gopa gupá zi amiaká niamó aikumú lo likimitoze, gililo.

<sup>24</sup> \* Ómasímo mikasi ale utó moloake, amupiló netá matá ale utó molo asú imó. Áisi nene okulumaki mikasigi keí Guivahani noinazo, áisi nene monó zagusave vegenalite kigizatunú gekú nene minoko aleko osá amive.

<sup>25</sup> Áisi vegená mukitoka sikalahúinigi netá mukí lehizelimiaká noinazo, áisi netá matakumú vitagá osá amive, keké. Nenemú vegenalita hozava aleko netá makó ale utó o amitunimoláa oko nomive.

<sup>26</sup> Lá onoimóza, vegená zuha hamokó ale utó moloake lokago, aitokatí numutó namató hize hutilí oko utó omo vunimó. Itó hize hutilí oko minatuni gamenagi lakaníagi áisigo mololetonoimóma neve.

<sup>27</sup> Nenemú nene ligikatunú vitagá iliki vikí Ómasi ezáa ániगतune loko geleake, nenémini imó. Eza hotoka minamive. Liki gilikagú noive.

<sup>28</sup> Leza aí agizauka minunike, oko moloko oaká noune. Likelitokatí nama luhuva giziaká a ve lugaáte nene leza Ómasilokatí utó unimóma neve liki lamóma neve.

<sup>29</sup> Leza Ómasilokati nouninazo, Ómasímo eza vegenalite kagata geleke golitunupe sili-vatunupe gehanítunupe lilí a netakitana noive loko laminogo une.

<sup>30</sup> Ómasímo aikumú gelemake netá golesa aliki mína gamena nene ániogo ahuloake, nasahilí oketoko minamóza, itúna nene numutó namató vegená mukitoka kígika ali viligatave loko lokimikave.

<sup>31</sup> Áisi nene numutó namató vegenalita mogonate ale utó moloko lihima limití gamena lo moloake, lelegí oko limití vema alémo etó imó. Lá oake, numutó namató vegená mukitoka aikumukó gilitave loko ámina ve nene heleneikutí alémo otekago noive.

\* 17:24: 1 Kug 8:27; Apo 7:48

<sup>32</sup> Loko Pauló nene helenosakutí oteaká gako lokago, lugáate goselekaseleka lamó, itó lugáate nene gamena makó zupa ámina gako goha lako gilitune liki lamó.

<sup>33</sup> Liki likago, Pauló nene ahulokimiake vimó.

<sup>34</sup> Vokago, veđená lugáate nene aitoka viki gímiziake Izesukumú gili alévolé amó. Keitokatí Aleopago hugumató kansole makó minamó, agulizá Tionisió, ezagi vená makó agulizá Tamalí itó veđená lugáagi minamó.

## 18

*Pauló Koliti numutoka vimó*

<sup>1</sup> Lá ikago, Pauló nene Atena apá ahuloake Koliti numutoka vimó.

<sup>2</sup> Neneloka Zuta ve makó alémo utó molamó, agulizá Akuilá. Aí nene Potu mikasiloka getamó. Itó venala Piliskako nene Italia mikasiuka niasigo, agulizaki ve napa Kalautió eza Zuta veđená nene Loma apakú minamitave loko lo hukokimiake kimiseleko ale ahulokago, keza ámina apá nene ahulikisike, Koliti numutoka vasimó. Izoha vi nanitesigo, Pauló nene keitoka anitimó.

<sup>3</sup> Ezagi kezagi hamokó hoza aleke seli numuni giaká a ve minamó nenazo, keí numukú iteko minake kelémo vatí igo, makó hoza alemó.

<sup>4</sup> Lá niago, Pauló eza holisigú holisigú Zuta veđenalitini monó numukú iteko Zuta vegi Kiliki vegi kagata logative loko monó lo kemeaká imó.

<sup>5</sup> Lá okago, Sailasiko Timotiko keza Masetonia mikasigutí asi gamena nene Pauló monó hoza amuza moloko alike, Izesú nene gologí oletative loko lo mololeta vema noive loko aí mogonáa nene Zuta veđená lo utó oko lo kemeko minamó.

<sup>6</sup> Lá okago, keza nene gakola gili ahuliake, lova ali ameke alivi letivi ikago, Pauló nene gologutí vahé moloko mumusopa atilí o ahuloake, láa loko lo kimimó: Lekeza alika latila itamó nene, nene lihima nenitoka nomive. Lekezatinihoka minanogo ive. Nenemú nemegesa lekemekinake hetoka veđenatokagó vinogo uve.

<sup>7</sup> Loko loake, hetoka ve makó agulizá Titió Zustó eza Ómasi gupá ze ameko minamó. Aí numuni nene Zuta vetini monó numuni agilikaloka minamó nenazo, Pauló nene aí numukú itike minoko aleko noigo,

<sup>8</sup> monó numuni gizapa ve agulizá Kilispó ezagi numunagú mina veđenaki Guivahanimú gili alévolé ikago, Koliti veđená mukilite monó gili alévolé iake, monó nagamí hilamó.

<sup>9-10</sup> Lá ikago, gamena makó zupa holugú nene Guivahanimo Pauloni vamotoka utó o ameake láa loko lo amimó: Imane apakú veđená mukí není zuha lilí itaze, neza gizapa ogetonougo, ve makolimo ma gelémo golesa aminogo ive. Nenemú geza gelegesá legemiko monó noloko ahulamo. Avetó oko lokogó minozo.

<sup>11</sup> Loko lo amekago, geleake, neneloka nene Ómasímini gako lo keme keme oko noigo, kilisimasi hamoki ikani 6-agi vimó.

<sup>12</sup> Lá okago, Akaia mikasigú agulizaki ve napa minamó, agulizá Galió. Eza gizapa onigo, Zuta veđenalite ali apiziake Pauloni lova ali amiake, goní numutoka alimiki vake,

<sup>13</sup> imane ve nenémo li hukilita gako pelevesava zeake haitolímíniki Ómasi gupá zi amitave loko lagata aleaká noive.

<sup>14</sup> Liki likago, Pauló nene gako linogo igo, agulizaki ve Galió eza Zuta veđená láa loko lo kimimó: Agae, Zuta vese, imane vémo lihima golesa netá genavagi ale utó ilina, gakotini nene gele lukumuline.

<sup>15</sup> Lá onoiómoza, lekelisi nene gakotinimú itó ve makolitini kugulizaínimú itó li hukilikita gakokumú gako hoza nalemó nenazo, lekeza netatinive. Není netá nomive.

<sup>16</sup> Loko loake goní numukutí kimisele ahulokago, lememó.

<sup>17</sup> Limiake galinali monó numuni gizapa vema agulizá Sosteneni nene aputá viziake agulizaki ve Galioni avogisalo apelemóza, Galió eza ániogoake ániogo ahulamó.

*Pauló Atiokia numutoka atiginá oko vimó*

<sup>18\*</sup> Lá okago, Pauló eza Koliti numutoka koma minomo noitike, monó amegesaló mila veđená kemesosoka loake, Piliskaki Akuilaki kelémoko vike sipigú itiake, Silia mikasigú vinigi Kenekelea numutoka vi anitikago, Pauló gozapá Ómasímini agulizató ale moloko zopovala hukamimó nenazo, ámina gamenamú hukatove loko li gamena alitokago, neneló hukamó.

<sup>19</sup> Lá oake sipigú itiake vake, Epeso numutoka anitiake, Piliskako Akuilako neneló minikasigo, Pauló eza Zuta vetini monó numukú itike, kezagi monó ligili hagili iki minamó.

<sup>20</sup> Lá iake, kezagi minatune liki likago, óe loake,

\* 18:18: Nam 6:18

<sup>21</sup> kemesosoka nolike, láa loko lo kimimó: Ómasímo giliko lamaná okikoma lekelitoka goha atiginá oko atove. Loko loake, Epeso apá ahuloake, sipigú iteake vimó.

<sup>22</sup> Vike Sisalia mikasiuka aniteake, Zelusalega iteko vike Izesuni vegenala zuha agive-lagini ángoake, gekévaké loketamó. Lá oake, Atiokia numutoka atiginá oko lomoko vimó.

<sup>23</sup> Atiokia numutoka koma minake monó hozaló goha vike Galesia mikasiuka Pilikia mikasiuka numutó namató mohona ike Izesuni vegenala zuha luhúsini kelémo kii loke-tomo vimó.

*Apoló Epeso numutoka monó lo kimimó*

<sup>24</sup> Lá okago, Zuta ve makó minamó, agulizá Apoló, eza Alesatalia apató geta vémo Epeso numutoka anitimó. Ámina ve nene gakó heeváa loaká ve minoake monó gotolaú gakó gele asú imó.

<sup>25</sup> Eza Guivahanímini monó avetó iki li amikago, áminagó oko gilimó. Áisi Zoní nene vegená monó nagamí holoketa gakó, itó Zoní nene Izesukumú gili gakokó nene zazavagó gilimóza, ámina nene amuza moloko hee lokogó lo kemeko minamó.

<sup>26</sup> Lá noike Zuta vetini monó numukú itike apí oko monó ale akutoko lo kimimó. Lo nokimigo, Piliskako Akuilako keza gilikasike, álími apazá zikasike, Ómasímini monó lugáa li amesike alapizi hee hee lasimó.

<sup>27</sup> Lá ikasígo, Apoló eza Akaia mikasiuka vitove lokago, agivelage ali kii litake Izesuni vegenala zuhaloka luhuva netá nigiziki imane ve nene lekelitoka novikoma, álími lamaná ilo. Liki luhuva giziki amikago, aleko vimó. Vike Koliti numutoka aniteake, Ómasímo nasahili oketago Izesukumú gili alévolé a vegená kelémo vatí imó.

<sup>28</sup> Lá noiké monó gotolagutí gato kemeko, Izesú nene gologí oletative loko lo mololeta vema noive loko nenémíni mognáa vegenalitíni kovogisaló lo utó ike, Zuta vetini gakó aleko limike lo kimimó.

## 19

*Pauló Epeso numutoka monó lo kemeko minamó*

<sup>1</sup> Apoló eza Koliti numutoka noigo, Pauló nene mikasi holutó mohona noike Epeso numutoka anitimó. Neneló vike Izesuni vegenala zuha makó ángoake,

<sup>2</sup> loká oketake lekeza nene monó gili alévolé iake, Ómasímini Sikalahú alemó nehe. Loko loká okimikago keza láa liki lamó: Óe, Sikalahú noive loko gelemunimó nena.

<sup>3</sup> Liki likago, goha loká oketake lá ikamóza, lekelisi nene éhini gakó lamanató monó nagamí hílámó neve. Loko lokago, leza Zonini monó nagamí huluhá nena.

<sup>4</sup>\* Liki likago, Pauló láa loko lo kimimó: Zoní eza nene vegenalite kigika ale viligakumú nagamí noholoketake nemegealoka némegetoko ati ve agulizá nene Izesú anogo ize, aikumú gili alévolé itave loko lo kimimó neve.

<sup>5</sup> Loko Pauló lo kemekago, giliake, Guivahani Izesuni agulizató monó nagamí hílámó.

<sup>6</sup> Nagamí hilikago, Pauló nene gotóitó agizani moloko Ómasiloka loiká loiká noigo Sikalahú keitoka lemekago, haitopaitó konokutí monó li utó iká Ómasímini agepagutí gakó líkámó.

<sup>7</sup> Ámina vegená 12-a minamó.

<sup>8</sup> Lá ikago, Pauló eza Zuta vetini monó numukú itike monó ale akutoko Ómasímini gizapaló minoakalímini gakó lo keme keme oko kagata aleko noigo, ikani losive makole golamó.

<sup>9</sup> Lá okago, vegená lugáate gíníkaha iake Izesuni monó nene kemegea amemó. Kemegea amiake, mukí vegenalitíni kovogisaló Izesuni monokumú alivi letivi ikago, Pauló ahulokimiake aí vegenala zuha kelémoko vike kelémo nupa oake, gamena gamena ve makó agulizá Tilanó aí gakó apí o kemeaká numukú minikí monó ligili hagili iki minamó.

<sup>10</sup> Niago, Asia mikasiuka vegená nene Zuta vegenakí Kiliki vegenakí mukító keza Guivahanímini monó gili asú niago, kilisimasi lositá oko vimó.

*Sikevani gipalatini gakó*

<sup>11</sup> Lá noigo, Ómasímo Pauloni hize lé omikago, golvigí netá haitolímini mukí ale utó imó.

<sup>12</sup> Lá okago, nenemú vegená nenete akisipi taulímitunú nene Pauloni agupelotí vemo iliki vake kivisi vegenalitíni kugupeló milikago zokamó, itó kigikagutí holosi golesa itiki golisi vamó.

<sup>13</sup> Lá niago, Zuta ve lusaló ve lugáa numutó namató vigiki mihina amó nenete vegenalitíni kigikagutí holosi golesa kepeleko kimisilitune liki Guivahani Izesuni agulizató láa liki

\* 19:4: Mat 3:11; Mak 1:4-8

avevezaha iki lamó: Izesuni agulizá lamaná Pauló mohona oko loaká noi vémini agulizató golisi vitave loko nololeketune, liki lamó.

<sup>14</sup> Nene Zuta vetini guguni gizoaká ve napa makó agulizá Sikevá aí gipala 7-a keza ámina netá aliaká amó.

<sup>15</sup> Itó gamena makó zupa láa liki likago, holosi golesa nenémo láa loko lo kimimó: Izesuni mogonamú mota gelenouve, itó Pauloni mogonamú mota gelenoumóza, lekelisi nene hí ve niave.

<sup>16</sup> Loko loake, holosi agikagú mina ve nenémo alegetá vizevo oko kepelekago, golanímo alemó ze ze igo, kugupa zapakó numukutí limiake golisi vamó.

<sup>17</sup> Lá ikago, ámina gakó nene Epeso numutoka Zuta vevenaki Kiliki vevenaki keza gili asú iake kegepa gahava nomigo, Guivahani Izesuni agepoka lake sigaga litamó.

<sup>18</sup> Lá ikago, Izesuni monola gili alévolé iki minamoláa mukilite aniteke keza litha kemetameki minake netá golesa ali minamó nene li utó i asú amó.

<sup>19</sup> Lá iake, gozapá lusa hoza aliaká a ve lugáate lusa giaká a puku nene gita iki aliki ake vevená kovogisaló lokú gizamó. Lá iake, ámina puku nenémini meinava ale nupa iki gatamó nene, 10 tausen kina okago,

<sup>20</sup> muki vevená keza nenémini ikago, Guivahanímini gakolímo hutilí oko vike gihila zeko alévolé imó.

### *Epeso numutoka gopaga lamó*

<sup>21</sup> Lá okago, Pauló eza Masetonia mikasiuka itó Akaia mikasiuka vomo vomo Zelusalega vitove loko agata geleake Sikalahulímo alapizitó nene neza Zelusale numutoka anitekinae, nenelotí goha voko voko Loma apatoka vitove loko gele hamokó oake,

<sup>22</sup> alími vatí iaká asi ve Timotiko Elastoko kimiselekago, Masetonia mikasiuka goí iki vasimó. Ezáa nene Asia mikasiuka koma makó miní ameko minamó.

<sup>23</sup> Nene zupa Epeso numutoka Izesuni monokumú lova napa utó imó nene lá oko neve.

<sup>24</sup> Neneló silivatunú gonanalivagi netá loló oaká i ve makó minamó, agulizá Temetelió. Áisi nene soza ómai netáini agulizá Tianani numunáámini ameni koma koma loló oake, ezáagi izegipa agunalagi ámina hozalotí moni napa aliaká amó.

<sup>25</sup> Lá ikago, Temetelió eza izegipa agunalagi agive agave kelémo nupa oake láa loko lo kimimó: Náavegúe, lekeza hozale nenémo moni henokanoni ale utó olemeaká noimóma nene gilinave.

<sup>26</sup> Itó ve makó amó agulizá Paulóma nene, lekeza aí mogona giliki áninigave. Áisi nene Epeso numutokatí itó Asia mikasi lugalokatí vevená muki kagata hizeko kelémo gopa ike vevená kígizanitunú lílí amó ómai netá nene, netá gihila nomive loko lo kemeaká noive.

<sup>27</sup> Láa lomo mohona iko iko, lelí hoza nene liminogo ive, itó lelí ómai netá napa Tianani zagusavemú nene vevenalita gilikiko liminogo ive. Lá okiko nene, Asia mikasiuka vevenaki numutó namató vevenaki Tianakumú goliva gilikilí iki niminamóma nenazo, agulizá haha itihe loko nehelele vizekave.

<sup>28</sup> Loko lokago, giliake, kigikagú ló loake, kizapaló molokago, gakó napagutí láa liki lamó: Epeso vevenalita izoteho Tianá nene agulizaki vená napama nena, liki lamó.

<sup>29</sup> Liki likago, ámina apató vevená gopa napa iake alesesá hugumatoka ololo liki vake alesesá iake, Masetonia apakutí Paulogegi makó mihina iaká a ve lositá, kugulizá Gaioki Alistakoki nene kígizató aliake gelelehá iki iliki vamó.

<sup>30</sup> Lá ikago, Pauló nene geleake, vevenalitiní alesesakú vitove lokago, aí vevenala zuha keza géneka lamó.

<sup>31</sup> Lá ikago, Asia mikasiuka kugulizaki ve lugáa Pauloni zogova minamó keza vevenalitiní alesesakú vamitive liki gakó ahulikago, vimó.

<sup>32</sup> Vokago, alesesá hugumató neneló vevená keza gakó gopa napa lake, haitopaitó gakó liki minamó. Lá niago, lugáate nene netakumú nilaze liki gelemake, gopa minamó.

<sup>33</sup> Lá iki niago, Zuta vetini kigivéipini makó agulizá Alesateni nene alími etó iake gala viziake, ámina gakó lí amí amí ikago, eza holomaló itike Zuta vevenalitiní mogonáini hize lé inogo agizanitunú alata molamóza,

<sup>34</sup> áisi nene Zuta vema nena, liki giliake, kegepagutí kegepagutí lí hamó ake gakó napagutí nene Epeso vevenalita izoteho Tianá nene agulizaki vená napama nena, liki nilago, gamena aowa lositá oko vimó.

<sup>35</sup> Lá okago, kansoletiní gakató gizapa vémo kelémo zou loake, láa loko lo kimimó: Epeso apakú vese, Tianate napámini zagusave napa imaneló nemó itó okulumakutí aí vogunahana netá makó limimó nenémini gizapaváa amelagita noune. Ámina gakó nene numutó namató mota gili asú inave.

<sup>36</sup> Hí vémo nenéminoko nomive loko litive. Ma nomive. Nenemú lekeza likigika ali hulu iiki netá golesa alemilo.

<sup>37</sup> Imanueloka kilímiki a ve nenetosa ómai netatémíni monó zagusavegutí netá makó ali halake halake oaká nehe itó Tianani alívi galatívi ahe ma amasímóma neve.

<sup>38</sup> Lá okago, Temetelió itó hozaló agive agave keza ve makokumú gelego golesa noigoma lihímváinímú goní numutoka kíapegitoka kilímiki vikiko, neneló goní gako litave.

<sup>39</sup> Itó gako makó minokikoma nene, kansoletini alegesakú aliki vikiko gako hoza aliki gilitave.

<sup>40</sup> Lekeza itína nene gopa lova hizikamó ha akokave. Ámina gako nene kugulizaki vemate gilitamó nene nanave loko lo kumuko giliko lamaná itive. Ma nomive.

<sup>41</sup> Loko gizapa vemámo loake, kimisele ahulokago vamó.

## 20

*Pauló Masetonia mikasiukagi Kiliki mikasiukagi vimó*

<sup>1</sup> Epeso numutoka gako vívi vovoga lámó nene asú okago, Pauló nene Izesuni vegenala zuha sele lo kemeake, kagata aleake, ale kii lokimiake ahulokimiake, Masetonia mikasiuka vimó.

<sup>2</sup> Vigeko áni go asú ike, monó amegesaló mila vegená minamoláa monokú ale kii lokimi-ake, sipigú vike Kiliki mikasiuka anítimó.

<sup>3</sup> Neneló ikani losive makole minoake, age nagamí agataloka lomoike, sipigú Silia mikasiuka vinogo igo, Zuta vete giliake gohoni milamó. Pauló nene geleake, Masetonia mikasiuka ale atiginá oko mikasigú vinogo limó.

<sup>4</sup> Loko lokago, Pelea numutotí Piloni gipala Sopaté itó Tesalonika mikasigutí Alistakó ave Sekutó ave itó Telepe numutotí Gaio ave Timotí ave itó Asia mikasigutí Tikikó ave Tolopimó ave ve nenéate Paulogegi

<sup>5</sup> goi iki vake Toloa numutoka legeva iki minamó.

<sup>6</sup> Zuta vegenalitini avóikini asenini zeketakumú gili mina holisi asú okago, nezagi vegená makoki Pilipi numutotí sipigú itekunike gamena ligizani lugaloka asú igo oko novigo voko voko Toloa numutoka anitekunike, holisi hamó minuhá.

*Toloa numutoka Pauló monó lo kimimó*

<sup>7</sup> Minunike, leza nene holisi gamena Sategú holugú nene lepa nosá natune loko alegesá okunike, Pauló nene gó lokiko vitove loko noike, monó lo keme keme oko noigo, akovevé loló imó.

<sup>8</sup> Numuni amupiló agika makokú minuhakutí nene liví mukí guluma oko minamó.

<sup>9</sup> Lá onoigo, gipa makó agulizá Eutikó áisi nene Pauló monó hána hána lokago, hepé gatetó minake ahíhi imó. Ahíhi okago, avó ako heleake, miní amiki giliki ite numuni hepé gatetotí velehé limike mikasigú akoake helekago, ali otiki áni gamó nene, mota helekago,

<sup>10</sup> Pauló limike hitoko akoake apatá novizike, vegená láa loko lo kimimó: Lekeza ive nama amilo. Hanuva noike, sikalahú nomolave.

<sup>11</sup> Loko loake, numukuka itike lepa nosá kemeake, nosá koma namó. Niake, gamena hána monó ligili hagili iki niago, gó lámó. Gó lokago, Pauló nene ahulokimiake vimó.

<sup>12</sup> Novigo, vegená keza ámina gipa nene agómula gizoake otikumú mulúikú lamaná giliake, numunauka alímiki itemó.

*Pauló Epeso numutotí monó gizapa ve ikago gako lo kimimó*

<sup>13</sup> Lá ikago, Pauló áisi mikasigú gapo vitove loko lokago, leza sipigú itekunike Aso numutoka voko nouko, áisi mikasigú vimó.

<sup>14</sup> Vike Aso numutoka aniteake áni golimikago, sipigú alémo molokunike, makó vuhá. Voko mikasi pokola makotoka Mitilena apakú vo anitehá.

<sup>15</sup> Nenelotí sipigú goha novuko, gó lokago, Kio mikasi pokola agilikaloka avilegeko vunike, gó lokago, Samo pokolagú anitehá. Nene lotí goha vunike gó lago, Mileto apatoka anitekunike,

<sup>16</sup> Pauló nene Sikalahú limi holisi nekú Zelusalega voko minanogo uve loko limó. Nene-émú Asia mikasi nekisaloka noigo, Epeso numutoka vitomóza, vegenalite pasiminimiiko gamena hána vitihe loko Epeso apá avilegeake, sipigutí lemeake,

<sup>17</sup> mikasigú vike Mileto numutoka anítimó. Aniteake, alesa kimiselekago, Epeso numutoka vake monó gizapa ve lugáa kilímiki amó.

<sup>18</sup> Iki anitikago, Pauló láa loko lo kimimó:

Neza Asia mikasiuka aniteuke ganá lekelitoka oko moloko minumó lekeza mogonalotí gililiki itiki minamóma neve.

<sup>19</sup> Nénisi nene ánéámina ive nama okuke miluma guluke Guivahaniloka gelekelé otoko minumó.

<sup>20</sup> Lá uke, lekelémo vatí iti gakó nene ma hitoleketosá amumóma neve. Monó gakó nene vejená ali nupa iki minakú itó numutikú numutikú etó etó oko lo lekemeke minoaká umóma neve.

<sup>21</sup> Zuta vejenaki Kiliki vejenaki kigika ali viligiki línaha netá ahuliiki Ómasiloka viki gímiziki Guivahani Izesu Kilistokumú gili alévolé itave loko lakagata aleko minumóma neve.

<sup>22</sup> Itó itína nene Sikalahulímo litó Zelusalega novuve. Elaneloka vo anitekugo, nenitoka nana netá utó itihe, nene gele vevesamumóza,

<sup>23</sup> Sikalahulímo numutó namató vetitoka mohona oko nougo, kalapusi nagalímo itó miluma netalímo negeva oko noive loko lo nemeaká noive.

<sup>24</sup> \* Lá onoimóza, neza minoko aleko oko moloko ukumú gelekugo, itemive. Guivahani Izesú gapo velenimiake monó hoza nimimó nene aleko ale nolutiginake Ómasímo nasahilí olimiaká noimómámini gakó lamaná lo hutilí itove loko nigikatunú gelenouve.

<sup>25</sup> Itó makó nenegi litoze, gililo. Neza Ómasímini gasovaló minoakalímini gakó lo utó omo holutikú minoko aleko ugo, lekeza ánginamó nemóza, goha nogokaló ma ángaminigave.

<sup>26</sup> Nenemú ale akutoko lo nolukumuze, gililo.

<sup>27</sup> Nénisi golisi gelemuke Ómasímo agata geleneimóláa lo lekeme o asú onomú nenazo, lekelikutí makó nenémo latila itimó nene, nenémini lihima nenitoka minaminogo ive.

<sup>28</sup> Lekezatitini gizapa niiki Sikalahulímo gizapa veve loko loleketa vejená keza Guivahanímini vejenala zuha aí golanímo meina hizi vejená nene lamaná iki gizapa ikitalo.

<sup>29</sup> Neza ahulolikimikugo, soza monotó vejenalite hela galagitana iki lekelitoka anitiki lekemeni apili hilingave.

<sup>30</sup> Lá ikiko, lekelikutí ve makó utó iiki Izesuni vejenala zuhate ahulilikimiiki keitoka viki gímizitave liki monó ale gopa inigave.

<sup>31</sup> Nenemú lekezatini gizapa alévolé iki ilo. Kilisimasi losive makole oko novigo, gamena gamena gó lanama gó lanama ive nama uke lakagata alumó etó etó oko lo lekemeaká umó nene, ahulosá amumóma neve. Nenemú lekeza giliki minalo.

<sup>32</sup> Itína nene Ómasímo hize lé oleketative loko lekelémo aí agizakú nomuluve. Áisi nene alévolé gakolatunú lekelémo kii linogo ive. Lá okiko, niiko, gosohá kigika kelémo loló i vejená mukitoka miní amelikimikiko apiziki minanigave.

<sup>33</sup> Neza moni henokanonimú mesahakosaha oleketosá amumóma neve.

<sup>34</sup> Nezánemuki vejenáne zuhamuki neni nigizánitunukó lugupémíni netá ale utó moloaká umó nene mota gilínave.

<sup>35</sup> Neza haitopaitó netá loló nouke hoza amuza moloko alinake kee lamamoláa nasahilí oketatune loko nenémini gapováagi lekelepizenoumóma neve. Nenemú lekeza ámina gapogú niviki Guivahani Izesú nene ale nómonó nenémo gihila nomive, hanuva nasahilí oaká nenémo gihila neve loko limóma nene gili minalo.

<sup>36</sup> Loko Pauló lo ahulokago, ezagi kalapusa hiziki Ómasiloka lámó.

<sup>37</sup> Ómasiloka liake, ive nama ake kuputá kapatá vizeke kogoka kegepa namó.

<sup>38</sup> Lá iake, lekeza nogoka goha ángaminigave loko amunaloka li gakokumú ive nama goha iake, sipigú itekoko vitive liki alímiki getatoka lemémó.

## 21

### *Pauló Zelusale numutoka vinogo limó*

<sup>1</sup> Itó lezagi kezagi vo ezega emega unike, sipigú hee loko voko voko Kosi mikasi pokolagú anitehá. Gó lokago, goha voko voko Lota pokolagú anitekunike, voko Patala numutoka anitehá.

<sup>2</sup> Aniteko sipigutí lemekunike sipi makó Pinisia mikasiloka vinogo ali vatí niago ángokunike, nenegú itekunike,

<sup>3</sup> voko Saepalasi pokola ángokunike sogaloka nego avilegekunike, voko voko Silia mikasi liginaloka Tulo numutó anitehá. Neneló sipigutí nene henoni nahulago,

<sup>4</sup> leza Izesuni vejenala zuhatini numúitoka iteko nouko, holisi hamó oko vimó. Oko novigo, Sikalahulímo kigikagú hoza alekago, Zelusalega vamtive liki Pauloni agisa agizató amó.

<sup>5</sup> Lá ikago, neneló nouko, vituni gamena alitokago, keza vená izegipagi numu gatetoka lilími-likí vikago, getatoka lemeko lalapusa hizeko Ómasiloka lunimó. Lokunike, ligizakú ale lomala okunike,

<sup>6</sup> sipigú noituko, keza numúitoka atiginá iki vamó.

<sup>7</sup> Lá ikago, Tulo numutokatí voko Tolemai numutoka anitekunike, neneló Izesuni vejenala zuhagi gekéváké lokunike numuni hamokó akunimó.

\* 20:24: 2 Tim 4:7



<sup>8</sup> \* Akokunike gó lokago, voko Sisalia numutoka aniteko Izesuni gakó lamaná lo kemeaká i ve Piliponi ániogokunike, aí numukú iteko minunimó. Eza amunaloka ve 7-a monó hozaló kilími etó amómagutí ve makó minamó.

<sup>9</sup> Aí mohó getola losive losive nenete Ómasímini agepagutí gakó liaká a mohó minamó.

<sup>10</sup> \* Neneló miní ameko nouko, Zutaia mikasiukatí Ómasímini agepagutí gakó loaká ve makó agulizá Agapó nene

<sup>11</sup> lelitoka oake, Pauloni holotani aleake ezáa agisa agizató nozike láa loko limó: Ómasímini Sikalahulímo ámina holotanímíni amelahíni nene Zelusalega vo anitekiko, Zuta vete imanémíni imiiki hetoka vetitoka amisilí milíko, mogona golesa alapizinigave loko nolive.

<sup>12</sup> Gakó láa loko lokago, lezagi ámina apá amelagegi Pauló nene Zelusalega vamitive loko negénegeka lotunimó.

<sup>13</sup> Lokuko, Pauló láa loko limó: Lekeza nanamú ive nama goha niago milumatini noguluve. Neza Zelusalega nagá numukukó vitove loko nenemukopa, Guivahani Izesukumule loko hilitokumuki nigikámo vávani onoize, ahulikalo.

<sup>14</sup> Loko lokago, agata aleko luhá nene gelemigo, ahulokunike Guivahanímó gilíko alévolé ino loko lunimó.

*Pauló nene Zemusí noitoka vimó*

<sup>15</sup> Loko lokunike, gamena lugáagi asú okago, Zelusalega tovo itune loko ale vatí unimó.

<sup>16</sup> Ale vatí nouko, Sisalia numutokatí Izesuni vejenala zuha lugáa keza lilímiki víki Saepalasi mikasi pokolagutí ve makó eza Izesuni vejenala minamó, agulizá Manasó, aí numukú lilími milíkago, iteko minuhá.

<sup>17</sup> Minokunike, nenelotí Zelusalega tovo unimó. Neneló ligivetege lilími miliake, nasahilí ilimikago,

<sup>18</sup> akokunike gó lokago, Pauló eza monó gizapa ve napa Zemusini numukuka lelémoko itimó. Iteko nouko, monó ve olotiva imi asú amó.

<sup>19</sup> Imi asú ikago, kigizakú aleake, Ómasímo hize lé otago hetoka vejenatoka monó hoza aligo gihila zi gakó nene miní ameko aveté o kimimó.

<sup>20</sup> Nene gakó aveté o keme asú okago, giliake, Ómasi agepoka liake, Pauloni láa liki li amemó: Ligivetege Pauló, Zuta vejená tausen tausen mukí nene Izesuni vejenala zuha lilí iki niamole. Keza mukitó Mosé lo hukoko li gakó amuza miliki hizi lé iaká niave.

<sup>21</sup> Lá okago, geí gakó lá oko ago giliaká niave: Zuta vejená hetoka vejenalitini kigilikagú minimi vinamoláa keza Moseni gakó ali ahulatave loko kagata ale ale oaká noane. Itó izegipáinitini kugupeló Ómasímini anosa milikitamitave loko itó Zuta veta mogonataganate ahulatave loko lokimiaká noane.

<sup>22</sup> Liki imane apató vejenalite geikumú láa liki giliaká nianazo, itó géisi imaneló noani gakó gilínigi nianazo, kegepauka hulu itive loko nana itune.

<sup>23</sup> \* Nenemú leza gakó makó lo gimitunimó nene itanize. Lelitoka ve losive losive niamó keza Ómasímini agulizató netá makó loló itune liki li hukake, gotóini zopova hukamake hanuva nianazo,

<sup>24</sup> leza keitoka gelémo gímizekuko, kezagi Ómasímini avogisaló likígika vihelé aheletoko minative loko leza aleaká nouni suni alitaze. Lá ikiko, Ómasi guguni gizi amita netá meina hizekimikako, gizi vatá niiki zopováini hukatave. Geza lá itanimó nene, ániigiiki geikumú gakoka gelemó soza gakó gelegago, geza Mosé lo hukoko li gakó gele aleaká noane liki gilínigave.

<sup>25</sup> \* Itó hetoka vetitokatí gili alévolé amoláa keitoka luhuva netá gizoko lo hukuni gakó láa loko gizunimóma neve: Soza ómai netáini guguni gizi kimitakutí namitave loko, itó iza golani namitave loko, itó nagá ita izagutí namitave loko, itó mokoló netá lilí amitave loko lo hukoketunimóma neve.

<sup>26</sup> Liki likago, Pauló eza gakóini geleake, ámina ve losive losiveló gímizekago, akiake gó lokago, kugupe kígika nagamí ziki ali vihelé ahelé lake, Zuta vetini monó zagusave napagú itemó. Itiake, Pauló kugupe kígika nagamí ziki ali vihelé ahelé liaká a gamena lutigiti gakó itó Ómasi guguni gizi amita gamenamú nene lo kimimó.

*Monó zagusavegú Pauloni agizató alemó*

<sup>27</sup> Lo kemekago, netá matá ali guni a gamena 7-ama asú inogo noigo, Pauló nene monó zagusave napagú iteko noigo, Asia mikasiukatí Zuta ve makolite aí ániigiake, vejená mukí gala vizemó. Gala vizikago, Pauloni agizató aliaike,

<sup>28</sup> gamoga giki lamó: Eé, Isilae vese, iki lilími vatí amave. Imane vémo numutó namató mohona ike Zuta ve lelí lova ale limike Mosé lo hukoko li gakokumú itó lelí monó zagusavemú alevo letovo oko loaká noi vema nena. Itó lelí monó zagusavelegú Kiliki vevená kelémoko itekago, keza lelí monó numuni napa ali mumusopa zikave.

<sup>29</sup> \* Liki lamó nene Pauló nene Epeso numutotí hetoká ve makó Tolopimó áisigi niasigo, ángiáike, Pauló nene monó zagusavegú alémoko itihe liki ámina gakó lamó.

<sup>30</sup> Láa liki likago, ámina apá amelage mukilite giliáike, ololu liki iki alegesá iáike, Pauloni agizató aliáike, monó zagusave napagutí gelelehá iliki lemémó. Nílemego, litá iki gáhe gemó.

<sup>31</sup> Lá iáike, Pauloni alímiki apili hilinigi niago, gakóma nene Loma amitini gimisigi vetini gizapa ve napa áitoka vokago, láa loko gilimó: Zelusale vevená mukilite lovaga nilave,

<sup>32</sup> loko gakó geleake, ami ve iti minamó limi minamó kelémoko vike ololu liki keitoka lemémó. Lá ikago, keza Pauloni napeletotí nene gizapa ve napamagi ami vevagi anitikago, ángiáike, ahulamó.

<sup>33</sup> Ahulikago, gizapa ve napa nenémo anitike Pauloni aleake, goní itane loko loake, seni nagá lositatunú zitalo loko loketamó. Loketake, áisi hí ve noive itó nana netá golesa nalive loko loká oketamó.

<sup>34</sup> Loká okimikago, vevená lugáate ganimakilisi ake vivi vovoga nilakú gakó mogonáa gele hee lamike, ami vetini numukuka alímiki vilo loko loketamó.

<sup>35-36</sup> Loko lokimikago, alímiki vake numuni akaló iáike itinigi niago, vevená keza kémegetiki vake ganimakilisi iki vake imane ve asú itive liki likago, Pauloni apili hilinigi ago, ami vete aputá viziki ali milamó.

#### *Pauló ezáa mogonagamú lo kiminogo limó*

<sup>37</sup> Ami vetini numukú nene Pauloni alímiki itinigi niago, Pauló eza lova gizapa ve napama Kiliki gakokutí loká otake gakó lo gimitohe. Loko lokago, gizapa ve nenémo láa loko limó: Olo, geza Kiliki gakó gelenape.

<sup>38</sup> Gozapá Izipi ve makolímó gamani vevená lova ale kiminogo izegipa agunamotamola 4 tausen lovámini galaváa mikasi gomopalaló kelémoko vimó nenazo, geza ámina ve noape itó haitó ve noane.

<sup>39</sup> Loko loká omikago, Pauló láa loko lo amimó: Óe, nénisi nene Silisia mikasiukatí Taliso numutoka getamó nouve. Ámina taoni napa amelahina nouve. Itó geza gele nemekako, vevená imane gakó koma lo kimitohe.

<sup>40</sup> Loko lokago, kiapé nenémo gele amekago, Pauló nene akaló ote minake agizanitunú alata molokago, gakó hilinago, Hipulu gakokutí láa loko lo kimimó:

## 22

#### *Pauló ezáa agika ale viligakumú lo kimimó*

*(Apo 9:1-19; 26:12-18)*

<sup>1</sup> Uvónegita aménegita, nezáne mogonáne lo likimitoze, gililo.

<sup>2</sup> Loko kezáini konóikutí lo nokimigo, giliki laga laga hiliáike niago, miní ameko láa loko lo kimimó:

<sup>3</sup> \* Neza Zuta ve Silisia mikasigú Taliso numutoka getamó noumóza, imane apatoka Gamalielé lainim-olimiaká numukú iteko minoko napa umole. Lá okuke, monó lo neme-neme igo, avónegini aménegini gakó legesó oko minuke gele asú umó. Lá okuke, itína lekezagi ámina oko Ómasímíni agulizá ale ititune loko amuza moloaká nouné.

<sup>4</sup> \* Itó lá okago, Izesuni gapoló viaká nia vevená nene gopoguni moloketuke, ámina vevená asú itave loko lova ale kumuke ve niamó vená niamó mukitoka nagá kemekuke nagá numukú kelémo moloaká umóma neve.

<sup>5</sup> Guguni giziaká a vetini ve napagi monó gizapa vegi není mogonáa mota gilinamole. Keza lígive lagaveloka Tamasiko numutoka aleko vitane liki luhuva netá nimikago, elaneloka vinake Izesuni vevená nene nagá zeko kelémo Zelusale numutoka okugo nososani kipilitave loko lokuke, aleko vumóma neve.

<sup>6</sup> Gapoló novuke, Tamasiko apá ale alí nolugo, holisaká nene okulumakutí lapaná napa galinali gulugulu loko limike, osá o nugupe imó.

<sup>7</sup> Osá o nugupe okago, viligoko pou loko mikasigú akonougo, anó lupa makó láa loko gulumó: Saulo, Saulo, nanamú gopoguni nomolonetane.

<sup>8</sup> Loko lokago, neza Guivahani geza éagama ve. Loko lokugo, láa loko lo nimimó: Gopoguni molonimiaká noani ve Nasalete numutotí Izesunama noluve.

<sup>9</sup> Loko lokago, ve makó nezagi minamoláa keza liviláagó ánígamóza, gakó lo nimimoláa gelemamó.

<sup>10</sup> Lá okago, neza loká otoko Guivahanínemaka, nana ozo loko nolonetane. Loko lokugo, Guivahanímo láa loko lo nimimó: Geza otekoko Tamasiko numutoka vokako, Omasímo netá itane loko logetamó nene li giminigave.

<sup>11</sup> Loko lokago, ló lapanalámó nogómula hize likokago, goloutamigo nene límugusi zekago, vegeanáe zuhate nigizató aliki Tamasiko numutoka vamó.

*Pauló nene Ananiá lo ami gakó lo kimimó*

<sup>12</sup> Neneló ve makó minamó agulizá Ananiá. Áisi nene monolagi ve minake Mosé lo hukoko li gakó nene ale amegesaló moloko agizaka hizeko minokago, Zuta ve mukilite aikumú gelego lamaná oaká imó.

<sup>13</sup> Ámina ve nenémo nenitoka oko noutó ote minake nigivénege Saulo, geza gogómula goloutozo. Loko noli agepagi nogómula goloutokago, aí ánígumó.

<sup>14</sup> Nánigugo, gakó láa loko lo nimimó: Avotegini Ómasi áisi gilitimoláa nenéminoko loló itane loko, itó aí ve heeváa ánígatane loko, itó aí gakola gilitane loko gelémo etó okave.

<sup>15</sup> Geza aitokatí netá matá ánígoko geleko animó nenémini gakó nene numutó namató vegeaná lo kimitanize.

<sup>16</sup> Itó itína imane hanuva nanamú minatane. Litá oko otekoko Izesuni agulizá okoko, monó nagamí holokako, líhimaka asú inogo ive.

*Pauló hetoka vegeatoka viti gakó lo kimimó*

<sup>17</sup> Láa loko lo nemekago, Zelusale numutoka atiginá oko vuke, monó zagusave napagú ituke Ómasiloka nolugo, nigika viligokago, Izesuni ánígumó.

<sup>18</sup> Ánígokugo, láa loko lo nimimó: Apá imaneloka keza geí gegepagutí gakóne giliiki gili ahulanigi aze, nenemú géisi Zelusalegatí litá oko ahuloko vozo.

<sup>19</sup> Loko lokago, neza láa loko lumó: Guivahanínemaka, není mognatagana mukí vege-nalite gili asú ikave. Neza nene geikumú gili alévolé a vegeaná nene nagá kemekuke monó numukú numukú itegá lemegá uke, segi nogosanitunú kupulumóma neve.

<sup>20</sup> \* Lá okuke, geí gakó lo utó oaká ve Setepanoni apilinigi niake gínegeanéini gololohá iki milikago, gizapa noketugo, Setepanoni apili nihelego golani limimó. Golani lemekago, gelekugo, lamaná imóma nenazo, Zuta vegeaná monó lo kimitomó nene nigika ale viligu gakó giliiki ininá iniganae.

<sup>21</sup> Loko lokugo, Guivahanímo láa loko lo nimimó: Neza mikasi gohauka hetoka vetitoka nogimisuluze, vamae.

*Ami vetini gizapa vémo Pauloni gizapa otamó*

<sup>22</sup> Vegená keza gílinago, Pauló nene gakó lugáa lo kimimóza, hetoka vetitoka vitove likumú nene anotó aliake, ganimakilisi niake ve nenémináa asú itive. Helekiko lamaná oko minatune.

<sup>23</sup> Liki ganimakilisi iake, kizapaló molokago, gínegeanéini vizakiake, usilí nizeke mumu-sopa gitiki nahulago,

<sup>24</sup> ami vetini gizapa ve napámo lokago, numukú alímiki itemó. Lá ikago, vegeanalite nene ganimakilisi itamó nenémini mognáa lo utó okiko gilitove loake, segi nogosanitunú apilitave loko loketamó.

<sup>25</sup> Lokimikago, agísa agizató nene nagá alikago, Pauló nene gizapa venini makó láa loko loká otamó: Loma ve nounazo, goníne asú amitó segi nogosanitunú nipilitamó etatihe.

<sup>26</sup> Loko lokago, gizapa venini nenémo gizapa ve napa noitoka voko láa loko lo animó: Ámina ve Loma ve gihila nenazo, nana otatune loko nogelene.

<sup>27</sup> Loko lokago, gizapa ve napa nenémo Paulotoka vike loká otake Olo, geza Loma ve noape. Loko lokago, Pauló oo lokago,

<sup>28</sup> gizapa ve napa nenémo láa loko limó: Neza haitotokatí vémina moni napa molokuke Loma ve loló umóma neve. Loko lokago, Pauló nene lá okanimóza, neza Loma mikasi amelaho getamóma nouve.

<sup>29</sup> Loko lokago, Pauloni apilitune liki amó nene litá iki ahulamó. Ahulikago, ami gizapa ve napa nenémo Pauló nene Loma veve loko likumu geleake, nagá alitakumú ahelele vizimó.

*Kansoletini holúikú Pauló gakó lo kimimó*

<sup>30</sup> Lá okago, gó lokago nene lova gizapa ve napa nenémo Zuta ve keza Pauloni nene nanamú goní nitamó nehe nenémini mognáa gilitove loko guguni giziaká a ve napagi

\* 22:20: Apo 7:58

keí monó kansolegi sele lokago, mukí iki alegesá ikago, Pauloni vinasimiake alímiki hetoka lemeke kovogisaló alími milamó.

## 23

<sup>1</sup> Pauló eza kansole kivi holo minake, gakó láa loko lo kimimó: Nigivénegita, neza Ómasímimi avogisaloka nigika vihelé ahelé ligo, minoloko iteko minutímima noluve.

<sup>2</sup> Loko noligo, guguni giziaáká vetini ve napa Ananiá nene Pauloni amatoka minamoláa nene lekeza agepaló zemave.

<sup>3</sup> \* Loko lokimikago, Pauló láa loko lo amimó: Gigikagú guha holamó geza Ómasímo gipilínogo ive. Géisi Mosé lo hukoko li gapomaló nelémo gonitó molatove loko nolanímóza, ámina lo hukoko li gakó nanamú avutá okanike nipilitave loko gala novizene.

<sup>4</sup> Loko lokago, amatoka mina vegealite láa liki li amemó: Geza Ómasímimi guguni giziaáká vetini ve napama nanamú ale letoko nolane.

<sup>5</sup> \* Liki likago, Pauló láa loko limó: Nigive nagavese, monó gakó makó láa liki luhuva gizi milamóma neve: Geza agulizaki ve makó aleko letamo. Liki gizikago nemóma nenazo, áisi nene guguni giziaáká vetini ve napama noive loko gululina, láa loko lamuline.

<sup>6</sup> \* Loko loake, kansole vegutí lugáa nene Satukaio monó ve itó lugáa Palisaio monó ve minakumú ániñoike, gakó napagutí láa loko lo kimimó: Nigivénegita, neza Palisaio monó ve nouve, itó asizónege avónege Palisaio monó ve minamóma neve. Heleakakutí goha oteaká neve loko nene gakó gelenoukumú gonitó nilími nimilave.

<sup>7</sup> Loko lokago, Palisaio monó vegeenaki Satukaio monó vegeenaki liká ahuliká ake ake kogoka hotopotó imó.

<sup>8</sup> \* Lá amó nene Satukaio monó vegeenaki nene helenosakutí oteaká itó ageló itó vogúinigi ve nenémimi netá nomive liki liaká niago, Palisaio monó vegeenaki nene nenémimi netakumú netá gihila neve liki liaká niave.

<sup>9</sup> Lá okago, alegesá ikú vivi vovoga liake, Palisaio monó vegeenakutí kigilikagutí monó gelemoláa lugáate otiake gakó lolagi láa liki lamó: Imane vémini lihíamamú gelehá nomive. Ageló niamó vogúinigi ve niamó makolímó gakó lo ameneitimóma nene nanave loko litune.

<sup>10</sup> Liki liake, gopa napaga likago, ami vetini gizapa ve napa nenémo Pauloni gitigi ahulatahe loko alegesá legekago, ami veloka lokago, ake alími-liki limiake numúikuka alímiki vamó.

*Pauloni apili hílínigi gohoni milamó*

<sup>11</sup> Lá ikago, akiake gó lokago, makó holugú nene Guivahanímó Paulotoka utó oake láa loko lo amimó: Geza gelegesá legemino. Zelusalega není gakóne lo utó okane. Ámina oko Loma apatoka lo utó molanogo ane.

<sup>12</sup> Loko lokago, akiake gó lokago, Zuta ve lugáagi ali apizíake, lova gizake láa liki Ómasímimi avogisaló li hukamó: Nosá naminake mose keké o noinake, Pauloni apelekinake zahí nagamí natune.

<sup>13</sup> Liki la ve 40-a minake ámina gakó lova gizamó.

<sup>14</sup> Gona giziake, guguni giziaáká a ve napagi monó gizapa vetitoka viake láa liki li kememó: Leza nosánetá naminake mose keké onoinake Pauloni apelekinake nosá natune loko Ómasímimi avogisaló lo hukokune.

<sup>15</sup> Nenemú kansolegi lekezagi ami vetini gizapa ve napa noitoka gakó láa liki li milikiko, vino: Geza Pauloni lelí mulusiuka amiselekako, ino. Lá okoko gakoláa lo lamaná itunize. Lekeza láa liki likiko, gakatini gelekoko lá okiko, leza Pauló nene gapoloka noiko gohoni molonoinake apele hilitune.

<sup>16</sup> Liki likago, Pauloni vegimivámó gohoni milata gakó nene geleake, voko ami vetini numukú iteake, amolahini Pauloni lo amimó.

<sup>17</sup> Lo amekago, Pauló nene ami vetini gizapa ve napa makó noitoka alémoko vike láa loko lo amimó: Geza imane gipa nene gizapa ve napa noitoka alémoko vokako, gakó makó lo amitive.

<sup>18</sup> Loko lokago, ámina ve nenémo gizapa ve napa noitoka alémoko vike láa loko lo amimó: Nagá numukú noi ve Pauló sele loake gipa imane gakó lo gimitive loko lokago alémoko nouve.

<sup>19</sup> Loko lo amekago, gizapa ve napa nenémo gipama agizató aleake, amegesa vizitoka alémoko novike loká otake gakó nanave loko lo nimitape, lozo.

<sup>20</sup> Loko lokago, gipa nenémo láa loko lo amimó: Zuta ve keza Pauloni azo nene kansoletitoka alémoko lomokako, aí mogona goha vitagá itune liki loká igitanigi li nihukaze.

<sup>21</sup> Láa liki nilikoma gele kememo. Keí vejenakutí ve 40-a nosá naminake mose keké onoinake Pauloni apelekinake nosá natune liki lova giziake, gohoni nimilake géi gakokumú gegeva iki gizapa iki niave.

<sup>22</sup> Loko gipa nenémo lo amekago, gizapa ve napa nenémo lá loko nolike amisilimó: Geza gakó lo nenenimó nene vejená makó lo kememo, keké.

*Pauló kiapé napa Pelikí noitoka vimó*

<sup>23</sup> Láa loko loake, ami vetini gizapa ve losima sele lo kemeake, láa loko lo kimimó: Lekeza viki likisiko, ami ve mikasigú vitamoláa 200, itó hosi iza kemegealó vitamoláa 70, itó zokaitó alitamoláa nene ámina oko 200 nenémináate ali sekele viziki holugú alímiki Sisalia numutoka vitave.

<sup>24</sup> Itó Pauloni nene hosi alími miliiki legesó iki gizapa iki kiapé napa Pelikinimaloka alímiki vilo.

<sup>25</sup> Loko lo kemeake, luhuva netá láa loko gizamó:

<sup>26</sup> Neza Kalautió Lisiana kiapé napa Pelikítega, geké nologetuke luhuva netá imane gizo nogumuve.

<sup>27</sup> Gugulizaki venemaka, ami ve kezate ve makó nene alímiki nivaze. Ái nene Zuta vete agizató aliake, apilinigi ago, nénisi nene Loma ve noive loko gelekuke, ami ve kelémo-loko vuke, kigizakutí ipá unimó.

<sup>28</sup> Ipá okunike, gonitó alími milamó nenémini mogonáa gilitove loko keí monó kansoletini alegesá ikú alémoko lumumó.

<sup>29</sup> Alémoko lomokuke, neza láa loko gulumó: Kezáini vili milina gapomú gonitó alími milamóza, heleaká netakumupe nagá numukú voko minoaká netakumupe nene ma lamave.

<sup>30</sup> Láa loko gelekuke, vejená lugáa keza gohoni miliake ámina ve apele hilitune lamó gelekuke, geitoka litá oko amiselekugo, núane novive. Itó gonitó alími nimila ve ámina oko kimiselekugo, geitoka viki gakoláa li gimitaze.

<sup>31</sup> Luhuva netá láa loko gizokago, ámina holugú nene ami vete gizapa venini gakó gili aliake, Pauloni nene Atipatili numutoka alímiki lemémó.

<sup>32</sup> Limi nanitego, gó lokago, ami ve lugáa keza hosí amegesaló minamoláate Pauloni alímiki viki

<sup>33</sup> Sisalia numutoka anitemó. Anitiake, luhuva netáama kiapé Pelikini nameké, Pauloni nene agulizaki vemámini agizakú milamó.

<sup>34</sup> Lá ikago, kiapé eza luhuva netá gatoake mikasivamú loká otamó. Neza Silisia mikasigutí ve nove lokago,

<sup>35</sup> kiapé nenémo láa loko lo amimó: Gonitó gilími nimila ve keza ikiko, géi gakó litune. Loko loake, ami ve kemekago, Heloteni numuni napagú ahulimiake gizapa itiki minamó.

## 24

*Pauloni goní itamó*

<sup>1</sup> Numuni ligizani lugaloka asú igo akiake, guguni giziaká vetini ve napa Ananiá ezagi monó gizapa ve lugáagi vejená mukilitini kegepa aleko loaká ve agulizá Telutulómagi Sisalia numutoka lemémó. Limiki kiapetoka Pauloni goní itata gakó linigi vi anitemó.

<sup>2</sup> Anitikago, kiapé eza Pauloni sele lokago, okago, Telutuló nene goní otake láa loko limó: Kiapetega Peliki, geza vatí oko gizapa oletako, nonagá oko minoaká noune. Imane nouni ve lelí lelémo vatí oaká noako,

<sup>3</sup> numutó namató vejená mukí lelísi geikumú gelekuko, etoaká noive.

<sup>4</sup> Gakó hána lokugo goselé gepelekatize, nenemú gakó lagasó lo gimitomó nene geza hulu oko gele nimitane loko noluve.

<sup>5</sup> Áimane vemú lizapaló moloaká i ve noive. Áisi Zuta ve numutó namató vejená lelémo golesa ike lova hizitave loko gala vizeko loaká noive. Lá noike, Nasalete numutotí vemámini monó liaká a vetini améipo napa noive.

<sup>6-7</sup> Lá noike lelí monó zagusave napa ale mumusopa zinogo noigo, aleko noune.

<sup>8</sup> Géisi gonitó alémo nomulunimó nenémini mogonáa vítagá oko gezaka loká otoko mogonáa ale utó molanogo ane.

<sup>9</sup> Loko lokago, Zuta ve keza alími vatí ake gakola hizi lé itamó.

*Pauló Pelikini avogisaló ezáa mogonámú lo kimimó*

<sup>10</sup> Lá ikago, kiapé nenémo hanuva litive loko agizanitonú avevezaha o amekago, Pauló láa loko limó: Geza imane mikasiloka kiapé loló oko gizapa oletoko noako, kilisimasi mukí oko vokave. Nenemú geleneinake, gakó litove loko gena aminake linogo uve.

<sup>11</sup> Neza Zelusale numutoka Ómasi gupá ze amitove loko iteko minutotí nene gamenáa 12-asi oko vonoimole. Itó geza nenemú gagata losi gelekokoma vegená imane loká oketako li giminigave.

<sup>12</sup> Neza nene monó zagusave napagú itó monó numúikú itó numuni apáikú monokumú géneka háneka loko vegená keza lova hizitakumú kelémo alitó mulugo ánisá amave.

<sup>13</sup> Imane vete li negú managú iake gakóne nene li nigemenazo, nenémini gihiláa ma gelepizeminigave.

<sup>14</sup> Itó makó lo utó oko lo gimitoze, gelezo. Izesú veleleta gapo gosohakumú goselé kepeleaká noimóza, ámina gapoló mohona nouke avotegini Ómasi gupá ze ameká nouve. Itó Mosé lo hukoko li gakoki Ómasímini agepagutí gakó liaká a vete giza gakoki mukí gele zageaká nouve.

<sup>15</sup> Minoko vegená lamanaki golesagi nene Ómasímo helenosakutí kelémo otinogo ive loko ve imane kezagi nezagi gele zageko noune.

<sup>16</sup> Lá unike, Ómasímini avogisaló itó vegenalitiní kovogisaló nigika vihelé ahelé liko minatove loko gizapa okogó nominuve.

<sup>17</sup> \* Lá okuke, kilisimasi mukí nene mikasi mulaloka minokuke, vegená makolite moni ale nupa ikago Zelusale numutoka nigivénegini kimitove loko aleko umó. Okuke, guguni gizatamoláa ale etó okuke,

<sup>18</sup> monó zagusave napagú iteko nigika nugupe ale vihelé aheletoko nougo, ánigamó. Nenegú vegená mulusigú minoaká nehe itó vegená vivi vovoga loko minoaká nene nomimóza, Asia mikasigutí Zuta ve lugáa keza neneló minamó.

<sup>19</sup> Kéisi nene není lihima ániginamó netimó nene geitoka iki goní initanazo.

<sup>20</sup> Keí kansoletini alegesató nougo, není lihima makó ániginitamó nene imane nia vete li gimitave.

<sup>21</sup> \* Gakó hamokó holúikú minuke lumó nenemú gili golesa ahe. Gakó napagutí láa loko lo kumumó: Heleakakutí oteaká neve loko gele zagenoukumú gonitó nilími nimilago itína nene gonitó nilími nimilago nouve loko lo kumumó neve.

*Pauló nagá numukú minamó*

<sup>22</sup> Láa loko lokago, kiapé Pelikí nene gosohá monolá gele hee hee lo vi ve minake, Pauloni gakó lo asú amike gohalaló ale molokago, ha minamó. Lá okago, láa lokogó lo kimimó: Amí vetini gizapa ve napa Lisíá nene Zelusalegatí lemekiko, gakotini lo asú itove.

<sup>23</sup> Loko loake, amí vema láa loko loketamó: Lekeza Pauloni gizapa itíkí némíni manámini itamiki agivelage iki nasahilí otatune nilikoma, géneka lamilo.

<sup>24</sup> Hoza gakó láa loko loketake, gamena luguhá minoake, Pelikí eza Zuta vená Tulusilani alémoko itike makó niasike, Pauloni sele lo amekago, eza Izesu Kilistokumú gele alévolé i mogonamú lo kimimó.

<sup>25</sup> Vevesoko oko moloko minoakakumú itó ale hee hee loko aleakakumú itó gamena napaló goní oletati gakó nenemú lo kemekago, Pelikí nene ahelele vizekago, láa loko limó: Itína mota áminasí nenazo, nagató goha voko noako, gamena makó zupa sele lokugo, atane.

<sup>26</sup> Loko lo ameake, kiapé nenémo Pauló nene asene zenetatane loko moni nimitihe loko gele molo moloko minoaká ike, gamena gamena alesá moloake, gakó ligili hagili iki miniaká asimó.

<sup>27</sup> Lá iki niasigo, kilisimasi lositá oko vokago, kiapé makó agulizá Polokió Pestó áisi Pelikini hoza agepaló alimó. Lá noigo, Pelikí eza Zuta ve mulúikú ale lamaná ike Pauló nene nagá numukú noigo, ahuloake vimó.

## 25

*Pauló agulizaki ve napámo gakola gilitive loko limó*

<sup>1</sup> Pestó nene kiapé loló oake, gamena losive makolegó minoake, Sisalia numutoka minatotí mota Zelusalega itimó.

<sup>2</sup> Iteko noigo, guguni giziaká a ve napagi Zuta ve iti minamoláagi anitiake, Pauloni gakola li amemó.

<sup>3</sup> Lá iake, gapoló gohoni molonoinake apele hilitune liki lova giziake, kiapé Pestoni láa liki gala vizemó: Mulutegú ale lamaná oko Pauloni nene Zelusalega amisilitane loko lo nogumune.

<sup>4</sup> Liki likago, Pestó láa loko lo kimimó: Pauló nene Sisalia numutoka nagá numukú noive. Itó neza áminaloka litá oko lomoinogo uve.

<sup>5</sup> Nenemú Pauloni mogonatagana gilinitamó nene lekelitokatí gizapa ve makoki nezagi makó liminake goní itatave.

<sup>6</sup> Loko loake, gamena 8-ía nehe 10-ía nehe Zelusalega minoake, Sisalia numutoka lomoko vimó. Lá oake, gó lokago, goní numukú iteko Pauloni alímiki alo loko lokago, alímiki amó.

<sup>7</sup> Alímiki itikago, Zuta ve Zelusalegatí lemamoláa keza hizi vigiake vauva aliki li negú managú itiki goní itamóza, gihiláa ali utó milamamó.

<sup>8</sup> Ali utó milamago, Pauló eza gakóini aleko limike láa loko limó: Neza Zuta vetini li huka gakotini neha, itó monó zagusavelini neha, itó Loma ve agulizaki ve napama neha ma aleko mumusopa zesá amuve.

<sup>9</sup> Loko lokago, Pestó nene Zuta ve mulúikú ale lamaná inogo Pauloni lo amike limó: Geza Zelusalega gelémo-loko tovoko gakoka lo asú ogetatohe.

<sup>10</sup> Loko lokago, Pauló láa loko limó: Loma agulizaki vémini goní numuni imane nemole. Nenemú není gakó imaneloka lo asú itunimó nene lamaná itive. Geza není mognáne gelenanimole. Neza Zuta veđená netá golesa makó aleketamuve.

<sup>11</sup> Neza nipili hilita netá makó aleko ve golesa minutó nipilitove loko latilina, nugupe nehelele vizemilinanóza, keza sozagi lake gonitó nilími nilimlanazo, makolimo nene mulúikú lamaná gilitave loko kei kizizakú ma nelémo molamitimó neve. Nenemú Loma apatoka agulizaki ve napamámo není gakó giliko asú itive loko noluve.

<sup>12</sup> Loko lokago, Pestó eza kansole vevagi ligili hagili iake, Pauloni láa loko lo amimó: Agulizaki ve napamámo gakóne gilitive loko lokanize, agulizaki ve napa Sisá noitoka vitane.

### *Agilipako Pelenikeko Pauloni gakó gilinigi lasimó*

<sup>13</sup> Loko lokago, gamena makó oko vokago, mikasi gahevalokatí agulizaki ve napa makó Agilipá itó mohó agunala Peleniké keza Pestoni agizakú alitíve líki Sisalia numutoka asimó.

<sup>14</sup> Asike, keza gamena luguhá ezagi miniki aliki niago, Pestó nene Pauloni gakoláa agulizaki vema aveté o amike láa loko lo amimó: Pelikí nene nagá numukú ve makó ahulomiake vokago, noimó nene,

<sup>15</sup> neza Zelusalega itekugo, guguni giziaká a ve napagi Zuta vetini gizapa vetegi aí gakola makó li nimiake ámina ve nene apele ahulatune líki voká linitamó.

<sup>16</sup> Voká linimikago, neza láa loko lo kumumó: Loma ve lelí suni lá oko nomive. Leza veđená gopa kepele ahulosá amune. Ve makó nene gakola minokikoma, ámina vegi goní itata veđenaki kelémo nupa okuko, goní itata vete likiko, ámina vémo kei gakó gelekoko uve amuve loko ezáa linogo ive.

<sup>17</sup> Nenemú keza aí golesa netá litune líki imaneloka ikago, neza gamena hána minamuke gó lokago, goní numukú itekuke lokugo, ámina ve alímiki itemó.

<sup>18</sup> Alímiki itikago, aí lihimavalamú ma litahe loko umóza,

<sup>19</sup> gonitó alími míla ve keza otiake kezáini monóinimú itó Pauló nene hili ve makó agulizá Izesú nene heleneikutí oteake noive líkumú lova kogoka amó.

<sup>20</sup> Lova kogoka ikago, neza gakó néminámú nagata losi gelekuke, Pauló nene Zelusale numutoka itekiko gakoláa lo asú itupe loko lo amumó.

<sup>21</sup> Lo amekugo, Pauló eza Loma vetini agulizaki ve napámo gakóne lo asú onetative loko limó. Loko lokago, Pauló imaneloka nagá numukú ageva oko noiko, Loma apatoka agulizaki ve napaloka amisilito gamena alitokiko vitive loko lotumó.

<sup>22</sup> Loko Pestó lo amekago, Agilipá lo amike neza ámina vémo gakó makó liko gilitove loko noluve. Loko lokago, Pestó nene azo gilitanize loko limó.

<sup>23</sup> Loko lokago, akiake gó lokago, Agilipá ave mohó agunala Peleniké ave keza sekele mamusi ikasike, alegesá numukú itikasigo, ami vetini gizapa ve napagi ámina apató ve iti minamoláagi kémegetiki itemó. Iti asú ikago, Pestó lokago, Pauloni alímiki itemó.

<sup>24</sup> Alímiki itikago, Pestó nene gakó láa loko lo kimimó: Gugulizaki ve Agilipagama itó veđenáne lugáa, gakó lo likimitoze, gililo. Ve imane nánigamó aikumú nene Zuta ve mukilite Zelusale numutokagi imanelokagi nívi níviga lake minamitive líki negénegeka likago,

<sup>25</sup> neza nene hiliti lihimavalamú vitagá okuke, Loma vetini agulizaki ve napámo gakóne gilitive loko líkumule loko aitoka amisilitove loko lo hukokuve.

<sup>26</sup> Lá oko lo hukumóza, imane vémini lihimavalamú vitagá okuke, agulizaki ve napaloka luhuva netá gizatove loko gulugo, gena okave. Nenemú imane ve lekelitoka itó gugulizaki ve Agilipaga geitoka aí mognáa vitagá oko gelekinake luhuva netá gizatove loko alémo nouve.

<sup>27</sup> Neza nagá numukú ve makó lihimavalamú vitagá oko ale utó molamoko luhuva gizaminake Loma apatoka hanuva amiselekugo vitive loko gulugo gena okave, loko limó.

<sup>1</sup> Láa loko lokago, Agilipá eza Pauloni láa loko lo amimó: Gezaka mogonaka lokako gilitune. Loko lokago, Pauló nene agizani hisú oko gakola láa loko lo kimimó:

<sup>2-3</sup> Zuta vete gonitó nilími mili mili niave. Gugulizaki ve Agilipaga, géisi nene Zuta vetini monokumú lova logoka unike oko moloko oaká nouni mogonate géisi geleká noanimó nenazo, geí govogisalo litove loko mulúnegú lamaná gelekuve. Nenemú geza gelekako mulukagú hulu okíko, gakóne litoze.

<sup>4</sup> Nénisi nene umaki ve komaloti Zelusalega ve nigivénegini holúikú minuke napa uke, oko moloko umó mogaána nene Zuta vegenalite gilinave.

<sup>5</sup> \* Neza Palisaio ve monolímíni izolahini lílí iki mina vetini holúikú minumó neve. Minugo mogaána ánginamóma nenazo, kéisi litune likima hanuva linigave.

<sup>6</sup> Neza Ómasímo avotegini lo moloketa gakóma gihila zitive loko gele molo moloko noukumú imane gonitó nilími nimilago noluve.

<sup>7</sup> Nene gihila zitive loko Isilae vegená lelí mulusi 12 leza únaká neteká Ómasi gupá ze ameko mínoaká nune. Gugulizaki venemaka, hanuva lá oko gakó lamaná nene gele zagukumú Zuta vete gonitó nilími nimilave.

<sup>8</sup> Ómasímo hele vegená kelémo oteaká zámuzagi noikumú lekeza nanamú gilikago lá osá amimó neve liki giliaká niave.

<sup>9</sup> \* Itó neza Nasaleté numutóti ve Izesuni monó ale golesa itove loko hoza napa alitove loko nagata geleká umóma neve.

<sup>10</sup> Gelekuke, Zelusalega ámina hoza apí umó. Guguni giziaká a ve napaloka lokugo, luhuva netá nimikago, Izesukumú gili ame vegená mukí numutó namató nene nagá kememo mohona oko minumó. Lá okuke, kipilikiko hilitave liki likago, gakóini hize lé okimiaká umóma neve.

<sup>11</sup> Zuta vetini monó numúikú numúikú nene Izesuni vegenala zuha keza agulizá alivi letivi itahe loko nogosani kemeaká umóma neve. Lá okuke, nénisi nene lovámíni galaváa minuke, apá hotokagi gopoguni moloketoloko vumóma neve.

*Pauló ezáa agika ale viliga gakó lo kimimó  
(Apo 9:1-19; 22:1-16)*

<sup>12</sup> Lá oko nominugo, guguni giziaká ve napa nenete luhuva netá nimikago, keí gakató nene Tamasiko numutoka vitove loko novugo,

<sup>13</sup> holínaka lokó okago, agae, gugulizaki venemaka, lapaná makolímó ho nene avilegek-ago ángimó. Nánigugo, ámina lapaná nenémo okulumakutí limike, nezagi vegenáne zuhagi nouhatoka hize sata olimikago,

<sup>14</sup> mikasigú hupatoko akunimó. Akonouko, Ómasímíni anó lupámo lelí Hipulu gakokutí láa loko lo nimigo gulumó: Saulo, Saulo, nanamú gopoguni nomolonetane. Sisi loaká nogosani nene eza hosímo agisatunú zitimó nene miluma gilinogo ive. Geza hosi izatini suni aleaká noanimómámo nene miluma nogelene.

<sup>15</sup> Loko lokago, Guivahani geza éagamave. Loko lokugo, láa loko lo nimimó: Gopoguni molonimiaká noani ve Izesunama noluve.

<sup>16</sup> Geza ote minozo. Neza gelekéle izegipáne loló itane loko utó o nogumuve. Nene itína netá ánganimó itó minomo iteko netá matá gelepizugo ángatanimó nenémíni gakó lo utó oko minatane loko gelémo etó nouve.

<sup>17</sup> Zuta vegená imane itó hetoka vegenalitini kigizakutí gelémo ahulo ahulo ogetoko minatove.

<sup>18</sup> Lá okínake, hetoka vegenatoka gimiselekugo, kígika kagata kolosiko, netá golesa nene kemegeza amiiki lapaná nene alitave. Lá iiki Satani agizakutí ahulimiiki Ómasímíni agizakú minataze. Lá ikiko, lihimavámi ahulokimikugo, nenikumú gili alévolé inakumule liki vihelé ahelé liki niamolátini mulusigú vi hiliiki minanigave, loko lo nimimó.

*Pauló monó hozavamú lo kimimó*

<sup>19</sup> Gugulizaki ve Agilipaga, neza okulumakutí vamokitana netá ángimóma gele alekuke,

<sup>20</sup> \* ganá apí oko Tamasiko amelage itó alika Zelusale amelage itó Zutaia mikasigú amelaho ve itó hetoka vegená niamó keza kígika ali viligiiki Ómasiloka viki gimiziiki kígika ale viligoakalímíni gihila ali utó itave loko nene monó lo kemeko minumóma neve.

<sup>21</sup> Nenémíni umómave liki Zuta ve makolite monó zagusave napagú nigizató aliave, nepele hilitune liki niago,



<sup>22</sup> Ómasímo alata moloake nelémo vatí omo vova noigo, monola nene vejená iti minamó limi minamó mukí lo kemeaká nouve. Lá uke, Ómasímini agepagutí gako liaká a vegi Moseki alika utó iti netakumú li mila gako nene láa loko lo kemeaká nouve:

<sup>23</sup> \* Gologí oletative loko lo mololeta vema nene miluma geleko hilitive liki itó helemoláatini ale goí oketoko oteoko Zuta vejenaki hetoka vejenaki keitoka lapanalímini gako ale utó oketative liki li hukita gako lo kemeaká nouve.

*Agilipá monokumú gele alévolé itive loko agata alimó*

<sup>24</sup> Pauló ezáa mogonala láa loko lo nokimigo, Pestó nene gako napa like láa loko limó: Pauló, geza itínasa negi hizekane. Gamena gamena huhuva netá mukí gatoko minoaká anítimo itínasa negi nohizene.

<sup>25</sup> Loko lokago, Pauló láa loko lo amimó: Gugulizaki venemaka Pesto, negi gako lamuve. Gako lamaná gihila noluve.

<sup>26</sup> Gako nolumó nene, agulizaki ve napa Agilipá geleneive. Aitoka nene vávani oko litove. Nolu netá imane nene asugunatoka utó amimó nenazo, agulizaki ve Agilipá gele asú onomó neve.

<sup>27</sup> Gugulizaki ve Agilipaga, geza Ómasímini agepagutí gako liaká a vetini gako ma mota gele alévolé onope. Mota gele zagenane loko gelenouve.

<sup>28</sup> Loko lokago, Agilipá nene Pauloni láa loko lo amimó: Láa loko loko mino hána aminake Kilistoni vejenala loló itane loko nolape.

<sup>29</sup> Loko lokago, Pauló láa loko limó: Gamena hána nominoko loló itape itó mino hána amoko loló itape neza gelemuve. Gezagi ve lugáagi itínasa imane gako nolugo nigelemó mukitokagi Ómasímo lekelémo vatí iko nenikitana lílí itave loko noluve. Nígizató nagá zinamó nenemú lamuve. Monokumukó noluve.

<sup>30</sup> Loko lokago, agulizaki ve napa Agilipá ezagi kipeki mohó agunala Pelenikeki ve lugáagi otiake,

<sup>31</sup> hetoka nilemeke ligili hagili niake ve imanémo hiliti netá ahe nagá numukú minati netá ahe ma alemive.

<sup>32</sup> Liki likago, Agilipá nene Pestoni láa loko lo amimó: Ve imanémo Loma vetini agulizaki ve napámo není gako lo asú itive loko lamilina, gologí omikuko, hanuva viline, loko limó.

## 27

*Pauló Loma apatoka vinogo sipigú itimó*

<sup>1</sup> Pauló nene Italia mikasigú Loma apatoka vitive liki li hukikago, Loma ami vetini gizapa ve makó minamó, agulizá Zulió. Áisi ami vetini mulusi makó agulizá Agustonive liki lamó nene mulusiló gizapa oko minamó. Lá noigo, kiapé eza nagá numukú mina ve makoki Paulonigi nene Zulioni agizakú milikago, kelémoko vike sipigú nezagi makó itunimó.

<sup>2</sup> Ámina sipi nene Atalamito apatokatí okago, Asia mikasi age nagamí agilikaloka numuni apá mukí minató vitive liki likago, áminagú itekunike, Masetonia mikasigú Tesalonika numutotí ve makó agulizá Alistakó ezagi makó vuhá.

<sup>3</sup> Akokunike gó lokago, sipi nene Sitona numutoka vo anitekago, Zulió nene Pauloni alémo lamaná oake gele amekago, numutoka aniteake agivelagini áinigokimikago, nasahilí itamó.

<sup>4</sup> Lá ikago, goha sipigú itekunike novuko, vuni gapolokatí una napa alekago, Saepalasi mikasi pokola sogaloka nego una napa alemi liginaloka avilegeko vunike vunike,

<sup>5</sup> Silisia mikasi itó Pamapilia mikasi agilikaloka letoko vunike vunike, Míla numutoka Likia mikasigú anitehá.

<sup>6</sup> Neneló sipigutí lemekunike Alesatalia apatokatí sipi makó oko minamó nene Italia mikasiuka vinogo noigo, ami vetini gizapa ve nenémo lelémago, ámina sipigú itekunike,

<sup>7</sup> ako molo moloko silipa oko hana hana oko vunike vunike, Kinito apá liginaloka anitekuko, unámo lelémago gopa okago, numuni apá ahulokunike, Kiliti mikasi pokolámini agilikaloka una alemi liginaloka vunike, Salomone apá avilegehá.

<sup>8</sup> Silipa oko vunike vunike, Lasea apá agilikaloka apá makó agulizá sipi lamaná oko minoaká i apá neneloka génopa génopa oko vo helega unimó.

*Ohuhú napa alimó*

<sup>9</sup> Age nagamikú gamena hána vova vova oko nominuko, golini gamena alitokago nene, Pauló nene helekatune loko geleake,

\* 26:23: 1 Koli 15:20; Isa 42:6, 49:6

<sup>10</sup> kagata aleko limó: Náavegúe, goha vitupe loko gulumóza, vamitunimoláa onoive. Sipi ategekiko, henonigó golesa amitive. Vegenaki mukitoka age nagamikú limitupe loko gulumó, gena okago, noluve.

<sup>11</sup> Loko lokago, ami vetini gizapa vemámo Pauló li gakó gele ahuloake, sipiló aleaká i vegi itó sipi amelahiki keí gakó gele alimó.

<sup>12</sup> Lá okago, age nagamí ohuni ánigamó nene golini gamenagú nene sipi áminaloka minamitimó okago, nenemú Kiliti mikasi pokolaló ohuni makó minamó agulizá Poeniki nene ho nolimi agilikaloka, neneló voko nouko golini gamena asú itihe liki mukilite kagata aliki lamó.

<sup>13</sup> Likago, sogalokatí una makó hana hana oko alekago, mota sipigú vitune liki giliake, lukesava akiliki ali milikago, Kiliti pokola agilikaloka novuko,

<sup>14</sup> vo hána amuko, ámina pokolagutí ohuhú napa agulizá ezega agilikalokatí ohuhú nene amuzavagi utó oake,

<sup>15</sup> lape ale viligatimó okago, lizamuha zekunike ahulukuko, sipima gopa gapo veleko vimó.

<sup>16</sup> Voko pokola koma makó agulizá Kauta loko nene helegaloka nego ohuhú alemi liginaloka novuko, sipi koma makó gelelehá unimó nene nagamikú holatimó okago, génopa hoza aleko,

<sup>17</sup> gelelehá oko sipi napamagú ale molokunike, sipi napama atigitihe loko lepa nagatunú vóvotoko alunimó. Lá okunike, getanimogó o mina apá agulizaláa Silita loko netoka vokatune loko seli nene ohuhulimo aleko akúvasokative loko vinasoko ale molokuko, sipima gopa gapo veleko vimó.

<sup>18</sup> Lá okago, ohuhúma amuzavagi aleva aleva oko minamó. Aleko noigo, gó lokago, henoni lugáa nene age nagamikú ali ahuli ahuli amó.

<sup>19</sup> Lá iake, gó lokago, sipímini netá matala lugalokatí ámina oko ali ahuli ahuli amó.

<sup>20</sup> Lá iki mina gamena lugháma ohuhú napa aleva aleva oko noigo, ho ikani sonohí loko lapaná lamigo, vita gapo ánigamake voko gopa itupe liki kagata giliake kelegesá ligimó.

*Pauló kelémo huluga limó*

<sup>21</sup> Lá iki niake nosánetá mosiake, gamena hána minikago, Pauló nene holúikú oteake láa loko lo kimimó: Vegúe lekeza gakóne gelelina nene, itó Kiliti pokola ahulamutilina, henokanoni nene gopa amiline.

<sup>22</sup> Itína nene lekelisi lekelegesá legemino. Vegená nene golesa aminogo une. Sipigó golesa inogo ive.

<sup>23</sup> Holugú není gupá ze ameká nou Ómasimo gelekelé izegipala noutoka ageló makó amiselekago,

<sup>24</sup> lemeake láa loko lo nemekave: Paulo, geza kelegesá legemino. Geza Loma vetini agulizaki ve napama noitoka hanuva voko anitínogo ane. Gelenape. Ómasimo geí asega zegimikoko gezagi sipigú nia vegi asenini zeketanogo ive.

<sup>25</sup> Loko lo nimimó nenazo, nenemú nigivénegita, mulutikú lamaná gililo. Ómasimo li gakó nene haha amoakalímini nenazo, gakó imane lo nimimó nene áminaló molative loko gelenouve.

<sup>26</sup> Lá onoimóza, sipi nenémo mikasi pokola makotó voko hizeko lolosa ginogo ive.

*Nagamikú sipima zeko atigimó*

<sup>27</sup> Láa loko lokago, Atalia age nagamikú gopa gapo veleko nouko, holisi lositá oko vokago, holugú akovevé nene sipi amelage keza mikasi makó ale alitokune liki kagata gelemó.

<sup>28</sup> Giliake, nagá ahulikago, limimó nene, ve makolimo agizani alémo sipitoko molo geleko ánigamó nene 20-a voko alekago, komama nivake goha míli giliki ánigamó nene 15-así voko alekago,

<sup>29</sup> sipi nene gehani amupiló iteko zeko ategekative liake, kehelele vizekago, sipi agasalokatí lukesava losive losive ahulikago, lemekago, gó la la liki niago,

<sup>30</sup> minake sipi amelage keza sipi nene ahulokinake golisi itune liki giliake, sipi komama vinasí ahulikago, nolimigo, soza lake leza sipi agokalokatí lukesava makó ahulukuko limitive.

<sup>31</sup> Liki nilago, Pauló nene ami vetini gizapa vegi vegenala zuhagi láa loko lo kimimó: Ámina ve nene sipi napagú minamitamó nene, lekeza age nagamikú simá nanigave.

<sup>32</sup> Loko lo kemekago, ami ve keza sipi komámini nagala hukí ahulikago, sipi koma nene age nagamikú gopa gapo veleko vimó.

<sup>33</sup> Lá okago, gó latihe liki ageva minikago, Pauló nene ve mukitó láa loko lo kimimó: Lekeza nosánetá namake minilikí nitiki gizapa iki niago, holisi lositá oko novigo, lukugupe ahulikave.

<sup>34</sup> Nenemú nosá natave loko noluze, pelevesava zemilo. Nosá niki kii likiko, lekegepa vamiko, avasavagi hanuva vinogo une.

<sup>35</sup> Loko loake, mukitó áninginago, nosáneté makó aleake, Ómasi agepoka loake, gitegeko namó.

<sup>36</sup> Nokago, ángiake, mulúikú lamaná okago, ámina iki nosáneté namó.

<sup>37</sup> Ámina sipigú minuhaláa 276 vejená minoko,

<sup>38</sup> nosá noko lagatupa ahulokunike, sipigutí laisi gó nene hilulú iki ali ahulikago, sipi nene vávani oko itimó.

<sup>39</sup> Lá noigo, gó lo vesamá noigo, mikasi áningamóza, ángi hee lamake gopa iake, ohuni makotó getani gunula ángiake, lapema neneloka voko getatoka ititive líki gíliake,

<sup>40</sup> lukesava akíliake, nagala huki ahulikago, age nagamikú lemekago, iha nagalaló vinasiki gelelehá iake, seliváa ali otikago, hepélímo alike hilulú o-loko getani netoka novike,

<sup>41</sup> senató voko híze zagekago, sipi agokáa nene mikasigú híze gíliatoake minokago, age nagamilímo valahuká zeake sipi agasaloka zeko atígimó.

<sup>42</sup> Zeko ategekago, lapema ategesá okago, kalapusi vejená keza galanogosá ziki golisi vikatave líki ami ve keza kepele hilitune líki lova gízikago,

<sup>43</sup> gizapa venini nenémo Paulokumule loko lo hukoketake, galanogosá ziaká amoláa keza apí iki nagamikú olíi míli míli iiki galanogosá ziki víki getatoka ititave loko,

<sup>44</sup> itó galanogosá zemamoláa keza nene za gatapatoki sipi zevo ategevo imoláagi ali míli míli iiki neneló hilulú iiki víká itave loko loketamó. Láa loko lokimikago, leza ámina netá alekunike mikasiló avasavagi ite asú unimó.

## 28

### *Pauloge Melita pokolaló ítemó*

<sup>1</sup> Getatoka o asú okunike, mikasi pokola agulizá Melitave likago, guluhá.

<sup>2</sup> Ámina pokolagú nene numuká ve keza lílími lamaná ake nasahilí ílitamó. Golini zekago, hepé lepelekago, ló gizi límikago, lotá nouko,

<sup>3</sup> Pauló nene ló mosanakasana ale nupa oake, lokú nogizago, lokutí gosihá makó lokumú golisi epenape zeake, Pauloni agizató akoheake zoleme minamó.

<sup>4</sup> Lá okago, mikasi amelage keza agizató nene gosihá akoheake zuuto minakumú láa líki lígíli hagíli iki lamó: Vegená kepele ahulo ahulo ve noitinazo, age nagamikú lemeko helemike, gunahatoka itekago, lihíma naminazo, hílinogo ive.

<sup>5</sup> Líki nilago, Pauló nene gosiháma aleko atohe ahulokago, lokú lemekago, gosihalímo apelemimó geleake minamó.

<sup>6</sup> Lá noigo, keza lulu vizítíhe itó pou loko akooko hilitíhe líki ageva minamó. Gamena hána ageva minamó nene némini manámini amígo, ángiake, genezáini ali viligiake imane ve ómai netá netive líki lamó.

<sup>7</sup> Itó minuni apá agílikaloka agulizaki venini eza agulizá Pupilioni mikasi minamó. Áisi nene lelémo moloake, lamaná ike nasahilí oletago nene, aí numutó minunimó nene gamena losive makole minuhá.

<sup>8</sup> Nouko, Pupilioni amelahíni avisekago, matuna mesamá oká ase izapa vizeká okago, Pauló nene geleake, numunagú itike agizani nene gotolaló nomolake Ómasiloka líke alémo zokamó.

<sup>9</sup> Lá okago, ámina mikasi pokolaló kivisi vejená mukí lelitoka ikago, kelémo zokusimó.

<sup>10</sup> Nenemú vejená mulúikú lamaná gíliake, netá mukí lehízílitamó. Lá ikago, ikani losive makole goloake helekago, vituni gamena alítokago, gapolokamú nosáneté ali vatí ílimiake, sipigú ali míli míli ílitamó.

### *Pauló Loma apatoka anitimó*

<sup>11</sup> Ámina pokolaloka nouko, Alesatalia apatotí sipi gosohá nene golini golisi ámina pokolaloka minamó. Ámina sipímíni agokaló keí ómai netáini lopé izegipave líki avevezaha netá líki amó. Leza nene áminagú itekunike,

<sup>12</sup> vunike nene, Sílakusa numutoka anitunimó. Neneloka gamena losive makole minokunike,

<sup>13</sup> goha sipigú itekunike, unamú zová zeko vunike, Lekio numutoka anitehá. Neneló gó lokago, lemegejalokatí una aleake, lehelú oloko vígo, akokunike gó lokago gamena losítakó vunike Puteolí numutó anitehá.

<sup>14</sup> Anitekunike, áminaloka monó gele vejená ángokimikuko, lílími mílamó. Lílími mílikago, gamena 7-a kezagi minunimó. Nenelotí otekunike, mikasigú vunike Loma apatoka novunike,

<sup>15</sup> Izesuni vegenala zuhate gakote giliake, lugáa ake Apio hugumatoka hotu lunimó. Lugáa nene ake apá makó agulizá Hoteli Numuni Losive Makole netoka hotu luhá. Pauló nene ánígokimiake, mulunagú lamaná gilike Ómasi agepoka limó.

<sup>16</sup> Nenelotí voko Loma numutoka anitekuko, kiapé makolímó gele amekago, itó gizapa ve makolímó gizapa otago, hanuva numukú minasimó.

*Loma apakuka Pauló monó lo kimimó*

<sup>17</sup> Neneló numuni losive makole akoake, Zuta vetini monó gizapa venini sele lo kemekago, ikago, Pauló nene gakó láa loko lo kimimó: Nigivénegita, neza Zuta vegená nigivénegini netá golesa ma aleketamuve, itó avónegini mogonatagana ma ale golesa amumóza, keza gopa Loma vetini kígizakú nilími milikago, Zelusale numutoka kalapusi nememó.

<sup>18</sup> Lá ikago, Loma vemate neni mogonamú vitagá iake, hilitape liki amó nene hilito netá utó amigo, vinasinitanigi lamóza,

<sup>19</sup> \* Zuta ve keza géneka likago, neni nigivénegikumú gakó imaneloka alekoko litove loko amumóza, keza alévoleka liake, nipilitahe loko Loma vetini agulizaki ve napámo gakóne lo hukative loko lumó.

<sup>20</sup> Nenemú nene ánígolikimikinake lekezagi logele hagele itune loko sele lo lekemekugo, ikave. Neza Isilae vegenalite ageva iki miniaká nia vemule liki nigizató nagá zikago nouve.

<sup>21</sup> Loko lo kemekago, keza láa liki lamó: Elaneloka Zutaia mikasiloka nia vete géi gakó luhuva netá lememeve. Itó vegená makolite nenelotí iki géi mogonamú gakó golesa lago ma gelemune.

<sup>22</sup> Nenemú geza gakó aleneitanimó nene, gezaka lokako gilitune loko nolune. Lá onoimóza, numutó namató vegenalite ámina monó gakó gosohakumú alivi letivi niago, gelenoune.

<sup>23</sup> Liki liake, alegesá itune liki gamena milamó nene alitokago, Zuta ve mukí nenete Paulo akoaká i numukú vauva aliki alegesá amó. Lá ikago, Ómasímó gizapa okimiakalímíni gakó lamaná nene neteká apí oake lo-loko vova vova noigo, límugusi zimó. Lo nokimike, Mosé lo hukoko li gakókí Ómasímíni agepagutí gakó liaká a vetini gakoki luhuva giza gakó gato nokimike, Izesukumú gili alévolé itave loko kagata alimó.

<sup>24</sup> Lá okago nene, lugáa nenete gakola gili alikago, lugáa nenete gili ahulamó.

<sup>25</sup> Lá iake liká ahuliká iki liminigi niago, Pauló nene gakó hamokó láa loko lo kimimó: Ómasímíni Sikalahulímó agepagutí gakó loaká i ve Isaiani alémo vávani okago, gakó gihila nene avotikíni láa loko lo kimimóma neve:

<sup>26</sup> \* Geza voko vegená mulusigú imane láa loko lo kemezo:

Lakagatatunú giliakaláa hanuva gilitamóza, gili hee laminigave.

Lokogómulatunú hanuva ánígatamóza, ániigi hee laminigave.

<sup>27</sup> Imane vegená keza kígika hize lí okago,

kagata molokago, kogómula likokago,

kogómulatunú netá matá ániigi hee hee lisá amave.

Kagatatunú netá matá ma gili hee lisá amave.

Kígikatunú netá makó gili hee lisá amave.

Lá iake, kígika ali viligísá amago, neza nana oko kelémo lamaná itove

<sup>28</sup> loko luhuva gizamóma nenazo, nenemú gakó makó lo likimitoze, gililo. Ómasímó lugutó vizeaká gapo vilimó nene hetoka vegenalitíni mututoni neve. Kéisi vatí iki gili lamaná inigave.

<sup>29</sup> Loko Pauló lo ahulokago, keza limiake vamó.

<sup>30</sup> Pauló nene kilisimasi lositá nene Loma apatoka minake, ezáa netá matalatunú oko moloko oko minamó. Vegená keza iki víki iki minamó nene vatí iki ikave loko lo kemeake,

<sup>31</sup> Ómasímíni gasovaló minoakalímíni gakó lo utó oko lo kimike, Guivahani Izesu Kilistoni gakó ale akutoko lo keme keme oko noigo, némini manámíni itamago netá makó agupeló utó amimó.

## Loma Vegenalitini Luhuva Pauló Gizo Kimimó

*Loma vegená nónohá kimike gizo kimi gakó*

<sup>1</sup> Neza Paulona Izesu Kilistó eza gelekélé veva nelémo moloake aí aposolo minatane loko sele lo nemeake, Ómasímíni gakó lamaná lo utó oko ale hutilí itane loko nelémo etó imó.

<sup>2</sup> Ámina monó nene Ómasímo alika nene utó itive loko gozapá lo moloake aí agepagutí gakó liaká a ve gala vízekago, monó gotola apazá pukugú luhuva gizamóma neve.

<sup>3</sup> Ámina luhuva gizamó nene Ómasímíni gípala Guivahanite Izesu Kilistokumú luhuva gizinamóma neve. Helegaloka áisi nene hanuva agupegi utó imó nene agulizaki ve Tevitini agapilamó keí holúikú utó imóma neve.

<sup>4</sup> Itó helegaloka eza sikalahula gizopa lo minatímo Ómasímíni zámuzagi gípala gihila minamó nenémíni mogona nene heleake otikú nene utó o lamaná imó.

<sup>5</sup> Izesu Kilistotoka gímizumómave loko Guivahanímo nasahilí onetake aposolo hoza lehizenetamó nene, monó lo kemekugo numutó namató vegená keza Ómasimú gili alévolé iki gili alitave loko nelémo etó imóma neve.

<sup>6</sup> Lekelisi nene keí kigevéikita niave. Izesu Kilistoni vegenala zuha lilí itave loko sele lo lekemeneimóma neve.

<sup>7</sup> Loma numutoka Ómasímíni vegenala zuha lekeza mukitoka Ómasímo agika lekemeake apazá vegenala zuha lekelémo etó i vegená nene luhuva imane gizo nolukumuve.

Ameteho Ómasi itó Guivahani Izesu Kilistó aitokatí nasahilí itó hulu lekelitoka mino moloko minino.

*Loma vegená ániगतove loko Ómasiloka limó*

<sup>8</sup> Gakó láa liki apí iki gililo. Lekeza mukitó Izesukumú gili alévolé inamó nenémíni gakola nene numutó namató vegená keza gilikago lamaná imó nenemú lekelikumú Ómasi agepoka linogo Izesu Kilistotoka loaká nouve.

<sup>9</sup> Neza nene gipalámíni gakó lamaná noluke, nigikatunú Ómasi gelekélé omiaká noumó nene Ómasímo geleneive. Aí avogisaló gakó imane lokugo gililo:

<sup>10</sup> Neza nene numuna loaká nou gamena nene lekelikumú geleká nouve. Lá nouke, Ómasímo geleneitó netimóma nene gapo nelepizekiko, lekelitoka vitohe lokomú Ómasiloka loaká nouve.

<sup>11</sup> Láa loko nolumó nene eza nene lekelí voko ániगतetanogo geleká nouve. Vokinake, monolimíni zámuzá lehizenetamó nene gona moloko lekemekugo monokú alévolé iki minatave loko noluve.

<sup>12</sup> Gakó lo nolukumumó nenémíni mogona lá onoiwe: Neza lekelitoka vokugo, Izesunimú gele alévolé unimó nenémíni gihiláa eza ániगतiko eza ániगतiko okinake, luhusate ale kii loko minatune loko noluve.

<sup>13</sup> \* Nigivénegita, není mogonamú gili guni itave loko láa loko lo nolukumuve: Hetoka vegená lugáaloka oko moloko oaká noumó áminagó oko lekelitoka vinake, monó hozámíni gihila makó ale utó itohe loko geleká noumóza, vitove loko nougo nene, netá makolímó gapo hize lí onimikago minoaká nouve.

<sup>14</sup> Neza numuká vegenaki matúini koló o mina vegenaki, itó sukulu la vegenaki sukulu lama vegenaki monó lainim-oketatane loko lonetamó nenazo, ámina genaváa nenitoka ha minokave.

<sup>15</sup> Nenemú Loma vegená lekelitoka áminagó oko Izesuni gakó lamaná lo likimitove loko nigikámo vávani okave.

*Gakó lamanalímíni zámuzá*

<sup>16</sup> \* Ámina gakó lamaná nene Ómasímíni zámuzá nego Izesukumú gili alévolé ita vegená kugutó viginogo ive. Zuta vegená apí oko lá okimioko hetoka vegenaki lá oketanogo ive. Nenemú neza ámina gakó lamaná lo utó itokumú novoza helesá amuve.

<sup>17</sup> \* Ámina gakó lamanakú nene Ómasímíni avogisaló lihimate asú olimikago minatuni mogonáa utó oaká noiwe. Aí avogisaló lihimate asú olimikago minoaká nenémo gele alévolé oakakukó neve. Nenemú monó gotolaú gakó makó láa liki gizinamóma neve:

Gili alévolé ikamómave loko Ómasímíni avogisaló lihímáini asú okimikago minatamó nenete alévolé iki miniki aliki inigave.

*Vegená mukitoka lihimategi nouné*

<sup>18</sup> Nenémíni mogonáa lá oko nene. Vegená kigikagú nene monó nomigo, haitopaitó netá golesa aliki minake, Ómasímini monó gihila ali gopa napa iki miniaká niave. Lá niakumú Ómasímo izapaló molamó nenémíni mogona okulumakutí ale utó okave.

<sup>19</sup> Ómasímini mogona lugáa nene ezáa ale utó oketamó nenazo, kigikagú hanuva utó oaká noive.

<sup>20</sup> Ómasi áisi nene vegealita ángamoakalímíni mogona nene apí ike mikasi ale utó i gamenalatí ale utó imó nene aí alévolé zámuza itó ametameni haitó apazá nemó nene utó o lamaná okago, vegealite ezáa ale utó i netalímíni luhuva ángiake, aí mogonamú gili vevesiaká niave. Nenemú vegená lugáa keza gili gopa iki Ómasímini mogonamú gele vevesamune liki litamoláa nomive.

<sup>21</sup> \* Keza Ómasímini mogona gilinamóza, gilitigí gelemotigí iake, noamimó gelekago, agepoka lisá amave. Lá iake, kagata gelemó nene gopá napa okago, kigikagú límugusi zekago, negi hiziki mihina iaká niave.

<sup>22</sup> Lá niake, lagatagi nouné liki iaká niamóza, negi hiziaká niave.

<sup>23</sup> \* Lá iake, Ómasi alévolé ve nenémíni lapaná ali otiki gupá zi aminakutí kemegeza amiake, gaha namatini, itó gosihakahalitini, itó tolova iaká vegealitini vogunahanáini lílí iake, gupá zi kimiki miniaká niave.

<sup>24</sup> Nenemú Ómasímo ahulo taiza okimiake kiviholo ahulokago, kezáini kugupetunú sihana netá ali utó iake, kigika kagatámo kumu hili netá ali minake, gumesisi mokoló mogona haitopaitó ali utó ake iki miliki iki minake,

<sup>25</sup> Ómasímini gakó gihila kemegeza amiake, soza gakó ali gúiaká niave. Lá iake kelémo utó i ve améipini nene ahulimiake, netá matá ezáa ale utó i netá nene gupá zi amiki agepoka liki gelekelé imiaká niave. Kee, Ómasi agepoka loko mino lúaló moloko minatunimó nene etanogo ive. Lamaná.

<sup>26</sup> Nenemú Ómasímo ahulo hotó okimikago, kumu hilitó hilitó sihana netá ali utó amó. Lá ake, vená keza gapo Ómasímo kelepezimó nene ahuliake, haitó gapoló vake kezáini kugupetunú alemoaká suni ali utó amó.

<sup>27</sup> Ámináminiki ve keza nene ve vená oko minoaká nene ahuliake, kigikagú gumesisi mokoló mogonamú ló napa lokago, kezáikó mihina ake sihana netá haitolímíni ali utó iki minamó. Lá iake, ali gopá napa amó nenémíni meinaváa ámina avotigitó alemó.

<sup>28</sup> Itó lá iake, Ómasímini mogona gilitigí gelemotigí amómave loko Ómasímo ahulo hotó okimikago, kigika kagata nene gopa oakalímíni nagakú minake netá alemoakalímíni ali utó iki minamó.

<sup>29</sup> Lá ake nene, netá golesa haitopaitolímíni ali kumupiló miliake, henokanonimú molo hukahuka oaká, mukahá, kemekugú noaká, vegená kepele heleaká, lova ale utó oaká, kogoka vizeaká, aleko mumusopa zeko loaká, notuni mohona oko kemegeka loaká,

<sup>30</sup> alevo galatovo oaká, Ómasi mukahá apeleaká, kugupemú gelego iteaká, kezáini netá matáninimú kogoliza viziki kugupe ali otiaká, golesa netá nenémíni gapováa gosohá ali utó iake, izóikini améikini gakó gili ahuliake,

<sup>31</sup> kigika kagata nomimó keza gakó lamó nene ha oaká noigo, kigikatunú nasahilí amake milumaváini giliki kigika hizi kemema vegená niave.

<sup>32</sup> Ómasímo vegená nenémínáate nogosani natave loko lo hukoko li gakó gilinamóza, gili ahuliake, ámina netá golesa gopa ali minamóza, nene netakó alemave. Vegená lugáate ámina netá alikago, etokave liake, keikumú gilikago, iteaká noive.

## 2

### *Ómasímo lihimatemú ale vevesoko goní olimiaká noive*

<sup>1</sup> \* Nenemú vémage, Zuta ve noanitika itó hetoka ve noanitika, geza mogonakamú hize lé oko gakó litanimoláa nomive. Vegená lugáa keza lihima ali utó niago mogonáini lotuva legeaká noanimóza, gezagi áminagó oko golesa netá aleaká noanimó nene gezakamuki lokane.

<sup>2</sup> Ómasímo nenémíni iaká nia vegealitini lihimáinimú ale vevesoko goní okimiaká noive loko gelenoune.

<sup>3</sup> Lá onoi móza, vémage, vegená lugáa nenete netá golesa aliaká niago mogonáini lutuva legekanike nene gakó loaká noanimóza, gezagi áminagó oko golesa netá alekanike Ómasímo asene zenetative loko gelenape, olo.

<sup>4</sup> Ómasi eza nene nasahililagi huluvagi vaí o nego, litá oko nogosani gemesá amive. Nenemú gelekako ha netá loló okahe, olo. Geza nene gigika ale viligatane loko Ómasímo asega zike hulu zou gemeaká noimó nene gelemape.

<sup>5</sup> Geza negi nagi hízeko gigika hize lí okago gigika ale viligamanike, ló lónogó anike, Ómasímini izapaló molati netá ale nupa oaká noane. Gamena napaló Ómasímo nogosani limiti gamenaló nene eza lihimatemú ale vevesoko lo hukati gakó utó o lamaná noiko, nogosani giminogo ive.

<sup>6</sup>\* Ómasímo vegeanalita oko moloko unitímini meinava liminogo ive.

<sup>7</sup> Vegená lugáa keza Ómasímini lapaná alitune liki, itó Ómasímo lugulizá ale otitive liki, itó alévolé apá lehizeletative liki goselé kepelemigo amuza miliki mogona lamaná lílí itamó nene, alévolé kemetameni lehizeketanogo ive.

<sup>8</sup> Itó Ómasímini gakó gihila gili ahuliaká vegená gínikaha, netá golesa palasa ali minatamó keitoka Ómasímo izapaló molokiko mukahá netá ale utó moloko nogosani kiminogo ive.

<sup>9</sup> Lá noiko, gasovagi netá miluma netá nene netá golesa aliaká nia vegená mukitoka kumupiló itinogo ive. Zuta vegenatoka utó okoko nene, hetoka vegenatokagi utó inogo ive.

<sup>10</sup> Itó vevesiki miniki mogona lamaná lílí iki minatamó nene, Zuta vegenaki hetoka vegenaki mukitó lapaná itó hulu lehizekimikoko kugulizá ale otinogo ive.

<sup>11</sup>\* Ómasi nenémo vegenakumú gilimó iteká lemeká osá amive. Hamolímini okogó gona mololetanogo ive.

<sup>12-13</sup> Mosé lo hukoko li gakó kagatatunukó giliaká nia vegená Ómasímo ániagamó nene vevesosá amive. Mosé lo hukoko li gakó gili alita vegená keza vevesiki minanigave loko linogo ive. Nenemú Mosé lo hukoko li gakó gelemake golesa netá aliki miniaká niamó keza mukitoka gili vevesamiki miniki gopa tolova inigave. Itó Mosé lo hukoko li gakó gilinake golesa netá aliaká nia vegená nene Mosé lo hukoko li gakoquí gona moloko goní oketanogo ive.

<sup>14</sup> Hetoka vegená Mosé lo hukoko li gakó gelema vegená nene, kezáini kagata giliki lo hukoko li gakó nene hanuva ámegetikago, lo huka gakó kigikagú minamó nenémini mogona utó oaká noive.

<sup>15</sup> Mosé lo hukoko li gakoquí nenéminiki iki miliki itave loko Ómasímo li gakó nene kigikagú molonoimóma neve. Nenémini mogona ali utó iaká niave. Lo hukoko li gakó nene kigikagú molokamole liki kigika nenémo ale viligá aligá ike, lugaloka géneka loaká noive, itó lugaloka ámina mogona ha lílí ilo loko loaká noive.

<sup>16</sup> Gamena napaló ale vevesoko gona mololetanogo ive. Ómasímo Izesu Kilistoni amiselekiko, lemeko kigikagú asuganá minoaká noi gakó ale utó inogo ive. Neza Izesuni gakó lamaná loaká noutó noutó nene, áminagó oko lo utó oaká nouve.

*Zuta vegi Ómasímo lo hukoko li gakoquí*

<sup>17</sup> Gezakamú Zuta ve nouve loko lanitika, Mosé lo hukoko li gakó nenémo gotokaló za loló okago, leheta okanike minoaká noane. Lá okanike, neza Ómasímini mogona gele vevesonouve loko lokanike gugupe aleko iteká noane.

<sup>18</sup> Lá okanike, Ómasímo oko moloko itane loko gili netá nene gelekane, itó lo hukoko li gakoquí apí igimikago geleaká noane.

<sup>19</sup> Itó lá okanike gezakamú láa loko loaká noane: Nénisi nene monó gelemiki gatizá mina vegená nene hanuva gapo vitave loko kelémo lolo inogo uve loko loaká noane. Itó límugusigú niamó hize hanatokimiaká nouve loko loaká noane.

<sup>20</sup> Vegená kigika gopa imó nene kelémo hee litove loko loaká noane. Monó gelemake izegipa namunigitana iki mina vegená nene apí okimitove loko loaká noane. Neza Mosé lo hukoko li gakó alenoumó nenazo, nenegú geleakalímini itó gakó gihilámini ametamenia alekuke nouve loko loaká noane.

<sup>21</sup> Geza láa loko loaká noanitika, vegená lugáa monó apí okemeaká noanike, gezaka gigika nene alémo hehe losá amane. Geza vegenakumú gumina alemilo loko lo kemeaká anike, géisi nene gumina alesá amape.

<sup>22</sup> Geza nene vege venako huki ezega emega amilizo loko loaká noanike, géisi goha ze huko ezega emega oaká noape. Geza nene soza ómai netakumú aleko letoaká noanimóza, soza ómai netalímini zagusavegutí gumina aleaká noape.

<sup>23</sup> Geza nene Ómasímo lo huka gakó gelenouve lokanike, gugupe aleko iteká noanimó nenazo, lo huka gakó nene gele ahulokanike, géisi nene Ómasi goihá giligili omiaká noane.

<sup>24</sup>\* Nenemú lekeza Zuta vegenakumú monó gotolaú luhuva láa liki gizinamóma neve:

Hetoka veđená nenete lekelisi iki miliki a suni ángiake, Ómasi aliki letiaká niave.

<sup>25</sup> Mosé lo hukoko li gakó gele alitanimó nene gugupeló Ómasímini anosa miligitamó nenémo gihila zinogo ive. Lo huka gakó avutá itanimó nene, gugupeló Ómasímini anosa miligitamó nemóza, miligitamamó gilinogo ive.

<sup>26</sup> Lá onoimó nenazo, gakó nenémini lugaloka lá oko neve: Hetoka veđená makó keza Mosé lo hukoko li gakokú vevesoaká gakó gili alitamó nenete kugupeló Ómasímini anosagi minamitamóza, Ómasímo keikumú gelekiko anosagi minamó gilinogo ive.

<sup>27</sup> Lá okiko, Ómasímini anosagi nomí veđená keza Mosé lo huka gakó ámegetoaká noani ve Zuta ve geí moganaka lotuva liginigave. Geza nene monó pepa ale minanike Ómasímini anosa gugupeló minago minanike, Mosé lo huka gakó nene gele ahuloaká noanikumú geí moganaka lotuva liginigave.

<sup>28</sup> Makó keza hanuva kugupetunú Zuta veđená kemetameni iko minatamó nene Zuta veđená gihila niamave. Itó Ómasímini anosa kugupelokagó minatimó nenémo netá gihila nomíve.

<sup>29</sup>\* Kigikagú Zuta ve kemetameni iki minatamó nene, Zuta veđená gihila minanigave. Lo huka gakolímímini anosa nene lugupetunukó ale minoaká nenémo netá gihila nomíve. Ligikagú emane Sikalahulímímini anosa ale minoaká nenémo netá gihila neve. Ve nenéminámú veđenalita guluko lamaná oakaláa nomíve. Ómasímo giligo lamaná oakaláa neve.

### 3

<sup>1</sup> Nenemú Ómasímini agómulaló Zuta veđená leza hetoka veđená kivilegeko noupe. Itó lugupeló Ómasímini anosa nemó nene ha hetá nehe.

<sup>2</sup> Lá oko nomíve. Nenémo haitopaitolímínoko netá gihila neve. Ómasi eza Zuta veđená haitopaitó netá lehizeletonoikutí nene Ómasímini gakó lehizeletamó nenémo iteko neve.

<sup>3</sup> Itó Zuta veđená lugáa keza Izesukumú gili alévolé amakumú nene nanave litune. Gili alévolé amatímó nene Ómasi eza nónohá zeletative loko lo mola gakó ale ahulokahe.

<sup>4</sup>\* Óve, lá oko nomíve. Veđená mukító keza sozaló ve minatamóza, Ómasímo eza lokago alévolé oaká ve noive loko gilitune. Nenemú monó gotolaú Ómasímú láa líki gizinámóma neve:

Gakó makó nolako, gelekinake, nene gihilave loko gelekinake hize lé itune.

Mogonakamú lotuva ligikikoma nene, géisi kiviliginogo ane.

<sup>5</sup> Zuta veđená leza oko moloko nounimó nene hee lamítímó Ómasímini mogona hee limó nenémini mogona ale utó oaká noínazo, nenemú nanave litune. Ómasímini mogona lá oko minokanazo, nenemú eza nogosani limitimó nene etaminogo ive loko litupe. Mikasiuka vete láa líki liaká niamó nenéminoko gakó láa loko nolumóza,

<sup>6</sup> mogonáa lá oko nomíve. Ómasímini mogona hee loko minamilina, mikasiuka veđená nana oko goní oletoko nogosani limiline.

<sup>7</sup> Loko lokugo ve makolite láa líki litave: Soza mogonate nenémo Ómasímo gakó lokago alévolé oaká noitímímini mogona ale utó okago Ómasímini lapaná ale oteaká noínazo, Ómasímo lihimatemú nanamú goní oletative.

<sup>8</sup> Geí gakó nene gihila netimó nene lihima netá golesa loló oloko vosakutí Ómasímo miluma geletatímó lelitoka vaí okiko agepoka lituni netá lamaná goha utó itive líki litave. Nenikumú nene láa loko loaká noane líki lotoka hiziki aveté iki líli ali iaká niave. Némika líki liaká nia veđená nene Ómasímo hee loko goní oketanogo ive.

*Hehe líki nia veđená ma niamave*

<sup>9</sup> Nenemú nana ive. Ómasímini agómulaló Zuta veđenalita hetoka veđená kivilegeko noupe. Nenémini oko nomíve. Zuta veđenaki hetoka veđenaki leza mukító lihima netalímímini gelekeleléa nune loko lo utó oko lo lekemekuve.

<sup>10</sup>\* Nenémini mogonamú monó gotolaú gakó makó lá oko neve: Ve makolímó hee hee loko minamíve, keké.

<sup>11</sup> Makolímó gele vevesoko minamíve.

Makolímó Ómasímú sele loko vitagá osá amíve.

<sup>12</sup> Mukító Ómasímini kemegesa amíkave.

Pisila nomimokó niave.

Makolímó hee loko oko moloko osá amíve. Ma nomíve keké.

<sup>13</sup>\* Kigikagutí gakó golesa iteaká noimó nenémo gonosi anuva nenéminoko neve.



Kegezáini nenémo ali viligá aligá ikago, kogoka kagaka vizeaká gakó iteaká noive.  
Kegepagutí nene gipe lakegusa gakó utó oaká noive.

14\* Kegepagú nene usi vizeaká gakó, ekesá gakó vávani oko utó oaká noive.

15\* Lova ali utó iki kipilinigi kigisa agilaló lisiaká niave.

16 Mihina atoka vauna hizeaká noive.

17 Hulu gapo lamaná nene gili vevesisá amave.

18\* Ómasimú lelegesá ligitive liki kagata gilísá amave.

19 Itó láa loko geleaká noune: Monó gotoláú gakó gizinamó nenémo Ómasímo lo huka gakó amelagitoka vo aleaká noive. Lá okago nene, vegená mukitoka mognate lotuva legekago, gakó litunimoláa nomive. Itó Ómasímíni avogísaló mikasigú vegená mukitoka lihimategi noune.

20\* Ómasímo lo huka gakó nenémo lihimavate lelepizeaká noimó nenazo, nenemú ve makolímó Ómasímo lo huka gakó gele alekíko nenémo lihimavala asú omiakaláa nomive.

*Gele alévolé unikumule loko lihimate asú olimikago minatune*

21 Lá oko noimóza, itínasa nene Ómasímo lihimate asú oletatí gapo ale utó onoimóza, Ómasímo lo huka gakó ámegetoaká gapogutí nomive. Nene gapomú nene Moseki Ómasímíni agepagutí gakó líli ali vete luhuva gizi miliake hízi lé amóza, itína utó o lamaná okave.

22\* Lá oko neve: Izesu Kílistokumú gili alévolé amómave loko lihimáini asú okímikago niave loko loaká noive. Gili alévolé a vegená mukitoka lá okímíaká noive. Zuta vegenaki hetoka vegenaki mognate haitopaitolímínoko nomive. Hamolímíni oko neve.

23 Mukitoka netá golesa alunikeve loko gonanalivagi lapanakú vo holosá amune.

24 Izesu Kílistó eza lelí lihimá meina hizeletamómave loko Ómasímo hagítana oko nasahílí oletatímó lihimate asú olimikago minanogo une.

25 Aí nene ale utó oko lelepizekago, Izesú eza golani lepíke Ómasi guguni gizo amíke, golesa netate nene nagamí zelímikago, aikumú gili alévolé ita vegená mukitoka nenémíni gihíláa utó oaká noive. Itó lá imó nene Ómasímo golesa netá nene gamena hána ale-loko voko minuhá gamena zou loko minake asele zelímíake nogosani lemémíke mino-loko voko noítímíni mogona nene vevesave loko lelepizímó.

26 Lá noike Izesukumú gili alévolé itamó keza lihimáini asú okímíkíko minata mogona itó ezáa vevesoko oko moloko oaká noi mogona imane gamenaló utó itive loko lá olimíaká noive.

27 Mosé lo huka gakó gele aleakakú negopa, Izesukumú gele alévolé oakakú lihimate asú olimikago minatune. Nenemú lugupe aleko iteakaláa nene asú okamóma neve. Ámina gapo nene Ómasímo híze lí okamóma neve.

28 Nene gakokumú láa loko gilitunize: Izesukumú gele alévolé osatímó Ómasímo gelekíko, lihimavate asú olimíkíko minanogo une. Ómasímo lo huka gakó gele aleakakú nomive.

29-30\* Ómasi aí mogona nene hamokó nenazo, Zuta vegená itó hetoka vegená mukitoka Izesunímú gele alévolé unikumule loko lihimá mololetaminogo ive. Lá onoinazo, Ómasi eza nene Zuta vegená lelí Ómasígó nomive. Ómasi nene Zuta vegenaki hetoka vegenaki mukitó Ómasile noive.

31 Nenemú gele alévolé oaká gakó ale otekunike lo huka gakó pelesa zeaká noupe. Lá oko nomive, keké. Lo huka gakó nene híze lé oaká noune.

## 4

*Avalahá lihimate asú olimíkíko minatuni gapogú ale goí imó*

1 Lihimate asú olimíkíko minatuni netakumú avoteho Avalahani mogonamú lo moloko lo líkímítoze.

2 Aí oko molokogú nene netá lamanakó oko moloko ikumulé loko Ómasi eza lihimavala asú omíkave loko lílina, Avalahá ezáa agupe aleko itílinamóza, nenémínoko nomive. Ómasímíni avogísaló ezáa agupe aleko ítemive.

3\* Nenemú monó gotoláú gakó láa líki gizinamóma neve:

Avalahá eza Ómasimú gele alévolé okago, nenemule loko Ómasímo gelekago, lihimavala asú omíkago minamó neve.

4 Ve makó eza hoza alekíko, meinaváa amitakumú nene hanuvamú namive líki laminígave. Hoza alítímíni meinaváa namive líki litave.

\* 3:14: Age 10:7 \* 3:15: Isa 59:7-8 \* 3:18: Age 36:1 \* 3:20: Age 143:2; Gal 2:16 \* 3:22: Gal 2:16 \* 3:29-30:

Gapo 6:4; Gal 3:20 \* 4:3: Apí 15:6; Gal 3:6

<sup>5</sup> Makó eza mogona lamaná ale-loko vitimó nenegú voko leheta amoko Ómasi eza ve golesatini lihimaváini asú okimiaká noi vemú gele alévolé itimó nene Ómasímo lihimavala ale ahulomikuve loko linogo ive.

<sup>6</sup> Tevití eza nene áminagó oko Ómasímo ve makó mogona lamaná ali-liki vitakumú gelemoko lihimaváini asú okimikuve loko loketa ve makolite nene kogoliza vizitakumú láa loko luhuva gizamóma neve:

<sup>7</sup> \* Lihimaváini ahuloketakumú, itó golesa netáini gilatoketakumú giliake kogoliza viziaká niave.

<sup>8</sup> Vegená makó nene Ómasímo lihimáini moloketonamimoláa keza kogoliza viziaká niave.

<sup>9</sup> Ámina logoliza vizeaká netá nene Ómasímuni anosagi nominuni ve Zuta vegená lelikó nomive. Hetoka vegenaki mukitó neve. Avalahakumú láa loko geleaká nounge: Eza nene Ómasimú gele alévolé imómave loko lihimavaka asú ogimikuve loko lotamó neve.

<sup>10</sup> Nana gamenaló lá imó neve. Agupeló Ómasímuni anosavagi noigo nehe, itó nomigo noigo nehe. Nomigo noigo lá omikamó nenazo, nenemú ámina anosa alitímo lihimala asú otamimó neve loko gelenounge.

<sup>11</sup> \* Áisi nene agupeló Ómasímuni anosavagi nomimó minake, Ómasimú gele alévolé okago, Ómasímo gelekago, lihima asú otamó nenémuni mogona alapize asú oake, alika nene ámina anosa amimó. Avalahá eza lá ike, kugupeló Ómasímuni anosa nomi vegená keza Ómasimú gili alévolé ita vegenalitini améipo loló onoimóma neve. Kezamuki Ómasímo gelekago, lihimáini asú okimikiko minatave loko lokimikave.

<sup>12</sup> Lá okamóza, anosagi nounimoláa lelí ametehogi noive. Zuta vegená leza lugupeló Ómasímuni anosagi nounikumule loko nomive. Gele alévolé oaká gapo nene avoteho Avalahá eza agupeló Ómasímuni anosa velesá molamike apí oko veleleta gapogú vunike gele alévolé unikeve loko anosagi nounimoláa lelí ameteho noive.

*Gele alévolé unikumú Ómasímo lo mololeta netá aleaká nounge.*

<sup>13</sup> \* Ómasímo Avalahanígi agapilamolagi mikasi ali lá itave loko lo moloketamó nene, Mosé lo huka gakó ámegetakumú nomive. Ómasimú gele alévolé ikumú Ómasímo lihimavaka asú ogimikugo vevesoko minokane loko lo amimó.

<sup>14</sup> \* Mikasi ali lá itave loko lo moloketamó nene lo huka gakó ámegeta vegenalitini mututoni loló ilina, gili alévolé amó nenémo pisila minamimó loló iline, itó lo mololeta gakó nene ha netá loló iline.

<sup>15</sup> Lo huka gakokú nene Ómasímo gili alemita vegená nene goní oketanogo ive loko lonoimóma neve. Lo hukoko li gakó nene vegenatoka nomitimó nene ámina gakó gele ahuloakaláa minaminogo ive.

<sup>16</sup> \* Nenemú netá mololetamó nene alitune loko gele alévolé unimómave loko ámina netá lelitoka utó inogo ive. Nene nanamú. Áisi nasahilí olimikakeve loko, Avalahani agapilamó lelí mukitoka nene lo mola netá voko alévolé inogo ive. Lo huka gakó ámegeta vegená keikó nomive. Avalahá nene Ómasímuni avogisaló lelí mukitó avoteho minake, gele alévolé oaká gapo veletamó nene, ámina gapogú voaká nuni vegená Zuta vegenaki hetoka vegenaki leza mukitó netá neve.

<sup>17</sup> \* Nenemú Ómasímo Avalahani láa loko lo moloko lo ami gakó nene monó gotolaú láa liki gizinamóma neve:

Nénisi nene geza numutó namató vetini améipo minatane loko loló nogetuve.

<sup>18</sup> \* Avalahá helenosakutí lelémo otitove loko hanuva lelémo oteaká noi vemú, itó utó ami netá nene aí gakotó utó oaká noi vemú gele alévolé imó neve. Itó agapilamó zuha hizi hutilí itave loko láa loko lo molota gakolímó gihila ziti mogona nomigo, Avalahá gopa gele alévolé oko agata losi gelemike gizapa oko minamó. Gagapilamó nene sonohí nenémuniki utó iki minanígave loko li gakotó numutó namató ve mukilitini avóipo loló oko minatikumú agata losi gelemike ageva oko minamó.

<sup>19</sup> \* Lá oake, Avalahani kilisimasiva nene 100 minake, ozaha molokago, Salá nene gelehosi moloake izegipa getati gamena asú okamóza, itó ezáa agupe gisulupa molokamóza, lá okamómave loko Ómasimú gele alévolé imó nene gologolo samimó.

<sup>20</sup> Ómasímo agapilamó zuhamú lo moloko lo ami gakó nene gelekago, haha amimó. Hanuva gele alévolé oakakú amuza moloko minake, Ómasi agepoka loko minamó.

\* 4:7: Age 32:1-2

\* 4:11: Apí 17:10

\* 4:13: Apí 17:4-6, 22:18-19; Gal 3:29

\* 4:14: Gal 3:18

\* 4:16: Gal 3:7

\* 4:17: Apí 17:5

\* 4:18: Apí 15:5

\* 4:19: Apí 17:17

<sup>21</sup> Eza Ómasimú giligo, itekago, Ómasímo netá makó loló itove loko nogómulaló lo molone-tamó nenazo, gihila zinogo ive loko gilimó.

<sup>22</sup> Nenemú Avalahá gele alévolé imómave loko monó gotolaú Ómasímo gelekago lihimavala asú omikago minamó neve liki luhuva gizinamó neve.

<sup>23</sup> Itó Ómasímo gilimó nene lihimavala asú otamó neve loko li gakó nene Avalahakumukó nomive.

<sup>24</sup> Lezamuki luhuva gizamó neve. Guivahani Izesú heleneikutí alémo oti ve Ómasimú gele alévolé okuko, lelí nene ámináminoko lihimate asú olimikave loko loletanogo ive.

<sup>25</sup>\* Izesuni nene lelí lihimamule liki heleaká gapoló alími milámoma neve. Itó lihimate asú olimikamole loko Ómasímo alémo otimóma neve.

## 5

### *Lihimate asú olimikago nominuhatímíni gihiláa*

<sup>1</sup> Leza Izesunimú gele alévolé unimómave loko Ómasímo lihimate asú olimikave loko gelekago, Guivahani Izesu Kilistotoka voko gímizekunike Ómasímíni hulugú noune.

<sup>2</sup> Izesú áisi nene gahe segelimikago gele alévolé unikeve loko Ómasímíni nasahilikú nominune. Lá oko nounike, Ómasímíni lapaná alitune loko lagata losi gelemoko ageva oko logoliza vizeko noune.

<sup>3</sup> Itó nenegó nomive. Gasova netalímíni agikagú minoko aleko nounike logoliza novizune. Lá nounike, láa loko geleaká noune: Gasovagi netakú minoko aleko nouhá nenémo lagele loló okiko goselé lepelemiko minanogo une.

<sup>4</sup> Goselé lepelemitimó nenémo alévolé okuko, Ómasímo mogonatemú gele lamaná ingo ive. Itó mogonatemú gele lamaná itimó nenémo okulumaká henonimú lagata losi gelemoko ageva oaká netá ale utó oaká noive.

<sup>5</sup> Itó Sikalahú lehizeletamó nenémo Ómasímo agika lemeaká noi netá ligikagú leke vaí imó nenazo, nenemú ageva oko minoaká nouhá netakumú nene hanuva ageva osá amune.

<sup>6</sup> Ómasímo mola gamena alitokago, leza zámuzate nomigo gámemé onouko, Kilistó eza veená golesa lelikumú hilimó.

<sup>7</sup> Ve hee loko minati vemule voko vávani oko heleakaláa nomimóza, ve lamanakumule loko heleakaláa gena otigí oko utó ilinamó nemóza,

<sup>8</sup> Ómasi áisi nene agika limi mogona lelepizimó nene golutuva netá ale-loko novuko Kilistó lelikumule loko nohiligo agika lelitoka mola mogona nene ale utó imóma neve.

<sup>9</sup> Lá noike, Kilistó eza golani lepíkeve loko lelí lihima ahulo asú oletamó nene gihila nenazo, gamena napaló Ómasímo lihimatémíni meinava limitikutí gologí oletati gakó nene lamaná gihila neve.

<sup>10</sup> Lélisi nene Ómasímíni gala veva nouko, gipala hilike lezagi Ómasígi goha lelémó apizimó nene gihila nenazo, lelémó apizekago, Izesú nene gosohá ametamenigi minoko aleko noitímó lugutó vizekago noune loko gele alévolé onoune.

<sup>11</sup> Itó nenegó nomive. Guivahanite Izesu Kilistó lugutó vizike itína Ómasígi lelémó apizekago leza Ómasimú logoliza vizeaká noune.

### *Atako Kilistoko*

<sup>12</sup>\* Nenemú láa loko gilitune: Ve hamó Atakumú lihima netá nene mikasigú utó imó, itó golesa netá alimó nenémo heleaká netá utó imó. Lá okago, veená mukilite lihima alinatímó heleaká netá nene veená mukitoka puu loko vo alimó.

<sup>13</sup> Mosé lo hukoko li gakó velesá utó onamigo lihima netá golesa hanuva mino-loko iteko minamóza, lo huká gakó makó nomitimó nene lihimáinimú loakaláa nomive.

<sup>14</sup> Lá onoimóza, heleaká netá nenémo Atatokati apí oake veená hizi hutílí iki minimi itémó keitoka agulizaki ve loló oketoko minamó. Loló oketoko noigo, Mosé utó imó. Atá nene Ómasímo lo hukota gakó pelevsava zimó nenéminiki alemake haitolímíniki lihima netá ale veenatoka heleaká netalímó agulizaki ve loló oketoko minamó.

Atá eza alika utó iti vémini avevezahaváa imóza,

<sup>15</sup> Lelegí iki minamasive. Ómasímo nasahilí oletake lihimate asú olimiaká netá hagitana lehizelímíaká noimó nenémo Atá lihima netá alimó nene avilegeneive. Ve hámakólímó lihima alekago veená mukitoka heleaká netá utó o asú imó. Lá onoimóza, Ómasi eza nasahilí ameláho minoake Atá lihima alimó nene avilegeake, ve hámakó Izesu Kilistoni nasahilila veená mukitoka lehizeletamó.

<sup>16</sup> Itó Ómasímo nasahilí lehizeletamó nenémo Atá lihima netá alimó nene avilegeake iteko neve. Hamolímínoko nomive. Ve hamolímó lihima netá alimó nenémo puu likumule loko Ómasímo lihima lemeaká mogona utó okamóza, vejená mukilite lihima netá alikago, Ómasímo aí avogisalo lihimate asú olimikiko minatuni netá mukí hagitana lehizeletonoimóma neve.

<sup>17</sup> Ve hamó nenémo lihima netá alekago heleaká netá lelitoka utó oake agulizaki ve loló imóza, ve hamó Izesu Kilistokumule loko alévolé apakú lugulizaki ve loló okinake aí lapaná izá moloko alituni netá nenémo avilegekave. Leza Ómasímíni nasahilí itó aí avogisalo lihimate asú olimikiko minatuni netá ale lá ituni vejená neneta lá inogo une.

<sup>18</sup> Nenemú ve hamó Atá lihima netá alekago, Ómasímo lihima lemeaká mogona nene vejená mukitoka utó imó. Ámináminoko ve hamokolímó hee lo mina netá alikumule loko lihimate asú olimikago minoko alévolé lemetamenigi minatuni netá hagitana lehizeletamóma neve.

<sup>19</sup> Ve hamolímó Ómasímíni gakó pelevesava zekago vejená mukitoka golesa o asú unimó. Ámina oko ve hamolímó amelahini gakó gele aleko ámegetokago mukitoka lihimavate asú olimikiko minanogo une.

<sup>20</sup> Itó Mosé lo hukoko li gakó miní amekago, golesa netate holutegú puu loko vikumú gelenounimóza, golesa netá nene hutilí oko nego, Ómasímíni nasahilí nenémo avilegeko iteko neve.

<sup>21</sup> Lá oake, gihila lá oko utó itive loko lihima netá nenémo heleaká netá utó itive loko amakuka vike agulizaki ve loló imó. Ámináminí oko Ómasímíni nasahilí nenémo Ómasímíni avogisalo lihima asú olimikago noinake, alévolé lemetameni Guivahanite Izesu Kilistokatí alinogo une.

## 6

### *Lihima netá aleakakumú huluhá itó Kilistogegi otenouhá geleneive*

<sup>1</sup> Nenemú nanave litune. Ómasímíni nasahilí nenémo utó oko napa oko hutilí itive loko lihima netalímíni hozaváa aleloko vitupe.

<sup>2</sup> Eé, lá oko nomive, keké. Lihima netá aleakakumú helehá gilimó nenazo, nenemú goha nana oko miní ameko lihima netá alitune.

<sup>3</sup> Lekeza láa liki gilísá amahe: Monó nagamí nohulunike Izesu Kilistotoka voko miní amunimó nene hilikú miní amuháma neve.

<sup>4</sup> \* Nenemú ametehini lapaná nenémo Kilistoni heleneikutí alémo mómoká okago otimóma neve. Áminagó oko lezagi oteko gosohá lemetamenigi minatune loko leza monó nagamí nohulunike nene, Kilistogegi heleko galegú nakuhá loló oaká noive.

<sup>5</sup> Leza nene Kilistogegi apizekunike eza otimó nenéminoko lezagi otinogo une.

<sup>6</sup> Láa loko geleaká nounge: Lugupeloka ligikaloka lihima netalímíni zámuza asú itive loko, itó lihima netalímíni gelekeleláa minamítune loko lítaha ligika nene Izesugegi zohota zaló apilinamó neve.

<sup>7</sup> Makó eza helekiko, lihima netakumú mumuzó oakakutí akagá omikiko minanogo ive.

<sup>8</sup> Kilistó hilitímínoko lezagi helekunike ezagi minoko aleko inogo une loko gele zage-nounge.

<sup>9</sup> Itó Kilistoni mogona geleaká nounge. Heleneikutí alémo otimó nenazo, goha helemínogo ive. Heleaká netalímó goha Izesu Kilistoni avilegeminogo ive.

<sup>10</sup> Hilimó nene lihima netakumú gamena hamó helekago, mota asú okave. Lá oake, itína minoko aleko noimó nene, Ómasímíni agulizá ale otitove loko geleneive.

<sup>11</sup> Lekezatinimú áminagó iki láa liki gililo: Lihima netá aleakakumú helehá gilimó nenazo, nenemú Izesu Kilistogegi otekunike apizekunike Ómasímíni agulizá ale otitune likígó gililo.

<sup>12</sup> Lugupe nene latila oaká lugupeló nene lihima netá nenémo není gelekeleláa minatane loko oko nogimizikoma nene, gili amemilo. Itó lukugupémo nene mokoló mogonamú nogilikoma nene, gili amemilo.

<sup>13</sup> Likigisa likigizani nene lihima netalímíni gelekeleláa minative liki lihima aleaká gapoló amiselemilo. Lekemeni hele minakutí otinamó nenazo, nenemú lukugupegi likigikagi Ómasi lehizitalo. Lá liki likigisa likigizani nene Ómasi monéna lehizimikiko, netá hee lo minati netalímíni gelekeleláa minatave.

<sup>14</sup> Lekeza nene Mosé lo huka gakolímíni gelekeleláa minamave. Ómasímíni nasahilímíni agikagú niave. Nenemú lihima netalímó agulizaki ve loló oleketamino.

\* 6:4: Kolo 2:12

*Vevesoko minoakalimini gelekelelâa minatune*

<sup>15</sup> Nenemú nana itune. Lo huka gakokú minamunike Ómasímini nasahilikú minunikeve loko nene golesa netá hanuva alitupe. Eé, lá oko nomive, keké.

<sup>16</sup> Lkelisi láa liki makó gilisá amahe. Agulizaki ve makolímini gelekelé izegipa minatune liki likigika lukugupelini lehizimiiki aí gili amitamó nene, gili amita vémini gelekelelâa lílí inigave. Lugaloka nene lihima netá nenémo agulizaki ve loló olikimikikoma, aí gelekelé itiki miniki hiliiki lapuluva inigave. Itó lugaloka nene Ómasi gili amiiki miniki lekeza lihimavatini nomitimó minanigave.

<sup>17</sup> Lekeza nene goí iki lihima netalímini gelekelé itiki minamó mota asú okave. Imane gamenaló nene gakó apí ilekemeke lehizilikitinamóma neve. Áminagú likigikatunú gili aliaká niave. Nenemú Ómasi agepoka lilo.

<sup>18</sup> Lekeza nene lihima aliakakutí gologí olikimikago, vevesoko minoakalimini gelekelelâa niave.

<sup>19</sup> Litaha likigika keé lamimómave loko vegealita oko molokogú emane ale moloko gakó imane lo nolukumuve. Lekeza nene gozapá lukugupe likigika likigisa likigizani ahulikago, gumesisímini mokómini itó mukí lihima netalímini gelekelelâa omikago, gopa napa minamóma neve. Imane gamenaló nene ámináminiki lukugupe likigika ahulikiko, vevesoko minoakalimini gelekelelâa omikiko, likigika gizopa lo miniko miniki aliki ilo.

<sup>20</sup> Lekeza lihima netalímini gelekelelâa mina gamenaló nene, netá lamanalímini gelekelelâa minamamóma neve.

<sup>21</sup> Lá niake, netá iki miliki amó nenémini gihilâa zesá amimóma neve, Itó imane gamenaló ámina netakumú giliake lokovoza heleaká noive. Nenémini amupiló heleaká netá utó imóma neve.

<sup>22</sup> Lá onoimóza, itínasa nene lihima netakumú mumuzó oakalímini nagá vinasokago, lekeza Ómasímini gelekelelâa niave. Nenémini gihilâa etó iki miniki nene, alika alévolé apá alinigave.

<sup>23</sup> Lihima netalímini meinava nene heleaká neve. Itó Ómasilokatí nasahilí hagitana lehizeliaká noimó nenémini gihilâa Izesu Kilistotoka miní ameko alévolé lemetameni alinogo une.

**7***Ve aleve minoaká mogonamú lo moloko limó*

<sup>1</sup> Nigivénegita, gamanimo lo huka gakó giliaká nia vegeaná lekelikumú nene noluve. Lkelisi láa liki gilisá amahe: Lo huka gakó nene geleva geleva noinake, hulukogó asú inogo ive.

<sup>2</sup> Nenemú nene vená makó nenémo vana agómulagi noiko ahulomiakalâa nene nomive liki li huka gakokú nene láa liki linamó neve. Vana helekiko nene, li huka gakokú ve vená minoakakumú li hukikita gakó nene asú omiaká noive.

<sup>3</sup> Nenemú vená makolimo vana nene agómulagi noiko, ve makotó voko gímizitimó nene, aikumú nene mokoló vená noive loko litunimóza, vana helekiko nene, li hukikita gakó nene asú omikiko, ve makotó voko gímizitimó nene, mokoló vená noive loko laminogo une.

<sup>4</sup> Nenemú nigivénegita, lekelí mogona ámináminoko neve. Kilistó hili agupeló viki gímiziakeve liki Mosé lo huka gakó ámegetiakakumú helemó gelekave. Lá niake, itína gamenaló nene Izesutoka voko gímizekunike, aí vegejala loló oko noune. Ómasímini agulizá ale otinake hehe loko oko moloko itune loko heleneikutí oteko noi ve Izesuni mututoní loló okune.

<sup>5</sup> Goí oko minoko aleko uni gamenaló litaha ligikámo litó minoko aleko unike, li huka gacolimo alémo vatí igo lumu heleaká netá nenémo lolâa minoake, lugupeloka ligisa ligizatoka hozavâa aleko minake sikalahute heleaká netá ale utó imó.

<sup>6</sup> Lá imóza, imane gamenaló nene hulunimó nenémini okuko, lo huka gakó ámegetoakalímini nagakutí nene Ómasimo gologí oletamole loko li huka gacolímini gizapaló minamunike, gosohá gapoló Sikalahulímo veleleta gapoló vinake Ómasi gelekelé otatune.

*Ómasimo lo huka gakó itó lihima netá*

<sup>7</sup>\* Nenemú nanave litune. Mosé lo huka gacolimo gapo golesagú lelémo moloaká nehe. Nenéminoko nomive. Lo huka gakó minamilina, netá golesa aleaká noumó nenémini mogona gele vevesamuline. Mosé lo huka gakó nenémo geza molo hukamo loko lamilina, neza molo hukahuka oakalímini mogona nene gele vevesamuline.

\* 7:7; Gá 20:17; Gapo 5:21

<sup>8</sup>Lá okamóza, lihima netakumú mumuzó oaká nenémo lo huka gakolímó gapo velemiake litó litó nene, molo hukahuka oaká haitopaitolímíni nigikagú ale utó oaká imó. Lo huka gakó minamilina nene lihima netakumú mumuzó oaká nenémo amuza moloko minamiline. Heleaká nenéminoko minaline.

<sup>9</sup>Neza gozapá nene lo huka gakó gelemuke, nigika helemihe loko gatizá minuke, gopa lamaná minoko aleko umóza, alika nene lo huka gakó nenémo nelémo utó okago, lihima netá nenémo nigikagú amuza moloko ote vevesokago,

<sup>10</sup>nigika helekave loko gulumó. Lá okago, lo huka gakó ámegetatomó nenémo alévolé nemetameni alitohe loko nogulugo ámina netalímó nigika hili netá ale utó imó.

<sup>11</sup>\* Lihima netá nenémo lo huka gakolímó gapo velemikago, nigika agoka vizeake nigika apele hilimó.

<sup>12</sup>Lá okago, Ómasímó lo huka gakó nenémo etó oko keké vizeko neve, itó hamopamó lo hukamó nene apazá etó oko vevesoko lamaná neve.

<sup>13</sup>Nenemú lo huka gakó lamaná nenémo nigika hili netá ale utó onetamó nehe. Nenéminoko nomive, keké. Lá oko neve. Lihima netá aleaká noumó nenéminí mogona utó itive loko lihima netakumú mumuzó oaká nenémo gakó lamanatanúní nigika hili netá ale utó onetamó. Lá onimikago, Ómasímó lo hukoko li gakó nenémo hozaváa alekago, lihima netakumú musi nizapa oaká noive.

*Lihima netá nenémo ligikagú neve*

<sup>14</sup>Leza láa loko geleaká nounge: Ómasímó lo huka gakó nene Sikalahulímíni nekisa neve. Itó nénisi nene litaha nigikámíni nekisa nounge. Nénisi nene lihima netalímíni gelekeleva nounge.

<sup>15</sup>\* Neza oko moloko u netakumú gelekugo atigino vatigino oaká noive. Neza nene nivisi netá lamaná alitove loko geleaká noumóza, alesá amuve. Alevo letovo oaká nou netá nene gopa aleaká nounge.

<sup>16</sup>Lá oaká nouke nene, Ómasímó lo huka gakó nene lamaná noive loko hize lé oaká noumó nenéminí mogonáa utó oaká noive.

<sup>17</sup>Nenemú netá golesa aleaká noumó nene nezáne hanuva lá osá amuve. Lihima netakumú mumuzó oaká nenémo nigikagú noike nogoka vizekago lá oaká nounge.

<sup>18</sup>Neza mogonáa láa loko geleaká nounge: Litaha nigika nugupeló nene netá lamanalímíni numuní apá aleko minoko aleko osá amive. Netá lamanakumú nogulumóza, gihiláa ale utó itó zámuza nenitoka nomive.

<sup>19</sup>Neza mogona lamaná alitohe loko nogulumóza, alesá amuve. Itó lihima netá alemitohe loko geleaká noumóza, gopa aleaká nounge.

<sup>20</sup>Lihima netá alemitohe loko nagata nogulu netáma aleaká noumó nenazo, nenemú nezáne lá osá amuve. Lihima netá nenémo nigikagú nego, ámina netá aleaká noumó nenéminí mogonáa mota utó okave.

<sup>21</sup>Nenitoka mogona lá oko utó oaká noive: Mogona lamaná alitohe nogulugo, lihima netakumú mumuzó oaká nenémo nogómulaloka omo alitoaká noive.

<sup>22</sup>Neza nigikatunú nene Ómasímó lo huka gakó nene gele laga oaká noumóza,

<sup>23</sup>lá nougo, nigisa nigizani nugupeloka haitó sunímó hozaváa aleaká noive. Nene sunímó nagata nogulu netá nenémo nigisa nigizató noinazo, lihima netá aleakalímíni nagakú nounge.

<sup>24</sup>Utó oká heleaká o vumoláa neza muhelé ahelelímíni mututoni loló o vumó nounazo, nenegutí éaho gologí onetative.

<sup>25</sup>Guivahanite Izesu Kilistó lá onetatikumú Ómasí agepoka loaká nounge. Nenemú nagatatanúní nene Ómasímó lo huka gakó gelekelé omiaká noumóza, litaha nigikatunú nene lihima netá gelekelé omiaká nounge.

## 8

*Sikalahulámo ligikagú minoko aleko oaká noive*

<sup>1</sup>Nenemú Izesu Kilistotoka miní ameko nouhá vegená lelitoka lihima netá aleakakumú lihima limitimoláa nomive.

<sup>2</sup>Izesu Kilistotoka voko gímizunikeve loko alévolé lemetameni lehizelimiaká noimó nene Sikalahulímíni lehizelimiaká noive. Sikalahulímíni gapo veleetamó nenémo lihima aleakakutí itó ligika heleakakutí gologí olimikave.

<sup>3</sup>Litaha ligikámo nene Ómasímó lo huka gakó ámegetoakalímíni zámuza nene aleko limigo, hoza alemigo, lelitoka Ómasímó alimó. Lá ike, Ómasímó hozaváa alike, litaha ligikámíni

golesa netalímíni zámuza apelekago, limimó. Lá noi ke, gipala amiselekago, lihima netató minuhá vegená lelí lemetameni ale luhooke, lelí lihima asú itive loko limimó.

<sup>4</sup> Nene litaha ligikámíni gapoló negopa, Sikalahulímíni gapoló novuni vegená Ómasímo lo huka gakokú hee hee loko oko moloko ituni gakó ámegetatune loko lá olimikave.

<sup>5</sup> Litaha gapogú viaká nia vegená keza litaha kigikámo litokó iki miliki iaká niave. Itó Sikalahulímíni gapoló viaká nia vegená keza Sikalahulímíni litokó iki miliki iaká niave.

<sup>6</sup> Litaha ligikámo lititó oko moloko itunimó nene, latila inogo u ne. Itó Sikalahulímíni lititó oko moloko itunimó nene, alévolé lemetameni ale luhokinake hulu oko minanogo u ne.

<sup>7</sup> Litaha ligikámo litó oko moloko itunimó nenémo Ómasímíni gala veva minanogo u ne. Lá nounike Ómasímo lo huka gakó ámegetosá nene ma nenémíni aminogo u ne.

<sup>8</sup> Litaha kigikámo litó iki miliki iaká nia vegená nene Ómasímo ángo amu hili netá lilí isá amave.

<sup>9</sup> Lá onoimóza, Ómasímíni Sikalahulímíni mulutikú minoko aleko noigo, litaha likigikámíni gizapaló niamave. Sikalahulímíni lonoitó iki miliki iaká niave. Makó keza Kilistoni Sikalahula mulúikú niamamoláa Izesuni vegenala zuha niamave.

<sup>10</sup> Kilistó nene mulutegú minoko aleko oaká noinazo, lugupe nenémo lihima netakumú hilititó onoimóza, ligika lemeni nenémo lihimate asú olimikago minunikumule loko helemike agómulagi noive.

<sup>11</sup> \* Lá okago, Izesú heleneikutí mómoká oko alémo oti ve Ómasímíni Sikalahulímíni nenémo mulutikú minoko aleko oaká noikoma nene, Kilistó heleneikutí alémo oti vémini Sikalahulímíni nenémo mulutikú minoko aleko oaká noitúmo heleaká lukugupe nene ámina oko alémo otinogo ive.

<sup>12</sup> Nenemú nigivénegita, litaha ligika nenémo litó oko moloko itunimó negopa, Sikalahulímíni litó oko moloko itunimó nenémíni genaváa lelitoka minokave.

<sup>13</sup> Litaha ligikámo litó oko moloko itunimó nene, latila inogo nounimóza, Sikalahulímíni zamuzatunú lukugupémo amu heleaká noi netá golesa apili ahulatamó nene, alévolé lekemetamenigi minanigave.

<sup>14</sup> Ómasímíni Sikalahulímíni gapo kelepizigo mihina iaká nia vegená keza Ómasímíni izegipala zuha miniaká niave.

<sup>15</sup> \* Ómasímo Sikalahulímíni likimimó nene goha lekelegesá legeaká netalímíni gelekelela lilí iki minatave loko nomive. Ómasímíni izegipala zuha lilí iki minatave loko lekelémo lá oaká Sikalahulímíni nene lehizeleketonoimóza neve. Sikalahulímíni zámuza nenémo hize lé olimigo, ahóno aménegave loko sele loaká nounge.

<sup>16</sup> Lelí sikalahulímíni Ómasímíni izegipala niave loko lo lemekago Sikalahulímíni ámina gakó hize lé oko ligikagú ale hutilí okago geleaká nounge.

<sup>17</sup> Itó izegipala zuha nouninazo, nenemú Ómasímíni helisa henoni ale lá unike Kilistoni helisa henonigi ale lá oaká nouháza, Izesú imó nenémínoko gasovagi netalímíni agikagú minoko miluma gilitunimó nene, ai lapaná alika ale lá inogo u ne.

### *Ómasímo lapaná ale utó oletative*

<sup>18</sup> Ómasímo okulumakú lapaná ale utó oletatimó nenémo itekave. Nenemú mikasigú miluma geleaká nounimó neneló ale moloko lokugo etaminogo ive.

<sup>19</sup> Ómasímíni izegipala zuha minunimómave loko lapaná lagámíni ale utó oletatikumú nenemú kigika nomimó ha netá keza gituhú niki ageva iki miniaká niave.

<sup>20</sup> \* Ómasímo ale utó i netá nene kigika nomimó heleakalímíni mututoni niave. Nene kezáini kagata geletó nomive. Ómasímo lokago utó okave.

<sup>21</sup> Alika gamenaló kigika nomimó ha hetá nene hulupa loko anuva oaká nagakutí vinasokimikiko, kezagi itó Ómasímíni izegipala zuha lezagi nagakutí lakavasú vizeaká lapaná alitakumú kagata losí gelemiki ageva iki minatave loko lo hukoletamóza neve.

<sup>22</sup> Leza láa loko geleaká nounge: Kigika nomimó ha hetá mukitó keza ká emane gamenalotí venalite izegipa getanigi miluma giliaká niamó nenémíni iki miluma giliki miniaká niave.

<sup>23</sup> \* Itó nene kéisigó lá isá amave. Ligika lemenigi vegená lezagi lá oaká nounge. Anosa mololetake lapaná alitunimó nenémíni zazaváa minative loko Sikalahulímíni lehizeleta vegená lélisi nene ligikatunú miluma geleaká nouhá nene Ómasímo lelémo lá okoko lugupémo kéé lamitímíni nagakú minakutí vinasoletatikumú gizapa onounge.

\* 8:11: 1 Koli 3:16

\* 8:15: Gal 4:5-7; Mak 14:36

\* 8:20: Apí 3:17-19

\* 8:23: 2 Koli 5:2-4

<sup>24</sup> Leza nene lugutó vizekago nenémini agikagú minunike lapaná alitune loko lagata losi gelemoko ageva oaká nounimóza, ámina netá ánígutílina nene miní ameko gizapa oko minamutiline. Ámina netakumú vitagá nounike nene gizapa oaká noune.

<sup>25</sup> Ámina netá velesá utó amigo ánígamunike legesó oko gizapa oko minoaká noune.

<sup>26</sup> Sikalahú nenémo ámináminoko keé lamuko lelémo vatí oaká noive. Leza nemú manamú Ómasiloka lokuko etative loko gelemuninazo, Sikalahulímo mulutegú minake veganalite lamamó nenéminoko lelikumú geleko Ómasiloka loaká noive.

<sup>27</sup> Lá okago, Sikalahulímo Ómasímo litoka oko Ómasímini veganala zuha lelikumú geleko Ómasiloka lo ameaká noinazo, ligika ániogoaká ve Ómasímo eza Sikalahulímo agata gili netá geleake lelémo vatí oaká noive.

<sup>28</sup> Itó leza láa loko geleaká noune: Ómasímo ligika ameaká nouhá veganá leza netá matá mukitó nene hize lé oletoko lelémo vatí itive lokogó ale utó olimiaká noive. Ómasímo sele lo kimítive loko gili veganá nene lá okimiaká noive.

<sup>29</sup> Ómasímo sele lo kimi veganá nene goí oko ániogo amu heleake, gipalámini ametameni lílí itave loko, itó agunamotamola lílí itave loko sele lo kimimóma neve.

<sup>30</sup> Itó Ómasímo ganá sele lo kimimoláa kelémo etó imó neve. Itó kelémo etó imoláa nene lihímáini ale ahulokimikugo niave loko loketamó. Itó lihímáini ale ahulokimikugo niave loko loketa veganá nene gonanalivagi lapaná lehizeketamóma neve.

#### *Netá makolímo lelémo ahelú ahulaminogo ive*

<sup>31</sup> Ómasímini mogonáa lá oko nenazo, miní ameko nanave litune. Ómasímo lelitoka mino moloko noikú nene makó éaho lovaga lo lemeko liviligitive.

<sup>32</sup> Gipala hamó nene aseva zeko géneka lamike lelí mukikumú lova vetini kigizakú molamó nenazo, nenemú aikumule loko netá matá mukí hagitana lehizeletamitihe.

<sup>33</sup> Ómasímo ezáa lihimate asú olimikave loko oletamó nenazo, eza lelémo etó i veganala zuha lelikuti ve makolímo goní hoza ameminogo ive.

<sup>34</sup> Izesu Kilistó ezáa hilimóza, hilimokó nomive. Mómoká oko oteake okulumakú iteko Ómasímini agizani lamagaloka noike, lelikumú negénegé oko Ómasiloka loaká noinazo, éaho lihimate limitive.

<sup>35</sup> Kilistó eza agika lemeaká noikutí éaho lelémo otopá zitive. Miluma netalímohe, itó gasovagi netalímohe, itó gopoguni moloakalímohe. Gaúna gamenámohe. Gígnegepánegekumú vitagá oakakumupe. Golivagi netá utó itikumupe. Luni leko sopolotunú lugupe hukatakumupe.

<sup>36</sup>\* Ámina netakumú monó gotolaú gakó makó láa liki luhuva gizinamóma neve: Geikumule liki gamena gamena gopoguni mililitiki lipili hiliaká niave. Sipsip iza apeleko hukoaká nouhá nenémini ilimiaká niave.

<sup>37</sup> Gakó lá oko nenazo, lá ilitatamóza, netá nenéminámove loko lelémo akaminogo ive. Agika limi ve Izesuni zámuza hize lé olimikago netá mukí avilegekunike alévolé okogó nominune.

<sup>38</sup> Nenemú láa loko gele seketigí onouve: Heleaká netalímohe, logómulagi minoaká netalímohe, agelolímohe, holosímohe, okulumakú alévolé oko minoaká netalímohe, itó itína utó iti netalímohe,

<sup>39</sup> itó veletokatí limiti netalímohe, amunalokatí ititi netalímohe, némini manámini netalímo Ómasímo agika limike nasahilí olimiaká noikutí lelémo otopá zeminogo ive. Ámina agika lemeaká netá nene Guivahanite Izesu Kilistokumule loko lehizelimiaká noive.

## 9

### *Isilae veganá Ómasímo kelémo etó imoláa*

<sup>1</sup> Neza Kilistoni veganala nounazo, gakó imane soza laminake lamaná litoze, gililo. Ómasímini Sikalahú nenémo nigika ale vávani okago nigikagú gakó nenémo hize lé onetago láa loko lo nolukumupe:

<sup>2</sup> Neza Zuta veganakumú miluma napa geleaká nouve. Zuta veganá mukí keza Izesuni ániagi ahulakumú nigikagú ahuu ahuu loaká noive.

<sup>3</sup> Gapo koló ilina nene, Zuta veganá nigive nagave kelémo vatí itive loko Ómasímo usí vizenimitoki nezáne Kilistoni geisa mikuti liminogo vávani uline.

<sup>4</sup>\* Kezagi itó nezagi Isilae ve noune. Ómasímo veganala gihila lelémo etó imó. Lá ike, mikasi gomopalaló aí lapanala lelepizimó, itó lo múnahéaká gakó itó Mosé lo hukoko lí gakó lo limike, aí avogisaló minoko agepoka liliki minatave loko gapováa lelepizike gakó lamaná lo mololetamó.



<sup>5</sup> Lá okago, leza avotege Avalahage Isakage monó ali mina ve keí kagapilamó zuha nounge. Kilstó nene lelí vejená lugupe aleake utó imó nene Zakoponi mulusigutí utó imó neve. Nenemú Kilstokumú gili alévolé itanazo. Kilstó eza netá matá mukilímíni Guivahani noimó nene Ómasi noive. Nenemú agepoka loko mino lúaló moloko minatunize. Lamaná.

<sup>6</sup> Lá onoi móza, Ómasímo netá matá ale utó oketatove loko limó nene haha amive. Zakoponi agapilamó zuha utó amó keza Ómasímo kelémo etó i vejená gihila lílí i asú amamó.

<sup>7</sup> \* Itó Avalahani agapilamola nounge liki linamoláate Ómasímíni vejená gihila lílí i asú amamó. Nenemú Ómasímo Avalahani láa loko lo amimó: Gipaka makó negopa, Isakani agapilamola kéisigó geí mututoni inigave.

<sup>8</sup> Gakó nenémíni mogonáa lá oko neve: Hanuva kugupegutí utó amó keza Ómasímíni vejenala zuha lílí i asú amamó. Ómasímo netá ali lá itave loko lo moloketa gakó gili zagiaká nia vejená nene není vejenáne zuha gihila niave loko geleaká noive.

<sup>9</sup> \* Ámina netakumú Ómasímo Avalahani agómulaló láa loko lo molotamó: Kilisimasi makó oko vokiko nene, veletó nene imane ikató goha okugo Salá eza izegipala getanogo ive.

Loko lo amimó nenazo, Avalahani lo molota gacolímíni gihila nene gipala makó Isimaeletó gihila zemitive loko gilimó neve.

<sup>10</sup> Itó nenegó nomive. Alike Lepekatoka ámina mogona utó imóma neve. Áisi nene avoteho Isakatoka lopé izegipa lositá geto molamó.

<sup>11-12</sup> \* Ámina izegipa nenetosa utó ikasike netá lamaná ahe golesahe velesá alinamasigo, Ómasi eza getati lopé izegipamú Lepekani láa loko lo amimó: Uvolaho nene agunalámíni gelekelé otatize. Láa loko limó nene, Ómasímo vejená kelémo etó itove loko agikatunú gilimó nenémo kezáini iki miliki a netakú nene leheta oaká noimó negopa, ezáa sele lo kimi netatoka leheta oaká noi mogona lelepizimóma neve.

<sup>13</sup> \* Itó Lepekani láa loko lo ami gacolímó gihila zikumú nene Ómasímo li gakó nene monó gotolagú láa liki gizinamóma neve:

Neza Zakopokumú numu helekave. Uvolaho Esaukumú goselé nepelekave.

<sup>14</sup> Nenemú nanave litune. Ómasímo lá oko oko moloko oaká noimó nenémo ma zová zeneihe. Íi, lá oko nomive.

<sup>15</sup> \* Ómasímo Moseni láa loko lo amimóma neve: Neza nene ve makó agutó vizitove loko nene hanuva agutó vizitomó neve. Ve makó nigika hize amitove loko nene nigika hize amitomóma neve.

<sup>16</sup> Nenemú Ómasímo sele nolítimo vejenalita amuza moloko oko moloko oakakú voko alemive. Ómasímo agika hize lemeaká noikukó voko aleaká noive.

<sup>17</sup> \* Palaoni nene Ómasímo lo ami gakó nene monó gotolau láa liki gizinamóma neve: Nénisi nene není zámuzatunú gelémo golesa okugo, není nugulizá numutó namató puu loko vitive loko gelémo etó onoumóma neve.

<sup>18</sup> Nenemú Ómasímíni mogonamú láa loko gilitunize: Áisi nene ve makó nigika hize amitove loko nene agika hize amitomóma neve. Itó Ómasímo ve makó agika hize lí itove loko nene hanuva hize lí itimóma neve.

*Ómasímo izapaló moloaká itó agika hize lemeaká mogonáa*

<sup>19</sup> Lá noiko, lugaloka láa loko lo nimitanimó nehe: Nenemú Ómasímo lihimatemú giligo nanamú golesa oaká noive. Ómasi eza netá matá makó alitave loko nololetiko, vejenalite gapo hizi lí itamoláa nomive.

<sup>20</sup> \* Loko litanimóza, vémage, nanakalotí Ómasímíni gakó pelevesava zitane. Mikasi somogitana noane. Mikasi somo nenémo loló onoi vema ale viligoko geza volane nenémínoko loló onetataninazo loko lo amitihe. Lá oko nomive.

<sup>21</sup> Mikasi somo loló oaká vémini mogona lá oko neve: Ezáa agata gilike mikasitunú somo loló oaká noimó nene etoaká noive. Hamó mikasitunú nene lugáa nene vejenalitiní mututoni loló oaká noimó nene lamanalímíni loló oaká noive. Itó lugáa nene galatini mututoni itive loko goesámíni loló oaká noive.

<sup>22</sup> Lá onoi mó nenazo, Ómasi eza somo nenémíniki nia vejená lugáa nene izapaló moloakalímíni mututoni itó vo tolova oakalímíni mututoni nia vejená keí nogosani kim-itove loko geleake, alika kipilitikumú asenini zeketoloko vimó. Eza lihimáikumú izapaló moloaká noimó itó zámuzagi noimó nenémíni mogona kelepipizinogo lá oaká imó neve.

\* 9:7: Api 21:12      \* 9:9: Api 18:10      \* 9:11-12: Api 25:23      \* 9:13: Mal 1:2-3      \* 9:15: Gá 33:19      \* 9:17: Gá

9:16      \* 9:20: Isa 29:16, 45:9

<sup>23</sup> Itó somogitana oko minatuni vejená lugaloka nene aí lapanala ale lá ituni vejená ale vatí oletonoive. Lá oletake, agika híze limi vejená nene aí lapaná ohunagi noimó nenémini mogona lelepizeaká noive.

<sup>24</sup> Nene Zuta vejená lelikó nomive. Hetoka vejenakutí sele lo kemeaká noi vejenaki lá okimiaká noive.

<sup>25</sup> \* Hetoka vejenaki sele lo kemeakakumú Ómasímo li gakó nene monó gotolaú Ómasímini agepagutí gakó lo utó oaká ve Hoseani gakola láa loko neve:

Vegená kelémo molamimoláa nene není vejená niave loko litoze. Vegená lugáa nigika kememumoláa nene nigika lekemenouve loko litoze.

<sup>26</sup> \* Ómasímini vejenala zuha niamave liki litatoka nene Ómasi alévolé vémini izegipala zuha niave liki linigave.

<sup>27</sup> \* Itó Isaiá eza Isilae vejenakumú gamoga geko láa loko limó:

Isilae vejená keza nene age nagamí agataloka getani nemó nenémini iki hízi hutilí itamóza, Ómasímo luguhakó kugutó vizinogo ive.

<sup>28</sup> Guivahani eza mikasigú vejená goní ita hozaváa alitove loko litá oko ale hukoko ale asú inogo ive.

<sup>29</sup> \* Itó Zuta vejená mukitó asenini zeketamikumú nene Isaiá amunaloka emane anozá gakó láa loko limó nene alévolé okave:

Guivahanímó okulumakú netá matá mukitó gizapa ve eza lagapilamó zuha lugáa asenini zeketamilina, leza Soto apakú Gomola apakú mina vejenakitana oko hele asú utiline.

#### *Isilae vejenaki Izesuni gakó lamanaki*

<sup>30</sup> Nenemú láa loko gilitune: Hetoka vejená keza lihimate asú olimikiko minatune liki amuza milamamoláa nene Izesunimú gili alévolé ikakeve loko lihimáini asú okimikago minikave loko loketamó.

<sup>31</sup> Isilae vejená keza Ómasímini avogisaló lihimate nomitimó minatune liki li huka gakó ámegetoaká gapomú vitagá iliki vamóza, ali utó amamó.

<sup>32</sup> Nene nanamú. Keza nene Izesú veleleta gapomú gili alévolé amatúmo nene lá amó. Hanuva oko moloko nouhatímó Ómasímo giliko lamaná itive liki lakumú lá amó. Lá iliki nívake nene, gapoló gehani makolímó lotohá kipilimó.

<sup>33</sup> \* Ámina gehanimú nene Isaiá li gakó nenémo voko alévolé imó. Eza láa loko luhuva gizamóma neve:

Ánigalo, Zaion apatoka gehani makó nomulumó nenémo lotohá kipilinogo ive. Itó monu gehani nomulumó neneloka kepeleko molanogo ive. Lá onoimóza, áminamú gili alévolé itamó nenete gizapa iki mína netakumú nene hanuvamú gizapa iki minaminigave.

## 10

<sup>1</sup> Nigivénegita, Zuta vejená Ómasímo kugutó vizitive loko nigikatunú lamaná gelekuke keikumú Ómasiloka loaká noumóza,

<sup>2</sup> keza nene Ómasi gelekulé otatune liki amuza miliki niago, ángigokuke lamaná noluve. Lá niamóza, gapováa gili hehe lisá amave.

<sup>3</sup> Ómasímitoka lihimáini asú okimikiko minata mogonáa gili vevesamave. Itó Ómasímini avogisaló lihimate nomitimó minatune liki kezáini iki miliki ita gapoló viake, lihimáini asú okimikiko minata gapo Ómasímo veleletamó neneló visá amave.

<sup>4</sup> Leza Kilistokumú gele alévolé okuko, gili alévolé amake Ómasímo lo huka gakó ámegetokuko lamaná itune liki lina vejenalitíni gapováa híze lí okave. Lá okago, aikumú gili alévolé ina vejená mukítoka nene lihimáini ale ahulo asú okimikago niave.

#### *Guivahanímú sele líta vejená mukítoka kugutó vizinogo ive*

<sup>5</sup> \* Nenemú Mosé láa loko luhuva gizamóma neve:

Ve makó keza lo hukoko li gakó nenémini hozaváa aliliki viva viva iki ali asú itamó nenete alévolé iki minanigave.

Loko Mosé limó nene Ómasímo lo huka gakó gele alekoko lihimavate asú olimikiko minatuni mogonamú limóma neve.

<sup>6</sup> \* Lá onoimóza, Izesunimú gele alévolé inake lihimate asú olimikiko minatuni mogonamú nene monó gotolaú láa liki luhuva gizinamóma neve:

\* 9:25: Hos 2:23 \* 9:26: Hos 1:10 \* 9:27: Isa 10:22-23 \* 9:29: Isa 1:9 \* 9:33: Isa 28:16 \* 10:5: Liv 18:5

\* 10:6: Gapo 30:12-14

Gigikauka nene éaho okulumakuka ititive,

<sup>7</sup> itó éaho galegú limitive loko lamo.

Nenémini mogona nene itína Kilistoni aleloko limitive loko okulumakuka itesaláa nomive, itó Kilistoni nene hele vegeinatokatí lugutó viziti gako aleloko ititive loko galegú lemesaláa nomive.

<sup>8</sup> Lá oko nomive. Nenemú monó gotolaú láa liki luhuva gizinamóma neve:

Monó nene hotoka nomive. Gemetoka neve. Gegepaló neve. Itó gigikagú neve.

Kilistokumú gili alévolé ita gako lo utó oko lo lekemeaká nouhá gako nenemú noluve.

<sup>9</sup> Láa loko lo utó oaká nounge: Izesú nene není Guivahaníne noive loko gegepatunú lo utó itanimó, itó Ómasímo nene Izesú heleneikutí alémo otimó neve loko gigikatunú gele alévolé itanimó nene, Ómasímo gugutó vizinogo ive.

<sup>10</sup> Ligikatunú gele alévolé itunimó nene, lihimate asú olimikiko minanogo une, itó leg-epatunú nene Izesuni agulizá lo utó itunimó nene, Ómasímo lugutó vizinogo ive.

<sup>11</sup> \* Nenemú monó gotolaú luhuva gizinamó nene láa loko neve:

Aikumú gili alévolé itamó nenete hizeko kememikumú kovoza helemínogo ive.

<sup>12</sup> Zuta vegeñaki hetoka vegeñaki etó iki niamave. Hamó lelegitó loló olimiaká noive. Hamokó Guivahani nenémo ve mukilitini Guivahani noike, aí sele li amiaká nia vegeñá mukitoka nene vauva aleko nónohá zekimiaká noive.

<sup>13</sup> \* Guivahanimú sele liaká nia vegeñá mukitoka kugutó vizitimó neve liki monó gotolaú luhuva gizinamóma neve.

<sup>14</sup> Lá oko nemóza, aikumú gili alévolé amitamó nene, nana iki sele li amitave. Itó aí gako gelemítamó nene, aikumú nana iki gili alévolé itave. Itó makolímó lo utó oko aí gakola lo kememítimó nene, aí gako nana iki gilitave.

<sup>15</sup> \* Itó Ómasímo gako liaká ve kimiselemítimó nene, nana iki li utó iki li kimitave. Liki loká inimikikoma neza láa loko litove: Izesuni gako li kimita vegeñá mota kimiseleñeimóma neve. Nenemú monó gotolaú gako makó lá oko neve:

Gako lamaná li utó iaká nia ve keza gapo niago, kigisagutí liti liti ligo, ikago, gelekunike, ligika vávani okave.

<sup>16</sup> \* Lá onóimóza, Zuta vegeñá mukitó ámina gako lamaná gili alemakumú nene Isaiá luhuva láa loko gizamóma neve:

Guivahanínemaka, gako lo kumunimó nene ma gili alévolé inamamóma neve.

<sup>17</sup> Nenemú láa loko gilitune: Ómasímíni gako gelekunikegó gele alévolé oaká nounge, itó Kilistoni agepagutí gako li utó niagogó gakola geleaká nounge.

<sup>18</sup> \* Geza nene Zuta vegeñalite monó gelemamó nehe loko loká itanimó nene, neza lá oko nomive loko litoze. Monó gotolaú láa liki gizinamóma neve:

Kegepagutí gako nenémo numutó namató vo alimó. Itó gakoíni nenémo mikasi nekisa vokisauka vo alimó neve.

<sup>19</sup> \* Lá onóimóza, geza nene Isilae vegeñalite gili vevesamamó netihe loko goha loká itanimó nene, neza lá oko nomive loko litoze. Mosé nene Ómasímo Zuta vegeñá lo kimi gako láa loko luhuva gizamó nene apí oko gelezo:

Lekeza hetoka vegeñakumú gelemó nene ha netá lilí inamoláa kelémo molokugo, lekeza kemekugú nanigave. Ve lugáa negi hizi minamó nene sele lo kemekugo, keikumú mulutikú golesa gilinigave.

<sup>20</sup> \* Itó Isaiá ahelele vizemigo Ómasímo li gako láa loko limó neve:

Nenikumú vitagá amatite není ániganigave. Nenikumú loká amake minamó keitoka anitinogo uve.

<sup>21</sup> \* Itó Isilae vegeñakumú Ómasímo li gako láa liki luhuva gizinamóma neve:

Neza nene giliki amanapa iki miniaká nia vegeñá gili ahuliaká nia vegeñá gínikaha iki miniaká nia vegeñá nene gamena hána nigizani gumí zeko alo loko sele lo kumumóma neve.

## 11

*Isilae vegeñá luguhalite Ómasímíni nasahilí alí alemó*

<sup>1</sup> \* Nenemú geza nene Ómasímo aí vegeñala zuha Zuta vegeñá monéna ahuloketamó nehe loko loká itanimó nene, neza óe, lá oko nomive, loko litove. Nénisi nene Isilae ve nouve. Neza nene Avalahani agapilamó nouve. Neza nene Pezamini mulusigutí noumóza, Ómasímo viselenetamive.

\* 10:11: Isa 28:16 \* 10:13: Zoe 2:32 \* 10:15: Isa 52:7 \* 10:16: Isa 53:1 \* 10:18: Age 19:4 \* 10:19: Gapo 32:21 \* 10:20: Isa 65:1 \* 10:21: Isa 65:2 \* 11:1: Pili 3:5

<sup>2</sup> Ómasi nenémo goí oko gilike kelémo etó i vejená viseleketamimóma neve. Lekeza nene Eliani gako nene monó gotolaú nemó nene gatiki gilisá amahe. Isilae vejená goní noketake negénegeka loko Ómasi láa loko lo amimó:

<sup>3\*</sup> Guivahanímeka, keza geí monó lili ali ve kipili hili asú iake, lónogó iki guguni giziaká a ita tele viziki ali golesa ikave. Lá ikago, imane nezagó nounazo, nezagi nipilini niave.

<sup>4\*</sup> Láa lokago, Ómasímo gako láa loko lo amimó:

Géisigó negopa, není vejenáne zuha minatave loko neza vejená 7 tausen soza ómai netá Pealini gupá zi amema vejená nene asenini zekimikuve.

<sup>5</sup> Loko limó nenazo, ámináminoko itínasa gamenaló Ómasi eza nasahilí amelaho noikeve loko Zuta vejená lughá lelémo etó okago minokune.

<sup>6</sup> Ómasímo lelémo etó oaká noimó nenémo leza oko moloko oaká nouhakú voko alemive. Aí nasahilikú nene voko aleaká noive. Leza oko molokogú voko alilina nene, soza saza nasahilí minaline.

<sup>7</sup> Nenémíni gihiláa lá oko neve: Isilae vejená mukitó keza lihimáini minamítive liki vitagá a netá ali utó amamó. Ómasímo kelémo etó i vejená kéisigó ali utó amó. Lughá keza nene kigika hize lí okago, negi nagi hiziki minamó nene

<sup>8\*</sup> monó gotolaú luhuva láa liki gizinató utó imó neve:

Ómasímo kigika ale gopa oká itó kogómula ale gopa oká, kagata hize lí oká okago minamó ámináagi itína ha niave.

<sup>9\*</sup> Itó Tevití láa loko luhuva gizamóma neve:

Lova ve galinali atakumú gelemiki nosánetakumú gelego ititimó nenémo kipilitimó neve.

Lotohá kepelekiko pou liki akiiki lihimáinímíni meinava alinigave.

<sup>10</sup> Keza nene kogómula likokiko likatiká iki mihina itave.

Kegegesaló agohí gihiki guni guni miliki mihina mihina iki muni lúaló miliki minanigave, loko limó.

#### *Hetoka vejená kugutó viziti gako*

<sup>11</sup> Geza nene Isilae ve keza lotohá kepelekago monéna pou liki akamó nehe loko loká itanimó nene, neza lá oko nomive loko litoze. Keza netá golesa aliki minamómave loko Zuta vejená keza ángiiki kemekugú niiki Izesutoka viki gímizítave loko Ómasímo kugutó vizeaká netá nene hetoka vejená lehizekimikave.

<sup>12</sup> Zuta vejená keza lihima aliki minikago monó nene numutó namató Zuta vejená minamamoláaloka puu loko vimó. Itó Zuta vejenalite Izesukumú gili gopa amómave loko Ómasímo nene hetoka vejená kelémo lamaná oko nónohá zeketamó. Lá onimó nenazo, nenemú Ómasímo Zuta vejená gihila kelémo atiginá o asú okiko, hetoka vejenatoka gihila haitólímínoko golivagi zinogo ive.

<sup>13</sup> Hetoka vejená lekeza lo likimitove. Lekelí aposolo nouke hozanemú gulugo itekago, nogoliza novizuve.

<sup>14</sup> Vejenáne zuha lughá monokumú kumu helekiko giliiki lamaná itave loko ámina hoza aleloko novuve.

<sup>15</sup> Ómasímo Isilae vejená ahuloketatímíni gihila nene hetoka vejená nene mikasi vogalaló numutó namató viki minakutí kelémo atiginá imó. Nenemú Ómasímo Isilae vejená goha kelémo molatímó nene hilinakutí atiginá itamó gilinogo ive.

<sup>16</sup> Sikoni vatá niake, ganá nosá nene Ómasíminive liki amikago, etó oko nego, mukitoka hutilí oko etó okogó minanogo ive. Eza luhusa nenémo avasavagi etó oko noikoma, izana hazana ámináminoko etó okogó minanogo ive. Ámináminoko leza Zuta vetini avotege goí iki monokú etó iki minikago, kagapilamó zuha ámináminiki Ómasímíni vejenala minanigave.

<sup>17</sup> Zuta vejená keza olivi za lamaná nenémíniki minamó, itó avóike Ómasímo nónohá zeketa ve nene za luhusa nenémíniki minamó, itó hetoka vejená nene ekesá olivi za nenémíniki minamó. Lá ikago, Ómasímo nene za lamanalímíni izana makó hukoko ale ahuloake, ekesá zagutí izana makó hukoake za lamaná huko ahulakú nene miní ameko hizekago, luhusámíni nogoza nenémo aminí ameká noive.

<sup>18</sup> Nenemú hetoka vémage, goí oko huko ahula izanagitana Zuta vejenakumú gele golesa amo. Géisi nene luhusa hize lé otamane. Luhusa nenémo geí hize lé ogimiaká noinazo, nenemú gupupe aleko itemo.

<sup>19</sup> Loko lokugo, géisi láa loko linogo ane: Ómasi nenémo není nene miní amenetanogo goí oko mína izana nene hukokave.

<sup>20</sup> Loko gako gihila litanimóza, Zuta vegenalite monó gili alévolé amamómave loko huko ahulonómó neve. Gele alévolé anikumukó keí numutagató noane. Nenemú geza gugupe aleko itemoko gehelele viziko minozo.

<sup>21</sup> Ómasi nenémo Zuta vegená olivi za lamanakítana mína vegená asenini zeketamímó nenazo, gezagi Ómasi viseletatanimó nene ámináminoko asega zegetaminogo ive.

<sup>22</sup> Nenemú géisi nene Ómasímíni nasahililamú itó amuza molatikumú gagatí molamino. Amuza molamó nenémíni gihiláa nene monó kemegeza ame vegematoka utó oaká noimóma neve. Itó aí nasahilikú alévolé oko minanitímíni gihiláa nene aí nasahilí lamaná geitoka utó oaká noive. Miní ameko nasahililagú minamitanímó nene, gezagi hukoko ale ahulanogo ive.

<sup>23</sup> Itó Ómasi nene miní ameká zámuzagi noinazo, Zuta vegená keza Izesukumú gili alévolé ama mogona ahulatamó nene, Ómasímó miní ameketatove loko hanuva goha miní ameketanogo ive.

<sup>24</sup> Hetoka vegená lekeza ekesá olivi za nenémíni mínamóma neve. Ómasímó ekesá olivi zagatí izana makó hukoake, gosohá suni alike za lamanakú miní ameko hizimó nenazo, nenemú Zuta vegená kelémo atiginá itove loko vávani oko kezáini numutagá ikú kelémo atiginá okiko, iki minanigave.

#### *Isilae vegená mukitoka kelémo atiginá itive*

<sup>25</sup> Nigivénegita, lekeza nene Zuta veganakumú gili gopa iki lezetete kivilegeko gele vevesoaká nounge líki lukugupe aliki itikataze. Nenemú asuguná gako makó lo lekemekugo gilitave loko geleaká nouve. Isilae vegená lugáa gínikaha iki minakú minilíki niviko hetoka vegená keza monó agikagú vi asú itamó nene,

<sup>26</sup> \* alika nene Isilae vegená mukitoka kugutó vizekiko lamaná iki minanigave. Nenemú monó gotolaú gako makó láa líki luhuva gizinámóma neve: Zaion agokalotí lugutó vizeaká ve lamaná utó oko, Zakoponi agapilamó keitoka anuva oko ne netá nene giteko ale ahulanogo ive.

<sup>27</sup> \* Itó lo múnahéaká gako láa loko lo hukoketanogo uve: Neza nene lihimáini nagamí zekinake apizeko minatune loko Ómasímó límóma neve.

<sup>28</sup> Isilae vegená keza Izesuni gako lamaná gili ahuliaká niakumú Ómasímíni gala ve lílí niatímó hetoka vegená lekelémo vatí oaká noive.

<sup>29</sup> Lá onoimóza, Ómasímó nónohá zelimiaká noikumú itó sele lo lemeká noikumú genezala ale viligá aligá amítímó nenazo, Zuta vegená gozapá kelémo etó oake avóikini gako lo moloketamole loko Ómasímó agika kemeaká noi vegená niave.

<sup>30</sup> Hetoka vegená lekeza gozapá gínikaha iake nene mínamóza, itína Isilae vegená keza gínikaha ikago, Ómasímó agika hize lekemeake lekelémo lamaná imóma neve.

<sup>31</sup> Áminagó iki Zuta vegená itína gínikaha iki niago, Ómasímó agika hize nolikimímó nene ámináminoko goha agika hize kiminogo ive.

<sup>32</sup> Zuta vegená niamó minamámó mukitoka nene alika agika hize kimitove loko pelevesava ziaká niamómámíni nagakú ahulokímikago niave.

#### *Ómasi agepoka li gako*

<sup>33</sup> \* Agae, Ómasímó gele asú oko mínumuni lisolimíaká amelaho noive. Gele vevesoaká ohuni áitoka neve. Lo hukookala nene vegenalita gelemunitímíni noko neve. Hoza aleakalímíni gapováa nene vegenalita vevesoakaláa nomíve.

<sup>34</sup> \* Nenemú monó gotolaú luhuva makó láa loko neve: Guivahanímíni agikagú gako nemó nene, ve éaho geleneimó neve.

Gakó akó noligo nene, éaho alémo vatí igo límó neve. Ma nomíve.

<sup>35</sup> \* Éaho goí oko netá makó lehizetatití apasoko amítive. Nenéa nomíve.

<sup>36</sup> \* Loko límó nene netá mukí áitokatikó utó oaká noive. Itó áisigó lokago utó oaká noive. Itó netá matá mukí nene aí gelegele nenazo, ámina monó gotolaú gizona gako nene gihila neve loko gelenoune. Nenemú nene agepoka linake miní ameko míno lúaló moloko minatune. Lamaná.

## 12

### *Ligikagi lugupegi Ómasi lehizetatunize*

\* 11:26: Isa 59:20-21 \* 11:27: Zel 31:33-34 \* 11:33: Isa 55:8 \* 11:34: Isa 40:13 \* 11:35: Hio 41:11 \* 11:36: 1 Koli 8:6

<sup>1</sup> Nenemú nigivénegita, Ómasímo agika goha hize lekemeaká noimó nenemule loko lekelémo mómoká oko gakó lo likimitoze, gililo. Ómasímo mukí loló oleketonoi netakumú gili nininiki Ómasímíni monola ali otitamó nene lamaná itive liki gilíniki likígika lukugupe nene guguni gizoaká netá alévolé oko minoakalímíni itó etó oko minoakalímíni Ómasímo ángo amu heleakalímíni minatave liki Ómasi lehizitalo.

<sup>2</sup> Itó iki miliki itamó nenémo monó gelema vegeñalitíni avevezahaló loló amino. Lekeza nene Ómasímo likígika ale viligokiko haitó lakagata giliki minalo. Lá ikiko nene, Ómasímo lititoka molatitoka iti netá nene, netá lamaná itó Ómasímo laga avisiti netá itó vihelé lo minati netá nene ali lekelí itaze.

<sup>3</sup> Ómasímo nasahilí lehizenetakumú mukitó láa loko lo nolukumuze, gililo: Lekezatínimú lakagata gilíkiko etati lelegító áminalokó minino. Avilegeko goha itemino. Ómasímú gili alévolé ikago monolímíni zámuza lehizeleketamó nenemú gili miniki mogonatini etó etó iki lotuva ligitaze.

<sup>4</sup> \* Lugupe nene hámakó neve, itó lugupémíni gelekeleléa mukí minake, haitopaitó hoza aliaká niave.

<sup>5</sup> Ámináminoko vegeñá nene mukí nounimóza, Kilistotoka voko gímizekunike mulusi hamokó nounge, itó leza keikumú gelegele nouko keza lelikumú gelegele nianazo, lugupe aleko iteakaláa nomive.

<sup>6</sup> \* Ómasímo nasahilí haitopaitolímíni oko lehizelimikago, lelí monó zámuza haitopaitó alenoune. Nenemú limi avotigí oko hoza alinogo une. Nenémíni agikagú makó eza Ómasímíni agepagutí gakó lo utó itimó nene, Ómasímo gakó gihila alapizi avotigitó lo utó itize.

<sup>7</sup> Makó eza monokú gelekelé oketatove loko litimó nenémo ezáaloka zámuza minati avotigitó gelekelé itize. Makó eza gakó lainim-oketati hoza alitove loko ezáaloka zámuza minati polosanava nenémíni itize.

<sup>8</sup> Makó eza kagata aleaká gakó litimó nene, ezáaloka zámuza minati avotigitó kagata alitize. Makó eza Ómasímíni hozaló moni ahulatove loko litimó nene, mulunagú lamaná geleko ahulatize. Makó eza monó gele vegeñatoka gizapa okimiaká hoza alitove loko nene amuza moloko gizapa itize. Makó eza gohogó vegeñá nasahilí oketatove loko nene agoliza vizeko nasahilí oketatize.

#### *Gosohá oko moloko ituni gakó*

<sup>9</sup> Likígika hizi kimiki nasahilí ikimiaká nene lukugupetunukó lá amilo. Netá golesamú nene musi likizapa ino. Netá lamaná nene ali gikitiki ali minalo.

<sup>10</sup> Lekeza zuhaloka aliaká niamómámíni iki likígivetikíni likígika kimiiki nene apiziki minatamó nenémo lukumu hilino. Ve makolitíni kugulizá ali otiki golómeni giziki eza aviliko eza aviliko okogó ale otitune liki gililo.

<sup>11</sup> Monó hoza alinigi nene, goselekaselé amiki amuza milikigó alilo. Guivahani gelekelé itiki mulutikú ahuu ahuu liko minalo.

<sup>12</sup> Ómasímo likimiti netakumú lakagata losi gelemiki ageva iaká niakumú lokogoliza viziki minalo. Miluma netalímíni agikagú nininiki hulu iki minalo. Ómasiloka loaká nene ali gikitiki ali minalo.

<sup>13</sup> Ómasímíni vegeñala zuhate netakumú vitagá niikoma, kilími vatí iki kimilo. Veno vegeñá niikoma nene, kilími miliki nasahilí ikitalo.

<sup>14</sup> \* Gopoguni mililikitata vegeñá nene Ómasiloka likiko nónohá zeketatize. Kelémo golesa itive loko negopa, nónohá zeketative liki lilo.

<sup>15</sup> Mulúikú lamaná gilita vegeñá nene lekezagi lilími vatí iki mulutikú lamaná gililo. Ive iki miluma gilita vegeñá nene lekezagi kilími vatí iki miluma gililo.

<sup>16</sup> \* Lekezatíni vitagá iaká nia netá nene likigivetitokagí utó itive liki amuza milalo. Lekezatínimú giliko itemiko, limiki mina vegeñaki iki miliki mihina ilo. Lekezatínimú gilíkiko, gele vevesoaká vegeñá loló amino.

<sup>17</sup> Golesa netá eza amupiló molokiko eza amupiló molokiko amilo. Vegenalite gilíkiko etati netakumukó gililo.

<sup>18</sup> Nenémíni gapováa utó neikoma, itó lekelí netá neikoma nene, numutó namató vegeñá mukitoka gouna ziki minalo.

<sup>19</sup> \* Nigivénegita, lihimavatini mililikitatamó nene lekezatini apasikitamilo. Ómasímo mukahá olimiti gamenalokumú milalo. Nenemú monó gotolaú luhuva makó láa liki gizinamóma neve:

Guivahanímo láa loko lokave: Lihima apasoaká nene není hoza neve. Lihima apasoaká hoza nene nezáne alitove,

loko lokave.

<sup>20</sup>\* Lekelisi nene monó gotolaú láa liki gizina gako nenazo, nenémini ikigó minalo:

Gala velini nene gaúna hilikikoma nosánetá kimilo. Nagamikumú kivisekikoma nagamí kimilo. Lekeza lá itamó nene, kovoza hiliko miluma gilitaze.

<sup>21</sup> Golesa netá nenémo lekelí lekelémo-loko lemémimo. Nenéa nomive. Lekeza mogona lamaná nene lílí iki miniki golesa netáini nene ahulataze.

## 13

### *Gamani vegeñalitini gako gele alitune*

<sup>1</sup> Vegená mukitoka nene gamani vegeñalitini gako gili alitave loko noluve. Gamani hoza nene Ómasímo litokó naleve, itó gamani vegená nene Ómasímini gaktó amegesaló miliki naleve.

<sup>2</sup> Nenemú makó keza gamanitini gako gili ahulatamó nene, Ómasímo ale utó i netá pelesa zinigave. Itó gamani vegeñalitini gako pelesa zita vegená nene kezáini iki miliki ita mogonáini meinava alinígave.

<sup>3</sup> Iki miliki ago lamaná i vegená nenete gamanimú kelegesá ligitive loko negopa, netá golesa aliki miniaká nia vegená nene kelegesá ligitive loko kelémo etó onoimóma neve. Nenemú geza nene kelegesá legemitimó minatove loko mogona lamanakó loló ozo. Mogona lamanakó loló oko minatanimó nene, geikumú gilikiko lamaná inogo ive.

<sup>4</sup> Gamani vegená keza nene geikumule liki Ómasímini gelekelela niave. Gizapa nigitiko vatí oko minatane liki hoza naleve. Geza golesa netá nalekoma gehelele viziko minozo. Keza nene hanuvamú kalapusi limiaká zámuzagi minamave. Keza Ómasímini gelekelela nianazo, golesa netá aliaká nia vegenakumú Ómasímo izapaló moloaká noi netá lelepizinigi gamani vegená nene Ómasi alími vatí iki kezagi kizapaló molokago kalapusi limiaká niave.

<sup>5</sup> Nenemú gamani vegeñalitini gakoíni gili alitave loko noluve. Gakoíni gele ahulokoko Ómasímo miluma hoza gimitikumukó negopa, gigikámo etokave loko lititokó itanize.

<sup>6</sup>\* Itó gamanite Ómasi gelekelé itiki gizapa hoza naleve. Nenemú lekeza gamanite litatoka litatoka iki takisi moni kimilo.

<sup>7</sup> Nenemú limitave liki lita netá nene vegená mukitó kimitaze. Takisi moni aliaká nia vegená nene takisi moni kimitaze. Itó haitó mikasiukatí netá makó atitó áminaló meinava iteko mina moni nene kimitaze. Kilími otiki kugulizá ali otita vegená nene kilími napa ilo.

### *Ligika kemeakalímini mogonáa lá oko neve*

<sup>8</sup> Lekeza netá gimiiiki nimilo liki linita gamena avilegemilo. Tinamule liiki likigika kimiiiki netá matá kimiliki viaká nenémini mogonámogó lekelitoka minatize. Makó keza kigikatunú nasahilí iki kigika kimitamó nenemú Ómasímo lo huka gako mukí gili aliaká nia veve litune.

<sup>9</sup>\* Mosé lo huka gakovú láa loko lonoimóma neve:

Vego venako lekeza huki ezega emega amilizo. Geza vegená makó apele helemo. Geza gumína amo. Geza vegená makolitíni netakumú ángo lamaná amo.

Nene gako ale nupa oko gotoláa nenémini oko neve:

Gezakamú geleaká noanimó nenémini oko gígivekaginimú geleko gigika kemezo.

<sup>10</sup> Nasahilíki ve minatamó nenete kigivítoka kigika miliki netá golesa alikitaminigave. Nenemú vegená makotoka kigika milata vegeñalite Ómasímo lo huka gako gili ali asú iaká niave.

### *Kilístó atikumú gámeme o minatuni gako*

<sup>11</sup> Lekeza itína imane gamenámini mogona gilinamó nenazo, lá itave loko loleketonoumóma neve. Lovokutí ininá oko otituni gamena mota alitokave. Monó apí oko guluni gamena nene, netá golesagutí gologí oletati gamena hána otigí oko minamóza, itínasa nene mota gamena alitokave.

<sup>12</sup> Límugusi mota asú inogo noive. Gó lanogo okululuva notovo ive. Nenemú límugusímini netá ahulíiki lekemeni apele helekative liki lapanalímini gimisi magé ali vatí iki minalo.

<sup>13</sup> Lapanató minatunimoláa nene etó oko minatune. Nosánetalímini lagaváa giliiki nagamí niiki meleketakeni iki gumesisi mokoló mogona haitopaitolímini ali utó iki lova iki lova leta lava leta iki kemekugú niki amilo.

\* 12:20: Ano 25:21-22

\* 13:6: Mat 22:21; Mak 12:17; Luk 20:25

\* 13:9: Gá 20:13-17; Gapo 5:17-21; Liv 19:18

<sup>14</sup> Guivahani Izesu Kilistotoka viki gímizemó nenémo gineganetini loló iko ali luhiki minalo. Lukugupémo amu heleko laga aviseaká noi netá alikataze, Ómasimukó giliki minalo.

## 14

### *Likigivetikini gakó li hukikitamilo*

<sup>1</sup> Monokú hoe lamiki netá makó loló uko Ómasímo giliko golesa itihe liki kagata losi gilitamoláa vasá zemiki kilimi milalo. Lá iki ha netakumú kagata losi giliiki lova leta lava leta itave loko nomive.

<sup>2</sup> Makó eza monokú alévolé oko minatímo nosáneta mukí gopa noaká noigo, makó eza monokú hoe lamike, haitopaitó nosáneta nonake, Ómasímo gele golesa okative loko izámimi mémela nosá amive.

<sup>3\*</sup> Nenemú haitopaitó nosáneta gopa noaká noi vémo agivelaho nosáneta makó moseaká noi vemú gele golesa amino. Itó iza mémela moseaká noi vémo agivelaho gopa noaká noi vemú nene aleko letoko lamino. Eza geí gelekelé izegipa negopa, Ómasi gelekelé omiaká noinazo, ezagi Ómasímimi izegipala loló onoive.

<sup>4</sup> Nenemú ve makolímo Ómasi gelekelé otoko monó geleneitimó nene, geza nanakalotí aí mogona lotuva legeko gilitane. Áisi monokú alévolé itimó nehe hoe lamitimó nehe nene gizapa vevámimi netá neve. Itó Guivahani eza hize lé olimiaká zámuzagi noinazo, hize lé omikiko, alévolé oko minanogo ive.

<sup>5</sup> Makó eza nene haitopaitó gamenamú gilimó nene iteká lemeká oaká noive. Makolímo gamenamú gilimó nene iteká lemeká oko nomigo, hamolímini oko neve. Makó eza némini manámimi itove loko nene gele alévolé onoko lá itize.

<sup>6</sup> Gamena makokumú giligo ititi ve nenémo Ómasimule loko lá oaká noive. Itó nosáneta mukí gopa noaká nomó nenémo Ómasimule loko noaká noive. Lá noike nene, nosánetakumú Ómasi agepoka loaká noive. Itó nosáneta makó mosé mosé oaká noimó nenémo Ómasimú gilike lá oaká noive. Lá noike, ezagi nosánetakumú Ómasi agepoka loaká noive.

<sup>7</sup> Lelikuti makolímo ezáagó giliko lamaná itive loko minoko aleko osá amive. Itó ezáagó giliko lamaná itive loko helesá amive.

<sup>8</sup> Minoko aleko oaká nouhá nene Guivahanímimi gelegele minoko aleko oaká nounge. Heleaká nouhá nene Guivahanímimi gelegele heleaká nounge. Nenemú nene logómulagi minoko aleko itunimó itó hilitunimó nene Guivahanímimi mututoni nounike áisi giliko lamaná itive loko lá itune.

<sup>9</sup> Kilistó logómulagi nouhaki helemoláagi Guivahanite minanogo heleake otimó neve.

<sup>10</sup> \* Nenemú nanakalotí gigivekahinimú aleko letoko litane, itó gigivekahinimú nanakalotí gelekako limitive. Leza mukitó Ómasímimi avogisalo utó o asú okuko, áisi lelí gakó lo hukanogo ive.

<sup>11</sup> \* Nenemú láa liki monó gotolaú luhuva gizinamóma neve:

Guivahanímimo láa loko lokave: Neza minoloko voko nou vémina alévolekutí noluve. Vegená mukitó kalapusa hiziki gupá zi nimiki kepegagutí Ómasímima nugulizá ali otinigave.

<sup>12</sup> Nenemú leza mukitoka Ómasímimi avogisalo mogonate lo utó itune loko lonoimóma neve.

### *Némini manámimi oketokuko ligivetege lihima alikataze*

<sup>13</sup> Nenemú eza lá igo eza lá igo niamó nene mogonataganamú lo hukoaká nene ahulatlune. Imanémimi itune liki li hukalo: Ligiveteginimó monolímimi agikagú viniko, gapo hizi lí ikimiká lihima netakumú gala viziká oaká suni ale utó amitune.

<sup>14</sup> Guivahani Izesuki nousitímima láa loko gele alévolé onouve: Nosá némini manámimi nonunike, ligika lemeni ale gopa iti netá ale utó oaká netá nomive. Lá onoimóza, makó eza netá makó nonoko lá oko nehe loko golotuva netá natimó nene, agika ale gopa inogo ive.

<sup>15</sup> Geza nene nosáneta makó gopa nokoko gigivekaho agata gululusi geleko ininá iti netá ale utó omikakoma, oko moloko oaká noanimó nene gigika kemeakalímimi gapogú vaminogo ive. Gigivekahikumú nene Kilistó aikumuki heleneimóma nenazo, geza nenemú gelekoko nene, nosánetakumule loko gigivekahini alémo golesa amo.

<sup>16</sup> Lekeza mogona lamaná lilí itamó nenémo gigivekaho lihima aleaká gapogú alémo molokiko vegená lugáate aliki letikataze, gizapa iki minalo.



<sup>17</sup> Ómasímini gizapaló minoakalímini mogońáa nene nosánetá makó natupe mositupe loaká nenegú nomive. Hee loko minoko aleko oaká itó hulu itó mulutegú lamaná geleaká nene Sikalahulímo ale utó moloaká noimó nenémo Ómasímini avogisaló voakaláa neve.

<sup>18</sup> Makó keza ámina gapoló viki Kilistoni gelekelé imikiko, Ómasímo ániogikiko laga avisinogo ive, itó veđená lugáate giliko lamaná inogo ive.

<sup>19</sup> Nenemú leza hulu utó itive loko itó ligika lemeni eza hize lé otiko eza hize lé otiko itune loko amuza molatune.

<sup>20</sup> Geza nosánetakumule loko Ómasímini hoza ale golesa amo. Nosánetá mukí nene noakakó nenazo, ligika lemeni ale gopa aminogo ive. Lá onoimóza, hanuva nanogo upe lokoko gopa nokoko ligivetehini agikagú golesa itimó nenémo lihima alinogo une.

<sup>21</sup> Geza givivekahini lihima alekative loko gala vizekatanize, aikumule loko goula nosá ahe vain nagamí ahe namitanimó, itó némini manámini amitanimó nene lamaná inogo ive.

<sup>22</sup> Geza nuvanémini manámini netakumú gakó napa nolokoma nene, Ómasigi gezakagigó ali minalizo. Makó keza kikikámo laga kivisigo gili lamaná iki minata netá alitamó nene, kogoliza vizinigave.

<sup>23</sup> Itó makó keza Ómasímo gele golesa itihe liki kagatagú losi pasi noiko netá makó gopa natamó nene, lamaná neve liki gili zagiki namamó nenazo, lihimavagi loló inogo ive. Ne netá mana netá lamaná itive loko gele zage minoko loló amitunimó nene, lihimavagi netá loló inogo ive.

## 15

### *Lezategopa ligivetege gili laga itave loko oko moloko itune*

<sup>1</sup> Monokú alévolé nouhá veđená leza nene kagata losi pasi giliki gili guni ama veđená gena kivisiti netá nene geheko legesó oko kelémo vatí oko alitune. Lezategó laga livisiti netá loló amitune.

<sup>2</sup> Leza ligiveteginimú geleko lamaná itave loko, itó monokú alévolé itave loko kelémo vatí itune.

<sup>3</sup> \* Kilistó eza ámina oko ezáa gele lamaná i netá alenamimóma neve. Monó gotolaú ve makolímó Ómasi lo ami gakó láa loko nemó nene Izesutoka alévolé oko minamó neve: Geí aliví galativí amó nenémo není numupiló itekave.

<sup>4</sup> Itó gozapá monó gotolaú gakó makó luhuva gizinamó mukí nene lagata ale kolosiko gele guni itune liki gizinamó neve, itó ámina luhuva nenémo lelémo vávani okoko lelémo gili noliko goselé lepelemiko Ómasímo ale vavá oleta netakumú lagata losi gelemoko gizapa oko minatune liki gizinamóma neve.

<sup>5</sup> Itó Ómasímo lelémo zou loaká itó lelémo vávani oaká amelaho eza gala vizekago, lekeza Izesu Kilistó veleleta gapogú lakagata hamokó gili miniki minatave.

<sup>6</sup> Lá iiki likigika itó lekegepa mili hamó iiki, Guivahanite Izesu Kilistoni amelahini agulizá ali otitave.

### *Izesuni gakó lamaná nene hetoka veđenakumuki neve*

<sup>7</sup> Nenemú Ómasímini lapaná utó itive liki Kilistó lekelémo molamó áminámini iki lekezagi likigivetikini kilími miliki likigika eza amiko eza amiko iki apizi lamaná iki minalo.

<sup>8</sup> Neza láa loko lo nolukumuve: Ómasi eza avotegini gakó lo hukoko lo kemenei gakó nene gihila zitive loko Ómasímo gakó gihila lamanakó loaká noimó nenazo, ámina gakó ale alévolé itove loko Kilistó eza Zuta ve lelí gelekelé oletamó.

<sup>9</sup> \* Lá imó nene, hetoka veđená kezagi nene Ómasímo agika hize lemeaká noikumú agepoka litave loko lá imóma neve. Nenemú monó gotolaú ve makolímó Ómasi lo ami gakó láa liki luhuva gizinamóma neve:

Hetoka veđenalitini holúikú gegepoka linake geí gugulizá sigaga loko nama linake gegepoka loko minanogo uve.

<sup>10</sup> \* Itó gakó makó láa loko neve:

Hetoka veđená lekezagi nene Ómasímini veđenala zuhagi lokogoliza viziki agepoka lilo.

<sup>11</sup> \* Itó gakó makó láa loko neve:

Hetoka veđená lekeza nene Guivahani agepoka liki geké litalo.

Numutó namató veđená lekeza sigaga sagaga liki agepoka lilo.

<sup>12</sup> \* Itó Isaiá nene gakó makó láa loko luhuva gizamóma neve:

Zesini gipala Tevitini agapilamó makolímó anogo ize.

Áisi nene hetoka vegeñalitini agulizaki ve loló inogo utó inogo ive.

Lá okiko, hetoka vegeñá keza aikumú kagata losi gelemiki ageva iki minanigave.

<sup>13</sup> Lagata losi gelemoko ageva oaká amelaho Ómasi eza nene gili alévolé akumú mulutikú lamaná giliaká itó hulu ale utó olekemekiko, lekelitoka vaí oko miniko nene, Sikalahulímini zámuzatunú hize lé olikimikiko, lakagata losi gelemiki aikumú ageva oko minoaká netá lekelitoka utó o vaí oko minative.

*Pauló vávani oko luhuva gizatímini mognáa*

<sup>14</sup> Nigivénegita, lekeza nene vatí iki iki miliki niave, itó monolímini mognagi gili vevesinave, itó eza lainim-otiko eza lainim-otiko itave loko nene lekelikumú gele alévolé onouve.

<sup>15</sup> Nenemukopa, neza Ómasímo monó lehizeneta gakokumule loko monó makokumú goha gili vevesatave loko lokovogisalo nelegesá legemigo vávani oko imane luhuva gizo nolukumuve.

<sup>16</sup> Izesu Kilistó eza hetoka vegeñá lekelitoka monó hozaló nimisilímó. Neza Ómasímini gakó lamanakumule loko guguni gizoaká hoza aleaká noumó nene, Sikalahú nenémo lekelémo otopá zekiko, hetoka vegeñá lekeza Ómasímini miguhala lili iki minikiko, Ómasímo ángo amu hilitive loko aleaká nouve.

<sup>17</sup> Neza Ómasímini hoza aleaká nou vémina Izesu Kilistokumule loko hoza aleaká noukumú gelekugo iteaká noive.

<sup>18</sup> Ámina hoza nene nana zámuzalotí aluline. Nomive. Izesu Kilistó hize lé onetago hetoka vegeñá keza monó gili alitave loko hoza aleko minumó nenemú vávani oko lo likimitoze, gililo. Neza nene monó lo utó oko lo nokumuke,

<sup>19</sup> osá amosá suni alévolé netá aleko oko moloko minuke, Sikalahutokatí zámuzalekuke, Zelusalegatí apí okuke, Kilistoni gakó lamaná mukí lo utó o-loko vuke vuke nene mikasi ale vígeko vuke vuke alika liliko mikasiuka vo anitumó.

<sup>20</sup> Lá nouke, lithagú goha ale gosohá okatove loko Kilistoni gakó vo anitemimó gosohá mikasigú gakó lamaná lo utó oko lo kimitove loko amuzale moloaká umóma neve.

<sup>21</sup> \* Monó gotolaú gakó makó láa liki luhuva gizinató nene námegetuve: Aí gakó lo kememuhá vegeñá nenete gilinigave.

Gakó gelemamó nenete gili guni inigave.

*Pauló Loma apatoka vitove loko gilimó*

<sup>22</sup> \* Lekelitoka vitove loko umóza, ámina hoza nalugo gamena gamena gapoma lí okago, gena niviseaká imóza,

<sup>23</sup> minoko aleko utoka kilisimasi mukí oko novigo lekelitoka vitove loko nigikatanú geleko minoaká nouve. Itó imane gamenaló apá lugaloka hoza makó alito apá nominazo,

<sup>24</sup> Sipena mikasiloka vinogo noumóza, ganá lekelitoka vo anitekinake áminauka vitove loko geleko nouve. Lekelitoka anitekugo nene, neza ángiko nene, Sipena mikasiloka vitokumú gamena koma logoliza vizinake nilími gapoló milatave loko noluve.

<sup>25</sup> \* Mota vitove loko geleaká noumóza, imane gamenaló nene Zelusale numutoka Ómasímini vegeñala zuha nasahilí oketoko moni aleko kimitove loko novuve.

<sup>26</sup> Masetonia mikasiuka itó Akaia mikasiuka Ómasímini vegeñala zuha kezáni kagata geleke láa liki li huginamóma neve: Zelusalega monó gele vegeñá gohogó niamó nene moni ale nupa okinake hize lé oketatune loko lo hukonouháma neve liki lamó.

<sup>27</sup> \* Keza nene mulúikú lamaná geleke lá ikamó nene etokave. Itó hetoka vegeñá keza Zuta vetitokatí kígikámini netá gihila alemó nenazo, nenémini genaváa keitoka neve. Ámina lihíma apasoko kimitune liki kugupémimi netá gona miliki Zuta vegeñakutí Izesuni vegeñala zuha kimikiko etanogo ive.

<sup>28</sup> Lá noínazo, nenémini gihila utó okago neza nene moni aleko voko avasavagi keme asú okinake Sipena mikasigú vinogo noínake lekelitoka vo anitino uve.

<sup>29</sup> Itó neza nene láa loko gele alévolé onouve: Zapakó lekelitoka vaminogo uve. Kilistoni nónohá nenitoka vaí okiko lekelitoka vinogo uve.

<sup>30</sup> Nigivénegita, leza Guivahanite Izesu Kilistokumú itó Sikalahutokatí eza agika amigo eza agika amigo oaká nounikeve loko negénegé oko lo nolukumuze: Lekeza nenitoka miní amiki nenikumú amuzale miliki Ómasiloka lilo.

<sup>31</sup> Zutaia mikasiuka Zuta vegeñá lugáa Ómasimú gili alévolé ama vegeñalitini kigizakutí Ómasímo gologí onetative liki Ómasiloka lilo. Itó Zelusalega monó gele vegeñá monima aliiki mulúikú lamaná giliki laga kivistive liki lilo.

<sup>32</sup> Lá okiko, alika Ómasímo giliko, etokikoma, mulúnegú agila guluma noiko lekelitoka vinake navasú vizeko hulu nivisitíve líki lílo.

<sup>33</sup> Ómasi hulu amelaho eza lekeza mukító minatímó minoloko voko minino.

## 16

### *Vegená mukí geké loketamó*

<sup>1</sup> Vená ligivetehe Piopé eza Kenekelea numutoka Izesuni vegenala zuhaloka monó hoza aleaká noi vená áisi vo anitekiko nene, monokú nasahílí itatave loko mogonala hize lé oko noluve.

<sup>2</sup> Ómasímíni vegenala zuhate alíkiko etatímó nenémíni iki Guivahanímule líki alímí vatí itaze. Ámina vená nenémo nezagi itó vegená lúgáagi gelekelé oletoko minamó nenazo, nemú manamú navisíko alímí vatí ilo.

<sup>3\*</sup> Itó vanago venalago Akuílako Pilískako keza nene Izesu Kílístóni monó hozagú nilímí vatí iaká niasive. Keí nene geké noloketuze, lí kimílo.

<sup>4</sup> Kéisi nene nenikumú kugupe latila inígasímó neve. Lá asimó nene nenikumukó nomíve. Numutó namató hetoka vegená Izesuni vegenala zuha minílíki vinamó kezagi keikumú mulúíkú lamaná gilíki kegepoka liaká niave.

<sup>5</sup> Keí numukú monokumú alegesá iaká nia vegenaki geké noloketuze, lí kimílo. Asia mikasiuka ganá apí oko Kílístóni vegenala loló í ve Epaineté nígika amenou ve aikumukí geké nolotuze, lí amílo.

<sup>6</sup> Maliá eza lekelikumú miluma geleko monó hoza alímó. Aí geké nolotuze, lí amílo.

<sup>7</sup> Atoloníkoki Zuniaki Zuta ve není zuha niasí ve kezagi nagá numukú makó minuháma neve. Keikumukí geké noloketuze, lí kimílo. Keza aposolo vetíni holúíkú kugulízaki ve niasive, itó neza hanuva nougo keza goí iki Kílístóni ízegípala lílí asimóma neve.

<sup>8</sup> Monokú noi ve Apiliatóni geké nolotuve. Nígika aitoka neze, lí amílo.

<sup>9</sup> Kílístóni hozagú nelémo vatí í ve Ulupanó itó nígika amenou ve Sitaké keikumú geké noloketuze, lí kimílo.

<sup>10</sup> Kílístó mogonalamú gilígo lamaná í ve Apeleni geké nolotuze, lí amílo. Alistopulóni numukú nia vegenakumú geké noloketuze, lí kimílo.

<sup>11</sup> Zuta ve nígvéneho Helotío itó Nalísisoni gelekelé vegenala keza Guivahanímíni vegenala zuha monokú nia vegenakumú geké noloketuze, lí kimílo.

<sup>12</sup> Vená losítá Tilípaenaki Tilíposaki keza Guivahanímíni hoza napa aliaká niasive. Itó Peasí áminámíni oko Guivahanímú miluma hoza aleaká igo nígika nagata aitoka neve. Keikumú geké noloketuze, lí kimílo.

<sup>13\*</sup> Lupú eza Guivahanímíni vegenala zuhagutí iteko mína ve, itó izolaho nelémo vatí íke ízóneho loló imó. Keikumú geké noloketuze, lí kimílo.

<sup>14</sup> Asikílító itó Pílegon itó Helemé itó Patopá itó Helemá kezagi kígvéikínígi geké napa noloketuze, lí kimílo.

<sup>15</sup> Pílogogokí venala Zuliaki itó Neleó itó atolaho Olipá itó monokú ve vená mukí kezagi makó niamó keikumukí geké noloketuze, lí kimílo.

<sup>16</sup> Lekeza nene monokú eza aputá vizíko eza aputá vizíko iki minalo. Kílístóni vegenala zuha numutó namató míni-líkí vinamó nenete geketíni nilave.

### *Gakó loketo asú imó*

<sup>17</sup> Nígvénegita, lekelémo mómoká uke lakagata aleko láa loko noluve. Líkílímí gopa napa iaká nia vegenakumú gízapa ilo. Keza hízi hóu líta gakó alí utó iki monokú vita gapo hízi lí íake monó lainím-oleketunímó nene pelevesava zíaká niamó nenazo, lekemegeza kimílo.

<sup>18</sup> Vegená nenémíniá nenate Guivahaníte Kílístóni gelekelé ítamake, kezáini kugupémo amu híli netá gelekelé nítake, kígika kagata gopa í vegená gímíníkú mílíki kílími gopa niago, gakó lamaná nilahe lago, kogoka kagaka vízíká niave.

<sup>19</sup> Lekeza monó gílí aliaká niamómámíni gakoláa numutó namató vokave. Lá okago, neza lekelikumú gelekuke nogoliza novízuve. Lá noumóza, ímanémíni iki mínatave loko noguluve: Netá lamanakumú gílí vevesíkí gílí minalo. Netá golesamú gilíki gena ino.

<sup>20</sup> Lá ítamó nene Ómasi hulu amelaho áisi nene míni hána amíko Satáni nene líkígisa heumauka zeko lana inogo íve. Guivahaníte Izesu Kílístóni nasahílí lekelitoka minino.

<sup>21\*</sup> Hamó hoza aleaká nousí ve Timotí itó Zuta ve nígvénege Lukíó Zasó Sosipaté kezagi geké nilílikítave.

<sup>22</sup> Neza Teletíona pepa ímane Pauló lo neme neme noigo luhuva gízo nolukumu vémina áminagó oko Guivahanímíni avogísaló lekelikumú geké nololeketuve.

<sup>23-24</sup>\* Gaió eza nasahilí onimiaká noigo, nezagi itó Ómasímini vegenala zuhagi aí numukú alegesá oko monó loaká nounge. Eza geké nololeketave. Elastó nene kansoletini moniló gizapa oaká ve itó ligiveteho Kuatokí ámináminiki getetini nilasive.

*Ómasi agepoka like gizo asú imó*

<sup>25</sup> Izesu Kilistoni gakó li utó iki li likimiaká niamó, itó Ómasímini asuguná gakola gozapá ká ela halá geloko voko minamó nene hámakó lelegitokó neve.

<sup>26</sup> Ámina gakó lamaná Ómasímo nigizakú molamó nene lo utó oko lo nokumuke ligikámini luhusala ale gikitoaká zámuzagi noi amelahinimú lo kemeaká nouve. Lá onoumóza, imane gamenaló Ómasímini agepagutí gakó li utó iaká a vete luhuva giziki Izesukumú lina gakó li utó ikave. Ómasi nene alévolé helisagi noi vémo lo hukonoitó nene numutó namató vegená keza gili alévolé iki Ómasi gili amitave loko ámina monó gatoko lo kemeaká nounge.

<sup>27</sup> Izesu Kilistó lelémó vatí noiko Ómasi ezáagó gele vevesoko noi ve sigaga sagaga loko agepoka loko mino lúaló moloko minatune. Lamaná.

---

\* 16:23-24: Apo 19:29; 1 Koli 1:14; 2 Tim 4:20

## **Koliti Vegenalitini Luhuva Nampa 1 Pauló Gizo Kimimó**

### *Lusa gakó*

<sup>1</sup> Neza Ómasímini gaktó Izesu Kilistoni aposolo loló itane loko nelémo etó i ve Paulona ligivetehe Sostené ezagi makó nousike

<sup>2</sup>\* Koliti numutoka Ómasímini vegenala lekelitoka luhuva netá imane gizo nolukumuve. Lekezagi vegená lugáagi numutó namató hamokó Guivahanite Izesu Kilistoni sele li amiaká niago Ómasímo lusa geleketoko Izesu Kilistotoka gímizemó nenémini agikagú nene apazá minatave loko alesá molo likimi vegená niave.

<sup>3</sup> Ómasi ametehe aitokatí itó Guivahani Izesu Kilistó aitokatí nasahilí itó hulu lekelitoka mino-loko voko minatize.

### *Keitoka monolímini zámuzá utó ikumú Ómasi agepoka limó*

<sup>4</sup> Ómasi eza Izesu Kilistokumule loko nasahilí lehizeleketakumú neza gelekuke lekelikumú gamena gamena Ómasi agepoka loaká nouve.

<sup>5</sup> Eza monó vávani oko loaká itó geleká haitopaitolímini hagitana lehizeleketonoimó nene,

<sup>6</sup> Kilistoni gakoálamo likigikagú luhusa alekago,

<sup>7</sup> lekeza Guivahanite Izesu Kilistó atiginá oko atikumú ageva iki minake monolímini zámuzá makokumú vitagá isá amave.

<sup>8</sup> Eza Guivahanite Izesu Kilistó anititi gamenaló lihimatini nomitimó minatave loko gizapa oleketoko noiko, gamenatini asú itive.

<sup>9</sup> Ómasi eza gipala Izesu Kilistó Guivahanite nene aitoka miní amitave loko sele lo likimi vémo lokago alévolé oaká ve noive.

### *Koliti vegená keza monokumule liki hizi hou lamó*

<sup>10</sup> Nigivénégita, neza Guivahanite Izesu Kilistoni agulizató lakagata aleko litoze, gililo. Lekeza gakó haitopaitó liki hizi hou lamilo. Monokumú nigiliki likigikatini mili hamó iki minalo.

<sup>11</sup> Náa vegúe, neza likigikagú lova leta gakó utó oko nemó nene Koloeni vegenalate likago gelekuve.

<sup>12</sup>\* Nenemú gakó láa loko noluve. Lekelitokatí makolite leza Pauloni vegenala nounge liki likago, makolite leza Apoloni vegenala nounge liki likago, makolite leza Pitani vegenala nounge liki liaká niave. Itó makolite leza Kilistoni vegenala nounge liki liaká niave.

<sup>13</sup> Nenemú nana ive. Kilistó eza hize hou loleketaha. Itó Paulona neza lekelikumú loko zohota zaló huluhe. Itó neni nugulizalímo avutá okago monó nagamí hilahe. Íi, lá oko nomíve.

<sup>14</sup>\* Neza lamaná monó nagamí hololeketamumóma nenazo, nenemú mulúnegú lamaná noguluve. Ve lositá Kilispoko Gaioko kezagó holoketumóma nene

<sup>15</sup> lekelikutí ve makolímo Pauloni agulizalímo avutá nepelekago, monó nagamí hulomóma neve loko lokative loko lá umó neve.

<sup>16</sup>\* Itó gakó makó noguluze. Setepaná aí vegenala kezagi holoketumó. Lugáa monó nagamí holoketuhe nene ma gelemuve.

<sup>17</sup> Kilistó eza vegená monó nagamí holoketatane loko nimiselemimóma neve. Aí gakó lamaná lo keme keme itane loko lonetonoimóma neve. Itó Kilistó eza zohota zaló hili gakoálamini zámuzá lemekative loko lekelí likigilikagú apikulú aleko gele guni oaká gakó losá anumóma neve.

### *Kilistó eza Ómasímini helisa itó gelekakaláa noive*

<sup>18</sup> Zohota zaló hili gakola nene gapo golesagú viaká nia vegenalite gelego ha netá loló oaká noimóza, gapo lamanató novuni vegená nenete guluko, Ómasilokatí zámuzalagi gakó neve loko gelenoune.

<sup>19</sup>\* Nenemú monó gotolaú Ómasímo lí gakó makó láa liki luhuva gizinamóma neve: Leza gele guni oko matute koló onoive liki liaká nia vegenalitini gakóini ale golesa inogó uve.

\* 1:2: Apo 18:1    \* 1:12: Apo 18:24    \* 1:14: Apo 18:8; Lom 16:23    \* 1:16: 1 Koli 16:15    \* 1:19: Isa 29:14

Itó sukulu napa lokunike gele vevesoaká nounge liki liaká nia vegeñalitini geleakáini nene gele ahulatove.

<sup>20</sup> \* Ómasímo monó gelema vegeñalitini geleakáinimú nene ha gakó neve loko gelekamó nenazo, nenemú gili guni iaká nia vegeñalitini gakóini hí neve. Itó monó mogona apí ikimiaká nia vegeñalitini gakóini hí neve. Itó ítina gamenámini mogonamú gakó hoza lita vetini gakóini nene hí neve.

<sup>21</sup> Itó Ómasímini gele vevesoakalímini zámuzá utó noigo, vegeñá kezáini geleaká nenetunú Ómasímini mogona áñiganígi áñigi vevesamamó. Nenemú Ómasímo giligo etokago, monó gakola lo kemehá nene vegeñá makolite gelego ha netá loló noimó nene vegeñá makó lo kemekuko, gili alévolé niago, Ómasímo kugutó vizeaká noive.

<sup>22</sup> Zuta vegeñá není zuha keza haitó suni utó iko áñigatune liki amuzá miliaká niave. Itó Kiliki vegeñá keza netá mogonamú gilinígi gumonó hiziki miniaká niamóza,

<sup>23</sup> Ieza nene Kilistoni nene zohota zaló apili hele gakó lokuko, Zuta vegeñá keza gelego gena oaká noive, itó Kiliki vegeñá keza gelego, negi gakó loló oaká noimóza,

<sup>24</sup> Ómasímo kelémo mola vegeñá Zuta ve niamó Kiliki ve niamó keza nene Kilstó zohota zaló hili gakokumú gelemó nene, Ómasímini helisa itó Ómasímini gele vevesoakaláa nene áminagutí utó oaká noive.

<sup>25</sup> Vegeñá keza Ómasímini hozamú negi netá neve nilago, ámina negi netalímo vegeñalitini geleakáini avilegeaká noive. Itó Ómasímini mogonamú zámuzala nomive nilago, ámina zámuzá nomí netalímo vegeñalitini zámuzá avilegeaká noive.

<sup>26</sup> Nigivénegita, Ómasímo ve nanámini sele lo likimimóma neve. Nenegú áñigiki gililo. Monó gelema vegeñalite lekelikumú láa liki giliaká niave: Gili vevesi minamoláa mukí minamave. Itó zámuzagi minamoláa mukí minamave. Itó getakutí itiki minamoláa mukí minamave.

<sup>27</sup> Liki linamóza, vegeñá kovogisaló negi niamoláa leza Ómasímo lelémo etó imó nene, gele guni onoune liki liaká a vegeñá kovoza hilitive loko alesa molo limimó neve. Itó vegeñá kovogisaló keé lamunimoláa leza Ómasímo lelémo etó imó nene, zámuzáinígi vegeñá keza kovoza hilitive loko alesa molo limimó neve.

<sup>28</sup> Itó vegeñá kovogisaló gohogó vegeñá nounimoláa itó vegeñá kovogisaló guhalehale oko nounimoláa lezagi Ómasímo sele lo limimó nene kovogisagi vegeñalitini lukesaváini akilitave loko sele lo limimó neve.

<sup>29</sup> Lá okago, mikasiuka ve makolímo Ómasímini avogisaló agupe aleko iteminogo ive.

<sup>30</sup> Ómasi eza Izesu Kilstotoka miní ameleketonoimóma neve. Kilstoni nene gele vevesatunítímini mogona minative loko, itó lihimate asú olimikiko minatunítímini mogona minative loko, itó lihimate ale ahulolimikiko ligika avova liko minatunítímini mogona minative loko, itó leli lihimagutí gologí oletative loko amiseleletamó.

<sup>31</sup> \* Nenemú gakó makó monó gotolaú láa liki luhuva gizinamó nene alévolé itive: Vegeñá makó nenete sigaga liki agepoka linígima Guivahanimukó litaze.

## 2

*Pauló Kilistoni apele gakokó lo kímimó*

<sup>1</sup> Nigivénegita, neza lekelitoka anitumó nene, Ómasímini asuguná gakó lo likimitove loko nene, vegeñalite sigaga lita gakó negopa, itó není gele vevesoakaláa negopa,

<sup>2</sup> neza láa loko lo hukouke vumóma neve: Neza lekelitoka vinake gakó lugáa laminake, Izesu Kilistoni zohota zaló apelemó nene gakokó lo likimitove loko vumóma neve.

<sup>3</sup> \* Itó lekelitoka voko minumó nene keé lamuke nehelele vizigo luvuluvo zeko minumó neve.

<sup>4</sup> Lá oko nouke, monó gakó lumó nene lakagata alitove loko mikasiuka vegeñalite gili vevesina gakokutí lo lekememuve. Ómasímini zámuzámo itó Sikalahulímo není gakó híze lé okago, gihíla zeaká imole.

<sup>5</sup> Lá umó nene lekeza Ómasimú gili alévolé itamó nenémo vegeñalite gili vevesiakakú negopa, Ómasímini zámuzagú leheta itive loko lá umóma neve.

*Ómasímini asuguná gakó Sikalahulímo lo utó oaká noive*

<sup>6</sup> Neza lamaná monokú olopa iki mina vegeñá nene gele vevesoaká gakokutí lo kemeaká noumóza, imane mikasiuka monó gelema vegeñalite gili vevesiaká gakó itó kugulizakí ve hiliki haha ita ve nenete gili vevesiaká gakó liaká niamó nenéminoko losá amuve.

<sup>7</sup> Neza Ómasímini asuganá gako halá geko minamó nene lo utó oaká nouve. Ámina gako nene vevená leza gonanalivagi loló oko minatune loko gozapá netá matá ale utó amike mina zupa Ómasímo ale vavá oko mololetamó.

<sup>8</sup> Mikasiuka kugulizaki ve nenete ámina gele vevesoaká gako mogona gili vevesamamó. Gili vevesalina nene, lelí Guivahani lapaná amelahini nene zohota zaló apelemaline.

<sup>9</sup>\* Lá onoimóza, gako makó láa liki luhuva gizinamóma neve: Vegenalite ángama netá, itó kagatatunú gelema netá, itó vegenalitini kigikámo gelemi netá nene, Ómasímo kigika aminita vevená nene ale vavá oketonoiomó neve,

<sup>10</sup> liki luhuva gizinamómáminoko Ómasímo Sikalahuni amiselekago, ámina netakumú lo utó o lemeaká noive. Sikalahulímo netá matalímini mogona itó Ómasímini mogona halá geko minamolagi geleaká noive.

<sup>11</sup> Hí vémo nene agivelahini agikámini mogona geleneive. Ezáa agikámini amelahogó geleaká noive. Ámináminoko Ómasímini agikámini mogona nene Ómasímini Sikalahulímo hamokó eza geleaká noive.

<sup>12</sup> Itó Sikalahú nene monó gelema vegenatokatí alemuháma neve. Leza Ómasímo monó asapulagi lehizeletamó nene gele vevesatune loko Ómasímini Sikalahula aluháma neve.

<sup>13</sup> Leza monó asapulagi aluhá nenemú logele hagele oaká nounimó nene, hanuva vegenalite kezáini geleakáinitunú li limikago negopa, Sikalahulímo lo lemekago lo kemeaká nounge. Itó Sikalahulímini anó lupamú giliaká nia vevená nene monó lo kemekugo giliaká niave.

<sup>14</sup> Ve makó Sikalahuki minamita vevená keza Ómasímini Sikalahulímini gako ma gelemine-gave. Keza nana netáinigutí gilitave. Nomive. Sikalahú alina vegenalite gilitamoláa oko nenazo, Sikalahuki minamita vegenalite giliko negi gako loló inogo ive.

<sup>15</sup> Sikalahuki minata vegenakó netá mukilímini mognamú hanuva gili vevesanigi ni-amóza, ve makolímo keí mognataganamú lotuva legeminogó ive.

<sup>16</sup>\* Nenemú gako láa liki luhuva gizinamó nene gihila neve:

Guivahanímini agikagú gako nemó nene éaho gilitimó neve.

Gako akó noligo nene hí vémo alémo vatí igo limó neve. Ma nomive. Ma nomimóza, leza nene Kilistoni geleakaláámini oko nominune.

### 3

#### *Koliti vevená keza Ómasímini hozaló vevená lílí iki minamó*

<sup>1</sup> Nigive nagavese, neza lekelitoka vuke, ve Sikalahúinigi lo kemeaká noumola nenéminoko lo lekememuve. Lekeza monokú nene alévolé amake Kilistoni izegipa namunigitana iki niago, neza ve Sikalahunigi nomi vevená lo kemeakaláa nene lo lukumumó.

<sup>2</sup>\* Neza likigikámini nosá alévoleláa lekememuve hanuva aminíma lukumumóma neve. Likigikámini nosá alévoleláa nene nana iki naline. Lekeza litaha lekemetamenigi ha nianazo, itínasa nene nosá alévoleláa nata avotigi iki minamave.

<sup>3</sup> Lekeza nenémináa miniki kemekugú niki lova leta lava leta iki hanuva vegenakitana nenéminiki litaha lekemetamenigi miniaká niave.

<sup>4</sup>\* Lekeza Pauloni vegenala nounge itó Apoloni vegenala nounge liki liaká nianazo, ve nenémináa lekeza numuká vegitana niave loko loleketanogó uve.

<sup>5</sup> Lekeza lelikumú nanamú hizí hou liaká niave. Apoloki nezagi hanuva Ómasímini gelekelé izegipalatosá Guivahanímo hoza gako loletatíminoko monó lo lekemeko nousigo, aikumú gili alévolé inamóma neve.

<sup>6</sup>\* Nénisi lekelitoka hoza aleko ale zuhá umó. Apoló nene liliha aleaká imóza, Ómasímo nene lusaváa gekago gihila zeaká noive.

<sup>7</sup> Nenemú ale zuhá oaká noi vemú lamitune, itó liliha aleaká noi vemú litunimó negopa, lusa gekago gihila zeaká noi ve Ómasímú hamokó litone.

<sup>8</sup> Hoza aleko ale zuhá oaká nou ve itó liliha aleaká noi ve leza hamokó lelegitó nousive. Meinaváa nene hoza alusi lelegitó etó etó oko alinogó usive.

<sup>9</sup> Leza Ómasímini hozaló veva nousive. Ómasímini minía nene lekelisi niave.

Itó lekeza Ómasímini numuni apala niave.

<sup>10</sup> Ómasímo hoza lehizenetamole loko neza numuni geaká ve gihilámina simeni lapusa ale hizumó. Itó nenémini amupiló ve makolite miní amiki numuni giaká niave. Nenémináate gili hee li miniki gitaze.

<sup>11</sup> Lapusa hizenoumó nemó nene Izesu Kilistoni aí akeleko makó hizeakaláa nomive.

<sup>12</sup> Itó lapusa nenémini amupiló makolímo goli silivá nenetunupe itó meinava iteko mina gehanitunupe itó zasiha lónohani ménihá nenetunú gitimó nene, minoko numuni gimó nenémini mogonáa utó inogo ive.

<sup>13</sup> Minoko gamena napaló mogonala utó noitó nene ló napa guluma inogo ive. Itó ló nenémo numuni nigeke hoza alemó nenémini mogona ale utó molanogo ive.

<sup>14</sup> Ve makolímo lapusa amupiló numuni gimó nene lolímo lo lamaná amitimó nene eza meinava alinogo ive.

<sup>15</sup> Itó ve makolímo numuni gitó lolímo lo asú itimó nene, Ómasímo aseva zetoko lokutí agutó vizitimóza, eza meinava aleminogo ive.

<sup>16</sup>\* Lekeza nene Ómasímini monó zavusave niave, itó Ómasímini Sikalahú nene mulutikú minoko aleko oaká noimó nene gelemahe.

<sup>17</sup> Ómasímini monó zavusave nene etó keké vizeko neve, itó aí zavusave lekelisi niave. Nenemú makó keza Ómasímini monó zavusave ali golesa itamó nene, Ómasímo ámináminoko ámina vegená kelémo golesa inogo ive.

<sup>18</sup> Lekeza likigikatini agoka vizemilo. Lekelikutí makolímo monó gelema vegenalitini kovogisaló gele vevesoaká ve nouve loko agata gilitimó nene, ámina gakó gele ahulokoko monó gelema vegenalitini kovogisaló negi ve loló oko minatimó nene Ómasímini agómualó gele vevesoaká ve minanogo ive.

<sup>19</sup>\* Mikasiuka monó gelema vegenalite vevesokave liki lita gakó nene Ómasímo gelekiko negi gakó loló inogo ive. Nenemú monó gotolaú Ómasimú gakó makó láa liki luhuva gizinámoma neve:

Monó gelema vegenalitini kogómualó gili vevesiki mina vegená keza gele vevesonoune liki netá nalemó nene gelehusi gekimikago, áminámini agepagú viki apiliaká niave.

<sup>20</sup>\* Itó makó lá oko neve:

Guivahanímo gele vevesonoune liki liaká nia vegenalite kagata nigele gakó nene ha netá neve loko gelemahe.

<sup>21</sup> Nenemú lekeza vegenalitini kugupe alimi iti iti amilo. Netá matá mukí nene lekelikumule loko mololikimikago neve.

<sup>22</sup> Paulona itó Apoló itó Pitá leza nene lekelikumule loko gizapa ahulolimikago noune. Itó mikasiuka netá matá mukí itó minoakape heleakape itó itínasa minati netape itó alika utó iti netá mukí nene lekelí mututoni neve.

<sup>23</sup> Itó lekeza nene Kilistoni mututoni niave, itó Kilistó nene Ómasímini mututoni noive.

## 4

### *Aposolote monó hoza alemó nenémini mogona*

<sup>1</sup> Lekeza lelikumú gilikiko, Kilistoni gelekelé ve itó Ómasímini hononímini gizapa ve itó Ómasímini asuguná gakó lole ale ve loló ino.

<sup>2</sup> Itó hononímini gizapa ve keza hoza amelaho litokó hoza alitave liki linámoma neve.

<sup>3</sup> Lá onoimóza, nezánemú litoze. Lekelisihe itó vegená lugáate iki miniki není gakó litamó nene gelekugo gihla loló aminogo ive. Itó nezáne mogonánemú lotuva legeminogo uve.

<sup>4</sup> Není lihimáne netimó nene gelenamuve. Lá onoimóza, není mogona nene Guivahani hamolímo ale utó inogo inazo, nenemú lihimáne nomimó nouve loko laminogo uve.

<sup>5</sup> Nenemú lekeza vegenalitini mogonáinimú loakakumú nene litá iki lamilo. Guivahani ezáa atiginá oko ati gamena nene ligikagú asuguná ne netá nene ale lapanató molanogo ive. Itó vegená ligikagú geleaká nouni gakó nene ale utó o asú inogo ive. Lá okoko vegenalitini mogonáini ániogokoko etatitokó kelémo napa inogo ive.

<sup>6</sup> Nigivénegita, lekeza lelí mogonáa lá iki nánigiki gili hee litave loko gakó nolomó nene Apoloki lezateloka lo moloko noluve. Monokú lá iki minalo loko lo mololeta gakó nene avilegemiki vegená lugáa kilimi napa iká itó lugáa alivi letivi iká amilo.

<sup>7</sup> Éaho lokago lukugupe alimi itiaká niave. Lekelitoka netá matá mukí vaí oko nemó nene Ómasímo lekemeñihe. Óe, Ómasímo netá matá mukí lekeme asú onoimó nenazo, lekeza nanamú gelego Ómasímo netá lekememimó gelegago lezate ale utó okune liki lukugupe alimi itiaká niave.

<sup>8</sup> Lekeza lekezatanimú láa liki giliaká niave: Lagatupa okago, monolímini netate vaí oko neve. Pauloge niamago lezategó lugulizaki ve loló oko minoaká noune liki liaká niamóza, Ómasímini avogisaló lamaná lukugulizaki ve lilí itanazo. Lá iki miniki lelí limimí iki lilímiki vikiko, lekelitoka miní ameko lugulizaki vegó loló oko minatuninazo.



<sup>9</sup> Neza láa loko nagata noguluve: Ómasímo aposolo leza vegeñalitiní kigilikagú lelémo ko lemeko mololetamó gelekave. Lá okago, goní ilimíkago lipili ahulatakumú ageva geko nominuhá ve gelekune. Mukitoka ageloge niamó itó mikasiuka vegeñá niamó keza lelí áni gi goselé ikago nouhá gelekave.

<sup>10</sup> Leza nene Kilistokumule loko vegeñalitiní kogómulaló negi ve loló oko nounimóza, lekelisi nene Kilistotoka miní ameko gelekate vai oko neve liki giliaká niave. Leza keé lamunimóza, lekeza alévolé oko lugulizaki ve nounge liki nigelehe. Vegeñalite lamaná lelí nene alivi letivi iaká niamóza, lekelí lukugupe alimí itiaká niave.

<sup>11</sup> Leza nene nosánetakumú zahí nagamikumú gaúna heleko nominune. Lipiliaká niago, gineganete nomimó numute nomimó minoaká nounge.

<sup>12</sup> \* Lugupémini netá utó itive loko lezate ligizanitunú hozaváa alunike ale utó oaká nounge. Lelikumú alivi letivi ikago, nónohá zekimiaká nounge. Gopoguni mililimikago mukahá osá amune.

<sup>13</sup> Lugulizá ali mumusopa zikago, kelémo hulu oaká nounge. Leza izahuza netá loló okunike, vegeñá mukilitiní pipizakitana minoaká nounge.

<sup>14</sup> Neza lokovoza hilitive loko gakó imane gizamuve. Neza nigika lekemenou gipáne mohóne lakagata aleko luhuva imane nogizuve.

<sup>15</sup> Kilistoni monokú apí ikimita ve nene vai iki nitamóza, ametike mukí niamave. Nénisi Izesu Kilistoni monó lo lukumuke ametipina loló oko nounge.

<sup>16</sup> \* Nenemú nene není nigizakagú lisiki némegetatave loko lakagata aluke noluze, gililo.

<sup>17</sup> Neza lá itave loko Timotini amiselekugo, lekelitoka novive. Eza nigika amenou ve Guivahanímini monokú gipáne loló oko minake, mukí netá ale gapoló molokogó aleaká noive. Eza voko neza Izesu Kilistotoka gímizeuke gosohá gapoló mohona oaká noumó nene numutó namató aí vegeñala zuha lo kemeaká nou gakó goha lo lekemekiko gilitaze.

<sup>18</sup> Itó lekelikutú lugáa nenete nenikumú nene aminogo ive liki hokolizá iki gopa miniaká niamóza,

<sup>19</sup> Guivahanímo gelekiko, lamaná okikoma, mino hána aminake lekelitoka vinake, ámina hokolizá iki mina vegeñalitiní gakoláa gelekinake, zámuzáini netihe nomitihe nenémini mogona ale utó inogo uve.

<sup>20</sup> Ómasímini gizapaló minoakalímini gapo nene gakokú nomive. Ómasímini zámuzagú nene utó oaká noive.

<sup>21</sup> Itó lekeza nenikumú nanave liki liaká niave. Mukahaki ano liki nilahe, itó nigika lamanaki hulu oko ano liki liaká niave.

## 5

### *Gumesisi netakumú goní oketamó*

<sup>1</sup> \* Lekelikumú láa liki lamaná likago gelekuke ininá okuve: Lekelitoka moko netá haitolímini numuká vetitoka utó amoakalímini utó onoimó nene gipalámo amelahini venalagi mihina iaká niasive liki lakumú noluve.

<sup>2</sup> Itó lekeza netá nenémináa utó onoimó nene lokovoza hiliki lukugupeló gilísá amahe. Lá niake monó vegeñá nounge liki lukugupe aliki otiaká niamó nene etamive. Lekeza miluma giliki lokovoza heleaká noi netá aleaká noi vema nene ali ahulitatanazo.

<sup>3</sup> Neza nugupetunú hotó nouke nigika lekelitoka nego ámina netá loló i vemú nene vogalitikú noukegitana láa loko lo hukumó:

<sup>4</sup> Lekeza alegesá iki niiko, itó neza nigikatunú gele nolukumugo, Guivahani Izesuni agulizató itó aí zámuzaló ámina ve nene holutikutú amisili ahulataze.

<sup>5</sup> Lá niiki ámina ve nene agupegú miluma geleoko eza litaha agika ahulikiko Guivahani Izesuni gamena alitokiko ámina vémini amenía aseva zetatihe liki Satani agizakú milatave loko nololeketuve.

<sup>6</sup> \* Monotegi vegeñá nounge liki lukugupetini aliki itiaká niamó nenemú gulugo golesa oaká noive. Iza ekesaláa nene netá komámo izavagú holokago gizi vatí amó nene ekesá o asú oaká noimó nene gelemaha.

<sup>7</sup> \* Nenemú ekesalagi ve nene gizaká iki alími ahulikiko, noviko, gihila lagámini lilí ilo. Lekelí ekesá netatini mota gilató asú okamóma neve. Leza Zuta ve avotegini asenini zeketakumú gele minoaká holisi nene sipsip iza nanogo numutegutú ekesá netá ahulo asú okunike ekesá netá nomi peleti noaká nouháza, lelí asele zelimiaká sipsip iza Kilistoni nene lelí lihimamule liki apilinamóma nenazo,

8\* nenémini holisiváa minatune loko musi netá hokolizá nenémini ekesá netala ahulo asú okinake, mokoná netalímíni gihiláa itó gakó gihila lagáminigó ekesá netala nomimó nene ale mininake holisiváa minatune.

*Mokoló vejená ahuloketature*

9 Neza luhuva netá makó gozapá láa loko gizo lukumumóma neve: Lekeza mokoló vejenaki nosá gitigi nímaní iki apiziki minamilo, loko loleketonoumóma neve.

10 Láa loko lumó nene monó gelema vejenalítini mokoló vehe itó makolímíni netató áni go lamaná oaká vehe, itó guminaló vehe itó gipe lakegusani lugeha netá ale miniaká nia vehe, keikumú lamumóma neve. Keí nene mikasi ahulatuni zupahé ahuloketaturitó niave.

11 Neza néminokomú gizo lukumumóma neve: Monó nogili ve likigivetipo makolímó mokoló mohona itihe itó makolímíni netató áni go lamaná oaká ve noitihe, itó gipe lakegusani lugeha netató minatihe, itó vejená kemegeka kama gaka litihe itó negi nagamitokó mohona itihe, itó gumina vaukalokó mohona iti ve nenémináagi apiziki múniki nosá netá namitave loko loleketonoumóma neve.

12-13\* Leza monó gelemiki hetoka mina vejenakumú gakó lo hukoketosá nene lelí hoza nomive. Lekeza holutikú monó nigele vejená keí lihimáinímíni gakolamú litamó nene lamaná inogo ive. Itó hetoka nia vejenalítini lihimáinímíni gakoláa nene Ómasímó linogo ive. Nenemú monokú gakó láa liki luhuva gizinamó nene gili minalo: Vejená golesa ahulikimikiko holutikú minamino.

## 6

*Monóini nomi vejenalítini kovogisalo goní gako lamilo*

1 Lekelitokatí makolímó nene agivelahini lihimá ale minatimó eza gako nene monó vejenatoka lamoko monóini nomi vejenatoka noloko goní omiaká noimó nenemú lokovoza helemihe.

2 Monó vejená leza minoko monóini nomi vejenalítini gako lo hukanogo une. Nene ma gelemahe. Itó minoko hoza nenémináa alitave loko loleketonoimóma nenazo, lekelí gakatini hutuva utó okikoma, li hukata avotigila iki minamahe.

3 Leza minoko ageló vejenalítini gakoki lo hukanogo une. Nenemú ha netá utó okikoma, vávani oko hanuva lo hukanogo une.

4 Ha netá nenémini gako láa utó okagoma, lekeza nanamú monó guluhá vejená leza guluko lemeaká noi vejená nenémináa keitoka aliki vikago, li hukilikimiaká niave.

5 Lekeza gako imane gilikiko, lokovoza hilitive loko lo nolukumuve. Lekelitokatí ve makó agatagú hee hee lo mina vema noamihe. Itó lekelitoka gakatini utó noikoma, aitoka aliki vikiko, ale hee loleketatimóza,

6 lekeza nenémini isá amave. Izesuni zuhagutí makolímó agivelahini lihimá utó okagoma, monóini nomi vejenatoka aleko vokago li hukimiaká niave.

7 Lekelisi eza goní omikago eza goní omikago iaká niamó nenémo monotini aleko lemeaká noive. Likigive lugáate netá golesa aleleketatune liki nilikoma, helegalokagó minatinazo.

8 Lekeza nene lekezatinigi netá ali gopa iake, gumina vauka niaká niave. Lá niake, monokú ve likigivetikinigi ámina ikimiaká niave.

9 Netá golesa aliaká nia vejenalite Ómasímíni avogisalo vi hiliakaláa nomive. Nenema gelemahe. Lekeza likigikatini agoka vizemilo. Gumesisi mokoló vejená itó gipe lakegusani lugeha netató vejená itó ve vená huki ezega emega iaká vejená itó vémohe venalímóhe agivelahitoka gímizekiko akiaká nia vejená nenehe,

10 itó guminatamina vejená itó makolítini netató áni go lamaná iaká nia vejená, itó negi nagamitó mihina iaká nia vejená itó kemegeka kama gaka liaká nia vejená, itó laskoli, vejená nenémináate Ómasímíni avogisalo vi hilaminigave.

11 Itó lekelikutí vejená lugáa gozapá nenéminiki minamóma nemóza, itína nene likigika nagamí zelikimiake itó ale guluvitolikimiake, Guivahanike Izesu Kilistoni agulizató itó lelí Ómasímíni Sikalahulímíni agulizató lihimatini asú olikimikago niave.

*Lukugupémo Ómasímíni agulizá ale otino*

12\* Lekeza mukí netá nene gako la nominazo hanuva alesá neve liki liaká niamóza, mukí netá nenémo ma lelémó vati aminogo ive. Itó lekeza mukí netá nene gako la nominazo hanuva alesá neve liki liaká niamóza, netá makolímó agulizaki ve loló o liminogo noiko gele amemitune.

<sup>13</sup> Lekeza nene goula nosá nene lagatupámini netale itó lagatupa nene nosánetakumú neve liki liaká niamóza, minoko Ómasímo nene áminagi áminagi gizo lú nokiko haha inogo ive. Lugupémo nene moko netá aleakakumule loko nomive. Guivahanímini luhuva utó itive loko neve. Itó Guivahani eza lugupémini amelaho noive.

<sup>14</sup> Itó Ómasímo Guivahani nene heleneikutí alémo otimó ámina oko zámuzalatunú leza lelémo otinogo ive.

<sup>15</sup> Lukugupetinímo Kilistoni gelekelé oaká noimó nene gilisé amahe. Itó Kilistoni gelekelela eza goha ale viligokoko mokoló venalímini gelekelé otatihe, olo. Íi, lá oko nomive.

<sup>16</sup> \* Lekeza láa liki gilisé amahe: Ve makolímo mokoló vená makotoka gímizekikoma, keza kugupenini kigikáini mili hámakó iiki minatáimó neve. Nenémini luhuva gakó makó láa loko nemóma neve: Keza lositató kugupe kigika hamokó loló okiko apiziki minatáive.

<sup>17</sup> Lá oko nemóza, makó eza Guivahaniloka gímizekiko ezagi kigikáini hamokó loló inogo ive.

<sup>18</sup> Lá onoimó nenazo, mokolú netá golisi italo. Ve makolímo netá golesa lugáa alitimó nenémo ezáa agupeló gímizemitimóza, mokoló netalímo netá nenémo ezáa agupe ale golesa inogo ive.

<sup>19</sup> \* Itó lekeza láa liki gilisé amahe: Lukugupe nene Sikalahulímini monó zavusave neve. Ómasímo lekelí lukugupémini agikagú minoko aleko itive loko mololeketonoimóma neve. Lekeza nene likigika lukugupémini amelage minamanazo,

<sup>20</sup> itó lekelí meina hizekamóma nenazo, nenemú lukugupémo Ómasímini agulizá ale otino.

## 7

### *Ve aleve keí gakó*

<sup>1</sup> Lekeza luhuva netá gizi nemeke loká inita netakumú lo utó molatoze, gililo. Ve makolímo vená alemoko hanuva minatove litimó nene lamanale.

<sup>2</sup> Itó lá onoimóza, moko netakumú gimilegú moloaká netá nenémo vaí oko minokanazo, nenemú ve nene etó etó iki vená aliiki venáinigi minatamó nene vatí oko neve. Itó vená keza ámina iki etó etó iki veló viiki váinigi minatamó nene vatí oko neve.

<sup>3</sup> Itó ve neneka gugupe nekisa nene venaka mosetamo. Itó ámina oko venalika gugupe nekisa nene vaka mosetamo.

<sup>4</sup> Vená geza gupupémini netá nene geí nomive. Vakámini netá neve. Itó ve geza gupupémini netá nene geí nomive. Venakámini netá neve.

<sup>5</sup> Vego venako lekeza lukugupetini ali amanapa amilizo. Hanuva Ómasiloka linigi goí iki ligili hagili iiki gamena miliiki mini hotó itái gamenamú litáimó nene, lamaná inogo ive. Milatái gamena asú okiko goha ali apiziiki minalizo. Milatái gamena aviligitáimó nene, Satá eza gimilikú molokative loko noluve.

<sup>6</sup> Ve aleve lilí iki minatave loko lo hukoleketugopa, hanuva gele lukumuke noluve.

<sup>7</sup> Nezáne noutíminiki gohuna minatave loko geleaká noumóza, Ómasímo zámuza haitopaitó lehizeletamó nenazo, makó keza ve aleve lilí itamó, itó makó keza gohuna minatamómámini zámuza alinamóma neve.

<sup>8</sup> Getó venaki itó gohuna vegi itó gevoná venaki keí gakó nene láa loko noluve. Keza není suni aliki veló vamiki vená alemiki minimi ititamó nene, vatí inogo ive.

<sup>9</sup> Lá itamóza, gumesisi lakagata nene ve vená huko ezega emega oaká lakagata gilitamó nene, ámina netalímini loláa nenémo lekelémo golesa okatize, ve aleve lilí iki minata sunímo vatí oko neve.

<sup>10</sup> Ve aleve lekelí gakó litoze, gililo. Nene není gakokó nomive. Guivahanímini agepagutí gakó noluve. Vená keza váini ahulikitamino.

<sup>11</sup> \* Itó váini ahulikítinitamó nene, goha veló vamiki hanuva minino, itó lá amiki váinigi goha apiziki minino. Itó ve keza venáini ahulikitamino.

<sup>12</sup> Vegená lugáatini gakó litoze. Gilikiko, Guivahánímo lokago alika geleake nolihe liki gelemilo. Negepa ale vávani okago nololeketuve. Izesukumú gele alévolé onoití ve makolímini venala eza monó gelemi vená minatimó nenémo vanagi apizeko minatíve loko gelekikoma, vanámo amisele ahulotamino.

<sup>13</sup> Itó Izesukumú gele alévolé onoití vená makolímini vana eza monó gelemi ve minatimó nenémo venalagi apizeko minatíve loko gelekikoma, venalámo amisele ahulotamino.

<sup>14</sup> Monó gelema ve nene venáinilokatí lusa nenémo keزالokagi voko aleneive. Itó monó gelema vená nene váinilokatí lusa nenémo keزالokagi voko aleneive. Lá noigo, gipa mohóni

nene lusaninigi lilí iki niave. Keitoka lusa minamilina, izegipáini nene monó gelema vejená minaline.

<sup>15</sup> Lá onoi móza, monó gelemiti vémohe itó monó gelemiti venalímohe vanahe itó venalahe ahulotoko vitove loko nolikoma, géneka lamilo. Ómasímo geha ziki apiziki minatave loko sele lo limimóma nenazo, nagá zeko ale minatunimó nomive.

<sup>16</sup> Vená geza vakagi apiziki minatáimó nene, monó gapogú nene vaka alémoko atape, amitane. Nenéa gelenape, olo. Itó ve geza venakagi apiziki minatáimó nene, venaka nene monó gapogú alémoko atape, amitane. Nenéa gelenape, olo.

*Guivahanímo iki miliki minatave loko loletamó nenegukó minatune*

<sup>17</sup> Lekeza etó etó iki nene Guivahanímo iki miliki minatave loko loleketamó itó Ómasímo sele lo likimi zupa iki miliki miniaká a mogonaló nenegukó monokú minino. Neza numutó namató Izesuni vejenala zuha gakó lo kemeko némika loko lo hukooká nouve.

<sup>18</sup> Vegená makó nene Ómasímíni anosa kugupeló milikimikago niago Guivahanímo sele lo kemekago imi nitamó nenete ámina anosa ahulata gapomú vitagá amitaze. Itó vejená makó nene kugupeló Ómasímíni anosa nomimó niago Guivahanímo sele lo kemekago imi nitamó nenete ámina anosamú voká lamitaze.

<sup>19</sup> Ómasímíni anosa aliki minatamó itó anosa nomimó minatamó nenémo netá gihila nomive. Ómasímíni agepagutí gakó gili aliki minatamó nenémo gihila neve.

<sup>20</sup> Vegená lekeza nanámíni mogonaló iki miliki niago Ómasímo sele lo likimimó nehe. Ámina mogonalokó minalo.

<sup>21</sup> Geza megusa izegipa loló oko noako Ómasímo sele lo gemeneitimó nenemú gagata losi gelemoko áminagukó minozo. Itó megusa izegipa loló oko minoko hoza aleaká noanikutí gologí ogetatune liki lilikoma, géneka lamo.

<sup>22</sup> Vegená makó nene megusa izegipa lilí iki niago Guivahanímo sele lo kemeneitimóláa keza Guivahanímo lihímáikutí apasoketa vejená niave. Itó ámináminoko vejená makó nene hanuva niago Guivahanímo sele lo kemeneitimóláa keza Kilistoni megusa izegipa lilí iki niave liki gili minalo.

<sup>23</sup> Izesú eza lekelí meina hizeneimóma neve. Nenemú mikasiuka vejenalitini gopoguni miliki gelekelé íkitamiki Izesunigó gelekelé itiki minalo.

<sup>24</sup> Nigivénegita, lekeza etó etó iki gozapá nanámíni mogonaló iki miliki niago Ómasímo sele lo likimimó nehe, ámina mogonalokó itína gamenagi Ómasiloka gímiziki minalo.

*Mohoki getó venaki keí gakó*

<sup>25</sup> Itó veló vama venakumú nene Guivahanímíni agepagutí gakó alenamumóza, Guivahanímo agika híze nemekago monónegi loló oko nouke, nezáne nagata nogulu gakó lo likimitomó neneló lekeza leheta itave loko noguluve.

<sup>26</sup> Itína gamena nene golesa netalímíni agikagú nounike lugupe gasova okago noune. Nenemú ve makó keza vená alemiki gohuna minatamó nenemú gelekugo lamaná inogo ive.

<sup>27</sup> Vená aleneitanimó nene, ahulatove loko gelemo. Itó vená alemoko hanuva noitanimó nene, venakumú gelemo.

<sup>28</sup> Itó vená alitanimó nene golesa aminogo ive. Itó hanuva noiti vená makolímó veló vitimó nene golesa aminogo ive. Lá onoi móza, ve aleve keza lugupémíni netakumukó giliki miluma giliki minanigave. Itó neza nenémíni gelehúsígutí akagá oleketatove loko noluve.

<sup>29</sup> Nigivénegita, gakó imane lo nolukumumó nenémíni mogona lá oko neve: Ómasímo mola gamena mota alitokave. Itó gelekelé otatuni gamena mota alínipa okanazo, venaki ve lekeza Guivahanímíni hozagú iki miliki itamó nene ve aleve lilí amamó giliko minalo.

<sup>30</sup> Itó ive nama iaká nia vejená lekeza iki miliki itamó nene ive nama amamó giliko minalo. Itó lokogoliza viziaká niamó lekeza iki miliki itamó nenémo lokogoliza vízemamó giliko minalo. Itó netá matá meina kona iki miniaká niamó nenémo henokanotini nomimó giliko minalo.

<sup>31</sup> Itó nosá molosaka liaká niamó nene lá amamó gelekiko minalo. Mikasi imane luhuvagi nego ángoko geleaká nouháza, mota vo tolova inogo ive. Nenemú gakó imane noluve.

<sup>32</sup> Lekeza nene ha netakumú mulutini itemiko minatave loko gelenouke noluve. Gohuna ve nenete Guivahanímíni hozamú giliki minanigave. Miniki Guivahanímo gelekiko lamaná itive likigó iki miliki inigave.

<sup>33</sup> Venaki ve nenete lugupémíni netakumú gilinigave. Lá niiki venáinite giliko lamaná itive likigó iki miliki inigave.

<sup>34</sup> Lá iake kagata losi giliki miniaká niave. Itó áminagó iki vená mohó getó keza Guivahanímini hozamukó giliki minanigave. Lá niiki kigika kugupe Guivahanímini loló itive likígó iki miliki inigave. Itó vegi vená nenete kugupémini netakumukó gilinigave. Lá iiki váinite gili lamaná itave likígó gilinigave.

<sup>35</sup> Lekeza vatí iki minatave loko gakó imane lo nolukumuve. Lekelí gapo hize lí ugopa, lekeza gopa amiki likigikatini mili nupa ikiko, Guivahaniloka mukipa miniko gelekelé itatave loko noluve.

<sup>36</sup> Itó ve makó eza mohola nene veló viti gamena asú inogo noikoma, itó amelaho nene ale minanogo goselé apelekikoma, veló amisilinogo nookoma, amisilitimó nene lihima aleminogo ive.

<sup>37</sup> Lá itimóza, ve makó nenémo agikatunú mohóne nene hanuva minative loko gele hamó oko gilikoma, gena amiko, veló vamtive loko lo hukatimó nene etanogo ive.

<sup>38</sup> Nenemú ve makó eza mohola veló vitive loko gele amitimó nene, etanogo ive. Itó makó nenémo mohola amiselemoko ale minatimó nenémo iteko neve.

<sup>39</sup> Vená makolímóhe makolímóhe vanámo oko moloko ititoka ititoka oko ezaló apizeloko voko minatize. Vana helekiko nene, ve makotó vitove lokoma hanuva vitize. Lá onoimóza, gopa napa minoko nomive. Guivahanimú geleneiti veló vitive. Lá onoimóza,

<sup>40</sup> nagata gulumó veló vamoko hanuva minatimó nene, agoliza vizeko minanogo ive. Nene není gakó nemóza, nagata gulumó Ómasímini Sikalahú nenitoka nego noluve.

## 8

### *Ómai netalímini miguhala noaká*

<sup>1</sup> Itó soza ómai netalímini miguhala niaká niamó nenemú lo likiminogo uve. Leza mukitó nene netá mogonatagana geleká nune liki liaká niamóza, mogona geleakaláagó gelekunike lugupe aleko iteaká nune. Ligika kemeko nasahilí oketoko minatunimó nenémo luhusate ale gilitolímikiko lamaná oko minanogo uve.

<sup>2</sup> Makó keza geleakate napa neve liki litamó nene geleká gihila makó alinamave loko litune.

<sup>3</sup> Makó keza kigika Ómasiloka mili gikí litamó keí nene Ómasímo giliko lamaná inogo ive.

<sup>4</sup> Nenemú soza ómai netalímini miguhala noakakumú nene láa loko geleká nune: Ómai netá eza netá gihila nomive. Ómasi eza hamokó gihila noive.

<sup>5</sup> Ómasi mukí nene okulumakú itó mikasigú niave liki liaká niave. Itó ómai netá guivahani sozámuni mukí niamó gelekamóza,

<sup>6</sup> leza nene Ómasi ameteho hamokó noive loko gelenoune. Aitokatí netá matá mukí utó o asú onoimó, itó leza aí mututoni loló itune loko nune. Itó Guivahani hamokó Izesu Kilistó aí agizakutí netá matá mukí utó onoimó itó leza aí agizakukó nune.

<sup>7</sup> Lá oko nemóza, vegená lugáa keza nene mogonáa lá oko noimó nene gili guni isá amave. Itó nenémináate ómai netá eza netá gihilave liki minake, sigaga litiki minake, kigika okamóma nenazo, miguhala nake goliva gelego, genavagi loló noigo, nake kigikáini ali golesa iaká niave.

### *Ligivetegini kigikáini ale gopa oketamitune*

<sup>8</sup> Ómasi eza nosáneta noaká namoakakumú giligo golesa aminogo ive. Miguhala noaká mostunimó nene gele golesa itihe. Itó nokuko gele lamaná itihe. Lá oko nomive.

<sup>9</sup> Hanuva lugáa lekeza lagava giliki niaká niamoláate likigivetikini kigika losi pasi i vegená kigikáini ali gopa ikimikataze, nenemú giliko gena likivisino.

<sup>10</sup> Geza matuka koló ominamó neneka, ómai netalímini numukú miguhala noko noako, givivekaho makolímó giliko gena oaká noiti vémo ángokoko láa loko linogo ive: Nonamole. Neza natomole. Loko lokoko nanogo ive.

<sup>11</sup> Natimó nene, givivekaho monó lagasó alenei ve Kilistó nohilike meina hizenei vema geí gigikaloka vokoko hoipa loko golesa amitimó nehe.

<sup>12</sup> Lekeza nenémini iaká niake, likigivetikini kigika kemeni alévolé ami vegená goihá giligili nikitake, kigika ali gopa ikimiaká niave. Kigika ali gopa ikitatamó nene, Kilistoni goihá giligili itamó gilinogo ive.

<sup>13</sup> Nenemú neza iza mémela nonugo, nigivéneho nenemule loko gele gopa oko lihima alekatinazo, aikumú gulugo, gena okikoma, iza mémela mose oko mininake hilitoze.

## 9

### *Aposolomate avevezaha a netá*

<sup>1</sup> Neza nagá makokú minamuve. Nénisi vegealitini megusa minamuve. Nénisi nene aposolo nomive liki nilahe. Nénisi nene Guivahanima ángamuhe. Hozanémini gihiláa Guivahanímini nasahilikú utó oaká noimó nene lekelisi nene lá isá amahe.

<sup>2</sup> Nénisi nene vegeená lugáatini aposolo minamugoma, aposolo hozanémini gihiláa Ómasímini lusaló utó amoláa nene lekelisi nianazo, lekelí aposolo lamaná nouve.

<sup>3</sup> Aposolo hoza aleaká nou mogonámú loká iaká nia vegeená nene gako imane ale viligoko láa loko lo kemeaká nouve.

<sup>4</sup> Aposolo lugáa keza lekelitokatí nosánetá zahí nagamí aliki niki minikago, lelikumú nene namitáive liki lí hukilitatahe.

<sup>5</sup> Pitá itó Guivahanímini agunamotamologi itó aposolo lugáa keza venáinigi monó hozaló nivago nosánetá kimiaká niave. Lá niago leza áminámini okogó venategi monó hozaló vitínazo, nosánetá mosilitatámó nene etatihe, olile.

<sup>6</sup> Nezagí Panapasiki lezagó ligizanitunú hoza aleaká nousimó nene ali ahulatáive liki gili limitámó nene etamitihe.

<sup>7</sup> Gililo. Pilisí ve keza lova hizita netá kezáini monínitunú meina hiziaká niahe. Itó ve makolímó hoza aleko zuhá itimó nene omolokiko aleko namitihe. Itó ve makolímó pulumaká iza gizapa onototí keí aminí namitihe.

<sup>8</sup> Gakó láa loko nolómó nene imane mikasiuka vegealitini gako nolómóza, monó gotolauá gakó makó ámináminoko utó noive.

<sup>9\*</sup> Mosé lo hukoko lí gakó makó láa loko lonoimóma neve: Pulumaká nenémo hoza alegetoko ménihá gihisi nanogo noikoma géneka loko agepa viseletamo.

Loko Ómasímó limó nene pulumakakumukó lamive.

<sup>10</sup> Vegená lelikumuki lo moloko limóma neve. Hozagaza aliaká niamó nenete gihila utó iko natune liki kagata losi gelemake, zuhaina iaká niamó nene etokave.

<sup>11\*</sup> Leza nene lekelitoka likigikámini netá gihila nene zuhá oaká unitó meinaváa lekelitokatí lugupémímini netá alitunikumú gilikago gena okahe.

<sup>12</sup> Lugáa keza lekelitokatí moni henokanoni aliaká niamó nenémo etokamó nenazo, lamaná lezagí nene áminámini oko lekelitokatí alitunimó etative.

Lá onoimóza, leza apí oko hoza alunikutí emane lugupémímini netá alemuháma neve. Kilistoni gakó lamanalímímini gapo hize lí omikatune loko lekelitokatí moni henoni alitave liki gili liminamóza, lá amunike ahulokunike gena aleko mohona oaká noune.

*Pauló meina nomi hoza aleko minamó nenémo gonanalivagi utó imó*

<sup>13\*</sup> Monó zavusave napagú hoza alemoláa keza monó zavusavegú Ómasímini avogisaló milita nosakutí niaká niave. Itó ló lónogó iake Ómasi guguni gizi amiaká nia ve keza vegealite Ómasímini avogisaló milita netakutí ali nímaní iaká niave. Nenéa lekeza gilísá amahe.

<sup>14\*</sup> Itó monó gakó lole ale ve leza ámina gakó giliaká nia vegenakutí lugupémímini lukesava alitave loko Guivahanímó lo hukoletonoimóma neve.

<sup>15</sup> Lá onoimóza, nénisi ámina vililita gapoló vosá amuve. Itó lekeza nene ámina suni alinitatave loko gelekuke luhuva imane gizamuve. Itó ve makolímó nene neza hagitana oko monó lo lekemeaká noukumú nogoliza vízeko nugupe ale oteaká noumó nene aleko lemekative loko nenemú gulugo gena okanazo, heleaká netalímó není alitihe loko nenemú gulugo, vávani noive.

<sup>16</sup> Gakó lamaná lo hutilí oaká nouve. Lá noumóza, ámina hozaváa nene není numupiló molonoimóma nenazo, nenemú nugupe aleko iteko sigaga loko litomó ma lamaná aminogó ive. Izesuni gakó lamaná lo hutilí amulina, nagataló nagataló igo minuline.

<sup>17</sup> Hoza nene nezáne nagata geleko ale utó oko alulina nene, minoko meinaváa alulinamóza, nezáne nagata geleko alemumóma nenazo, mogonáa lá oko neve. Ámina hoza nene Ómasímó nemekago numupiló itekago aleaká nouve.

<sup>18</sup> Nenemú meinaváa aleaká noumó nene lá oko neve. Neza monó hozaló novuke, Izesuni gakó lamanáma meinaváa nomimó vegeená lo keme keme oaká nouve. Lá uke gakó lamaná loaká nenémímini meinaváa lugupémímini lukesaváa alitave líkí linamó nene ale ahuloaká nouve.

*Pauló eza haitopaitó vegealitini gelekeléini minamó*

<sup>19</sup> Neza vegeená makolitini megusáini minamumóza, vegeená mukí nene Kilistotoka kelémo molatove loko gopa mukí vegealitini gelekeléini loló oko nouve.

\* 9:9: Gapo 25:4; 1 Tim 5:18 \* 9:11: Lom 15:27 \* 9:13: Gapo 18:1 \* 9:14: Mat 10:10; Luk 10:7

<sup>20</sup> Zuta vejená Kilistotoka kelémo molatove loko kezagi makó minunike, Zuta vetini kemetameki loló oaká nouve. Itó nezánemú Mosé lo hukoko li gakolímíni nagakú minamumóza, lo hukoko li gakolímíni agizakú nia vejená nene Kilistotoka kelémo molatove loko keitoka minuke, ámina lo hukoko li gakotó gelekelé izegipa nemetamenigi loló oaká nouve.

<sup>21</sup> Itó Zuta vejená minamamoláa keza Mosé lo hukoko li gakó minami vejenaki makó minunike Kilistotoka kelémo molatove loko Mosé lo hukoko li gakó minami nemetameki loló oaká nouve. Nene Ómasímíni avogisalo eza lo mola gakó nomive lukopa, neza Kilistó lo mola gakó gele aleaká noumole.

<sup>22</sup> Itó vejená monó kigika amimoláa Kilistotoka kelémo molatove loko ve nenémináagi makó minunike vejená monó kigika amimoláa kemetameki loló oaká nouve. Lugáate latila inigi niago, némini manámíni oloko vinake Ómasímo lugáa kugutó vizitive loko haitopaitó vejenatoka minuke, haitopaitó kemetameki loló oaká nouve.

<sup>23</sup> Mukí netá nene hanuva Izesuni gakó lamaná utó oloko vitive loko loló oaká nouve. Lá nouke Ómasímo nónohá nozeketoko nezagi nónohá zenetative loko aleaká nouve.

#### *Amuza moloko gonanalisi netá alitune*

<sup>24</sup> Lekeza láa liki gilísá amahe. Zohí oaká apató nene izegipa keza mukító ololu iaká niamóza, netala nene hámakolímó goí oko vo anitike aleaká noive. Lekeza ámina iki Ómasilokatí gonanalísítini alitune liki ololu lilo.

<sup>25</sup> Lesis ita izegipa keza amuza molatune liki apínápí iki haitopaitó avevezaha iaká niave. Keza gonanalisi netá ha netakumú nenémini iaká niamóza, leza nene gonanalisi netá alévoleláamú nenémini itune.

<sup>26</sup> Nezánegi nene ololu loaká noumó nene anosa netá alitove loko ánigo hee lo minuke ololu loaká nouve. Itó neza hoza alumó nene ale satosá amuve.

<sup>27</sup> Neza vejená nene monó lo keme keme oko minoko nezáne latila okatove loko nugupéne aleko lemeko nigikámo litító ámegetative loko gizapaváa minoaká nouve.

## 10

### *Soza ómai netá gupá zi amiki gelekelé itamilo*

<sup>1</sup> \* Nigivénegita, leza avotege iki miliki amó nenemú gilitave loko lo likimitoze, gililo. Mosé eza Izipi mikasiukatí kelémoko novigo, keza mukítoka límusímo molo hitokimikago vamó, itó mukítoka age nagamí likiki vamó.

<sup>2</sup> Lá niake, Moseni vejenala zuha lilí itave loko límusímo itó age nagamílímó monó nagamí loló okago hilamó.

<sup>3</sup> \* Itó Sikalahulímó nosá ale utó okimikago, mukító niki minamó.

<sup>4</sup> \* Itó Sikalahulímó nagamí ale utó okimikago, mukító namó nene Sikalahulímíni zámuzaló gehani nenémo kémegetoko novigo ámina gehakutí nene nagamí lemekago namó. Ámina gehani nenémini agulizá Kilistó.

<sup>5</sup> \* Lá okamóza, Ómasímo ámina Zuta vejená lugáamú gele golesa okimikago, mikasi gomopalaló hili gesá amó.

<sup>6</sup> \* Itó Zuta vejenatoka netá lá oko utó imó nenémo lelí lagata alinogo utó imóma neve. Keza nene golesa netakumú mumuzó ikago, leza áminámíni okatunize.

<sup>7</sup> \* Keikutí lugáa nenete soza saza ómai netá gupá zi amiake, némini netalímíni gelekelé itiki minamó. Lekelisi nenémini amilo. Nenemú monó gotolaú nene luhuva láa liki gizinamóma neve:

Vegená keza mitó minake, nosánetá niki niki iake, otiake ómai netalímó ánigo guni itive liki melekeni amó neve.

<sup>8</sup> \* Lá iake, mokoló netá haitopaitolímíni ali utó iki minamó nenémini okatunize. Keikutí lugáa nenete ámina netá golesa ali utó iki minake, ámina zupagó vejená helemó nene 23 tausen hili gesá amó.

<sup>9</sup> \* Itó keikutí lugáate Ómasímú agika lamanaki ve nenazo, nosánetakúmú géneka litunimó nene gahá lememitihe liki liake gimivagú milikago, gosihá agulizá guimalite kipilikago, hili gesá amó. Lezagi lá okatune.

<sup>10</sup> \* Keikutí lugáate Ómasímú gahá litigí ikago, vejená kepeleaká ageló makolímó anitike kepele gesá imó. Lezagi lá okatune.

\* 10:1: Gá 13:21-22, 14:22-29 \* 10:3: Gá 16:35 \* 10:4: Gá 17:6; Nam 20:11 \* 10:5: Nam 14:29-30 \* 10:6: Nam 11:4 \* 10:7: Gá 32:6 \* 10:8: Nam 25:1-16 \* 10:9: Nam 21:5-6 \* 10:10: Nam 16:41-49

<sup>11</sup> Keitoka netá utó imó nenémo lelí mesaha loló okaze, nene ánígatune. Mikasigi okulumaki gamenaváini asú ititó nounge. Gakó imane lagata aliki nene gakokumú avetó iki luhuva gizinamóma neve.

<sup>12</sup> Nenemú nene ve makolímó ezámú giligo monokú alévolé oaká noitimó nenémo voko golesa okatize, nenemú legesó oko minatize.

<sup>13</sup> Lekelitoka gimilikú moloaká nenémo utó omo itimó nene, numutó namató vejená mukitoka áminagó oko utó oaká noive. Lá onoimóza, Ómasímó lelémo vatí itove loko lokago alévolé oaká ve nenazo, gimilikú moloaká netá makolímó utó okoko lekelí zamuza avilegekoko lekehelú itimó okikoma, Ómasímó lekelémo vatí oko zamuza nolekemeko zukatoni lekelepizekiko, hanuva alévolé iki minanigave.

<sup>14</sup> Nenemú nene, nigivénegita, lugeha netá soza saza ómai netakumú mosiiki etó iki minalo.

<sup>15</sup> Lekeza likigikagi lakagatagima niave. Nenemú gakó imane litoze, lekezatini giliki ángi hee lilo.

<sup>16</sup> \* Gonigú nene vain nagamí Ómasímó lusa geko molamó nene nonunike, Kilistoni golanímíni lusa molamó nene izá moloko aleaká nounge. Itó peleti lusa geko molamó nene nonunike Kilistoni mémelámíni lusa molamó nene izá moloko aleaká nounge.

<sup>17</sup> Lepa nosá nene hámakó peletigutí noaká nounge. Ámináminoko leza monó guluhá vejená nenete apizeko hámakó loló oaká nounge.

<sup>18</sup> \* Lekeza nene Isilae vejenalitiní sunimú gililo. Guguni giziki nosánetá niaká nia vejenalite guguni giziaaká italó viki Ómasiloka gímizíaká niave.

<sup>19</sup> Gakó nolomó nenémíni mogona lá oko neve. Ómai netalímíni miguhala niaká niamó nenémo netá gihila nomive. Itó ómai netá ezagi gihila nomimóza,

<sup>20</sup> \* monó gelema vejenalite miguhala niaká niamó nene Ómasímimimú nomive. Holositini miguhala niaká niave. Nenemú nénisi nene lekezagi holosigi apizitave loko gelemuve.

<sup>21</sup> Lepa nosató Guivahanímíni gonigutí niiki itó holositini gonigutí niiki itamó nene, etamitive. Ámina goni lositakutí noakaláa nomive. Itó Guivahanímíni italotú niiki holositini italotú noakaláa nomive.

<sup>22</sup> \* Guivahanímíni izapaló molative liki niahe. Ehe, lelí zámuzámo aí nene avilegenamive.

*Némíni manámíni inigi Ómasímíni agulizá vitive liki lá itaze*

<sup>23</sup> \* Lekeza nene netá matá mukí nene ligika ale golesa iti netá nomigo hanuva aleakaláa neve liki liaká niamóza, mukí netá alekuko nenémo lelémo vatí aminogo ive. Netá matá mukí nene gakola nomigo hanuva aleakaláa nemóza, nene netá mukí aleloko novinake luhusate ale gilitolimiakaláa nomive.

<sup>24</sup> Makó eza ezámukó gelemoko agivelahinimú gilino.

<sup>25</sup> Lekeza nene lekezatikó maketilotí iza goula nosá meina hizitune likima hanuva hizitaze. Lá niikima soza saza ómai netalímíni numukutí nehe liki giliko, gena okative liki loká miká amilo.

<sup>26</sup> \* Nenemú monó gotolaú luhuva láa liki gizinamóma neve:

Mikasigú netá matá mukí nemó nenémíni amelaho Guivahani áisigó noive.

<sup>27</sup> Liki gizinamó nenazo, mikasiuka netá mukí nene noaká netakó neve loko gilino go ne. Nenemú monó gelemi ve makolímó nosánetakumú alesa molo lekemekiko nene, numunagú ititune likima ititaze. Itikiko, nosánetá lekemekiko nene, lakagata giliko, gena amiko, gopa nalo. Gopa niniki nene holositini miguhala nehe liki loká miká amilo.

<sup>28</sup> Lá onoimóza, gopa niniko nene ve makolímó imane iza nene ómai netalímíni miguhala neve loko lo utó o lekemekiko nene, ámina vemú nene giliko, gena okikoma, ahulalo.

<sup>29</sup> Lekezatini likigikatini golesa itikumú nomive. Likigivetipini agika golesa okative loko noluve. Nezáne nigikamú gulugo gena ami netakumú ve makolímó ezáa agikatanún ale moloko nenikumú lokatize, nenemú ahulatove.

<sup>30</sup> Neza Ómasi agepoka lokinake nosánetá natomó nenazo, Ómasi agepoka loko nato netakumú ve makolímó gele golesa oko gahá nimitimó nene etaminogo ive.

<sup>31</sup> Nenemú lekeza nosánetá nanigi itó zahí nagamí nanigi itó némíni manámíni inigi Ómasímíni agulizá vitive liki lá ilo.

<sup>32</sup> Lekeza Zuta vejená ahe itó Kiliki vejená ahe itó Ómasímíni vejenala zuha keí kovo-gisaló gili golesa ita netá nene ali utó amilo.

\* 10:16: Mat 26:26-28; Mak 14:22-24; Luk 22:19-20      \* 10:18: Liv 7:6      \* 10:20: Gapo 32:17      \* 10:22: Gapo 32:21  
\* 10:23: 1 Koli 6:12      \* 10:26: Age 24:1



<sup>33</sup> Neza ámináminoko vejená haitopaitó keza áninimikiko etative loko minuke, nezáne netá matáne lamaná itive loko nomive. Ómasímo vejená mukí kugutó vizitive loko némini manámini oaká nouve.

## 11

<sup>1</sup> \* Neza Kilistó lisoko vi gapoló lisuke, ámegetoaká nouve. Lekeza ámináminiki neni nigizakagú lisiki némegetalo.

*Venalite gotóitó netá hitata gakó*

<sup>2</sup> Lekeza nene oko moloko umómaloka mili giliki neza lo hutu gakó lainim-oleketumó nene ámegetiki miniaká niave. Nenemú gulugo lamaná okago lekegepoka loaká nouve.

<sup>3</sup> Itó gakó makó lokugo gilítaze, gililo. Ve nene venalitini napáa niave, itó Kilistó nene vetini napáa noive, itó Ómasi nene Kilistoni napáa noive.

<sup>4</sup> Nenemú ve makolímo ezáa gotolaló akilí hitonoko Ómasiloka litimope itó Ómasímini agepagutí gakó lo utó itimó nene, Guivahaní avoza hiliti netá alinogo ive.

<sup>5</sup> Itó vená makolímo gotolaló netá hitamoko Ómasiloka litimope, itó Ómasímini monó gakó lo utó itimope nene, vana avoza hiliti netá alinogo ive. Lá itimó nene, mokoló vená lugáate gotóini zopova hukí asú iki miniaká nia vená gilinogo ive.

<sup>6</sup> Nenemú vená makó nene gotolaló netá hitamoko lá okikoma nene, gotola zopova hukí alínipa italo. Itó vená makó nenemú avoza helekikoma, gotola zopova aseva zekoko gó ale hitooko Ómasiloka lino.

<sup>7</sup> \* Itó ve keza nene Ómasímini nekisa itó Ómasímini gonanalísiva lílí inamole. Itó vená keza nene vetini gonanalísi niave. Nenemú ve keza monó lita gamenaló gotóitó netá ali hitiiki minatamó etaminogo ive.

<sup>8</sup> \* Ómasi eza ve nene venakutí aleko loló amive. Vená nene vegutí aleko loló imole.

<sup>9</sup> Ve nene venakumule loko alémo utó amive. Vená nene vemule loko alémo utó imole.

<sup>10</sup> Nenemú monó líki niago, ageló vejenalite ániği miniaká nianazo, vená keza vetini gizapaló niamó nenémini anosa nene gotóitó gó ali hitiki minatamó nene etanogo ive.

<sup>11</sup> Lá oko nemóza, Guivahanílo gimizekunike ve nene venalitini zámuza nianazo, itó vená nene vetini zámuza nianazo, nenemú Guivahanímini avogísalo nene ve vená keza haitopaitólini minatamó nene etaminogo ive.

<sup>12</sup> Vená nene vegutí aleko loló onoimóma neve, itó itína gamena ve nene venakutí utó oko ve hize hutíli oko minoaká nune, itó netá mukí nene Ómasilokatí neve.

<sup>13</sup> Lekezatini giliki ániği hee lilo. Vená makolímo gotolaló netá hitamoko Ómasiloka litimó nene, etatimó nehe.

<sup>14</sup> Itó ve makó nene gotola zopova hánagi minatimó nene etaminogo ive. Nenémini mogona nene gozapá monó gelemake mína zupa hanuva gilínámóma neve.

<sup>15</sup> Itó venalitini gotóini zopova hána nenémo netá hitinámó gilinogo inazo, keza zopova hánagi minatakumú nene gíli lamaná iaká niave.

<sup>16</sup> Makó nenémo imane gakó gele ahulanogo nookoma, láa loko gilino: Haitó suni nene lezagi Ómasímini vejenala zuha lugáagi ma ale minamune.

*Lepa nosató ali nupa iake ali gopa iki miniaká amó*

<sup>17</sup> Netá makokumú gulugo golesa oaká noimó nenemú lekegepoka laminake lakagata alinake lo likimitoze, gililo. Lekeza monokumú ali nupa iake likigika mili hamó amake hizi hóu liaká niave.

<sup>18</sup> Itó monokumú ali nupa niago, lekelí likigika hóu loaká noive líki li nimikago lamaná lahe loko gelekuve.

<sup>19</sup> Itó hizi hóu lámó nene hanuvamú nomive. Lekelikutí hí vejenalite monokumú amuza miliaká niave. Keza míni utó itave loko ámina suni utó oaká noimó netive.

<sup>20</sup> Itó lepa nosá nanígi ali nupa iki minake, nosá niaká niamó nene Guivahanímini nosá nomive.

<sup>21</sup> Lekeza nosánetá aliki ake nelaga amake, lekezatini litá iki etó etó níkago, vejená lugáa gaúna hiliki miniaká niave, itó vejená lugáa nagamí níki níki kigika kagata gopa oaká noive.

<sup>22</sup> Lekeza numutini nomigo lá iaká niahe. Lekeza nosánetá natune likima numutikukó nalo. Lekeza Ómasímini vejenala zuha makó ániğago lemekago, gohogó vejená keza golesa gele netá alikimiaká niave. Nene sunimú nanave loko lo likimitove. Lekegepoka litohe. Óe, lekegepoka laminogo uve.

*Lepa nosalímini gakó*

\* 11:1: 1 Koli 4:16; Pili 3:17

\* 11:7: Apí 1:26-27

\* 11:8: Apí 2:18-23

<sup>23</sup> Neza Guivahanilokatí gako aleko lukumómoma nene lá oko neve. Guivahani Izesú nene Zutá amimí i holugú nene peleti aleake,

<sup>24</sup> Ómasi agepoka loake, gitegeko nokimike limó: Není mémela imane lekelikumule loko nolukumuve. Nenikumú gili miniki niki minalo.

<sup>25</sup>\* Itó nosánetá niake, vain nagamí goni ámináminoko aleake, láa loko limó: Imane gonigú nene lo múnaheaká gako gosohá ale alévolé oaká golaníne neve. Nata zupa zupa nene nenikumú gili miniki niki minalo.

<sup>26</sup> Guivahani velesá atiginá oko amiko nene lekeza imane peleti nosaki vain nagamiki nata zupa zupa nene Guivahani hili gako li utó utó iki li kimiaká niave.

<sup>27</sup> Nenemú vejená makó keza Guivahanímini peleti nosaki vain nagamiki ali gopa iki natamó nene, Guivahanímini mémelagi golanigi ali gopa inatímini lihima alinigave.

<sup>28</sup> Nenemú peleti nosaki vain nagamiki nanigi niikima, goí iki likigikagú gako netikumú vitagá iiki nalo.

<sup>29</sup> Itó vejená makó nenémo Guivahanímini agupe loló uhatímini mogona gele hee lamoko gopa natimó nene, Ómasímo lihimalamú goni otati netá nene ezáa ale utó inogo ive.

<sup>30</sup> Lekelikuti lugáate lepa nosá gopa nikago, netá kiviseaká noive, itó lugáa mota hulikave.

<sup>31</sup> Leza mogonatemú vitagá oko lo utó moloko minutilina, Guivahanímo nene lihima lemémiline.

<sup>32</sup> Itó Guivahanímo mogonatemú lotuva legeaká noi zupa nene lelí mogona ale utó oko lagavutó zeaká noive. Monó gelema vejenakí gopa miniki golesa ikatave loko nenémini olimiaká noive.

<sup>33</sup> Nenemú nigivénegita, lekeza lepa nosá natune liki niikima, ali nupa iki miniki vejená lugáamú kegeva iki niiko, imi asú ikiko, apí iki nalo.

<sup>34</sup> Makó nenémo nosánetakumú gaúna napa helekokoma, numunauka minoko goí oko nino. Alegesá iki ali gopa ikiko lekelitoka lihima utó okatize. Itó gako lugáa nezáne lekelitoka vinake ale hee linogo uve.

## 12

### *Sikalahulímo monolímini zámuza lehizelimiaká noive*

<sup>1</sup> Nigivénegita, Sikalahulímo zámuza haitopaitolímini lehizelimiaká noimó nenémini mogonamú gili gopa ikataze, lo likimitoze, gililo.

<sup>2</sup> Lekeza gozapá monó gelema vejená niago, lakagata hizego, negi hiziaká netá ómai netá sozáaló viki gímiziaká amó. Nene mota gilinaimó nenazo,

<sup>3</sup> nenémini lugáa lokugo gilitaze, gililo. Ve makó nene Ómasímini Sikalahulímo alémo vávani iko Izesuni aleko letoko laminogo ive. Itó Sikalahulímo alémo vávani amiko nene, Izesú nene Guivahaníne noive loko laminogo ive.

<sup>4</sup>\* Itó monolímini zámuza haitopaitolímini nemóza, Sikalahú hamokó nenémo lehizelimiaká noive.

<sup>5</sup> Monolímini gelekelé hoza haitopaitolímini nemóza, hoza amelaho Guivahani nene hamokó noive.

<sup>6</sup> Itó monolímini zámuza haitopaitotunú hoza aleaká nounimóza, Ómasi hamokó nenémo lelémo vávani igo aleaká noune.

<sup>7</sup> Sikalahú nenémo monokú lamaná iki minatave loko monolímini zámuza mukí nene gona moloko leme asú oaká noive.

<sup>8</sup> Ve makó nene Sikalahulímo alémo vávani igo gako gele hee lo minake loaká noive. Makó nene ámina Sikalahulímogó alémo vávani igo, asuguná gacolímini mogona loaká noive.

<sup>9</sup> Itó vejená makó nene ámina Sikalahulímogó alémo vávani igo, Ómasimú gele alévolé onoikeve loko alévolé suni ale utó oaká noive. Makó nene ámina Sikalahulímogó alémo vávani igo kivisi vejená kelémo zokoaká noive.

<sup>10</sup> Itó makó nene alévolé suni alitive loko zámuza ameká noive. Makó nene Ómasímini agepagutí gako litive loko agika agata ale koló omiaká noive. Makó nene netá matá nene Ómasilokatí nemó nomimó nenémini mogona ániago hee hee litive loko nene agika agata ale koló omiaká noive. Itó makó nene haitó vetini konokutí monó galinali litive loko agepa ale vávani omiaká noive. Makó eza haitó konokutí lina gacolímini mogona ale viligoko lo kimitive loko agepa ale vávani omiaká noive.

<sup>11</sup> Nenémini zámuza mukí nene Sikalahú hamolímogó ezáa agata gilike etó etó oko gona moloko lemeaká noive.

### *Lugupe hamó nego gelekeleváa mukí neve*

\* 11:25: Gá 24:6-8 \* 12:4: Lom 12:6-8

<sup>12</sup>\* Vegená leza lugupe nene hámakó neve, itó lugupémini gelekelé nita netá ligisa ligizani logoka legepa logómula lagata nene mukí neve. Keza ali nupa ikago, lugupe hámakó loló oko neve. Leza Kilistotoka gímizuni vegenatoka ámináminoko neve.

<sup>13</sup> Sikalahú hamolímo lelitoka limike monokú lelémo nupa okago, lugupémini suni aleko hamó loló oko nominune. Zuta vegená itó Kiliki vegená itó sihele vegená nouhaki itó minamuhaki leza mukító nene hamó Sikalahú ale mulutegú molo asú unike, hamó loló okune.

<sup>14</sup> Lugupémini gelekelela nene hamó nomive. Mukí niave.

<sup>15</sup> Nenemú ligisa nenémo neza agizani noamuve, nenemú agupémini nekisa minamuve loko litikumule loko lugupe ahuloake ezáagó minoakeve loko laminogo une.

<sup>16</sup> Itó lagata nenémo neza agómula minamuve, nenemú agupémini nekisa minamuve loko lugupe ahuloake ezáagó minoakeve loko laminogo une.

<sup>17</sup> Lugupeló nene logómulagó minalina, lugupe nenémo agatamú vitagá iline. Itó lagatagó minalina, agokamú vitagá iline.

<sup>18</sup> Lá onoi móza, lá oko nomive. Ómasímo ezáa agata gele hee lo minake, lugupémini gelekelela mukí nene hoza gakó haitopaitolímini loketamó.

<sup>19</sup> Lugupémini nekisa hamokó minalina, lugupe nene golesa oko haha ilinamóza,

<sup>20</sup> itínasa nene gelekelé netá mukí niago, lugupe nene hamó neve.

<sup>21</sup> Nenemú logómula nenémo geza lelí luhusate minamanize, ahulokoko vozo loko ligizani lo ameminogo ive. Itó gotote nenémo geza lelí luhusate minamanize, ahulokoko vozo loko ligisa lo ameminogo ive.

<sup>22</sup> Lá oko nomive. Lugupémini nekisa lugáa keé lama netá nene minamalina, leza lamaná oko minamutiline.

<sup>23</sup> Itó lugupémini nekisa makokumú guluko limiki niamó nene gizapa okimiaká nounge. Itó lugupémini lovoza hili netá nene asapú oko gonanalísi oaká nounimóza,

<sup>24</sup> lovoza helemi netá nene utó iki miniaká niave. Ómasímo nene lugupe ale utó ike, lugupémini nekisa limiki minamoláa nene hoza napa kimimó.

<sup>25</sup> Lugupémini nekisa keza hou líki haitopaitó minamikí lelegí iki eza gelekelé otiko eza gelekelé otiko minatave loko hoza kimimó.

<sup>26</sup> Nenemú lugupémini nekisa makolímo gotá apelekiko miluma gilitimó nene, lugáa mukí keza miluma gili asú inigave. Itó lugupémini nekisa makó ali otitamó nene, lugáa mukí keza kogoliza vizi asú inigave.

<sup>27</sup> Monokú nominuhatímíni mogona ámináminoko neve. Lekeza mukí ali nupa ake Kilistoni agepegitana iki minake aí vegenala zuha lílí iki niave. Itó etó etó nene aí nekisa lílí iki minake, gelekelé iki niave.

<sup>28</sup>\* Ómasímo nene vegenala zuha lelitoka lá oko lelémo etó okago nounge: Aposolo lelémo etó okago, lelí hoza itekave. Nene lotí lemeko Ómasímíni agepagutí gakó li utó iaká ve. Nene lotí lemeko monó lainim-ilimiaká ve, itó nene lotí alévolé suni haitopaitolímini aliaká ve kelémo etó imó. Nene lotí lemeko kivisi vegená kilímí zokiaká vegí, nasahilí ikimiaká ve, gizapa ve, itó haitó konokutí galinali li utó iaká ve kelémo etó imó.

<sup>29</sup> Leza aposologó lelémo etó imó nehe. Itó Ómasímíni agepagutí gakó li utó utó vegó kelémo etó imó nehe. Itó monó lainim-ikimiaká vegó kelémo etó imó nehe. Itó alévolé suni haitopaitolímini ali utó iaká vegó kelémo etó imó nehe.

<sup>30</sup> Itó kivisi vegená kilímí zokiaká vegó kelémo etó imó nehe. Itó haitó konokutí galinali li utó iaká vegó kelémo etó imó nehe. Itó haitó konokutí lina gakolímini mogona ali viligiki li kimikiaká vegó kelémo etó imó nehe. Nene mínoko nomive.

<sup>31</sup> Lekeza monolímini zámúza iteko minamoláa alitune líki amúza milalo. Itó neza monolímini zámuzatunú miniki aliki ita gapováa lamaná lekelepizitoze, gililo.

## 13

### *Ligika kemeko nasahilí oaká gakó*

<sup>1</sup> Neza vegenalitíni konokutipe itó agelogini konokutipe monó litomóza, nigika nene vegená kememoko hanuva lá itomó nene, hoko-hoko netá pelo anó nenémini oko ha netá loló inogo ive.

<sup>2</sup>\* Itó neza Ómasímíni agepagutí gakó loakalímíni zámuzagi ve loló oko mininake, Ómasímíni asuguná gakolímini mogona nene gele asú oko, itó mukí asuguná gakó mogonamú gele asú oko minoko, itó neza gele alévolé onoko agoka makó akutoko alemó zítítímíni zámuzagi minoko nigika kememinake hanuva lá itomó nene, ha netá loló inogo ive.

<sup>3</sup> Itó netá matáne mukí gohogó ve nasahilí oketoko itó nugulizá ale otitove loko nugupe lokú ahulokoko nigika kememinake hanuva lá itomó nene, ha netá nenazo, nenémo nelémo lamaná aminogo ive.

<sup>4</sup> Kigika kimita vejená nenete gínikaha amiki hulu iki minanigave. Keza kemekugú namiki kezáinimú giliko itemiko kezáini kugulizá ali oteminigave.

<sup>5</sup> Keza sihana netá alemiki letenaha minamiki mukahá amiki vejenalitini lihima ali minamiki,

<sup>6</sup> netá golesámo hutilí noiko kogoliza vizemiki monó sunímo hutilí noiko mulúikú lamaná gilinigave.

<sup>7</sup> Kigika kimiaká vejená nenete genavagi netá hanuva gihinigave. Mukí netá matakumú gili alévolé ikigó minanigave. Kigikatunú Ómasimú kagata losi gelemiki ageva iki miniki monokú alévolé iki minanigave.

<sup>8</sup> Ligika kemeaká suni nene lutegeminogo ive. Ómasímini agepagutí gakó loaká nene asú inogo ive. Itó haitó konokutí galinali loaká nene asú inogo ive. Itó asuguná gakó mogona geleaká nenegi asú inogo ive.

<sup>9</sup> Asuguná gakó mogona geleaká itó Ómasímini agepagutí gakó loaká nounimó nene veletó agilaló neve.

<sup>10</sup> Minoko alika nene vové avetoko avasavagi netá utó noiko, veletó agilaló ne netá nene tolova inogo ive.

<sup>11</sup> Neza ízegipa namuni minuke, namu gakó loko minumó, itó namunite giliaká kigika kagata geleko minumó. Itínasa nene olopa ve loló okuke, ízegipa namunitini suni ahulokuve.

<sup>12</sup> Itínasa gamena geleaká noumó nene, gapokapolímo logoka legepa ale viligokago, ángo hee hee losá amunimó nenéminoko neve. Alika nene gihila lamaná logómulaló utó iko, Ómasímo lelí mogonáa ángoko gele asú oaká noimó nenéminoko leza ángokoko gele hee hee loko gilinogo une.

<sup>13</sup> Itó miniva miniva ita netá nene Ómasimú gele alévolé oaká itó lagata losi gelemoko ageva oaká, itó ligika kemeaká nene netá losive makole nemóza, ligika kemeaká nenémo iteko neve.

## 14

*Ómasímini agepagutí gakó lo utó o kemeaká nenémo iteko neve*

<sup>1</sup> Nenemú lekeza vejená likigika kimiki nasahilí itune liki amuza mílalo. Itó monolímíni zámuzá makó alitune liki amuza mílalo. Lá iki miniki Ómasímini agepagutí gakó li utó iakakumú gilikiko itino.

<sup>2</sup> Haitó konokutí galinali liaká nia vejenalite vejená li kememake Ómasi li amiaká niave. Keza nene Sikalahulímo kelémo vatí igo Ómasímini asuguná gakó nilago, vejená lugáate gili gopa iaká niamóza,

<sup>3</sup> Ómasímini agepagutí gakó li utó iaká niamó keza vejená monokú kilími olotiva iaká niave, itó ali kii likimiaká niave, itó kilími hulu iaká niave.

<sup>4</sup> Haitó konokutí liaká nia vejenalite kezáini kigikáini hizi lé imiaká niamóza, Ómasímini agepagutí gakó li utó iaká nia vejenalite Izesuni vejenala zuha mukí nene monokú kilími alévolé iaká niave.

<sup>5</sup> Lekeza haitó konokutí galinali li asú itave loko geleaká noumóza, Ómasímini agepagutí gakó li utó itakumú gulugo itekave. Ómasímini agepagutí gakó li utó iaká nia vejená nenete haitó konokutí liaká nia vejená nene kiviligikave. Lá onoimóza, ve makolímo haitó anokutí lokikoma, Izesuni vejenala zuhatini luhusáini ale gilitoketative loko makolímo ámina lonoi gakolímíni mogona ale viligoko lo kimitimó nene hamó lelegító minanigave.

<sup>6</sup> Nigivénegita, neza lekelitoka vinake Ómasímo lo utó oko lo nimi gakó itó monó mogona itó Ómasímini agepagutí gakó itó lainim-oleketati gakó lo utó oko lo lekememinake haitó konokutikó gakó lo likimitomó nene, nenémo nana oko hize lé oleketative.

<sup>7</sup> Hanuva netá hololopani itó gotilisa nene lamaná iki zemitamó nene, anó lupamú nana oko gilitune.

<sup>8</sup> Itó ami vémo pikuli nene lamaná oko huhu lamitimó nene, lova hizitave loko sele nolive liki viki ali vatí aminigave.

<sup>9</sup> Ámináminoko lekeza haitó konokutí gakó asapulagi litamó nene, vejená lugáate mogona nana iki gilitave. Hanuvamú likago, gaktotini nene hepelímo ale gopa okiko tolova inogo ive.

<sup>10</sup> Nagata gulumó numutó namató haitopaitó konó komasí nomive, itó gilituni gakokó nemóza,

<sup>11</sup> hanuva neza haitó konokutí lina gakoímini mogonáa makó gele gopa itomó nene, ámina gakoímini amelaho nenikumú gelekiko, haitó apatotí ve loló inogo uve, itó neza ámináminoko aikumú gelekugo haitó apatotí ve loló inogo ive.

<sup>12</sup> Itó lekelitoka mogona ámináminoko neve. Sikalahulímini zámuza lekelitoka utó itive liki amuza miliaká niamó nene vatí oko nemóza, Izesuni veganala zuha monokú kilími miliko, monokú luhusatini ali alévolé itave liki amuza milalo.

<sup>13-14</sup> Neza haitó konokutí Ómasiloka litomó nene nigikatunukó linogo uve. Nagata nenémo netá gihila ale utó aminogo ive. Nenemú haitó konokutí gakó galinali lita veganalite mogona ali viligiki veganá li kimitatímini zámuza alitune liki Ómasiloka lino.

<sup>15</sup> Nenemú nana itune. Nenémini uko etanogo ive. Makó zupa nene Sikalahulímo legepa ale vávani okiko haitó konokutí Ómasiloka litune, itó makó zupa nene lagatatanú gele hee noloko Ómasiloka litune. Makó zupa nene Sikalahulímo legepa ale vávani okiko haitó konokutí nama litune, itó makó zupa nene lagatatanú gele hee lonoko nama litune.

<sup>16</sup> Lá amitanimó nene, Sikalahulímo gegepa ale vávani okiko haitó konokutí Ómasi agepoka litanimó nene, geza lokako, nene sunimú gele vevesamita veganalite geí gakó gelemítamó nenazo, keza nana iki lamanale liki litave.

<sup>17</sup> Geza Ómasi agepoka gihila litanimoki, gigivekaho nene gele gopa noiko, nana oko monokú alémo alévolé itive.

<sup>18</sup> Haitó konokutí gakó loaká nene nénisi likivilegeko loaká nouve. Nenemú Ómasi agepoka loaká noumóza,

<sup>19</sup> neza nenemú gulugo, gihila loló amive. Monokumule liki alegesá niko haitó konokutí gakó hána hána litove lokoma hanuva litomóza, neza nenemú gelekugo lemekave. Nígika nagatatanú gele hee hee linake veganá lainim-oketanogo nene monó gakó luguhasí lo kemeakakumú nene gulugo, itekave.

*Monokú linígima izegipa komatini suni alemilo*

<sup>20</sup> Nígivénegita, izegipa komate izahuza netakumú giliaká niamó nenéminiki likigika lakagatámo izegipa komatini suni alemilo. Izegipa komatini suni alinígima nene netá golesa alemilo. Itó gakó giliki ali hee hee linígima nene, olotiva veganalitini suni alilo.

<sup>21</sup> \* Monó gotolaú gakó makó láa liki luhuva gizinamóma neve: Guivahanímó láa loko nolive: Neza haitó apatotí veganá kelémoko okugo, keza iki imane veganá nene haitó konokutí není negepagutí gakó li kimitamóza, není gakó gelemínigave.

<sup>22</sup> Nenémini lugáa litoze, gililo. Haitó konokutí gakó galinali loaká nenémo monó gilina veganakumule loko haitó suni utó osá amive. Monó gelema veganalite ininá itave loko neve. Itó Ómasímini agepagutí gakó lo utó oko lo kemeaká nenémo monó gelema veganakumule loko utó osá amive. Monó gakó gilina veganalitini luhusáini neve.

<sup>23</sup> Nenemú Izesuni veganala zuha ali nupa iki miniki mukitó nene haitó konokutí gakó ganagana niliko, nene sunimú gelema veganá ahe itó mogona gelema veganá ahe itiki giliiki nene, negi hizikave liki gilinigave.

<sup>24</sup> Itó lekeza mukitó nene Ómasímini agepagutí gakó li utó iki niliko, monó gelemi vehe itó hetoka ve makolímohé lekelitoka iteko monó gakó gilinogo ive. Lá itimó nene, lekeza mukitoka lina gakoímo lihimalámini mogonala ale utó oko goní otanogo ive.

<sup>25</sup> Lá okiko, agikagú netá halá geko nemó nene utó okiko, eza pou loko mikasigú agoka hizeko ako minoko, Ómasi gupá ze ameko, Ómasi lamaná lekelitoka noive loko linogo ive.

*Monokú netá mukí iki miliki itamó nene vo gunigó ino*

<sup>26</sup> Nígivénegita, nenemú nana itune. Lekeza monokumú alegesá inigí niikíma, lukugupégó anitísá amave. Makó nenémo monó nama aleko oaká noive. Itó makó nenémo lainim-oleketatí gakó aleko oaká noive. Makó nenémo Ómasímini agepagutí gakó haitolímini aleko oaká noive. Makó nenémo haitó konokutí gakó galinali loaká nene aleko oaká noive. Makó nenémo haitó gakoímini lonoi gakoímini mogona loaká nene aleko oaká noive. Nene suni mukí alítamó nene, monokú luhusatini ale alévolé itune liki nenémini ilo.

<sup>27</sup> Haitó konokutí gakó litamó nene mukilite lamilo. Losihe losive makolehe nenéminiki hamopamó niliko, makolímó nene mogona ale viligoko lo kimino.

<sup>28</sup> Monokumú alegesá iki niiko, ve makolímó haitó konokutí linogo nookoma, mogona ale viligoko lo kimiti ve makó nomikoma ezáagó nene makotoka minoko ezáaloka itó Ómasiloka lino.

<sup>29</sup> Itó Ómasímini agepagutí gakó nene veganá losihe losive makolehe keza li utó iki niiko, lugáa keza nigiliki gona milatave.

\* 14:21: Isa 28:11-12

<sup>30</sup> Makó nenémo noliko, Sikalahulímo nene ve makolímini agikagú monó gako molomikiko, linogoma, goí oko li ve nene hanuva noiko lino.

<sup>31</sup> Lá iki Ómasímini agepagutí gako litune likima, lekeza mukitó hanuva li asú itave. Lá iki hamopamó likiko, lugáa keza monó giliki kigika vávani itive.

<sup>32-33</sup> Ómasi nene ale gopa oaká netakumú amu helesá ami Ómasi noive. Netá ale hee loaká nenemú amu heleaká noi Ómasi noinazo, Ómasímini agepagutí gako li utó ita ve nenete kezáini li utó ita gakató gizapa iki minatave liki linamole.

Izesuní vejenala zuha lugáa nenete monokumú ali nupa niago nene,

<sup>34</sup> Vená nenete gako lamake hanuva miniaká niave. Lekezagi áminámini ilo. Vená nenete monó gako litave loko gele kemesá amune. Vená keza nenéminiki limiki minatave loko Mosé lo hukoko li gako nene nene.

<sup>35</sup> Vená makolímo monokumú alegesá niiko gako litimó nene, lovoza heleaká netá nenazo, vená keza netá makokumú loká inigima, hanuva numúikuka miniki váinigi kezáinigó loká ikitiko, ligili hagili itave loko noluve.

<sup>36</sup> Nolu gakokumú géneka litamó nene, Ómasímini gako lekelitokatí utó okago nilahe. Itó lekelisigó Ómasímini gako gelemó nehe loko litove.

<sup>37</sup> Lekelitokatí makolímo ezámú gelekiko, Ómasímini gako loaká ve gihila loló itimó itó Sikalahulímini zámuzagi mína ve loló itimó nene, gako luhuva gizo nolukumumó nene Guivahanímo lo hutamó neve loko gilino.

<sup>38</sup> Vegená makó nenémo imane gako gele ahulatimó nene, aí gako gele ahulatune.

<sup>39</sup> Nenemú nigivégita, lóa liki gililo: Ómasímini agepagutí gako li utó itakumú amuza mílalo. Haitó konokutí galinali loaká nenemú géneka likitamílo.

<sup>40</sup> Itó monokumú alegesá iki miniki netá matá mukí iki míliki itamó nene vo lamanakó oko vo gunigó ino.

## 15

### *Izesú heleneikutí oti gako*

<sup>1</sup> Nigivégita, Izesuní gako lamaná lo lekemekugo gilinamóma goha lo likimitove. Lo lekeme lekeme ugo, alikago, lukesatini loló onomóma neve.

<sup>2</sup> Ámina gako ali gilitiki alinitamó nene, gili zagiaká netatini alemó zeko gopa onamitimó nene, lukugutó vizinogo ive.

<sup>3\*</sup> Monó gako iteko mína gako lo nimimokó nene lo lukumuke, lóa loko lo lukumumóma neve: Kilistó nene monó gotoláu alika lá oko utó inogo ive liki li mílató lelí lihimatemú hilimó.

<sup>4\*</sup> Helekago, gale zimikago, monó gotoláu li mílató gamena losive makole galegú mínoake, otopá zeko otimó.

<sup>5\*</sup> Oteake, goí oko Pitani utó o amimó. Nenelotí izegipala zuha 12-a keitoka utó o kimimó.

<sup>6</sup> Nenelotí vejenala zuha 500 keza alegesá iki niago neneló utó o kemekago, ángi asú amó. Itó keikutí mukí kogómulagi ha niamóza, lugáa mota hilikave.

<sup>7</sup> Nenelotí agunala Zemusini utó o amimó. Nenelotí aposolo mukí utó o kimimó.

<sup>8\*</sup> Alika nene neza guhalehale oko nougo utó o nimimó.

<sup>9\*</sup> Neza aposologutí lemeko nouve. Neza Ómasímini vejenala zuha gopoguni moloko kepeleko nougo, aposolo loló itane loko nugulizá molokago, okeha nípiligo nouve.

<sup>10</sup> Lá onoumóza, neza aposolo loló uke, neni mogonáne haitolímínoko nemó nene Ómasi agika lamanakímo lokago loló okuve. Itó agika lamanakímo nenitoka satamíve. Neza hoza alumó nene aposolo lugáa kivilegeko alumole. Itó hoza neza nanánetumú aluline. Ómasi agika lamanakímo nenitoka minokago alumole.

<sup>11</sup> Itó neza hoza alumoki itó aposolo lugáate hoza alemoki nenémo gihila nomive. Leza monó nenéminoko lo lekemekuko, lekeza gili alévolé inamó nenémo gihila neve.

### *Izesú heleneikutí oteneimóma nenazo, lezagi otinogo une*

<sup>12</sup> Kilistó nene heleneikutí otopá zeko otimó. Monó lóa loko lo nolukumuko, lekelikutí lugáate helenosakutí oteminogo une liki nanamú liaká niave.

<sup>13</sup> Heleneitunikutí otituni gako nene gihila minamilina, Kilistó heleneikutí otimoki nene gako gihila minamiline.

<sup>14</sup> Itó Kilistó nene otemilina, monó noluhá nene hanuvamú lokuko, lekeza hanuvamú gili alévolé aline.

\* 15:3: Isa 53:5-12 \* 15:4: Age 16:8-10; Mat 12:40; Apo 2:24-32 \* 15:5: Luk 24:34; Mat 28:16-17 \* 15:8: Apo 9:3-6 \* 15:9: Apo 8:3

<sup>15</sup> Itó nenegó nomive. Leza Ómasimú lo nouhá nene eza Kilistoni heleneikutí alémo otimó neve loko loaká nounimóza, helenosakutí otemoaká netá nelina, Kilistoni nene Ómasímo alémo otemilíne. Itó nene gakó lunimó nene Ómasiloka lo mulunike sozaló ve loló oko nounimó gililíne.

<sup>16</sup> Hele vejená otemitave liki liaká niamó nene gakó gihila minalina, Kilistonigi alémo otemive lokogi gakó gihila minalíne.

<sup>17</sup> Itó Ómasímo nene Kilistoni heleneikutí alémo otemive liki liaká niamó nene gakó gihila minalina, gili alévolé iaká netatini nene ha netá loló ilíne. Itó lihimatini nene hanuva minalíne.

<sup>18</sup> Itó Kilistonimú gili alévolé iake hele vejená nene viki latila alíne.

<sup>19</sup> Leza mikasiukagó imane hanuvamú Kilistokumú lagata losi gelemoko ageva oko minutilina, vejená lugáa mukilite muhelete gelelíne.

*Helenosakutí otitunimó nene ganagana otinogo une*

<sup>20</sup> Itó nenéminoko nomive. Kilistó nene lamaná heleneikutí otopá zeko otike, hele vejená ale goí o kimike otimó noive.

<sup>21</sup> Ganá ve Atá eza heleaká netá ale utó o limike hilimó ámináminoko haitó ve makolímó helenosakutí otituni netá ale utó o limike otimó.

<sup>22</sup> Atagegi lugupe apizekoma nouninazo, nenemú hele asú oaká noune. Ámináminoko Kilistogegi lugupe apizekoma nouninazo, galegutí ote asú inogo une.

<sup>23</sup> Hizi letiki otitave loko lonoitokó otinogo une. Kilistó ale goí o limike oteneive. Ati gamenaló nene aí vejenala zuha leza otinogo une.

<sup>24</sup> Nenelotí alíka nene Izesú eza kugulizaki ve haitopaitolímíni itó Satani amuza ve keí zamuza aleko leme asú okoko, aí gizapaló nia vejená nene Ómasi amelahini agizakú molokiko, gizapa oletoko noiko, gamena lutiginogo ive.

<sup>25</sup> \* Itínasa nene Guivahanímó hozaváa aleko gizapa oletoko minoloko noviko, Ómasímo nene lova ve gala veva kelémo agisa heumauka molokiko, hozava ale asú inogo ive.

<sup>26</sup> Lá okoko, lova ve gala ve makó kepele asú okoko lova ve gala vetini améipini napa nene alíka apele hilinogo ive, agulizá nene heleaká netá.

<sup>27</sup> \* Izesú lá iti netakumú monó gotolaú láa liki luhuva gizinamóma neve:

Ómasímo mukí vejenaki itó netá matá mukí nene agisauka molo asú inogo ive.

Liki lina gakó nene giliiki Ómasímuki lonoi gakó nehe liki gelemilo. Ómasímo mukí netá nene Kilistoni agisauka kelémo nupa oaká noive. Eza nene Kilistoni agisauka minaminogo ive.

<sup>28</sup> Ómasímo vejená itó netá matá mukí nene gipala aí agisauka lelémo nupa okiko nouko, gipala nenémo amelahini gelekelé otanogo ive. Lá okiko, amelaho livilege asú inogo ive.

*Helenosakutí oteakakumule loko genavagi hoza aleko nominune*

<sup>29</sup> Lekelikutí lugáate hele vejenakumule liki monó nagamí hiliaká niave. Helenosakutí oteaká netá nomítimó nene, nanamú nihilave.

<sup>30</sup> Itó helenosakutí oteaká nene soza gakó minalina, neza nene gasovagi netalímíni amupiló genavagi minoaká noumó nene hanuvamú minalíne.

<sup>31</sup> Nigivénegita, Guivahanite Izesú Kilistó eza není gonanalisi minatave loko lekelémo molamó. Nenemú gelekuke, Ómasímíni avogisaló láa loko noluve: Neza gamena gamena heleaká netalímó omo ávatíha okago nominuve.

<sup>32</sup> \* Neza Epeso numutoka gasova galagitana vejená kezagi lova hizeko minuhale nene, hanuva vejenalítini gakotoka leheta onoko onoitomó nene, nana netá gihila utó o nimitive. Helenosakutí oteaká netá nomítimó nene, láa loko luko etalíne: Azo hilinogo unize, itínasa nosáneta iza goula apeleko lavalona natune loko lutilíne.

<sup>33</sup> Gopa napa mihina nia vejenatoka viki gímizemilo, likilímíni gopa ikataze. Itó lamaná iki iki miliki ita netatini nene gopa okative.

<sup>34</sup> Lekeza nene likigika otopá ziko etó iki miniki golesa netá nene lekemegeza amilo. Lekelikutí vejená lugáate Ómasimú gilísá amave. Nenemú gelekuke, lokovoza hilitive loko noluve.

*Helenosakutí haitolímínoko gileleko otinogo une*

<sup>35</sup> Itó lugáate nene hele vejená keza nana iki otitave. Itó kugupe kovogisagi nanagitana ominamó utó itave.

<sup>36</sup> Liki loká ita gakó nene negiga linigave. Lekeza netá matá ali zuhá iaká niamó nene hanuva ma golosá amive. Sikú zapava hulupa legekago, goloko iteaká noive.

<sup>37</sup> Zuha netá nene haitó agupegi neve. Itó gulúvila nene haitó agupegi neve. Gihiláagó kilé ahe itó netá lugáahe zuhá oaká nune. Itó zuhá okuko, goloakaláagi agilagi nene alika utó oaká noive.

<sup>38</sup> Itó Ómasi eza gele vevesoake lotamole loko ametameni amimó áminaló goloko iteake o moloaká noive. Itó gihila ámina oko kemetameni haitopaitolímíni utó oaká noive.

<sup>39</sup> Lugupémíni mogonáa ámina oko hamokó minamive. Vegená lelí lugupe haitó, itó iza galatíni kugupe nene haitó, itó namatíni nene haitó, itó lagahatíni nene ámina oko haitó.

<sup>40</sup> Itó okulumatoka netá matá mukí neve, itó mikasiloka ámina oko netá mukí nemóza, okulumatoka netá mukí nemó nene gonanalíváa haitó, itó mikasiuka netá nemó nene ámina oko gonanalíváa haitó.

<sup>41</sup> Ho nene lapanaláa haitó, ikani eza lapanaláa haitó, sonohí keza ámina oko lapanáini haitopaitó neve.

<sup>42</sup> Helenosakutí oteakalímíni mogonáa ámina oko neve. Gale zeaká lugupe nene haha oakalímíni neve. Goloaká nenémo haha aminogo ive.

<sup>43</sup> Gale zeaká lugupe nene hutuváa neve. Goloaká nene gonanalívagi neve. Gale zeaká lugupe nene keé lamimó neve. Goloaká nene zámuzalagi neve.

<sup>44</sup> Gale zeaká nene mikasi lugupéa neve. Goloaká nene okulumakú lugupegi golanogo une. Mikasi lugupe nemó nene ámina oko okulumakú lugupe neve.

<sup>45</sup> \* Monó gotolaú láa liki luhuva gizinamóma neve:

Ganá ve Atá nene sikalahulagi loló oko minoaká nenémíni amelaho loló oko minamó neve. Itó alika Atá agulizá Izesú eza alévolé oko minoakalímíni amelaho loló oko minamó.

<sup>46</sup> Okulumakú lugupe ale goí osa amive. Mikasigú lugupe nene ale goí okago, okulumakú lugupe nene alika utó inogo ive.

<sup>47</sup> Ganá mikasigú ve eza nene mikasitunú loló imó, nenemú mikasigú ve minamó. Alika ve eza nene olulumakutí vema minamó.

<sup>48</sup> Mikasiuka vegená leza mikasiukatí ve Atá mina avevezaha oko nune. Itó okulumakutí limi ve mina avevezaha oko gosohá vegená minanogo une.

<sup>49</sup> Itó mikasiukatí vémini ametameni alunimó ámina oko alika okulumakutí limi vémini ametameni alinogo une.

*Izesú anititi zupa okulumakú lugupe ale luhanogo une*

<sup>50</sup> Náa vegúe, gakó makó imane litoze, gililo. Mikasi lugupémo Ómasímíni avogisaló vaminogo ive. Itó anuva oko haha iti lugupetunú netá alévoleláa ma alemnogo une.

<sup>51</sup> \* Gililo. Neza asuguná gakó makó lo likimitoze. Leza Izesulinímú gele alévolé uni vegená mukitó hilitunimó negopa logómulagi nuni vegenaki hilina vegenaki ale viligokinake gosohá lugupe nene mukitó ale luho asú inogo une.

<sup>52</sup> Alika pikulima noziko, helemoláate galínali gó melevezakitana oko otiiki anuva iki haha amitamó minanigave. Itó logómulagi minatunimoláagi ale viligokinake, haitó lugupe ale luhanogo une.

<sup>53</sup> Lugupe imane anuva oko haha oaká lugupe nene gololohá oko ale ahulokinake alévolé oko minoaká nene ginégane nenémínoko ale luhanogo une. Itó heleakalímíni mututona leza alévolé lugupe ale luhanogo une.

<sup>54</sup> \* Itó anuva oakalímó alévolé oko minoaká ale luhati zupa, gakó láa loko monó gotolaú luhuva gizonimóma alévolé inogo ive:

Alévolé oko minoaká nenémo heleaká nene avilegeneimóma neve.

<sup>55</sup> \* Avilegeake, heleaká geza lepeleaká zámuzaka hí neve. Heleaká geza gasovaka hí neve loko limó.

<sup>56</sup> Lihima netalímó nene heleaká netalímíni gasovala loló onoive. Itó Ómasímó lo huka gakokutí lihima netalímó helisalagi loló onoimóza,

<sup>57</sup> Ómasi eza Guivahanite Izesu Kilistoni lomikago, netá golesa avilegeaká zámuzalemeaká ve noinazo, nenemú agepoka litune.

<sup>58</sup> Nenemú náa vegúe, imane lo lekemenou gakó gili miniki alévolé iki oti vevesiki minalo. Lá niiki Guivahanímule liki hozaváa naliki, ámina hozámíni gihila voko sata aminogo ive liki gili miniki Guivahanímíni hozaló gamena gamena amuza miliki aliliki vilo.

## 16

*Izesuni vegenala zuhate moni ali nupa itave loko lo kimimó*

<sup>1</sup> \* Itó Zelusale apatoka Ómasímíni vegenala zuhate alitave liki moni ali nupa itakumú lo likimitoze, gililo. Galesia mikasiuka monó vegená lo kumumómámíniki ilo.



<sup>2</sup> Lekeza moni nalemómámini avevezahaló gili miniki, holisi zupa zupa Sategú nene lugáa gona miliiki ali etó etó iki mili-liki viki minalo. Hanuva moni ali nupa amiki gatizá niiko, vo anitekugo, moni ali nupa inigi ligitagani ikataze.

<sup>3</sup> Lekezaloka vokugo, veđená makó kilími etó inita ve nene ámina hozamú gilitave loko luhuva netá kemekoko kimiselekugo, ali nupa initatotí nene Zelusalega aliki vitaze.

<sup>4</sup> Itó lekeza giliko, etokikoma, nezagi makó aleko vitune.

*Pauló keitoka vinogo gakó lo molamó*

<sup>5</sup>\* Neza Masetonia mikasiuka vinogo nounazo, neneloka vinake gamena koma minokinake lekelitoka vinogo uve.

<sup>6</sup> Lekelitoka vinake, nenelotí nenelokahe nenelokahe vitokumú gapoló nilími vatí itave loko lekezagi gamena koma minatohe, itó hepé gamena asú itihe loko nagata noguluve.

<sup>7</sup> Neza itína gamena hanuva gopa novinake lekelí ángomó vitomó nene etaminogo ive. Nenemú Guivahanímo gelekiko, lamaná noikoma lekelitoka voko gamena koma mininake vitove loko noluve.

<sup>8-9</sup>\* Neza nene imaneloka Epeso numutoka Guivahanímo monolímíni gapováa velekago, hoza nalugo gihila zeaká noinazo, itó monolímíni gala veva mukí nianazo, Sikalahú lími holisi velesá alitamigo imaneloka miní ameko minanogo uve.

<sup>10</sup>\* Timotí lekelitoka vo anitekiko, Guivahanímini hoza aleaká noumó nenéminoko aleaká noinazo, agupeló gelegele okatize, lamaná oko minative líki geha zi amilo.

<sup>11</sup> Lekeza gosohá ve noive líki aikumú giliko lememinó. Nezagi ligive lagave lugáagi ageva oko nounimó nenazo, lekeza legesó iki gizapa itíiki amisilikiko, geha zeko gapoló oko oko atiginá oko nenitoka atize.

<sup>12</sup> Itó ligivetehe Apoloni gakó litove. Ligive monó ve lugáa kezagi lekelitoka vitive loko agata aleko amiseleháza, eza itínasa vinogo vávani amive. Itínasa gopa gamena makó nene vití gapo koló okikoma, lekelitoka vinogo ive.

*Pauló gekéini loketake luhuva gizo asú imó*

<sup>13</sup> Lekeza gizapa iki monokumú gili alévolé iki minalo. Lá niiki, lekehelele vizemiko amuza miliki minalo.

<sup>14</sup> Itó netá matá mukí lílilí inigima likigika kímíiki lílilí ilo.

<sup>15</sup>\* Itó nigive nagavese, gakó makó lo likimitoze, gililo. Lekeza Setepanani vená izegipala keza Akaia veđenakutí ali goí iki monó giliake, kígika ali viligamó neve líki mota gilinave. Itó monó gele veđenatoka gelekélé hoza alekogó minatune líki kagata giliaká niave.

<sup>16</sup> Nene lekelisi nene nenémini veđená itó lílímí vatí iki monó hoza aliki miluma giliaká nia veđená lugáagi ali lakamatoka milatave loko lakagata naluve.

<sup>17</sup> Setepanaki Potunatoki itó Akaioki keza nenitoka ikago, Koliti veđená lekelikumú miluma geleko noutoka mulúnegú lamaná gelekuve.

<sup>18</sup> Lá okuke, nezagi lekezagi mukító keí ángo lomala unike, mulutegú geha zimó. Lekeza ve nenéminámú giliko lamaná ino.

<sup>19</sup>\* Asia mikasiuka monó gilina veđená keza lekelikumú geké nililikitago noluve. Itó Akuilako venala Piliskako itó keí numukú monokumú alegesá iaká nia veđená keza Guivahanímule líki lekelikumú geké nililikitago noluve.

<sup>20</sup> Lekezatitini monokú eza aputá viziko eza aputá viziko iki minalo.

<sup>21</sup> Neza Paulona itínasa luhuva nogiza vémini agizakutí luhuva gizoaká nogosanima alekuke getetini loleketuke luhuva imane gizo asú nouve.

<sup>22</sup> Makó eza Guivahani agika amemitimó nene, Ómasímo usí vize amekiko meikú mututoni loló itize. Guivahanite geza ano.

<sup>23</sup> Guivahanite Izesuni nasahilí lekelitoka mino moloko minino.

<sup>24</sup> Nígikámo Izesu Kilistonímule loko lekelitoka minoaká noive.

## **Koliti Vegenalitini Luhuva Nampa 2 Pauló Gizo Kimimó**

*Koliti vegená nónohá kimike gizo kimi gakó*

1 \* Neza Ómasímini agepagú gakató Izesu Kilistoni aposolo loló u ve Paulona itó ve ligiveteho Timotí ezagi makó minusike Koliti numutoka Ómasímini vegenala zuha itó Akaia mikasi lugáaloka monó gele vegená miniliki víki iki inamó lekeza luhuva netá imane gizo nolukumuke láa loko noluve:

2 Ameteho Ómasi itó Guivahani Izesu Kilistó aitokatí nasahilí itó hulu nene lekelitoka minoloko voko minino.

*Pauló milumámini amupiló minake Ómasi agepoka limó*

3 Guivahanite Izesu Kilistoni amelahini Ómasi agepoka litunize. Eza hulu ameteho itó lelémó geha zeaká ameteho minokave.

4 Eza milumámini mogonáa haitopaitó utó noigo lelémó guni oaká noive. Lá okago, Ómasímo lelémó hulu oaká noi hulu nenémó leza ámina oko ligive lugáa miluma malumámini amupiló niminíkoma kelémó geha zitunimó onoive.

5 Kilistó eza miluma gilimó nenémíni nekisáa lelitoka vai oko miní amekago, ámina oko Kilistoni huluváa genavagi ale utó moloaká nousive.

6 Helegaloka lelitoka miluma maluma utó oaká noimó nene lekelitoka geha utó itive loko itó lekelémó lamaná itive loko utó o lemeaká noive. Itó helegaloka hulu nenémó utó o lemeaká noimó nene lekelikumule loko utó o lemeaká noive. Itó hulu nenémó lekelitoka mino moloko híze lé noleketiko, miluma maluma lelitoka utó oaká noimó ámina oko lekelitoka utó noiko nene siti viziki miniki alitave loko neve.

7 Itó leza lekelikumú lagata losi gelemoko minoaká nounimó nene alévolé okago láa loko geleaká nounge: Leza miluma geleaká nounimó nene lekezagi izá miliki miluma maluma giliki niminiki hulúmini gehava monéna alitave.

8 \* Nigivénegita, nenémíni gakola makó láa loko neve: Asia mikasigú milumámini amupiló minomo iteháma neve. Nenemú lakagatí molokative loko litoze, gililo. Neneloka nene genavagi netá golivagi lamaná lumupiló iteake lelémó akatimó okago, miní ameko logómula gizative loko ma gelemuháma neve.

9 Itó imane heleaká netá ale alitokune lokunike ligikate golosasa gimó nene lá imóza, ma utó o lemémimóma neve. Leza zámuzatemú gelekuko lemeko ha netá loló okiko, Ómasímo heleakakutí lelémó oteaká ve aitokagó leheta itune loko ámina golivagi netá utó o limimóma neve.

10 Itó áisi nene heleakakutí alata mololetoko minamó. Itó áisi minoko goha alata mololetoloko vinogo ive. Nene gakó gele seketigí o minoko aitoka leheta okune.

11 Itó lekeza Ómasiloka litatímó lelémó vatí iko, Ómasi eza agika lamanaki vémove loko lokonotó aleko lugutó vizekiko, vegená mukíite kegepagutí kegepagutí lelikumú Ómasi agepoka líki geké litiki minatave.

*Pauló Koliti vegenatoka vinogo noike haitó agata gilimó nenémíni mogonáa*

12 Lezatemú gulusigo lagasó iteaká noimó nene lá okomú neve: Ligika lamanatotí itó monokú nene imane mikasiuka nominuko ligikámo netá makokumú lehelú osá amive. Leza monóini nomi vegená keí kovogisaló nenémíni oko minunike monó gilina vegená lekelí lokovogisaló etó oko vevesoko minoaká nounge. Itó monóini nomi vegenalite gili hee líkakató leheta o minoko nomive. Ómasímini nasahilitó voko leheta oko minoaká nounge.

13-14 Neza gakó soza sazagi loko nomive. Gakó mogonatagana ma hitosá amuve. Luhuva gizo lekemekugo gatiki gili guni itave lokogó gizoaká nouve loko gelenouve. Itó lekeza není mogona lugáa mota gilinamómáminiki lekeza alika gili hee líki gili asú itave loko noguluve. Lá ikiko, lekelikumú neza gulugo iteaká noimó nenémíni oko lekeza Guivahani Izesuni gamena napaló nenikumú giliko itítize.

15 Gakó láa loko nolomó nene gele alévolé okuke goí oko gamena lositá lekelitoka vitomó nenémó mulutikú lamaná gilitave loko ale vavá umó.

16 \* Itó voko ánigolikimikinake Masetonia mikasiuka voko minokinake goha nene atiginá oko lekelitoka okugo nilímí gapo iki niko Zutaia mikasiuka vitohe loko gulumole.

<sup>17</sup> Itó neza láa loko lokugo, vávani oko haitolímíni imómave liki nilahe, olile. Itó neza nene monóini nomi vegeakítana oko nene negepatunú vitove loko lo muluke ámina gamenaló nene nigikatunú óe vamtive loko lumó nene hutuva loló okahe.

<sup>18</sup> Ómasi eza lamanalímíni amelahínáa minoakeve loko gakó lo hukoko lo lekemekugo hutuváa itó gihiláa nene gamena hámakó utó onamive.

<sup>19</sup> \* Ómasímíni gipala Izesu Kilistoni mogaána nene nezagi itó Sailasí itó Timotí leza lo lukumuhá vemámo gakó lo molokago lugáa nene gihiláa loló oaká noigo lugáa hutuva loló osá amive. Mukí gihiláagó loló oaká noive.

<sup>20</sup> Ómasímo lo mololeta gakó haitopaitolímíni nene aitokagó gihila zeaká noive. Nenemú Ómasímíni luhuva gegemá oko minative loko Izesú lelémo vatí noigo Ómasi agepoka lokusike lamanale loko loaká nousive.

<sup>21</sup> Ómasímo lekezagi Kilistotoka lelémo molokago alévolé okune. Itó Ómasímo lelémo etó onoiómoma neve.

<sup>22</sup> Itó áisigó nene ligikagú anosa mololetamóma neve. Itó netá mukí alika lehizele-tatítímíni izaina ike nene Sikalahú mulutegú molokago noimómoma neve.

<sup>23</sup> Neza numutitoka voko gahá lekemeko lekelémo gopa okatove loko gulugo, gena okago, lekelitoka goha vumómoma neve. Gakó nene nigikagú ánigoaká ve Ómasímo gelekago lamaná lo nolukumuve.

<sup>24</sup> Itó lekeza gili alévolé iakatinigú alévolé iki niamó nene gelenousimó nenazo, leza monokú lugulizaki ve loló itíive loko ma lamuve. Hanuva lekelitoka mulutikú lamaná gilitave loko lekelémo vatí oko hozaváa aleaká nousive.

## 2

<sup>1</sup> Miluma gilita netá goha ale utó mololikimikatove loko gulugo, gena nivisekago, lekelitoka vamtive loko nigikatunú lo hukokuve.

<sup>2</sup> Nénsi miluma netá lekemekugoma, makó éage mulúnegú ali lamaná initatave. Leke-lisigó nianazo, mulutikú golesa gilikiko lá amitamó ikatave loko nenémíni aminogo uve.

<sup>3</sup> Itó lekezatini netá matá aliaká amó ali hee litave loko luhuva netá makó gozapá gizo lukumumó nene lekelitoka vokugo, lekeza mulúnegú ali lamaná inimiaká niamómata goha mulúnegú ale golesa gilito netá alinimikatave loko nene ámina luhuva gizumóma neve. Lezatemú láa loko noguluve: Není mulúnegú lamaná gilitotímó monéna mulutikú lamaná geleaká netá ale utó mololeketanogo ive.

<sup>4</sup> Itó mulúnegú ale golesa gelekugo itó mulúne githiná okago, lekelikumú ive napa napa uke luhuva netá gizo lukumumó nene mulutikú golesa oleketatove loko negopa, nigikáne lekelitoka alévolé oko mulumó nenémíni mogaána lekelepizitove loko ámina luhuva gizumóma neve.

*Golesa netá ali vémini lihima ahulitata gakó*

<sup>5</sup> Ve makokumú luhuva netá gizumó áisi nene mulutegú golesa guluni netá alimó nene nenikó ma onetamive. Lekelikutí lugáagi mulutikú golesa gele netá alimómoma neve. Ale nupa oko lokugo gena okative loko mukí vegeaná nenémíni oletamómoma neve loko lamuve.

<sup>6</sup> Lekeza mukilita ámina ve nene nogosani amiki netá matá ali hee liki lílí itamó nene mota áminaló asú ino.

<sup>7</sup> Itína nene mulunagú golesa gelekoko monéna golesa okative loko lihima ahulitiki alími hulu ilo.

<sup>8</sup> Nenemú alími vatí iki nasahilí i amiiki likigikámíni mogona alapizitave loko lakagata aleko noluve.

<sup>9</sup> Neza nenemule loko goí oko luhuva netá gizo lekemenoumómoma nene gakónéa mukí gili alitave loko nenémíni mogaána utó itive loko gimilikú moloko gizo lekemenoumómoma neve.

<sup>10</sup> Lekeza ve makolímíni lihimala ahulimikago, neza ámina oko ahulomiaká nouve. Áisi lihima ale utó molamó nene nezagi ale utó molonetamó negoma nene nezagi nahulotuve. Satá nene netá golesa aleletatove loko nogilimoláa mota gelenounimó nenazo, nenemú lekelikumú guluke Kilistoni avogisaló nene

<sup>11</sup> Satá eza logoka vizeko livilegekative loko ámina vémini lihima ahulomiaká nouve.

*Pauló Toloa apatoka minake agata gululusi gili gakó*

<sup>12</sup> \* Neza Kilistoni gakó lamaná litove loko Toloa numutoka nanitugo, Guivahanímo gapova ale lologa molonimikago, gelekuke,

<sup>13</sup> nigivéneho Taetasí eza lekelitokatí litá oko atiginá oko amigove loko vitagá okuke nagata gululusí geleuke lekeza mota minalo lokuke Masetonia mikasiuka vumómoma neve.

*Kilistoni anuvaváa noune*

<sup>14</sup> Kee, Ómasi eza Kilistotoka lelémo gímizeakeve loko aí gala veva gamena gamena kivilegeaká noikumú agoliza vizeko ganini hizeaká noive. Lá oake gala vizekago, aí mogonámini anuva lamaná lagámini nene sénava segekuko hutilí oko numutó namató hutilí oko novimó nenemú geké lotinake logoliza vize amitune.

<sup>15</sup> Leza Kilistoni anuvaváa lamanakitana nouhatita Ómasi guguni gizo amekago vejená kugutó vizeakálímini mututoni itó lapuluva oakalímini mututoni nene anuva kepeleaká noive.

<sup>16</sup> Lapuluvámini mututoni lilí inamó keza gelelehá i ahulikago limiki hiliaká nenémini anuváa kepelekago hiliaká niave. Itó lugutó vizeakalímini vejenala leza gelelehá okuko lemeko alévolé oko minoakalímini anuváa lepeleake lelémo mómoká okago, gosohá lemetameki loló oko minoaká noune. Lelí hozámini mogonáa lá oko nenazo, hoza nenémináa éagema kezáini zámuzáinitunú alíkiko hee hee litive.

<sup>17</sup> Lelikitana minata vejenalítegó lá itamó neve. Leza vejená lugáate iki miliki iaká niamó nenémini osá amune. Vejená lugáa mukilite Ómasímini gakokumú gelego, moni ale utó oketati netá loló okago, hozaváa aliaká niamóza, leza nene Ómasímo limiselekago ligikagú vové avé lo minago minoko Ómasímini avogisaló voko Kilistotoka gímizekunike monola loaká noune.

**3***Gosohá lo múnahéaká gakolímini hozaváa aleaká noune*

<sup>1</sup> Láa loko nolumó nene lelí lugulizate ale otítíve loko gakó nenémináa goha apí usimó nehe. Itó lekeza lelí mogonatemú gilitave loko vejená lugáate luhuva netá makó giziki lelí lugulizá ali otiki lekelepizitahe. Itó lelí mogonamú ali otíiki lekeza makó giziiki vejená luhuva netá makó kelepizitahe.

<sup>2</sup> Nenéminoko nomive. Není hozanémini luhuva nene lekelisi niave. Itó luhuva gizoaká netá nene ligikagú luhuva gizokago, vejená mukitoka ániigiki gatiki giliakalímini nene neve.

<sup>3</sup> \* Leza lekelitoka hoza alekusigo lekeza Kilistotokatí luhuva netá lilí ikago, nenémini mogonáa utó oko neve. Itó luhuva gizoaká netá nene nagamitunú gizamive. Alévolé oko minoaká Ómasímini Sikalahulímo luhuva gizamó nene Mosé lo mola gakó gehaniló luhuva gizamómámini oko negopa, likigikagú luhuva gizokago alévolé oko neve.

<sup>4</sup> Lelí mogonatemú gakó némináa nene Kilistokumule loko Ómasiloka leheta nousike lo lekemeaká nousive.

<sup>5</sup> Hoza gihiláa makó lezatelokatí utó oaká noive loko itó lezate zámuzatelotí neve loko nomive. Netá matá loló okusigo lamaná oaká noimó nene Ómasilokatikó nene neve.

<sup>6</sup> \* Ómasi áisi nene lelémo vatí okago gosohá lo múnahéaká gakolímini hozaváa aleaká nousive. Li huka gakó luhuva gizamó nene gele aleakalímini hozaváa negopa, Sikalahú gele ameakalímini hozaváa neve. Li huka gakó luhuva gizamó nenémo lemeni heleaká netá ale utó mololimiaká noive. Itó Sikalahú nenémo alévolé lemetameki minoaká netá nene ale utó mololimiaká noive.

<sup>7</sup> \* Itó Mosé lo hukoko li gakó nene litaha ligika lapuluva oaká ale utó moloko voakalímini nene gatapa geható luhuva gizamó nenémo gopa Ómasímini lapanalagi utó imole. Itó ámina lo hukoko li gakolímini lapaná nene minoko tolova imóza, Moseni avogisaló ámina lapaná nenémo napaló nego, Isilae vejená keza neneló anitiki agoka agepaló ániagamitamó imóma neve.

<sup>8</sup> Monó lithámini lapanaláa nenéminoko minamó nenazo, Sikalahulímo monó gosohá lehizelimiaká noimó nenémini lapanaláa aleko iteko sipisi minanogo ive.

<sup>9</sup> Ligika lapuluva oakalímini mututonáa voaká nenémini lo múnahéaká gakolímini lapanaláa nene lemekosí neve. Itó lihimate asú olimikago minoaká nenémini hozavámini lapanaláa nene iteko neve.

<sup>10</sup> Itó litha lo múnahéaká gakolímini lapanaláa nene Moseni agoka agepaló utó imóza, gosohá lo múnahéaká gakolímini lapanala napa nenémo zemikago lovoza helekave.

<sup>11</sup> Netá voko haha inogó ítímini lapanala nene napa otigí utó imó nenazo, netá minoloko voko mino lúaló moloaká nenémini lapanaláa nenémo iteko sipisi neve.

<sup>12</sup> Lagata losi gelemoko ageva oaká nouni netá nenéminoko minokanazo, monó gakóma lehelele vizemigó vávani oko lo kemeaká noune.

13\* Lá nounike Mosenigitana minamune. Aí avogisaló Ómasímini lapaná sata ominamó nene asú inogo noigo, Isilae vegealite iki ángikatave loko agoka agepaló gánoni ge hitoake minoaká imóza, gosohá lo múnahéaká gacolímíni lapaná nene ze hitosá amune.

14 Itó kigikáini hize lí okago, minoloko voko itína lo múnahéaká gakó litaha nenémo goha asapulagi loló okago, keza nagatiki gili hee liki gilísá amave. Itó asapú nene ezáa hanuva ma vinasaminogo ive, Kilistó hámakó vinasoko ale vesamá oaká noive.

15 Keza itína gamena nene Moseni luhuva gakó gatiaká niago kigikagú asapulagi ha minoaká noimóza,

16 kigikáini ali viligiki Guivahaniloka kovogisa i amitamó nene asapúma vinasoketanogo ive.

17 Guivahanímú nolomó nene Sikalahukumú noluve. Itó Guivahanímíni Sikalahulámo minoaká noitoka netá makolímó nagá oletosá amive.

18 Leza nene lovogisate aitoka asapuláa minamitimó neve. Nenemú Guivahanímíni lapanalámó hize hanatolimikoko lelémó viligokago, Ómasímini ametamenigi aleloko novunimó nene Guivahanímíni Sikalahulímó lá oaká noive.

#### 4

##### *Lugupe nene mikasi somogitana neve*

1 Guivahani eza nasahililagímó hoza nenémináa loletamó nenazo, nenemú goselekaselé amitunize.

2 Láa nounike, avozavagi netá itó asugunatoka aleaká netá nene lemegesa amekunike, makó sozámíni amupiló minoko Ómasímini gakó ale gopa oaká nene ma osá amune. Leza Ómasímini avogisaló monó ale akutoko lo utó moloko lo nokumuko vegehá mukilite lelí mogonate gilikago hee lokogó neve.

3 Itó monó gakó lamaná loaká nounimó nene asapulagi nolomó geleaká noikoma, lapuluvámíni mututoni lilí ina vegeatokagó asapulagi nolomó geleaká noive.

4 Monó gili ahuliaká niamó kéisi nene imane mikasigutí agulizaki ve nenémo kigikáini hize lí okago, nana iki gakó lamanalímíni lapanalímó kigikagú lemekiko Kilistó eza Ómasímini avevezahaló oko nomina vémini luhuváa ángi hee liki ángitave.

5 Leza monó nolunike lezatemú lo lekemesá amusive. Izesu Kilistó eza lelí Guivahanive itó Izesukumule loko gelekelé izegipatiní mukitoka loló oko minatíve loko lo lekemeaká nousive.

6\* Ómasi eza gozapá mogonaloka límugusi zeake nego gó lozo loko lokago gó lámó. Itó áisigó nene lokago ligikagú monolímíni lapaná utó okago Kilistóni avogisaló Ómasímini lapaná utó o lamaná okago ángoaká nune.

7 Itó ámina monó meinaváa iteko minamó ale minoaká nuni vegehá leza nene ámina monó lo nokumuko lugupémo nene mikasi somogitana alévolé onamigo ámina monolímíni zámua lelitoka negopa, Ómasilokatí noimó nenémini mogonáa utó oaká noive.

8 Miluna malumámíni amupiló nominuko nenémo lelémó zeko lana osá amive. Itó lagata losi gelenounike gopa nene guluko gopa osá amive.

9 Gopoguní netalímíni amupiló nominuko, gopa nene ameteho taiza oletosá amive. Galaná mílilitiki lá niago, gopa ma heleko lapuluva osá amune.

10 Nenéminoko Izesú minoko aleko oakalímíni agikaváa ámina oko lugupeloka utó itive loko lugupeloka Izesuní apilí hele ametameni nene aleko mohona oaká nune.

11 Vegehá keza Izesukumule liki lelí gamena gohalagú imi anití anití iki lilími gopa napa iki heleakakú lilími miliaká niamó nene Izesú minoko aleko oakalímíni zámua nene heleaká lugupeloka utó o lamaná itive loko nenéminoko utó o lemeaká noive.

12 Lá okago, lelitoka heleaká netalímó hozaváa aleaká noive, itó lekelitoka alévolé oko minoaká netalímó hozaváa aleaká noive.

13\* Monó gotoláu luhuva gakó makó nene neza Guivahanímú gele alévolé oaká nounazo, monó loaká nune loko gizononímóma neve. Itó leza ámina lelegitó Sikalahulímó lelémó vávani igo Guivahanímú gele alévolé oaká nounike monoláa loaká nune.

14 Lá unike Guivahani Izesuní heleneikutí alémo oti vémo lezagi ámina oko Izesugegi helenosakutí lelémó otekoko lekezagi monéna aitoka lelémó molanogo ive loko geleaká nune.

15 Ámina genavagi netá nene lekelikumule loko geheaká nounimó nene Ómasímini nasahilí ohunavagi nenémo hutilí oko noviko, vegehá mukilite giliiki Ómasi agepoka liki niviki kogoliza vizi namiko, Ómasímini lapaná utó oloko voko minative loko neve.

##### *Gutá apató minoko aleko oaká gakó*

\* 3:13: Gá 34:33      \* 4:6: Apí 1:3      \* 4:13: Age 116:10

<sup>16</sup> Leza nenemú láa loko gelekunike goselé ma osá amune. Lugupe te gisulupa moloaká noimóza, gamena gamena ligika nene ale gosohá oaká noive.

<sup>17</sup> Mikasiuka miluma maluma koma geleaká nounimó itó alika monéna asú itimó nenémo gonanalisi napa itó genavagi itó alévolé oko minoakalímíni nene ale utó mololetanogo ive.

<sup>18</sup> Itó ángoaká nouni netá nene asú itimó neve. Ángamuhá netá nene alévolé oko mino lúaló moloko minatimó nenazo, netá genavagi alilimiaká niamó nenémo negopa, asuguná netá utó o limití netatoka gonú omínoaká nounge.

## 5

<sup>1</sup> Leza láa loko geleaká nounge: Mikasi lugupe sikalahutémini gá numunáa lukokikoma Ómasímo okulumakú alévolé numuni makokitana gosohá lugupe ale utó mololetanoimó nene kigizanitunú gemamó hanuva alévolé oko minati numuni apá neve.

<sup>2</sup> Itó leza nenemú okulumakú numuni hize lelepizitive loko lagaváa gelekunike amuza nomulunike hanuva lugupegi minoaká nounikeve loko lege zeko minoaká nounge.

<sup>3</sup> Sikalahute zapakó minokative loko okulumakú lugupe ale luhokuko lamaná itive.

<sup>4</sup> Imane mikasiuka gó numukú noinake miluma geleko gena liviseká liviseká noigo, lege zeko minoaká nounge. Leza luhoaká gote litaha nene monéna vizako ahulatune loko gelesá amune. Litaha gó ha neiko amupiló gosohá netá ale luhatune lokogó geleaká nounge. Lá okunike heleakalímíni mututoni loló unimó nene alévolé oko minoakalímímo mikilí itive loko geleaká nounge.

<sup>5</sup> Ámina netá lamaná utó o limitive loko ale vavá oletamó nene Ómasi áisi nenegó noive. Ámina netá lehizeletatimómámini izaina nene Sikalahú lehizeletamó neve.

<sup>6</sup> Leza gosohá lugupe alitunikumú guluko mulutegú ale gilitolimikiko minatunize. Lá noinake láa loko nene gilitunize: Mikasi lugupegi minoaká nouni gamena nene Guivahanímú vítagá unike gutá mikasiloka minoaká nounge.

<sup>7</sup> Itína gamena nene gele alévolé okogó minoko aleko oaká nounge. Gihiláa nene velesá ángonamune.

<sup>8</sup> Láa noinake gopa mulutegú ale gilitolimikago minoaká nounike lugupetunú gutá mikasiló minoaká nene ahulokinake gotó apatoka Guivahanigi makó minosakumú lagaváa geleaká nounge.

<sup>9-10</sup> \* Nenemú láa loko gelenounge: Lugupegi minoko netá matá oko moloko unimó lamaná nehe itó golesa nehe nenémini lelegí oko etó etó oko apasoko limitive loko leza mukitó minoko Kilistoni lo hukoaká holomaló vo anitino unimó nenazo, nenemú minoaká nene imane mikasiloka gutá lugupegi minoaká ahe itó mezane gotó mikasiloka minatunimó ahe nene Guivahanímú giliko lamaná itive loko legesó oko minoko aleko oaká nounge.

### *Ómasímo ale ge ha zelimikiko ezagi apizituni gakó*

<sup>11</sup> Guivahanímú lehelele vizigo minoakalímíni mogonamú gelekunike vejená keza kigika ali viligatave loko kagata aleko lo kemeaká nounge. Ómasi eza mogonate ángoaká noive. Itó lekeza áminámini iki mogonate nene likigikatunú giliaká niave loko noguluve.

<sup>12</sup> Leza láa loko lokuko, gilikiko, leza nene miní ameko lugulizá ale otinogo gakó lo nolukumuhá gelemíno. Lekeza hanuva lelikumú giliko, itekiko, lekeza vejená lugáa kigika otopá zemiko miniki kugupémíni netakumukó hokolizá iki miniaká niamoláa nene není mogonamú li kimikiko gili lamaná itave loko noluve.

<sup>13</sup> Lelikumú negi ve liki nilamóma nene Ómasímíni hozavamule loko loló ino. Itó ligikate hee lokogó neve liki nilamó nene lekeza monotinigi itave loko loló ino.

<sup>14</sup> Ve hamó eza vejená mukikumule loko helekamó nenazo, leza mukitó monéna ezagi helenouhá geleneive loko gele zagunikeve loko Kilistó eza agika lemeaká noitímo lelémó gikitokago lezate lugupe aleko itesá amune.

<sup>15</sup> Itó vejená mukikumule loko hilimó nene logómula gi nomininake lezatemukó minoko aleko aminake lelikumú heleake oti vemule loko minoko aleko itunize.

<sup>16</sup> Nenemú lá oko logómula gi minatuní gamenaló vejená kugupegi kemetamenigígó ángokinake mogonatanáminimú lo hukoketaminogo une. Itó Kilistóni ámina oko gozapá agupegí ametamenigí ángokunike eza lelikitana ve noive loko gulunimóza, ámina aveveza-haló itínasa nene goha ma lá aminogo une.

<sup>17</sup> Nenemú vejená makó Kilistotoka gímizinitamó kéisi nene haitolímíni lilí iki ninigave. Litaha netáini nene asú okimikago gosohá mogonáa utó o kemekave.

\* 5:9-10: Lom 14:10

<sup>18</sup> Ámina netá matá gihiláa nene Ómasilokatí neve. Áisi nene Kilistoni zámuzaló lelémó apizekago nonagá okunike vejená lugáa nene ámina kelémó nonagá iti gakó li kimitave loko loletamóma neve.

<sup>19</sup> Ámina gakó láa loko neve: Ómasi eza Kilistotoka minake mikasiuka vejená lezagi ale geha zeletamó. Lá oake lihimate ahulolimiake goha gatoaká nene gatosá amive. Itó ale geha ze limiaká gakó nene holutejú hize oteletamóma neve.

<sup>20</sup> Nenemú leza Kilistoni gakó lole ale ve minusike Ómasímini gakó lamaná nene mololimikago, lo lekemeaká nousi gakó nene Ómasímo lo likimimó gelekago nene, Kilistokumú gelenousike lakagata aleko láa loko lo lekemeaká nousive: Ómasímo ale geha zelikimikiko ezagi apizilo.

<sup>21</sup> Kilistó eza lihima ma alemi ve nene Ómasímo lelikumule loko golesa netategi loló otamó nene leza Kilistogegi apizekinake Ómasímini avogisaló hee loko minatune loko nenémini imó neve.

## 6

<sup>1</sup> Ómasi alémó vatí vatí ve leza lakagata aseva aleko láa loko lo lekemeaká nousive: Ómasímini nasahilila lehizeleketamó nene voko haha amino.

<sup>2\*</sup> Nasahilí oleketakumú Ómasímo li gakó makó láa loko neve:

Neza gamena lamanató geí gakó gele minumóma neve.

Itó gugutó vizeaká gamenaló gelémó lamaná umóma neve.

Gilinahe. Gamená lamaná itínasagó neve, itó lugutó vizeaká gamena nene ámina oko itína nene neve.

<sup>3</sup> Leza ámina oko vejená keza hoza aleaká nounikumú goseleka likatave loko monokutí velehé limita netá loló osá amune.

<sup>4</sup> Leza mukí netá oko moloko oaká nounike Ómasímini gelekélé ve nuni mogona ale itó moloaká nune. Milumámini agikagú minunike, itó gasovagi netalímini amupiló minunike, itó galana netalímini amupiló minunike, geha zeakalímini agikagú minoaká une.

<sup>5\*</sup> Segi nogosanitunú zi gilikilí niago, nagá numukú minoaká unike makilisi hiziki lipilinigi akú minoaká unimóma neve. Miluma hoza aleaká unike, lovó akamunike ote minunike nosáneta ma ale ligikagú vizeko namunike minoaká unimó neve.

<sup>6</sup> Ligika gizopa lo minago minunike, netá mogona geleakalímini minunike, mulutejú geha zigo minunike, ligive nasahilí okimiaká unike, Sikalahuki minunike ligika lamaná oko kemeaká unimó neve.

<sup>7</sup> Gakó lamanakó lokunike Ómasímini zámuzá ale minoaká unimó neve. Lihimate asú olimikago minoaká nounimó nenémó gimí magete itó lagele loló okago ale minoaká nune.

<sup>8</sup> Lugulizá ali otiakakú itó lovozámini holulagú minoaká nune. Itó legepoka loaká itó alivi letivi ilimiaká nenémini holukú nune. Sozaló veve liki nililitago soza lamunimó minoaká nune.

<sup>9</sup> Mogonatemú vitagá niamóza, Ómasímo mognate gele asú onoimole. Itó heleakalímini agepaló minunitita gopa logómulagi minoaká nune. Itó lipilikago hele vunimó neneta voko haha amune.

<sup>10</sup> Itó móinata mulutejú lamaná geleko minoaká nune, itó gohogó nouhá nene gopa vejená mukí kelémó monokú henóiki vejená loló oaká nune. Sivosávo ovunitita ligikámini henonite vaí ominamó minoaká nune.

<sup>11</sup> Kee, Koliti vejenáise, nigika nene lekelitoka napaló neve. Itó negepatunú nene gakó lo koló oko lo nolokumuve.

<sup>12</sup> Nénisi nene nigikatunú alévolé oko hize lé olikimiaká noumóza, lekelisi nene likigika nimiaká niamó nene lagasó neve.

<sup>13</sup> Lekelikumú gulugo mohóne gipáne lilí ikago, gakó imane lo likimitoze. Nenémini helega apasiki ámina iki likigikatini ali napa iki nenitoka milikiko minative loko noluve.

### *Ómasímini zavusave nune*

<sup>14</sup> Monó gelema vejená keza apizeko minatune liki nilikoma, lekeza lelegí oko nune liki kilími vatí iki gehemilo. Gilinahe. Lamanalímini itó golesámini keza nana iki apizitáive. Itó lapanaki itó limugusigi nana iki apizitáive. Ma apizeminigasive.

<sup>15</sup> Itó Kilistó ezagi gala veva Sataki nene nana oko kigika hamó minative. Itó monó gele alévolé uni vejenaki monó gelema vejenaki nana oko nonagá oko minatune.

- 16\* Itó Ómasímini zavusavegi soza ómai netalímini zavusavegi keza nana iki apizitáive. Gilinahe. Ómasi alévolé oko minoaká vémini zavusave nene lélisi nene noune. Nenemú Ómasímo láa loko lonoimóma neve:  
Neza mulúiku minoko aleko inake  
holutikú mohona inogo uve.  
Ómasinini loló o kemekugo,  
keza vegeanáne zuha minanigave.
- 17\* Nenemú Guivahanímo láa loko lonoimóma neve:  
Monó gelemamoláa ámigikimiiki apazá minalo.  
Itó musi netató nene ali gelemilo.  
Lá ikiko, nénisi nene gizapa oleketoko lekelémo guni inogo uve.
- 18\* Lá okinake ametipina nene minatove,  
itó lekeza nene mohóne gipáne lilí iki minatave.  
Guivahani osá amosá ve áisi gakó nene láa loko lonoimóma neve.

## 7

<sup>1</sup> Nigika lekemenou nigivese, netá nenémináámini mututoni lelémo molonoimóma neve. Nenemú musi netá nenémo ligikate itó lugupete ale golotuva loaká noi netakutí nene Ómasímú lehelele viziko ligika nagamí zeko ale mokoná lokoko gizopa lo asú iko etó oko minatunize.

*Pauló kigika ali viligakumú agoliza vizimó*

<sup>2</sup> Lekezatini likigikatunú gahe giligitalo. Leza lekelitoka minusike netá golesa aleleketosá amusive, itó ve makó alémo gopa otonamusive, itó mulutikú hizeko netá matatini ma ale gopa amusive.

<sup>3</sup> Neza gakó imane mulutikú hizitive loko loleketamuve. Neza itínasa áimane lekezagi makó minoko aleko inakehe itó hilinakehe nigika lekelitoka minamó minanogo ive loko mota lo lekemekuve.

<sup>4</sup> Nigikatunú lekelitoka voko nogímizigo lekelémo napa oko loaká nouve. Lekeza nigikáne ali geha zi asú ikago milumámini amupiló nogoliza sipisi novizuve.

<sup>5</sup> Itó Taetasinimú vitagá oko Masetonia mikasigú omo anitekunike ma lavasú vizeko minamune. Neneloka lugupémini lovváa itó ligikámini lelegesaváa nenémo utó oake lelémo vénehekánehé ligo minonouháma neve.

<sup>6</sup> Megusa siheleni mulúini kelémo kii lokimiaká ve Ómasi áisi nene Taetasini alémo atiginá oake mulute ale gilitoletamó.

<sup>7</sup> Lá oake, atiginá imó nenemukopa, lekeza mulunagú geha ziti gakó li amemó nene aleko okago, gelekusike mulutegú geha zekago nousive. Neni ániganigi giliki miniaká niamó itó golesa netá utó ikumú miluma giliki miniaká niamó itó nenikumú hizi lé inítiki amuza miliaká nia gakó lo nemekago, itínasa mulúnegú lamaná aleko iteko gelekuke nouve.

<sup>8</sup> Neza gozapá luhuva netá makó gizo lukumugo mulutikú golesa gelemó nenemú gelekuke itínasa mulúnegú golesa gelemuve. Luhuva gizu gamena nene gamena alínipáisi mulutikú golesa gilikago gelekuke, lamaná mulúnegú golesa gulumó neve.

<sup>9</sup> Itó itína nene mulúnegú lamaná geleko noluve. Mulutikú golesa gelemó nenemukopa, mulutikú golesa geletímó likigika ali viligakumú mulúnegú lamaná noguluve. Lekeza miluma gelemó nene Ómasímo giligo lamanalímini loló okago, gilikamole loko gakotémo ma lekelémo golesa onamive.

<sup>10</sup> Nenémini mognamú láa loko gilitune: Monokú miluma geleaká nenémo ligika ale viligoaká netá ale utó molokiko vegeaná lugutó vizekiko minatune. Nenemú miluma geleaká nenémináa ale utó molatítímó alika nenemú giliko golesa aminogo ive. Itó hanuva miluma geleaká nenémo negi nagi netá ale utó molokago lapuluva iaká niave.

<sup>11</sup> Ánigalo. Miluma geleaká lapa nomimó nenémo lekelitoka gihiláa lagasó ale utó molamivé. Monokú lekelémo vávani oaká itó mognatini lamaná ale utó moloaká itó golesa netá ahelú oaká sipisi itó Ómasímini mesahamú lekelegesá legeaká itó nenikumú gili guni iminiki amuza moloaká itó golesa netalímini helegáa kemeaká nene netá nenémináa ale utó molamó nene lekelitoka utó okago, lo lukumu netakumú lekelí lihima nomimó nenémini mognáa utó okave.

<sup>12</sup> Gozapá luhuva netá láa loko gizo lukumumó nene golesa netá ali vema aikumule loko nomive. Itó golesa netá ale utó molota vema aikumule lokogi nomive. Gakó lo lekemekuko

\* 6:16: 1 Koli 3:16, 6:19; Liv 26:12; Izi 37:27 \* 6:17: Isa 52:11 \* 6:18: 2 Sam 7:14; Isa 43:6; Zel 31:9 \* 7:5: 2 Koli 2:13



Ómasímini avogisalo lekeza lelitoka mulutini milatímini mogonáa utó itive loko nenemú gizo lukumómoma neve.

<sup>13</sup> Itó lekeza áminámini iake mulutegú ali geha zemóma neve.

Itó mulutegú ali gililitamó nenemukó nomive. Taetasí nene lekelikumú agata gululusi nogiligo lekeza Taetasini muluna ali geha zikago, eza mulunagú agila guluma noigo, ámina gakó nene geleko lagaváa gulunimóma neve.

<sup>14</sup> Neza gozapá Taetasí nene lekelitoka vinogo noigo lekelémo napa oko gakó lo amumó neve. Itó lekelikumú gakó lo amumó nenémimi gihiláa utó o asú imó neve. Neza Taetasini gakó nene sozagi ma lo lekemesá amuve. Ámina oko lukugulizá ale oteko Taetasini lo amumóma nene ma gihiláa loló onoimóma neve.

<sup>15</sup> Taetasí nene lekelitoka vokago, lekehelele viziki ininá iki mulutini milake nasahilí itamó itó gakoláa gili alemó nenemú geleake agika lekelitoka molamó nene napa neve.

<sup>16</sup> Neza lekelikumú gulumó netá matatini hee lokogó nego, mulúnegú golesa amigo vatí oko minanogo uve. Nenemú mulúnegú lamaná geleko luhuva imane gizo nolukumuve.

## 8

### *Monokumule loko moni ali nupa ita gakó*

<sup>1</sup>\* Nigivénegita, Masetonia mikasiuka monó gele vegeatoka Ómasímini nasahilí nenémo gihila ale utó imó nenemú lo likimitoze, gililo.

<sup>2</sup> Keza miluma maluma nenémimi agikagú minake gohogó minamó nenémo ha netá loló okago, gopa nene monolímimi kogolizaváa nene itiki alinake mulúikú lamaná geleaká netá nene vegeaná makó kimitune liki moni ali nupa amó nene komasí nomive.

<sup>3</sup> Neza keí mogonatagana gele hee loko gelenouke nolumó nene lá oko neve: Kezáini kagata giliki vávani iake moni ali nupa amó nene kezáini moni milamó nenémimi lelegitó milamake aviligiki milamó.

<sup>4</sup> Lá iake neza kagata aleko lá amugo, kezáini geleke gala vizilitake Zelusale numutoka Ómasímini vegealatini mulúikú lamaná gilita netá ali utó miliki kilími vatí inigi moni aleko voko kimitane liki negénegeka lamó.

<sup>5</sup> Lá iake, netá lagasó inigi lahe loko noguluko ganá nene Guivahaniloka kigika mili gilitiake Ómasímo lititoka molatitoka itune liki liake lezalokagi kigika mili gilitiki minamó.

<sup>6</sup> Keza nenémimi ikago, Taetasí nene ámina hoza apí i ve nene lekelitoka vooko lekeza likigika kimita hoza nenémináa ali asú itave loko gala vizunimó.

<sup>7</sup> Itó gele alévolé oakatini itó monó loakatini itó gakó mogonáa gele hee loko geleakatini itó monolímimi hozavamú amuza moloakatini itó likigika lemeaká nene netá nenémináamimi gihila mukí ali utó miliakeve loko ámina mulutikú lamaná geleaká hoza aliiki moni ali nupa itakumú lekeza ámina iki vávani itave loko noluve.

<sup>8</sup> Neza moni ali nupa itakumú gala vizeleketoko loleketamuve. Monó geleaká vegeaná lugáaloka ámina hozamú vávani ikave. Nenemú lo lekemekugo lekeli nasahilílimini lelegiláa nana oko neve, nenémimi mogona utó itive loko noluve.

<sup>9</sup> Lekeza Guivahanite Izesu Kilistoni nasahilílamú mota giliaká niave. Eza minumuni izolaho lekelikumule loko gohogó ve loló imó nene lekeza áminatunú monokú minumunavagi líl itave loko nenémimi imó nenazo, Izesuni agizaka hiziki mihina itave loko noluve.

<sup>10</sup> Itó gakó makó láa loko nogulumó nene lo lekemekugo, gili alikiko, gihila utó itize. Lekeza nene litaha meleketó lekezatini litá iki moni ale nupa itune liki liake vávani iki ámina hoza apí inamóma nene itína ámina lelegitó ali asú itamó nene lamaná inogo ive.

<sup>11</sup> Nenemú vávani iki apí amómáminiki miní amiki aliliki niviki vávani iki ali lutigitamó nenémimi gihiláa nene moni milínita lelegitó ali utó milalo.

<sup>12</sup> Mulutikú lamaná giliki moni milatamó nene Ómasímo gelekiko lamaná inogo ive. Leza molonamuni lelegitó negopa, netá molunouni lelegitó molokuko Ómasímo ánigago lamaná oaká noive loko noluve.

<sup>13</sup> Lugáate mulúikú lamaná gilitave loko moni ale nupa oakakumú nene lekeza mikasi lukugupegi miniki lukugupeló gilitave loko nomive.

<sup>14</sup> Lekeli minumunimó itínasa gamena nene keí gohogó amiselekiko, netá matáini nomi vegealite netá makokumú vitagá amitave. Itó minoko gamena makó zupahé keí minumunimó lekelitoka gaúna gamena amisilitive. Lá okiko nene kezagi lekezagí hamó lelegitó mini miliki minatave.

<sup>15</sup>\* Gona miliki kimimi vakumú nene monó gotolaú gakó lá oko nemóma neve: Mukí netá gizaká a vegealitatini minumuníni napa nomimó neve. Itó lagasó ali nupa amoláate gaúna helemamóma neve.

*Taetasige monó moni aliki vita gakó*

<sup>16</sup> Ómasi eza lekelémo vatí itikumú nene Taetasini alémo zaú okago, lekelikumú nagata geleaká umó ámina avevezahaló aitoka utó okago, Ómasi agepoka loaká nouve.

<sup>17</sup> Neza lo amekugo geleneive loko nomive. Ezáa agikámo vávani o lamaná okago núane lekelitoka vinogo ive.

<sup>18</sup> Guivahanímini vejenala zuha mukitoka keza Izesuni gakó lamanakumule loko hoza aleaká noi vemú gili lamaná iki giliaká nia ve ezagi makó amiselekugo núane nivasive.

<sup>19</sup> Itó ámina vémini gakola makó lá oko neve: Guivahanímini vejená keza ámina ve nene mulúikú lamaná gilitave loko ali nupa ina moni aleko novuko, neneló kelémo vatí iko, makó vitave liki alími etó amó. Ámina hoza nene Guivahanímini agulizá otitive loko, itó mulutegú vávani igo hoza nalunimó nenémini mogona utó itive loko alinogo noune.

<sup>20</sup> Nenemú gopa gakó makó utó okative loko sipisi moni nene legesó iki gizapa itave loko kimiselekugo nivasive.

<sup>21</sup> Lá nounimó nene leza netá loló okuko Guivahanímo ezagó gelekiko lamaná itive loko negopa, mukí vejenalite gilikiko lamaná itive lokogi nalune.

<sup>22</sup> Neza nene ámina ve lositaki itó ligive makoki nene kimiselekugo núane nivaze. Ámina ve eza nene mukí zupa gimivagú moloko ánigokuko vejená kelémo vatí itikumú amuza moloakalímini mogonáa utó okave. Ásisi nene lekelikumú giligo, alévolé okago, amuza napa nomolave.

<sup>23</sup> Itó Taetasini mogonamú gilitune liki nilikoma, lekelikumule loko ezagi nezagi hoza aleaká ve losi nene nousive. Itó Taetasigegi makó nivasi vetini mogonáinimú gilitune liki nilikoma, keza monó gele vejenáini zuha nenete kimisilikago núane nivasive. Itó keza Kilistoni lapaná ali utó iaká nia ve niasive.

<sup>24</sup> Neza lekelémo napa oko lo nokumumó nenémini gihiláa utó itive liki lekeza ámina ve nene viki anitikiko nasahilí ikimikiko, monó gilina vejená lugáa numutó numutó keza gili guni itave.

**9***Zelusalega monó vejenakumule liki moni ali nupa a gakó*

<sup>1</sup> Zelusalega Ómasímini vejená nasahilí ikitiki moni kimita gakó nene mota gilinave. Nenemú nanave loko goha gizo likimitove.

<sup>2</sup> Ámina hozamú mulutini hukili okago, gelekuke, lekelémo napa oko lekelí mogonamú láa loko lumó: Akaia mikasiuka monó nigele vejená lekeza lítaha kilisimasiló litá iki vávani iake moni ali utó moloaká gapo ali utó amó nenémini gakó nene Masetonia vejená lo kemekugo, vejená lugáate keza amuza miliki gakotini giliake, ámina hoza alitune liki mulúikú lamaná gelemó.

<sup>3</sup> Neza ámina hozamú lekelémo napa oko lo kumu gakó nene voko hetagá okative loko neza lumómaló nene áminaló miliki vávani iki moni ali nupa itave loko ámina ve losive makole kimiselekugo nivave.

<sup>4</sup> Nezáne alika Masetonia vejenaki vokuko, lekeza moni moloakakumú ligitagani ikikoma lekelémo napa oko lo kumu gakóne alemó zekiko, nezagi itó lekezagi lovoza helekative loko

<sup>5</sup> nenemú neza gulumó etokago, nigive nagave imane gala vizeko kimiselekugo, goí iki lekelitoka núane nivave. Vi anitikiko, lekeza moni ma kimitune liki emane amunaló gakó li hukinamóma neve. Nenemú ganatilisi ali nupa ikiko minatize. Lá ikiko, neza lekelitoka vo anitekinake gala vizé vizé ugo moni milatamó negopa, mulutikú lamaná gili minake moni milinamó nenémini mogona lamaná utó okiko ánigatove.

<sup>6</sup> Itó moni ali nupa itakumú anoza gakó imane láa loko noluze, gili minalo: Leza zuha netá koma zuhá itunimó nene minoko komagó alinogo une. Itó zuha netá mukí zuhá itunimó nene minoko mukí ale minanogo une.

<sup>7</sup> Nenemú imanémini itaze. Lekeza etó etó iki likigikatunú giliki gili guni iniki gilita avotigiláminiki nene moni ahulataze. Itó kogoliza viziki monó moni ahuliaká nia vejenakumú nene Ómasímo ánigo amu heleaká noinazo, gínikahavagi neiko vejenalite gala vizí vizí agogopa, mulutikú lamaná giliki ahulataze.

<sup>8</sup> Ómasi eza minununavagi ve noinazo, vávani oko lusa nene lukumupiló molokiko minumuni utó o likimitize. Lá okiko, lekezatini ni lakagatupa niiki vejená nasahilí ikitata hoza haitopaitolimini alitune likima netá makokumú ma vitagá aminigave.

<sup>9\*</sup> Monóinigi vejenalite lá itakumú nene monó gotolaú gakó makó láa loko nemóma neve: Keza gona miliki gohogó vejená nasahilí ikitake kimiaká niave.

\* 9:9: Age 112:9

Keí nasahilíni huko vamtímó minoloko voko minanogo ive.

<sup>10</sup> \* Ómasi eza zuha netá ale utó mololímikago zuhaina oaká nounge. Itó gihiláa ale utó mololímikago minoko aleko oaká nounge. Lá oaká noinazo, eza nene lekezagi minoko zuhaváa ale utó mololíkimioko lusa geko ale napa okiko, nasahilitínímini gihiláa mino hutilí oko minanogo ive.

<sup>11</sup> Itó haitopaitolímíni oko minumunitinigi vegená lilí iiki áminatunú vegená makó nasahilí ikimikiko, nasahilitínímini gihiláa utó okiko, keza lelikumú Ómasi agepoka litamómámini mogona lá oko neve:

<sup>12</sup> Lekeza Ómasímini vegenala zuha mulúikú lamaná gilita netá lilí iki moni kimikiko, nenémo gohogóini amisele ahuloketative lokogó negopa, nenémo Ómasi agepoka loko geké lomíaká nenémini minumuniági ale utó molotative.

<sup>13</sup> Lekeza Kilistoni gakó lamaná giliake ali gikitiki ali gikiaká ali miniaká niamó nenémini mogonáa, itó lekeza Zelusalega monó gele vegená itó líkigive lugáa mukitoka kezagi nene mulutikú lamaná giliki napa iki nasahilí ikitamó nenémini mogonáa utó okiko, Ómasímini lapaná utó o lamaná oko minative líki ali otinigave.

<sup>14</sup> Lá ikiko, Ómasímo nasahilí haitolímínoko lekelitoka ale utó imómave líki kígika lekelitoka miliki lekelikumú Ómasiloka linigave.

<sup>15</sup> Itó Ómasi eza nasahilí oletoko gipala lehizeletamómámini mogona lo asú oko lo utó o asú amoakalímini nenemú hanuva sigaga lotoko agepoka litune.

## 10

*Pauló ezáa mogona hize lé imó*

<sup>1</sup> Neza Paulona imane Kilistoni zou nagamílagi itó nasahilílagi noukeve loko lakagata aleko lo líkimitoze, gililo. Lugáate nenikumú láa líki líaká niave: Lelitoka oko minake ezáa amuzavagi ve minamike, gakó nagamílagi lo lemeaká imó. Lá oake, voko minake agogagutí gakó lo lemeaká noive líki líaká niave.

<sup>2</sup> Nígive nagavese, lekelitoka voko mininake vegenalite litaha kígikatunú aliaká ni-amómáminoko hozava aleko minoaká noive líki nenikumú líaká nia vegená nene nogok-agutí gakó lo kimitove loko nene vávani oko lo kimitomóza, lekeza lugáa ámináminoko nogogagutí lo lekemekatoze, gala vizevilo.

<sup>3</sup> Lelí mogona lá oko neve: Mikasiuka netá matate ale minunike litaha lugupegi lamaná mohona nouhá nemóza, monokumule loko lova hizeaká nouhá nene monó gelema vegenalite litaha kígikatunú lova hiziaká niamó nenéminoko nomíve.

<sup>4</sup> Gimisi magé ale minunike monolímímini lovavagú hoza aleaká nounimó nene mikasiukatí monó gelema vegenalitiní netatunú negopa, Ómasímini zámuzalagi nounike nene-tunú gala veletini ha gakóinímini vegegisa tele vízeaká nounge. Itó keí zámuzza zeko letokuko níiko,

<sup>5</sup> Ómasímini mogonámú gele guni oaká gapo hizi lí inigi govísi aliki letiaká gakóini apelekunike, vasá zeaká netá ali utó iaká niamó nene avilegeaká nounge. Itó Kilistoni gelekelelágó utó itive loko haitopaitolímímini lagata geleaká netá nene nagá ameaká nounge.

<sup>6</sup> Lekeza není gakó gili aliakatini vávani i asú ikiko, leza vegená lugáa gakó pelesa ziaká niamoláa nene nakahuni kimitune loko gizapa onounge.

<sup>7</sup> Není mogona lokovogisaló utó noimó nene ánigalo. Lekelitokatí ve makolímóhe makolímóhe ezámú gelekiko Kilistoni vegenala zuha loló okamó áisi láa loko gilitize: Ezágó Kilistoni vegenala ma nomíve. Lezagi Kilistoni vegenala nene nousive.

<sup>8</sup> Guivahanímó hozavamú gilike zámuzza nimímó nene lekelémo lapuluva oakakumú negopa, hize lé olíkimiakakumú nenazo, neza ámina zámuzamule loko nugupe aleko iteko lo líkimitomó nene novoza helemínogo ive.

<sup>9</sup> Itó luhuva netá imane gizo nolukumumó nene, nenemú giliko lekelegesá lígiti gakó gizo nolukumumó gelemíno.

<sup>10</sup> Nenikumú láa líki líaká niakumú noluve: Luhuva netakú gakó golivagi itó alévolekutí gizoaká noimóza, lovogisaló nene amuzza ve minamíve. Itó hutuváa gakó loaká noimó nene nagamílagi loaká noive líki líaká niave.

<sup>11</sup> Némika líki líaká nia vegená keza hotó minuke luhuva gakó gizo lekemeaká noumó nene áminámini gihiláa hamó lelegító nene holutikú minoko ale utó molokugo ániganigave líki gilitaze.

<sup>12</sup> Neza vegená kugupe aliki ití ití iki miniaká nia vegenatoka gímizekinake lelegí nounge loko lítohe. Íi, keza není lelegító ma minamíve. Vegená nenémináa keza Ómasímo oko

\* 9:10: Isa 55:10

moloko oaká nounikumú nanave loko nogilive liki lamake, gako gona miliki iaká niamó nene kezáini mogonáinimukó gili minake gako gopa kezáini mogona lotuva ligiaká niave.

<sup>13</sup> Neza Ómasímini hoza alitane loko lehizeneta lelegitó nelémo etó imó nene ámina oko aluke, lekelitoka anitumó nenemú gelekuke alemo ite ite gako losá amuve. Itó lehizeneta lelegitó gopa avilegeko ma losá amuve.

<sup>14</sup> Neza hozanegó lelegi oko aleaká nouve. Hoza lakanite nene lamaná lekelitoka neimó nenazo, leza nene lekelitoka anituko leli legepagutí Kilistoni gako lamaná ganá apí iki gilinanóma neve.

<sup>15</sup> Leza vejená lugáatini hozagú lagakilimó oko moloko leza alunimole loko lugupe aleko iteaká gako loaká nene ma osá amune. Gele alévolé oakatini nene agizani alekiko leza lekelitoka voko hoza lakanite ale napa itune loko nenemú ligika nego minoaká nouve.

<sup>16</sup> Lá okinake lekegemesaloka mina mikasigú vejenatoka gako lamaná lo utó oko lo kemekinake, ve makolímíni hoza lakanivagú ezáa ale utó ikumú lugupe aleko iteaká gako loaká nene ma amitune.

<sup>17</sup>\* Lugupe aleko iteakakumú nene monó gotolaú gako makó lá oko nemó neve: Makó eza netá matakumú aleko ite ite gako litove loko nookoma, Guivahanímo oko moloko i netakumú gele minoko lino.

<sup>18</sup> Makó ezáa agupe aleko iteko nolikoma nene, monó hoza lamaná alekave loko lamitune. Guivahanímo alémo napa okago gihiláa loló okave loko litune.

## 11

### *Paulogegi soza aposolo vegi kei gako*

<sup>1</sup> Gako lagasó makó lo nolukumugoma negi gako lokave liki goselé lekepelemino. Hanuva legesó iki gililo.

<sup>2</sup> Neza lekelikumule loko Ómasímo lekemekugú noaká noimómáminoko amuza moloaká nouve. Lekeza ve aleve suni ánigonami mohó vové aveláa nenéminiki niko, ve hamotokó vitave loko anosa mololeketumó nene Kilistó noive.

<sup>3</sup>\* Lá onoimóza, gosihalímo logoka vizeakalímíni mogonamú gele hee lo minake Evani nene soza gakatunú agoka vizimó ámina oko lekezaloka ve lugáate lokogoka vizitakumú geleakatini golasasa gekiko, vové avé liki Kilistonimukó giliaká niamó nene ahulikatave loko gulugo, gena noigo noluve.

<sup>4</sup> Nenémini mogona lá oko neve: Lekelitoka vejená makolímó aniteko Izesuni mogonáa lélisi lo lekemeaká nouhalímíni negopa, ametameni haitolímíni makó lo lekemekago nene, itó gozapá lelitokatí alemó nenegopa, haitolímíni gosohá gako lo lekemekago nene, itó Izesuni gako lamaná lelitokatí gelemóma nenegopa, monó haitolímíni makó lo lekemekago nene, géneka li amemiki hanuva gili amiaká niamó nene lamaná noihe.

<sup>5</sup> Nezáne mogonamú gelekugo ve napa noune liki iaká nia aposolotini sepenauka nominumó gelesá amive.

<sup>6</sup> Neza negepa gúmusi muluke lo lekemeaká nouhe loko gelenamumóza, monolímíni mogonáa geleaká nene gelenouve. Itó nenémini mogonáa haitopaitolímíni oko ale vesamá oko lokovogisaloka ale moloko lo lekemeaká nouve.

<sup>7</sup> Itó lekelí lekelémo napa itove loko nezáne lemeko minuke Ómasímini gako lamaná lo lukunutó meináváa ma alesá amumó nenémo golesa ihe lamaná ive.

<sup>8</sup> Lekelitoka monó hoza aleko gelekelé noleketuke Ómasímini vejenala zuha lugáate moni henoni nimikago aleaká umó nene hagitana ipá oaká umó gelekave.

<sup>9</sup>\* Itó lekelitoka minuke netá makokumú vitagá uke voká makó loleketamumóma neve. Neza vitagá oko mohona nougo, Masetonia mikasigutí nigive makolite aniteke netá nimiki ali negepa miliaká amó. Lá niago lekelitoka nene hanuva minuke genavagi netá geheleketonamumóma neve. Itó minoloko iteko gohagi geheleketamitove loko noluve.

<sup>10</sup> Kilistoni gako gihiláa nigikauka nego lamaná noluve. Ámina suni aleaká noukumú nugupe ale napa otigí oko loaká nou gapo nene Akaia mikasigú lekeza nia mikasiuka hizi lí aminigave.

<sup>11</sup> Nene nanamú noluve. Nigika lekememuke lá oaká nouhe. Nenémini oko nomive. Nigika lekemeaká noumó nene Ómasímo geleneigo noluve.

<sup>12</sup> Netá aleaká noumó nene ale-loko voko minanogo uve. Itó nene hanuvamukopa, vejená lugáa keza Pauló hoza aleaká noimó nenémini lelegitó oko hoza nalune liki kugupenini aliki itikatave loko nene lukesaváini akeleaká nouve.

<sup>13</sup> Ve nenémináate aposolo sozámíni itó monó hoza sozámíni aliki minake, Kilistoni aposolo leli lemetamenigitana lílí iaká niave.

<sup>14</sup> Lá ikago netá haitolímini makó alikave loko litupe. Lá oko nomive. Satá ezagi nene ageló vejená lapanáiki loló itove loko ali tolova oaká noinazo,

<sup>15</sup> nenemú Satani hozaváa aliaká nia vejená keza ámina iki netá lamaná aleakalímini gelekeleláa loló itune liki kezáini kogoka kegepa vávani iki ale tolova iaká niakumú ininá amitune. Keza miniki hoza golesa aliaká niamó nenémini helegáa alinigave.

*Pauló aposolo hoza alike miluma gili gakó*

<sup>16</sup> Gakó nolomú nene goha litoze. Nenikumú gelego negi ve liki loló amino. Gopa nenikumú láa liki nigilikima gili nimikiko nugupe lagasó ale napa otigi oko litoze.

<sup>17</sup> Neza gakó láa loko litomó nene Guivahanímo lonetamómámini oko litogopa, hanuva nugupe aleko iteko gakó apí okumole loko gopa nene negi gakó linogo uve.

<sup>18</sup> Vegená mukilite lugupémini netakumú ali napa napa iki gakó liaká nianazo, neza ámina oko litove.

<sup>19</sup> Agae, lekeza netá mogonáa geleaká nouni vejená nounge liki likamó nenazo, lugáate negi gakó li likimikago, vávani iki giliaká niave.

<sup>20</sup> Itó likilími gelekele izegipatini milanigi niake, itó netá matatini ipá iki nanigi niake, itó gelehúsíki apilitave liki niake, itó kugulizaki ve lílí i likiminigi niake, itó lokogoka lekegepaló zinigi niago, nenemú lekeza gahá kememake gili kimiaká niave.

<sup>21</sup> Neza nene sunimú amuza molamugo lekeza lovoza heleaká netá nalive liki nilahe.

Makó keza netá nemupe manamupe ahuu ahuu liiki nene alune liki ma niko, nezagi nene negi vigitana oko nehelele vízemigo nugupe aleko iteko litoze.

<sup>22</sup> Ámina aposolo sozámimi nene kezáinimú Hipulu ve nounge liki liaká niamóza, nezagi ámina oko Zuta ve nounge. Kezáinimú Isilae vejená nounge liki liaká niamóza, neza ámina oko loaká nounge. Keza goha ámina iki kezáinimú Avalahani agapilamola nounge liki liaká niamóza, neza áminaló kámegetoko loaká nounge.

<sup>23</sup> \* Keza Kilistoni gelekelé veva nounge liki liaká niamóza, neza imane gopa negi nagí gakó litoze. Neza kivilegeko Kilistoni gelekelé veva haitolímini nounge. Neza hozámimi milumaváa geleaká noumó nene haitolíninoko neve. Itó monokumule loko nagá numukú minoaká umó, itó segi nogosanitunú nipilikago nagavú geaká imó, itó lapuluva itove loko geleaká umó nene haitó avevezahaló iteko neve.

<sup>24</sup> \* Zuta ve keza gamena ligizani lugaloka asú igo uheni nakahunitunú nepelemó nene 39 igo nepelemó.

<sup>25</sup> \* Gamena losive makole Loma vete segi nogosanitunú nepelemóma neve. Itó gamena hamó nene gehanitunú nipilikago hilinogo umóma neve. Itó gamena losive makole nagamikú lapedú nougo ámina sipi zeko ategekego age nagamikú lemesá umóma neve. Itó gamena hamó nene sipima golesa okago límugusi zeko gó loko imóza, simá namoko hanuva age nagamí amupiló minumóma neve.

<sup>26</sup> \* Itó gamena mukí nene gapo hána hána vova vova oko mohona oko nominugo, golinímo nagamilímo okago lapuluva osá oko minoaká nenémini amupiló iteko minumóma neve. Itó laskoli vetini holúíki heleakalímini amupiló minumóma neve. Zuta ve nigivénegini holúíki itó Zuta ve minamamóláatini holúíki heleakalímini amupiló minumóma neve. Taoni napagú itó gihisigú heleakalímini amupiló minumóma neve. Age nagamikú nene sumizá noaká avevezahaló, itó monó sozaló ve ligivetegini holúíki heleakalímini amupiló mohona oko minumóma neve.

<sup>27</sup> Génopa hoza alekuke nigizamuha nagavú gigo mohona uke, novoki ako lamaná amumó mohona uke, gaúna heleko zahí nagamikumú nivisigo, hepé heleko minumóma neve. Gineganemú itó avilisakumú vitagá oko minumóma neve.

<sup>28</sup> Itó nenegó ma nomive. Gamena gamena mulúne gitihiná igo numutó namató Guivahanímini vejenala zuha gizapa okimiaká hozamú gulugo, gena nivisigo minoaká nounge.

<sup>29</sup> Makó keza monokú ipú zemagoma, nezagi miluma gelekimiaká nounge. Itó makó keza monokutí olíi hizikagoma, milumaváini geleaká nounge.

<sup>30</sup> Itó neza netá makokumú nugupe ale napa itove loko nookoma, keé lamumó nenemú ale napa oko nolugo lamaná inogo ive.

<sup>31</sup> Guivahani Izesuni amelaho Ómasía luhuva gegemá oloko voko mino lúaló molati ve áisi nene nenikumú lamaná nolive loko geleneive.

<sup>32</sup> \* Neza Tamasiko numutoka nougo, agulizaki ve napa Aletani kiapelímo nagá numukú nelémo molanogo lokago, numuni gatekú gohoni akamó.

\* 11:23: Apo 16:23

\* 11:24: Gapo 25:3

\* 11:25: Apo 16:22, 14:19

\* 11:26: Apo 9:23, 14:5

\* 11:32: Apo

<sup>33</sup> Lá niago, nigive nagave keza nene gosúvehagú lohusi iake vegegisa koló o minakú nehelú i ahulikago, olío hetoka lemekuke golisi vumó neve.

## 12

### *Pauló agika ale viligokago áníga gakó*

<sup>1</sup> Lugupe ale napa ituní gakó losá nene ma lelémó vatí amitimóza, gopa nene litoze. Nigika ale viligokago netá ánígumó itó Guivahanímó lo vesamá oko lo nimimó nenemú itínasa aveté oko lo likimitoze, gililo.

<sup>2</sup> Neza Kilistoni vevenala makó gelenouve. Eza nene netá makó áníga gamenalotí kilisimasi 14 oko vokave. Ve eza nene Guivahanímó galinali alémoko okulumakú itekago velé amupiló agika nekú nene itimó. Neza agupegi nehe itó agupe gileleake nehe nene gele hee lamuve. Ómasímogó geleneive.

<sup>3-4</sup> Itó Guivahanímó ámína ve galinali alémoko itekago, Palatise zazuhagú nene iteko gakó legepatunú lamosá itó mikasiuka veta lo utó moloko lamosá nene gilimó. Neza gelenoumóza, agupegi minake itihe itó gileleake itihe nene nénisi gelemuve. Ómasímogó geleneive.

<sup>5</sup> Ámína vemule loko nugupe ale napa oko gakó litove loko nene nezáne mogonamú hize lé oko laminogo uve. Nezánemú litove loko nene keé losá amumó nenemukó ale napa oko linogo uve.

<sup>6</sup> Nugupe ale napa oko gakó litove loko nelina nene, gakó lamaná lulinamó nenazo, negi nagi ve minamuline. Lá onoimóza, nenikumú gelego itekative loko nene ma laminogo uve. Netá matá lokugo itó oko moloko nougo, lekezatini ánígiki mota giliaká niamó nenémíni lelegító minanogo ive.

<sup>7</sup> Okulumakú netá gosohá ánígoko moloko umó nenemú nugupe aleko itekatove loko nugupéne mémelagú emane uhenagi netá makó hizimó nene, Satani gelekéle izegipala makó eza nigikatunú gulugo itekative loko agizani lapuva nimitive loko lonoimóma neve.

<sup>8</sup> Lá okago, ámína netalímó ahulonetative loko Guivahaniloka gamena losive makole lumó neve.

<sup>9</sup> Voká lokugo, láa loko lo nimimó: Není helisánémó keé losá amanikú nene napaló hize lé ogimiaká noinazo, není nasahilínémó geitoka veleko voaká noigo, netá makokumú voká litanimoláa nomive loko lo nimimó. Nenemú Kilistoni zámuzalámó nenitoka nelémó gilí litive loko keé losá amumó nenemukó ale napa oko noluke nogoliza vizeaká nouve.

<sup>10</sup> Lá onoinazo, neza keé losá amutó nene aitoka leheta nouke amuza moloaká nounazo, Kilistikumule loko keé lamugoma, itó alivi letivi ninitagoma, itó miluma malumámíni amupiló nominugoma, itó gopogunímíni itó galáinímíni amupiló nominugoma, gopa nenemú mulúnégú golesa gelesá amuve.

### *Pauló Koliti vevenakumú miluma gilimó*

<sup>11</sup> Imane negi nagi gakó lumó nene lekelisi iki miliki amó nenémó nelémó zaú okago noluve. Lekezatini nílmí napa ikiko lamaná itinazo. Neza hanuva ánéámína noumóza, lekelí aposolo iteko nouné liki nila vetini kamakuka lemeko ma minamuve.

<sup>12</sup> Neza lekelitoka hoza huluváa alugo, alévolé suni itó gosohá netá zámuzagi ale utó oaká umó nenémó aposolo mogonáne ale utó moloaká imó.

<sup>13</sup> Itó lekeza nanetá vitagá iake Ómasímíni vevenala zuha mulusi lugáatini avevezahaló minamave. Lekeza netá hamotunukó lekelémó alínipa okuve. Netá matatini visele nómonó nene ma oleketamumómá neve. Ámína suni nene lihima napagi nego ahulinitalo loko litohe.

<sup>14</sup> Neza lekelitoka gamena losítá vumómá neve. Itó itína nene goha vitove loko ale vatí nouve. Vinake goí oko vuke nugupémíni lukesaváaloka umómámínoko miluma hoza lekememinogo uve. Izegipa koma nenete izóikini améikini hizi lé ikitanigi moni ali nupa isá amave. Kéisi izóike améike hizi kegepa itakumukó gilígili miniaká nianazo, neza lekelí moni henonimú negopa, lekelikumule loko amuza moloaká nouve.

<sup>15</sup> Neza nene lekelikumule loko moni henokanóne itó minoko aleko oakáne nenegi nuvane ahulatove loko vávani oko nouve. Nenemú nigikatunú lekelikumú geleaká noumó nenémó aleko iteko noiko, lekeza likigikatunú nenikumú giliaká niamó nenémó aleko lemeko minatihe.

<sup>16</sup> Vegená lugáate nenikumú láa liki liaká niave: Ezáa netá utó ezo azoga loko ipá oaká nene ma osá amimóza, asugunatoka vevená kogoka vizeko netá matáini ipá oaká onoitithe liki liaká niave. Oilie, neza lá umó nehe.

<sup>17</sup> Nenemú lekeza lilo. Není gaktó nene vevenáne zuha kimiselekugo, viki netá makó lekelitokatí ipá ikahe.

<sup>18</sup> Taetasini nene vitive loko lotumó, itó monokú ligive makó amiselekugo makó vikasisgo nene, Taetasí nene voko lekelitokatí netá matá ma ipá ihe. Leza ligika molo hamó usike gapo hamotó lisoko makó vamusihe.

<sup>19</sup> Gakó akó loaká noumó nene lekeza gelego ezáa mogona hize lé oaká nolive liki nilahe. Nenéminoko nomive. Neza Kilistoni izegípala minuke Ómasímini avogisalo gakó loaká nouve. Itó nigive nagavese, gihila nenikumule loko lamuve. Monokú lekelémo kii litove loko loaká nouve.

<sup>20</sup> Neza lekelitoka voko ániroleketatomó nene lekelikumú gulugo hehe lamitive loko, itó lekeza nenikumú ámina iki gíliko hehe lamitive loko gulugo, gena nonivisive. Itó lekelitoka lova leta lava leta itó lekemekugú noaká, mesaha kosaha, itó molo alata alata oaká, itó alevó letovo oaká, lotoka lataka hízeaká, vegená kugupe aleko iteaká, ale gopánapa oaká, netá nenémináa neko voko ánirolekatove loko gulugo, gena nonivisive.

<sup>21</sup> Lekelitokatí lugáate emane amunaloka líkígika golutuva lámó mokoló netá itó musi netá líkígika napaló nego, némini manámini ake líkígikatini makó ali viligísá amiki nenéminiki niko, lekelitoka vo anítitómó nene lokovogisalo Ómasinémo nelémo-loko lemekiko, lekelí lihíamamú mulúne gíthíná okative loko gulugo gena niviseaká noive.

## 13

### *Kagata alike geké loketake gizo asú imó*

<sup>1</sup> \* Itína lekelitoka goha vokugo gamena losive makole inogo ive. Goní oaká gamenaló nene ve losítá ahe itó losive makolehe keza ve makolímíni lihíamamú líkiko utó o lamaná oko vevesanogo ive líkí monó gotoláú gízina gakó nene, lekelitoka vo anítekinake ámina gakó gele minínake gakó linogo uve.

<sup>2</sup> Amunaló emane lihímatínigí minamoláa itó vegená lugáa nene lekelitoka gamena losi vu zupahé lakagata aleko lu gakó áminama nugupe hotó onóigo goha imane noluve. Alike goha nene voko aselíni ma zeleketaminogo uve.

<sup>3</sup> Kílistó nene nelémo vávani ígo loaká noutímíni mogonamú lekeza vitagá niamó nene ániaganigave. Kílistó eza lekelitoka hozaváa nalímó nene nekísáa nomímó neve. Zámuzalagí aleaká noive.

<sup>4</sup> Gozapá nene lamaná mígelelé onóigo zohota zaló apelemóma nemóza, itína nene amelaho Ómasímini zámuzalagí aleake otímó neve. Neza ámina oko eza imómáminoko mígelelé ovumóza, aítoka gímízekuke Ómasímini zámuzaló voko leheta oko minoaká noumó nenémini mogona lekelitoka voko ale utó molanogo uve.

<sup>5</sup> Lekelisi nene lamaná monokú niahe niamáhe nene líkígikatini loká iki vitagá iiki nenémini mogonáa ali utó milalo. Itó Izesu Kílistoni mulutikú alími milikago nominámó nenémini mogona mota gílináhe, olíle. Itó lukugupémo monó avevezaha oaká noihe.

<sup>6</sup> Nénisi nene hetó nugupetunukó monó ve ma minosá amuve. Lá nougo ániगतave loko geleaká nouve.

<sup>7</sup> Ómasímo gízapa olíkímíkiko lihíma ali utó mílamítave loko Ómasíloka loaká nouve. Lekeza ániígíkiko monó ve gíhlíla loló oko mínatove loko nomive. Lekeza monó gakó gíli alítamó nenémo utó o lamaná ítíve loko noluve. Itó nenikumú nene agupetunukó monó ve noive líkí gílitámó nene ha netá neve.

<sup>8</sup> Leza nenémináate nana oko gakó gíhila lova ale amítíve. Hanuva hize lé otatíve loko nousive.

<sup>9</sup> Leza zámuzamú vitagá okoko nousigo, lekelisi zámuzatiki mínatámó nene mulutegú lamaná gílinogo usive. Lá nousike líkígika gízopa látíve loko Ómasíloka loaká nousive.

<sup>10</sup> Guivahanímo zámuzáa nímímó nenetunú lekelí lekehelú itove loko negopa, lekelí lekelémo alévolé itove loko nemeneimóma nenazo, neza lekelitoka voko alévolé gakokutí lo lekemekatove loko ganatílisi hotó nouke lakagata aleko luhuva imane gizo nolukumuve.

<sup>11</sup> Itó nígívenegita, gakó lo asú oko láa loko lítoze: Lekeza mulutikú lamaná gílikí minalo. Itó lakagata aleko imane nolómó gílikí líkígika ali guni iki alími lamanatoka milalo. Lá níiki lekeza líkígikatini míli hamó iki hulugú minalo. Lá íkíko, Ómasí eza lígika kemeaká itó hulu amelaho lekelitoka mínanogo ive.

<sup>12</sup> Lekeza monokú eza aputá víziko eza aputá víziko iki minalo.

<sup>13</sup> Imaneloka monó gílina vegenalíte mukító geketini lílíkimíaká níave.

<sup>14</sup> Guivahani Izesu Kílistoni nasahílila nenémo itó Ómasímo agíka lekemeaká noimó nenémo itó Sikalahulímo lekelémo apízeaká noimó nenémo lekelitoka míno loko voko mínino.

\* 13:1: Gapo 17:6, 19:15

## Galesia Vegenalitini Luhuva Pauló Gizo Kimimó

*Galesia vegená nóhohá kimike gizo kimi gakó*

<sup>1</sup> Neza Paulona aposolo nene ve makólímo nimiselemimó itó vegenalite hoza gakó ma linitamamó, Izesu Kilistó itó heleneikutí alémo oti ve Ómasi ametehe nene aí gakotó aposolo loló utímína,

<sup>2</sup> itó nigivénege lugáagi imaneló niamó kezagi makó nounike nene Izesuni vegenala zuha Galesia mikasiuka niató niató lekelí luhuva imane gizo nolukumuve.

<sup>3</sup> Ómasi ametehe itó Guivahanite Izesu Kilistó aitokatí nasahilí itó hulu lekelitoka minino.

<sup>4</sup> Izesú eza ametehe Ómasímíni gakotó nene itína gamena golesa netatémo lelémo golesa inogo ikutí gologí oletanogo lelí lihíamamule loko minoko aleko imoláa nene ezáa ahulamó.

<sup>5</sup> Nenemú Ómasímíni lapaná ale ote-loko voko minatune. Lamaná.

*Gakó lamaná haitó makó nomive*

<sup>6</sup> Lekeza nene Kilistoni nasahilikú miní amitave loko sele lo likimi veló mini hána amake lekemegeza amiake haitó gakó lamanakú viki lakagata míliki giliaká niakumú nene oho loko nololeketuve.

<sup>7</sup> Gakó lamaná nene makó nomimóza, hanuva vegená lugáa nenete Kilistoni gakó lamaná nene ale gopa itupe liki haitó monó li likímiki likígika alí gopa ake nenémíni iaká niave.

<sup>8</sup> Lá niamóza, nezahe itó okulumakutí ageló makólímóhe Izesuni gakó lamaná amunaloka lo lukumuhá nene lo lekememoko ale gopa oko haitó lo lekemesá nene lolímíni mututoni loló osató neve.

<sup>9</sup> Ámína gakó nene gozapá lunimó áminagó nene goha noluve. Makolite nene gakó lamaná amunaloka lo lekemekugo gílinamó nene ali gopa iki haitólímíniki li likímítamó nene lolímíni mututoni lílí itamó neve loko goha nene noluve.

<sup>10</sup> Gakó nolumó nene vegenalite ángi kumu hilitave loko lamuve. Ómasímo ángi amu hilitive loko noluve. Neza nene vegenalite nenikumú giliko ítitive loko hoza alulina, Kilistoni gelekelé ve minamuline.

*Pauló aposolo loló imómámíni mogona*

<sup>11</sup> Nigivénegita, neza gakó lo likímítoze, gililo. Izesuni gakó lamaná lo lukumumó nene vegenalite kagata giliki ali utó amó nomive.

<sup>12</sup> Itó vegenalítitokatí nomive. Itó vegenalite lainim-ínitamave. Izesu Kilistó ezáa lo utó oko lo nimimó neve.

<sup>13</sup> \* Neza gozapá Zuta ve minuke holúikú minokuke, netá matá oko moloko umó li likímikago nene gílinave. Neza Ómasímíni monó gele vegená nene gopoguni moloketuke kepeleko kimisele kimisele moloko, kelémo golesa galasa oaká umó nene,

<sup>14</sup> \* ízegípa nahalúnegini kivilegeko izotegini ametegini itó avotegini mogona nene haha amítive loko ámína gakólímo alévolé oko minative lokuke nene, amuza moloko lá oaká umóma neve.

<sup>15</sup> Lá oaká umóza, Ómasi nenémo amunaloka ízónehini agatupagú nougo, ángoake, nasahilí onetake nelémo etó oake sele lo nimimó.

<sup>16</sup> \* Sele lo nimimó nene, giligo, etokago, gakola nene Zuta vegená minamamoláaloka ale hutilí itane loko gípálámíni mogona lo utó oko nelepizimó. Itó lá imóza, ámína gákokumú gele vevesonouhe loko vegená makotoka loká oketamumóma neve.

<sup>17</sup> Itó aposolo goí iki lílí iki minamoláa keza ámína gakó lamaná nene hee liki li nimitave loko Zelusale numutoka ítemumóma neve. Ángisá ugopa, litá oko Alapia mikasigú mikasi gomopalaló voko minuke atiginá oko Tamasiko numutoka vo anítumó.

<sup>18</sup> \* Neneloka nougo, kilisimasi losive makole oko vokago, Pitani ángatove loko Zelusalega itekugo, holisi lositá makó minusimó.

<sup>19</sup> Neneló nousike, aposolo lugáa makó ángamumó. Guivahanímíni agunala Zemusinígó ángumó, áisi monó gízapa ve napa minamó nenazo.

<sup>20</sup> Itó gakó imane luhuva nogizumó nene soza gakó nomive. Ómasímíni agovisaló lamaná noluke luhuva nogizuve.

<sup>21</sup> Lá okuke nene, Silia mikasigú itó Silisia mikasigú nene voko minumó.

<sup>22</sup> Itó Zutaia mikasigú Kilistoni vegenala zuhate není nogokaló ángamamó.

\* 1:13: Apo 8:3, 22:4-5, 26:9-11

\* 1:14: Apo 22:3

\* 1:16: Apo 9:3-6, 22:6-10, 26:13-18

\* 1:18: Apo 9:26-30



<sup>23</sup> Keza veđená lugáate nenikumú gako makó likago láa liki gelemó: Gopoguni mololetake lepeleko limiseleko monó ale golesa itive loko vi vémo goha ale viligoake veđená nene monó lo nokimive.

<sup>24</sup> Láa liake, nenikumú Ómasi agepoka liki miniaká amó.

## 2

### *Aposolote Pauloni hozamú gelego lamaná imó*

<sup>1</sup> Lá okago, kilisimasi 14 oko vokago, Panapasiki Zelusalega goha atiginá oko itekusike, Taetasini nene ale gímizekusike makó itunimó.

<sup>2</sup> Nene hanuva lá amumó. Ómasímo gako lo utó oko lo nimitó nene itumó. Itumó nene Zuta veđená minamamoláa Izesuni gako lamaná lo utó oko lo kemeaká noumó nene monokú kugulizaki ve kezagó alegesá iki niago aveté oko lo kumumó. Není hozamú géneka likikoma hoza goi oko aleko minumoki itó hoza itína aleko nominumoki nene hanuvamú alumó gelekative loko lá umóma neve.

<sup>3</sup> Lá okugo, ve lugáahe itó nezagi minusi ve Taetasí ahe eza nene Kiliki ve nenazo, nenemú Zuta ve loló itive loko agupeló nene Ómasímíni anosa molotatune liki li hukitatahe loko nougo lamamóza,

<sup>4</sup> emane amunaloka ve lugáa nene soza sazalo monó ve iki holutegú asugunatoka anitemó. Keza Izesu Kilistotoka voko apizeko minunike netá makolímíni nagakú minamuhá nenémíni mogona ániगतune liki Mosé lo hukoko li gacolímíni gelekelé ve lelémo molatune liki ániği loló itune liki halá giki amó.

<sup>5</sup> Nene vete lelí ale limitune liki likago, leza Izesuni gako lamaná nenémo lekelitoka ale gilitoko alitive loko Taetasini agupeló anosa mlatave liki likago keké gele kememuháma neve.

<sup>6</sup> Lá okago, veđenalite gelego monó kugulizaki ve minamó nenete lelí gapo hizi lí inigi némini manámíni inítamamóma neve. Itó keikumú gulugo haitolímíni iki minamamó neve. Ómasímo ámináminoko lugupeló ániğamó nene itetiği lemetiği osá amive. Zelusale numutoka itu zupahé nene ámina monó gizapaló vete haitó gako makó lo utó oko lo kimitane liki miní amiki li nememamó.

<sup>7</sup> Keza láa liki li nememake láa likiğó gelemó: Ómasímo Pitani nene Zuta veđenatoka Izesuni gako lamaná lo utó oko lo kimitive loko lotamó. Ámináminí oko není nene hetoka veđenatoka gako lamaná lo utó oko lo kimitane loko lonetamó neve liki gelemó.

<sup>8</sup> Pitá nene Zuta vetini aposolo loló imó ániğamó oko neza nene Ómasímíni zámuzaló hetoka veđenalitini aposolo loló umó.

<sup>9</sup> Lá okago, Zemusiki Pitaki Zoniki monokú kugulizaki ve niahe liki gele ve nenete nenikumú nene Ómasímo apazá hoza lehizemikave liki gelemó. Giliake, ligiveteve liake, Panapasiki ligizakú alemó. Lá iake, lekeza hetoka veđenatoka monó hoza nalisiko, lezate Zuta veđenatoka naluko, oko minatune liki li hukamó.

<sup>10</sup> Gohogó veđená limiki niamoláa nasahilí ikitatáive likiğó li nememó. Itó ámina hoza amuza moloko alitohe loko gele minutó lave.

### *Atiokia numutoka Pauló Pitani gahá ami gako*

<sup>11</sup> Itó Pitá eza Atiokia numutoka okago, aitokatí netá golesa utó onoigo, ániğokuke, aí agómulaló pelevesava zeko gako lo amumó.

<sup>12</sup> Nenémíni mogonáa lá oko neve: Goí oko nene hetoka ve monó gele ve makó Zemusí kimiselekego ake Pitagegi makó minake nosánetá nene hámakokutí ninago, alika nene Zuta ve makó ikago, ániğoake, hetoka veği kugupeló Ómasímíni anosa minatave liki amuza miliaká a vema nianazo loko keikumú alegesá legekago hetoka ve nene ahulo hotó okimiake, kezagi makó minoko nosánetá namimó.

<sup>13</sup> Lá oake, voko aleko oko aleko noigo, Zuta ve monokú agivelage ámináminiki genezáini losigi veđenalitini suni aleke Pitani alími vatí ago, Panapasí eza keitoka miní ameko keí suni alimó.

<sup>14</sup> Lá iki minake, Izesuni gako lamanalímíni gapogú hee liki vamago nene ániğokuke, veđená lugáatini kovogisalo nene Pitani láa loko lo amumó: Geza nene Zuta ve noanimóza, Zuta ve lelí avotege li huka gako nene ahulokanike hetoka vete iki miliki iaká niakú nene novane. Nenemú hetoka ve keza Zuta ve lelí oko molokogú vitave loko nolanimó nene etamive, loko lo amumó.

*Zuta veği hetoka veği gili alévolé akumulé lokogó kugutó vizeaká noive*

\* 2:1: Apo 11:30, 15:2

<sup>15</sup> Leza nene hetoka ve gopa napa miniaká nia vejenakutí utó amune. Zuta ve gihila utó unimóza,

<sup>16\*</sup> láa loko geleaká noune: Mosé lo hukoko li gakó emane gele alekinake hozava ale-loko voko mininake lihimate asú olimiakaláa nomive. Izesu Kilistonimú gele alévolé okukogó lihimate asú olimikiko minanogo une. Láa loko gelekunike, lo hukoko li gakolímíni hozava aleko nominukopa, lihimate asú olimikiko minatune loko Izesu Kilistonimú mota gele alévolé okune.

<sup>17</sup> Kilistotoka voko gímizekoko lihimate asú itive loko nouháza, lá oloko novinake hetoka vegitana oko golesa netá aleaká vejená loló noukoma nenemú nanave loko litune. Kilistó golesa netá alilo loko lelémó vatí oaká noihe. Óe, lá oko nomive, keké.

<sup>18</sup> Lihimate asú itive loko Mosé li gakotó amegesaló mololoko vituni suni mota gale zunimó nene goha apatitunimó nene, lamaná lo hukoko li gakó pelevesava zeaká nounimó nenémíni mogonáa utó inogo ive.

<sup>19</sup> Mosé lo huka gakó nenémó áminama gele alekinake alévolé nemetameni alito gapo hize lí oake nemeni apele hilimó gelekamóza, Ómasimule loko minatove loko otekumó neve. Itó Kilistoni apili nihelego nezagi zohota zaló nípili hilikamó gelekamóza,

<sup>20</sup> itínasa minoko aleko noumó nene, nezánegó minamuve. Kilistó eza mulúnegú minoko aleko noigo, nugupetunú minoko aleko noumó nene Ómasímíni gípalamú gele alévolé onouke minoko aleko oaká nouve. Eza nene agika nenítoka moloake minoko aleko imoláa nene nenikumule loko ahulamó neve.

<sup>21</sup> Lo hukoko li gakó emane gele alekoko lihimate asú olimikago minoaká imó nelina nene, Kilistó nene hanuvamú hilimó loló ilinamó nenazo, Izesú nohilike Ómasímíni nasahílí lehizeletamó nene ale gopa oko ahulosá amuve.

### 3

*Lo hukoko li gakó gele alesá nehe Izesukumú gele alévolé osá neve*

<sup>1</sup> Kee, Galesia vejená negi nagi neneta, lekeza nene éahoma lekelémó gopa napa ive. Izesu Kilistoni nene zohota zaló hili mogonáa lo lekemeko nolekelepizuko, lokogómulatunú ángi akutiki ángimóma neve.

<sup>2</sup> Netá hamokumú loká oleketatoze, giliki li nimilo. Lekeza Ómasímíni Sikalahú alemó nene, nana iake alemóma neve. Mosé lo hukoko li gakóma gili aliake alemó nehe, itó Izesukumú gili alévolé iake alemó neve.

<sup>3</sup> Nanamú negi nagi hiziki niave. Sikalahulímíni gapogú apí iki li-liki nivakutí nene ali viligiki litaha mogona ali miniki alévolé apakú anititune liki nigelehe, olile.

<sup>4</sup> Monó lekelitó minamómave liki gopoguni mililikimikago, golvagi netá nene hanuvamú lukunupiló itimó nehe. Óe, lá oko nomive.

<sup>5</sup> Ómasi eza Sikalahú lehizelikimiká itó alévolé suni lekelitoka ale utó oká noimó nene, Mosé lo hukoko li gakóma gili alikago lehizelikimiaká noihe, itó Izesuni gakó lamaná gili alévolé ikago lehizelikimiaká noihe.

<sup>6\*</sup> Monó gotolaú Avalahani mogonamú luhuva láa liki gizinamóma neve: Eza Ómasimú gele alévolé okago, nenemule loko lihimavaka asú ogimikave loko lotamó.

<sup>7\*</sup> Nenemú láa liki gililo: Gili alévolé iaká niamoláa keza nene Avalahani agapilamó zuha gihila niave.

<sup>8\*</sup> Zuta vejená minamamoláa keza Ómasimú gili alévolé ikiko nene, lihimáini ahuloke-tatikumú gozapá geleake, monó gotolaú Ómasímó gakó lamaná Avalahani lo amimó nene láa líki luhuva gizinamóma neve: Geí lusa nenémó hetoka vejená mukitoka vo ale asú inogo ive.

<sup>9</sup> Nenemú Avalahá gele alévolé oake lisoko vi gapoló lisiki vitamoláa keza aí lusagú vi hlanigave.

<sup>10\*</sup> Itó Mosé lo hukoko li gakokú leheta iake ámegé ámegé iaká nia vejená keza lolímíni mututoni líl inigave. Nenemú monó gotolaú láa liki luhuva gizinamóma neve: Mosé lo hukoko li gakokú hize letoko gizoloko vonoi gakó mukitó gili alemitamó nenete usilímíni mututoni minanigave.

<sup>11\*</sup> Nenemú monó gotolaú gakó makó lá oko neve: Gili alévolé iakeve liki Ómasímíni agovisaló lihimáini asú okimikago minatamó nenete alévolé iki miniki aliki inigave liki luhuva gizinamó nenazo, Mosé lo hukoko li gakó gele alekinake Ómasiloka lihimá nomítimó minoakaláa nomive. Nenémíni mogonáa mota utó okave.

\* 2:16: Age 143:2; Lom 3:20-22    \* 3:6: Apí 15:6; Lom 4:3    \* 3:7: Lom 4:16    \* 3:8: Apí 12:3    \* 3:10: Gapo 27:26

\* 3:11: Hip 2:4

12 \* Itó lo hukoko li gakó gele alekinake alévolé ituni mogona haitolímíni neve. Gele aleloko vova vova oko alévolé itunimoláa neve. Nenemú monó gotolaú láa loko luhuva gizonoiómoma neve: Lo hukoko li gakolímíni hozaváa alilíki viva viva iki ali asú ita vejená alévolé iki minanigave loko neve.

13 \* Itó monó gotolaú nene vejená zaló nagá ziki saína iki apatemó keza lolímíni mututoni niave líki luhuva gizinámoma neve. Itó Kilistoni ámina iki zaló saína iki apatikago, lelikumule loko usí alimó. Aleake, Mosé lo hukoko li gakolímíni nagakutí guluhuletamó.

14 Lá imó nene Izesu Kilistó hoza alikumule loko Avalahatokatí lusámo numutó namató vejenatoka puu loko vo asú itive loko lá oletamó. Itó lá okiko Sikalahú lehizeletatove loko lo mololetamó nene Ómasimú gele alévolé okinake alinogo une.

*Mosé lo hukoko li gakoki Ómasímo lehizeletatove loko lo mololeta gakoki*

15 Nigivénegita, neza hanuva gilina netá makotó lo moloko litoze, gililo. Ve makó nenetosa keza netá matá makokumú li múnahiki luhuva gizatámó nene, makolímó senisimoká itó velé amupiló gakó makó miní ameko loká oko luhuva gizatimoláa nomive.

16 \* Itó Ómasímo nene Avalahani itó agapilamola lehizeletatove loko lo moloketoko limó nene, agapilamó zuha mukikumú lamímóma neve. Hamó Kilistokumú limóma neve.

17 \* Mogona lá okomú noluve: Ómasímo gozapá monó helisa henoni lehizeletatove loko lo mololetake limó. Lá okago, kilisimasi 430 okó vokago, Mosé lo hukoko li gakó nene alika utó imó. Itó ámina lo hukoko li gakó nenémo Ómasímo lo molota gakó avutá apelemingogive.

18 \* Monolímíni lusa henoni nene lo hukoko li gakó gele aleakakú nelina nene, Ómasímo gakó lo mololetoko likutí alemutiline. Lá onoiómóza, nene ma nomive. Ómasímo monolímíni helisa henoni nene lo molotake lonoikeve loko Avalahani hagitana lehizetámoma neve.

19 Lá onoiómó nenazo, lo hukoko li gakóma nene nana netakumú neve. Pelevesava zekoko netá golesa aleaká nenémíni mogona lo utó itove loko Ómasímo miní ameko molamóma neve. Itó minoloko vova vova oko noiko nene, lehizegetatove loko lo molota ve Avalahani agávolaho Izesú utó okiko asú itive loko lonoimóma neve. Itó lo hukoko li gakóma nene ageló makolite limiki holutegú mina ve Moseni agizakú mílikago limimó.

20 Lá onoiómóza, ve makolímó holutó ve minatimó nene, ve hamokumú minaminogogive. Vegená mukikumú minanogogive. Lá onoiómóza, Ómasi áisi ve hamokó noinazo, eza Avalahani nene netá makó lehizegetatove loko agómulaló lo molotamó nene holúikú minati ve makokumú vitagá amike ezágog lotamó.

*Mosé lo hukoko li gakó utó itímíni mogonáa*

21 Itó Mosé lo hukoko li gakó nenémo Ómasímo lehizeletatove loko lo mololeta gakó lovaga lo ameká noihe. Lá oko nomive. Mosé lo hukoko li gakó nenémo alévolé lemetameni ale utó oakaláa nelina nene, lamaná lo hukoko li gakokutí lihimate asú olimikago minoaká gapováa utó iline.

22 Lá onoiómóza, vejená mukitoka golesa netalímíni nagakú nounimó nenémíni mogonáa monó gotolaú li utó iki milinámoma neve. Lá okago, nenemú nene Izesu Kilistokumú gele alévolé okoko lehizeletatove loko lo mololeta netalímíni gihila alitunimoláa oko neve.

23 Zuta ve leza gozapá nene gele alévolé oaká gapo utó amigo, Mosé lo hukoko li gakó nenémo nagá lemekago, nagakú minoloko novuko, gele alévolé oakalímíni gakó utó o lamaná imó.

24 Itó Mosé lo hukoko li gakó nenémo lelémó vevesoaká gapo loló oko gizapa oletoloko vitó nouko, Kilistotoka lelémó molokago nene Izesunimú gele alévolé okunike lihimate asú olimikiko minanogogive.

25 Lélisi nene gele alévolé oaká gapováa utó okago, neneló ámegetoko novuko, ámina lo hukoko li gakolímíni gizapavaló minamune.

26 Itó lekeza mukitó nene Izesu Kilistokumú gili alévolé atúmó itínasa Ómasímíni vejenala zuha lílí iki niave.

27 Monó nagamí hiliake, Kilistotoka miní amiake, mukitoka Kilistoni ametameni ali luhikave.

28 Nenemú Zuta vejená niamó itó hetoka vejená niamó, megusa lílí iki muhelé ahelé iki minamó itó hanuva miniaká niamó, ve niamó vená niamó haitopaitó miniaká amó nene ha netá loló okago, lekeza mukitoka Izesu Kilistotoka viki gímiziake mulusi hamó lílí iki niave.

29\* Lekeza Kilistoni mututoni lilí inamó nenazo, nenemú Avalahani agapilamó zuha gihila lilí iki niake, Avalahani helisa henoni Ómasímo lehizetatove loko lo molotamó nene mukitó lekeli netá loló inogo ive.

#### 4

1 Nenémini mogona makó láa loko litoze, gililo. Izegipa namuni eza amelaho helekiko minoloko iteko helisa henoni ale lá itimóza, izegipa noinazo gopa nene megusa izegipa ametamenigi loló oko minanogo ive.

2 Lá noiko, uvolagehe amelagehe keza helisa netaláa gizapa itiki minanigave. Gizapa itiki niko eza napa okoko amelaho mola gamena nene alitokiko, helisa henoni nene ale alinogo ive.

3 Ámináminoko leza gozapá monokú olopa vegetana oko minamunike, mikasímini amupiló ha netá mognamú li huka gakolímíni gelekelela otoko minuháma neve.

4 Lá okago, alika nene gamena molamó nene alitokago, Ómasímo eza gipala amiselekago, vená makolímímo getokago, utó imó. Utó oake, eza Mosé lo hukoko li gakolímíni gelekelé oko minamó.

5\* Leza nene lo hukoko li gakolímíni nagakutí gologí olimikiko Ómasímo lelémó lá itive loko Ómasímini gipala utó imó neve.

6 Itó lekeza Ómasímini izegipala lilí iki niamómave loko Ómasímo gipalámíni Sikalahú nene mulutegú amiselekago, lemeko noigo, aí zámuzatunú ahóno aménegave loko sele loaká noune.

7 Nenemú geza megusa izegipa noakopa, Ómasímini izegipala noane. Itó aí izegipala minanikeve loko Ómasímini nasahílilaló aí helisa netalímíni amelaho ve loló oko minoaká noane.

#### *Pauló Galesia vejenakumú miluma gilimó*

8 Hetoka vejená lekeza gozapá Ómasímú gili guni amake soza saza ómai netalímíni agihúna giki minake keí nagakú minake, gelekelé ikitiki minamó.

9 Itó itínasa lekeza Ómasímú vitagá iake alími utó ikave. Itó lá onoimóza, lamaná Ómasímó lekelikumú vitagá ike lekelémó utó okamó nenazo, ha netá pisila nomimó helisa nomi netá nene nanamú goha lokovogisa amiki gelekelé nitiki nilave.

10 Lá iki niminake, Ómasímó giliko lamaná itihe liki Zuta vete haitopaitó gamena itó haitopaitó ikani itó haitopaitó kilisimasi mili etó amó nenémini holisi miniaká niave.

11 Lá niago hozane nenémó lekelítoka gihila zemitihe loko gulugo gena niviseaká noive.

12 Nígivénegita, neza voká loleketoko litoze. Neza lekelilímíni oko Mosé lo hukoko li gakolímíni nagakutí nelémó otopá zekago nouve. Lekeza není suni aliki minalo. Lekelítoka minoloko novugo, lekeza netá golesa makó lilí initamamóma neve.

13 Neza gozapá miluma netá gizalekuke, ganá apí oko Izesuni gakó lamaná lo lukumómoma neve.

14 Itó nugupegú keé lamigo, gena likivisegetigí imóza, není gopa goselé lekepelemimóma neve, itó mu likizapa onamimóma neve. Lekeza ánginimiake alesá mili nememó nene, Ómasímini ageló ahe itó Izesu Kilistonihe keikumú alesava mili kememó gilimó neve.

15 Kee, gamena nene zupa lokogolizagó ma viziki miniaká amóma nene itínasa hikuka vokave. Lekelí mognatini lamanakumú láa loko lo likimitoze, gililo. Lekeza lokogómula gologí itune likima, hanuva gologí iiki není nilími vatí iki nimitune liki nelina, hanuva nemeline.

16 Itó itínasa gamena nene gakó gihiláa lo nolukumukumú nene gala velini loló okuhe, olile.

17 Ve lugáate amuza miliki lekegepoka liaká niamó nene netá lamanakumú nomive. Lilími ezega emega ikiko, lekeza golisi inimiiki keí kugulizáini alí otitave liki amuza miliaká niave.

18 Netá lamanakumule loko lekegepoka loaká nene netá gihila nemóza, lekelítoka voko minu zupahekó negopa, gamena gamena lá iaká niko lamaná inogo ive.

19 Izegipánemata, neza lekelikumú miluma sipisi goha noguluve. Venalite izegipa getanigi miluma giliaká niamómáminoko miluma sipisi noguluve. Kilistoni ametameni lekelítoka utó o lamaná itive loko lekelikumú gulugo gena niviseaká noive.

20 Lekelikumú nagata gululusi geleuke lekelítoka litá oko voko lokovogisaló haitoliminoko gakó lo likimitove loko geleaká nouve.

#### *Hegako Salako keí anoza gakó*

\* 3:29: Lom 4:13 \* 4:5: Lom 8:15-17

<sup>21</sup> Mosé lo hukoko li gakó nenémini gelekélé otatune liki liaká niamó neneta, loká oleketatoze, li nimilo: Lekeza lo hukoko li gakolímíni luhuva netaláa nagatamáza, mogona gili hee lisá amahe.

<sup>22</sup>\* Áminagú nene láa liki gizi milinamóma neve: Avalahá nene gipala lositá getamó. Makó nene gelekélé mohó megusa Hegá getamó, itó makó nene alimí ame vená Salá getamó.

<sup>23</sup> Itó gelekélé mohó megusámo geta izegipa agulizá Isimaelé nene hanuva utó imó. Itó alimí ame venalímó geta izegipa agulizá Isaká nene Ómasímó alika getatane loko Avalahani lo molota gakotó getamó.

<sup>24</sup> Itó nene gakolímíni agikagú anoza makó láa loko neve: Ámina vená losi keza lo múnahi gakó lositalitíni avevezahaváa lílí asimó. Lo múnahi gakó makó nene Sinai agokaú utó imó nenémini gizapaló nia vejená nenete lo hukoko li gakolímíni gelekeleláa miniaká niave. Nenémini avevezahaváa nene gelekélé mohó megusámo Hegá eza loló imó.

<sup>25</sup> Itó Alapia mikasiuka Sinai agokamú Hegani agokave liki liaká niave. Itó Hegá eza Zelusale apá itína hanuva nemómámíni avevezahaváa noive. Zelusale apá nene Mosé lo hukoko li gakó ámegetoko minatunimó nene Ómasímíni agómúlaló hee loko minatune liki ámina gakolímíni megusáa lílí iki nia vejenalítíni gotó apá neve.

<sup>26</sup> Itó Zelusale apá okulumakuka nemó nenémo alimí ame vená Salani avevezahaló neve. Neneló miniki aliki nia vejená nene nagá makokú minamave. Nenemú ámina apá nenémo izoteho loló onoive.

<sup>27</sup>\* Nenemú monó gotolaú luhuva makó láa liki gizinamóma neve:

Vegi vená geza gagapílamó lagasó getokako

gohuna vená nenémo alika izegipala gululusi nene getatímó nenazo,

gohuna vená geza izegipa getamanike minoaká noanitika geza mulukagú lamaná gelezo.

Miluma gelemanitika géisi nene gogoliza vízeko gígisa zezo.

<sup>28</sup> Nígívenegita, leza Isakanímámínoko Ómasímó lo mololeta gakotó utó unimó.

<sup>29</sup>\* Hanuva utó i izegipa nenémo Sikalahulímíni gakotó utó i ve Isakani gopoguni molotake lovaga lo amimó. Ámina suni itínasa nene utó okago lo hukoko li gakokú ámegé ámegé iki hoza nale ve nenete leza Sikalahutokatí utó uní vejená gopoguni mililimiaká niave.

<sup>30</sup>\* Lá onoimóza, monó gotolaú gakó nana oko neve. Gelekélé moholímíni gipala nenémo helisa henoní ale lá aminogo ive. Alimí ame venalímíni gipalámo ezagó alítímó nenazo, gelekélé mohó megusagi gípalagi nene kimisele ahulokiko visino loko Ómasímó Avalahani lo amimó neve liki luhuva gizinamóma neve.

<sup>31</sup> Nenemú nígívenegita, leza nene Mosé lo hukoko li gakolímíni nagakú minoko gelekélé mohó megusámíni agapílamó minamune. Izesukumú gele alévolé unikeve loko alimí ame venalímíni agapílamó nouninazo, Ómasímíni helisa henoní ale lá inogo une.

## 5

### *Nagakú goha ma minamituni gakó*

<sup>1</sup> Nagá nomimó minatave loko Kílistó eza gologí oletamóma neve. Lá okanazo, nenemú vejená lugáa nenete Mosé lo huka gakolímíni nagakú goha lekelémo molokuko gelekélé ílitatave liki nilikoma géneka liki alévolé ilo.

<sup>2</sup> Neza Paulona lo likimitoze, gílilo. Lekeza Ómasímó lugutó vizítive liki lukugupeló Ómasímíni anosa milatamó nene, Kílistoní nasahílí nene lekelitoka ha netá loló inogo ive.

<sup>3</sup> Itó goha miní ameko lo lekeme lamaná itoze, gílilo: Makó keza alévolé lemetaméni alitune líki kugupeló Ómasímíni anosa milatamó nenete lo huka gakó lugáa monéna kumupíló ítekiko ámina gakó nene ámegé ámegé iki hoza alílikí vinígave.

<sup>4</sup> Lo huka gakó gele alínake lihimate asú olímíkiko minatune nilámó lekelisi Kílistogegi apíziki múnahemó nene hukíake otopá zíkago aí nasahílí nene ahulikave.

<sup>5</sup> Itó lélisi nene Sikalahulímíni zámuzaló gele alévolé uhakumú lihimate asú olímíkiko minatune loko nenémini gelegele minoaká noune.

<sup>6</sup> Izesu Kílistotoka voko gímízitunimó nene Ómasímíni anosagi lugupeló minoaká itó Ómasímíni anosa nomimó minoaká ale nupa napa okoko monéna gihíláa nomimó hutuváave loko lítune. Izesukumú gele alévolé oaká netalímó lígíkagú minókiko lígíka lígívetegíní kímítunimó nenemúkó gihílave linogo une.

<sup>7</sup> Lekeza monolímíni gapogú vatí iki ololu liki nivago ve makolímó nana oko gapo hize lí olíkímíkago gakó gihíláa lekemegeza amíake gílí alísá amave.

<sup>8</sup> Sele lo líkímí ve nenémo gala vízeko lá ilo loko loleketosá amíve.

<sup>9</sup>\* Izámíni ekesaláa lagasó makó nenémo nosá netakú vo alekiko mukí ekesá o asú itimó neve.

<sup>10</sup>Itó lekeza není nigikagukó vitave loko gulugo gena amigo lo nolukumuve. Guivahaniló voko gimizunimómave loko Ómasímini anosa lukugupeló netikumú neza nogulutíminoko lekeza gilitamó nene vo mili sigítive loko noguluve. Itó lekelémo gopa oaká noi ve nene Ómasímo goní otanogo ive.

<sup>11</sup>Nigivénegita, neza veganalitini kugupeló Ómasímini anosagí minamítimó nene Ómasímo kugutó vizemítive loko lainim-oleketumó nelína, gopogu galatakalatá nene inítamaline. Ómasímini anosa kugupeló minative loko lo kemekogó minulína nene, Izesú zohota zaló hilimó nenémíni gakó lo nokumukumú mu kagata oaká noimó nene asú ilíne.

<sup>12</sup>Likilími gopa iaká nia ve kezáini kugupeló Ómasímini anosagó negopa, kugupenini zivi hutivi i asú itanazo.

<sup>13</sup>Nigivénegita, nagakú ma minamítave loko Ómasímo sele lo likimimóma neve. Itó nagakú minamave liki lukugupémo amu heleaká noi netalímini gelekeleléa minamilo. Likígika kimiiki eza nasahilí otiko eza nasahilí otiko iki minalo.

<sup>14</sup>\* Mosé lo hukoko li gakó ale nupa oko gotola lá oko neve: Gezakamú geleaká noanimó nenémínoko gígívekagínimú geleko gígika kemezo.

<sup>15</sup>Lekeza lá amiki izámi suni aliki eza akohú apíliko eza akohú apíliko iiki latila ikatave loko lakagata naluve.

*Litaha ligikámíni gihiláa itó Sikalahulímini gihiláa*

<sup>16</sup>Itó nenémíni itave loko noluve. Lekeza Sikalahulímo lititoka lititoka iki miliki ilo. Lá iiki litaha likígikámo amu heleaká noi netalímini hozaváa amelilo.

<sup>17</sup>\* Litaha ligikámíni lagavámo Sikalahú nene lovaga lo ameaká noive. Itó Sikalahulímini lagavámo litaha ligika nene lovaga lo ameaká noive. Lá okago, kéisi nene lova sava ikasigo, lekeza netá matá oko moloko itune liki amó nene vávani iki isá amave.

<sup>18</sup>Itó Sikalahulímo lekelémo lolo ikoma Mosé lo huka gakolímo agulizaki loló o leketaminogo ive.

<sup>19</sup>Litaha ligikámíni hozaváa nene, asuguná netá negopa, utó oaká noive. Lá oko utó oaká noive: Mokoló netá, golotuva netá, lugupémíni avoza heleaká netá,

<sup>20</sup>itó soza ómai netá agepoka loaká, gípe lakegusani, mukahá kepeleaká, lovasava, kemekugú noaká, gulu guluga loaká, lova leta lava leta, kizapaló moloaká, lugulizaki ve loló itune liki kezáinimú gelego itekago amuza miliaká, itó miní ezega emega iki otopá ziki miniaká,

<sup>21</sup>lelí itive loko molo hukoaká, itó piá nagamító minoaká, itó nosáneta goliva gilikilí iki niaká, itó netá lugáa nenémínaa aliaká niamó nene ámina netá matakumú gozapá lo lekemenoumóma neve. Itó imane goha lakagata aleko lo nolukumuve. Ámina golesa netá alítamoláa nenete Ómasímini avogísalo vi hilaminigave.

<sup>22</sup>Itó Sikalahulímini gihiláa nene lá oko utó oaká noive: Nasahilí oketoko ligika kemeaká, mulutegú agila guluma oaká, hulu oko legesó oko minoaká, kelémo lamaná oaká, ligika lamanaki minoaká, hozagú alévolé oaká,

<sup>23</sup>lemeko zou loko minoaká, itó lizapaló molamoaká nene, netá nenémínaa pelevesava zekoko gapo lotokogi nomíve.

<sup>24</sup>Itó Izesu Kilistoni veganala zuha leza litaha ligikámo amu heleaká netá, itó golesa netakumú mumuzó oaká netá nene apele helekuko haha onoimóma neve.

<sup>25</sup>Sikalahulímini zámuzalaló minoko aleko nouninazo, nenemú Sikalahulímini gapogukó liso liso vitune.

<sup>26</sup>Lugupémo itekoko eza ahelú okiko eza ahelú okiko nouko mulúikú golesa gililitata netá alemitune. Itó eza amiko eza amiko kemekugú namitune.

## 6

*Genavagi netató eza hize lé otiko eza hize lé otiko itune*

<sup>1</sup>Nigivénegita, lekelikutí makolímo monokú mígelelé onoko lihima ale utó molokíkoma, lekeza Sikalahukí minamó neneta mulutikú hulu o minoko alími hehe lalo. Lá niiki lekezatini gimilikú milatakumú limikí akíkataze, gízapa ilo.

<sup>2</sup>Gena lekepeleaká noi netá nene eza hize lé omíkiko eza hize lé omíkiko iki miniki Kilistó lo huka gakó nene vatí iki gili alilo.

<sup>3</sup>Vegená makó kugulizáini nomiti veganalíte kezáikumú giliko ititimó nenete kezáini kígikaváini agoka vizíkiko lá inogo ive.

<sup>4-5</sup> Nenemú lekeza etó etó iki mognonataganatini ániġi vevesalo. Monokú keé lamoko gopa aleaká nouni netalímġni ġenaváa mota gona molokago leza mukitó ámina netalímġni amelahove etó etó oko loló onounimó nenazo, lekeli hozámġni mognamú etó etó iki vitagá iki ali utó ilo. Lá ikiko lokogoliza vizeaká ġakó utó itimó nene, ve makolímġni mognamú negopa, lekezatini iki miliki itamó nenémo ale utó inogo ive.

<sup>6</sup> Monó ġiliaká nia veġená lekeza monó lainim-ilikimiaká nia veġená nene netá matá gona miliki kimilo.

<sup>7</sup> Lekezatini likiġikatini agoka vizemilo. Ómasi agoka vizeakaláa nomive. Ve makó keza hoza alitamó nene miniki ámina netalímġni ġihiláagó alinġgave.

<sup>8</sup> Makó keza litaha ġiġikatunú hozaváa alitamó keza miniki litaha ġiġikámġni ġihiláa latila nene ali utó inġgave. Itó makó keza Sikalahulímġni hozava alitamó keza miniki Sikalahulímġni ġihiláa alévolé kemetameni nene alinġgave.

<sup>9</sup> Netá lamanakumú nene goselekaselé aminake amuza moloko oko moloko itunize. Voko akamġtunimó nene Ómasímó mola gamenaló minumuni ale utó inogo une.

<sup>10</sup> Lá onoinazo, nenemú gamenavate noiko veġená mukitoka nasahili oketatune. Lá noinake monokú ġigive ġagave nene netá aleko iteko nenémġni oketatune.

*Kagata alike ġekémi loketamó*

<sup>11</sup> Itínasa nene luhuva ġizoaká nogosani nene luhuva ġizoaká vémini agizakutí aleko luhuva napámġni imane nezáne niġizanġtunú nogizumó nene ániġalo.

<sup>12</sup> Veġená lugáa keza ġupéinímó monó kemetameni okago lekezatini lukugupeloka Ómasímġni anosa minative liki amuza golesa miliaká niave. Keza Kilistó zohota zaló hili ġakolímogó lugutó vizitive loko lo utó oko lo kġmitunimó nene ġopoguni mililitatahe liki ġelego ġena okago, nenémġni iaká niave.

<sup>13</sup> ġugupeló Ómasímġni anosa milikimikago nia veġená keza Mosé lo hukoko li ġakó lugáa ġili alemake lekezagí anosagí miniiiki keitoka miní amikiko kezámġni ġugupenġni aliki itinġi ġiliaká niave.

<sup>14</sup> Néniisi nene nemupe manamupe nugupe aleko iteko lamuve. ġuivahanite Izesu Kilistó zohota zaló hilimómámġni ġakó nene hámakokumú sigaga lomiaká nouve. Izesú zohota zaló hilikumule loko mikasiuka netá matá hulupa loko anuva oaká netató hulumó ġelekago goha gala vizemitive. Itó ámina oko monó ġelesa veġenalite nenikumú ġilikago mota helenoumó ġelekave.

<sup>15</sup> ġugupeló Ómasímġni anosagí minoaká nenehe itó minamoaká nenehe nenémo ġihila nomive. Gosohá lemetamenġi minoaká netá hámakó ġihiláa neve.

<sup>16</sup> Ámina lakanġiġú miniki aliki iaká niamoláa lekelitoka Ómasilokatí hulu itó agika lamaná lehizeleketatimó mino-loko iteko minatimó nene Ómasímġni veġená mukitoka minino.

<sup>17</sup> Láa loko lo nahuluve: ġopoguni milġnitake niġilikago nuhú imane nego neza Izesuni meġusava noumó nenémġni mognáa utó oaká noimó nenazo, ġakó imane lo nolukumumó nenémġni velé amupiló ve makolímó silipa hoza goha nememino.

<sup>18</sup> Niġivénegita, ġuivahanite Izesu Kilistotokatí nasahilímó likiġikagú mino-loko voko minino. Lamaná.

## Epeso Vegenalitini Luhuva Pauló Gizo Kimimó

*Epeso vegená nónohá kimike gizo kimi gakó*

<sup>1</sup> \* Neza Paulona Ómasímini gakotó Izesu Kilistoni aposolo loló utímina Epeso numutoka monó gele vegená Izesu Kilistoni monokú alévolé iki miniaká nia vegená lekeza luhuva netá imane gizo nolukumuve.

<sup>2</sup> Ameteho Ómasi itó Guivahanite Izesu Kilstó aitokatí nasahilí itó hulu lekelitoka mino moloko minatize.

*Kilistotoka gímizunimómave loko monó lusa haitopaitolímini lehizeletamó*

<sup>3</sup> Guivahanite Izesu Kilistoni amelaho Ómasi áisi nene nónohá zeletake okulumakutí monó lusa haitopaitolímini Kilistotoka voko gímizunimómave loko lehizeletamó. Lehize-likumú geké lotatunize.

<sup>4</sup> Áisi nene gozapá ká eláa mikasímini guhaiváa utó onamigo ezáa avogisalo apazá etó iki keké vizikigó minatave loko Kilistotoka miní amitave loko lelémo etó imó. Lá ike, agika limike,

<sup>5</sup> ganatili gelekago minakumule loko Izesu Kilistoni nasahilí oletake kelémo lá okugo aí izegipala minatave loko lo hutamó.

<sup>6</sup> Eza gipala gihila áisi lapanalagi nasahililagímo hagitana oko lehizeletamó. Nenemú geké lotoko minatune.

<sup>7</sup> \* Izesú eza golanivatunú meinavate hizelimiake gologí oletake golesa netate gilatoletamó. Nenémini nasahililáa lelitoka ohunagi minokave.

<sup>8</sup> Nene avevezahaló ohunagú ligikagú luhuvagi itó geleká gihiláa napa oko leke vizeletamó.

<sup>9</sup> Lá ike ezáa agikatunú gele minamómámini asuguná gakó ganatili geleave láa loko lo hukoletake ale vesamá okave:

<sup>10</sup> Eza gamenamú giligo minamó nene alitikiko Kilstó nene netá matá mukí okulumakú neha itó mikasiuka neha ale nupa napa nenémini gotoláa loló itive loko lo molamó.

<sup>11</sup> Itó netá matá mukí nene Ómasímo ezáa agikatunú gilike lo hukató aleaká noi ve áisi gozapá ganá agata gilike lo hukoletató monó helisa henoni ali alitave loko lelémo etó imó.

<sup>12</sup> Nenemú ganá apí oko Kilistokumú lagata losi gelemoko ageva oaká uni vegená leza Ómasímini lapaná ale oteko minatune.

<sup>13</sup> Itó lekeza ámina iki gakó gihiláa lukugutó vizi gakó lamaná nene giliake, Kilistokumú gili alévolé ikago, lo mololetató nene Sikalahú ganatili lehizelikimikago Ómasímini anosagi líl inamóma neve.

<sup>14</sup> Okulumakú Ómasímini monó helisa henoni ali lá itave loko gozapá lo huko mololetamómámini zazaváa nene Sikalahú lehizeletamó. Itó aí vegenala zuha lelí meina hizelimiaká hozaváa apí imó nene aleloko voko ale lutiginogo ive. Nenémini mognáa gele vevesatune loko Sikalahulímini anosagi nominune. Nenemú Ómasímini lapaná ale oteko minatune.

*Epeso vegenakumú Ómasiloka limó*

<sup>15</sup> Nenemú lekeza Guivahani Izesukumú gili alévolé iake monó vegená likigivetikini likigika kimiaká niamómámini gakola gelekukeve loko,

<sup>16</sup> lekelikumú Ómasi agepoka loaká noumú nene ahulosá amuve. Lekelikumú láa loko Ómasiloka loaká nouve:

<sup>17</sup> Guivahanite Izesu Kilistoni amelaho lapanalímini amelaho Ómasi áisi nene Sikalahú lehizeketoko likigika alémo vávani okoko Guivahanímini mognáa lo lekemekiko gili guni iki netá mogonamú gili vevesiki gilitaze.

<sup>18</sup> Lá níiki likigika lakagata ale koló okiko, Guivahanímo lekelémo otopá zimómave loko okulumakú gonanalísímú lakagata losi gelemiki ageva iaká nia netakumú gilitave. Itó vegenala zuha lekeza monó helisa henoni asaivagi ali lá itakumú gilitave.

<sup>19</sup> Itó leza gele alévolé uhatoka amuza sipisi alévolé helisatunú hoza aleaká noimó nenémini napavamú gilitave loko Ómasiloka loaká nouve.

<sup>20</sup> \* Ámina alévolé zámuza sipisitunú nene Kilstó hilikutí mómoká oko alémo oteake okulumakú agizani lamagaloka alémo molokago,



<sup>21</sup> kiapege itó gamani itó ve napa itó amuza ve iti minamó haitopaitolímini keí ve uvóipo ahulokimikago mina vegeñalítini kugulizá nene lemeko noígo, aí agulizaláa mino veletó oko neve. Itó itíñasagó nomive. Alike utó iti gamenaló iteko minanogo ive.

<sup>22</sup> \* Itó Ómasímo netá matá mukí nene Izesuni heumauka mulisi moloketake ámina netalímini gotóini loló itive loko hize otemiake vegeñala zuha lelitoka alémo molamó.

<sup>23</sup> Itó monó guluni vegeñá leza Izesuni agupe makó loló okuko lelitoka gizapa noletago, netá matá mukilímini agikagú mino vaí oko noi vémini agikagú minoko aleko oaká nouné.

## 2

### *Lemeni heleneikutí lelémo mómoká imó*

<sup>1</sup> \* Lekeza gozapá nene hokolizá pakalizá iki lihimatinigi minikagove liki lekemeni hele vimó minamole.

<sup>2</sup> Nene gamenaló nene lekeza mikasímini gapo golesagú nivake, vogalaló zámuzagi netá matalímini gizapa ve golesaló gímiziake ámegetiaká amó. Aí ametamenímo itína gamena nene Ómasímini gakola pelevesava ziaká a vegeñatoka hoza aleaká noive.

<sup>3</sup> Leza gozapá kezagítana oko minunike, litaha ligikámini lagaváa ámegetoko loló oko lugupémini itó geleakalímini gakoláa gele alekunike, vegeñá lugáa minamó nenéminoko Ómasímini mesahaváámini mututoni loló unimó.

<sup>4</sup> Lá oko minuháza, Ómasi áisi nasahilila mukí minokagove loko nasahilí sipisi oletake agika limimó.

<sup>5</sup> Lihimategi minunitímo lemeni heleloko vimó nominuko, Kilistogegi lelémo mómoká okago, otunimó. Gilinahe. Ómasímini nasahililatunú lugutó vizimó.

<sup>6</sup> Itó Izesu Kilistotoka lelémo gímizekago ligikáa lemeniatunú áisigi mota okulumakú minoko aleko oaká nounimó gelekave.

<sup>7</sup> Nene alike gamenaló utó omo omo iti gamenaló nene agika hize limike Izesu Kilistoni nasahilila ohunagi limimó nene ale vesamá oletanogo lá imó neve.

<sup>8</sup> Gilinahe. Eza lugutó vizimó nene aí nasahilitunú neve, itó Izesunimú gele alévolé unimómave loko neve. Nene lelí amuzatunú nomive. Ómasímo hagítana lehizeletamó.

<sup>9</sup> Nana hoza ale minuko nenémini oletamó neve. Nene ma nomive. Nenemú lugupe aleko iteakaláa nomive.

<sup>10</sup> Leza Ómasímini agizani luhuva nouko, ezáa Izesu Kilistotoka miní amunikeve loko mogona lamaná lilí itave loko lelémo utó molamó. Itó neneló lisi lisi iki vitave loko gozapá ámina gapo veletetamóma neve.

### *Kilistotoka miní amunikumule loko lelémo hamó onoimó*

<sup>11</sup> Lekeza gozapá hetoka vegeñá minamó. Itó Zuta vegeñá keza kugupéitó Ómasímini anosagi minamó nenete lekelikumú aliki mumusopa ziki anosagi nomi vegeñá niave liki liaká amóza, ha kugupémini anosamú linamóma neve.

<sup>12</sup> Nene gamenaló lekeza Kilistogegi apiziki minamake otopá ziki minamó neve. Itó Isilae vegeñá lelí mulusigú minamake, lekeza hanuva gutá minamó neve. Itó Isilae vegeñá kelémo molokago keza lo múnahi gakó lo moloketamó nene ali minikago, lekeza amegesaloka minamó. Imane mikasiuka nene netá gihilamú ageva gemake Ómasigi minamamóza,

<sup>13</sup> nene gamenaló lekeza hotoka gihisigú minakutí itína gamena nene Izesutoka miní ameki Kilistoni golanímo geisa mikú lekelémo molokago imi anitiki niave.

<sup>14</sup> Ezáa nene nonagá itave loko lelémo apizeaká ve noive. Itó leza Zuta vegeñaki lekeza hetoka vegeñaki holutegú logoka hotopotó okago minuhalímini geisa nene aleko tele vizeake lelémo hamokú molamó neve.

<sup>15</sup> \* Itó Mosé lo hukoko li gakolímini agikagú nene alilo alemilo liki haitopaitó gakó linamó nene ezáa agupe ahulake mukitó ipá oko ale ahulokamóma neve. Lá oake, Zuta vegeñaki hetoka vegeñaki mulusi lositá lelí holutegú minoko aitoka gímizunimómave loko ezáa lelémo gosohá vegeñá hamokó loló oake minake nonagá ale utó imó.

<sup>16</sup> \* Eza zohota zaló nohilike, vegeñá mulusi lositá lelí lovasava oko minunimó nene apele heleake, Ómasigi lelémo mukipa imó.

<sup>17</sup> \* Lá oake, gihisigú minamó hetoka vegeñá lekeza itó geisa mikú minunimó Zuta vegeñá leza mukitoka hulúmini gakó lo lemekago gelekune.

<sup>18</sup> Lá oake, gapo velelimikago, leza Zuta vegeñaki itó lekeza hetoka vegeñaki Sikalahú hámakolímo gapo velelimikago, ametehe noitoka vo anitesá neve.

<sup>19</sup> Nenemú itínasa gamenaló nene lekeza hanuva hepelaloka gutá ve minamave. Lekezagi monó vegená lugáagi Ómasímini apá amelage noune. Itó Ómasímini vegenala zuha loló oko noune.

<sup>20</sup> Aposolo itó Ómasímini agepagutí gako loaká ve leza lukesava loló oko nouko, nenetini lumupiló hize lé olíkímikago miniliki viki niave. Itó Izesu Kilistó nene numuni lapusaváa loló oko noive.

<sup>21</sup> Numutó namató vegená Guivahaniloka miní amekuko, aí apazá zagusave utó oloko voko napa oaká noive.

<sup>22</sup> Sikalahú nenémo lekezagi ámina oko aitoka lekelémo miní amekago, Ómasímini numuni apá lilí ikago mulutikú minoko aleko oaká noive.

### 3

*Pauló hetoka vegenakumule loko monó hoza alimó*

<sup>1</sup> Itó neza Paulona nenemú hetoka vegená lekelikumule loko Izesu Kilistoni gelekeleláa minuke nagá numukú nouve.

<sup>2</sup> Lekeza nenikumú nene Ómasímo nasahililatunú oko lekelitoka monó hoza alitane loko lonetonoimóma neve liki gilinave loko gelenouve.

<sup>3</sup> Eza asuguná gako amegesáa lo utó moloko lo nimimó neve liki mota gilinave. Ámina netakumú goí oko gako alínipáisí gizo lukumumóma neve.

<sup>4</sup> \* Lekeza ámina gako gatiki nigiliki neza Izesu Kilistoni asuguná gako amegesáa nene nigikatunú gele vevesoko gelekuke ángoaká umoláa lekeza gilitave loko vesamá oko ámina luhuva gizo lukumumóma neve.

<sup>5</sup> Ámina asuguná gako amegesáa nene gozapá miniliki va vegenatoka utó amimóma neve. Apazá aposolo itó Ómasímini agepagutí gako liaká ve lelitoka alika Sikalahulímo lo utó moloko limimó nene láa loko neve:

<sup>6</sup> Gako lamaná lo molamó nenémini gihiláa nene Zuta vegená minamamolaloka itó Zuta vegená lelitoka hámakó avevezahaló mulusi hámakó loló oko mininake Izesu Kilistokumule loko lehizeleketatove loko lo mololeta netá izá moloko alekuko lelí mututoni itive loko lonoimóma neve.

<sup>7</sup> Itó ámina gako lamanalímini gelekeleláa loló itane loko Ómasímo nasahililatunú oko aí zámuzaló moloko gele minake nenitoka ale utó molonoimóma neve.

<sup>8</sup> Monó gele vegená limiki minakutí neza lemeko minumolámina Kilistotokatí minumuni gatoko gato asú amokalímini noimó nenémini gako lamaná nene Zuta vegená minamamoláa lo utó moloko lo kimitane loko nenémini hoza gako lonetonoimóma neve.

<sup>9</sup> Ómasímini asuguná gako amegesáa nenéminoko hozaváa aleko ale asú itove loko agata gili mogona nene neza lo utó molokugo vegená mukitoka gilitave loko lonetonoimóma neve. Nene Ómasi eza netá matá mukí ale utó onoi vémo ámina asuguná gako amegesáa nene ezáa agikagukó halá geloko voko minamó.

<sup>10</sup> Láa loko Ómasímo agikatunú gilimó gihiláa nene Ómasímini vegenala zuha leza itína ale vesamá okuko, Ómasímini gele vevesoakaláa haitopaitolímini nene okulumakú agelóini kugulizaki ve niamó itó amuzáiki ve niamó keza ángiiki gili guni itave loko halá geloko voko minamó nene,

<sup>11</sup> Ómasímo eza gozapá netá matá ale utó onamike agikatunú lo huko mololoko iteko minamó nenémini gihiláa nene Guivahanite Izesu Kilistoni amiselekago ale utó molamó.

<sup>12</sup> Aikumú gele alévolé okuko gapo veko lovolovo zetelamó nenemú lelegesá legemiko Ómasímini avogisaló vitune.

<sup>13</sup> Nenemú láa loko lo likimitoze, gililo. Neza lekelikumule loko gasovagi netalímini amupiló nominugoma, likigika lememinó. Lekeza nenemú giliko gonanalisi netatini loló ino.

*Kilistó agika limitímini mogona gilitave loko Ómasiloka limó*

<sup>14-15</sup> Nenemú nene okulumakú miniliki varó itó mikasiuka minoloko vunimó mukilitini ameteho gihila aí nalapusa hizeko gupá ze ameko lekelikumú numuna láa loko loaká nouve:

<sup>16</sup> Ómasímo eza ohunagi lapanalatunú Sikalahutoka lokago lemeko zámuzá ale utó molo-likimikiko, likigikatini napa alévolé itive loko,

<sup>17</sup> itó Kilistokumú gili alévolé iminatímo eza mulutikú minoko aleko itive loko, itó agika likimitímo luhusatini ale gilitoko lukesalini loló okiko,

\* 3:4: Kolo 1:26-27

<sup>18</sup> lekezagi itó monó gilina vevená lugáa mukitoka kezagi Kilistó agika limimó nenémo livilege zaká maká oaká noikumú gili guni iki gilitave loko,

<sup>19</sup> itó Kilistó agika limimó nenémíni mogonáa nenémo vevenalita geleaká nene avilege zaká maká oko nemó nenemú hanuva gili guni ikiko, Ómasímíni agikagú laga netá vaí oko noimó nene lekezatini likigikagú vaí oko minative loko Ómasiloka loaká nouve.

<sup>20</sup> Ómasi eza ligikagú hoza aleaká noi zámuzalatunú eza oko moloko oaká noitimo loká oaká nouni netá itó lagata geleaká nouni netá avilege zaká maká oko golivagi netá loló iti vémini luhuva hutilí ino.

<sup>21</sup> Aí vevenala zuhalita oko moloko itunimó itó Izesu Kilistó oko moloko noimó nenémo Ómasi geké lotatunimó nene omolelé amalelé oko lagapilamotoka minoloko iteko minino. Lamaná.

## 4

### *Sikalahulímo lelémo hamó ikú minatune*

<sup>1</sup> Neza Guivahanimule loko nagá numukú noutímína lakagata aleko lo likimitoze. Ómasímo iteko mína netató sele lo likimimó nenémíni sisihetokó miniki aliki ilo.

<sup>2</sup> \* Lá níiki likigika aliliki limíki mulutikú geha ziko hulugú miniki goselé likipiliti netá alilikitatakumú goselé lekepelemiko legesó iki likigika kimiki minalo.

<sup>3</sup> Itó hulúmíni nagalatunú múnahелеketamóma neve. Nenemú ámina nagá hukikataze, eza gizapa otiko eza gizapa otiko iki Sikalahulímo lekelémo hamó ikú nene minalo.

<sup>4</sup> Ómasímo okulumakú helisa henoni hámakokumú lakagata losi gelemiki ageva iki minatave loko sele lo lekemeneimómáminoko mulusi hámakó nouhá itó Sikalahú hámakó neve.

<sup>5</sup> Guivahani hámakó noive, itó monó hámakokumú gele alévolé oaká nouhá, itó monó nagamí hámakó holoaká nouve.

<sup>6</sup> Itó mukitó ameteho Ómasi hámakó noive. Áisi monéna mukitoka livilege zaká maká oko noive. Itó etó etó oko zámúza limike hize lé olimikago aí hozaváa aleaká nouve. Itó eza mulutegú etó etó oko minoko aleko oaká noive.

<sup>7</sup> Kilistó eza lehizeleta polosava monolímíni zámúza etó etó oko ale minoaká nouve.

<sup>8</sup> \* Nenemú nene monó gotolaú luhuva gakó makó láa loko neve: Eza veletoka mezane noitike nagá numukú minamoláa kigizató alike kelémo otimó neve. Itó monolímíni zámuzala nene vevená lehizeletamóma neve.

<sup>9</sup> Veletoka itimó nenémíni mogonáa lá oko neitive. Eza mikasi agikagú lemeneikutí atiginá oko itimó.

<sup>10</sup> Itó ámina limi ve nenémo atiginá oko okulumá avilegemo avilegemo itimó nene aí ametamenimó okulumakuki itó mikasiguki mino gikí oko minative loko iti ve noive.

<sup>11</sup> Itó monolímíni zámúza lehizeletamó nene vevená lugáa nene aposolo lelémo molamóma neve. Itó lugáa nene Ómasímíni agepagutí gakó liaká ve itó lugáa nene Izesuni gakó lamaná li hutilí iaká ve itó lugáa pastoli ve itó monó tisa,

<sup>12</sup> keza monó gilina vevená mukitoka kelémo vatí ikiko keza monolímíni gelekeleléa minatave loko itó Kilistoni mulusi leza monokú voko napa itune loko vevená nenémínioko lelémo molamóma neve.

<sup>13</sup> Lá oká lá oká oko hozaváa aluko gele alévolé oakate itó Ómasímíni gipalámíni mogonáa geleakate nene hutilí iko ligika hámakó miniko monokú alévolé oko Kilistoni ametamenigítana ale luhokinake napa oloko ititune loko ámina zámúza lehizeletonoimóma neve.

<sup>14</sup> Itó lá okiko leza namuni molokoko minaminake amúza moloko nouko logoka viziaká ve keza soza sazagi li limikiko, soza saza gakóinímíni hepeláamo lelémo mómoká okiko neneló gímizitupe neneló gímizitupe lokatunize.

<sup>15</sup> Leza ligika kemeko gakó gihiláa loloko vinake matute loló oko noi ve Kilistotoka gímizekinake alévolé itune.

<sup>16</sup> \* Aitoka miní amekuko amelaho vémo múnaha lamaná olimikiko apize lamaná oko mininake aí agupémíni gelekelela mininake agisa agizani loló itunize. Lá noinake zámúza limi avotigí alenounimó neneló moloko lamaná oko hozaváa alinake ligika kemeakalímíni nasahilikú napa oloko vitunize.

### *Litaha lemetameni ahulokinake gosohá lemetameni ale luhatune*

<sup>17</sup> Nenemú neza Guivahanímíni avogisaló lakagata aleko lo likimitoze, gililo. Hetoka vevená lugáa keza kagata giliaká niamó nene ha netakumukó giliaká niave. Keikitana iki miniki aliki amilo.

<sup>18</sup> Keza nene kigika kagata koló amigo negi nagi hiziki kigika hize lí okago niakumú Ómasilokatí alévolé kemetameni alita netá kemegeza amikave.

<sup>19</sup> Itó kigikáini hize lí okago netá golesamú kovoza ma helesá amigo, mokoló netalímini agikagú niake, golotuva netá haitopaitolíminimú kumu helekago goselé kepelemigo lilí iaká niave.

<sup>20</sup> Lekelisi nenéminiki minatave loko Kilistoni mogona lo lekemesá amuháma neve.

<sup>21</sup> Aí mogaána lo lekemenouháma neve. Itó Kilistotoka víki gimizikago aitokatí gakó gihiláa lainim-oleketuko gilinamóma neve.

<sup>22</sup> \* Litaha lekemetamenigi miniki aliki iaká ago itó lukumu hilimó nenémo soza lokoko lokogoka vizekego lapuluva oaká imó nenazo, ámina litaha likigikama gololohá ilo.

<sup>23</sup> Itó likigika lakagata alémo gosohá lilí ikiko minino.

<sup>24</sup> \* Ómasímo gosohá lekemetameni ale utó imó nene ezáa ametamenigi miniiki hee hee loko minoaká itó etó oko keké vizeko minoaká netá ali utó milata lekemetameni nene ali luhalo.

<sup>25</sup> \* Nenemú lekeza soza saza ahulalo. Leza apize lamaná unike aí nagá loló okuháma nenazo, nenemú gakó lamanakó eza lo amiko eza lo amiko iki minalo.

<sup>26</sup> \* Mesahagú miniki lihima alikataze. Mesaha oká likizapaló moloká iki niko ho nene lememino.

<sup>27</sup> Lá itamó nene Satani nene gahe sigitaminigave.

<sup>28</sup> Gumina aliaká a vegealita ámina netá ahuliiki likigizanitunú hozaváa amuza miliki aliiki nosánetatini henokanotini ali utó miliki vegená ámemena nasahilí okekatune liki ámina zámuzagi minalo.

<sup>29</sup> Ulínaka gakó lekegepagutí makó lamilo. Gakotini gilita vegeiná kelémo lamaná itune liki gakó lamanakó liki eza hize lé otiko eza hize lé otiko oaká gapomú vitagá ilo.

<sup>30</sup> Ómasímini Sikalahú nene nemú manamú liki ahelukulú amilo. Aí nene gamena napaló nene asele zeletatimó nenémini zazaváa minative loko lehizeletonoimóma neve.

<sup>31</sup> Ekesá gakó mesaha gakó mukahá gakó itó vivi vovoga aleko letovo oaká gakó nuvane giliki gili ahulalo. Itó lova likigika amino. Itó likizapaló molamino.

<sup>32</sup> \* Lekeza likigika geha ziko likigika eza amiko eza amiko iki apizi lamaná iki minalo. Ómasímo Kilistokumule loko lihimavatini ahuleketamómáminiki eza lihimavala ahulotiko eza lihimavala ahulotiko iki minalo.

## 5

### *Lapanalímini luhuva loló inake nenémini avevezahaló minatune*

<sup>1</sup> Lekeza Ómasímini izegipa gihila minatita aí avevezahaló minalo.

<sup>2</sup> \* Lá niiki likigika kemeakalímini agikagú miniki aliki ilo. Kilistó eza ámina oko agika limike lelikumule loko agupéa latila imó nene Ómasi guguni gizo amigo Ómasímo anuva giligo lamaná imó neve.

<sup>3</sup> Lekeza monó vegeiná nianazo, mokoló netá itó musi netá itó mulutikú nihunihu nene lekelí holutikú utó amino.

<sup>4</sup> Itó ulínaka negi gakó giza zohí gakó golesa litamó nene etaminogo inazo, ámina netá ahuliiki Ómasi agepoka liki minalo.

<sup>5</sup> Lekeza láa liki gili alévolé iki gili minalo: Mokoló vehe itó musi netató vehe itó mulúikú nihunihuló ve mulutikú nihunihu nenémo soza ómai netá ámegetoakaláa geleneimó nenazo, ve nenémináa keza Kilistoni itó Ómasímini avogisaló miniki aliki ita netakumú nene vitagá itamóza, ma aleminigave.

<sup>6</sup> Golesa netá nenémináamú nene Ómasi gili amema vegeinatoka Ómasímini mesaha utó inogo inazo, lokogoka viziki lekelitoka soza saza gakó li likimikikoma, giliko gihiláa loló amino.

<sup>7</sup> Nenemú lekeza vegeiná nenémináagi mini apiziki minamilo.

<sup>8</sup> Lekeza gozapá límuagusigú minamóma nemóza, itína nene Guivahaniloka gímiziake lapanatinigi lilí iake niave. Nenemú lapanalímini luhuvaváa lilí iiki nenémini avevezahaló minalo.

<sup>9</sup> Lapanalímini gihiláa lá oko utó oaká noive: Ligika lamanaki minoaká itó hee loko minoaká itó gakó gihila loaká,

<sup>10</sup> nene netá matá oko moloko itune loko Guivahanímo giliko lamaná iti netakumukó vitagá ilo.

<sup>11</sup> Lugáate límugúsímíni netala itó hutuváa lílí nikoma kezagi mini apiziki minamilo. Lekeza ámina netá golesáíni nene ali hanatalo.

<sup>12</sup> Netá asugunatoka aliaká niamó nene lovoza heleaká netá nenazo, nene gakó lami-tune.

<sup>13</sup> Netá nenémináa ale hanatokuko, lapanalímo hize hanatokiko, utó o lamaná inogo ive.

<sup>14</sup> Itó utó oaká netá nenémináamo nene lapanaki loló itímó neve. Nenemú monó gakó makó láa loko nemóma neve:

Lokovó akina ve lekeza otilo.

Itó hilínita ve lekeza mómoká iki otilo.

Kilistó nene hize hanatoleketanogo ive

líki luhuva gizinamóma neve.

<sup>15</sup> Nenemú lekeza miniki aliki itatoka nene gizapa etoha iki minalo. Itó negi nagi hiziki minamikí gili vevesiki minalo.

<sup>16</sup> \* Itína gamena nene golesa netalímo hutílí onoinazo, nenemú netá lamaná aleaká gamena utó olíkimitímó nene ma líkivilegemino. Gamena ha okatize.

<sup>17</sup> Negi nagi netá lílí iki minamikí, Guivahanímo lititoka molatitoka iti gapomú vitagá ilo.

<sup>18</sup> Piá nagamikumú lekemeni zemilo. Nenémo nene líkigikatini ale gopa okatize. Ómasímíni Sikalahú nene líkigikagú mino vaí ino.

<sup>19</sup> \* Ómasi agepoka lílí iki ipá apá nama itó monó nama itó Sikalahulímo lekelémo vávani iko gosohá nama eza lo amiko eza lo amiko iki líkigikagú Guivahani agepoka lí amiki nama líki lokogoliza vizí vizí iki minalo.

<sup>20</sup> Lá níiki Guivahanite Izesu Kilistoni agulizá iki mukí netakumú gamena gamena Ómasi ametehíni agepoka lílí iki minalo.

*Ve aleve iki míliki ita gakó*

<sup>21</sup> Lekeza Kilistoni goliva gilitiki eza gelekelé otiko eza gelekelé otiko ilo.

<sup>22</sup> \* Vená lekeza vatinitini kagahaisiuka niminiki Guivahanímíni agahaisiuka niminamó loló ino.

<sup>23</sup> Kilistó eza vegenala zuhatini gotóini minake ale nupa oko gizapa olimiaká noive. Agisa agizani agupéa leza nene nouko eza lugutó vizeaká ve noive. Vená keza ámina iki váinitini kígnaló niave.

<sup>24</sup> Nenemú Ómasímíni vegenala zuhate Kilistoni agínaló niamó ámináminiki venatini nenete minimi limiki váinitini kagahaisiuka minataze.

<sup>25</sup> \* Ve lekeza venatini nene líkigika kimitamó nene Kilistó monó gele gevenakumule loko agika limike agupe latila ike hilimómáminiki líkigika kimilo.

<sup>26</sup> Kilistó lá imó nene vegenala zuha kelémo etó okiko golotuva netá keitoka minokative loko itó monó gakolatunú nagamí zekoko lusa gekiko

<sup>27</sup> ezáaloka ale akolotake líkigika gizopa lo minikogó lihima nomimó etó ikigó minatave loko hilimó neve.

<sup>28</sup> Itó ve lekeza lekezatini lukugupemú miluma giliaká niamó ámináminiki venatinimú milumáini giliki líkigika kimilo. Lekelikutí makolímóhe makolímóhe venalamú miluma geleko agika amitímó nene ezáa agupemú nene miluma giliti netá loló inogo ive. Ve makolite kugupenini mukahá apilisá amave.

<sup>29-30</sup> Leza lugupeva gizapa lamaná otunike nosánetá amekogó minoaká noune. Leza Kilistoni agupe agisa agizani nekisáa nounimómave loko aí vegenala zuha ámináminoko gizapa olimiaká noive.

<sup>31</sup> \* Nenemú monó gotolaú gakó makó lá oko neve: Ve makolímóhe makolímóhe izolahiko amelahiko ahulokimioko venalaloka voko gímizékiko keza kugupe kígika míli hámakó iki minatáive.

<sup>32</sup> Itó ámina gakó amegesáa halá ge minamó nene Kilistó itó vegenala zuhaloka voko alekative loko noluve.

<sup>33</sup> Nenemú ve lekeza mukitó nene lukugupelinimú giliaká niamó ámináminiki venatinimú giliki líkigika kimilo. Itó vená lekeza mukitó nene vatini kugulizáini ali otiki kilími napa ilo.

## 6

*Izegipagi izóike améike iki míliki ita gakó*

1 \* Mohó gipa lekeza Guivahanimule liki izotikini ametikini gelekelé ikitiki keí gakoíni gili alilo. Nenémo nene lekelí gapo loló onoive.

2 \* Geza izokahiko amekahiko kugulizá ale otezo loko li gakoímo gapo lota gakoíni nene ámina gakoíni ganá miní ameko lo mololetamómagi neve. Láa loko lo mololetamóma neve:

3 Lá itanimó nene mikasigú mino lamaná oko gamena hána mino-loko voko minanogo ane, loko lonoimóma neve.

4 \* Itó izoíkita améikita lekeza nene mohotini izegipatini keza kizapaló molati netá lilí ikitamilo. Guivahanímini monokú kagata aliki kilími hee hee liki gakoí gilitave liki kagavutó zilo. Lá iki gizapa nikitiko monó gapogú viki napa itaze.

*Gelekelé vejenaki kugulizaki vegi iki miliki ita gakoí*

5 \* Gelekelé izegipa lekeza mikasiuka kugulizaki velini gelekelé ikitiki gakoíni gili aliiki likigika lamaná ominiko lá ikitalo. Lá níkoma Kilistoni gelekelé nitamó nene gilingo ive. Itó keikumú giliko gena noikoma legesó iki miniki gakoíni gililo.

6 Lekeza nene kugulizaki velini lukugupe lekememi kimiiki gelekelé nikitiko hanuva lelí ánigi lamaná itave likigopa, leza Kilistoni gelekelé nenémináa minatune liiki Ómasímo lititoka molatitoka iki lá ilo.

7 Vegenakumú hoza nalune likigopa, Guivahanimú nalune liiki mulutikú lamaná giliiki hoza goselekaselé amiki alilo.

8 Lá níiki gelekelé izegipa niamó itó kugulizaki ve lilí iki niamó keza mogona lamaná lilí iki minatamó nene, Guivahanímo nenémini helegáa ámináminoko meinaváa kiminogo ive liki gili minalo.

9 \* Itó lukugulizaki ve lekeza gelekelé izegipatini nene ámina iki kilími lamaná iiki gamuni iki ahulikitalo. Lá níiki láa liki gililo: Gelekelé izegipatinigi itó lekezagi nene okulumakú Guivahani ametipo hamokó noive. Eza itiki minamó limiki minamó mukikumú giligo hamó lelegitokó niave.

*Ómasilokatí gimisi magé lova netá ale ligizakú molatune*

10 Lo asú oko litoze. Guivahaniloka viki gimiziiki aí zámuza napa lekelitoka neiko nenémini agikagú miniliki viki alévolé ilo.

11 Satá nene asugunatoka logoka vizeaká suni alinogo noiko nene helisa aliiki nitatotí nene amisele ahulatune liki Ómasilokatí gimisi magé lova netá ale likigizakú miliiki gizapa iki minalo.

12 Leza hanuva lugupegi vejenaki lovasava osá amune. Kugulizaki ve napa itó guivahani alévoleláa imane limugusi gamenaló gizapa ve niamó kugupe nomimó ánigamoakalímini golesa netá okulumá sepenauka niamó kéisi lova ali limiaká niave.

13 Lá niamó nenazo, nenemú lekeza Ómasilokatí gimisi magé lova netá ali asú iki miniiki lova golesaló amuza miliki niko gala ve keza iki lou níiki vikiko lova hizi asú itató nene lekeza áminaló alévolé iki minanigave.

14 \* Lekeza lá iki otiiki minatave loko noluve: Gakoí gihaláa getelini loló noiko, Ómasímini avogisaló lihimatini asú olikimikago minatamó nenémo apitiniló geha sioti loló okiko ali luhíiki minalo.

15 \* Hulúmini gakoí lamaná ali guni iki ali minatamó nenémo likigisa suú loló okiko lisi gikitíiki minalo.

16 Lá níiki izolahináa napa nene Ómasimú gele alévolé atímo lagelini loló okiko, gamena gamena likigínagú miliiki niko, golesa netalímini amelahóa gimisivagutí magelámo satokiko magelímini loláa lihátize.

17 \* Lá noiko, aenitunú akilitini agulizaláa lekelémo lukugutó vizeaká netá nene ali hitiiki Sikalahutokatí Ómasímini gakoí nenémo sopoló hánalini loló okiko ali minalo.

18 Lekeza gamena gamena Sikalahulímo lekegepa ale vávani noiko Ómasiloka miní ami amiki líki voká liki minalo. Itó zozozogo vizemiki goselé lekepelemiko gizapa iki minalo. Lá níiki monó gele vejená mukitoka keikumú numuna hoza alilo.

19 Lá níiki nenikumú nene Guivahanímo negepáne ale vávani okiko Izesuni gakoí lamaná goí oko asuguná oko minamó nene negepa atilínake vávani oko lo utó molative liki lekeza numuna lílo.

20 Neza ámina gakoí lamanakumule loko gakoí lo utó utó ve nagá numukú noutímina Ómasímo lonetatíminoko nelegesá legemiko lo utó molative liki nenikumú Ómasiloka lílo.

\* 6:1: Kolo 3:20 \* 6:2: Gá 20:12; Gapo 5:16 \* 6:4: Kolo 3:21 \* 6:5: Kolo 3:22-25 \* 6:9: Kolo 4:1 \* 6:14: Isa 11:5, 59:17 \* 6:15: Isa 52:7 \* 6:17: Isa 59:17

*Gekéini loketamó*

<sup>21</sup>\* Minoko aleko noumó nenémini mogaáa itó hozaváa aleaká noumó nenemú gilitave loko Tikikó nene voko gakó lo likiminogo ive. Eza ligiviteho gihila Guivahanímini gelekelé izegipala hozagú alévolé oko mina ve

<sup>22</sup>\* áisi lelí gakoláate lo lekemeko mulutikú ale lamaná itive loko amiselekugo núane noviye.

<sup>23</sup> Ómasi ameteho itó Guivahani Izesu Kilstó áisi nigive nagave hulu ale utó mololeketoko gele alévolé oakatini ale hutilí olikimiko likigika eza amiko eza amiko iki minatave loko noluve.

<sup>24</sup> Guivahanite Izesu Kilstotoka gímizi lamaná iki likigika amiaká nia vegená lekelitoka Ómasímini nasahilí nenémo mino moloko minino.

## Pilipi Vegenalitini Luhuva Pauló Gizo Kimimó

*Pilipi vegená nónohá kimike gizo kimi gakó*

<sup>1</sup>\* Neza Paulona itó Timotiki makó nousike Izesu Kilistoni gelekeleléesa leza Pilipi numu-toka vegená Izesu Kilistokumú gili alévolé iake Ómasímíni vegenala zuha lílí ina vegená itó pastolígí itó monolímíni gelekele végi lekeli pépa imane luhuva gizo nolukumuve.

<sup>2</sup>Ómasi ameteho itó Guivahani Izesu Kilistó aitokatí nasahilí itó hulu lekelitoka minoloko voko minino.

*Pilipi vegenakumú Ómasiloka límó*

<sup>3</sup>Neza lekelikumú gele-loko novuke Ómasine agepoka loaká nouve.

<sup>4-5</sup>Lekeza Izesuni gakó lamaná ganá apí iki giliake áminasitó monó hoza aleloko vutó itó itínasa naluto nene nilími vatí iaká niakumú guluke lekelikumú Ómasiloka loaká noumó nene mulúnégú lamaná geleko Guivahani agepoka lomíaká nouve.

<sup>6</sup>Itó hozaváa lamaná likigikagú apí i ve Ómasímó aleloko voko ale nolutigiko Izesu Kilistó anitití gamenaváa alitanogo íve loko gele seketígí oko nene gelenouve.

<sup>7</sup>Neza imaneloka nagá numukú nougo itó gakó lamanakumule loko gakó hoza aleko hize lé oko nalugo lekezagí nezagí Ómasímíni nasahilí izá moloko ale minoaká nounikumú lekeza nigikagú minamóma nenazo, neza lekeli mukikumú nagata gele lekemeaká noumó nene lamaná onouve.

<sup>8</sup>Izesu Kilistó eza agika lemeaká noimómámíni agikagú minuke neza lekelikumú milumavatíni geelaká noumó nene Ómasímó giligo lamaná noluve.

<sup>9</sup>Itó likigika kimitatímó itó netá mogonamú geleakatinímó itó giliki ali guni iakatinímó napa oloko vítíve loko numuna loaká nouve.

<sup>10</sup>Itó lá okiko netá gohaláa ángiki miliki ikiko Izesu Kilistó anitití gamenaló likigika gizopa lo miniko lihima nomitímó miniki

<sup>11</sup>Izesu Kilistoni ali gikitiki aliniko áisi nene hize lé oleketiko, hehe liki minatamó nenémíni gihiláa itó minumunáa ali utó milikiko Ómasímíni luhuva lapanala utó o lamaná oko minative loko Ómasiloka loaká nouve.

*Kilistó nenémo minoko alekóne loló okave*

<sup>12</sup>Nigivénegita, gili gopa ikatave loko lo likimitoze. Neza netá golesa utó o nimimó nenémo Izesuni gakó lamanalímíni gapo hize lí itigopa, vo guni oko vo alitive loko utó imómá neve.

<sup>13</sup>\* Neza Kilistokumule loko nagá numukú nou gakolímó imaneloka agulizaki ve napámíni pilisi ve itó vegená lugáa keí kagataló holo asú onouve.

<sup>14</sup>Itó nagá numukú noumómave liki imanelokatí ligive lagave lugáa keza Guivahanímú giliake vávani ake Ómasímíni gakó kelegesá legemigo lí utó iaká niave.

<sup>15-17</sup>Lugáa Kilistoni monoláa nene eza avilegekago eza avilegekago iki iaká niave. Keza sozagi pevisá ziki nené nemekugú niake kezámíni kugulizámíni alilíki itínígí Kilistoni agulizá iaká niamó nene nagá numukú nominumómámíni amupiló miluma hoza nímínígí lá iaká niave. Itó lugáa nenete mulúikú lamaná gilíki aí gakó iaká niave. Keza nene Ómasímó imaneloka minoko Izesuni gakó lamaná hize lé itane loko loake nelémo molamó neve liki giliake kígika nímíake lá iaká niave.

<sup>18</sup>Itó néminí manámínoko monó nene soza kígikagutí itímoki itó kígika lamanakutí ali milíki litámó nenemú lova sava amitune. Hanuva Kilistoni gakolámó hutilí oaká noikumú mulúnégú lamaná noguluve.

<sup>19</sup>Itó lekeza nenikumú numuna iaká hoza alíkiko itó Izesu Kilistoni Sikalahulímó nelémo vatí iko nagá numukutí gologí inítatave. Mulúnégú láa loko gelekuke lamaná gelekogó minanogo uve.

<sup>20</sup>Itó minoakakumupe itó heleakakumupe nigika vávani ominíko nugupe nigikagi Kilis-toni lehizemíkugo nenémo guhekaheláa loló itíve loko oloko voko minumóma neve. Itó lá oloko voko minatove loko novoza heleaká netá nene ma ale utó molaminake gele lamaná okoko nigíkatunú nagata losi gelemoko ageva oko minanogo uve.

<sup>21</sup>Kilistó nenémo minoko aleko netáne loló okave. Itó heleaká nenémo iteko mina netá ale utó molonetanogo íve.

<sup>22</sup>Itó mikasiuka miní ameko minatamó nenémo není hozámíni gihiláa goha ale utó molanogo íve. Nenemú nana netakumú vávani itohe lokuke nagatagú losi pásí onouve.



<sup>23</sup> Neza makokumupe makokumupe niviseaká noive. Mikasi ahulokinake Kilistoni ale utó molokinake áisigi minoakakumú laga nivisekago nenémo nene netá iteko neve.

<sup>24</sup> Itó lekeza siheleni minikatave loko lekelikumule loko mikasiuka goha miní ameko minokugo lamaná itize.

<sup>25</sup> Itó nenemú nene gele seketigí oko gelenoumó nenazo, neza heleminake lekezagi mininake lekelémo vatí ugo lekelí gele alévolé oakatini itó mulutikú agila guluma noimó nenémo napa oloko vitize.

<sup>26</sup> Itó lekelitoka goha voko minugo nenikumule liki Izesu Kilistoni geké limiaká niatita gohagi miní amiki geké litatave loko gelenouve.

<sup>27</sup> Lá onoimóza, likigika mili hamó iiki múnahiki miniki gakola lamanalámíni hozaváa alévolé iki naliko gihiláa ali utó nimiliko lekelitoka vinake ángatove, itó hotó mininake gakotiniá gilitove loko lekeza iki miliki itamó nenémo Kilistoni gakó lamaná nenémíni avevezahaló minino.

<sup>28</sup> Gala velinimú lekelegesá ma legemiko alévolé iki miniki zámuzatini golosasa gemino. Ómasímo ámina anosa kelepizekiko keza simá noakalímíni mogona ali utó inigave. Itó Ómasímo lukugutó vizitimó nenémíni mogona ali utó inigave.

<sup>29</sup> Lekeza Kilistokumú gili alévolé itave lokogó nomive. Aikumule liki miluma maluma nentalímíni amupiló minatave loko monéna gele lekemeneimóma neve.

<sup>30</sup>\* Itó neza monokumule loko lovagú alévolé hoza gozapá nalugo ánginamóma neve. Itó itínasa nene nalugo gakóne giliaká niave. Itó monokumule liki ámina lovagú alévolé hoza lekezagi áminámíni iki aliaká niave.

## 2

*Kilistó ezáa agupe aleloko lemekago Ómasímo alémo oti gakó*

<sup>1</sup> Lekeza Kilistotoka miní amekumule loko lekelémo múnahékago miniaká itó likigika kimiakave liki hulu iki miniaká itó Sikalahugegi apiziki miniaká itó mulutikú hizigo miluma giliaká netá mukí lekelitoka nehe.

<sup>2</sup> Nekoma, mulúnégú lamaná iteko geleko minatane liki geleakatini ali nupa ino. Lá niiki likigika kimiaká itó likigika lakagata múnahéaká nene hamó lelegitó iteko minino.

<sup>3</sup> Lekezatanimukó giliki lukugupe alimi iti iti netá matá makó alemilo. Lekeza likigikáa aliliki limiki miliiki likigive lakagavemú giliko itino.

<sup>4</sup> Itó makolímohe makolímohe ezáa hoza lamaná itive loko gelemoko agive lugáagi lamaná itave loko gilino.

<sup>5</sup> Izesu Kilistó eza lá oko geleaká imoláa ámina oko lekelitoka minino.

<sup>6</sup> Eza Ómasímíni ametamenigi minoko aleko oko minamóza, Ómasigi lelegí oko nousitofí nanamú ahulatove loko lamike ale gikitamike,

<sup>7</sup> eza gonanaliváa ahuloake gelekelé ametameni ale luhoake, vegená lemetamenigi utó imóma neve.

<sup>8</sup> Oko molokóa nene vegená lelí avevezaha oko moloko noike ezáa agikáa aleloko limike moloake, Ómasímo litokó ámegé ámegé ike heleaká netá ale alitamó nene lovoza heleakalímíni itó mulizapa oakalímíni geheake zohota zaló heleneimóma neve.

<sup>9</sup> Lá imómave loko amelaho Ómasímo alémo ká mezaneló agulizaki ve sipisi alémo loló okago, aí agulizá nenémo iteko minokiko vegená lugulizá lemeko minative loko lotonoimóma nene,

<sup>10</sup>\* okulumakú itó mikasiuka itó mikasi agikauka minamoláa keza mukitó Izesuni agulizá iki kalapusa hiziki agepoka litave loko,

<sup>11</sup> itó kegepagutí kegepagutí nene Izesu Kilistó eza Guivahani noive liki li gululutiki litamó nenémo iteko miniko Ómasi amelahini lapaná utó itive loko lotonoimóma neve.

*Sata netató nia vegená hize hanatoketatune*

<sup>12</sup> Nenemú nígika lekemenou izegipa páne, lekeza gamena gamena gakóne gili aleakalímíni minamó nenémíni miní amiki minalo.

<sup>13</sup> Ómasi ezáa nene likigikagú hozaváa nalike ezáa lititoka molatitoka niko alévolé oaká zámuzá itó gihiláa ali utó miliaká zámuzá lehizelikimiaká noinazo, lekezagi nougogó negopa, hotó nougogi nene lukugutó vizimó nenémíni gihila ale utó itune liki gopa okatune liki Ómasimú goliva giliki ininá ininá iki amuzá milalo.

<sup>14</sup> Lekeza netá mukí nalikí gulu-guluga liká pelevesava ziká amilo.

<sup>15</sup> Lá niiko, lihima nomimó likigikagú gololó o minatimó minataze. Lá niiki vegená mulusi ali zová zavá ziki itó ali golesa palasa iaká nia vegenalitini límugusi kigilikagú nene

lekeza Ómasímini mohola gipala likigika lamanakigó lilí iki miniki sonohí nenéminiki hizi hanatataze.

<sup>16</sup> Lá niiki, Kilistó anitekiko nene lekelikumule loko oko moloko umó itó hozaváa gena oko alumó nene hanuvamú nomimó nenémini mogona utó okiko nogoliza vizeko mulúnegú lamaná gilitove loko hizi hanatiki alévolé kemetamenigi minoakalímini gako ali utó mili kimiki minalo.

<sup>17</sup> Gili alévolé iakatinímo Ómasiloka guguni gizoaká netakitana nego, nenémini amupiló nipili nihiliko golaníne lekitomó nenémo Ómasi gizo amumó gelekiko nenemuki lokogoliza viziki lekezagi mulutikú lamaná nigiliko nezagi lamaná gilinogo uve.

<sup>18</sup> Itó lekeza ámina iki lokogoliza viziki lekezagi nezagi mulutegú gilitune loko noluve.

#### *Timotiko Epapolotaetasiko*

<sup>19</sup> Guivahani Izesú gelekiko, vatí okikoma, Timotini litá oko lekelitoka amiselekugo voko lekelí gako makó ale atiginá oko lo nemekiko gelekinake mulúnegú lamaná gilitove loko noluve.

<sup>20</sup> Ve nenémináa aikitana makó imaneloka niamave. Áisi lamaná lekelikumú gilike agikatanú hize lé olíkimiaká noive.

<sup>21</sup> Ve lugáa kezáinimukó giliki Izesu Kilistoni hozaváamú ma gilísá amamóza,

<sup>22</sup> Timotí nene minoko aleko oaká noimó nenémini mogona lamaná nego mota gili-nave. Gipa makolímó amelahini alémo vatí oaká noimó nenémini oko eza Izesuni gako lamanalímini hozaváamú nelémo vatí oaká imó neve.

<sup>23</sup> Itó nenitoka netá néminoko manáminoko utó itikumú nene gele guni okinake aí nene litá oko lekelitoka amiselekugo vitive loko gelenouve.

<sup>24</sup> Lá okiko, Guivahanímo gele nemekikoma, nezánegi mino hána aminake lekelitoka vinogo nene gelenouve.

<sup>25</sup> Neza netá makokumú vitagá oko nougo, lekeza Epapolotaetasini amisilikago ake nelémo kíi like nelémo vatí oaká ve itó monokú ve galaváa nigivénéhini loló oko minoaká noimó nene nagata nogulumó nene goha ale atiginá oleketatove loko noluve.

<sup>26</sup> Eza avisekago nenémini gako gilinamóma neve. Eza lekelikumú miluma geleake avisi netakumú giliko mulutini itekative loko lekelikumú giligo gena noigo noluve.

<sup>27</sup> Itó netá avisekago helesakosá imóza, Ómasímo agika hize amimó nene aikó nomive. Nenitoka mulúne gitihiná imó nenémini amupiló miní amekative loko eza agika hize nimike alémo zokamó.

<sup>28</sup> Nenemú lekeza aí ániigiiki mulutikú lamaná gilitave loko itó neza ámina oko gulugo gena amiko minatove loko ale gikitamuke itúnasa nene vávani oko amiselekugo núane novive.

<sup>29-30</sup> Eza Kilistoni hozaváamule loko helesakosá ikutí nene lekeza hotó minake nilími vatí amisá niago gelekelé onetatove loko agupéa latila itikumú giligo gena amimó nenazo, nenemú mulutikú lamaná giliki Guivahaniloka voko gímizi ve noive liki alími lamaná ilo. Lekeza ve nenémináa mukí kilími napa iki nasahilí ikitalo.

### 3

#### *Ómasímini agovisaló hee loko minoaká gihiláa*

<sup>1</sup> Nigivénégita, gako makó láa loko lo asú inogo uve: Guivahaniloka gímiziki niatímó mulutikú lamaná giliki minalo. Ámina gako gohegeva gizoko goha lo likimitove loko gulumó nene gena amive, itó lekelitoka nene mino moloko minoko ale gikitoleketatize.

<sup>2</sup> Lekeza gala kemetameki vegenakumú gizapa iki minalo. Keza netá golesa galasa aliki Ómasímini anosa kugupenitó nomulupe liki kugupenini gopa hukiaká nia vegenakumú gizapa iki minalo.

<sup>3</sup> Sikalahulímó hize lé olimikago, Ómasi gupá ze ameká nounimó itó Izesu Kilstotoka gímizekunike logoliza vizeaká nounimó leza lugupetunú oko moloko uni netató ma leheta osá amuhá vegená nene Ómasímini izegipala gihila noune. Kéisi negopa lezatete Ómasímini anosagi minoaká gihiláa alenouve.

<sup>4</sup> Ómasímo nugutó vizitive loko nezáne nugupetunú oko moloko u netató leheta oko minatove loko hanuva leheta oko minuline. Itó ve lugáa keza kugupelokó leheta iaká alina nene, neza ámina itove loko aleloko iteko kivilegeko leheta uline.

<sup>5\*</sup> Lá okomú noluve: Neza utó okuke nougo, gamena 8 oko vokago, nugupéneló Ómasímini anosa milamóma neve. Neza Isilae vetini mulusiguti Pezamini agapilamola neza Zuta ve gihila utó umóma neve. Mosé lo hukoko li gakoalímini gelekeleléa Palisaio monó ve loló oko minumó.

\* 3:5: Lom 11:1; Apo 23:6, 26:5

<sup>6</sup>\* Zuta vetini monokumú amuza golesa muluke Izesuni vejenala zuha lova ale kemeaká umóma neve. Mosé lo huka gakó geleko ámegetugo vejená lugáate lihimánemú vitagá amó nomive.

<sup>7</sup>Lá onoimóza, neza gozapá netá ale minumó nenemú gulugo gihiláa loló oko minamóza, alika nene Kilistokumule loko ámina netakumú gulugo ha netá loló imó.

<sup>8</sup>Itó nenegó nomive. Neza Guivahaníne Izesu Kilistoni mogonatagana ángoko gulumó nenémini meinaváa itekago, netá lugáa mukitoka nene lamaná gulugo ha netá loló okave. Neza Kilistoni ale lá itove loko aikumule loko netá matáne mukí ángugo, hutuváa loló okago, vo tolova o asú okave.

<sup>9</sup>Neza aitoka gímizekuke minuke, Mosé lo hukoko li gakó gele alekuke, nezáne amuza moloko Ómasímini agovisalo hee loko minosá amuve. Kilistokumú gele alévolé okuke Ómasímini agovisalo lihimáne asú onimikago minoaká nenemú nivisekago gele alévolé oakalímini loló oko minatove loko Ómasímo lihimánemú giligo asú itímini agikagukó minoko aleko oaká nouve.

<sup>10</sup>Itó neza Kilistoni mogonáa gele guni itove loko itó eza galegutí oteakalímini zámua nenitoka utó itive loko itó eza miluma gilitó miní ameko nezagi gilitove loko hilinogo igo iki miliki ita mogona alitove loko,

<sup>11</sup>itó lá okinake voko heleneitokutí oteaká netá ale utó itohe loko geleaká nouve.

*Anosa ángo hehe lonouke ololu loaká nouve*

<sup>12</sup>Neza ámina netá mota ale lutegekuve loko losá amuve. Itó nigikáne gizopa vové avé lokogó neve loko losá amuve. Hanuva Izesu Kilistó nelémo lá imómave loko aitokatí ámina gonanalisi netá alitove loko amuza moloko novuve.

<sup>13</sup>Nigivénegita, nezánemú gulumó nene ámina gonanalisi lamanáa mota alekuve loko lamuve. Imanéminigó oaká nouve. Ahulukuke u gapo nene nemegezaloka nego, nenemú gelesá amuve. Nogómuloka ne netá alitove loko nigizani vatá oaká nouve.

<sup>14</sup>Lá nouke Ómasímo Izesu Kilistó hoza alimómave loko okulumá gapoló nelémo molake makiló ahulonimikago, gonanalisi netá alitove loko ángo vevesonouke hee loko ololu loko novuve.

<sup>15</sup>Monokú napa unimoláa leza mukitoka ámina gonanalisi netakumukó gele zageko minatunize. Itó gakó nolumó nenemú giliko, gapóa haitolímini noikoma, Ómasímo likigika ale hanatokiko gili vevesanigave.

<sup>16</sup>Lá onoimóza, monokú vonouni gapolokó vitunize.

<sup>17</sup>\* Nigivénegita, lekeza mukitoka nénisi ale goí oko novugo ángiiki áminalokó némegetiki alo. Vegená lugáa keza áminagó iki ali goí iki viaká niaze, keí nene ángiiki nene ámina kigizakaló vilo.

<sup>18</sup>Lá niiki láa liki gili minalo: Neza vejená lugáamú lo lekememo ova ova umóma neve. Itínasa imane ivegutí nene goha lo nolukumuve. Keza iki miliki niamó nenémo Kilistó zohota zaló hilimó nene lova ali amiaká niamó geleneive.

<sup>19</sup>Vegená nenémináa keza kugupémo amu heleaká noi netá nenémo ómasinini loló oaká noive. Itó haitopaitó netá kovoza hiliti netakumú golómeni giziaká niave. Itó mikasiuka netakumukó giliaká niave. Lá niamó nenémo vo tolova oakalímini mututoni lílí niave.

<sup>20</sup>Lá iki niago, leza nene okulumá apalímini amelahove nounike, lugutó vizeaká ve Guivahani Izesu Kilistó eza okulumakutí limitikumú ageva oko minoaká nouve.

<sup>21</sup>Eza netá matá mukí ale nupa napa oko ale agahaisiuka molokiko aí agisa heumaukagó kelémo moloaká zámuzatumá nene keé lami lugupe ale viligokiko, ezáa lapanalagi agupegitana loló inogo ive.

## 4

*Kagata aseva alike loketa gakó*

<sup>1</sup>Nenemú nigika lekemenou nigivénegita, mulúnegú geleuke lekelikumú goha noniviseva. Lekeza hozanémini gihiláa lílí ikago, lekelikumú nogoliza vizeaká nouve. Lekeza amuza miliki Guivahaniloka gímizi salakiki aí mututoni lílí iki minalo.

<sup>2</sup>Itó Izuotiako Sitikako lekeza Guivahanímini mohola lílí ikasinazo, likigika mili hamó iki minatáive loko lakagata naluve.

<sup>3</sup>Itó hozagú ve nigivénege gihiláa geza ámina vená losi kelémo vatí ozo. Kezagi itó Kelemetó itó nigivénege lugáagi Izesuni gakó lamaná nenémini miluma hozavamú hizi lé inítinamóma neve. Kugulizá nene alévolé kemetameki nia vejenalítini kugulizá giza pukugú neve.

<sup>4</sup> Lekeza Guivahaniloka gímizemó nenémini agikagú miniki lokogoliza viziki minalo. Neza goha lakagata aleko litoze. Mulutikú agila guluma iko minalo.

<sup>5</sup> Guivahani mota omo lovogisaloka inogo inazo, gevená mukí nene hulugutí némini manámini iaká niamómámini mogona kelepipizilo.

<sup>6</sup> Nemupe manamupe giliko mulutini itemino. Netá matakumú vitagá niiki Ómasiloka liki netakumú voká liki nene, netá mota lehizeleketakumú agepoka liki minalo.

<sup>7</sup> Lá iki niko, Ómasímini hulu nenémo vejená geleaká nene avilegeko nemó nenémo likigikatini lakagatatiniló gizapa okiko Izesu Kilistotoka alévolé iki minataze.

<sup>8</sup> Itó nigivénégita, gakó makó láa loko lo nahuluve. Netá gihiláa gelekelé o amekaláa itó netá lamaná itó hee loko minoaká netá itó gizopa vové avetoko mina netá itó ángoakalímini lagaváa itó gele lamaná oaká netá nene, etovi netá nekoma itó agepoka loaká netá nekoma, ámina netá mukikumú lakagata gili minalo.

<sup>9</sup> Neza oko moloko uke lainim-oleketuke netá matá voko ale nupa oko lekelepizeko nougo ángiki gelemó áminamalokó nene minalo. Niko, hulu amelaho Ómasímo lekezagí minanogo ive.

*Agupémini netá lehizitakumú gakó lo kimimó*

<sup>10</sup> Lekeza gamena hána hanuva miniliki iteke likigikagú lamaná okago, itína nenikumú goha giliake ali lamaná initanigi nilago, nenemú gulugo Guivahaniloka vo anitekago mulúnegú lamaná napa noguluve. Lekeza goí iki nenikumú giliakaláa gilikamóza, netá mukí alenetaupe liki gapo vitagá iake nenemú gena likivisimó.

<sup>11</sup> Neza netá némini manámini agikagú minuke goselé nepelemigo minatomó nenémini mogonamú vitagá oloko vuke mota gelenoumó nenazo, neza oko molokóne itína nomigo vitagá nouke lamuve.

<sup>12</sup> Neza ali-likí itíiki itó ali-likí limiiki initatamóza, hanuva lá oakaláa lá niko vatí oko minanogo uve. Itó netá no gelekelé oko minoaká itó hukonopakono oko minoaká itó minumuni amupiló minoakape itó gaúna gamenámini amupiló minoakape nenémini agikagú vávani oko minoakalímini mogonamú vitagá uke uke mota gelekuve.

<sup>13</sup> Kilistó zámua nemekago ámina zámua ale minuke haitopaitó netá golesámini lamanalímini amupiló ale vatí okuve.

<sup>14</sup> Lá onoimóza, lekeza nene miluma maluma geleko nougo nilími lamaná iaká amó nenemú gulugo etoaká noive.

<sup>15</sup> \* Pilipi numutoka ve vená lekeza není gakó mota gilinave. Neza Izesuni gakó lamanalamú hozaváa apí u gamenaló nene Masetonia mikási ahuloko novugo, Izesuni vejenala zuha lugáa hanuva niago lekezagó monó lusa lukumugo moni nemego oko minunimó neve.

<sup>16</sup> \* Itó Tesalonika numutoka nougo, nugupémini netakumú hizi lé initiki minamóma neve.

<sup>17</sup> Neza nene henokanonimú ma lamuve. Monolímini gihiláa lekelitoka utó okoko minoloko ititive loko noluve.

<sup>18</sup> Itína imane netá matá ali utó miliniti asú amó vaí oko nego nenemú gilitave loko luhuva imane gizo nolukumuve. Eapolotaetasi nene lekelitokatí netá aleloko oko nemekago, henónegi ve loló okuke nouve. Lekeza lehizinita netakumú gelekugo Ómasi guguni gizi amikago anuva lamaná imó gelekave. Itó Ómasi laga avisi netá gelekave.

<sup>19</sup> Ómasine eza minumuni ale utó oaká amelaho nene Izesu Kilistotoka miní amemómave loko netá matá lamaná avilisá olíkimikiko netá makokumú ma vitagá aminigave.

<sup>20</sup> Ómasi ameteho aitoka nene agepoka loo loo nenémo mino-loko iteko alévolé oko minino. Lamaná.

*Gekéini loketamó*

<sup>21</sup> Izesu Kilistotoka viki gímiziake Ómasímini vejenala zuha lílí iki nia vejená nene gekéini noloketuze, lí kimílo. Itó nigive nagave nezagi miniaká nia vejenalitegi geketini nililikitave.

<sup>22</sup> Monó gele vejená imane mukilite geketini lilikimiaká niamóza, agulizaki ve napa Sisani gelekelé imiaká nia vejenalite aliki itiki lá ilikimiaká niave.

<sup>23</sup> Guivahani Izesu Kilistoni nasahílí nenémo lekemetamekú vo holoko minino.

## Kolosa Vegenalitini Luhuva Pauló Gizo Kimimó

*Kolosa vegená nónohá kimike gizo kimi gakó*

<sup>1</sup> Neza Paulona Ómasímíni gakotó Izesu Kilistoni aposolo ve loló utímína neza itó ligivetehe Timotiki makó nousike

<sup>2</sup> Kolosa numutoka monó gele vegená ligive lagave Kilistotoka alévolé iki gímiziki nimina vegená nene luhuva netá imane gizo nolukumuve. Ómasi ametehe aitokatí nasahílí itó hulu lekelitoka mino moloko minino.

*Kolosa vegenakumú Ómasiloka límó*

<sup>3-5</sup> Lekeza Izesuni gakó gihíla lamaná nene lekelitoka gozapá utó okago okulumakú monó helisa henoni lekeza ali lá itave loko gozapá mololeketakumú giliake alitave liki lakagata losi gelemake ageva iki miniaká niamole liki Izesu Kilistokumú gili alévolé iaká niamó itó monó gele vegená mukitoka likigika kimiaká niamó nenémíni gakó likago geleksusike leza Guivahanite Izesu Kilistoni amelaho Ómasi nene lekelikumú gamena gamena agepoka loaká nousive.

<sup>6</sup> Ámína gakó lamaná nenémo numutó namató hutílí oloko vova vova oko gihíláa ale utó oaká noimómámíni oko lekelitoka ganá apí oko anitekago Ómasímo nasahílí olimiaká noi gakó nene lamanatotí gili guni iake, nene gamenatotí lekelitoka ámína oko gihíláa utó oloko voaká noive.

<sup>7</sup> \* Ligivetehe ligika amenousi ve Epapalá lelikumule loko Kilistoni gelekélé izegipala lamaná áisi mota ámína gakó gihíla lo lekemekago gilinamóma neve.

<sup>8</sup> Áisi nene Sikalahulímo lekelémo vávani igo likigika eza amigo eza amigo iaká nia gakó geleake mota oko lo lemekave.

<sup>9</sup> Leza gakotíni lamaná geleksusike ámínaló apí oko Ómasímo geleakatíni ale napa okiko eza geleko moloko imoláa giliiki Sikalahulímíni gele vevesoaká gakola gili guni iki gilitave loko Ómasiloka loko nominusive.

<sup>10</sup> Itó lekeza miniki aliki iki miliki itamó nenémo mogonatíni ale utó molokiko Guivahanímo ánigokiko lamaná itive loko, itó monokú hoza haitopaitó naliki nenémíni gihíláa ali utó itave loko, itó láa níiki Ómasímíni mogona gili guni iki giliki minatave loko numuna loaká nousive.

<sup>11</sup> Itó Ómasímíni zámúza nene sigagavagi netá olío ititímó nene viki akamiki legesó iki ali gihíiki mulutikú agila guluma iko minatave loko numuna loaká nousive.

<sup>12</sup> Itó ametehe eza veletoka lapanalagi apakú helisa henoni mololetamó nene monó gilina vegená lekezagi izá miliki alitave loko ale vavá oko mololeketamó nenemú mulutikú lamaná giliki agepoka lo.

<sup>13</sup> Ómasi eza límugusi amelahini zámuzalotí gologí olimiáke ánigo amu hili gipalámíni gizapaló nominuhakú lelémo molamó.

<sup>14</sup> \* Gipala áisi nene lihimate ahulolimíake gologí oletake meinavate hizimó neve.

*Kilistoni ametamenigi hozavagi*

<sup>15</sup> Gipala áisi ánigamoaká ve Ómasímíni ametamenigi utó ike netá mukí avilegeko mína vémo nominave.

<sup>16</sup> Lá oake minoakató netá mukí okulumató itó mikasiló ale utó o asú oko ale utó imó nene ánigoakalímíni itó ánigamoakalímíni, vegená ahe itó ageló ahe zámuzalagi lelege loko mína netá nene helisa iteko minamó nenehe itó kugulizaki ve minamó mukí nene aí zámuzaló utó amó neve. Itó aí mututoni itave loko utó amó neve.

<sup>17</sup> Itó netá mukí utó amigo amunalotí emane gipala eza míno-loko voko minamó. Itó netá matá mukí nene aí zámuzaló apize lamaná okave.

<sup>18</sup> \* Itó áisi nene agisa agizani loló oko nouhá vegená nene lelí gotola loló oko noive. Lá noiike apí oaká itó vegená helenosakutí ale goí oko mómoká oko oteaká amelaho minake netá mukí nenémíni lapusaváa loló imó.

<sup>19</sup> Ómasímo ezáa ametameníni nene gipalaloka mulusi moloko minative loko gelekago etamó.

<sup>20</sup> \* Itó netá mukí nene okulumatoka itó mikasiloka Ómasi ezáagi goha lelémo apizitive loko lomikago, áisi nene zohota zaló golanía lekike ale geha zike nenémíni imó neve.

<sup>21</sup> Lekeza gozapá Ómasigi otopá ziki minake gala veva lilí iki minake lekemegeza amiake netá golesa haitopaitolímíni aliki miniaká amóma nemóza,

<sup>22</sup> itína Kilistoni agupe hilimó nenémo hulu lekemekago, likigika gizopa lo miniko apazá keké viziki Ómasímíni avogisaló lihima nomimó minatave loko goha aitoka lekelémo apizimóma neve.

<sup>23</sup> Itó nenemú lekeza gele alévolé oakakú alévolé iki miniki luhusatini ali kii lominago Izesuni gakola lamaná giliake monó helisa henonimú lakagata losi gelemiki ageva iaká niamó nene gopa olikimikatize, gelegele huzá giliiki minamilo. Ámina netakumú gakó lamaná li likiminamóma nene lekezagó ma nomive. Numutó namató vejená li kimilíki vinamóma neve. Itó neza Paulona nenémíni gelekélé izegipala loló oko nouve.

*Pauló monó gele vejenalitini gekeleléa minamó*

<sup>24</sup> Neza lekelikumule loko miluma netalímíni amupiló nominuve. Nenemú imane gelekugo lamaná onoiwe. Kilistoni agupémíni agisa agizani lilí iki nia vejená lekelikumule loko Kilistó miluma maluma gilimóma neve. Ámina milumámíni nekisaloka miní ameko geleká netá nene není numupiló itekago ale asú ito hoza naluve.

<sup>25</sup> Neza Ómasímíni gakó hize hutilí oloko vitive loko monó gele vejenalitini gekeleléa mininake lekelitoka Ómasímíni gakoláa lo lekeme-loko novoko ale lutigitane loko nelémo etó imóma neve.

<sup>26</sup> Vegená omolelé amalelé iki mini-liki nitego ámina asuguná gakó amegesáa nene vejenalite gelemítave loko halá geko minokago gelemunike hanuva minuháza, itína gamena nene monó guluhá vejená ale vesamá oko lo lemekamóma neve.

<sup>27</sup> Itó hetoka vejenatoka gakó amegesámú minumuni lamaná minamó nene monó gele vejenala nene asuguná gakolímíni gihíláa lo utó moloko lo limimó nene lá oko neve: Kilistó eza mulutikú minoaká noikumule líki okulumakú helisa henonimú lakagata losi gelemake ageva iaká niave.

<sup>28</sup> Aí mogona lo utó moloko numutó namató vetitoka lo kemeaká nouné. Gele vevesoakatunú kagata aleko lainim-olikimiaká nounimó nene Kilistoni vejenala gihila lilí iki aitoka gímiziiki likigikámo monokú napa omo iteko alévolé oko minative loko

<sup>29</sup> aí zámua sipisi nenémo hize lé onimikago hozaváa nene amuza moloko aleaká nouve.

## 2

<sup>1</sup> Neza lo likimitoze, gililo. Lekeza niamó itó Lautisia numutoka vejená niamó itó vejená lugáa nogoka ánigama vejená lekelikumule loko hoza aleloko vonoumó nene lagasó nomive.

<sup>2</sup> Lekezagi likigikatunú amuza miliki likigika eza amiko eza amiko iki múnahi lamaná iiki netakumú gili vevesiiki Ómasímíni asuguná gakolímíni mogonáa itó Kilistokumú gili guni iki neneloka viki gímiziki minatave loko hoza aleaká nouve.

<sup>3</sup> Aitoka nene likigikagú luhuva utó oakalímíni gele vevesoakaláa nenémíni ohunáa halá geneimó neve.

<sup>4</sup> Ve makolímó laga likivisiti gakó lo lekemekiko likigika gopa okative loko gakó imane lo nolukumumó nene

<sup>5</sup> nezáne nugupetunú hotó minuke nigikatunú lekezagi nominuke lekeza Kilistokumú gili alévolé iake múnahi lamaná iake alévolé iki niminamó nenemú gelekuke mulúnegú lamaná geleká nouke luhuva imane gizo nolukumuve.

*Kilistotoka gímizitunimó nene ligikámíni netá makokumú vitagá aminogo une*

<sup>6</sup> Lekeza Izesu Kilistoni nene Guivahanite loló o limitive liki ali mulutikú milamómámíni lelegitó nene aitoka gímizi lamaná iiki iki miliki ilo.

<sup>7</sup> Lá niiki aitoka luhusatini alekiko miní gikitiki minalo. Itó monó gapo lekelepiznamóma nene áminamalokó lisi lisi niviki lehizeleketa netakumú agepoka lii liiki minatamó nenémo likigikagú vaí oko minino.

<sup>8</sup> Ve makolímó vejenatokatí geleká gakó itó logoka vizeaká gakó hutuváa lo lekemekikoma, nenegú viki nagá ikataze, gizapa iki minalo. Gakó nenémíniá nene avotegini kigikagutí utó okago omolelé amalelé iki minilíki itetoka itó mikasímíni amupiló gihíláa nomi netakumú li mila gakotó gímizi minake liaká nia vegutí neve. Kilistoni gakó nomive.

<sup>9</sup> Gilinahe. Ómasímíni avevezahaváa mukitó nene Kilistoni agisa agizatokagi agupeló mukí mino giki oko neve.

<sup>10</sup> Lekeza aitoka gímiziake likigikámíni netá makokumú vitagá aminigave. Áisi nene gizapa oaká netá itó kugulizaki niamó mukilitini gotoláa noiwe.

<sup>11</sup> Aitoka gímizikago nene likigikauka Kilistoni luhuva neve. Vegenalite kigizanitunú lukugupeló luhuva zeakaláa nene nomíve. Miníki alíki íki mílíki íaká amó litaha nene gololohá í ahuliake Kilistotoka vake nene gosohá lílí inamóma neve.

<sup>12</sup> \* Monó nagamí hílílíkitake áisi hílíkú miní amílíkitinamóma neve. Lá ikago eza zámuzalatunú Kilistoni alémo oti zámuzamú gíli alévolé ikago gosohá lekemetameki miníki alíki ítató miní ameleketatove loko lekelémo otímóma neve.

<sup>13</sup> \* Lekeza gozapá líkígíkaló ító lukugupeló Ómasímíni anosa nomímó minake golesa netá gopánapa alíki minamómave loko líkígíka hele vímó niago, Ómasi eza líhimavatíni ahuloake Kilístoki lekelémo otímó neve.

<sup>14</sup> \* Lá ímó nene gakó pelevesava zeaká unikumú goní oletati luhuva gizo molamó nene gílato nahulake nenémíni líhíma ale nupa okoko zohota zaló apatekago haha okamóma neve.

<sup>15</sup> Lá noíke kugulizaki ító amúza míli mína ve lovagú kívelegeake zámuzáíni gologolo soketakumú vegená kovogísaló kovoza helepelé ímó nenémíni mogona ale utó molamóma neve.

<sup>16</sup> \* Nenemú nosáneta makokumú ahe ító soza saza holisímúpe ító íkanímíni holíváahe ító holísi ale etó oko mínoakakumúpe ító mínamoakalímínímúpe ve makolímó ámína netakumú líhíma alíkave loko nolíkoma gíli amémílo.

<sup>17</sup> Netá nenémínámú hanuva hutuváave loko lítune. Gíhíláa nene alíka utó ítíve loko samapala noave loko lítune. Ító gíhíláa nene Kilístotoka utó oko neve.

<sup>18</sup> Ve lugáate líkímímí lakamamá íki lekezatíni alílíki límíki mínata gakó lí líkímíki íki ageló vegená gupá zí kímítave líki lakagata hízíkí ító lígíkate míno vílíkogago netá ánígo vevesoaká une líki lí líkímíkíma, nenemú gílíkíko gíhíla loló amíno. Hanuva kagata gíliakaláa nemóza, kugupéíni nene hanuvamú alíki ítíaká níave. Ve nenémínáate monó gíhílátíni ípá ílíkímíkataze.

<sup>19</sup> \* Keza nenémínáa Kilístotoka víki gímízemó mota gologolo sokave. Áísi nene gotote noigo lélísi nene agísa agízanáa nóune. Agísa agulúnaha nenémo límíke luhúsate ale gíkítoletamó. Lá oake múnaheletoko hízevo lé ovo oletake noigo zámúza Ómasílokátí alekuníke utó o napa oloko voaká nóune.

#### *Kilístó hílító míni amekuníke lígíka heleneíkútí otekune*

<sup>20</sup> Kilístó hílíímó neneló lekeza míní amíkí lukugupémíni netakumú lí hukína gakó gele aleakakumú mota hílíkamó geleneímóma nenazo, ímane míkasímíni amupíló gíhíláa nómi netakumú lí huka gakoláa nanamú gelekelé íaká níave.

<sup>21</sup> Lí huka gakóma láa loko neve: Nene ale gelemo. Volane namo. Ímane no gelemo. Gakó nenémínáa líví hukíví íaká níamó nenemú nolúve.

<sup>22</sup> Ale geleko nokuko asú oaká netakumú lí hoípa íaká níave. Ító vegenalíte hanuva kagatatunú gelemó vevesokago alí nupa napa íki líaká níave.

<sup>23</sup> Ve nenémínáate ha vegená nenémínáate kezáíni kagata geleke monó nenémíníkí lílo líkí ító lukugupelíní alí límílo líkí ító lukugupe apílíkí zíví hutíví ilo líkí nía gakó nene gele vevesoaká gakó gíhílagítana loló okamóza, netá nenémínáamo gíhíláa nómíve. Nenémínáa nene lugupémo amú heleaká netalímíni gahe ma getamíníno gíve.

### 3

<sup>1</sup> \* Kilístó mómoká oko otímómámíníkí lekeza líkígíka heleneíkútí otínámó neneta, veletoka Ómasímíni zamagaloka Kilístó nóitoka ne netakumú nene gíli mínaló.

<sup>2-3</sup> Lekeza netá golesa alítakumú hele vegená lílí inamó gelekago, mínikí alíki ítá netalímíni Kilístogéi lekeza monéna Ómasímíni amatoka voko halake mínamó nenazo, míkasígú netá matá nemó nenemúkupa, veletó netakumúkó gílíki mínaló.

<sup>4</sup> Kilístó eza mínikí alíki atímíni mogona nóinazo, eza goha utó noíko lekezagí nene aí lapaná hígepavagí ízá mílíki alínígave.

#### *Lítaha lígíkámo oko moloko ímó gololohá okuníke lígíka gosohá ale luhokune*

<sup>5</sup> Nenemú netá lá okomú nene etó íki mínikí lukugupémo múmuzó ítí netá nene músí netá, golutuva netá, mulutíní gíthíná oaká netá, mokoló mogona, ító mulutíkú níhuníhu loaká netá, nenémo sozaló ómai netá ámegetoaká suní nenazo, netá nenémínáa apílí hílíkíko helegelesíno.

<sup>6</sup> Ámína netá múkíkumú nene Ómasílokátí mesaha utó ínogo íve.

<sup>7</sup> Ító lekeza gozapá ámína íki netá nenémínáa alí mínago líkígíka loló ímóza,

<sup>8</sup> itína nene ahulalo. Mukahá pakaha, hokolizá, mesaha, hokolizá, ulínaka gako, itó golatalaka gako netá nenémíná nene ahuli asú iki ahulalo.

<sup>9</sup>\* Litaha likigikámo oko moloko i netá nene lolohá iki ali ahuliake likigika gosohá ali luhikamó nenazo, soza gako eza lo amiko eza lo amiko amilo.

<sup>10</sup> Ai mogonamú gili vevesatave loko gosohá lekemetameni nene ezáa ametamenigitana oko lelémó utó itímó ale lamaná ova ova oaká noive.

<sup>11</sup> Nenemú haitopaitó minuháma nene asú okamóma neve. Hetoka vejená minuhá itó Zuta vejená minuhá, lugupeló Ómasímíni anosa nemó nomimó, zauka vejená itó gihisigú vejená, megusámíni nagakú niamoláa minamamoláa monéna minamuko, Kilistó ale nupa oko lelí ve napa loló oake mulutegú mino vai oko noive.

<sup>12</sup>\* Ómasímíni vejená lekeza ezáa agika lekemeake lekelémó etó okago apazá niamó nenazo, nenemú lekeza likigika hize kimiaká itó nasahilí ikimiaká itó likigika lamanaki minoaká itó lukugupe aliliki limiki miniaká itó likigika ale geha zekago legesó oko minoaká nenémó gineganetini loló okiko ali luhiiiki ali minalo.

<sup>13</sup>\* Lekeza hulu vejená miniki itó holotikú gako utó noikoma Guivahanímó lihimatini ahulamó nenémíni lekezagi lihimatini eza ahulotiko eza ahulotiko iki minalo.

<sup>14</sup> Itó netá mukí nenémíni amupiló likigika kimitamó nene mukí netá ale nupa oko múnahékago mino hamó oake avasavagi minoaká netá nene ali luhiki minalo.

<sup>15</sup> Lá okiko Kilistoni hulúmó likigikagú gizapa oleketino. Ámina hulu lekeza ali lá itave loko Ómasímó lekelémó etó okago aí agupe hamó lilí inamóma neve. Itó lekeza lehizelikimiaká noi netakumú agepoka liki minalo.

<sup>16</sup>\* Kilistoni gacolímó likigilikagú hize hutilí oko minino. Itó Ómasímíni gele vevesoaká gako haitopaitolímíni eza lo amiko eza lo amiko iki lekezatini lakagata aseva aliki lainim-ilikitalo. Lá niiki likigikatunú Ómasi geké litiki monó nama itó ipá apá nama itó Sikalahulímó lekelémó vávani iko gosohá nama liki likigikatunú lokogoliza vizé vizé iki Ómasi agepoka lii liiki minalo.

<sup>17</sup> Itó lekegepatunú ahe itó likigizatanunú ahe netá iki miliki inigima nene Guivahani Izesuni agulizá iki netá mukikumú Ómasi ametehini agepoka liki minalo.

*Lezatete izolaho amelaho gelekélé izegipa kugulizaki ve gosohá iki miliki ita gako*

<sup>18</sup>\* Vená lekeza vatinitini kagahaisiuka limiki minalo. Guivahanímíni mututoni lilí ikatita nenémíni ikiko lamaná inogo ive.

<sup>19</sup>\* Ve lekeza venatini likigika kimilo. Itó alévoleka li kememilo.

<sup>20</sup>\* Itó gipa mohó lekeza izotike ametike mukí gako litamó nene gili alilo. Lá itamó nene Guivahanímó giliko lamaná inogo ive.

<sup>21</sup>\* Izóikita améikita lekeza izegipatini kizapaló moloko goselé kipiliti netá lilí ikitamilo.

<sup>22</sup>\* Itó gelekélé ve lekeza mikasiuka kugulizaki velinitini gako nene netá matá mukikumú gili alilo. Itó keza lugupeló ángikiko lamaná itive liki gili minikigopa, likigikagú lovaleta minamiko Guivahani Izesukumú goliva gili miniki lá ilo.

<sup>23</sup> Hozalini mukí nene vejenakumule likigopa Guivahanimule liki likigikámo vávani iko iki miliki ilo.

<sup>24</sup> Lá niiki lekeza Guivahani Kilistoni gelekélé imiaká nianazo, lekelí hozámíni meinaváa okulumakú helisa henoni nemó nene Guivahanilokatí alitunimó neve liki gili miniki hoza alilo.

<sup>25</sup>\* Makó keza hozaváa makó ali golesa iki alitamó nenémíni helegáa alinigave. Itó Ómasímitoka iteko lemeko negopa, hamó lelegító liminogo ive.

#### 4

<sup>1</sup> Lukugulizaki ve lekeza gelekélé izegipatinini netá makó ali gopa ikitamilo. Ali hehe likitiki kimilo. Itó lekelí Guivahani okulumakú noinazo, alika lelí hozámíni mogona ale utó inogo ive liki gili minalo.

*Kagata aseva aleko loketa gako*

<sup>2</sup> Lekeza goselé lekepelemiko Ómasiloka liki minalo. Itó gizapa iki niiki lehizeleketa netakumú agepoka lii lii iki minalo.

<sup>3</sup> Itó Ómasímó monolímíni gahe segelimikiko, Kilistoni asuguná gacoláa lo utó oko lo lamaná oko lo kimitune liki numuna lilo. Nene gakokumule loko nagá numukú nominuve.

\* 3:9: Epe 4:22; 4:24      \* 3:12: Epe 4:2      \* 3:13: Epe 4:32      \* 3:16: Epe 5:19-20      \* 3:18: Epe 5:22; 1 Pit 3:1  
\* 3:19: Epe 5:25; 1 Pit 3:7      \* 3:20: Epe 6:1      \* 3:21: Epe 6:4      \* 3:22: Epe 5:6-8      \* 3:25: Epe 6:9



<sup>4</sup> Itó numuna loakatunú hizi lé inimikiko, neza gakó nenémini lokugo etatitó nenéminoko lo utó oko lo kimitoze.

<sup>5</sup> \* Ómasímini geisa hetoka mina vejenaki hotu li lomala iiki keza mikuka ititave liki netá matá ali guni iki lilí ikitalo. Netá lamaná aleaká gamena utó olikimitimó nene ma likivilegemino.

<sup>6</sup> Gakotini nene age hilimikiko lagaváa loló ino. Lá okiko vejená makolite gakó némini manámináamú nana oko ale viligoko lo kimitune liki ligitagani aminigave.

*Geké loketamó*

<sup>7</sup> \* Není avetó gakó nene Tikikó lo likiminogo ive. Eza ligiveteho nigika amenou ve Guivahanímini gelekélé izegipa gakó gele aleakalímini noive.

<sup>8</sup> \* Eza nene minoko aleko nouhatímini gakoláa lo lekemekiko likigika ale hulu itive loko lekelitoka amiselekugo núane novive.

<sup>9</sup> \* Itó Onesímo monokú alévolé oko nomina ve ligiveteho nigika amenou ve lekelí numutokatí vema ezagi itína amiselekugo makó viki imane numutotí gakoláa li likimi asú inigasive.

<sup>10</sup> \* Nagá numukú ahulilimikago nousi ve Alistakó itó Panapasini aholaho Makí itó Zosúa agulizaláa makó Zustó keza geketini nililikitago noluve. Makini gakoláa goí oko lo lukumómoma nenazo, áisi vo anitekikoma ali lakamatoka milalo.

<sup>11</sup> Zuta vejenakutí Izesuni gakotó ámegeta vejenakutí ámina ve losive makole nenete kezagó Ómasímini gizapaló minoakalímini hozavámú nilími vatí iaká niave. Lá ake mulutegú ali lamaná iaká niave.

<sup>12</sup> \* Itó lekelí numutokatí ve makó Epapalá eza Izesu Kilistoni gelekélé izegipala makolímoma nene geketini nololeketago lo nolukumuve. Áisi nene Ómasímo hize lé oleketiko lekeza Ómasímo lititoka molatitoka gili hee liki monokú lakagata gululusi gelemiki olopagó minatave loko amuza moloko Ómasiloka loaká noive.

<sup>13</sup> Neza aí mogonáa mota gelenouke lo nolukumuve: Lekelikumupe itó Leotisia numutoka itó Hielapolí numutoka monó gele vejenakumupe miluma hoza sipisi aleaká noive.

<sup>14</sup> \* Lelí lusa ve tota nigika amenou ve Luká itó Temá keza geketini nililikitasigo lo nolukumuve.

<sup>15</sup> Neza Leotisia numutoka monó gele vejená itó monó vená Nimipá itó Ómasímini vejenala zuha aí numukú monokumú alegesá iaká nia vejenakumú gekémini noloketuze, li kimilo.

<sup>16</sup> Lekeza luhuva netá imane vejená mukí gati kimikiko gili asú iki gilikiko, Leotisia numutoka monó liaká nia vejenatoka milikiko vokiko nene gatatave. Itó keitoka luhuva makó gizumó nene áminámini iki likimikiko lekeza gatataze.

<sup>17</sup> \* Alikiponi nene monó hoza Guivahanímo lehizegetamó nene legesá oko minoko ale lutegeko alezo liki li amilo.

<sup>18</sup> Neza Paulona itínasa luhuva nogiza vémini agizakutí luhuva gizoaká nogosanima alekuke nezáne nigizanitunú nugulizáne imane nogizuve. Nagá numukú noumó nene lakagatí molokatize, nenemú gili minalo. Ómasímini nasahilí nenémo lekelitoka mino moloko minino.

\* 4:5: Epe 5:16 \* 4:7: Apo 20:4; 2 Tim 4:12 \* 4:8: Epe 6:21-22 \* 4:9: Pile 10-12 \* 4:10: Apo 19:29, 12:12, 13:13; Pile 24 \* 4:12: Kolo 1:7 \* 4:14: 2 Tim 4:10-11; Pile 24 \* 4:17: Pile 2

## Tesalonika Vegenalitini Luhuva Nampa 1 Pauló Gizo Kimimó

*Tesalonika vegená nónohá kimike gizo kimi gakó*

<sup>1</sup>\* Neza Paulona itó Sailasiko Timotigegi makó nounike Tesalonika numutoka Ómasímini vegenala zuha Ómasi ameteho itó Guivahanite Izesu Kilistoni vegenala zuha lekeza nene luhuva netá imane gizo nolukumuve. Nasahili itó hulu lekelitoka mino moloko minino.

*Tesalonika vegenalite Ómasimú gili alévolé ake monó gapoló vamó*

<sup>2</sup> Leza gamena gamena lekelikumú Ómasi agepoka lova lova oaká noune. Itó numuna nolunike lekelikumuki geleko loaká noune.

<sup>3</sup> Lekeza Ómasimú gili alévolé iaká nenémini gihila ali utó iaká niave, itó vegená nasahili ikitake likigika kimiaká niave. Guivahanite Izesu Kilistokumú alévolé iki lakagata losi gelemiki ageva iaká niave. Nenemú gelenounike ameteho Ómasímini avogisalo agepoka loaká noune.

<sup>4</sup> Ligivetegita, Ómasimo agika lekemeake lekelémo etó imó nenémini gihila nene

<sup>5</sup> Izesuni gakó lamaná aleko voko lo lekemekuko, ha gakó loló imó negopa, amuzavagi nego, Sikalahulímo nene gihiláa neve loko lo likimimóma neve loko gelenoune. Lekelitoka minunike lekelikumule loko oko moloko unike monó hoza alunimó nene mota gilinave.

<sup>6</sup>\* Lá okuko, oko moloko unitó nene lekeza iki miliki iake, Guivahani oko moloko itoki nene iki miliki niave. Lá ake nene, monokumule liki gopoguni nimililitago, Ómasímini Sikalahulímo lekelémo vatí igo, gakó lamanáma gili alikago, mulutikú agila guluma lamaná imó neve.

<sup>7</sup> Lá iake, lekeza goí iki monó gapoló nivago Masetonia mikasiuka itó Akaia mikasiuka monó gili alévolé a vegená lekeza atímini iki iki miliki amó.

<sup>8</sup> Lekelitokatí nene Guivahanímini gakó lamaná puu loko vike Masetonia mikasiukagi Akaia mikasiukagi vimó. Lá imóza, nenegó nomive. Lekeza nene Ómasimú gili alévolé amó nenémini gakó nene numutó namató vokago, nenemú lezate lo kimitunimoláa makó nomive.

<sup>9</sup> Holutikú hozaváa alekuko nenémini gihiláa utó i gakola nene kezáni li limiaká niave. Lekeza nene soza ómai netá lekeme gesa amiake Ómasi alévolé ve gihilaloka gímiziki gelekélé imiake,

<sup>10</sup> gipala heneneikutí alémo oti ve Izesú minomo iteko okulumakutí limitikumú ageva iki niave liki li limikago gelenoune. Áisi nene gamena napaló mesaha olimioko nogosani limitikutí nene lugutó vizeaká ve noive.

## 2

*Pauló Tesalonika numutoka monó hoza alimó*

<sup>1</sup> Nigivénegita, lekelitoka vunike hoza alunimó nene ha amimole liki lekezatini gilinave.

<sup>2</sup>\* Ganá nene Pilipi numutoka gopoguni mililitake alivi letivi ilitamó nene lekeza mota gilinave. Lá ikamóza, Ómasimo lukesate hize lé olimikago lova vetini holúikú lelegesá legemigo minunike Ómasímini gakó lamaná lo utó oko lo lukumuháma neve.

<sup>3</sup> Lakagata aleko lo lekemeaká nounimó nene gele gopa napa oko, soza ligikagi nouhakutí utó osá amive, itó lokogoka vizeko lo lekemesá amune.

<sup>4</sup> Ómasimo ángoletago, etokago, Izesuni gakó lamaná geleko ale guékinake lo kimitune loko lelémo etó okago, ámina gakó nolune. Vegenalite giliko lamaná itive loko nomive. Ómasi eza ligikagú ángoaká vémo gelekiko lamaná itive loko lo lekemeaká noune.

<sup>5</sup> Lekelisi nene lelí mogona gilinave. Leza lekelitoka minunike, asugunatoka moni henonimú voká linogo lekegepoka loaká gakó itó lukugupe aleko iteaká gakó ma lo lekememune. Ómasimo gelekago noluve.

<sup>6</sup> Lekelisihe itó numutó namató vetehe lelikumú giliko itekiko lugulizaki ve loló itune loko lamune.

<sup>7</sup> Leza Kilistoni aposolola nouninazo, nenemú netá matá makokumú voká lokuko lemelinamó nene lamaná ilinamóza, lá oko nomive. Izóike keza izegipáni kilími kava ziaká niave. Áminagó oko leza nene lekelitoka minunike lekelémo kava zeaká unimó.

<sup>8</sup> Nenémini lagaváa nene ligika lekelitoka minokago Ómasímini gakó lamaná lo likimitune lokogó lamune. Ligika lemeni lekelitoka lekeme gikitatune loko ligika lekelitoka nego luháma neve.

<sup>9</sup> Nenemú ligivetegita, moni henonimú nagá zeko ale minuko goselé lekepelekative loko únaká neteká lugupémíni hoza amuza moloko itó vauva aleko minunike, Ómasímini gakó lamaná lo lekemehá mota gilinave.

<sup>10</sup> Leza ligika hanato minago hee hee loko lihimate nomigo minunike, monó gele vejená lekelitoka oko moloko unimó lekezagi itó Ómasímogi mogonate mota gilinave.

<sup>11</sup> Lá iake, ve makolímó izegipa palaloka oko moloko oaká noimó nene leza lekelitoka áminámini oleketunike, etó etó oko gakó lo lekeme asú unimó.

<sup>12</sup> Lá unike, lakagata aleko lekelémo kii loleketunike Ómasímini avogisalo itiiiki aí lapaná ali lá itave loko sele lo lekemeaká noi ve Ómasímo gelekiko lekeza iki miliki iko etative loko lo lekemeaká uháma neve liki lekeza mota gilinave.

<sup>13</sup> Leza nene Ómasímini gakó lo lekemekuko, vejenalítini gakó loló amimó. Lekeza nene Ómasímini gakole liki giliake ali gúinamóma neve. Itó lamaná lá oko neve. Ómasímini gakó nenémo monó gili alévolé ina vejená lekelitoka hoza aleaká noive. Nenemú lélisi nene Ómasi agepoka lokogó nominune.

<sup>14</sup> \* Ligivetegita, Ómasímini vejenala zuha Zutaia mikasigú Izesu Kilistotoka viki gímize vejenaki lekezagi hamolímíni iki iki miliki niago gasovagi netá lílí ilikitamó. Kei nene Zuta vete gopogu galatakatalá ikitamómámini iki likigivetike lugáate gopoguni mililikitamó.

<sup>15</sup> \* Zuta ve keza Guivahani Izesuni itó Ómasímini agepagutí gakó liaká a ve ámina iki kipili helemó, itó leza lipiliki limiselemóma neve. Keikumú Ómasímo giligo lamaná amigo, numutó namató vejenalítini lova ve lílí iaká niave.

<sup>16</sup> Lá niake, hetoka vejená monó lo kemekuko, lamaná ikatave liki gapo hize lí itupe liki lovaga lí limiaká amó. Keza lá iva iva ikago, kei lihima nene amupiló amupiló oko iteko minokago, Ómasímo izapaló molokago, nenémini lovvaváa mota keitoka anitekave.

### *Pauló Tesalonika numutoka goha vitove loko gilimó*

<sup>17</sup> Ligivetegita, gamena koma ahulo hotó oleketunimó nene ligikatunú nomive. Lugupetunú lá unimó. Lekezagi minamunike, lekelí ángatupe loko amuza moloko minoaká une.

<sup>18</sup> Nene voko ángatune loko lokunimóza, neza Paulona gamena gamena ángatove loko nougo, Satá nene lelí gapo hize lí goha olimikave.

<sup>19</sup> Lekelikú lagaváa geleaká nounimó nene lá oko neve:

<sup>20</sup> Guivahanite Izesú anítiti zupa nene hí vejenakumú mulutegú agila guluma noiko minatune. Hí vejenakumú lagata gopa gelesá amune. Lekelisigó nene lelí hozámini gihila lílí inamó neve. Itó lamaná lekelikumú agepoka loaká nounimó, itó mulutegú lamaná geleaká nounimó nenazo, nenemú lekelikumú logoliza vizeko minanogo une.

## 3

<sup>1</sup> \* Lekelikumú miluma geleaká nouke, minoko aleko umó netamigo, nezagó Atena numutoka mininake,

<sup>2</sup> Timotini amiselekeguo, ahulonimioko lekelitoka vitive loko lo hukumó. Eza nene ligivetehe noike Ómasímini hozaló ve minake, Kilistoni gakó lamaná loaká noi vémo monokú lekelémo vávani itive loko, itó ale kii loleketative loko,

<sup>3</sup> itó lekeli nene gopoguni mililikimikiko monó ahulikatave loko nene amiselekuve. Gopoguni mililiamiaká niamó nenémo Ómasímo litó utó oaká noive liki lekeza mota gilinave.

<sup>4</sup> Leza nene lekelitoka minunike goí oko lova nene lumupiló itinogo ive loko lo lekeme-nouháma neve. Ámina gakó nene alévolé okave liki mota gilinave.

<sup>5</sup> Lá okago, ámina gasovagi netakumú nene gimilegú moloaká vémo gimilikú molahe, itó monó ahulahe, itó ali minahe, itó lelí hozámini gihiláa haha okahe, monó alinamó nenémini mogonáa gilitove loko lekelikumú miluma napa gelekuke minoko aleko umó netamigo, Timotini amiselekeguo vimóma neve.

<sup>6</sup> \* Itó Timotí nene lekelitokatí atiginá oko ake, gakó avetó oake lekeza gili alévolé amó itó likigika kimiake nasahilí ikimiaká niamó itó lekeza nene nenikumú lagaváa giliaká niamó itó neza lekelí ángatove loko geleaká noumómámini iki není ángatune liki giliaká niamó nenémini gakola lo leme asú okave.

<sup>7</sup> Nenemú nigivénegita, gopogu galatakalatá nenémíni agikagú itó miluma geleaká nenémíni agikagú nouke, lekeza Izesukumú gili alévolé iaká niamó nenémíni gakó gelekuke mulúnégú geha zekave.

<sup>8</sup> Itína lekeza nene Guivahaniloka viki gímiziiki alévolé inítakumú gelekinake, ligikagú lamaná okiko, minoko aleko inogo une.

<sup>9</sup> Itína Ómasímini avogisaló lekelikumú mulutegú agila guluma noimómave loko lekelikumú Ómasi agepoka loaká noune.

<sup>10</sup> Guivahanímo gele lemekiko, lekelitoka vinake, eza ángiko eza ángiko inake, monó lugáa minoloko vonoimó nene miní ameko lo likimitune loko únaká neteká vauva aleko Ómasiloka loaká noune.

<sup>11</sup> Ameteho Ómasi ezáa itó Guivahanite Izesú gapo velelimikiko lekelitoka vituninazo.

<sup>12</sup> Itó lekelitoka vokuko nene, Guivahanímo hoza alekiko, eza agika amiko eza agika amiko ita netalímo hutilí ino, itó ligika lekelitoka mulunimó áminámini iki likigika mukí vegeatoka milatamó nenémo puu loko hutilí oko napa ino.

<sup>13</sup> Lá okiko, Guivahanímo líkigika nene ale kii lolikimikiko, Guivahanite Izesú eza vegejala zuha mukí kelémoko ati zupa nene lekeza nene Ómasi ametehini avogisaló vihelé lo miniko etó keké viziki lihimatini nomiko minatave.

#### 4

##### *Oko moloko nouko Ómasímo gíliko lamaná iti gakó*

<sup>1</sup> Nigivénegita, Guivahanite Izesuni agulizató lakagata aleko gakó makó lo likimitoze, gílilo. Monokú miniki aliki itamó nenémo Ómasímo gíliko lamaná itimó nenémíni mogonáa lo lekemekuko giliake monokú minoakalímini iki mota niamó nene ámina iki amuza miliki minalo.

<sup>2</sup> Guivahanite Izesuni gakotó gakó lo lukumuhá nene mota gilinave.

<sup>3</sup> Ómasímo gili agika nene lá oko neve: Mokoló netá ahuliiki likigika nene gizopa lo miniko minataze.

<sup>4</sup> Itó etó etó iki likigika lamanatotikó hee hee liki vená alitaze.

<sup>5</sup> Moko netakumú lukugupegú ló guluma iko nomive. Numuká vegeená keza Ómasímini mogona gili hee hee lamatite lá iaká niave.

<sup>6</sup> Ámina netá alita ve nene Guivahanímo áminámini meinávaa kimitive loko goí oko lakagata aseva aleko lo lekemenouháma nenazo, ve makolímo ámina suni alekoko agivelahini nene lihimavagi netá loló otamino.

<sup>7</sup> Likigika golotuvagi minatave loko nomive. Likigika vové avetiko minatave loko sele lo likimimó neve.

<sup>8</sup> Nenemú makó keza gakó imane gili ahulatamó nenete vegeená ángi ahulatagopa, Ómasi eza Sikalahú lekemeaká noi vema ángi ahulanigave.

<sup>9</sup> Lekeza Izesuni vegejala zuha lugáa nene likigika kimitave loko nanamú luhuva netá lekemeva lekemeva itune. Ómasi ezáa likigikatunú eza amiko eza amiko itave loko lo likimike lekelepizeneimóma neve.

<sup>10</sup> Itó lekeza lamaná Masetonia mikasigú numutó numutó Izesuni vegejala zuha minimi vinamó nene likigika kimiaká niave. Lá iaká niamóza, goha napa iki nenémíni itave loko lakagata aleko lo nolukumune.

<sup>11</sup> Itó lo lukununimó nenémíni gako vívi vovoga lamiki, numutikú legesó iki miniki, lekezatini netakumukó gili miniki, lekezatini likigizanitunú hoza alitakumú nene amuza milalo.

<sup>12</sup> Lá ikiko nene numuká vegejalite lekelikumú gili lamaná itave, itó ve makokumú gegele minamiki minatave.

##### *Guivahani atiginá iti gakó*

<sup>13</sup> Nigivénegita, lekeza nene hele vegenakumú nene monó gelematite okulumakú monolímini helisa henoni alitune liki gizapa isá amamó nenémíni miluma napa giliki ive nama ikatave loko lo likimitoze, gílilo.

<sup>14</sup> Leza Izesú heleake goha oti gakó nene gele alévolé onoune. Ámináminoko Ómasi eza Izesuni alémo atiginá iti zupahé nene, Izesukumú gili alévolé iake hele vegeyakini ezagi kelémoko anogo ive.

<sup>15</sup> \* Guivahanímini gakola makó lo likiminogo uve. Mikasiuka logómulagi nouko Guivahani anítitimó nene, leza nene hele vegeená kivilegeminogo une.

\* 4:15: 1 Koli 15:51-52

<sup>16</sup> Guivahani ezáa okulumakutí limitove loko gamoga geko sele lolimioko ageló vegeanal-  
itini agulizaki venini anó lupa itó Ómasímíni pikuli anó nomiliko liminogo ive. Lemekiko,  
Kilistokumú gili alévolé inake helemó keza goí iki otinigave.

<sup>17</sup> Otikiko, logómulagi ha minunimoláa nene Ómasímo lelémo otopá zekiko, keitoka límusi  
amupiló noitinake Guivahanigi hotu lanogo une. Guivahanigi mininake mino lúaló  
moloko minanogo une.

<sup>18</sup> Nenemú lekeza gakó imane ligili hagili iki eza alémo alévolé otiko eza alémo alévolé  
otiko iki minalo.

## 5

### *Guivahani atikumú gizapa oko minatune*

<sup>1-2</sup> \* Ligivetegita, guminaló ve keza holugú litá iki anitiaká niave. Áminagó oko nene  
Guivahanímíni gamena nene galinali alitanogo ive liki mota gilinamó nenazo, nenemú  
Guivahanímíni gamenavamú nanamú luhuva gizoko lo lekemeva lo lekemeva itune.

<sup>3</sup> Nene gamenaló vegeaná keza mota hulu okave liiki legesó iki niiko, golivagi netá litá oko  
aniteko kumupiló itekiko golesa inigave. Izegipa agatupagi vená makolímo litá oko galinali  
miluma geleko ininá oaká noimó nenémíni oko vegeatoka anitekiko, nana iki golisi itamó  
neve.

<sup>4</sup> Lá onoimóza, ligivetegita, lekelisi nene límugusigú minamave. Nenemú Guivahanímíni  
gamena nene guminaló ve venémíni oko litá oko galinali anititimó nene lekeza gatizá niiki  
ininá itató niamave.

<sup>5</sup> Lekeza lapanalímíni itó livilímíni mututoni niave. Límugusímíni mututoni minamune.

<sup>6</sup> Nenemú ve lugáa nenete kovó akiaká niamó nenémíni iki akamilo. Matutini gopa amiko  
lekezatini gizapa alévolé iki minalo.

<sup>7</sup> Kovó akiaká nia vegeaná keza límugusigú kovó akiaká niave. Itó nagamí niaká vegeaná  
keza límugusigú nikake kígika gopa oaká noive.

<sup>8</sup> \* Lá onoimóza, lapanalímíni mututoni loló unimó nene ligika gopa amiko gizapa oko  
minatune. Lá inake Ómasímú gele alévolé itunimó itó ligika eza amiko eza amiko itunimó  
nenémo lagele loló itive. Ómasímo lugutó vizitikumú lagata losi gelemoko ageva oaká nouhá  
netá nenémo lelí geha akilí loló itive.

<sup>9</sup> Nenémíni mogonáa lá oko neve: Ómasímo mesaha olimikoko nogosani limitove loko  
lelémo etó amimóma neve. Eza Guivahanite Izesu Kilistoni lugutó vizeaká netá ali lá itave  
loko lelémo etó onoimóma neve.

<sup>10</sup> Guivahanímíni lelikumule loko hilimó nene leza helekinakehe itó logómulagi noinahehe  
ati gamenaló ezagi minatune loko lá imóma neve.

<sup>11</sup> Lekeza nenemú itína aliaká niamó nenémíni ikigó eza hize lé otiko eza hize lé otiko iki  
itó eza luhusava aliko eza luhusava aliko iki aliliki víki minalo.

### *Kagata alike gekémi leketamó*

<sup>12</sup> Ligivetegita, netá makokumú amuza moloko nololeketuve. Lekelitoka monó hoza  
aliki lakagata aseva aliaká nia ve keza Guivahanimule liki ali goí nilikitake kilílmí hee liaká  
nia vemú giliko lamaná ino.

<sup>13</sup> Lá iki kilími napa iki likígika kimiiki hozanimimú gilikiko itino. Itó lekeza nene hulu  
iki minalo.

<sup>14</sup> Ligivetegita, lakagata aleko gala vizeko láa loko lo nolukumuve: Hoza alisá ama  
vegeaná nene kagata alilo. Itó kovoza helepelé iaká nia vegeaná kilími mómoká iki kilími kii  
likitalo. Kígika alévolé ami vegeaná hizi lé ikitalo. Lá iiki vegeaná mukikumú legesó iki hulu  
iki minalo.

<sup>15</sup> Golesa netakumú pekimiiki eza apiliko eza apiliko ali volaló imaló amilo. Lá okatune  
liki lekezatitokagi vegeaná mukitoka netá lamaná oketatune likigó amuza milíki minalo.

<sup>16</sup> Mulutikú agila guluma ikogó minalo.

<sup>17</sup> Ómasiloka gamena gamena numuna liki minalo.

<sup>18</sup> Netá matá mukikumú Ómasi agepoka lilo. Nene Izesu Kilistoni mututoni lilí inamómave  
loko Ómasímíni agikalokagó neve.

<sup>19</sup> Ómasímíni Sikalahúlímíni loláa zi lihamilo.

<sup>20</sup> Ómasímíni agepagutí gakó lo lekemeakakumú giliko lememino.

<sup>21</sup> Li likimíta gakó mukí nene giliiki gona milíki minalo. Lamaná nehe golesa nehe liki  
giliiki lamaná neko nene ali minalo.

<sup>22</sup> Netá golesa haitopaitolímíni nene lekemegeza amilo.

<sup>23</sup> Ómasi eza nene hulu amelaho ezáa likigika nagamí zeko lekelémo guluví lo asú okiko likigika lekemeni avasavagi niminiko Guivahanite Izesu Kilstó anititi gamenaló lihimavatini nomitimó minataze.

<sup>24</sup> Sele lo lekemeaká noi ve eza lo hukokago alévolé oaká noi vémo ámina hoza aleloko voko ale asú inogo ive.

<sup>25</sup> Ligivetegita, lelikumú Ómasiloka liki minalo.

<sup>26</sup> Izesuni vegenala zuha mukí nene monokú eza aputá viziko eza aputá viziko iki minalo.

<sup>27</sup> Neza Guivahanímini avogisaló luhuva netá imane Izesuni vegenala zuha mukí gati kimikiko gili asú itave loko nololeketuve.

<sup>28</sup> Guivahanite Izesu Kilstoni nasahilí lekelitoka minoloko voko minino.

## Tesalonika Vegenalitini Luhuva Nampa 2 Pauló Gizo Kimimó

*Tesalonika vegená nónohá kimike gizo kimi gakó*

<sup>1</sup>\* Neza Paulona itó Sailasiko itó Timotiko makó nounike Tesalonika numutoka monó gele vegená ameteho Ómasi itó Guivahani Izesu Kilistó aí vegenala zuha nene luhuva netá imane gizo nolukumuve.

<sup>2</sup> Ómasi ameteho itó Guivahani Izesu Kilistoni hulu itó nasahilí lekelitoka vo aleko minino.

*Izesú atiginá oko ati zupa goni ita gakó*

<sup>3</sup> Ligivetegita, lekelikumú Ómasi agepoka loaká nouni hoza lumupiló itekago aleaká nounimó nene lekeza Izesukumú gili alévolé iaká niamó nenémo napa oloko novigo itó likigika eza amigo eza amigo niamó nenémo napa oloko novigo ámina hoza etokave.

<sup>4</sup> Lekelí gopoguni mililikitake gasova netá nimilikitago, miluma giliki miniake gili alévolé iki likigika gologolo samigo alévolé iki hanuva niave. Nene gakó gelekunike, Ómasímini vegenala zuha miniliki vamó keitoka nene lukugupe aleko iteaká noune.

<sup>5</sup> Itó lukumupiló miluma netá utó noikumú láa loko litune: Ómasímo lihimatemú gona mololetati zupa nene hee loko gona moloko limitimó nenémini mogona lá oko utó okave. Ómasímo lekelikumú giligo etokago, aí avogisaló vi hilatakumule loko gasovagi netalímini amupiló lekezagi niave.

<sup>6</sup> Nenemú minoko Ómasímo giligo, etokago, gasovagi netá ali likimiaká nia vegenatoka áminagó oko miluma netá nene ámina vegená kiminogo ive.

<sup>7</sup> Lá ooko Guivahani Izesú nene amuzagi agelogege okulumakutí limita zupa nene gopoguni mililikitago miluma giliki miniaká nia vegenaki itó lezagi mino geleaká apakú lélemo molanogo ive.

<sup>8</sup> Lá nooko nene ló gulumagú lemeko Ómasímini mogona gelema vegená itó Guivahanite Izesuni gakó lamaná gili alema vegená miluma hoza kiminogo ive.

<sup>9</sup> Lá nooko ezáa avogisalotí itó zámuzalalotí itó lapanalalotí kehelú ahulokiko, mini golesaló iliki viki minanigave. Ómasímo miluma hoza lá oko nokimiko,

<sup>10</sup> Izesú atiginá oko ati zupa nene aí vegenala zuhate aí gonanalivagi lapaná ali otinigave, itó monola gili alévolé ina vegenalite sigaga litanigave. Lekeza ámina gakó lo lekemekuko gili alévolé ina vegená nianazo, nenemú lekelisi ámina vegenaki minanigave.

<sup>11</sup> Nenemú leza gamena gamena lekelikumú Ómasiloka loaká nounimó nene Ómasi eza sele lo likimimó nenémini lelegitó iki miliki itave loko, itó aí zámuzatunú hize lé olikimikiko, netá lamaná loló itune liki gili miniaká niamó itó gili alévolé iaká niamó nenémini hozaváa aliliki vítave loko loaká noune.

<sup>12</sup> Itó lekeza lá ikiko, Ómasile itó Guivahanite Izesu Kilistó nasahilí olimiaká noimó nenazo, Guivahanite Izesuni agulizá lekelisi ali otitaze, itó ámináminoko aí lapaná lekelitoka utó noiko, eza lekelí lukugulizá ale otitive.

## 2

*Lo huka gakó gele ahuloaká vema utó iti gakó*

<sup>1</sup>\* Nigivénegita, Guivahanite Izesu Kilistó ati gamena itó aitoka lelémó nupa iti gamena nenémini gakoláa lo likimitoze, gililo. Neza lakagata aleko láa loko lo likimitove:

<sup>2</sup> Vegená keza Ómasímini agepagutí gakokumupe itó gakó makokumupe itó luhuva netá makokumupe Pauló gizamole liki niliki Guivahanímini gamena mota okave liki nilikoma, lekeza litá iki gili gopa iiki mulutini itemino.

<sup>3</sup> Gakó némimi manámini lilikitiki likilími gopa ikataze, nenemú láa liki gililo: Apí oko Ómasi lova ali amiaká vegená utó ikiko, itó lo huka gakó gele ahuloaká ve lolímini mututoni loló inogo i vema utó okiko, Guivahanímini gamena alika utó inogo ive.

<sup>4</sup>\* Lo huka gakó gele ahuloaká ve nenémo vegenalite gelego ómai netá loló oaká noi netá itó vegenalite gupá zi amiaká nia netá nene lova ale amekoko keí holúikutí nene ezáa agupe aleko itinogo ive. Lá okoko Ómasímini monó zagusave napagú iteko minokoko ezámú nénisi Ómasi nouve loko linogo ive.

<sup>5</sup> Nénisi lekelitoka minuke, gako láa loko lo lekemeva lekemeva umó nene lakagati molokahe.

<sup>6</sup> Itó imane gamenaló ámina vémini gapova lí oaká netá nene gilinave. Ómasímo mola gamenaló eza utó inogo ive.

<sup>7</sup> Imane gamenaló netá golesa aleaká vémo asugunatoka hoza aleaká noimóza, Ómasímo ámina ati vémini gapo hize lí oaká noi vema ale ahulomikiko, eza utó inogo ive.

<sup>8</sup> \* Ómasímo lo huká gako gele ahuloaká vema utó okiko, Guivahani Izesuni agepa múnizámo apele hilinogo ive. Guivahani anititi zupa nene lapanalagi zámuzagi nooko alémo golesa inogo ive.

<sup>9</sup> \* Lo huká gako gele ahuloaká vemámo Satani zámuzagi aniteoko haitopaitó suni alévolé netá mukí nene soza moloko ale utó inogo ive.

<sup>10</sup> Lá okoko vegená lugáa latila oakalímíni mututoni nene haitopaitó suni golesa aleko kogoka vizinogo ive. Keza gako gihila lamanakumú kumu helemiko gili ahulata mó nenemú Ómasímo kugutó vizeminogo ive.

<sup>11</sup> Vegená keza lá iaká nitakumú Ómasímo lokiko, kogoka vizeaká izolahináa utó okiko nene, ai soza gako gili zaginigave.

<sup>12</sup> Lá ikiko gako gihila nene gili ahuliiki, netá golesamú laga kivisiti vegená mukitoka nene lihima napa kumupiló itinogo ive.

### *Lugutó vizitove loko Ómasímo lelémó etó imó*

<sup>13</sup> Ligivetegita, Guivahanímo agika likimi vegená lekeza Sikalahulímo likigika nagamí zelikimikakeve loko itó gako gihila gili zagikakeve loko lekelí nene apí oko lukugutó vizitove loko Ómasímo ezáa lekelémó etó ikumú nene gamena gamena Ómasi agepoka loaká hoza lumupiló itekago aleaká noune.

<sup>14</sup> Lekeza lá itave loko gako lamanáma lo lekemekuko giliiki Guivahanite Izesu Kilstoni gonanalivagi lapaná ali lá itave loko Ómasímo lekelémó etó imó neve.

<sup>15</sup> Nenemú ligivetegita, lekeza likigika mili alévolé iiki legepagutí gako loká itó luhuva netá ze lekemeká unike lainim-oleketunimó nene ali gikitiki ali minalo.

<sup>16</sup> Guivahanite Izesu Kilstoki itó Ómasi ameteho eza agika lelitoka moloake nasahilí oletakeve loko lelémó huluga loaká netá mino lúaló moloko minoakalímíni itó netá lamanakumú lagata losi gelemoko ageva oaká nouhá netá ale utó oleta ve

<sup>17</sup> áisi nene likigika nagá zeko hize lé olikimikiko, gako gihila loaká itó hoza gihila aleaká nene lekelitoka lemeko akamino.

## 3

### *Lelikumú Ómasiloka lilo*

<sup>1</sup> Nigivénegita, gako makó lo asú oko lo likimitoze, gililo. Guivahanímini gako nene puu loko vitive loko, itó lekelitoka utó okago gihila zimó nene áminagó oko vegená makotoka gihila zitive loko lelikumú Ómasiloka lilo.

<sup>2</sup> Itó vegená makolite monó nene avasavagi gili asú isá amanazo, kigika golesagi vegená lihímáinigi vegenalítini kigizakutí akagá oletative liki Ómasiloka numuna lilo.

<sup>3</sup> Guivahanímo lokago alévolé oaká i vémo luhusatini ale kii loleketoko ve golesámo lekelémó golesa okative loko lekelémó vatí oko alata mololeketanogo ive.

<sup>4</sup> Lekeza nene gako loleketunimó nene gili aliaká niakumú itó gili aliiki ámegetiki minatakumú Guivahaniloka gímizekamole loko lekelikumú lagata losi gelemínogo une.

<sup>5</sup> Guivahanímo likigika ale vávani iko, Ómasímo agika lekemeaká noikú itó Kilstó alévolé oko oko moloko ikú miní amitave loko Ómasiloka noluve.

### *Hoza alemoko zogozogo vizeaká gako*

<sup>6</sup> Nigivénegita, Guivahani Izesu Kilstoni agulizató nene hoza gako láa loko nololeketune: Izesuni vegenala zuha luguhá nenete gako lo lukumuható iki gímizemake, hoza alemake, gopa miniaká niave. Nene vegenaki apiziki minamilo.

<sup>7</sup> Leza lekelitoka vuni zupa nene gapo veleleketoko hoza aleaká unimó nene mota gilinave. Lekeza ámináminiki lémegetalo. Leza lekelitoka nene hanuva minosá amuháma neve.

<sup>8</sup> Lekelitokatí nosánetá meinaváa nomimó hanuva noloko vova vova amuháma neve. Nagá zeko ale nominuko goselé lekepelekative loko lugupeló netá meina hizitune loko únaká neteká miluma hoza aleaká unimóma neve.



<sup>9</sup> Itó lekelitokatí nosánetá alitave loko lo hukoletonoimóma nemóza, mogaána lekelepizunike lelí ligizakagú lisatave loko hoza lá oko aleaká unimó neve.

<sup>10</sup> Lekelitoka minunike ve makolimo hoza alemoko zogozogo vizitimó nene, nosánetá mosimikiko namino loko lo lekemenounimóma neve.

<sup>11</sup> Itó imane lekelitokatí gakó makó aliake veená lugáate kezáini hozanini ahuliake zogozogo viziki ve makolitini hozagú gavaavató mihina iaká niave liki likago gelekune.

<sup>12</sup> Veená nenémináa keza Guivahani Izesu Kilistoni gakotó kagata aleko láa loko noloke-tune: Keza legesó iki hozáini alikiko, gihila utó iko nataze.

<sup>13</sup> Nigivénegita, lekeza mogona lamaná loló oakakumú goselé lekepelemino.

<sup>14</sup> Imane pepagú gakó gizo nolukumumó nene makolimo gele ahulokikoma, aí mogonamú giliiki nene ahulikiko, ezágó minoko avoza hilitize.

<sup>15</sup> Nene lova ali amitave loko lamuve. Ligivetehove liiki agata aliki alími vevesalo.

*Nónohá zeketa gakó*

<sup>16</sup> Guivahani eza hulu amelaho gamena gamena haitopaitó suni aleko hulu ale utó oleketino. Guivahani nene lekelitoka minoloko voko minino.

<sup>17</sup> Neza Paulona itínasa luhuva nogiza vémini agizakutí luhuva gizoaká nogosanima alekuke nigizanitunú luhuva imane nogizumó nene není anosave loko nene nogizuve. Neza gamena gamena není luhuva lá okogó gizoaká nouve.

<sup>18</sup> Guivahanite Izesu Kilistoni nasahilí lekelí mukitoka mino moloko minino.

## Timotini Luhuva Nampa 1 Pauló Gizo Amimó

*Timotini nónohá amike gizo ami gako*

<sup>1</sup> Neza Paulona Ómasi lugutó vizeaká vémini gakató itó Izesu Kilistokumú lagata losi gelemoko ageva oaká nouni vémini gakató neza Izesu Kilistoni aposolo noutímína,

<sup>2</sup>\* Timotiga monó gapogú gelémo muluke gelémo lá uke gipáne noane loko noluve. Geí luhuva imane gizo nogumuve. Ómasi ameteho itó Guivahanite Izesu Kilistó agika hize gemeko nasahilí ogetoko hulu ale utó ogetino.

*Soza saza monokumú gizapa itive loko agata alimó*

<sup>3</sup> Neza nene Masetonia mikasigú vinogo nouke gagata aleko lo gumumómámini ozo. Lá oko nene Epeso numutoka goha miní ameko minozo. Minoko vejená lugáa nenete soza saza monó api i níkememó nene ahulatave loko lokimikako ahulataze.

<sup>4</sup> Makó nene gitene gako itó vejená hizi hutilí iki minimi ite gako nenémini mogona likago, nenemú iteká lemeká okago, li volaló imaló goha ikave. Lá ikago, Ómasimú gili alévolé iki gelekelé itata gapo nene utó amive.

<sup>5</sup> Monó loakalímini gihiláa lá oko utó okiko etanogo ive: Ligika nagamí zeko minoko, ligikagú gako golesa makó minamiko, ligikatumú gele alévolé oko minoko ligika eza amiko eza amiko oaká nene utó itive.

<sup>6</sup> Ve lugáa nenete monó gapo imane ániigi ahuliki kemegeza amiake, ha gako gihila nomimó nene ligili hagili iaká niave.

<sup>7</sup> Lá iake, kezáinimú nene Mosé lo hukoko li gako lainim-oketatune liki amuza miliaká niamóza, gako nilamó nenémini mogona itó gako makó alévoleka liki nilamó nenémini mogona gili vevesamave.

<sup>8</sup> Leza nene lo hukoko li gakokumú nene láa loko gelenoune: Nene gako lamaná nemóza, Mosé lo hukoko li gako itó haitopaitó li hukina gako nene mogona lamanatokó ámegetatunimó nene lamaná onoive.

<sup>9</sup> Leza láa loko gelenoune: Vegenalite li hukina gako nene lihimáini nomi vegenalitiní mututoni nomive. Li hukina gako gili ahuliaká nia vejená, itó gínikaha ita vejená, monóini nomi vejená golesa, kígika golutuva latimó, monokumú gelema vejená, izóikini améikini itó haitó vejenaki kipili hiliaká a vejená,

<sup>10</sup> mokoló vejená, vémohe venalímohe agivelahitoka voko gímizekiko akiaká, vejená gumina aleaká, sozaló vejená, hakupá gako li kimiaká vejená, itó netá lugáa nenémo monó gakolímíni gala veva nene netá nenémináa aliaká nia vegenalitiní mututoni neve.

<sup>11</sup> Ámina monó gako nenémo Ómasímo gako lamaná lehizenetamó nenegú noike lelí Ómasi lagámini lapanala lo utó oaká noive.

*Ómasímo agika hize amikumú agepoka limó*

<sup>12</sup> Zámúza lehizenetake luhúsane ale gilitoneta ve Guivahanite Izesu Kilistoni agepoka loaká nouve. Áisi nenikumú giligo, aí gakató amegesaló moloaká ve loló nougo, gelekelé onetatane loko nelémo etó okave.

<sup>13</sup>\* Goí oko nene alevo letovo uke gopoguni nomolotuke agulizá ale mumusopa zeaká umó nene neza aí monó gele guni amuke gatizá minokuke, lá ukumú agika hize nemeake,

<sup>14</sup> Guivahanitémo nasahilí napa onímiaké, Izesu Kilistotoka voko gímizumómave loko gele alévolé oaká itó agika nemeaká netá nene lehizenimikave.

<sup>15</sup> Izesu Kilistó eza lihimáinigi vejená kugutó vizitove loko mikasiuka limi gako nene lamaná neve. Mukitó gele alesató neve. Itó netá golesa aliaká a vetini guivahani nénisi nene noumóza,

<sup>16</sup> Izesu Kilistó eza asene zenetoloko vova vova imó nenémini mogona nelepitizove loko Ómasímo agika hize nimimó nene hanuvamú nomive. Vegená nenete alikaloka není mogona ániigiiki gili alévolé iki alévolé kemetameni alitave loko lá imó neve.

<sup>17</sup> Alévolé Guivahani napa, helemoakalímini, itó ániigamoakalímini, Ómasi hamokó aí agulizá ale otekuko, aí lapaná nenémo mino lúaló moloko minatize. Lamaná.

<sup>18</sup> Gipáne Timotio, goí oko Ómasímini agepagutí gako geikumú utó imó nenemú gelekuke láa loko nologetuve: Ámina gakolímó gelémo vávani okiko, lovagú iaká niamó nenéminoko monó hoza alévolé oko alezo.

\* 1:2: Apo 16:1 \* 1:13: Apo 8:3; 9:4,5

<sup>19</sup> Lá okoko, gele alévolé o minoko gigikagú némini manámini gako golesa minamiko, monó hoza alezo. Vegená lugáa nenete kigika lapanaki minoaká gako nene gili ahuliake, Ómasimú gele alévolé oakatini nene ahuliake, kigika gologolo sokago,

<sup>20</sup> latila inigi amó keikutí ve losi Haimeniaisiki Alesateki niasive. Satani agizakú vi hiliki Ómasimú alivi letivi amitái mogona gilitáive loko kimisele ahulokuve.

## 2

### *Ómasiloka lituni gako*

<sup>1</sup> Gako imane goí oko iteko alévolé itive loko neza gagata aleko noluve. Lekeza vegená mukikumú voká voká liki Ómasiloka liki eza hize lé oketative liki keikumú Ómasi agepoka liki minatave loko nologetuve.

<sup>2</sup> Itó lekeza legesó iki hulu iki monokú lamaná iki minikiko, vegená nenete nemú manamú giliko lamaná itive liki kugulizaki ve napamú itó mukí gizapa vegenakumú Ómasímo hize lé oketative liki numuna hoza alilo.

<sup>3</sup> Nenémo lamaná inogo ive. Itó lugutó vizeaká Ómasi eza nenemú giligo etoaká noive.

<sup>4</sup> Eza nene vegená mukitoka kugutó vizitove loko itó gako gihila ali lá itave loko geleaká noive.

<sup>5</sup> Ómasi hamokó noive, itó Ómasi leza vegenaki agata helega helega nouko ve hamokó Izesu Kilistó holutegú ve loló i ve nene

<sup>6</sup> vegená mukitoka lihimate meina hizeko gologí oletatove loko minoko aleko imoláa nene ahulamó. Ómasímo nenémini itove loko ezáa mola gamena nene alitokago vegená mukitoka kugutó vizitove loko nogilimó nenémini avevezahaváa utó okago gelekune.

<sup>7</sup> \* Ámina gako lo utó oaká ve itó aposolo loló itane loko Ómasímo nelémo etó okago nouve. Zuta ve minamamolaloka gako gihila gele alévolé oaká gako mogona lainim-oketatane loko nelémo etó okave. Nene soza lamuve. Lamaná noluve.

<sup>8</sup> Nenemú numutó namató monó gilina vegená keza kizapaló moloko itó lova leta lava leta nomitimó kigika gizopa lo miniko kigizani ali otiki numuna litave loko noluve.

<sup>9</sup> \* Itó vená keza gineganéini ali lamaná iki luhiki ali hita hita iki mihina itave loko noluve. Itó ve kumu hilitune liki gotóini zopova haitopaitó gonanalisi amitave. Gonanalisi netá golivagi itó luhoaká gó luhuvagi nene luhamitamó neve.

<sup>10</sup> Monó gilina vená nenete etati lelegitó minatamóámmini iki lamaná iki iki miliki itatímo gineganéini loló ino.

<sup>11</sup> Vená keza legesó iki limiki miniki kagata gili vevesi miniki gako gilitaze.

<sup>12</sup> Vená neneta monó tisa lilí itamope itó ve kivilegeko gizapa oketatune litamope nenemú gele kemesá amuve. Monó litakú nene keza gako lamiki legesó iki minataze.

<sup>13</sup> \* Lá itakumú nene Atani nene goí oko alémo utó okago Evani nene alika alémo utó imó.

<sup>14</sup> \* Itó Atani nene Satá gimivagú molamimó neve. Evani nene gimivagú molokago, gele ameake pelevesava ale utó ikumú noluve.

<sup>15</sup> Lá okamóza, vená keza monó gili alévolé itamó itó vegená makó kigika kimitamó itó kigika gizopagi minatamó nenémini agikagú miní amiki némini manámini osá nene netá golesa okatune liki kugupe gizapa iki minatamó nene, izegipa nigetiko Ómasímo kugutó vizinogo ive.

## 3

### *Pastoli hozaló minoaká gako*

<sup>1</sup> Makolimohe makolimohe pastoli minatove loko litimó nene, hoza gihilamú linogo ive. Nene gako gihila lamaná neve.

<sup>2</sup> \* Itó pastoli loló iti ve nene, lihimavala nomitimó minoko ganakutí vená hamokó aleneiti vémo minatize. Némini manámini osá golesa okatove loko agupeva gizapa oko minatize. Legesó oko zou loko minatize. Veno vegená ikikoma nasahilí oketoko kelémo molatize. Lainim-okimiaká hoza nene gele vevesoko ale hee loko alitize.

<sup>3</sup> Negi nagamí mukí nokoko negi hizemitive, itó negi nagamí nokoko lovaga loko lova ale utó amitize. Eza legesó oko hulu oko minoko, moni henoniló agika molamitize.

<sup>4</sup> Ezáa vená izegipala legesó oko lamaná oko gizapa oketoko kagata aleko kelémo vevesokiko, limiki miniki gelekelé itataze.

<sup>5</sup> Ve makó ezáa vená izegipala lamaná oko gizapa oketamitimó nene, Ómasímini vegenala zuha nana oko gizapa oketative.

<sup>6</sup> Itó monó nagamí izoha holati ve makolímó pastoli loló amítive. Nenémo ezáa agupe aleko itekiko, Satá eza amimika lokiko, lolímíni mututoni loló okatize.

<sup>7</sup> Ómasímíni vejenala zuha lílí ama vejená keza ve makolímíni mogonamú giliko, etokiko nene, áisi nene pastoli loló itive. Aí amé zíkiko nene, Satani gelehúsígu apelekatize.

*Monó gelekelé ve mìnóaká gako*

<sup>8</sup> Ve makó keza monó gelekelé ve loló itune liki áminagó iki ve zouváa minataze. Keza genezáini lositaki minamítave. Negi nagamító ve minamítave. Moni henonimú mumuzó amítave.

<sup>9</sup> Lelí monó imane asuguná oko minatotí mota utó okamó nene ali gikitiki miniki, kigikagú gako golesa minamiko minataze.

<sup>10</sup> Keí nene goí iki mulúkú hiziki mogonáini ánikigiko, etokiko, monó hoza nene kimikiko monó gelekelé ve lílí itave.

<sup>11</sup> Ámináminiki venáini keza zou liki minataze. Netá nemú manamú osá golesa okatune liki kugupeló gizapa itave. Venáini iki miliki itamó nenémo gihila loló onoi vete monó gelekelé ve lílí itave.

<sup>12</sup> Keza ganakutí vená hamokó alinita ve nenete ámina hoza alitave. Vená izegipáini zuha vatí iki gizapa ikitatave.

<sup>13</sup> Lá iiki monó hoza alitamó nene lamaná okikoma kigikámíni henoni lamaná nene keitoka minanogo ive. Izesu Kilistotoka viki gímizeakakumú gako vávani iki li utó inigave.

*Lelí monolímíni asuguná gako*

<sup>14</sup> Neza nene noanitoka litá oko vitove loko gelekumóza, imane luhuva gizo nogumumó nene,

<sup>15</sup> netá makolímó nagá zékiko nominugoma geza láa loko gilitane loko luhuva imane gizo nogumuve. Léisi nene alévolé ve Ómasímíni vejenala zuha aí lapusava lílí iiki aí gako gihila hizi lé ita vejenalítini holúkú mininake, oko moloko itunimó nenémíni mogonamú luhuva imane gatokoko gilitane.

<sup>16</sup> Lelí monolímíni asuguná gakola halá geko minamó nenémíni gihiláa Izesuni mogonamú láa liki li utó iaká niamó nene, golivagi neve:

Áisi nene lelí lugupe ale luhoake utó imó.

Sikalahulímó aí mogonáa ale utó igo hee loko minamó.

Ageló vejenalite aí ánikamó.

Numutó namató vete aí gakola gili asú amó.

Mikasiuka vejenalite aikumú gili alévolé amó.

Okulumá lapanalaló alémoko itimó.

## 4

*Sozaló monó ve alíka utó itakumú limó*

<sup>1</sup> Sikalahulímó lo utó oko láa loko loaká noive: Mínomo noiteko alikaloka ve lugáate monó ahuliiki kilími gopa napa iaká nia holositini gako gili alinigave. Itó ámina holositini soza saza gaktó viki gímizítave.

<sup>2</sup> Ámina soza sazaló ve nenete kigikámíni gakola gili ahuliaká niago mota lí okagove liki vejená kogoka vízeke láa liki li kimiaká niave:

<sup>3</sup> Vená alemiki gohuna minalo, itó nosáneta lugáa namiki mosiaká ilo liki liaká niave. Ámina nosá nene Ómasímó gili alévolé iki minata vejenalite itó aí gako gihila gili zagita vejenalite agepoka liki hanuva natave loko ale utó imóma neve.

<sup>4</sup> Ómasílokátí utó onoi netá nene lamanakó neve. Nenemú nene agepoka loko ámina nosáneta aleko noaká nune. Nenemú moseakaláa nomive.

<sup>5</sup> Ómasímó ezáa gakoalámule loko itó agepoka loko noaká nounikumule loko lusa genei netá nenazo, óe loko lonoi netá nomive.

*Kilistoni gelekelé veva lamaná mìnóaká gako*

<sup>6</sup> Gele alévolé oaká nuni gako itó monó gako gihilaló voko gímizenimó nenémo kigikámíni nosáneta loló oko noiko, geza nene monó gele vejená gako imane lo nogumumóma nene lo kemeko kelémo lamaná itanimó nene, Izesu Kilistoni gelekelé izegípala lamaná minanogo ane.

<sup>7</sup> Gitene gakovú monola nomive. Nene gako gemegesa amezo. Geza nene monokú voko gele alévolé oko oko moloko itove loko, gígika alémo vávani oaká hoza alezo.

<sup>8</sup> Lugupe ale vávani oaká hoza nenémo lamaná otígí nemóza, monó gakovumú ligika alémo vávani oaká nenémo itína gamenaló nemó alíka gamenaló nemó Ómasílokátí alévolé lemetameni lehizeletati netá nenazo, nene gihila lamaná neve.

<sup>9</sup> Nenémo gihila nenazo, vejená mukitoka nenémuni gihila ali lá itave loko amuza moloko hozaváa alitune.

<sup>10</sup> Ómasi eza numutó namató vejená mukitó kugutó viziti ve noimóza, keikutí gele alévolé unimoláa lamaná lugutó vizeaká noi ve noinazo, nenemú Ómasi alévolé ve atikumú lagata losi gelemoko ageva oaká nounimómave loko miluma hoza lumupiló itekago hoza napa aleaká noune.

<sup>11</sup> Gakó mukí lo nogumumó nene gili alitave loko monoka gele vejená lainim-oketozo.

<sup>12</sup> Géisi nene izegipa gosohá ve noane liki vejenalite geikumú giliko lememino. Geza gele alévolé o minoko gigika gizopa lo miniko, gigika kemekoko oko moloko itanitímo itó monó litanitímo gili alévolé a vejená gapo kelepezeko geí gémegetatave loko lá itanize.

<sup>13</sup> Monó gotolaú gakó gato kemeaká hoza itó monó mogona lo utó oaká hoza itó monó lainim-okimiaká hoza nene hozaló gigika ame gikitoko amezo.

<sup>14</sup> Goí oko nene monó olotiva vete kígizani nene gotokaló miliki lusa nigitiki Ómasímuni agepagutí gakó makó geikumú linató nene Sikalahulímo monolímini zámuza lehizegetamó nenémuni gihiláa gopa okatize, alévolé oko gizapa oko minozo.

<sup>15</sup> Vegená mukilite monokú oko moloko anítímo napa oko novimó nene áinigikiko, laga kivisitíve loko, nénisi lo nogumu gakó nene gigika molo gikitoko ale minozo.

<sup>16</sup> Gezaka gugupe gizapa oko itó monó lo kimitani gakó avasavagí gizapa oko gakó lo gumumó nene alévolé oko ale minozo. Lá itanimó nene, gezagi geí gakó giliaká nia vejenaki alévolé apá alinigave.

## 5

### *Monó gilina vejená nasahilí oketatuni gakó*

<sup>1</sup> Ozaha makó gakó lo amitove loko nene, gahá ameko lamo. Aménegave loko alémo geha zeko lo amezo. Gosohá ve nene nugunamotamóneve loko némuni manámuni oketoloko voko minozo.

<sup>2</sup> Gelehosi nene izónegítave loko gizapa oketoko némuni manámuni oketoloko voko minozo. Vená gosohá nene mohó nugunamotamóneve loko némuni manámuni oketoloko novoko nene, gezaka gugupe gigikaloka gizapa ozo.

<sup>3</sup> Itó gevoná vená nene kezáikó niiki muhelé ahelé iki niminikoma, kelémo lamaná oko hize lé oketozo.

<sup>4</sup> Gevoná vená makolímini izegipagi agapilamoki keza nene goí iki kezáini numúikú nene monó hoza alitiki alími lamaná itave. Lá iki nene emane amunaloka izóipiki améipiki gizapa ikitató nene, ámina lihima apasiki gelekelé itataze. Nenemú Ómasímo giliko lamaná inogo ive.

<sup>5</sup> Gevoná vená gihila nene kezáikó miniki Ómasimú gili alévolé iake, gamena gamena únaká neteká Ómasiloka liki voká voká lake kagata losi gelemake ageva iaká niave.

<sup>6</sup> Itó gevoná vená makolímo mokoló minokikoma nene, aikumú nene agómulagi noihe liki lamiki ameni mota heleneive liki gililo.

<sup>7</sup> Gevoná venalitini lihímáini minamitimó miniko keitoka gakó minamitive loko gakó imane lo hukoko lo kemezo.

<sup>8</sup> Makó keza keí vejenáini zuha itó keí vená izegipáini nene gizapa lamaná ikitiki nasahilí ikitamitamó nene, lelí monó ahuliake monó gelema vejená kiviligiki limiki minanigave.

<sup>9</sup> Gevoná vená makolímohe makolímohe ve hámakoki mino-loko noitiko kilisimasiva 60 minatímó nene, monó hoza koma naliko nosáneta koma ale utó oko native loko agulizá nene ámina venalitini kugulizá mina pepagú gizo molokako minino.

<sup>10</sup> Áisi nene oko moloko igo vejenalite gili lamaná inamó noitihe, itó izegipala getokoko lamaná oko gizapa oketoko nasahilí oketamó noitihe, itó aitoka veno vejená ikago nasahilí oketoko kelémo molamó noitihe, itó áisi lemeko minake Ómasímuni vejenala zuha lugáa nasahilí oketamó noitihe, itó vejená miluma maluma gilikago kelémo lamaná imó noitihe, itó vejená nasahilí oketoko némuni manámuni oketonoiithe. Mogonáini nene loká miká okako, lá okogó neikoma, kugulizá gizatanize.

<sup>11</sup> Gevoná vená gosohá nenete lugulizá nene pepaló gizatane likikoma, óe loko gizamo. Veló goha vita netakumú kumu helepelé okiko, goí iki Kilstotoka víki gímizemóma ahuliake atiginá iki viaká niave.

<sup>12</sup> Lá iake nene, kezáini apí iki monokumú ale amegesaló molatune liki li huka gakó nene gili ahulikago, lihímáini iteko minokave.

<sup>13</sup> Lá iake nene, numukú numukú itigá limigá iki hanuva gakó liki miniaká niave. Itó nenegó nomive. Keza notuni mihina ake hanuva gakó gopa napa gakó golesa liva liva ake, vejená makolitini netá matakú gavakavató mihina iaká niave.

<sup>14</sup> Nenemú nénisi láa loko noluve: Vená gevoná gosohá keza veló goha viiki izegipáini geti miliiki, kezáini numukú makó miniki aliki ita vejená gizapa lamaná ikitatave. Lá iki niiko, lelí gala ve nenete kegepa zikiko, lelikumú gakó golesa lamitave.

<sup>15</sup> Gevoná vená lugáa keza litá iki latila oaká gapoló vake, Satani ámegetiki viaká niave.

<sup>16</sup> Izesukumú gele alévolé onoití vená makolímíni zuhagutí gevoná vená makó nitamó nene, áisi nasahílí oketative. Lá noiko, monó gele vejenalitíni mukitó netáikutí alemiko, monó gele vejenalite keza gevoná vená kezáiko minamoláa nene hizi lé ikitatave.

<sup>17</sup> Monokú olotiva ve keza hoza alikiko, lamaná okikoma nene, monó vejenalite meinaváa miní amiki napa iki kimitave. Monó li kimiki lainim-ikimiaká hoza alévolé iki alita vete nenémíni aliki itiki alitave.

<sup>18</sup> \* Meinava alitakumú nene monó gotolaú luhuva láa liki gizinamóma neve: Pulumaká nenémo hoza aleloko novike nosánetá natove loko noikoma, agepaló gahumá itamilo. Hanuva natize.

Itó gakó makó láa liki luhuva gizinamóma neve:

Ve makolítitoka hoza alita ve nenete ámina vegutí meinava alitaze.

<sup>19</sup> \* Ve hámakó nenémo monó olotiva ve makó gonitó alémo molatove loko nolikoma, litá oko gele amemo. Vegená losihe losive makolehe lá ive liki likikoma, gelekoko gakó gilitanize.

<sup>20</sup> Ve makolímó lihima alekikoma, lugáa keza giliiki kelegesá ligitive loko monó gele vejenalitíni kovogisaló gahá amezo.

<sup>21</sup> Neza Ómasímíni itó Izesu Kilístoni avogisaló itó Ómasímó kelémo etó okago aí amatoka ageló niamó keí kovogisaló láa loko lo nohukogetuve: Gakó imane lo hukoko lo nogumumó nene gele alekoko gizapa okako lemeko akamino. Ve vená gakóini litove loko vejená lugámú gelekako, iteko lemeko lamoko kelémo lisihé okogó noloko némíni manámíni loló oketozo.

*Monó hoza alita ve kilími etó ita gakó*

<sup>22</sup> Ve makó keza monó hoza alitave loko litalilá oko lusa geketamo. Keí lihímáinímó geí gumupiló itekatize. Gezaka gugupe gígika gizapa okako gizapa lo minatize.

<sup>23</sup> Itó Timotiga, geza mulukagú akohú oká giviseká oaká noimó nene nagamikó namoko vain nagamí koma ma natane loko noluve.

<sup>24</sup> Itó ve lugáatini golesa netáinímíni lihima nene Ómasímó nogosani kimiti gamena vevesá alitamigo litá oko utó oaká noive. Ve lugáatini lihima nene itína asuguná nemóza, alika utó inogo ive.

<sup>25</sup> Ámináminoko vejená makolítini nasahílí hoza nene itína utó oaká noive. Itó lugaloka lá amitimó nene, asuguná halá geko minoloko voko minaminogo ive. Alika utó inogo inazo, nenemú monó hoza alita ve nene litá oko kelémo etó amitane loko noluve.

## 6

<sup>1</sup> Megusa izegipa lilí iki hagítana hoza aliki miniaká nia vejená keza nene ve napáinímú láa liki gilitaze: Vegenalite Ómasímíni agulizá aliliki limiki monó aliki letikatanazo, nenemú ve napatémíni kugulizá ale oteko gelekelé lamaná oketatune.

<sup>2</sup> Láa liki gilíki, ve napáinímú nene kezagi lezagi hamó monó gele alévolé okunike, lisihé oko minokune liiki keikumú giliko lemémíno. Gelekelé izegipáini hozalotí meinaváa aliaká nia vete Ómasímú gili alévolé ina ve nianazo, itó gelekelé izegipáini nene Ómasímó agika kemeaká noinazo, nenemú lamaná iki gelekelé ikitatamó nene etanogo ive.

*Moni henonímú mumuzó oaká gakó*

Geza nene kelémo oteko gakó imane lainim-oketozo.

<sup>3</sup> Makó keza gakó gihila gili ahuliiki haitó monó lainim-ilikitatamó nene, itó Guivahanite Izesu Kilístoni gakó gili ahuliiki monó gapómíni gakoki kemegeza amitamó nene, keikumú láa loko gilitune:

<sup>4</sup> Kezáini kagata giliki kugupe aliki itiki gakoláa ma gili vevesamave. Gakó miní amiki liva liva iki miniaká niamó nenémo kumu helekago, kemekugú níká lova leta lava leta iká itó alivi letivi iká, itó hanuva kemegeka liki gopa gakó líká,

<sup>5</sup> itó ligi ahuligí iki miniká ita netá ali utó iaká nia vejená nene kígika kagata gopa okago, gakó gihila ahuliake, monó nenémo moni henoni ale utó itihe liki giliaká nia vejenalitíni holúikú ali utó iaká niave.

<sup>6</sup> Moni henonímú lugupeloka ale akalatuni netakumú mumuzó amoko mota alenouni netakumú lepa hízeko kii lo minatunimó nene monokú henonigí vejená minanogo une.

\* 5:18: Gapo 25:4; Mat 10:10; Luk 10:7

\* 5:19: Gapo 17:6, 19:15

<sup>7</sup>Leza láa loko gelenoune: Izotege getikago utó uni gamenaló nene, netá matá henoni ma alekamune. Itó minoko hilituni gamenaló nene lugupe zapakó vinogo une.

<sup>8</sup>Nenemú nosánetá ginegane lelitoka ma nekoma nene, áminasí lelitoka neve loko hanuva zou loko minatune.

<sup>9</sup>Moni henoni sipisimú kumu heleaká noi vegená keza Satá gimínikú molokiko, Satani gelehúsígú apilínigave. Lá níiki, ha netá negi netá kelémo gopa iti netá haitopaitokumú kumu helekiko, nenegú limiki latila iki golesa inigave.

<sup>10</sup>Moni henonimú mumuzó oaká nenémo haitopaitó golesa netalímini mogonáa neve. Vegená lugáate ámina gapoló viake, monó gele alévolé oakáini ahuliake kemegeza amiaká niave. Lá ikago, keitoka miluma netá mukí utó oaká noive.

*Gele alévolé oakakumú amuza moloko hozaváa alítune*

<sup>11</sup>Ómasímini hozaló ve geza netá nenémináa kemegeza kemezo. Lá okoko nene, hee loko lamaná minoko oko moloko oaká, monolagi minoaká, gele alévolé oaká, gigika kemeaká, itó gopoguni miligimiaká utó noiko amánapa oko ote minoaká, kelémo hulu oaká, nenéminoko minatove loko amuza molozo.

<sup>12</sup>Lá nooko, Izesukumú gele alévolé oakakumú amuza moloko hozaváa alezo. Aleloko voko alévolé gemetameni nene ale gikitoko alinogo ane. Itó gezaka lá itove loko vegená mukilitini kovogisaló monó ale lá nouve loko lo nohukako, Ómasímo ámina alévolé gemetameni ale luhatane loko sele lo gimimóma neve.

<sup>13</sup>\* Netá matá mukí ale utó i ve Ómasímini avogisaló itó kiapé Potiasí Pilatoni amatoka ezáa mogonamú lo utó i ve Izesu Kilistoni avogisaló láa loko lo hukoko lo nogumuve:

<sup>14</sup>Guivahanite Izesu Kilistoni gamena velesá alitamigo gilími etó a zupa lo hukogetu gakó nene gigika gizopa lo miniko lihimaka nomitimó ámegetoloko voko minozo.

<sup>15</sup>Aí gamenava alítitimó nene, Ómasímo lokiko, utó o lamaná inogo ive. Ómasi eza mino lúaló moloko minoaká lagámini gizapa ve hámakó minake, kugulizaki vetini agulizaki venini, itó gizapa vetini gizapa venini hamokó noive.

<sup>16</sup>Ezáagó heleakavagi nomíve. Ási lapanató minoko aleko noitó nene, leza hanuva voko aniteakaláa nomíve. Ve makolímó aí agupe ánisósá amimóma neve, itó ánisamitimó okave. Sigaga lomíaká zámuza itó alévolé oko minoaká zámuza aítoka minino. Lamaná.

<sup>17</sup>Geza imane mikasígú netá moni henoni mukí ali miníaká nia vegená láa loko lo hukoko lo kemezo: Kugupe alíki itíki holomaló milamítave. Tolova oaká henonimú gilíko, alévolé amino. Neneloka víki leheta amilo. Ómasi eza loko lisolimiaká noi veloka voko leheta ituníze.

<sup>18</sup>Geza láa loko lo hukoko lo kemezo: Netá lamaná alítakumukó gilíki alíki minalo. Mogona lamaná iki milíki itamó nenémo lekelí henoni loló ino. Nasahílí iki miníki, netá matatini gona milíki ali laga laga iki alíki minalo.

<sup>19</sup>Lá iki monó gihila ali utó itamó nenémo luhúsáini loló okíko, alíkaloka minoloko voko minatímó neve. Lá noiko, keza alévolé kemetameni gihila nene ali lá itave loko lo kemezo.

<sup>20</sup>Kee, Timotíga, helisa netá Ómasímo gimímó nene gizapa oko ale minozo. Itó ha gakó písila nomímó nene vegená lugáa keza ali minake, lelí monó pelevesava ziake, mukí netá matá mogona gele asú noune líki, soza gakó liaká niave. Géisi ámina gakó kemegeza amezo.

<sup>21</sup>Vegená lugáate ámina gakotó víki gimíziake, lelí monó ángi satíake ahulikave.

Ómasímini nasahílí nene lekelitoka mino moloko minino.

\* 6:13: Zon 18:37

## Timotini Luhuva Nampa 2 Pauló Gizo Amimó

*Timotini nónohá amike gizo ami gako*

<sup>1</sup>\* Neza Paulona Izesu Kilistotoka voko gímizekugo alévolé lekemetamenigi minatave loko lo mololeta gakóma lo utó itove loko Ómasímini gakató imane Izesu Kilistoni aposolo loló oko nouúmina,

<sup>2</sup> Timotiga, monó gapoló gelémo muluke gelémo lá uke nigika gemenou ve luhuva imane gizo nogumuve. Ómasi ameteho itó Guivahanite Izesu Kilistó eza nasahilí ogetoko agika hize gemeko hulu ale utó ogetino.

*Timotinimú Ómasi agepoka like agika ale kii lota gako*

<sup>3</sup> Avónege kigika lamanaki minake, omolelé amalelé iki Ómasi gelekelé itiki minamómáminoko nénisi nigikagú gako nomigo Ómasi gelekelé otuke agepoka loaká noumó nene, gamena gamena únaká neteká geikumú gele minuke Ómasiloka loaká nouve.

<sup>4</sup> Makotoka vinogo nougo nenikumú ive nama animó nene gele minuke, voko ániogimikinake mulúnégú agila guluma napa itive loko geleaká nouve.

<sup>5</sup>\* Ómasimú gele alévolé oaká gihila nene geitoka nemó nene gele nominuve. Itó atekaho Loisi itó izokaho Zunisi goí iki Izesukumú gili alévolé inasigo geza ámináminoko gele alévolé onane loko gele guni onouve.

<sup>6</sup> Nenemú gelekuke, lokugo, gako imane goha gilitanize. Neza gotokaló nigizani molokugo Ómasimo monolímíni zámua lehizegetamó nene, gizapa lamaná oko ale otenako, loló guluma ino.

<sup>7</sup> Lá nooko, láa loko gelezo: Ómasimo nene nemú manamú lelegesá legeakalímíni lematameni lehizeletamimóma neve. Amuza moloko ligikatunú nasahilí oketoko ligika lugupe gizapa itave loko lemeneimóma neve.

<sup>8</sup> Nenemú Guivahanitémíni gako lamaná lo utó itanikumú govoza helemino. Lá nooko aí hozamule loko kalapusi numukú noumómave loko nenikumú govoza helemino. Ómasi eza zámua gemeneimó nene ale minoko, Izesuni gako lamanakumú gopoguni miligitikoma, gezagi nenémíni amupiló hanuva minozo.

<sup>9</sup> Ómasi eza lugutó vizike otopá ziki etó iki keké viziki minatave loko sele lo limimó nene oko moloko uhá ma lamaná nego lá amimó. Ezáa agikatunú geleake nasahilí hagitana lehizeletamó nene eza gozapá mikasi ale utó amike Izesu Kilistoni mututoni lilí itakumule loko lehizeletake,

<sup>10</sup> gihila zitikú nene imane gamenaló lugutó vizeaká amelaho Izesu Kilistó lemekago ámina nasahilí nene utó o lamaná imó. Áisi nene heleaká netá apele heleake, alévolé oko minoaká netá helemoaká nene aí gako lamanatanunú ale utó oletamó neve.

<sup>11</sup>\* Neza ámina gako lamaná lo utó utó ve, itó aposolo itó tisá minatane loko Ómasimo nelémo etó onoiómoma neve.

<sup>12</sup> Itó neza nenemú miluma geleaká netá nene numupiló itekago kalapusi numukú noumóza, nenemú novoza helesá amive. Neza gele alévolé onou vémini mogona gelenouve, itó nagata losi gelemoko noinake eza amuza amelaho noinazo, nigika amenoumó nene gizapa onetoloko noviko, aí gamenava alitanogo ive loko gele guni onouve.

<sup>13</sup> Gako gihila geza ámegetatane loko lainim-ogetonoumó nene áminagú ale minoko Izesu Kilistotoka voko miní nene amikeve loko aikumú gele alévolé oaká itó gígika kemeaká nenémíni agikagú minozo.

<sup>14</sup> Ómasímini Sikalahú mulutegú minoko aleko oaká noimó áisi izokaho loló iko Ómasimo gemenei netá nene gizapa etoha oko ale minozo.

*Onesipoloni gako*

<sup>15</sup> Asia mikasiuka muki veganalite ahuli asú inimikave. Keikutí nene Pigeloki itó Helemogenekí niasimó. Nene mota gelenane.

<sup>16</sup> Onesipoló eza kalapusi numukú minukumú avoza helemigo gamena gamena luhúsáne ale kii lonetamó nenazo, Guivahanímo ezagi veganala zuhagi milumaváini geleko agika hize kimino.

<sup>17</sup> Áisi Loma apatoka oake nenikumú vitagá ike ike nelémo utó imó.



<sup>18</sup> Guivahanímo giliko, lamaná okikoma, gamena napaló Guivahanímo agika hize amitive loko noluve. Itó Epeso numutokagi eza nasahilí onetoko hoza aleko minamó nene komasí nomimó nene lamaná gelenane.

## 2

### *Izesuni gimisivagi ve lamaná minati gakó*

<sup>1</sup> Gipáne geza Izesu Kilistotoka voko gímizunikeve loko nasahilí lehizelimiaká noimó nenémíni agikagú minoko alévolé ozo.

<sup>2</sup> Ve mukilitini kovogisaló gakó mukí lo gumumóma nene, ve lugáamú gelekako alévolé ina veđená minikikoma, ámina gakó lehizekimikako, ámináminiki veđená lugáa lainim-ikitataze.

<sup>3</sup> Geza Izesu Kilistoni gimisivagi ve lamaná loló oko minoko, gezagi gopoguni miligi-tatakumú goselé gepelemino.

<sup>4</sup> Ami ve lilí iiki hozaváa alita vete hanuva veđenalite iki miliki itatotí apazá minanigave. Ami ve lilí itave loko kelémo etó i ve agulizaki ve nenémo giliko lagaváa gilitive liki nenémíni hozagó alitune liki gilitaze.

<sup>5</sup> Itó lesisitakú nene ve makolímó ámina zohilímíni gizapa vevámo lesisimú lo huta gakó avutá itimó nene, gihiláa aleminogo ive.

<sup>6</sup> Makó eza zuháina oko amuza moloko miluma geleko zuhá iti vémo nosánetá omolikiko goí oko nanogo ive.

<sup>7</sup> Guivahanímo gígika alémo zou lokiko nene, netá matá mukí gele vevesataninazo, anoza gakó láa loko lo nogumumó nenémíni mogonáa geleko alémo etó ozo.

### *Pauló monokumule loko milumámini amupiló minamó*

<sup>8</sup> Geza Izesu Kilistokumú gele minozo. Eza Tevitini agávolaho heleneikutí mómoká oko oti veve loko aí gakó lamaná loaká nouve.

<sup>9</sup> Ámina gakó lamanakumule loko gasovagi netá noguhuke, miluma geleaká nouve. Lá nouke, galana veđitana nagá zinimikago noumóza, Ómasímini gakó nene nagá alina-mamóma neve.

<sup>10</sup> Neza miluma hozaváa Ómasímó kelémo etó i veđenakumule loko gasovagi netá geheaká noumó nene keza Izesu Kilistó kugutó vizeaká netá itó alévolé lapanalagi ali lá itave loko lá oaká nouve.

<sup>11</sup> Gakó makó láa loko nemó nene gakó gihila neve:

Áisi hilikú miní amunimó nekoma nene,  
ezagi makó minoko aleko inogo une.

<sup>12</sup>\* Miluma netá lumupiló noitiko nene,  
nenemule loko goselé lepelemiko hanuva gihitunimó nene,  
alika ezagi apizeko mininake  
aí hozaló gizapa inogo une.

Aikumú noamive loko egamega otatunimó nene,  
eza áminámini oko egamega oletanogo ive.

<sup>13</sup> Leza monokú alévolé amitunimó nene,  
ezáa mogonamú egamega amitimó nenazo,  
eza hanuva lonoi gakotó amegesaló moloko minanogo ive.

### *Ómasímó hozaló vevamú giliko lamaná iti gakó*

<sup>14</sup> Monó gilina veđená gei gizapaló niamó nene gakó imane ale gosohá oko lo kemekoko Ómasímini avogisaló láa loko lo hukoko lo kemezo: Ha gakó pisila nomi gakó likivilege vino. Ámina gakó nenémo negénegé iki liva liva niago gele veđená nene kelémo golesa oaká noive.

<sup>15</sup> Ómasímó geikumú gelekiko hozaló ve lamaná loló itane loko amuza moloko minoko hoza alezo. Lá oko gakó gihiláa nene ale vevesoko lo kemeko noako, gei hozamú govoza heleaká netá nene gumupiló iteminogo ive.

<sup>16</sup> Gihila nomi gakokumú vivi vovoga nilikoma, gemegeza kemezo. Lá niamó nene láa liki niviki monó ahulanigave.

<sup>17</sup> Soza gakóini nenémo litá oko halamé napa nenémínoko minoko veđená mukitoka napa oko vo alinogo ive. Ve nenémínáa keikutí makó Haimeniasiko Pailitoko keza nene niasive.

<sup>18</sup> Keza nene gakó gihila ániagi satikasike ahulikásike, ligika nene hele minakutí mota otekamó nenazo, alika gosohá lugupegi lelémo oteakaláa nomive likasike monó gele veđená lugáa kilími gopá-napa niasive.

\* 2:12: Mat 10:33; Luk 12:9

<sup>19</sup> Ómasímíni vejenala zuha keza gehani lukesa hizinamó nenémíni iki minikago, netá makolímó kelémo mómoká aminogo ive. Keí lukesanitó Ómasímó luhuva láa loko gizonóimóma neve:

Guivahanímó ezáa vejenala zuha áního vevesoaká noive.

Itó makó láa loko gizonóimóma neve:

Guivahanímíni agulizá ali mina vejená mukitoka gopa napa netáini litá iki ahuli asú iiki kemegesa amítaze.

<sup>20</sup> Leza monó guluhá vejená nene lapegitana noune. Agulizaki ve makolímíni numuni napagú nene lape haitopaitolímíni golutunú itó silivatunú lílí inamóma itó zatunú itó mikasitunú lílí inamóma nene neve. Makó nene netá lamanakumú neve, itó makó nene ha netakumú neve.

<sup>21</sup> Makó keza gopa napa netá mositamó nene kígika gizopa lokiko nene, lape gihila lílí ikiko, numuni amelaho lusa geko kelémo otopá zekiko, haitopaitó hoza nene numuni amelahíni alitanigave.

<sup>22</sup> Gosohá ve nenete kugupémo haitopaitó netakumú mumuzó oaká noikutí nene géisi mino otopá zezo. Lá okoko nene, gezagí itó kígika gizopa lo minago Guivahanímú voká voká líki sele líki miniaká nia vejenaki vevesoko minoaká, gele alévolé oaká, líkígika kemeaká, hulu oko nonagá oko minoakakumú amuza mlalo.

<sup>23</sup> Lovaga líki gemé zíkí nila gakó negí gakó ha gakó nene givilege vino. Nenémíni gihila nene lova leta lava leta oaká nemó nene gelenane.

<sup>24</sup> Guivahanímíni hozaló ve keza lílí ali iki lova leta lava leta amiki, vejená mukí alévolekutí lí kememiki hulugutí monó vevesíkí lainim-ikitataze.

<sup>25</sup> Kéisi legesó iki monolímíni gala véa nene kilími vevesatave. Ómasímó kagata alekiko kígika ali vilígiki gakó lamaná áního vevesatahe lílí lá inigave.

<sup>26</sup> Lá ikíko, monolímíni gala vetíni kagata goha koló okiko, Satani gelehusígú apilínigí akutí nene gologí okímíkiko, Ómasímó lititoka molatitoka iki minataze.

### 3

#### *Gamena asú inogo noiko utó ita vetini mogona*

<sup>1</sup> Geza gakó makó láa loko gele hee lozo: Gamena asú inogo noiko, golesa netá utó oko puu linogo ive.

<sup>2</sup> Vegená lá iki minanigave: Kezánimú giliko itekiko, moni henonímú kumu helepelé iko miniki, kezáini iki milíki ita netalímó kumu helepelé okiko, netá matakumú alíki letiki, kezáini kugupe ali otíkí, izóikini améikini gakó gíli ahulíiki, netá lamaná makó kimitató lekegepoka líki mokáneve lamíki, kígika lamanakí nomiko,

<sup>3</sup> kígíkatunú nasahílí nomimó miníki, lihíma ali miníki, lotoka lataka híziki, kugupe kígikaló gizapa amíki, gala kemetameni iki miníki, netá lamanakumú gíli golesa iiki,

<sup>4</sup> kimímika líaká iki, kogoka kagaka víziki, kezáini alími napa itíki, kígika nene Ómasíloka mílaníkí kígíkaa nene kugupémo amu heleaká noi netató mílanigave.

<sup>5</sup> Lá iki kugupémo nene monó kugupe itimóza, monolímíni zámuza nene vasá zi ahulani-gave. Lá iki níminiko, geza áníhookoma, gemegesa kemeko kezagí apízemo.

<sup>6</sup> Ve nenémíniágutí lugáa keza asugunatoka víki gopa napa mihína nia venalitíni numúikú itíki kogoka víziki gakó lí kímíki kivilígíaká níave. Ámína vená keza lihíma napa genavagí ali minake, la netá lami netá nenémo kumu helekago,

<sup>7</sup> monokú mína vetíni gakó gíliaká níamóza, Ómasímíni gakó gíhila gíli vevesísá amave.

<sup>8</sup> \* Ve losítá keí kugulizá Zaneke Zapeleko kéisi nene Moseni gakó pelevesava zesímó áminagó iki ámína ve kígika gopa o vímó nenete lelí monolímíni gapo ahulíake negí híziaké gopa íkave.

<sup>9</sup> Zaneke Zapeleko keza negí hízesímó nenémíni mogona utó imómáminíki kéisi negí níhizemó nenémíni mogona utó okiko, vejená mukító keza áního asú itámó nenazo, netá matá iki milíki níamó nene nana itotí lá imí imí itítave. Ma lá aminigave.

#### *Timotini agata alike lo asú oko lo ami gakó*

<sup>10</sup> Lá imóza, makó minusíke oko moloko umó itó monó lainim-oketumó itó oko moloko uke hoza alumó nenémíni mogona kelepizumó, itó Ómasímú gele alévolé oko minumó itó netá matakumú goselé nepelemigo legesó oko minumó, itó Izesuni vejená nígika kemeko minumó, itó gasovagí netá numupíló itigo amánapa oko ote minumó,

\* 3:8: Gá 7:11

<sup>11</sup> \* itó gopoguni nimilinitago miluma geleko minumó, itó Atiokia numutokagi Ikonio numutokagi Listela numutokagi gopoguni haitopaitó milinitago miluma netalímini agik-agú minumó nene, némegetoko anike ánígonanimóma neve. Lá oko minumóza, Guivahanímo ámina netakutí gologi onetamóma neve.

<sup>12</sup> Itó vejená keza Izesu Kilistotoka víki gímiziiki monó gapoló vitamó nene keza mukitoka gasovagi netá kumupiló itinogo ive.

<sup>13</sup> Lá onoimóza, ve golesagi soza monó liaká vegi keza kogoka vizita vegi kogoka vizikiko iliki niva vegi nenete hoza aliliki niviko napa omo itinogo ive.

<sup>14</sup> Géisi nene gakó lo gemeaká umó nene gigika onoimóma neve. Lá okago, gakó lo gemehá vejenalítini mogona gelenanimó nenazo, nenemú ale gikitoko ale minozo.

<sup>15</sup> Geza izegipa namutó minanike apazá pepa monó gotola gatoloko noitenike, save alekanike Izesu Kilistonimú gele alévolé anikeve loko gugutó viziti gakó gelenane.

<sup>16</sup> Monó gotola pukugú luhuva gizinamó mukitó nene Ómasímini Sikalahulímo kigika ale vávani okimikago ali utó inamóma neve. Nenegutí gatoko noguluko monolímíni mogona lelepizeaká noive. Lá ike, lagata aleaká noive, itó gopa gakó noluko lelémo gapoló moloaká noive, itó lagata alike lelémo vevesoaká noive, itó hee loko minoko aleko ituni gapo lelepizeko lelémo vevesokiko,

<sup>17</sup> Ómasímini vejenala gihila loló oko mininake monokú legegagi avasavagi mininake, monó hoza lamaná haitopaitolímíni aleko minanogo une.

#### 4

<sup>1</sup> Neza Ómasímini avogisaló itó Izesu Kilistó eza minoko vejená logómulagi itó helemoláagi gona mololetanogo i vémini avogisaló nene Izesú amuzavagi aniteko gizapa oletatimómave loko láa loko lo hukoko lo gimitoze, gelezo.

<sup>2</sup> Geza nene monó lo utó oko lo kimitanimó nene, vejená nenemú nokivisiko nokivisemiko gopa lo kemezo. Kagata aleko kelémo vevesoko kelémo oteko goselé gepemiko lainim-oketozo.

<sup>3</sup> Minomo iteko gamena makó alitokiko, monó gihilamú géneka liiki ahulanigave. Lá niiki, monó nene kagatatunú giliko lagavagi minatimó nenéminigó gilitune liki tisá kilími nupa ikiko, hanuva gopa gakó kumu hiliti gakó li kimikiko,

<sup>4</sup> monó gihila nene kemegesa amiiki, gitene gakokú víki gímizinigave.

<sup>5</sup> Keza lá itamóza, géisi nene gigika gagataló gizapa oko minozo. Gasovagi netá gumupiló noitikoma, alévolé ozo. Izesuni gakó lamaná lo utó oaká hoza naleko ale gúezo. Ómasímo hoza gimimó nene ale lutegeko alezo.

<sup>6</sup> Nénisi hilito gamena mota alitokave. Nipili hilikiko nugupeletó miguhala nanigave.

<sup>7</sup> Nénisi nene hoza lamaná aleloko vumó nene mota ale asú onouve. Zohikú eza aviligigo eza aviligigo iaká niamó nenéminoko hoza ale lutegeko makiló anitekuve. Gakó gihila gizapa umó nene gologolo samimóma neve.

<sup>8</sup> Itó okulumakutí gonanalivagi akilí lamaná nene vevesiki miniki aliki iaká nia vejenalítini mututoní nenémo negeva noimó nene gamena napaló Guivahani áisi ale vevesoko gona moloaká vémo nezagi mukí vejená eza anítiti gamenamú lagata losi gelemoko ageva oaká nouhá vejená nene ámina akilí lehizeletanogo ive.

#### *Vejená lugáatini gakó*

<sup>9</sup> Geza nene nenitoka atove loko amuza moloko litá oko atanikumú noluve.

<sup>10</sup> \* Temá áisi nene mikasigú netakumú giligo, itekago, ahulonimiaké Tesalonika numutoka vokave. Keleseké eza Galesia mikasiloka vokave. Taetasí eza Talamesia mikasiuka mota vokave.

<sup>11</sup> \* Leza nene Lukakigó nousive. Makí nene hozagú nelémo vatí iti ve noinazo, nenemú alémoko ano.

<sup>12</sup> \* Tikikoni nene amiselekugo, Epeso numutoka novive.

<sup>13</sup> \* Anogo nookoma nene, hepekumú luhoaká gó nene Toloa numutoka Kaloponi numutó gololohá o molonoumóma alenetoko ano. Itó monó gotolánemagi itó pepa agila makó molonoumómagi alenetoko ano.

<sup>14</sup> \* Kapatunú netá matá loló oaká ve Alesaté nene netá golesa goha alenimikaze, nenemú minoko Guivahanímo lihimala lelegí oko aminogo ive.

<sup>15</sup> Eza amuza moloko lelí monó gakokumú pelevesava zimó nenazo, áisi gelémo gopa napa okatize, gizapa etoha oko minozo.

\* 3:11: Apo 13:14-52; 14:1-7; 14:8-20 \* 4:10: Kolo 4:14; Pile 24; 2 Koli 8:23; Gal 2:3 \* 4:11: Apo 12:12; 13:13; 15:37-39 \* 4:12: Epe 6:21-22 \* 4:13: Apo 20:6 \* 4:14: 1 Tim 1:20; Age 62:12; Lom 2:6

<sup>16</sup> Goní nougo, ganá apí oko není mogonamú lo nokumugo, makolímo nelémo vatí oko hize lé onetamimóma neve. Keza mukító ahulí asú initamóma neve. Nenémini lihima nene Ómasímo ahuloketino.

<sup>17</sup> Guivahani nenémo nasahilí onetake hize lé onetake, aí gakola lo utó oloko vinake lo lutigitane loko itó hetoka vegealite gili asú itave loko luhusáne ale gilitonetamó. Lá noike gasovagi netalímini agepagutí asene zenetake vínasonetamole.

<sup>18</sup> Itó Guivahani eza golesa netá nemupe manamupe nelémo vatí oko asene zenetoloko voko okulumakú aí avogisaló avasavagi nelémo molanogo ive. Aí lapaná nene mino lúaló moloko minino. Lamaná.

*Gekéini loketa gakó*

<sup>19</sup> \* Itó imane Piliskaki vana Akuilaki itó Onesipoloni vegejala zuhagi gekéini noloketuze, nene lo kemezo.

<sup>20</sup> \* Elastó eza Koliti numutoka minamó, itó Tolopimoni avisekago Mileto numutoka ahulotonouze.

<sup>21</sup> Geza nene golini gamena alitamiko atove loko amuza moloko ano. Eupuló eza gekeka nologetaze, itó Putené itó Linó itó Kalautiá kezagi ligivetege lugáagi nene geké niligitave.

<sup>22</sup> Guivahanímo geí sikalahutoka minino. Ómasilokatí nasahilí nene lekelitoka mino moloko minino.

## Taetasini Luhuva Pauló Gizo Amimó

*Taetasini nóhóh amike gizo ami gakó*

<sup>1</sup> Neza Paulona Ómasímini gelekélé ve itó Izesu Kilistoni aposolo nouke hoza nimimó nene Ómasímo kelémo etó i vejená keza monokú alévolé itave loko itó nenéminiki miniki aliki itakumú gakó gihila monokú nemó nene gili vevesatave loko ámina hoza nimimóma neve.

<sup>2</sup> Není hozámini mogona lá oko neve: Ómasi soza losá ami vémo gozapá mikasigi okulumaki utó ami gamenaló nene alévolé lemetameni lehizeletatove loko lo mololetoko likumú lagata losi gelemoko ageva oko mínoaká nounge.

<sup>3</sup> Nene gakó nene Ómasímo gamenamú giligo, etokago, aí gakó li utó niago, ale utó imó. Ómasi lugutó vizeaká vémo lo hukonetató ámina hoza lehizenetamó.

<sup>4</sup>\* Monó gapoló gelémo muluke gelémo lá u ve Taetasiga, gezagi nezagi hamó monó gele alévolé onousi ve luhuva imane gizo nogumuze, gelezo. Ómasi ameteho itó Izesu Kilistó lugutó vizeaká ve aitokatí nasahilí itó hulu geitoka minino.

*Kiliti pokolaló Taetasí monó hoza aleko minati gakó*

<sup>5</sup> Kiliti mikasi pokolaló ahulogetumó nene hoza agepa minamó nene ale vevesoko ale apasatane loko logetumómáminoko geza numutó namató mohona oko monó gizapa ve kelémo molatane loko ahulogetumóma neve.

<sup>6</sup>\* Ve makolímohe makolímohe lihimavala nomitimó, ganakutí vená hamokó ale minati vémo, aí izegipala nenete Izesukumú gili alévolé itamó, itó vejená makolite aikumú giliko ha netá matató ahulo latila oaká ve hokolizá oaká ve nomitimó, ve nenémináa pastoli hozagú kelémo molatane loko logetumóma neve.

<sup>7</sup> Itó Ómasímini hozaló gizapa itamó nenazo, ámina hoza alinigi nia ve nene lihimáini nomitimó minataze. Lá iki gínikaha amitamó itó litá iki alévoleka lamitamó, piá nagamí vauva aliki namitamó, lova gakó lamitamó, moni henonimú lagaváa gelemitamó minataze.

<sup>8</sup> Lá lá iki veno vejená ikikoma nasahilí ikitiki kilími milatamó, itó netá lamanakumukó kumu hilitimó, zou líki minatamó, hee hee líki miniki aliki itamó, kigika gizopa lo minatimó, itó kigika kugupeló gizapa itamó neve.

<sup>9</sup> Lá iiki monó gakó nenémo hize lé oketiko, monó gihila lamaná nene vejená li kimiki kagata aliki hizi lé ikitiki, lelí monó aliki letiaká nia gakó pelevesava ziki ali amunagú itave loko lo keme keme nouni gakokú nene, leza guluko alévolé noi gakó ali gikitiki ali minata ve nene pastoli líl itave.

<sup>10</sup> Mogona lá oko nekumú noluve: Ve mukí nene gínikaha niave. Ha gakokumú li volaló imaló iki kogoka viziaká ve niave. Ómasímini anosa nene kugupeló moloakakumú amuza miliaká nia ve nenete vauva aliki lá iaká niave.

<sup>11</sup> Lá iaká nia ve nenete moni henoni alitune líki etami mogona aliki lainim-oketatune líki giliake, ve lugáa venáini izegipáinigi kilími gopa iaká niakumú kegepa apizilo loko loketatune.

<sup>12</sup> Kiliti mikasi pokolaló nia ve kezáikutí gakó mogona gele hee lo mina ve makolímo láa loko limó neve:

Kiliti vejená keza nene sozaló vejená, akohú galagitana, nosánetakumú iza galámo imómámini iaká niamó nene gasovagi vejená minake hozamú goselé kepeleaká noi vejená niave.

<sup>13</sup> Neza ámina gakokumú gulugo gihila loló okave. Nenemú geza vauva aleko gahá kemeko kagata alekako, monó gakó nene gili vevesiki miniiki,

<sup>14</sup> Zuta vetini gitene gakó ha gakó nene gili aleminigave, itó monó gelema vejenalite gakó gihilama kemegeza amiake hanuva gakó li hukinamó nene gili aleminigave.

<sup>15</sup> Kigika gizopagi mina vejenalite netá matakumú gelego, gizopa loakalíminigó neve. Itó golesa netá nenémo kigikagú siholoni gekago gili alévolé ama vejenalitini kigika kagatagú siholoni gekago golotuva loaká noimó nenazo, nenemú keza netá matakumú gelego, ámináminoko siholoni geko golotuva loakalíminigó neve.

<sup>16</sup> Keza Ómasímini mogona gelenoune líki kegepatunú liaká niamóza, iki miliki iaká niamó nenémo mogonáini lo utó oaká noigo, gihila nomive. Keza nene vejená golesa gakó gili ahuliaká vejená hoza lamaná alitatímini oko nomive.

\* 1:4: 2 Koli 8:23; Gal 2:3; 2 Tim 4:10 \* 1:6: 1 Tim 3:2-7

## 2

*Monó lamanalímini agikagú gako*

<sup>1</sup> Géisi nene monó gihila lamanalímini agikagutikó lo kemezo.

<sup>2</sup> Ve olopa keza etó iki zou liki miniki, kígika kugupe gizapa iki miniki, monó gelenouhá nene gili vevesiki itó Izesuni vevená makó kígika kimúiki itó hulu iki gasovagi netalímini agikagú alévolé iki minatave loko loketozo.

<sup>3</sup> Áminagó oko olopa vená keza monó vená lilí iki miniki, lotoka hiziki li volaló imaló amiki, piá nagamilímini gelekeleláa minamítave loko loketozo.

<sup>4</sup> Lá iki vená gosohá nene netá lamanakumú lainim-ikimikiko váinigi izegipáinigi kígika keitoka miliki gizapa lamaná ikitatave.

<sup>5</sup> Itó lá iiki olopa vená keza kígika kugupe gizapa lamaná iki, mokoló minamiki, numúitó apáitó miniki netá matáini gizapa lamaná iki, kígika lamanaki miniki váini nene gelekelé lamaná ikitiko, vevená makolite ániigiiki Ómasímini gako alivi letivi amitave.

<sup>6</sup> Ámináminoko gosohá ve keza kígika kugupe gizapa iki etó iki minatave loko kagata aleko lo kemezo.

<sup>7</sup> Itó géisi netá lamanakumú ale etó oko zou lo minoko monó gako nene giza zohikutí lamoko lo keme-loko novoko, goí okako, ániigiiki gémegetiki vítave.

<sup>8</sup> Monó nene ale vevesoko lo kemekako, nenemú pelevesava zemiko, monokumú lova ali limiaká nia vevenalite lelikumú gako golesa linigi vitagá iiki kovoza helekiko ahulatave.

<sup>9</sup> Megusa izegipa lilí iki hagítana hoza aliki miniaká nia vevená nene ve napáinitini gako gili aliki gelekelé lamaná ikitatave loko, itó ve napáini keza laga kivistive liki ve napáinitini konotó aliki keí gako pelevesava zemitave loko loketozo.

<sup>10</sup> Ve napáinitini netá matá gumína alemiki, netá matató gizapa lamaná iki hoza aliki iki miliki itamó nenémo vevesokiko, Ómasi lugutó vizeaká vémini monó nene némini manámini iki ali otitave.

<sup>11</sup> Nenemule loko Ómasímo numutó namató vevená kugutó vizitove loko hagítana oko nasahilí olimiaká netá ale utó okave.

<sup>12</sup> Lá oake, ámina nasahilí nenémo apí olimioko lelémo vevesokago, imane mikasigú ha netá golesamú lumu helepelé oaká imó nene ahulokinake, imane mikasiuka ligika lugupe gizapa lamaná oko vevesoko mininake, monó lemetameni iko minanogo une.

<sup>13</sup> Lá inake, Ómasi napa lugutó vizeaká ve Izesu Kilistoni lapaná utó itikumú ageva oaká nounimó nene gonanalivagi netá nenazo, nenemú lagata losi gelemoko ageva oaká nouné.

<sup>14</sup> \* Áisi nene lelikumú loko miluma gilike, netá golesa aleaká uhakutí akagá oletatove loko minoko aleko imoláa ahulamó. Lá oake, aí vevenala zuha lelémo etó oake monó gihila amuza miliki aliki minatave loko ligika nagamú zeko lelémo lamaná imóma neve.

<sup>15</sup> Gakó imane lo nogumumó nene ale hutilí oko lo kemezo. Monolímini zamuza alenikumú gelenoko kagata aleko kelémo vevesozo. Ve makolímó geikumú giliko, lememino.

## 3

*Lamaná oko oko moloko ituni gako*

<sup>1</sup> Monó vevená geí gizapaló minamó nene gako ale gosohá oko láa loko lo kemezo: Keza kiaegeini itó gamani vevená iti minamoláa gelekelé ikitiki gakoíni gili alitaze. Lá iiki hoza lamanaláa haitopaitolímíni alitakumú ali vatí itaze.

<sup>2</sup> Alivi letivi iki lova leta lava leta amitaze. Hulu iki miniki, vevená mukilitini kovogisaló zou liki minataze.

<sup>3</sup> Lezate gozapá ámináminoko minunike, negi hizeko gínikaha oaká nouko, lilími gopa iaká amó. Lá okunike, lumu heleaká netá lagava geleaká uni netá nenémini gelekeleláa otoko minunike, vevená kelémo golesa unike, vevenalite iki miliki a netakumú nenéminoko minatuninaze lokunike, levé nogoza noaká unimó. Lá nouko, lelikumú gili golesa niago, keza mukahá lepelego leza mukahá kupuluko oko minoaká unimó.

<sup>4</sup> Lá oko nouko, alika nene lugutó vizeaká ve Ómasímo nasahilí olimiaká itó agika lemeaká mogona ale utó oake lugutó vizimó.

<sup>5</sup> Leza hee hee loko minoko oko moloko uhá ma lamaná nego, ániigoake lá amimó. Agika hize limikakeve loko, minoko aleko gosohalímini nagamí holoakakú itó Ómasímini Sikalahulimitokatí gosohá utó oaká nenémo lelémo lamaná imó.

<sup>6</sup> Ómasi eza nene lugutó vizeaká ve Izesu Kilistotokatí Sikalahú nene vauva aleko lehizeletamó nene

\* 2:14: Age 130:8; Gá 19:5; Gapo 4:20; 7:6; 2 Pit 2:9

<sup>7</sup> Izesuni nasahililámo Ómasímini avogisaló lihimate asú olimikago minoko, alévolé apakumú lagata losi gelemoko ageva oaká nounimó nene ali lá itave loko lá oletamó neve.

<sup>8</sup> Gakó lo nolukumumó nene lamaná gihila nenazo, gakó imane amuza moloko lo kimitane loko noguluve. Lá okako, Ómasimú gili alévolé ina vejená keza netá lamaná loló itune líkigó hoza vauva aliki alitave. Lá ita netá nene netá lamaná nenazo, lá itamó nenémo vejená kelémo lamaná itimó neve.

<sup>9</sup> Ha gakó li volaló imaló iki miniaká niamó nene gihila nomimó, itó avóike amunaloka ve hutilí iki omolelé amalelé iki miniliki itiki mína vejenalitini kugulizakumú lova leta lava leta iaká, itó Mosé lo hukoko li gakokumú lígí ahulígí iki lova isá isá iaká niamó, nene gakó nene ha gakó gihila nomimó nenazo, gele ahulokoko gemegesa amezo.

<sup>10</sup> Ve makolite monó ali golesa iki hize hou loaká netá ali utó ikikoma, gamena hamope gamena lositá ahe kagata aleko gakó lo kimitanimó nene gelemikoma, kimisele ahulokako, kezáinigó víki háitotoka minatave.

<sup>11</sup> Ve nenémináa netá golesa aliliki niviki kigika gopa o vimó miniake, kezáini iki miliki amó nenémo kei mogona lo utó okave loko gele minoko nenémini oketozo.

*Hozamú lotake vejená gekéini loketamó*

<sup>12</sup> \* Atemasinihe Tikikonihe geitoka amiselekugo, anitekiko nene, Nikopoli numutoka noitoze, nenitoka atove loko amuza molozo. Neza nene ámina numutoka golini gamena minátomó onoiize.

<sup>13</sup> \* Ve lositá Apoloki goní gakó mogonáa geleaká i ve Zenaki keza monó hozaló vitáive loko nosánetáini henokanóiki ale vatí oketatove loko amuza molozo. Lá okako, netá matakumú vitagá amitáive.

<sup>14</sup> Vegenate zuha keza hoza lamaná aliliki niviki kigika itive. Lá okiko, lugupémini netá hize lé omiakakumú nene nasahilí hoza aliliki niviki, monokú iki miliki itamó nenémo gihila ale utó inogo ive.

<sup>15</sup> Nezagí makó nouni vejená keza mukitoka geikumú geké niligitave. Monokumule liki kigika limiaká nia vejená geké noloketuze, lo kemezo. Ómasilokatí nasahilí lekelitoka míno moloko minino.

\* 3:12: Apo 20:4; Epe 6:21-22; Kolo 4:7-8; 2 Tim 4:12

\* 3:13: Apo 18:24; 1 Koli 16:12

## Pilemoni Luhuva Pauló Gizo Amimó

*Pilemoni nónohá amike gizo ami gakó*

<sup>1</sup> Neza Paulona Izesu Kilistokumule loko nagá numukú nou vémina itó ligivetehe Timotiki makó nousike Pilemó ligika gemenousi ve hamó hozaló ve nouninazo, nenemú luhuva netá imane gizo nogumuve.

<sup>2</sup> \* Itó venaka ligivetehe Apiaki monó hozagú amuza moloko alévolé oaká noi gipaka Alikipó, itó geí numukú monokumú alegesá iaká nia vejenaki hamó luhuva gizo nolukumuve.

<sup>3</sup> Ametehe Ómasilokatí itó Guivahanite Izesu Kilistotokatí nasahilí itó hulu lekelitoka minino.

*Pilemó gele alévolé oake agika kimitímini mogona*

<sup>4</sup> Numuna loaká nou zupa zupa nene gugulizá oko geikumú Ómasi agepoka loaká noumó nene

<sup>5</sup> geza Guivahani Izesukumú gele alévolé oaká anike, Ómasímini vejenala zuha gigika kemeaká noanimó nenémini gakola nene vejenalite likago gelekuke ló oaká nouve.

<sup>6</sup> Itó géisi nene gele alévolé oakakú emane lezagi ligika molo hamó okinake, netá lamaná mukí Kilistotokatí lelitoka utó oaká noimó nene gele vevesoko gilitane loko Ómasiloka loaká nouve.

<sup>7</sup> Nigivénege, geza Ómasímini vejenala zuha nasahilí okimiaká noane. Lá oko gigika kemenikumú nene mulúnegú lamaná noguluke, nogoliza vizeaká nouve.

*Pauló Onesímini goha alématihe loko Pilemoni loká imó*

<sup>8</sup> Nenemú etati netá alitane loko Kilistoni gakotó lo hukoko logetatomó nelina, vávani oko lo gumulinamóza,

<sup>9</sup> leza monokú nouhá vejená eza agika amigo eza agika amigo oaká nounikeve loko hagitana voká noluve. Neza Paulona Izesu Kilistoni monó gakó lole ale vémina itó aikumule loko nagá numukú nou vémina noluve.

<sup>10</sup> \* Neza nagá numukú nouke, ve makó alémo monó gapoló muluke alémo lá u ve agulizá Onesímo aikumú noluve.

<sup>11</sup> Agulizalímini mogona nene lelémo vatí oaká ve nego, áisi goí oko gelémo vatí amigo etamimóza, itínasa nene gezagi nezagi lelémo vatí oaká ve loló okago etokave.

<sup>12</sup> Áisi nene není gomuháne noimóza, goha alémo atiginá okugo, geitoka novize.

<sup>13</sup> Neza nene Izesuni gakó lamanakumule loko nagá numukú nougo, áisi nene geitó omolelé oko gelekéle onetative loko ale gilitanogo umóza,

<sup>14</sup> geza gele nememanitó alémo lá okugo alévolekutí nemekatane loko gelekugo, gena okago, hulugutí nimitane loko gelekuke alémo atiginá nogetuve.

<sup>15</sup> Onesímo ahulogetamó nenémini mogona lá oko noitive: Ahulogimikikoma nene, gamena koma oko vokiko atiginá oko nene gezagi alévolé oko mino-loko voko minanogove.

<sup>16</sup> Nene gelelekeleó ogetamitive. Koma itetigi oko minatize. Monokú gigivekaho loló okago húnane novive. Itó nigika amenou ve noimóza, geitokagi ha netakumupe Guivahanímini izegípa loló ikumupe áminámini oko itetigi oko minatimó neve.

<sup>17</sup> Nenemú nenikumú gelekako, gigivekaho noitomó nene, Onesímini alémo mulukauka molatanimó nene, gelekako, Pauloni alémo mulukauka molanimó gilitize.

<sup>18</sup> Itó goí oko netá makó ale golesa ogetonoitimó itó geitoka lihimala ma netimó nene, ámina lihima nenitoka molatane.

<sup>19</sup> Neza Paulona láa loko není nigizanitunú luhuva gizo nogumuve: Nezáne apasoko giminogo uve. Lá itomóza, nenitokatí alévolé gemetameni alenimó nenémini lihima napa geitoka nemó nenemú ma lamuve.

<sup>20</sup> Nenemú, nigivénege, geza Guivahanimule loko netá makó loló onetatane loko noluve. Kilistotoka gímizusimómave loko mulénegú lamaná gilitove loko naná naná onetozo.

<sup>21</sup> Geza není gakó imane gele alitane loko gelenouke luhuva imane nogizuve. Itó lutíminigó negopa gigikagutí geleko netá makó loló itane loko gelenouve.

<sup>22</sup> Itó lekeza nene nenikumú numuna nilató Ómasímo nagakutí gologí onimikiko geitoka vitove loko nene gele hamó oko gelenouve. Nenemú géisi nene akato numuni ale vavá onetozo.



*Vegená makó gekéini loketamó*

<sup>23</sup>\* Izesu Kilstokumule loko nagá numukú minusi ve nigivéneho Epapalá geikumú geké nologetave.

<sup>24</sup>\* Lá oake, hamó hozaló ve Makí, Alistakó, Temá, Luká keza nene ámináminiki geké niligitave.

<sup>25</sup> Guivahani Izesu Kilstoni nasahilí likigikagú mino moloko minino.

## Hipulu Vegenalitini Luhuva Gizo Kimimó

*Ómasímo gipalámíni agepa ale vávani okago gakó lo limimó*

<sup>1</sup> Ómasi eza gozapá agepagutí gakó liaká a vetini kegepa ale vávani okimikago, keza avotegini nene gakó haitopaitolímíni itó gapováa haitopaitolímíni li kimiliki iva iva amóza, <sup>2</sup> gamena asú inogo noigo imane gamena nene gipalámíni agepa ale vávani okago aí gakó lo utó oko lo limimó. Gipala eza mukí netá matalímíni mututonáa loló oko minative loko lota vémini zámuzatunú mukí netá ale utó imó.

<sup>3</sup> Ómasímíni lapanalámíni gonanalívámíni luhuváa aitoka utó imó neve. Itó Ómasímo minoko aleko itímíni lelegiláa aitoka minokanazo, nenemú ezáa zámuzalaló molo gele minake loaká noi gakó nenémó netá mukí hize lé omiaká noive. Áisi nene lihimate nagamí zelimiaká hozaváa ale asú oake, vozaú vémini agizani lamagaloka voko mitó minoko gizapa oko minamó noive.

<sup>4</sup> Lá noike ageló kivilege asú oko minamómámíni lelegilaló nene agelolitini kugulizáini avilegeko iteko mina agulizá alimó neve.

*Gipalámo ageló kivilege asú noi gakó*

<sup>5\*</sup> Ómasímo gakó makó gipala lo amimó nene ageló makó láa loko lo amesá amive. Makó nene gipala láa loko lo amimóma neve:

Géisi nene gípáne noanize,

nénisi nene itínasa gelémo utó nomuluve.

Itó lá okove:

Nénisi nene amelahina loló oko minatoze.

Itó áisi nene gípáne minative.

<sup>6\*</sup> Makó nene minoko ganá gipala amiselekago, mikasiuka liminogo noigo, gipalámíni gakoláa láa liki luhuva gizinamóma neve:

Ómasímíni ageló vegená keza mukitó gupá zi amiki agepoka li amitave.

<sup>7\*</sup> Itó helegaloka ageló vegenakumú láa loko luhuva gizonoiómoma neve:

Ómasímo lokago aí ageló vegenalitini kemetameni ale viligokago hepé kemetameni ali luhiaká niave.

Keza gelekelé izegipala loló o kimikago ló guluma kemetameni ale luhiaká niave.

<sup>8\*</sup> Lá onoiómoma, gipalamú nene láa loko luhuva gizonoiómoma neve:

Ómasi geza geí gonanalivagi siá alévolelaló minoloko voko minanogane.

Itó geí zámuzámíni hánusaváa ale minanike geí gasovaló nene ale hehe loko gizapa oaká noane.

<sup>9</sup> Geza nene hee loko minoaká netakumú giviseaká noive.

Itó netá golesamú nene gumu helesá amive. Nenemú Ómasímo geí Ómasi áisi nene gogoliza vizitani netupa hologimikago gígivekagíni kivilegekane.

<sup>10\*</sup> Makó nene gipalamú ve makolímó láa loko lonoimóma neve:

Guivahani geza ganatilisí mikasímíni guhaiváa molanimóma neve.

Itó okulumakuka keza nene gígizani luhuva ma niave.

<sup>11</sup> Keza miniki haha inigave. Itó géisi nene mino alévolé oko minanogo ane.

Kéisi nene luhoaká gó nenémínikí minikanazo, lítaha lanigave.

<sup>12</sup> Lá iki niko, géisi nene gakeko ale molanogo ane.

Lá okako, keza nene haitó kemetameki lílí inigave.

Lá itamóza, géisi nene noani gemetamenigí áminalokó minanogo ane.

Itó meleke gamenavaka nene ma asú aminogó ive.

<sup>13\*</sup> Itó Ómasímo gipala láa loko lo amimó neve:

Oko nigizani lamagáneloka minoloko voko noako

gala vega kelémo nupa okugo gígisa lapuvauka minanigave

loko gipala lo ami gakó nene ageló makó láa loko lo amesá amimó nenazo,

<sup>14</sup> ageló mukí keza sikalahuki netá Ómasímíni gelekeleléa nene lugutó vizeakalímíni gihiláa ale lá ituni vegená lílími vatí itave lokogó kimiseleaká noive, itó Izesú nene ageló kivilege asú noive loko gelenoune.

\* 1:5: Age 2:7; 2 Sam 7:14; 1 Iki 17:13

\* 1:6: Gapo 32:43; Age 97:7

\* 1:7: Age 104:4

\* 1:8: Age 45:6-7

\* 1:10:

## 2

*Lugutó vizeaká iteko minamó*

<sup>1</sup> Gipalámíni mogona lá oko noinazo, leza gopa gapo golesagú gapo veleko vokatune loko gipalamú gako gulunimóma nene goha ale gosohá oko amuza moloko alévolé oko geleko minatune.

<sup>2</sup> Agelogini kegepagutí gako Mosé gizamó nenémo gihila zekago, veganalite agelogini gakoíni avutá oaká itó gele ahulokoko pelevesava zeakalímíni mogona utó okago nene, lihínavagí nenazo, nenémíni ago helegáa lihima mota alikamóma nenazo,

<sup>3</sup> Lélisi nana oko lugutó vizeaká netá iteko minamó nene gele ahulokuko voko haha itimó neve. Ezáa Guivahanímo ganatilísi ámina lugutó vizeaká gako lo utó molamó nene katagatanú gili kolosiki gilina vete li limi limi ago ago, alévolé onomóma neve.

<sup>4</sup> Lá onoi, Ómasímo ezáa haitopaitó alévolé suni itó zámuzalámíni netala netá gosohá ale utó moloake keí gako nene hize lé otake Sikalahutokatí monolímíni zámuzá ezáa litoka molatoka oko gona molake limimó.

*Izesú lugutó vizeakalímíni Guivahani noive*

<sup>5</sup> Mikasi alika utó itimómámíni gako nolumó nene Ómasímo ageló keza gizapa itave loko loketamó negopa, veganalita gizapa itave loko loletamóma neve.

<sup>6</sup>\* Nenemú nene monó gotolaú ve makolímó Ómasi lo ami gako lo utó moloko láa loko limóma neve:

Géisi vejená ánenémína nene nanáinimú gele kemeaká noane.

Itó ve nenémínaatíni kagapílamó nanamú ániogoko kelémo vatí oaká ane.

<sup>7</sup> Nene gamena alínipáisi ageló veganalitikutí limiki minatave loko lokimikanimóza, netá golivagítunú itó lapanalámíni agulizatunú ale akoloketanimó neve.

<sup>8</sup> Lá okanike netá mukí nene kígisa lapuvauka ale molokane.

Ómasímo netá mukí nene veganalitíni sepéikuka molamó nene gona molamike netá mukí avasavagi lehizeko asú imó. Itína gamena nene mukí netá nene vetini sepéikuka molonoigo ániogósá amune.

<sup>9</sup> Lá noimóza, Izesuni mogonáa nene ániogoko geleafá noune. Gamena alínipa makó nene ageló veganalitikutí lemeko minamóza, miluma gilike hilimómave loko lapanaki itó agulizá napagi lehizetamó nene ale akiseake noive. Itó ageló veganalitikutí lemeko minamó nene Ómasímini nasahilí lelí limitive loko lokago, áisi nene heleafá netá ekesalímíni nene vejená mukitoka lelikumule loko gilimó neve.

<sup>10</sup> Ómasímo netá mukí nenémo aí gelegele minative loko noi ve itó netá mukilímíni amelaho loló oko mina vémo mohola gípala mukí nene gonanalivagi lapaná lehizeketatove loko gilimó nene kugutó vizeakalímíni Guivahani eza miluma geleoko vo milisegekogó minatane loko Izesuni lotamó nene etokave.

<sup>11</sup> Itó kígika alémo mokoná loaká noi ve nemó itó kelémo mokoná lamoláa keza minamó keí améipo hamokó noize, nenemú Izesú nene izegípa nugunamotamóneve loketatove loko gelekago avoza helemive.

<sup>12</sup>\* Nenemú Izesú Ómasi lo ami gokoláa lá oko neve:  
Neza vejenáne zuha geí mogonamú lo kemekinake monó gele vejenáne zuhatini holúikú nama loko gegepoka litove.

<sup>13</sup>\* Itó eza Ómasimú li gako makó lá okogi neve:

Neza aikumú gele zageko minanogo uve.

Itó makoki lá oko neve:

Imane nezagi itó Ómasímo izegípala nimimoláagi leza mukitoka noune.

<sup>14</sup> Nenemú Ómasímini izegípala leza nene lugupe mémelagi vejená minoaká nouninazo, Izesú ámináminoko lelí lugupe ale luhamó. Lá imó nene ezáa nohilike heleafá amelahini Satani zámuzá nene apele kulutokago,

<sup>15</sup> heleafá netakumú kehelele vizeakalímó nagá zekago miniki aliki a gamenavámíni nagakú mína vejená vinasoketatove loko nenémíni imóma neve.

<sup>16</sup> Ámina netá nene ageló kelémo vatí itove loko lá osá amive. Eza Avalahani agapílamó zuhagítana nia vejená lekelémo vatí oaká noive liki monó gotolaú luhuva gizinamóma neve.

<sup>17</sup> Itó Izesú eza lelí guguni gizoaká ve napa nene ageló negopa, kugupe mémelagi vejená kelémo vatí itove loko limimó nenazo, Ómasímini avogísaló eza litokó minoko hoza alévolé oko aleakalímíni itó agika hize lemeakalímíni loló itive loko, Ómasímo vejená lelí

lihimatemú goha izapaló molamitive loko nene agunamotamola lezagi mukí netakú hamó lelegitó minatave loko lotonoimóma neve. Gapováa lugáa makó minamimó neve.

<sup>18</sup> Ezáa lelikitana miluma gilike lemekú miliakakú vo holamó nenazo, nenemú vejená lelitoka lemekú moloaká netá nene utó o lemekiko, lelémó vatí itimó neve.

### 3

#### *Izesuni agulizalímo Moseni avilegeneive*

<sup>1</sup> Nenemú Ómasímini apazá vejená nigivénegita, okulumakú netá izá miliki alitave loko sele lo likimimó neneta, lekeza monó gele alévolé oaká nounitímini lole ale ve itó guguni gizo ameká noi ve napa Izesuni ángi hee liki ángalo.

<sup>2</sup>\* Ómasímo ámina hoza alitave loko lo molotató áisi nene Mosé nene Ómasímini vejenala zuha gelekelé oketamó nenéminoko Ómasímo litokó minatíminoko Ómasímini hoza alévolé oko minoloko voko ale minamó.

<sup>3</sup> Numuni geaká noi vémini agulizalímo genei numunímini agulizá avilegeaká noive. Ámináminoko Izesuni agulizalímo Moseni avilegeko lapanalagi neve.

<sup>4</sup> Itó numuni ale utó moloaká nene vejenalita geaká netá nemóza, netá mukí ale utó moloaká ve nene Ómasi noive.

<sup>5</sup> Itó Mosé eza Ómasímini numunigitana lílí iki mina vejenatoka minake Ómasímo litokó gelekelé hoza alévolé oko aleko minake, Ómasímo alika Izesukumú lo utó ití gajokumú gakola lo moloaká imó.

<sup>6</sup> Lá oko minamóza, Kilistó eza nene gipalámo Ómasímini numunigitana mina vejenatoka gizapa noketake Ómasímo litokó hoza alévolé oko aleaká noive. Numuni nene lélisi nene nounge. Itó nene hanuvamukopa, ale vavá oleta netakumú ageva oaká nouni netakumú gele gele mininake mulutegú lamaná nogilinake minoloko vitunimó nene Ómasímini numuni loló oko nounge loko litunize.

#### *Ómasímini mino gelekelé oakalagú vo holatuni gakó*

<sup>7</sup>\* Isilae vejenalite Ómasímini gakó gili ahuliake mino gelekelé oakalagú vi hilamakumú nene Sikalahulímo li gakóma monó gotolaú láa liki gizinamó nene gele minatunize:

Itína nene lekeza Ómasímini anó lupa gilinitamó nene,

<sup>8</sup> mikasi gomopalaló Isilae vejenalite gínikaha iake

mesaha ake Ómasi gimivagú milamó nenéminiki likigika hize lí iko minamilo.

<sup>9</sup> Avotike keza neneló melekéni 40 oko novigo golivagi netá mukí loló oaká umó

nene ángiaká amó nemóza, hokolizá i nimiake giminegú miliaká amóma neve.

<sup>10</sup> Neza nenemú mesaha okuke keza gamena gamena gopa napa kagatatunú giliaká niamó niaze,

itó není gapo ángi vevesiki ángisá amamóma neve loko lonoumóma neve.

<sup>11</sup> Neza mesaha oketuke keza mino gelekelé oakánegú vi hilaminigave loko alévolé oko lo hukoko lumóma neve.

<sup>12</sup> Nigivénegita, lekelitokatí makó likigika anupaki miniiki monó gili ahuliiki alévolé ve Ómasi lekemegeza amikatave liki gizapa iki minalo.

<sup>13-14</sup> Leza ganá apí oko gele seketigí uní gakó nene ale gikitoko alinake anosaló antitunimó nene Kilistoni nasahilí izá moloko ale minuni vejená loló itunimó nenazo, gamena gamena itó gamenavatini ha neikoma golesa netalimímini gimilegú moloká aleká oaká nenémo lekelitokatí ve makó apikulú alekoko Ómasimú agika hize lí okative liki, eza agata aliko eza agata aliko iki luhusatini ali alévolé iki minalo.

<sup>15</sup>\* Nenemú monó gotolaú gakó makó lá oko nemó nene gele alitunize:

Lekeza itína Ómasímini anó lupa gilinitamó nene

Isilae vejená gínikaha iake mesaha amó

nenéminiki likigika hize lí iko lá amilo.

<sup>16</sup>\* Nene hí vejenalite Ómasímini anó lupa gili ahuliake pelesa ziaká amó neve. Mosé ale goí oketago Izipi mikasiukatí a vejenalite lá amóma neve.

<sup>17</sup> Itó hí vejenakumú Ómasímo izapaló molokago melekéni 40 oko vimó neve. Nene golesa netá aliake mikasi gomopalaló hilí gesá a vejenakumú nene nenémini imóma neve.

<sup>18</sup> Itó hí vejenakumú mino gelekelé oakánegú vi hilaminigave loko alévolé oko lo hukoko loko limó neve. Nene gakola gili ahuliake pelesa ziaká a vejená Isilae vejenakumú nene limó neve.

<sup>19</sup> Nenemú lá oko gelenoune. Keza Ómasimú gili alévolé amatimo mino gelekelé oaká apalaloka vi hilamamó neve.

#### 4

<sup>1</sup> Mino gelekelé oakalagú vi hilatave loko lo mololetonoí gako nene haha amimó nenazo, nenemú lekelitokatí makolímóhe makolímóhe Isilae vejenakitana oko ámina gapoloka vo legesó okative loko lelegesá ligitize.

<sup>2</sup> Nene hanuvamú nomive. Ómasímíni gakola lamaná Mosé lo kimimó áminagó leza lagataló vo holokave. Itó keza ámina gako gelemóza, mukilite kigikagú ali milamago lemeko minamigove loko keitoka hutuvagó minamó.

<sup>3</sup> \* Leza monó gele alévolé oko gelenounimoláate ámina mino gelekelé oakalagú vo aniteaká noune. Nenemú Ómasímíni gako gili ahulakumú láa loko limó: Neza mesaha oketuke keza mino gelekelé oakánegú vi hilaminigave loko alévolé oko lo hukoko lumó neve.

Nene mikasímíni guhaiváa molake netá mukí loló o asú onoitotí mino gelekelé oko minake, alika ámina gako limó.

<sup>4</sup> \* Ámina mino gelekelé oaká gamenamú nene Ómasímó netá mukí loló o asú oake gamena nampa 7 neneló mino gilimó neve liki luhuva gizina gako nene monó gotoláú neve.

<sup>5</sup> \* Lá okago, veletoka Isilae vejenakumú nene keza není mino gelekelé oakánegú vi hilaminigave, loko limó.

<sup>6</sup> Leza Ómasímíni mino gelekelé oakakú vo holatuni gapo nene ha neve. Lá onoimóza, gozapá vo holokalímíni gako lamaná lo kimi vejená keza gili ahuliake vi hilamamó nenazo,

<sup>7</sup> \* nenemú itína vo holatuni gamena makó moloake, mota lo lukumu gako nene alika Tevitini agepagú molokago, láa loko limó:

Lekeza itína nene Ómasímíni anó lupa gilinitamó nene,  
likigika hize lí iko minamilo.

<sup>8</sup> \* Zosúa nene mino gelekelé oaká numuni apá gihiláa ale utó moloketamó nelina, Ómasímó alika haitó mino gelekelé gamenamú lamilinamó nenazo, nenemú Ómasímó haitó mino gelekelé gamenamú limó neve loko gelenoune.

<sup>9</sup> Nenemú láa loko gilitunize: Ómasímíni vejenala zuha lelí mino gelekelé oko minoaká holisí makó ha neve.

<sup>10</sup> \* Ómasímó hoza ale asú oake mino gilimó ámina iki vejená makó keza Ómasímó mino gilitó miní milatamó nene hozáini alilikí nivitakutí miní gililikí iki minamó gelekave.

<sup>11</sup> Lá onoimó nenazo, lelitokatí makolímó Ómasímíni gakola gili ahulakumú vejená gozapá gínikaha gapo miliki vamó áminaló vokatinazo, Ómasímíni mino gelekelé oaká apatoka vo holatune loko amuza molatunize.

<sup>12</sup> Ómasímíni gako gele ahuloakakumú makó láa loko gilitune: Ómasímíni gako nene alévolé oko minoakalímíni neve. Itó amuzavagi neve. Itó amitá makó agepáa amegesaloka itó agómualaloka sánevetá nene avilegeko noimokitana nenazo, nenetunú hukomo lemeko lemenigi ligikagi itó helisate mapilihavetegi ómuvagi noko helegetoaká noive. Lá oake, áminatunú nene Ómasímó ligikámo geleakaláa itó gele laga oakalímíni mogona ale utó moloaká noive.

<sup>13</sup> Itó áisi netá mukí ale utó molamó nenazo, Ómasímíni avogisaló nene hí netá asuguná oko minative. Aí avogisaló nene netá mukí halakeko nomive. Itó goní hoza alinogo uní véminí avogisaló nene utó okogó neve.

*Izesú lelí guguní gizoaká ve sipisite noive*

<sup>14</sup> Lelé guguní gizoaká ve sipisite iteko minamó makó minoletonoí ve Ómasímíni gipala Izesú áisi nene okulumakú iteko noive. Neneló minoletonoinazo, monola loaká nounimó nene ale gikitoko ale minatunize.

<sup>15</sup> Itó guguní gizoaká ve sipisite eza gena liviseko láa noigo ániigo ámegeletosá amive. Lelitoka lemekú moloaká netá utó oaká noimó ámináminoko aitoka haitopaitolímíni utó imóma nemóza, aitoka lihima hamoláa minamimó neve.

\* 4:3: Age 95:11 \* 4:4: Apí 2:2 \* 4:5: Age 95:11 \* 4:7: Age 95:7-8 \* 4:8: Gapo 31:7; Zos 22:4 \* 4:10: Apí 2:2

<sup>16</sup> Lá onoimó nenazo, netá makolímohe makolímohe omo lovogisaloka noikoma, áisi nasahili oletoko agika hize lemeko lelémo vatí itive loko leza nasahilila aleaká siá eza gizapa olimiaká noimómálo lehelele vizemiko anititune.

## 5

<sup>1</sup> Mikasiuka ve lelitokatí guguni giziaká ve napa napa keza Ómasímini vejenakumule loko Ómasiloka utó i amiiki lihimáikumú agepoka liká netá matá guguni gizi amiká amitave liki kilími etó iaká niave.

<sup>2</sup> Ve nenémináa kezagi keé lamamómave minikanazo, negi nagi gatizá minunike otolova o vunimóláa lelikumú hulu iki milumavate gilitató niave.

<sup>3</sup>\* Nenemú keza keé lamamómave liki, vejenalitini lihimamú itó kezáini lihimáikumú netá matá guguni gizi amiaká niave.

<sup>4</sup>\* Itó ámina hoza ite minamó nene kezáini kigikagutí gakotó negopa, guguni gizoaká ve napa keza Ómasímo kelémo etó okake ámina hoza nene kigizakú molokave. Ámina hoza amelaho Alonani nene gozapá ká emane amunaloka ámináminoko Ómasímo amimóma neve.

<sup>5</sup>\* Itó Kilistó eza ámináminoko ezámú giligo itekago guguni gizoaká ve napa loló amimóma neve. Nene Ómasímo láa loko lomikago loló imóma neve: Geza nene gipáne noanize.

Nénisi nene itínasa nene gelémo utó nomuluve.

<sup>6</sup>\* Itó gakó makó láa loko lo amimó neve:

Géisi nene Melikisetekeni avevezahaló oko guguni gizo ameaká ve mino lúaló moloko minanogane.

<sup>7</sup>\* Izesú eza mikasiuka mina gamenaló hilinogo noitotí alémo atiginá oaká zámuzagi mina veloka like sele napa like agómulagutí ive nogoza lemekago voká sipisi lotamó. Lá okago Ómasímini amakuka lemeko minamómave loko gele amimó.

<sup>8</sup> Eza Ómasímini gipala minamóza, gopa nene miluma maluma geleloko vitotí Ómasímini gakó gele aleakalímini mogonáa ángo hee limó.

<sup>9</sup> Lá oake, guguni gizoaká ve napa loló itikumú vo milisegeko mina ve loló oake aí gakola gili aliaká a vejená mukitoka keí kugutó vizeaká nekisáa nomítímini améipo loló imó nene,

<sup>10</sup> lelí guguni gizo ameaká ve sipisi Melikisetekeni avevezahaló minative loko Ómasímo lotató lá imó neve.

*Monó ahulikatave loko kagata alimó*

<sup>11</sup> Nenémini gakó mukí nemóza, lekelisi geleakatini alínipagi minikago, lo likimitove loko gulumó gena okave.

<sup>12</sup>\* Lekeza gamena hána monó gililíki iva iva iki minatitegi vejená lugáatini tisá lilí alina, etalinamóza, lekeza monó avogisáa nene goha lo lekemeakató mini milikave. Lekeza likigikámini nosá alévoleláa namitató niave. Hanuva aminikó níki minata lelegító minikave.

<sup>13</sup> Aminí niaká nia vejená nene hehe loko minoaká mogona ma gili hee lamanazo, vejená nenéminámú nene namuni niave loko loketatumize.

<sup>14</sup> Nosáneta alévoleláa nene olopa vejenalitini mututoni neve. Kagata kigika koloso lamaná okago, netá golesámini itó lamanalímini mogona gili-likí nivake nenémini mogonáa gili vevesiaká nia vejenalitini mututoni lilí inamó neve.

## 6

<sup>1</sup> Nenemú nene leza lá okove loko Kilistoni gakó avogisáa apí ikú loakalímini nene molokuko neko, gakó amegesáa loloko itinake loakalímini gapo nene miní amitunize. Monó guhaiváa lítaha nene nomilinake, gihila nomi hozalotí ligika emane ale viligoaká itó Ómasimú gele alévolé oaká,

<sup>2</sup> itó nagamí holoaká gakó haitopaitolímini itó gotóitó ligizani moloko lusa geaká, itó helenosakutí oteaká, itó lihima moloketomo vova vova oaká gakó nanamú goha apí itune.

<sup>3</sup> Ómasímo gelekiko, lamaná okikoma, gakó amegesáa makó miní amitunize.

<sup>4</sup> Nenémini amitunikumú láa liki gilílo: Monolimo nene vejená lugáatini kigika alémo hanatokago okulumakutí nosáneta níki gilínamó, itó Sikalahú ali lá inamó,

<sup>5</sup> itó Ómasímini gakó itó alika utó iti gamenámini alévolé zámuzámini lagaváa gilínamóza,

\* 5:3: Liv 9:7 \* 5:4: Gá 18:1 \* 5:5: Age 2:7 \* 5:6: Age 110:4 \* 5:7: Mat 26:36-46; Mak 14:32-42; Luk 22:39-46

\* 5:12: 1 Koli 3:2

<sup>6</sup> Ómasímini veđená nenémináa keza monéna monó ahulatamó nene, Ómasímini gipala goha zohota zaló apiliiki avoza netá lilí itatamó gilitimó nenazo, kigika goha ali viligikiko kelémo atiginá oakaláa nene ma nomive.

<sup>7</sup> Mikasi makó nene golinímo gamena gamena zeko minake alémo geha zekago, veđenalite áminaló zuhaina zahaina iaká niago, nosánétáini ale utó molokimiaká noimó nene Ómasímini lusaló nene mikasi amelahitoka gihiláa utó oaká noimóza,

<sup>8</sup> \* ámina mikasiloka liliha gasovagi netakó vizititímo gohogó mikasi loló okikoma usí vizekiko lolímo latitó neve. Mikasimú lumó nene mikasimú negopa, veđenakumú lo moloko noluze, gililo.

<sup>9</sup> Nigika lekemenou veđenáise, neza gakó láa loko nolumó nene lekeza lapuluva itave loko geleko lamuve. Lukugutó vizimó nenémini gihiláa lekelitoka utó oloko voko minative loko gele seketigí oko noluze.

<sup>10</sup> Ómasi eza ma ale gopa oko lá oko osá amive. Eza hee loko mina ve noinazo, lekeza aikumule liki hozaváa aliake likigika aminatímini gihiláa nene veđenala zuha kilími vatí ake nasahilí ikimiaká amó itó itína nalemó nene ezáa nenemú agatí molaminogo ive.

*Ale vavá oleta netakumú ageva oko minatune*

<sup>11</sup> Lekeza mukitoka hamó lelegitó vávani iki lilí ikiko, lehizeletati netá ale lá itune liki ageva iki lakagatagó minoloko noitiko gamena asú itive loko gelenouve.

<sup>12</sup> Nenémini gihila nene lekeza migelelé amiki veđená gili alévolé inake itó goselé kepelemigo legesó iki netá matá lo moloketamó ali aliaká nia veđenalite vilina gapoló nene kemegeçaló miliki iliki vitave loko noluze.

<sup>13-14</sup> \* Nenémini gakola makó lá oko neve: Avalahani nene Ómasímo lo hutake nénisi nene lusa goha gegetoko goha gegetoko inogo uve. Itó okinake geí gagapilamó zuha hize hutilí ogimiká hize hutilí ogimiká inogo uve. Loko lo molotake ve makó iteko minamómámini agulizató lo hukatove loko gilimóza, vitagá oake ezáa agulizató ale alévolé oko lo hutamó.

<sup>15</sup> Itó Avalahá eza Ómasímo láa loko lo molota gakokumú goselé apelemigo legesó oko minoloko itikeve loko ámina gakolímímini gihila ale lá imó.

<sup>16</sup> Vegenalita ligizani iteko ve makolímímini avogisaló ale alévolé oko lo hukoaká gakó nolinake lelikutí ite mina vémini agulizató lokuko, pelesa zeaká gakó nene utó aminogo ive.

<sup>17</sup> Ámináminoko Ómasímo eza limitove loko lo mololeta netakumú nene Ómasímo genezala ale viligoko haitó gakó litihe liki kagata losi gilikatave loko agikatanú giligo alévolé okago limó neve. Nenémini mogonáa ale utó molatove loko lo moloketa netalímímini gakolímímini amupiló ale alévolé oko lo hukoaká gakó nene miní amimó.

<sup>18</sup> Lá imó nene eza soza saza gakó nomimó mina vémo ale alévolé oko gakó lositá limó nene hize oteake amekago nene, aí amakuka golisi oko halá guni veđená lezagi nene netá matá ale vavá oletamó nenémini gihilamú amuza moloko alitune loko gele minatune loko lá imó neve.

<sup>19</sup> \* Ale vavá oleta netakumú logoliza vizeko ageva oko nounitímo ligikámini lukesavate loló oko noike guguni giziaká ve napate monó zavusavegú ímeha gó agikagú itiaká amómáminoko okulumakú Ómasímini avogisaló lelémoko iteaká noive.

<sup>20</sup> \* Neneloka lelikumule loko ale goí olimiaká ve Izesú áisi nene ale goí o mololetoko voko agikagú vo hola ve Melikisetekeni avevezahaló lelí guguni gizoaká ve loló oake alévolé oko mino lualó moloko minanogo ive.

## 7

*Melikiseteké Ómasímini guguni gizo ameaká ve mina gakó*

<sup>1</sup> \* Melikisetekeni mogonamú lo likimitoze, gililo. Eza nene Saleme numutoka agulizaki ve napa itó Ómasi napámini guguni gizoaká ve minamó. Lá noigo Avalahage kugulizaki ve gala véini kipili gizatotí atiginá niago, Melikisetekege viki gapoló hotu likasike eza Avalahani nónohá zetamó.

<sup>2</sup> Lá omikago, Avalahá lovagutí vauna netá alekamó nene gatoko gona moloake netá 10 10 minakutí hamopamó nene Melikisetekeni amimó. Itó Melikisetekeni agulizalímímini mogona lelí gakokutí nene hee loko minoakalímímini agulizaki ve napave. Itó Saleme apalímímini agulizaki ve minakeve loko, agulizá makó lelí gakokutí nene hulu Guivahanive loko neve.

<sup>3</sup> Melikisetekeni izolahiko amelahiko itó avolage keí kugulizá nene monó gotolaú luhuva gizinamamá neve. Keí mogonamá vitagá iki iki ali utó milamamó neve. Eza minoko aleko imó nene apí imoláagi minamimó itó hilimoláagi minamimó nenazo, eza Ómasímini gipalagitana minake guguni gizoaká ve miní ameko mino-loko voko minamó nominave.

<sup>4</sup> Imane glii guni iki gililo. Melikiseteké nene ve napa loló oko noigo, avoteho gihíla Avalahá eza ve iteko minamó nenémo lovagutí vauna netá lamanakó gatoko gona moloake netá 10 10 minakutí Melikisetekeni hamopamó amimó neve.

<sup>5</sup> \* Livaini agapilamola lugáa guguni giziaká ve lílí iki mína ve keza Avalahani zuha lílí amó nemóza, kígíve kagavegutí netá matáini mukí omolamó 10 10 minakutí hamopamó ali alitave líki lí míla gakó ali nupa iki lakutí nene lí hukíkítiki lamó neve.

<sup>6</sup> Lá onoimóza, Melikiseteké eza nene Livaini mulusigutí utó amí vémo nene Avalahani netá matala mukí 10 10 minakutí nene hamopamó gopa alimó. Lá noi, Ómasímo netá lamaná gimitove loko lo molota ve Avalahani nene nónohá zetamó.

<sup>7</sup> Itó ití mína vete lími mína vevená nónohá zíkimiaká niakumú nene makolímo ma gelemuve loko lamitímó nena, nenemú Melikiseteké eza Avalahani avilegeko ve napa minamó neve loko gelenoune.

<sup>8</sup> Lugaloka nene guguni gizi amiaká nia ve keza miniki hílitamó nenete vejenalitini netá matáini 10 10 nekutí hamopamó aliaká niave. Itó lugaloka ámina netá 10 10 nekutí hamopamó ali ve Melikisetekemú nene eza híli gakó itó agapilamó zuhatini gakó ma nominazo, eza minoloko voko minoaká noi veve líki luhuva gizinamó gelekave.

<sup>9-10</sup> Neza gelekugo lá okave. Livaí eza avolahini agupeuka ha noigo, Melikisetekeki hotu lí lomala niasigo, Avalahani líví nene ale amimó nene Livaini amimó geleneive. Lá okago, Livaí eza vejenatotí henoni 10 10 nekutí netá hamopamó aliaká a vetini avóipo mína vémo Avalahani amatoka minake ámina netá nene Melikisetekeni ale amimó gelekave. Itó Livaiki aí agapilamó zuhagi guguni giziaká ve lílí amó mukító nenete Melikiseteké mota Livaini avilegekave líki linamó gelekave.

<sup>11</sup> Livaini agapilamó zuhatini guguni gizoaká hozámíni gizapaló nene Ómasi eza Mosé lo hukoko lí gakó nene Isílae vevená kímimóza, ámina guguni giziaká ve keza gapo velemó nenémo vo milisegeko minatuni netá ale utó ílina, alíka guguni gizoaká ve makó haitolímini Melikisetekeni avevezahaló nanamú utó íline. Guguni giziaká ve Alonani agapilamó zuha minamó nenete lílími vatí ita lelegító minaline. Lá onoimóza, Izesú utó oake eza Alonani avevezahaló oko minamíve. Eza Melikisetekeni avevezahaló utó imó neve.

<sup>12</sup> Nenémíni mogona makó lá oko neve: Guguni gizoaká hoza litaha senisim oko gosohá makó ale utó itove loko lonoimó nenazo, Ómasímini avogisaló vo holoakakumú lo hukoko lí gakó ámina iki senisim íkiko, gosohalímíni makó utó itive loko lonoimó neve.

<sup>13</sup> Lo hukoko lí gakó nenémo Izesutoka vo alekago, eza guguni giziaká zavusavegú hoza ali ve Livaini agapilamolaloka líkita vetini mulusigutí utó amimó. Izesú nene haitó mulusigutí utó imó nene ámina mulusigutí ve makolímo guguni giziaká zavusavegú hoza alesá amimó neve.

<sup>14</sup> Guivahanite eza Livaini zuhagutí negopa, agunala Zutani zuhagutí utó imó neve loko mota gele asú oko gelenoune. Itó Zutani agapilamó zuha keza guguni gizi amiaká hoza alítakumú nene Mosé gakó makó lonamimóma neve.

*Izesú Melikisetekeni avevezahaló utó i gakó*

<sup>15</sup> Itó guguni gizoaká ve gosohámámíni mogona makó lá oko utó okave. Guguni gizoaká ve makó Izesú eza Melikisetekeni avevezahaló utó okave.

<sup>16</sup> Eza guguni gizoaká ve loló imó nene Livaini agapilamó zuhagutí utó inigave líki lí hukíkí linató negopa, eza alévolé oko minoakalímíni zámuzaló guguni gizoaká ve minamó minokave.

<sup>17</sup> \* Aikumú nene monó gotolaú nene géisi Melikisetekeni avevezahaló guguni gizoaká ve mino lúaló moloko minanogo ane líki luhuva gizinamóma neve.

<sup>18</sup> Nenemú Mosé lo hukoko lí gakó nenémo vo milisegeko minatuni netá ma ale utó oloko vamímó nenazo, helegaloka guguni gizoakalímíni gakó gozapá límó nene amuzá nomító gihíla makó utó amimóle loko ale otopá zímó.

<sup>19</sup> Itó helegaloka nenémíni avilegetígí oko guguni gizoaká gosohakutí netá lamanakumú ageva oakalímíni gihílaa ale utó molamó nenémo gapo velelimíkago, Ómasímini avogisaloka voaká noune.

<sup>20</sup> Gosohá guguni gizoaká nenémo Izesutoka utó imó nene Ómasímo ale alévolé oko lo hukotató alévolé zámuzalagi utó o amimó. Goí iki guguni giziaká ve keza Ómasímo ale alévolé oko lo hukoko lamító guguni giziaká ve lílí iki minamóza,

\* 7:5: Nam 18:21

\* 7:17: Age 110:4



21 \* gosohá imane nene Ómasímo ale alévolé oko lo hukotató Izesú eza guguni gizoaká ve gihiláa loló oko noive. Aí luhuva gakó Ómasímo lo amimó nene lá oko neve:

Guivahanímo ale alévolé oko lo hukake géisi guguni gizoaká ve mino lúaló moloko alévolé oko minanogane loko li gakó nene ahulaminogo ive.

22 Mogonáa nenéminoko minokago, Izesú nene lo múnahéaká gakó gihilámíni ale alévolé iti ve loló imó neve.

23 Itó goí iki guguni giziaká ve keza nene hoza miní amiki aliliki nivake hili vivi amó nenazo, ámina hoza agepaló alita ve mukí minamó.

24 Lá inamóza, Izesú alévolé oko minoaká ve minoakeve loko guguni gizati hoza nene miní ameko mino lúaló moloko minanogo ive.

25 Nenemú alévolé oko minoakakú noi vémo nene gamena gamena lelikumule loko Ómasiloka voká loaká noinazo, aikumú gele alévolé unikeve loko Ómasímíni avogisaló voaká nouni vejená vatí oko lugutó vizeloko voko minatimó neve.

26 Lelemo guni guni oaká vele Izesú nene lelí guguni gizoaká ve napa noimó nene etokave. Eza apazá keké vizeko minoko lihima nomimó agika gizopa lo minamó eza golesa netá aliaká a vejenakutí etó oko minake, okulumá avilege asú oko nomina ve nenémináamo hoza lá oko aleaká noimó nene etokave.

27 \* Áisi nene guguni giziaká ve napa lithagítana nomíve. Keza gamena gamena ganá kezáini lihímáinimú ganatílisi guguni gizi amiake alika vejenalitíni lihímáinimú giziaká niamóza, hoza nenémináa alíti mogona Izesú nene lihínavagi minamikumule loko nomimó. Eza agika agupeva nene lehizetake guguni hamó nene gizo amekago voko asú imó.

28 Mosé lo hukoko li gakotó nene vejená kigikámo gopa i vejená nene guguni giziaká ve minatave loko gopa loketamóza, Mosé lo hukoko li gakó amupiló nene Ómasímo ale alévolé oko lo hukooká gakó nenémo gipala alémo etó okago, áisi nene guguni gizoaká ve minoloko voko mino lúaló moloko minatikumú vo mílisegeko minamó neve.

## 8

### *Izesú lo múnahéaká gakó gosohálímíni guguni gizoaká ve noive*

1 \* Gakó nolomó nenéminí gotola ale nupa oko lá oko neve. Lelí guguni gizoaká ve napa eza veletoka okulumakú Ómasímíni golivagi holomaló amakuka agizani lamagaloka voko noive.

2 Eza apazá zagusave itó monó seli numuni gihiláa nenegú lelikumú Ómasiloka loaká noimó nenémo guguni gizoaká hoza loló okave. Ámina zagusave gihilama nene mikasi gomopalaló monó seli numuni vejenalite gemokopa, Guivahani ezáa ale utó imó.

3 Guguni gizi amiaká ve napa mukitoka keza iza goula nosá gizi vatá iaká itave liki kilími etó amó nenazo, nenemú lelí guguni gizo ameaká ve Izesú ezagi Ómasi guguni gizo amitive loko lonoi ve minamó.

4 Itó mikasiuka Mosé lo hukoko li gakotó Livaini mulusigutí guguni giziaká ve nene hanuva niamó nenazo, Izesú eza keí mulusigutí utó amimó nenazo, eza itínasa mikasigú minamó nelina, lihimatemú guguni gizoaká ve minamíline.

5 \* Keza monó numukú hoza aliaká niamó nene hanuva avevezaha neve. Gihiláa nene okulumakuka neve. Nenéminí gakola makó nene monó gotoláú lá oko neve: Mosé eza monó seli numuni gitove loko noigo, Ómasímo láa loko lo amimó: Gelenape. Agokaló noako ametamenáa gelepizumó nenemáminoko netá mukí loló ozo loko lotamó.

6 Gosohá lo múnahi gakó iteko nemó nene ezáa gosohá lo mola gakó iteko nemó nenémo guhaiváa loló omikago ale utó molamó nenazo, ámina seli numuni gitikumú láa loko lotamóza, imane nene Izesú eza Ómasigi vejenaki kelémo apizitove loko lo múnahi gakó gosohá nenémo iteko nene neve. Áminámíni oko guguni gizoaká hoza ezáa aleaká noimó nenémo iteko mukí guguni giziaká vetíni hozanini kivilegekeve.

7 Gozapá lo múnahi gakó minamó nenémo vihelé lo minamó nelina, alika makó utó itive loko gakoláa utó amíline.

8 \* Lá onoimóza, Ómasi áisi nene Zuta vejenakumú gele golesa oake, lo múnahi gakó gosohakumú láa loko limó nene monó gotoláú láa liki luhuva gizinamóma neve: Minoko gamena makotó nene Isilae vejenaki itó Zuta vejenaki lo múnahéaká gakó gosohá makó ale utó oketatove loko Guivahanímo loko limó neve.

<sup>9</sup> Gosohá nenémo gozapá avóike Izipi mikasiukatí kelémoko atove loko kigizató alu gamena kezagi lo múnahaeká gako moloketu gakokitana nomive. Keza lo múnahaeká gako litaha nenémini agikagú ali hehe liki minamago, nénisi áningo ahuloketumó neve.

<sup>10</sup> Itó alika Isilae vejenaki láa loko gako lo múnahinogo uve: Neza lo hukoaká gakónéa kagatagú molokugo liminogo ive.

Lá okoko kigikagú luhuva gizokugo minatize.

Neza Ómasinini minatoze.

Itó keza vejenáne zuha minataze.

<sup>11</sup> Lá okiko ámemena niamó itó iti minamó mukí keza nenikumú gili asú iki gilitamó nenazo,

nenemú ve makolímo agivelahinihe itó ahalulahinihe

geza litá oko Guivahanímini mogonáa gele hee lozo loko monó lo ameko lainimotaminogo ive.

<sup>12</sup> Lá okomú gilinigave: Neza nigika hize kiminake golesa netáini ahuloketanogo uve.

Itó lihimáinimú goha nagata ma gelemínogo uve loko Guivahanímo lokave.

<sup>13</sup> Itó Guivahani eza lo múnahaeká gako gosohalímini gakoláa láa loko like, gozapá minamó nene mota litaha lokave loko limó neve. Itó netá litaha hulupa lo vi netalímo haha ititó neve.

## 9

*Litaha seli numunima monó numuni makó gihiláámini avevezahaló minamó*

<sup>1</sup> Lo múnahaeká gako litahagú nene Guivahanímini avogisaló gupá ze ameká gako minamó, itó imane mikasiuka monó seli numuni gemó

<sup>2</sup> \* nenémini gakola lá oko minamó: Ámina seli numukú nene sahaza makó hizi hukamó makó avogisaló minamó, agulizá apazale liki lamó, nenegú nene lamu ló hána itó holoma agisavagí minamó, itó holoma amupiló nene Ómasímini avogisaló milina peleti nene minamó.

<sup>3</sup> \* Itó voko agika makó ímeha gotunú hizi hukamó minamó, agulizá apazá gihiláa etole loko minamó.

<sup>4</sup> \* Nenegú nene anuvagi paulá guguni gizoaká holoma makó golitunú lilí amó nene minamó. Itó golitunú hitina pokisi nene lo múnahaeká gakolímini pokisi minamó. Áminagú laisigítana netá agulizá mana nosalímini somo nene golitunú lilí inamóma nene minamó. Itó Alonani hánusa sisiváagi nene minamó. Itó gatapa gehani losiló nene gapo lota gako luhuva gizokago minamó.

<sup>5</sup> \* Veletó nene Ómasímini lapanalímini avevezaha netá kogokénagi netá ageló nenéminoko lositá keza pokisimámini amupiló lihima gilatoakakumú golani hepa hepa iaká ató nene kogokénatunú ali hitikasike minasimó. Nenémini gakola hána okative loko miní ameko lo asú amítove.

<sup>6</sup> \* Netá nenéminiki milikago, nego, numuni avogisa nenegú nene guguni giziaká a ve keza gamena gamena itiki hozanini aliki miniaká amóza,

<sup>7</sup> \* apazá gihiláa etole loko mina numuni agikagú nene guguni giziaká vetini ve napa ezáagó melekéni makolímini agikagú nene gamena hamó zupa iteaká imó. Lá oake meme izatini itó pulumaká izatini golani aleneikegó itike ezáa lihima itó vegejalitini lihimáini gopa alinamó nenemule loko lihima gilatoaká holomaló golani hepa hepa imó.

<sup>8</sup> Ámina netalímini mogonamú nene Sikalahulímo láa loko lo nolimive: Seli numuni nene ha neiko apazá gihila etó onoi zavusavegú Ómasímini avogisaló vo holatuni gapo koló o gesá amimó neve.

<sup>9</sup> Itó ámina seli numuni minamó nenémo imane gamenaló Izesú loló oaká noi netalímini avevezahaváa neve. Nene áningokinake nene apazá seli numukú iza goula nosá guguni gizi vatá iaká nenémo Ómasímini monó lituni vejená ligikagú vihelé lo miniko minatuni netá ale utó amítimó neve loko gilitune.

<sup>10</sup> Nenémo lugupeloka lí míla gako nenegó neve. Itó zahí nagamí itó lugupe nagamí zeaká nenémini gakoláa neve. Nene Ómasímini gakotó utó okago, vegejalite ámegetiliki viki niko alika Kilistó lo múnahaeká gako gosohá utó itive loko lo hukoletamó neve.

<sup>11</sup> Lá onoimóza, Kilistó áisi nene netá gihiláa ale utó inogo molamó nenémini guguni gizoaká ve napa utó imó. Lá oake seli numuni haitolímini nene vo milisegeko minamó itó

\* 9:2: Gá 26:1-30, 25:31-40 \* 9:3: Gá 26:31-33 \* 9:4: Gá 30:1-6, 25:10-16, 16:33; Nam 17:8-10; Gapo 10:3-5 \* 9:5: Gá 25:18-22 \* 9:6: Nam 18:2-6 \* 9:7: Liv 16:2-34

gihiláa lamaná minamó itó kigizanitunú gemamó itó imane mikasiuka nomimó nenegú itimó nene

<sup>12</sup> eza memegi pulumakalitinigi golani negopa, ezáa golaníagi apazá etó oko mina apakú gamena hamó itike meinavate hizeko gologí oletati gapo vilimó nenémo alévolé oko mino lúaló moloko minanogo ive.

<sup>13</sup> \* Memegi pulumakalitinigi golani itó pulumaká akalevámíni lanía nene golotuva mogona alina vegeatoka hepa hepa iake kugupeloka holokimikago, vihelé igo minamó.

<sup>14</sup> Lá okanazo, Kilistó eza nene mino-loko vova vova oaká Sikalahulímo hize lé otago, ezáa agika agupe avasavagi minamó nene Ómasi lehizemiake, lélisi oko moloko oaká uhá netá hutuváa ligikagú gímizimó nene Kilistoni golanímo aleko iteko nagamí zeko lelémo vávani okiko, alévolé Ómasi gelekeleláa otanogo une.

<sup>15</sup> Nenemú nene Kilistó eza lá oake, lo múnahaeká gakó litaha nenémíni gizapaló minunike lihima ale utó mulunikutí akagá oletatove loko hilimó neve. Lá okamó nenazo, Ómasímo sele lo kimi vejená keza alévolé oko minoaká helisa henoni alitave loko lo moloketamó nene ali lá itave loko Ómasigi vejenaki kelémo apizeakakumú lo múnahi gakó gosohá ale utó mololimikave.

<sup>16</sup> Helisa henonímíni gapováa lá oko neve. Izegipatini améipo hilimómámíni mogona utó o lamaná okagogó helisa henoni alita gapo koló itive.

<sup>17</sup> Gosohá agómulagi noiko, helisa netalímíni gakó nene hanuvagó minanogo ive. Helekiko, améipini netá matakumú luhuva gizina gakó nene gihila zekiko, helisa henonima gona miliki alinígave.

<sup>18</sup> Nenemú áminámínoko lo múnahaeká gakó litaha nenémo pulumaká ahe memetini golani lepikagogó vo alimóma neve.

<sup>19</sup> \* Nenémíni mogona lá oko neve: Mosé eza lo hukoko li gakó luhuva gizamó nenémíni gakola lo keme asú oake, pulumaká izatini itó meme izatini golani nene nagamíki ale gopa oake, sagelegelegitana netató nene meme izámíni zopova golohatunú molo likeake, nenetunú nene ahípí zeake, lo hukoko li gakolímíni pepaló itó vegeatoka hepa hepa imó.

<sup>20</sup> Lá noiike, Ómasímo lo múnahaekalímíni gakó lo hukoleketamó nene golani imanémo ale alévolé oko minative loko lo kimimó.

<sup>21</sup> \* Mosé nene monó seli numuni nemó itó apazá hozámíni netá matá nemó nene lá oko ahípí zeto asú imó.

<sup>22</sup> \* Itó lamaná Mosé lo hukoko li gakotó netá mukí otigí nene memetini itó pulumakalitiní golanitunú ale guluví loaká noimó neve. Golani lepinamató nene lihima gilatoakaláa ma nomive.

*Lihimate Kilistoni amupiló itekago agohí geake Ómasi guguni gizo amike hilimó*

<sup>23</sup> Netá matá gihila okulumakú nemó nenémíni avevezahaváa nene gaha-namatini golanitunú nenémíniki nagamí ziki ali guluvitatave loko lonoimó nemóza, okulumakú iteakalímíni gapo gihila nene guguni gizoakalímíni etó oko haitolímíntunú nagamí zeko ale mokoná lative loko lonoimóma neve.

<sup>24</sup> Nenemú nene Kilistó eza apazá zavusave kigizanitunú gemó itó netá gihilámíni avevezaha minamó nenegú nene vo holonamive. Eza okulumakú iteake Ómasímíni avogisaló lelikumule loko hize lé oletati hoza nene aleaká noive.

<sup>25</sup> Zuta vetini guguni giziaká vetini ve napa áisi meleketó meleketó gamena hamokó zupa apazá numukú voaká noive. Lá noiike, ezáa golaníatunukopa, hanuva netalímíni golanía aleake iteaká imóza, Kilistó eza agika agupéa gamena gamena ahuloletamó nelina, eza mikasímíni guhaiváa utó itotí emane heleloko ova ova oko komasí minamíline.

<sup>26</sup> Lá onoimó nenazo, Kilistó ezáa agika agupéa nene lelikumule loko ahulanogo gamena mukí itemimóma neve. Áisi nene Ómasímo mola gamena asú inogo noigo gamena hamokó ezáa agika agupéa nahuliko, lihimate asú itive loko utó imó nene asú o lamaná okave.

<sup>27</sup> Vegenalita gamena hamokó hilitune loko itó alikáa lihimatemú goní inogo une.

<sup>28</sup> \* Ámina oko Kilistó eza mukí vegenalitiní lihimavámíni aí amupiló itekago, agohí geake Ómasi guguni gizo amike hilimó. Itó lihimate asú itive loko negopa, eza kogoliza viziki ageva iki miniaká nia vejená kugutó vizeaká hoza ale lutigitove loko alika goha utó inogo ive.

## 10

<sup>1</sup> Mosé lo hukoko li gakó nene makó gihiláa alika utó ititímíni avevezahaváa neve. Gihila lamaná nomive. Nenemú guguni giziaká ve napa keza Mosé lo hukoko li gakotó

\* 9:13: Liv 16:15-16; Nam 19:9,17-19

\* 9:19: Gá 24:6-8

\* 9:21: Liv 8:15

\* 9:22: Liv 17:11

\* 9:28: Isa 53:12

kilisimasiló kilisimasiló guguni áminámini ikigó giziaká niamó nenémo Ómasímini avogisalo viaká nia vejená nene monéna vo milisegeko minoaká gapo velesá ale utó amimóma neve.

<sup>2</sup> Ómasi gupá zi amiaká nia vejená nene monéna kigika ale gizopa loketamó nelina, ligikagú lihimate nomimó nominune liake guguni gizoaká nene ahulaline.

<sup>3-4</sup> Lá onoimóza, guguni gizoakakú memetini itó pulumakalitini golani lekemó nenémo lihimaváini asú oakaláa ma nominazo, guguni gizoaká nene kilisimasiló kilisimasiló nigizago, lihimaváinimú goha giliaká niave.

<sup>5</sup> \* Nenemú nene Kilistó mikasigú limitove loko noike ezáa agupe guguni gizatikumú nene amelahini lo ami gakó nene monó gotolaú láa liki gizinamóma neve:

Guguni gizo gemeaká nene haitopaitoliminimú gumu helemive.

Lá okaninazo, nugupe ale vavá onetanimó neve.

<sup>6</sup> Haitopaitó izatunú apiliki saga liki guguni giziaká amó nene ánego lamaná osá amane.

Lihimavate asú itive loko guguni gizoakakumú ma gelesá amane.

<sup>7</sup> Lá okago, láa loko lumó: Gelenape. Ómasi geza litanitoka molatanitoka itove loko nouve.

Lo hukoko li gakolímíni luhuvagú není gakó gizonoitó alitove loko nouve.

<sup>8</sup> Iza guguni gizo gemeaká haitopaitoliminimú gelesá amane loko, itó haitopaitó izatunú apiliki gé liake lihimavate asú itive liki guguni giziaká niamó nene ánego lamaná osá amanimó neve loko limó nene, ámina guguni gizoaká hoza nene Mosé lo hukoko li gakotokó giziaká akumú limóza,

<sup>9</sup> némika loake Izesú miní ameko láa loko limó: Ómasi geza litanitoka molatanitoka itove loko nouve loko limó nenazo, lihimate asú iti gapo litaha nene ale otopá zeake, gapo gosohalímíni nene ale utó imó.

<sup>10</sup> Nenemú Ómasímini gakotó Izesu Kilistoni agupe nenémo guguni gizokago, leza mukitoka ligika ale guluvitokago nounimó nene goha aleminogo ive. Mota alekago monéna asú onoive.

*Kilistó ezáa golanitunú guguni hamó gizokago asú okave*

<sup>11</sup> \* Zuta vetini guguni giziaká ve mukitoka keza gamena gamena hozanini aliki oti minake guguni giziva giziva iki miniaká niamóza, nenémo nene vejenalitini lihimáini gilatoketosá amive.

<sup>12</sup> \* Lá onoimóza, Kilistó nene lihimate asú itive loko ezáa golanitunú guguni gizokago, asú okamó nenazo, nenémíni amupiló goha lá aminogo ive. Itó lá oake, Ómasímini agizani lamagaloka mitó minamó.

<sup>13</sup> Neneló Ómasímo gala veva agisa lapuvauka kelémo molatikumú ageva noive.

<sup>14</sup> Ligika avasavagí lelémo etó oaká gapoló voaká nouhá vejená nene guguni hamó gizoake, lelémo vo milisegeko minatuni gapoló molokago, lutegekamóma neve.

<sup>15</sup> Itó Ómasímini Sikalahulímo ezagi ámina gakó nene lamaná gihila neve loko lo utó oko lo lemekamóma neve. Aí gakola monó gotolaú lá oko neve:

<sup>16</sup> \* Alika gamenaló lo múnahaká gakó lá oko ale utó moloketatove loko Guivahanímo láa loko nolive: Neza nene lo hukoko lu gakó nene kigikagú molokimikugo, lemekago, kagatagú luhuva gizokago minatimó neve.

<sup>17</sup> \* Loko loake, áminaló miní ameko láa loko live:

Golesa netáinimú itó lihimáinimú goha gelemínogo uve.

<sup>18</sup> Nenemú lihimate mota ahulonoitó nene netá golesamú guguni gizoaká nene áminagó oko asú o lamaná okave.

*Ómasímini avogisalo anitinake monó ale gikitoko ale minature*

<sup>19</sup> Nenemú nigivénegita, Izesuni golani nenémo gahe segelimikago, leza Ómasímo apazá minoaká noitoka ititunikumú ligika nene vávani oaká noive.

<sup>20</sup> Monó zavusavegú ímeha gó nene aí agupémíni avevezaha minamó nenazo, nenémo zeko hóu lo losi noigo Ómasímini amatoka voakalímíni gapo gosohalímíni itó alévolé oko minoakalímíni ezáa ale koló oletamó nenazo,

<sup>21</sup> itó eza iteko voake, guguni gizoaká vele napa loló oake, Ómasímini vejenala zuha lelí gototeló gizapa ve noinazo,

<sup>22</sup> \* nenemú eza gele alévolé unitímó ligika vávani onoiko, soza ligikagi minaminake, itó lihimategi nominuko gena livisi netá nene aí golanitunú holomikago, ligika vávani ominiko, itó lugupe nene nagamí agómula ominatitunú nagamí zelimikiko noinake Ómasímini avogisalo anititune.

\* 10:5: Age 40:6-8 \* 10:11: Gá 29:38 \* 10:12: Age 110:1 \* 10:16: Zel 31:33 \* 10:17: Zel 31:34 \* 10:22:

<sup>23</sup> Lá noinake, leza gakó lo molató amegesaló moloaká ve noinazo, ageva nouni netá nene lagata losi pasi amoko ale gikitoko gizapa oko minatunize.

<sup>24</sup> Itó ligikatunú nasahili oko ligika eza amiko eza amiko inake, netá gihila loló oakakumú eza alémo vatí iko eza alémo vatí iko oko minatune loko ligika ale vávani oaká gapomú vitagá oko minatune.

<sup>25</sup> Lá inake, monokumú alegesá oakakú vejená lugáate isá amake amanapa iki miniaká niamó nenémíni aminake, eza ale kii lotiko eza ale kii lotiko itunize. Guivahani ati gamena mota alitokanazo loko gele mininake amuza moloko nenémíni itunize.

<sup>26</sup> Nenémíni amitunikumú láa liki gililo: Leza Ómasímíni gakó gihiláa nenémo ligika hize hanatokiko, golesa netá nene goha lagata geleko alémo etó oko ale minukoma, lihimate asú itive loko guguní gizoakaláa makó ma nomíve.

<sup>27</sup> \* Nenegopa nenémíni lihimaváa golivagi napa ló agénahunámíni lehelele viziko ageva minanogo une. Ló guluma nenémo Ómasi lova ali amiaká nia vejená nene akohú kipilínogo ive.

<sup>28</sup> \* Ve makolímo Mosé lo hukoko li gakó avutá okago, ve losive makolehe itó lositakó ahe aí gakola likago, aí mogona golesa utó okago, míluma gilitamake litá iki apili hiliaká niave.

<sup>29</sup> \* Nenémo genavagi otigí oko nemóza, ve makolímohe makolímohe Ómasímíni gípala ale mumusopa zitímó, itó apizeko múnahéakalímíni gakó gosohá ale alévolé oaká golani lepímó nenémo agika ale mokoná lámó nenemú ánigo ha gele gele itímó, itó nasahili olimiaká Sikalahuni nene aleko letatímó nene, Ómasímó nana otatímó neve. Eza goní napa genavagi inogo ive.

<sup>30</sup> \* Gilinahe. Lihima kemeaká nene není hozámíni ago helegáa neve, itó apasoaká nene nezáne inogo uve loko li vemú gelenoune. Itó Guivahani eza vejenala zuha keitoka gakó hoza aleko gona moloketanogo ive loko li véminí mogona geleaká nouhá nenazo, litaha gapoló atiginá oko vitunikumú goní aminogo une loko litupe. Íi.

<sup>31</sup> Gamena napaló alévolé oko minoaká Ómasímíni agizakú holoaká nene genavagi netá nekumule loko noluve.

<sup>32</sup> Lekeza gozapá Kilistoni gakó ganá gelekumú goha gililo. Gamena nene zupa likigikagú nene Ómasímíni liví nenémo hize hanatolikimikago, míluma malumámíni agikagú minake Izesukumú génopa hoza aliki alévolé iki minamó.

<sup>33</sup> Itó lekeza míluma netalímo lukumupiló itekago, gopoguni mililikitake lokovoza hiliti netá lilí ilikitinamó. Itó gamena makó lekeza nene likigive lakagave netá nenémíniáa lilí níkitago lekezagi miní amiki míluma gilikitámó.

<sup>34</sup> Likigive lakagave nene monokumule liki nagá numukú ahulikimikago, keikumule liki mulutini githiná ímoma neve. Itó monóini nomi vejenalite henokanotini ipá i alikago nene, likigikámíni henoni lamanaláa alévolé oko mino-loko voakalímíni okulumakuka molonoune liki giliake, lokogoliza viziaká amóma neve.

<sup>35</sup> Lá iki minamó nenazo, itína nene Ómasímú gele zageakatini ahulamilo. Nenémo minoko alika meinava napa ale utó oleketanogo ive.

<sup>36</sup> Ómasímó lititoka molatitoka oko moloko inake netá ale vavá oleketamó nenémíni gihiláa alika alitune liki lekeza genavagi netalímíni agikagú hulu iki minalo.

<sup>37</sup> \* Izesú lelí hozámíni meinaváa limínogo goha atikumú monó gotolaú luhuva makó láa liki gizinave:

Gamena alínipa makó neve. Nene asú noigo anogo ize.

Ative liki lina ve nene mino otoa amoko litá oko anitínogo ive.

<sup>38</sup> Lihímáini nomi vejenáne nenete gili alévolé atímó alévolé iki miníki aliki inigave. Itó makó keza ahuliiki atiginá iki vitámó nene keikumú gelekugo laga niviseminogo ive loko Guivahanímó límó neve.

<sup>39</sup> Itó leza keé lamunike goselekaselé oko monó ahulunike lapuluva oaká gapómíni mututoni noamune. Lélisi nene Izesunímú gele alévolé okunike lemeni lugutó vízeakalímíni mututonáa noune.

## 11

### *Ómasímú gele alévolé oakalímíni mogonáa*

<sup>1</sup> Ómasímú gele alévolé oakalímíni mogonáa lá oko neve: Netá matakumú lagata losi gelemoko ageva oaká nounimó nene alitune loko gele seketigí o minatune, itó ángamuni netakumú ageva oaká nounimó nene ale ligizakú itune loko gele hamokó itune.

\* 10:27: Isa 26:11

\* 10:28: Gapo 17:6, 19:15

\* 10:29: Gá 24:8

\* 10:30: Gapo 32:35-36

\* 10:37: Hip 2:3-4

<sup>2</sup> Avotege lugáa gozapá miniki aliki amó nenete Ómasimú gili alévolé iki miniaká amó nene Ómasimo áinigokago lamaná oaká imó.

<sup>3\*</sup> Gozapá nene Ómasimini gakató mikasiuka netaki okulumakú netaki ániogaká nouni netá nene ániagosagalutí utó imó neve loko gele alévolé unikeve loko gele hee loko gelenoune.

<sup>4\*</sup> Atani gipala Epoló gele alévolé oakala minakeve loko Ómasi guguni gizo amimó nene Ómasimo áinigokago, lamaná okago, uvolaho Kaini nene ániog gosalé imó. Epoló gele alévolé oakala nene Ómasimo áinigokago lihimala minami ve minake, guguni gizo amekago alimómámini mogona neneló ale molamó. Itó Epoló helekamóza, gopa gele alévolé oko mina gakó imane lo lemeaká noimó gelekave.

<sup>5\*</sup> Enokú eza gele alévolé oaká ve minamole loko Ómasi eza ániog lamaná oake heleaká nene aítoka utó amítive loko gosohá agómulaḡi okulumakú alémoko itimó. Lá omikago vegenalite aikumú vitagá amó. Itó velesá itenamigo aí mogonamú nene Ómasimo Enokuni ániog laga imó neve loko utó onoimóma neve.

<sup>6</sup> Nenemú láa loko gilitunize: Ómasi eza noive loko itó aí mogonamú amuza moloko vitagá ituni vegená nene meinava limitive loko ligikatunú gele seketigí okogó aí amatoka voakaláa nenazo, gele alévolé oakate minamítimó minokukoma, Ómasimo ániगतimó ma ániog lamaná amítimó neve.

<sup>7\*</sup> Noá eza gele alévolé oaká ve minamómave loko Ómasimo alika ale utó iti netá velesá ániogamigo, goí oko gakó agata aleko lo amekago, Noá nene Ómasimú goliva gilike vegenala zuhagi gosohá minatave loko nene loake, nagamikú lape sipisi loló imó. Lá noiike, mikasiuka vegenalitini lihimáinimú goní ita mogonamú lo utó oake, lihimá asú omikago minoakalímini gihiláa Ómasimú gele alévolé unikeve loko aleaká unitímini gihiláa nene ale utó imó.

<sup>8\*</sup> Ómasimo mikasi makó geí helisa henoni minative loko lehizegetatoze, geza mikasiga ahulokoko makotoka voko minatane loko Avalahani lo amekago, Ómasimú gele alévolé oakeve loko gele aleake mikasi nenemupe nenemupe limó nene gelemike, gele gopa oake gopa vimó.

<sup>9\*</sup> Gele alévolé oaká ve minoakeve loko mikasi ániog molotamó neneló vike aniteake, gutá minake, seli numuni moloake minake, ánuvanegú ako minamó. Gipala Isaká itó aí gipala Zakopó keza ámina lo moloketa netá ali lá itái ve minasike ámináminiki seli numukú miniaká asimó.

<sup>10</sup> Avalahá eza alévolé lukesavagi apá makó utó itive loko Ómasimo vogunahana moloake ale utó mola apakumú ageva oko minamó.

<sup>11\*</sup> Venala Salá eza gohuna vená noiike, Ómasimú gele alévolé oakalímini minoakeve loko gelehosi moloake izegipala getati gamena asú okago, zámuza amekago, izegipa agatupagi minamó. Ómasimo nene agómulaló lo molomikago gihila zeaká noi vemámo lo utó molokave loko gele seketigí oake nenémini imó.

<sup>12\*</sup> Itó nenemú nene hele vegenakitana mina ve hamokutí hize hutilí oakalímini zámuzáa asú oakakú agapilamó zuha hizi hutilí amó keza okulumatoka sonohí minoloko voko oko noimó nenémini avevezahaló, itó age nagamí agataló emane getani nemó nenéminoko vegenalita gatoko gato asú amoakalímini avevezahaló utó iliki vamó.

<sup>13\*</sup> Ámina vegená mukitoka Ómasimú gili alévolé iki minake miniki hili vamó keza ale vavá oketa netalímini gihila nene velesá alemake, hanuva hotó nego ániogiake, kogoliza viziki ali kamatoka milamó. Lá iki minake, leza mikasiuka hanuva veno ve gutá nouni liki gelemó.

<sup>14</sup> Gakó némika liki liaká nia vegenalite gotó apáini gihila makó ali utó milanigi kigikagú giliki minamómámini mogona mota utó okave.

<sup>15</sup> Lá iake, keza numuni apáini itó mikasinini ahulakumú miluma makó giliki lá amamó. Ámina apakumú kivisekago nelina, atiginá iki anigi hanuva aline.

<sup>16</sup> Lá onoimóza, keza nene numuni apáini lamanaláa makó alinigi nenemukó gelemó nene okulumá apakumú gelemó neve. Ómasimú nene Ómasile liki likago, gelekago agoliza napa vizekave. Nene ezáa numuni apá makó okulumakú ale utó moloketakumú geleneike agoliza vizekave loko gelenoune.

<sup>17\*</sup> Itó Avalahá eza Ómasimo amekú mola gamena nene gele alévolé oaká ve minoakeve

\* 11:3: Apí 1:1; Age 33:6; Zon 1:3 \* 11:4: Apí 4:3-10 \* 11:5: Apí 5:21-24 \* 11:7: Apí 6:13-22 \* 11:8: Apí 12:1-5 \* 11:9: Apí 35:27 \* 11:11: Apí 18:11-14, 21:2 \* 11:12: Apí 15:5, 22:17, 32:12 \* 11:13: Apí 23:4; 1 Iki 29:15; Age 39:12 \* 11:17: Apí 22:1-14

loko gipala Isakani apeleko gizatove loko gele vávani imó. Ezáa agapilámó zuha hizi hutilí itave loko Ómasímo lo molota gákó nene ale ali ve minamóza, gipala hamó nene apeleko gizatove loko gele hamó imó.

18 \* Isakatokatí hizi hutilí itamoláamú gagapilamola gihila minanigave loko lota gipala minamóza, ámina gipa nene apeleko Ómasi guguni gizo amitove loko gilimó.

19 Avalahá eza Isakakumú láa loko gilimó netive: Ómasímo eza Isakani heleneikutí alémo otitove loko nenémini zámua aleneive. Lá onoinazo, heleneikutí alémo atiginá imó gelekave loko anoza letoko limóma neve.

20 \* Itó Isaká eza gele alévolé oakeve loko alika utó iti netalímini gákó nene Zakoponi itó Esauni lo kimike nónohá zeketamó.

21 \* Zakopó nene Ómasimú gele alévolé oaká ve minoakeve loko hilinogo noike Zoseheni gipala lositá nónohá nozeketake, hánusatanú hize gikitoake ote minake Ómasi gupá ze ameko agepoka limole.

22 \* Zosehé eza gele alévolé ve minoakeve loko hiliti gamena alitokago, Isilae vegená miniki Izipi mikasi ahuliki vitakumú geleake ezáa helisamú goí oko lo hukoko nene vinigi niiki neni helisagi aliki vilo loko lo kimimó neve.

23 \* Itó Mosé utó okago, izolahiko amelahiko nene Ómasimú gili alévolé iaká aveve minikasikeve liki izegipáinimú izegipate lamaná netá neve liki ániigi kumu hilikasigo, agulizaki ve Palaoni gakokumú kelegesá legemigo ikani losive makole novigo alími halá gesimó.

24 \* Itó Mosé napa oake Ómasimú gele alévolé o minake, Palaoni moholámini gipalave liki litanigi ago óe loko gele ahulamó.

25 Eza golesa netalímini lagaváa mino hána oko minamoakalímini nenemú giligo lemekago, Ómasímini vegenala zuha kezagi miluma netalímini agikagú niago, kezagi miní ameko gilitove loko mino etó imó.

26 Lá oake, eza minoko Palaoni helisa henoni ale lá ooko Izipi mikasigutí moni henokanoni itó netá matá minumuni mukí alitikumú giligo, ha netá loló okago, Ómasímo gologí oletative loko lo mololeta vemule loko miluma gílimoláa minatove loko nenemú giligo gihiláa loló imó. Eza minomo noitike okulumakú nenémini meinaváa alitove loko lá imó neve.

27 \* Itó Mosé eza gele alévolé oakeve loko Izipi mikasi ahulamó nene agulizaki ve Palaoni izapaló molakumú nene ahelele vizimó negopa, Ómasi ániigamoakalímini aí agómulatanú ániigamó gelekago, alévolé oko minake lá imó.

28 \* Mosé eza gele alévolé imómave loko lokago, sipsip iza apilivi givi iake, vauna aleaká ageló nenémo Isilae vegenalitini ganá gipáini nene asenini zeketative loko golaniátunú numuni gatani zaló hilitamó.

29 \* Itó Isilae vegená keza Ómasimú gili alévolé iakeve liki age nagamí agulizá golohá nagamikú likiki vamó nene nagamí nene mino ezega emega okago gunahá mikasiló vamó. Itó Izipi ami ve keza nene ámina oko vitune liki nivago, age nagamilímo kelémo sumizá namó.

30 \* Itó Isilae vegená keza gili alévolé a vegená minikakeve liki Zeliko numutó nene gamena 7 oko novigo vegegisa nene ali vígikago vegegisa nenémo lemeko akamó.

31 \* Itó gapoló mokoló vená Lahapá eza Ómasimú gele alévolé itímo ve lositosa Zosúa kimiselekago vegená kemeni ániiganigi guhu gapo vasimó nene numunagú kelémo molokago, Ómasímini gákó pelesa ziaká a vegená nene Ómasímo kepeleake Lahapani nene aseva zetamó.

32 \* Lá ikamóza, gákó lugáa nanave loko lo asú itove. Giteoná itó Palaká itó Samisoní Zepitá Tevití Samuelé itó Ómasímini agepagutí gákó liaká ve keí gákó lo asú oko linogo nelina, loloko novugo hána iline.

33 \* Keza Ómasimú gili alévolé a vegená mukí minikakeve liki lugáate vegená mukí nene lova ali kemeke kivilegemó, itó Isilae vegetatokagi hetoka vegetatokagi gizapa ikitiki kagata aleaká hozo aliki kilími hehe lamó, itó Ómasímo netá lehizeketatove loko lo moloketa netalímini gihiláa alemó. Itó lugáate laezoni akohú galatini kegepaló alego,

\* 11:18: Apí 21:12 \* 11:20: Apí 27:27-29,39-40 \* 11:21: Apí 47:31-48:20 \* 11:22: Apí 50:24-25; Gá 13:19

\* 11:23: Gá 1:22, 2:2 \* 11:24: Gá 2:10-12 \* 11:27: Gá 2:15 \* 11:28: Gá 12:21-30 \* 11:29: Gá 14:21-31

\* 11:30: Zos 6:12-21 \* 11:31: Zos 6:22,25, 2:1-21 \* 11:32: Gon 6:11-8:32, 4:6-5:31, 13:2-16:31, 11:1-12:7; 1 Sam

16:1; 1 Kug 2:11; 1 Sam 1:1-25:1 \* 11:33: Tan 6:1-27

<sup>34\*</sup> lugáate ló gulumámini agénahuna ali geha zego, lugáate lova amupiló nitekegi lá amóza, gosohá minamó. Keé lamatite goha nene amuza milamó. Itó lugáate lovagú amuza milake mikasi lugalokatí gala venini kipilivi gizivi amó.

<sup>35\*</sup> Vená lugáate Ómasimú gili alévolé amómave loko Ómasímo izegipáini hilinakutí kelémo oteake goha izóikitoka kelémo gímizimó. Itó helegaloka Ómasimú gili alévolé ina vejená lugáa nogosani kepeleke gopoguni milikitamó nene monó ahulikiko aselini zeleketatupe liki li kimikago alikaloka lamaná oakakú goha otinogo une liki giliake, gili ha iake helemó.

<sup>36\*</sup> Ómasimú gili alévolé a vejená lugáa giza nikitake gopoguka likitake segi nogosanitunú kepelemó. Itó lugáa keza kigisa kigizató seni nagá aliake nagá numukú ahulikitamó.

<sup>37\*</sup> Vegená lugáa gehanitunú kipili helemó, itó lugáa nene kugupenini ziki gitegemó. Itó lugáa nene sopolotunú kipili helemó. Lugáa keza Ómasimú gili alévolé amómave liki kimisili ahulikago, keza mikasi gomopalaló itó agokaú gutá iki minake, mei tutuhunauka itó geha mulikú akiki mihina iki minamó. Lá iki minake ginaganéini nomigo sipsip iza meme izatini galupaváa ali luhiake, gaúnámini amupiló minake, megusa izegipa lilí iki milumámini amupiló minamó.

<sup>38</sup> Nenéminate gevená lugáa keza nanáinilotí mikasiuka apiziki minikago hehe laline.

<sup>39</sup> Nenémináa keza mukitoka gili alévolé akumú Ómasímo ánigago lamaná imó. Lá okago, gopa nene netá lehizeketatove loko lo moloketa netalímini gihila nene kogómulagi mina gamenaló ma ali utó milamamó.

<sup>40</sup> Nenémini mogona lá oko neve: Ómasi eza lelitoka netá ite minamoláa mololetanogo gelekago minamó nenemú keza goí iki ámina netá alemamó. Alike nene lezagi vo milisegeko minatuni netá nene ali utó itave loko Ómasímo moloketonimóma neve.

## 12

### *Guivahanímo lagavutó zeaká noive*

<sup>1</sup> Ómasimú gele alévolé oakalímini mogona li utó a vejená mukilite zohitó mulusi napa nenéminiki miniake lilími vigikamó nenazo, nenemú lesis-iaká nia vejenalite ololu liaká nia mgonamú gele mininake gena lepeleaká netá nene gololohá oko ale ahulatunize. Itó lihima netalímini nagá likimó nenegi guluhoko ale ahulatunize. Lá okinake gapo lelepizimó nenelokó goselé aminake ololu lokogó vitunize.

<sup>2</sup> Láa noinake gele alévolé oakatemú ale goí moloaká itó nenémini gihiláa ale utó moloaká ve Izesú nene makimáminoko logómulaloka noiko aitoka ánigo zage loko ololu litune. Eza agoliza nene utó o amítive loko lonoitó zohota zaló heleakalímini avoza napámini amupiló itikumú giligo ha netá loló okago, miluma gilike hilimó. Lá oake, Ómasímini gonanalivagi siató agizani lamagaloka iteake mitó noive.

<sup>3</sup> Golesa netá itó hokolizá nene Izesuni lilí itamó nene gele ahuloake, legesó oko minamó. Lekeza aikumú nigiliki goselé amilo. Likigikatini golasasa gekatize.

<sup>4</sup> Lekeza golesa netakumú gimilikú moloaká netalímo lekelémo akanogo noigo amuza miliki lova ali namego lukugupelini apilikago golani velesá amive.

<sup>5\*</sup> Itó Ómasímo lekelikumú izegipáneve lolikimiake luhusatini ale kii loleketake, gakó makó lo likimimó nene lakagatí molokahe, olo. Gakó láa loko limó neve:

<sup>6</sup> Guivahanímo agika kemeaká noi vejená mukitoka kagavutó zeko kelémo hehe loaká noive.

Itó aí izegipala lamaná kelémo molamó mukitoka nogosani kemeko kelémo hehe loaká noinazo, nenemú gipáne geza Ómasímo gelémo hehe lanogo gagavutó nozikoma, nenemú gelekako lememino.

Itó golesa netakamú nogosani gemekikoma, gigika golasasa gemino.

<sup>7</sup> Guivahanímo lakagavutó zekikoma, goselé amiki alévolé iki minalo. Ve makolímohé makolímohé gipala apeleko alémo hee lamitíhe. Lá oko nomive. Kelémo hee loaká nene vejená mukilite lá iaká nianazo, Ómasímo ánigokago aí mohola gipala lilí ikago, lekelémo hehe linogo nenémini olíkimiaká noive.

<sup>8</sup> Itó Ómasímo izegipala mukitó kelémo hee loaká noinazo, lekeza nene lá oleketamiko minatamó nene, mohola gipala gihila lilí iki minaminigave. Nene gapoló izegipave loko loleketanogo ive.

\* 11:34: Tan 3:1-30 \* 11:35: 1 Kug 17:17-24; 2 Kug 4:25-37 \* 11:36: 1 Kug 22:26-27; 2 Iki 18:25-26; Zel 20:2, 37:15, 38:6 \* 11:37: 2 Iki 24:21 \* 12:5: Hio 5:17; Ano 3:11-12



<sup>9</sup> Itó makó litoze. Mikasiuka ametege keza nene lagavutó zikago, leza géneka lamoko kelémo napa uháma nenazo, ligikámíni ametehíni agahaisiuka lemeko minokuko etanogo ive. Lá okinake mino lamanatoka moloko minanogo une.

<sup>10</sup> Ametege kezáini kagata geletó nene melekeni gamena luguhá oko novigo lagavutó ziki lílími hehe liki miniaká amóza, Ómasi áisi nene netá gihiláa utó o limitive loko itó ezáa apazá keké vizeko nomina mogona izá miliki alitave loko lá oliமாகী noive.

<sup>11</sup> Lagavutó zeko lelémo hehe loaká netá utó okagoma, ganatílisi gelekuko laga netá negopa, milumavagi loló oaká noive. Itó alikaloka nene hehe loakakú minoaká nounimó nenémíni gihiláa nene huhu lelitoka utó inogo ive.

*Ómasímini nasahílí ániḡi ahulikatave loko kagata alimó*

<sup>12</sup> \* Nenemú lekelisi likigika gopa o vimó likigisa likigizani akatamó lílí níikíma migelelé amíkí alévolé ilo.

<sup>13</sup> \* Monolímíni gapogú viníḡi níiki kígisa gepíli mína veḡená makó monéna golesa i asú ikataze. Goha monokú migelelé amitave líki lekeza Ómasímini gapoló nene ali hehe líki mihína ilo.

<sup>14</sup> Lekeza mukí veḡenaki hulu oko minatune líki amúza mílalo. Kígika golutva lovimó nenete miníki Guivaháni ániḡamítamó nenazo, líkígíkáḡú gízopa lo miníko minatakumú amúza mílalo.

<sup>15</sup> Lekelítokátí ve makó Ómasímini nasahílikutí velehé limíkataze, gízapa íki minalo. Lá níiki holutíkú goheḡe golesa makolímó sísi va ísekoko loko loaká noimó nenémínoko líkígíkámíni ekesalámó napa okíko, veḡená mukílítíni kígika gopa okatínaze, gízapa íkítíki minalo.

<sup>16</sup> \* Lá níiki lekelítokátí makolímóhe makolímóhe mokoló ve keza míni etó íki mínamake míniaká amó nenémínoko Esauni gapoló vokátize. Esaú eza nene hamokó nosánetakumule loko ká emane alikaloka utó otatí helisa netá nene ahulamóma neve.

<sup>17</sup> \* Lekeza aí mogona móta ḡílnave. Eza alíka ameláhitokátí lusa alítove lokago amelaho óe lokago, netá matá imó nene nana oko haha ítive loko geleake, ive nama oloko víha víha voko avisa lamóma neve.

<sup>18</sup> \* Lekeza Ísilaḡe veḡená alemó nenémíníki Sínai agoka ali ḡíliaká avotígílaló amave. Ló gulumagú ma ví hílámamóma neve. Itó límusi sípisi hitakú itó límugusi ze mínakú itó ohuhú nalíkú nenémíni agíkagú ma ví hílámamóma neve.

<sup>19</sup> Lekeza Sínai agokaloka píkulí napa zímó itó Ómasímini anó lupa napa ma ḡelemamóma neve. ḡelemoláate nene ḡakó makokí ḡelemítune líake negéneḡé íki mínamóma neve.

<sup>20</sup> \* ḡakó láa loko lo molámóma nene ḡílikago kehelele vízímó: Veḡená makó keza agokaló lísi ḡílikíkoma, lekeza ḡehanítunú kípi lílítaze. Itó ízamukí ámínámíníki ítataze.

<sup>21</sup> \* Ámína ḡolívaḡi netá utó okago, Mosé nene ániḡoake, neza nenemú neleḡesá leḡekago luvoluvo zekuḡe loko límó.

<sup>22</sup> Lekeza agoka nenémínáaló negopa, lekeza Zaion agokaú alévolé oko minoaká Ómasímini numuni apá Zelusale apakítana oko mína apá okulumakú netoka anítíkave. Lá níake, ageló gatoko gato asú amoakalímíni níató,

<sup>23</sup> itó aí ízegípala zuha ḡíhíla kugulizáini okulumakú gízo molámó keza kogoliza vízíkí ali nupa íki mínató ví anítíkave. Lá níake, veḡenala mukítoka líhimatemú ḡona mololetatí ve Ómasi noító ími anítíkave. Itó hehe líki mínake hele veḡená kígíkagú lo víhelé mínoakatoka kelémo mola veḡenalítíni kemetaméni níatoka míni amíkámóma neve.

<sup>24</sup> \* Itó lo múnáheaká ḡakó ḡosohá ale utó mololeta ve Ízesutoka ví anítíkave. Itó Epoloni ḡolanímó nene uvolahó apele híli líhílamú apasatíve loko mikásiukatí límó nenelókopa, Ízesú ezáa ḡolani hepa hepa imó nenémo aleko íteko netá ḡíhílamú sele loaká noimó neneló ví anítíkave.

<sup>25</sup> Lekeza ḡakó lo lekemeaká noi ve Ómasímini ḡakola ḡíli ahulikatanaze, gízapa íki minalo. Gozapá Mosé nene mikásiuka mínake ḡakó makó kagata aseva aleko lo kemekago, ḡakó hutuváave líki ahula veḡenatoka netá ḡolívaḡi utó o kímmóma neve. Lá okanazo, ítína nene okulumakú mínake ehe loko lo nolímí ve nene lemegesa amítunímó nene ámínaló ḡogosani lemémíko ha mínatupe.

<sup>26</sup> Gozapá Sínai agokaló ḡakó nolíḡo mikási mómmóká imó. Lá imóza, ḡakoláa makó ítína loḡómulaló lá oko lo mololímíkave: Neza mínoko mikási nene goha alémo mómmóká ítomóza, lá noínake okulumakí nene alémo mómmóká inogo uve loko límó.

\* 12:12: Isa 35:3 \* 12:13: Ano 4:26 \* 12:16: Apí 25:29-34 \* 12:17: Apí 27:30-40 \* 12:18: Gá 19:16-22, 20:18-21; Gapo 4:11-12, 5:22-27 \* 12:20: Gá 19:12-13 \* 12:21: Gapo 9:19 \* 12:24: Apí 4:10

<sup>27</sup> Goha nene alémo mómoká inogo uve loko limó nenemú netá matá mukí ale utó molamó nene ale mómoká okoko ale tolova itove loko geleake limóma neve. Lá itimó nene alévolé oko minoaká netá mómoká amítí netá nene utó okoko minoloko voko minative loko lá inogo ive.

<sup>28</sup> Nenemú leza alévolé netá makó mómoká amitimó minoloko voko minoaká netá nene ale lá itunikumú Ómasi agepoka linake lehelele viziko gupá ze ameko eza gele lamaná iti netá aleko monola loko minatune.

<sup>29</sup>\* Nene nanamú negopa. Ómasile eza lotunú gizo lúnoaká ve noinazo.

## 13

*Oko moloko nouko Ómasímo ániyo lamaná iti gakó*

<sup>1</sup> Monokú agunala uvolahe likígika eza amigo eza iaká niamó nene lekelitoka lemémíno.

<sup>2</sup>\* Lugaáte keza veno vejená kilími milanigi vejená kelémo nomulupe liki ageló nene kilími milinamóma nenazo, veno vejená numuteuka kelémo molatune likima goselekaselé amilo.

<sup>3</sup> Likigive lakagave monokumule liki nagá numukú kilími milamolamú giliko lekezagi likilími milinamó giliko kilími vatí ilo. Lá níiki lezagi hamó lugupegi nounge liki giliiki kilími golesa palasa ikitago nia vejenalite miluma giliaká nia netá nene lukumupiló itino.

<sup>4</sup> Mokoló itó ve vená huki ezega emega iaká nia vejená keza Ómasímo lihima kiminogo inazo, ve go venako minoaká sunimú gilíkiko netá gihila loló ino, itó ve aleve suni ali gopa amilo.

<sup>5</sup>\* Likigikatini nene moni henokanoniló vamino. Nénisi nene ahulogetaminogo uve, itó viselegetaminogo uve loko Guivahanímo lonoimó nenazo, netatini ali minakumú mukahá makahá amiki vitagá nouni netá ale utó oletanogo ive liki hulu ikigó minalo.

<sup>6</sup>\* Nenemú leza amuza alekinake monó gotolaú ve makolímó gizonoi gakó makó láa loko litunize:

Guivahani eza nelémo vatí oaká ve noinazo,

neza netá nemú manamú nelegesá legeminogo ive.

Vejenalite nana netá golesa alinitatakumú nehelele vizitive.

<sup>7</sup> Monó gizapa velini Ómasímíni gakó li likimiaká a vemú giliki minalo. Lá níiki monolímíni gapovaló nivake helemoláatini kigizaka ániyo zagi miniki keitoka kémegetiki niviki gili alévolé iakatínigi ali minalo.

<sup>8</sup> Izesu Kilistó eza goí oko minamó itó itúnagi noimó áminámini okogó mino lúaló moloko minanogo ive.

<sup>9</sup> Lá noinazo, haitopaitó gosohá monó li nilikimikoma gelemilo. Ómasímíni nasahilí nenémo likigikatini ale alévolé olikimikiko nene lamaná inogo ive. Netá noakalímíni itó namoakalímínimú li hukina gakó nenémo ma lelémo vatí aminogo ive. Nene gakó ámegetiki vamó nenete gihila ma ali utó milinamamóma neve.

<sup>10</sup> Izesú nohiligo ezáa agupe nene lelí guguni gizoaká netá loló okamó nenazo, Zuta vetini apazá seli numukú Ómasi gelekelé imiaká nia vejenalite ligikámini nosánetá gihila natave loko gele kemenamive.

<sup>11</sup>\* Lekeza mota gilinave. Guguni giziaká vetini ve napa nenémo pulumaká izahe meme izahe apeleko gé loake, golani nene vejenalitiní lihímáikumú guguni gizatove loko Ómasímíni apazá zavusavegú aleko itekago gahaváa nene númaseloka aliki limiki ló gizi ahuliaká niave.

<sup>12</sup> Itó Izesú eza ámina oko ezáa golanitunú vejená ligika ale guluvitoletatove loko Zelusale numuni númaseloka apilikago hilimó.

<sup>13</sup> Nenemú leza ámina oko avotegini gakó gele alekuko Ómasímo lugutó vizitíhe liki liaká nia vejená ahulokimikinake aitoka lemeko aí amupiló avoza hili netá ámina oko lumupiló itekiko gihitunize.

<sup>14</sup> Lá noinake alévolé apá makó Zelusalegitana imaneloka lelitoka minamize, hanuva minoko utó itimoláa nenemú nene ligikámo ageva oaká noive loko nogilinake lá itunize.

<sup>15</sup> Nenemú legepatunú lituni netalímó Izesuni agulizá ale oteko noiko Ómasi miní ameko agepoka loko minatunimó nenémo lelí guguni gizo ameaká netate loló okiko Izesuni amekuko, Ómasi alapizitive.

\* 12:29: Gapo 4:24 \* 13:2: Apí 18:1-8, 19:1-3 \* 13:5: Gapo 31:6,8; Zos 1:5 \* 13:6: Age 118:6 \* 13:11: Liv 16:27

<sup>16</sup> Ómasi eza nasahiliki netá itó netá lamaná izá moloko vegená kimituni netakumú gelekago guguni gizo ameká netá gihiláa loló oaká noinazo, ámina netá alitune liki lakagata gili minalo.

<sup>17</sup> Monokú kugulizaki velini nene lekemetameniló gizapa ilikitiki ali hehe liki miniaká nianazo, keí gako gili aliiki keí kamatoka limiki minalo. Keza nene hozaninímini mogonamú alika gamenaló nene li utó milanigave. Lekeza hokolizá atímo miluma nigiliki ámina hoza alitamó nene lekelémo vatí iti netá lekelitoka utó amitimó nenazo, nenemú hozaváini kigika lamanatofí alitave liki gelekelé ikitiki némini manámini ikitalo.

<sup>18</sup> Neza etó okogó oko moloko itove loko amuza moloaká noumó nenazo, nigikagú lihima netikumú vitagá oaká nouve. Lá noumómave loko nenikumú Ómasiloka liki minalo.

<sup>19</sup> Guivahanímo není gapo híze lí noi netá ahulooko nelémo atiginá okiko lekelitoka litá oko vitove loko numuna loakatunú nilími vatí ilo loko gala vízeko lo nolukumuve.

#### *Ómasi agepoka limó*

<sup>20</sup> Hulu amelaho Ómasi eza Guivahanite Izesú ezáa golanitunú alévolé oko minoakalímini lo múnahéaká gako ale alévolé imómave loko sipsip izaló gizapa ve napa loló i ve hilikutí alémo atiginá o lemeka ve

<sup>21</sup> Ómasi áisi netá lamaná haitopaitolímini lehizeleketoko lekelémo vávani okiko eza lititoka molatitoka gili alitave loko noluve. Lá niiko, ezáa gelekiko lamaná iti netá nene Izesu Kilistoni zámuzatunú likigikagú ale utó ino. Aí luhuva gegemá okiko agepoka loloko iteva iteva oko alévolé oko minino. Lamaná.

#### *Vegená gekéini loketamó*

<sup>22</sup> Nigive nagavese, neza gako hána gizo lekemenamumó nenazo, lakagata aleko luhusatini ale alévolé iti gako imane lo lukumumó nene lakagata gili hee liki gili minalo.

<sup>23</sup> Itó lo likimitoze, gililo. Ligiveteho Timotini mota kalapusigutí guluhimikanazo, eza litá oko okikoma, alémoko vinake ángoleketatíve liki gililo.

<sup>24</sup> Monó gizapa velini itó Ómasímini vegená lugáa mukí nene gekéini noloketuze, li kimilo. Italia mikasiukatí likigivetike imaneló niamolate gekelini nililikitago lo nolukumuve.

<sup>25</sup> Ómasímini nasahilí nenémo lekelitoka minoloko voko minino. Lamaná.

## Zemusini Luhuva

### *Zemusí geké loketake luhuva gizamó*

<sup>1</sup> \* Neza Zemusina Ómasímini gelekelé ve itó Guivahani Izesu Kilistoni gelekelé vémina nezáne luhuva imane nogizuve. Lekeza Isilae vegená mulusi 12-a hutilí í ve vegenakutí Izesuni vegenala zuha líli amoláa geké nololeketuve.

### *Gele alévolé oakakumú itó lugupe ale oteakakumú*

<sup>2-3</sup> Nigive nagavese, gopoguni nimilikitikoma nene, gimilikú milikiko lekeza Ómasimú alévolé iki gilinamómámini mogona lá oko utó itive líki giliiki gili golesa amiki lokogoliza viziki minalo. Lekeza monokú alévolé itave líki gopoguni mililikitata netá nenémo lekelémo vatí inogo ive.

<sup>4</sup> Gopoguni nimilikitikoma nene, zou líki lipiziki minatamó nene, líkigika lamanaki vihelé lo miniko minanigave.

<sup>5</sup> Ómasímo nene vegená hize lé oketoko gínikaha amoko kemeaká noinazo, lekelikutí ve makolímó gele vevesoakala vitagá okokoma Ómasiloka lokíko aminogo ive.

<sup>6</sup> Kagata losi gilita vegená nene hepé alíke age nagamí valahuká zeaká noimó nenéminiki miniaká nianazo, Ómasiloka voká loko ámina netá alitohe alemitohe loko agata losi gelemoko gele hamó oko Ómasiloka litimó nene ámina netá alinogo ive.

<sup>7-8</sup> Kagata losipasi giliaká nia vegenalite zová ziki mihina iaká nianazo, Guivahanilokatí netá ma alemínigave.

<sup>9</sup> Gohogó vegená lekeza Ómasímo lekelémo vatí oaká noikumú nene lokogoliza viziki minalo.

<sup>10</sup> \* Itó henotiki vegená lekeza za guvava nenéminiki lutihimí zitamó nenazo, Ómasímo lekelí henonimú gíligo lemeaká noikumú lokogoliza viziki minalo.

<sup>11</sup> Ho noiteko lokíko netá guvava mikinogo ive. Lá ooko guvava legemó zekíko avogisa gopa inogo ive. Ámina iki henóiki vegenalita hozagazagú niviki tolova inigave.

### *Gopogunigi itó gimileguki moloakakumú*

<sup>12</sup> Gimíikú milata netá asú okíko alévolé iki minata vegenalite nene, Ómasímo kígika aitoka miliki minata vegená kimitove loko lo moloketonoitó nene gosohá kemetameni nene golvigí akilikitana alítamó nenazo, gopoguni nimilikitikoma alévolé itamoláa nene kogoliza viziki minanigave.

<sup>13</sup> Ve makolímóhe netá makolímóhe netá golesamú Ómasi gimivagú molaminogo ive, itó netá golesa makokumú Ómasímo gimilegú molosá amimó nenazo, gimilikú nimilikoma Ómasímo gimilegú nomolave líki lamilo.

<sup>14</sup> Lumu heleaká netalímó gimilegú molokago gelehúsígú apeleaká noune.

<sup>15</sup> Lumu nenémo ezáa nalamula molokíko gele ahulamitunimó nene lihíma alinogo une. Ámina lihímate nene lulu vízeko napa napa okíko Ómasímo viselelimíkíko tolova inogo une.

<sup>16</sup> Nígíka lukumu nígívenegita, gopa amilo. Gimilegú moloaká nene Ómasilokatí nomive.

<sup>17</sup> Mukí netá lamaná vihelé lo minoaká netakó lamaná nene Ómasilokatí neve. Ómasi ameteho eza okulumató hanatoaká netá mukí kelémo utó imó neve. Ámina netá ali vilígá alígá iaká niamóza, Ómasímo nenémini osá amive.

<sup>18</sup> Leza Ómasímini vegenala zuha ganá apí oko loló itune loko Ómasímo geleko moloko noitó aí gakó gihíla gele alévolé okúko gosohá lemetameni lemekave.

### *Ómasímini gakó gele aleakakumú*

<sup>19-20</sup> Nígíka lukumu nígívenegita, lekeza imane gakó gililo. Lizapaló moloaká nenémo Ómasímini avogísaló hee loko oko moloko ituni netá ma ale utó amitimó nenazo, lekeza Ómasímini gakó litá iki nígiliki líkizapaló molatikumú gakó makó litá iki lamilo.

<sup>21</sup> Golotuva netá itó musí netá itó netá golesa aleaká mukí nene ahulíiki Ómasímini gakó líkígíkgú molamó nene ali gíkitiki alilo, Ómasímini gakolímó lukugutó vizitimó nenazo.

<sup>22</sup> Ómasímini gakó gili ahulata vegená nene gopa inigave. Nenémú gakola nene giliiki ámegetalo.

<sup>23</sup> Ve makolite Ómasímini gakó giliki gili alemitamó nene gapokapokú kogoka kegepa ángiaká niamó nenéminiki minanigave.

<sup>24</sup> Kogoka kegepa ániagiake viki litá oko kagatí moloaká noive.

<sup>25</sup> Lá onoimóza, Ómasímo lo huka gakó lamaná nene gologí olimiaká gajokú monolímini mogonamú vitagá oloko vinake lagatí molamiko gele alekogó minatunimó nene, Ómasímo nónohá zelimikiko logoliza vizeko minanogo une.

<sup>26</sup> Makó keza monó noguluhá vejená nounge liki litamó nenete kegepa gizapa amitamó nene, monó lupe liki soza lotuváa linigave.

<sup>27</sup> Megusa izegipá itó vená getó muhelé iki niko kelémo vatí itunimó itó mikasiuka monó gelema vejenalitiní mogona nenémo lelémo golesa okative loko gizapa oko minatunimó nenémo monó lituni netá loló oko Ómasímini avogisaló hee loko lamaná minanogo ive.

## 2

### *Vejená ániagoko gona moloaká*

<sup>1</sup> Nigive nagavese, lekeza lapanalagi Guivahani Izesu Kilistokumú mota gili alévolé nianazo, vejená makokumú sigaga nilikitake vejená makokumú ániagi ahuliaká nia netá nene ahulalo.

<sup>2</sup> Ve makolímo netá lamaná akolokoko agizató nene goli gehanitunú lilí a lini akolokoko monó numutikú noitiko, itó ve makó gohogó ve nene ginégane litaha akolokoko ititimó nene,

<sup>3</sup> lekeza netá lamaná akolonoiiti vema ániagiiki sigaga limiiki holoma lamanató alími miliiki gohogó ve neneka, omaneló voko oteko minozo itó mikasiló ha minozo liki li amitamó nene,

<sup>4</sup> lekeza vejená kugupe hetokagó ániagiake gona miliki kilími haitopaitó iake, lakagata golesa giliki vejená gizaká iaká niave.

<sup>5</sup> Nigika lukumu nigivénegita, nenemú lo likimitoze, gililo. Gohogó ve niave liki iaká nia vejená makó nene Ómasímo kelémo etó okago, Ómasimú gili alévolé nianazo, Ómasímini avogisaló nene henóiki vejená lilí ikamó neve. Lá niago, Ómasímo kigika aitoka nimila vejená nene lo moloketonoinómáminoko aí gizapa olimiakalímini lapaná nene lehizeketanogo ive.

<sup>6</sup> Lekelisi gohogó vejená ániagi ahuliaká niamóza, henóiki vejená nenete vasá zilikimiake goní ilikimiaká niave.

<sup>7</sup> Lekelisi Izesuni agulizakumú sigaga liaká niamóza, henóiki vejená nenete Izesuni agulizá alivi letivi iaká niave.

<sup>8</sup> \* Monó gotoláú Ómasímo lo hukoko li gajokutí gakó alévolela láa loko neve: Gezakamú geleaká noanimó nenéminoko gigivekaginimú geleko kigika kemezo loko limó neve. Lekeza ámina lo huka gakó gili alitamó nene netá gihila alitamóza,

<sup>9</sup> vejená makokumú sigaga nilikitiki vejená makokumú ániagi goselé itamó nene lihima alitámó nenazo, Ómasímo lo huka gakó mota gili ahulikave loko linogo ive.

<sup>10-11</sup> \* Ómasímo haitó ve vená ipá i ezega emega amilo loko limó itó vejená kipili helemilo loko lo hukamó neve. Itó lekeza haitó ve vená ipá i ezega emega amiki vejená kipili hilitamó nene Ómasímo lo hukoko li gakó mota pelevesava zikamó nenazo, ve makolímo Ómasímo lo hukoko li gakó mukí nene gele alekoko hamokó gele ahulatimó nene, mukitoka mota avutá imó gilinogo ive.

<sup>12</sup> Ómasímo lo hukoko li gakó gologí olimiaká gakó gili alitamoláagi gili ahulatamoláagi alika lelémo nupa oko gona mololetanogo ive. Nenemú gakó niliki netá matá naliki nolu gajokumú gili minalo.

<sup>13</sup> Ve makolímo agika hizekiko vejená makó kelémo vatí amitimó nene, Ómasímo ámina oko agika hizekiko alémo vatí amiko, ámina ve goní napa inogo ive. Itó kigika hizekiko kilími vatí ita vejená nene Ómasímo ámina oko agika hizekiko kelémo vatí inogo ive, itó goní okimiakaláa nene koma minanogo ive.

### *Geleakalágó netá gihila nomive*

<sup>14</sup> Nigive nagavese, ve makolímo neza Izesukumú gele alévolé okuve loko litimó nenémo monokú mogona lamaná makó ale utó amitimó nene, hutuva loló inogo ive. Nenémini okogó gele alévolé oloko vitunimó nene, Ómasímo lugutó vizeminogo ive.

<sup>15</sup> Likigivetipó ve makó ahe vená makó ahe gineganemú ahe itó nosánetakumupe vitagá noikoma,

<sup>16</sup> Ikelitokatí makolímo aló vozo, mumusí oko nooko no gagatupa oko minozo loko lo amitimóza nasahilí otamitimó nene, hutuva inogo ive.

<sup>17</sup> Vegená makolite monó gili alévolé iiki monokú mogona lamaná makó ali utó amitamó nene, Ómasimú gili alévolé itamola mota helekave.

<sup>18</sup> Ve makolímó nolu gajokumú géneka litímó nene, láa loko lo amitomó neve: Geza monó gele alévolé okanimóza, neza nene monokú mogona lamaná ale utó oaká nouve. Monokú mogona lamaná nelepizemoko gele alévolé oaká animokó nelepizitanimó nene, neza monokú mogona lamaná ale utó oaká noumó nene gelepizekugo, Ómasimú gele alévolé noutímíni mogona hanuva gilinogo ane loko linogo uve.

<sup>19</sup> Lekeza nene Ómasi hámakó noive liki liaká niamó nene gakó gihila nilamóza, holosi golesa nenete ámina iki giliake alika goni itakumú kehelele vizekago luvoluvo ziaká niave.

<sup>20</sup> Negi nagi vegenakumú litune. Vegená makó keza Ómasimú gili alévolé itamóza, monokú mogona lamaná makó ali utó amitamó nene, gele alévolé oakáini mota helekave loko litune.

<sup>21</sup> \* Avoteho Avalahá nene gipala Isakani Ómasi guguni gizo aminogo noigo, Ómasímó geleake, novogisaló lihimavala asú omikago noive loko li gakó nene mota gilinave.

<sup>22</sup> Nenemú eza gele alévolé omo novike monokú mogona lamaná ale utó oaká imó, itó monokú netá lamaná ale utó oloko vitímo gele alévolé i netá nene vihelé lo minamó neve.

<sup>23</sup> \* Nenemú monó gotoláu nene Avalahá eza Ómasimú gele alévolé okago, nenemule loko Ómasímó gelekago lihimavala asú omikago minamó neve loko li gakó nene alévolé imó. Itó vegenalite Avalahakumú eza Ómasímíni zogova lamaná noive liki liaká amó.

<sup>24</sup> Lá onoimó nenazo, gele alévolé oakatemukó gelekoko Ómasímó eza novogisaló mota lihimatini asú olikimikago niave loko lamitimóza, gele alévolé onounike monokú mogona lamaná ale utó oakakumú gelekoko novogisaló lihimatini asú olikimikago niave loko linogo ive. Nene mota gilinave.

<sup>25</sup> \* Ámináminoko Zosúa eza vegená guhu gapo viki asuguná iki vegená kemeni ániगतave loko kimiselekago, mokoló vená Lahapá noitoka ikago, áisi kelémo numukú moloake, gala vegenalite ániigiiki kipilikatave loko kimisele makó gapoloka molokago vamó. Ámina mogona gihila ale utó okago, Ómasímó aikumú novogisaló lihimála asú omikago noive loko limó.

<sup>26</sup> Ve makolímíni agikagú ameni nomígo mota helekave loko litune. Ámina oko ve makolímó Ómasimú gele alévolé okoko monokú mogona lamaná ale utó amitimó nene gele alévolé oakala mota helekave loko litune.

### 3

#### *Genezate*

<sup>1</sup> Nigive nagavese, tisá mukí nene aleko iteko goní hoza napa ale liminogo inazo, lekelikuti ve mukilite monó tisá lílí amino.

<sup>2</sup> Leza mukitó gopa oaká nounge. Makó keza gajokú gopa amitamó nene, vihelé likigó minanígave. Kegepaló gizapa itamó nenete kugupeloka netá mukí hanuva gizapa lamaná itamó neve.

<sup>3</sup> Aenitunú lílí a netá nene hosi izatini kegepa holutó moloko nagá zeko nagató aleko gelehá nouko, gapo vinogo nounitoka viaká niave.

<sup>4</sup> Ámina oko sipi nene netá napa napa nemóza, itó hepé napa nenémo alémoko voaká noimóza, sipi ale ataloaká ve nenémo iha komaló ale molo molo nogiliko ámina sipi napa nene eza gilitoka vinogo ive.

<sup>5</sup> Ámina oko genezate nene netá koma nemóza, netá koma-kama oko alesá amuve loko ale napa napa oaká noive. Ló luluha koma nenémo guluma oake zazuha gihinahisi lo asú oaká noive.

<sup>6</sup> Ámina oko genezate nene lokitana neve. Lugupémíni netakutí nene mikasiuka netá golesa mukilitini nogosani neve. Genezatémo lugupe ligika ale gopa o asú oaká noive. Ló luluhámo guluma oake zazuha gihinahisi lo asú oaká noimómáminoko ló apakutí Satani vegenala zuhate mikasiuka vegená mukitoka genezate ali viligá aligá ago gakó golesa lokuko áminalotí oko moloko nouni netá nene golesagó oloko novive.

<sup>7</sup> Iza goula itó zauka gaha-nama, itó gosihá, itó nagamikú netá haitopaitolímíni mukí kilími kagata ligatamó neve, itó kilími kagata ligiaká niamóza,

<sup>8</sup> genezate nene ve makolímó agata alemínogo ive. Genezate nene netá golesa noiike hanuvagi minosá amive. Ale viligá aligá oko minoaká noive. Genezate nene zahámegeta golesa heleaká netá neve.

\* 2:21: Apí 22:1-14

\* 2:23: Apí 15:6; 2 Iki 20:7; Isa 41:8

\* 2:25: Zos 2:1-21

<sup>9</sup> \* Helegaloka genezatetunú nene Guivahani ametehini agepoka loaká noune, itó helegaloka Ómasi ezáagitana kelémo utó i vejená nene genezatetunú usí vizekimiaká noune.

<sup>10</sup> Ámina hamokó genezatetunú nene gakó lamaná lo kemeko kegepoka loaká noune, itó ale viligoko usí vizekimiaká noune. Nigivénegita, nene etami suni neve.

<sup>11</sup> Nagamí hinipiní hamokutí nene noaká nagamiki ekesá nagamiki lemeaká noihe.

<sup>12</sup> Itó loisi nenémo anasi golatihe, itó gizasímo nene loisi golatihe, itó age nagamikutí noaká nagamí utó itihe. Lá aminogo ive.

#### *Ómasilikatí gele vevesoakaláa*

<sup>13</sup> Lelikikutí ve makó nene netakumú gele vevesoaká ve itó gele hee loaká ve noitimó nenémo zou ve minoko hee loko oko moloko itimó nene, gele vevesoakalímíni mogona ale utó inogo ive.

<sup>14</sup> Lá onoimóza, likigikagú gínikahagi gezaokaní gezaokaní liki kemekugú niki minatamó nene, sozagi likataze, lukugupe aliki itiki leza gele hee lonoune liki lamilo.

<sup>15</sup> Ámina netá alitamó nene, gele vevesonoune liki lina gakó nene hutuváa neve. Ómasímo ámina netá alilo loko losá amive. Satá nene ámina netá alilo loko gala vizeaká noigo, litaha lemetamenitunú aleaká noune.

<sup>16</sup> Kigikagú kemekugú noaká netá itó gezaokaní gezaokaní loaká netá netitoka nene vegenalite gopa netá aliki netá golesa mukí lílí inigave.

<sup>17</sup> Ómasímo gele vevesoaká netá lehizelimiaká noimó nene, ligikagú gizopa lo minago hulu vejenakó minoko gínikaha amoko muheléini ángigokoko kelémo lamanatamaná okoko ligitagani oko genezate lositaki minoko soza losá amune.

<sup>18</sup> Vegená nene hulu vejenakó miniiki netá mukí zou liki alitamó nene, hulu utó inogo ive.

## 4

### *Monóini nomi vejená ániigi lamaná iakakumú*

<sup>1</sup> Lekeza nene lova leta lava leta iki lova hiziaká niamómámini mogonamú lo likimitoze, gililo. Lukugupémini lukumu heleaká netalímo likigikagú vo alekago lova utó oaká noive.

<sup>2</sup> Lá iake, lukumu hili netá nene alitupe liki amuza milaha milaha alemake vejená visilikimiaká niave. Netá matá ániigi lamaná iki ali likigizakú inamake lova napa hiziaká niave. Netá matakumú Ómasiloka voká lamanazo, alísá amave.

<sup>3</sup> Itó netá makokumú Ómasiloka voká likamóza, likigika hee loko minamitita lekeza lukugupémo amu heleaká noi netakumukó gopa Ómasiloka liaká nianazo, Ómasímo lekememinogo ive.

<sup>4</sup> Gumesisiló vegenalita monó gelema vegenalite giliaká niamó nenémini iki laga likivisiti netakumukó gilitamó nene, Ómasímini gala veva lílí itave liki gelemahe. Monóini nomi vejená kumu heleaká noi netakumukó likivisitímó nene, Ómasímini vegenala minaminigave.

<sup>5</sup> Ómasímo monó gotolaú nene není Sikalahú kigikagú moloketumó nene hanuvamú ahulotamuve, netá golesa alitahe loko gizapa itive loko ahulotonouve loko limó.

<sup>6</sup> \* Lá onoimóza, lumu heleaká netá golesa gili ahulatave loko nasahilí oletoko hize lé olimiaká noive. Nenemú monó gotolaú Ómasímo kugupe ali otiaká nia vegenalitiní lukesa akeleaká noive, itó limiki mina vegenalitiní lukesa hize lé okimiaká noive loko lonoimóma neve.

<sup>7</sup> Lekeza Ómasiloka gímiziiki aí amakuka limiki minalo. Satani visilitatamó nene, golisi inogo ive.

<sup>8</sup> Itó Ómasímini avogisaló vi alitatamó nene, eza ámina oko lokovogisaló omo alitanogo ive. Golea netatini nene ahulalo. Vitupe atupe liki vénehekánehé nilamó nene ahuliiki likigika nagamí zilo.

<sup>9</sup> Lekeza mogonatitoka giliki miluma giliki ive iki niviki likigika hizino. Giza iki logogoliza vizeaká netatotí ive iki miluma giliaká netatini utó ino.

<sup>10</sup> Guivahanímini avogisaló limiki minínikoma lekelémo otinogo ive.

### *Likigivetikini gakó golesa lí kimiakakumú*

<sup>11</sup> Nigivénegita, lekezatinimú alivi letivi iki gakó golesa lamilo. Makó eza agivelahinimú gakó golesa lomikiko lihima molotatímó nene Ómasímo lo huka gajokumú gakó golesa loko aleko letamó gilínogo ive. Geza nene Ómasímo lo huta gakó aleko letatanimó nene, gele alemoko aleko letoko gakó gihila nomive loko litanimóza,

<sup>12</sup> Ómasímo ezáagó lo huka gako ale utó oake gako ako loko gona mololetanogo ive. Ezáagó lugutó vizitímó neve, itó lelémó tolova itímó neve. Lá noiko nene vegealitiní mogonataganamú lotuva legeaká nene lekelí hoza nomive.

*Iki miliki ita netakumú lukugupe ali otemilo*

<sup>13</sup>\* Lekeza nene itínahe azohe apá makotoka vinake kilisimasi hamó minokinake, hoza alinake henoní ale utó itune liki liaká nia vegealita nene gako makó lo likimitoze.

<sup>14</sup> Azo utó iti netá nene lekeza gilinahe nílaha, olile. Lekelisi nene miniki aliki niamó nene ló lokilagitana neve. Ló lokila notike notike vegealite gamena lagasó ángikago litá oko asú oaká noive.

<sup>15</sup> Nenemú Ómasímo giliko lamaná noikoma nene, minoko aleko oko moloko itune liki lilo.

<sup>16</sup> Itína nene, iki miliki ita netakumú lukugupe aliki itiaká niamó nenémó etamive.

<sup>17</sup> Makó keza netá lamaná alitune liki gilinita netá lílí amitamó nene, lihima alinigave.

## 5

<sup>1</sup> Lekeza henotiki vegealita gako makó lo likimitoze, gililo. Netá golivagi lekelitoka utó itímó nenaze, nenemú miluma giliki ive nama ilo.

<sup>2</sup>\* Henotini mota hulupa lokago, gineganetini lamaná nene gúnakonite mota hukatató niave.

<sup>3</sup> Lekelí monitini gaupá gimó nenémó moni aliki etoha iki ali minamómámini mogona alika utó okoko, lokitana oko lekezagi henotinigi lanogo ive. Henoní ali nupa iki milinamóza, mukí mikasiuka netá asú iti gamena mota alitokanazo, ámina gamenaló henotinímini lihima golesa alinigave.

<sup>4</sup>\* Gilinahe. Lekelí mikú hozaló vete govisi hoza aliki gihisi hukikago, lekeza etami suni aliki meinava kememago, hoza ale vete ive nama amó nenémó Ómasímini agataló holokago lihimatínimú geleake láa loko nolive:

<sup>5</sup> Lekeza mikasiuka imane iki miliki ake niki lagaváa giliaká niake, giliki gehatiaká niamóza, Ómasímo lekehelú iti gamena mota alitokave.

<sup>6</sup> Lekeza vevesiki nia vegeaná nene goní ikimiake nikepelego keza lihima lova iki likipilisá amave.

*Goselekaselé amoakakumú itó Ómasiloka loakakumú*

<sup>7</sup> Nigivénegita, Guivahaní atiginá oko ati gamenamú goselekaselé amiki aí ageva iki minalo. Gilinahe. Zuhaina vete mini zuhá iake goí o golinigi itó alika golinigi zekiko minumuni omolokiko gihila lamaná aleko natune liki goselekaselé amake gizapa iki miniaká niave.

<sup>8</sup> Guivahanite atiginá oko ati gamena alitokaze, nenemú lekezagi ámina iki goselekaselé amiki likigika Ómasiloka míli alévolé iki minalo.

<sup>9</sup> Nigivénegita, goní oletati ve Ómasi nene alitó noive. Goní ikataze, lekeza mukahá makahá amílo.

<sup>10</sup> Ómasímini agepagutí gako liaká a ve gopoguni nimilikitago goselekaselé amake Guivahanímini agulizá iki miniaaka a vetini kigizakau lisiki hulu iki minalo.

<sup>11</sup>\* Gilinahe. Keza alévolé iki mina vegeanakumú nene Ómasímo nónohá zeketa vegeale loko loaká nounge. Zopú eza miluma maluma geleko goselé amike minamoláama mota gilinahe. Miluma gili gamenava asú omikago Guivahanímo netá matá lamaná alika lehezatawó nene mota gilinahe. Nenemú Guivahanímo muhelete ángikokoko agika hize lemeko hize lé oletatímóma neve loko gilitune.

<sup>12</sup>\* Nigivénegita, alévolé gako makó litoze, gililo. Okulumakú líví ziki likigizani itiki lí hukamílo. Itó mikasiuka netá makokú líví ziki lí hukamílo. Ómasiló goní ikatanazo, lekeza nene oo alitune itó óe alemitune linigima nene gako lamanakutí lilo.

<sup>13</sup> Lekelikutí makolímó eza miluma maluma geleko nominokoma Ómasiloka líno. Itó lekelikutí makolímó agoliza vizeko nominokoma Ómasi agepoka lokoko nama líno.

<sup>14</sup>\* Lekelikuti ve makó avisekikoma monó gizapa ve sele lo kemekiko, anítiki Ómasiloka liki Guivahanímini agulizá ali otiki netupagitana nagamí hilitatave.

<sup>15</sup> Lá níiki Ómasímú gili alévolé iminiki litamó nene, Guivahanímo alémo guni okiko avisi vema nene zokanogo ive. Itó lihimavatini minatímó nene, Ómasímo ahuloketanogo ive.

\* 4:13: Ano 27:1 \* 5:2: Mat 6:19 \* 5:4: Gapo 24:14-15 \* 5:11: Hio 1:21-22, 2:10; Age 103:8 \* 5:12: Mat 5:34-37 \* 5:14: Mak 6:13



<sup>16</sup> Nenemú Ómasímo lekelémo zokative liki eza hize lé omikiko eza hize lé omikiko iki lihimatini li utó utó miliki Ómasiloka lilo.

<sup>17</sup>\* Vevesiki minata vegenalite numuna litamó nene, netá gihila mukí alinigave. Ilaizá nene lezagitana vemámo golini zemitive loko amuza moloko Ómasiloka lokago, kilisimasi losive makole asú oake nekisa ikani 6 oko novigo mikasiló golini zemigo,

<sup>18</sup>\* alika nene goha golini zitive loko Ómasiloka lokago, golini zekago, mikasigú netá matá goha goloko itimó.

<sup>19</sup> Nigivénegita, lekelitokatí makolímo monokú gapo zová zavá zekiko, agivelaho makolímo alémo atiginá okikoma,

<sup>20</sup>\* gakó láa liki gilitaze: Makolímo lihimavagi ve gapo golesagutí alémo atiginá itimó nene, ámina lihimavagi vémini amenía monéna tolova inogo iikutí agutó vizeko lihimala mukí ale ahulomikave liki gilitaze.

## Pitani Luhuva Nampa 1

### *Nónohá kimike lo kimi gako*

<sup>1</sup> Neza Pitana Izesu Kilistoni aposolo noutímína, Ómasímo kelémo etó i vejená lekeza Zelusalegati hutilí iake Potu itó Galesia itó Kapatosia itó Asia itó Pitinia mikasiuka viki gá nia vejená luhuva imane gizo nolukumuve.

<sup>2</sup> Lekeza nene Sikalahulímo lekelémo apazá zekiko Izesu Kilistoni gako gili alitave loko itó aí golani hololeketamó nenémo likigika nagamí zekiko minatave loko Ómasi ametipo lo molonoító minakutí lekelémo etó imóma neve.

Ómasilokatí nasahilí itó hulu lekelitoka minoloko iteko minino.

### *Okulumakú alévolé henonimú lagata losi gelemoko ageva oaká nounge*

<sup>3</sup> Leza Guivahanite Izesu Kilistoni amelaho Ómasi agepoka litunize. Áisi nene Izesu Kilistoni nene heleneikutí alémo otekamole loko agika napa oko hizelimikago gosohá lemetameni limigo Ómasilokatí utó okunike netá lamaná alitune loko lagata losi gelemoko ageva oaká minokoko voko minoakalímíni gihiláa geleko minoaká nounge.

<sup>4</sup> Itó heleneikutí alémo otekamole loko okulumakú helisa henonite hulupa legeko lá amoakalímíni itó anuva oko gelesamoakalímíni itó helemoakalímíni ageva nounimó nene miniki okulumakú alitave loko ale vavá oletamó.

<sup>5</sup> Lá oake, Ómasímo aí zámuzalatunú gizapa noleketiko aikumú gili alévolé iki niko minoko gamena asú noiko lukugutó vizeaká netá lehizeleketanogo noimó nene utó oko lamaná inogo ive.

<sup>6</sup> Lá itikumú lokogoliza viziki niminamóza, Ómasímo giliko etokikoma, gamena alínipáisi gopogunímíni amupiló itiki miluma giliki miniki gopa lokogoliza viziiki minatave loko noluve.

<sup>7</sup> Gilinahe. Goli gehani minoko lapuluva oaká netalímíni pipizá netá gopa netimoláa nene lolímo lo asú okiko goli gehanigó etó oko minanango ive. Aminámínoko gele alévolé oaká netatinímíni meinava goli avilegeko iteko minamóza, gopoguni mililikitata netalímo alémo mómoká noikoma, gele alévolé oakatini kii loko noiko, Izesu Kilistó anititi gamenaló nene lukugulizá ali otiki lekegepoka niliko gonanaliváa lekelitoka utó inogo ive.

<sup>8</sup> Lekeza Izesuni ametamenía ániagamata gopa likigikatini amiaká niave. Lá niake itína gamena nene lokogómulatunú aí ániagame aikumú gopa nene gili alévolé iaká niave. Lá niake lokogoliza viziki lagaváa haitolímíni vejenalita legepatunú lo utó moloko lamoakalímíni nene giliaká niave.

<sup>9</sup> Ómasimú gele alévolé oakatinímíni gihiláa nene likigikatini lukugutó vizeaká netá nene omo lokovogisaloka okaze, nenemú lokogoliza nivizeve.

<sup>10</sup> Ámina lugutó vizeaká netá nene Ómasímíni agepagutú gako liaká a ve keza nana okoko utó itimó neve liki gozapá vitagá iki nenémíni mogonamú agizaka hiziki minamó neve. Lá iake lekelitoka Ómasímíni nasahilí utó itive liki alikamú gako li miliake minamó.

<sup>11</sup> Kilistó eza miluma gelekoko alika lapanalagi gonanalisi alitikumú Kilistoni Sikalahulámo gako nene kigikagú molokago keza gamena nanahé zupa itó nana gamenaló Kilistotoka utó o amitive liake nenémíni mogonamú vitagá iki minamó.

<sup>12</sup> Keza hoza alemó nene kezáikumule loko nomive. Ómasímo lekelitoka utó itive loko lo utó oko lo kimimóma neve. Itó alika nenémíni gihila utó okago Ómasímíni Sikalahú amiselekago, eza okulumakutí lemeake zámuzá lehizekimikago Izesuni gako lamaná li hutilí a vete li lekemego gilinamóma neve. Ámina gako nekisáa nene ageló keza gele guni itupe liki gili miniaká niave.

### *Etó oko minoko aleko ituni gako*

<sup>13</sup> Nenemú lekeza likigika lakagatatinímíni nagá zi gikitiki nimiriki gizapa etoha iki Izesu Kilistó goha utó oko nasahilí oleketatikumú lakagata losi gelemiki ageva iki minalo.

<sup>14</sup> Lekeza gozapá numuká vejená minake gatizá minago lukugupémo amu heleaká netá aliki minamó. Itínasa nene ámina netató iki miliki amiki Ómasi gili amilo.

<sup>15</sup> Sele lo likimi ve Ómasi eza apazá keké vizeko noitímíniki iki miliki niiki apazá keké vizikigó minalo.

<sup>16\*</sup> Nenemú Ómasímo li gako makó nene monó gotolaú láa liki luhuva gizinamóma neve: Neza apazá keké vizeko nounazo, lekeza ámina iki apazá keké viziki minalo.

\* 1:16: Liv 11:44-45, 19:2

<sup>17</sup> Lekeza ametebove liki limiake Ómasiloka liaká niave. Eza voko aleko oko aleko itigopa, minoko aleko oko moloko ituni avotigila oko hee loko gona mololetanogo ive. Nenemú lekeza mikasiuka gá ve minata gamenaló nene lekehelele viziko minalo.

<sup>18</sup> Lekeza láa liki gili minalo: Lekeza avotike netá gihila nomi gapoló nivago netá hutuváámo goli silivá nenémínimo meinavatini hizeko gologí oleketonamimóma neve.

<sup>19</sup> Lekeza Kilistoni golani meinava iteko minamó nenetunú meina hizeko gologí oleketonoimóma neve. Eza guguni gizoaká sipsip iza agupe gololó imó itó avasavagi vové avé loko minamó nenémínoko minamóma neve.

<sup>20</sup> Itó gozapá mikasi ale utó ami gamenaló nene Ómasímo hoza gakó lomikago utó i ve nenémo alikama gamena asú inogo noigo lekelikumule loko utó imóma neve.

<sup>21</sup> Lá oake, Ómasiloka lekelémo apizekage lekeza heleneikutí alémo oteake gonanalivagi lapaná ale luhota vemú gili alévolé iake gele alévolé oakatini itó lakagata losi gelemiki ageva iakatini nene Ómasilokagó neve.

<sup>22</sup> Lekeza gakó gihila gili aliaká niago, lekelí likigikatini mokoná lamómave loko liki-givetikini nene soza netá alikitamiki lamanakutí likígika kimiaká niave. Nenemule liki likígika lamanakutí eza amiko eza amiko iki múnahiki minalo.

<sup>23</sup> Lekeza gosohá utó amó nene avotike hiliaká amómámini zuhaváa negopa, alévolé ve Ómasilokatí utó amóma neve. Alévolé lemetameni ale utó oko alévolé oko minoaká gakokutí Ómasímini gakokutí utó amóma neve.

<sup>24</sup> \* Nenémíni gakó makó nene monó gotolaú láa loko nemóma neve:  
Vegená mukító nene gihisi nenémíniki niave.

Itó ániagi laga hiliaká netáini nenémo netá guvava lamaná nenémínoko neve.  
Gihisi nene gulu gulu vizeaká noive.

Itó guvaváa nenémo lutehemó zeaká noimóza,  
<sup>25</sup> Guivahanímini gakó nene alévolé oko mino lualó moloko minoakalímini neve.  
Ámina gakó lamaná li likimikago gilinamóma neve.

## 2

### *Guivahanímo alévolé oko minoaká gehani noigo aí apazá vegená noute*

<sup>1</sup> Lekeza hokolizá soza netá itó genezatini losi minoaká itó kemekugú noaká itó aleko letoaká nene ahuli asú ilo.

<sup>2</sup> Ahuli asú iiki izegipa namuni keza aminikumú kiviseaká noimó nenémíniki likigikat-inímini aminí lamanakumú likivisino. Ámina aminí lamaná niliki viki monokú napa iiki gehatikí minataze.

<sup>3</sup> \* Guivahanímini nasahililamú makó lagaváa gilinita vegenalita némini itaze.

<sup>4</sup> Lekeza Guivahani minoloko voko minoaká gehanigitana noi ve vegenalite ániagi ahulamóza Ómasímo giligo meinaváa iteko mina ve alémo etó i veloka viki gímizilo.

<sup>5</sup> Lá niiki sikalahutinigi gehani lilí i asú iiki miní amiki minilíki itiki Ómasímini Sikalahulímini monó numuni lilí ilo. Lá iiki nene apazá guguni gizi amiaká vegená niiki Ómasiloka liakatunú guguni gizi amikiko Izesu Kilistotoka vokiko, gelekoko gele laga itize.

<sup>6</sup> \* Izesukumú monó gotolaú gakó láa loko nemóma neve:

Neza alévolé gehani makó meinava iteko minamó nene alémo etó okuke

Zaion agokaloka geha lapusa nohizuve.

Aikumú gili alévolé itamó nenete viki netá alemamómave liki mulúikú ma mesaha aminogo ive.

<sup>7</sup> \* Lekeza aikumú gili alévolé iaká nia vegenatoka nene eza netá meinava iteko minoaká noive. Itó gili alévolé ama vegenakumú nene monokú láa loko lonoimóma neve:

Numuni giaká ve keza gehani makó ániagi goselé iake ali ahulamó nenémo geha lapusa loló oake noive.

<sup>8</sup> \* Itó aikumú monokú luhuva makó láa liki gizinamóma neve:

Ámina gehani amupilotí lotohá kipilinogo ive.

Itó ámina gehanilotí kepele molanogo ive.

Loko limó nene monó ahulakumú lotohá kipilitive loko lonoitó viki nenémíni iaká niave.

<sup>9</sup> \* Lá onoimóza, lekeza nene lekelémo etó onoi vegená itó agulizaki ve napatémíni guguni gizi amiaká nia vegená itó Ómasímini apazá keké viziki nia vegenala lilí ake aí zuha lilí iki

niave. Lekeza límugusigutí lekelémo otopá zeake lapanalámini silikakénaló lekelémo mola vémini gako li hutilí ikiko hutilí itive loko sele lo likimimóma neve.

<sup>10</sup> \* Lekeza gozapá nene ha netá minamóza itína nene Ómasímíni vejenala zuha lilí iki niave. Gozapá nene gopa minamóza itína nene agika hize likimitímíni agikagú niave.

*Ómasímíni gelekelé vejená minatune*

<sup>11</sup> Nigive nagavese, neza gala vizeko lakagata aleko lo likimitoze, gililo. Lekeza mikasiuka gá niamó itó hanuva veno vejená niatita lukugupémini laga aviseaká noi netalímo likigika lova ale ameaká netá nene mosilo.

<sup>12</sup> Lá niiki monó gelema vejenalítini holúikú etó iki minalo. Lá iki niiko, ámina vejenalite mogonataganatini ániigiki giliiki golesa netá aliaká nia vejená niave liaká nia gako nene ahuliiki iki miliki ita mogonatini lamaná ániigiiki Ómasímó gako hoza aleketati gamenaló nene Ómasi agepoka liki minataze.

<sup>13</sup> Vegenalita gizapa ve haitopaitolímíni kilími milamó nene lekeza Guivahanimule liki gelekelé ikitalo. Gamanitini agulizaki ve napámíni gakola

<sup>14</sup> Itó kiapege kéisi li huka gako gili alilo. Ómasímó golesa netá aliaká nia vejená nene nogosani kimitave loko itó gakoíni giliki netá lamaná aliki miniaká nia vejená kegepoka litave loko gamanite kelémo etó onoimóma neve.

<sup>15</sup> Lekeza lá iki lamaná iki iki miliki itamó nenémo vejená negía keza lekelikumú negi gako liaká niamó nene kegepaló gahumá ikitatave loko Ómasímó loleketonoimóma neve.

<sup>16</sup> Lekeza mukí netalímíni nagakutí mota gologí olimikamóma neve liki lamaná iki miniki aliki ilo. Itó lá iki minatamó nenémo golesa netalímíni gahumaláa loló amino. Lekeza alévolé iki miniki Ómasímíni gelekelé izegipa lilí iki minalo.

<sup>17</sup> Lekeza mukí vejená kilími guni ilo. Itó likigive monokú niamoláa likigika kimilo. Ómasímú lekehelele viziko minalo. Gamanitini agulizaki ve napáa nene alími napa ilo.

*Kilístó miluma gilike ale goí mololetamó*

<sup>18</sup> Gelekelé izegipa lekeza gizapa velinitini kamatoka limiki miniki nasahilí ikitiki gakoíni gili alilo. Itó huluváa itó kigika lamanaki mina vejenakumukó negopa, ve lolaváa itó gínikaha ve kezagi nenémini ikitalo.

<sup>19</sup> Keza galana nomító hanuvamú miluma hoza alilikitikoma lekeza Ómasímú giliki gínikaha amiki lamaná iki niko, Ómasímó lekelikumú giliko lamaná itize.

<sup>20</sup> Itó lekeza lihima netá naliko nilikipilikoma, gínikaha amiki niko, ve makolímó geké loleketatihe. Lá aminogo ive. Nenemú lamaná iki miniko likipiliki miluma netá alilikimikikoma legesó iki minalo. Lá itamó nene Ómasímó giliko lamaná inogo ive.

<sup>21</sup> Lekeza nenémini itave loko sele lo likimimóma neve. Kilístó eza ámina oko lekelikumule loko miluma gilike ale goí oko gapo veleleketamóma nenazo, lekeza agizaka hiziki vilo.

<sup>22</sup> \* Áisi nene lihima makó ale utó molamimóma neve. Itó agepagutú soza makó lamimóma neve.

<sup>23</sup> \* Alivi galativi nitago eza alevo galatovo oko loketamimóma neve. Itó miluma nogilike gamuní oketamike mogonataganamú ale hee loko lo hukoaká ve Ómasiloka leheta oko minamóma neve.

<sup>24</sup> \* Lelí lihímá aí amupiló itekago, agohí geake, zohota zaló hilimó nene netá golesa aleakakumú hele vejenakitana iki mómoká iki otemítave loko, itó hee loko minoakakumú miniki aliki itave loko lá imóma neve. Itó aí agómuni nenémo likigikámíni agómuni gimóma neve.

<sup>25</sup> \* Lekeza sipsip iza nenéminiki hela hiziki mihina amóma nemóza, itína nene likigikámíni gizapa ve nenémo lekelémo atiginá okago áitoka anitikave.

### 3

*Ve alevetini gako*

<sup>1</sup> \* Vená lekeza ámina iki vatinitini kagahisiuka limiki minalo. Itó vatini lugáa nene monokumú gelemake miniaká nitamó nene monokú yí hilatave liki gako nene li kememiki hanuva likigika lamanaki minikiko

<sup>2</sup> vatini nene lekelé iki miliki miniki aliki iaká netá nene gizopa lo miniko ániigiiki kigika ali viligiki minataze.

<sup>3</sup> \* Lekeza lukugupémini gonanaliváa nene nagatumó iki zopovatiní ali lamaná iki gonanalisi itakumú itó likigisa likigizatoka gonanalisi iki meinava iteko mina netá milatakumú itó ginegane luhuvagi luhatakumú gilikiko ha netá loló ino.

<sup>4</sup> Lá noiko geha itó hulu iki minata netalímo likigikagú vaí o lamaná oko giki okiko gonanalisitini nene alévolé oko minoakalímíni itó litaha lamoakalímíni Ómasímo gelekiko iteko minati netá likigikagú minative.

<sup>5</sup> Monóinigi vená gozapá minilíki amó keza kigikámini gonanalisi netá nenémináa alíki miníki amó. Lá ake Ómasiloka leheta iki váinitini kagahisiuka limíki miníaká amóma neve.

<sup>6</sup> \* Salá eza ámináminoko vana Avalahani gakola nene gele aleake aikumú guivahaníneve loko lomiaká imó. Itó lekeza netá lamaná lílí iki netá nemú manamú lekelegesá legemíki minatamó nene Salani izegipala zuha niave loko loleketanogo une.

<sup>7</sup> \* Itó ve lekeza ámina iki venatinígi hamolímíni alévolé lekemetameni ali lá inamóma nenazo, Ómasiloka numuna líki akíki otíkitini nenémo voko lí amitive líki venatinígi apíziki miníki zámuzáini lemeko nenaze líki gili miníki venatini nene netá matá nene líkigika lamanakutíki lí kimíki minalo.

*Oko moloko itunitímo vo guni noiko milumámini amupiló itituni gakó*

<sup>8</sup> Lá níiko lo asú oko lo líkimitoze. Lekeza mukitoka líkigikatini míli hamokó iki geha ziki miníki líkigika eza amíko eza amíko iki líkigivetikini mílumáini gilíki lukugupelíni alíki limíki minalo.

<sup>9</sup> Netá golesa nalilikítikoma, lekeza ali vilígiki netá golesa alíkitamílo. Alívi letívi nilíkitikoma lekeza ali vilígiki alíki letamíki nónohá zíkitalo. Lekeza nónohá zeleketatove loko Ómasímo sele lo lekemeneimóma nenazo, lekeza ámina iki lusa gakó nene lí kimílo.

<sup>10-12</sup> \* Nenemú monó gotoláú gakó makó láa loko neve:

Guivahani eza hee hee líki miníaká nia vegeatokagó agovisa kemeko aitoka líaká níakumú ágata moloko gámémé noimóza,

golesa netá aliaká nia vegeaná nene Guivahanímo ánígamó ánígo goselé oaká noínazo, makó keza alévolé oko minoakakumú lagaváa kivisekiko logoliza vízeko minoko aleko itune líikíma genezáinílo gízapa íiki gakó golesa lamítaze.

Itó kegepatunú soza gakó makó lamítaze.

Itó golesa netá kemegesa amíiki netá lamanakó alítaze.

Hulugú miníki nenéminí hozaváa alíki amúza míliki alítaze.

*Gopoguni mililitatamómámini amupiló itituni gakó*

<sup>13</sup> Lekeza netá lamanakumú víki gímíziíki níko hí vémo netá golesa loló oleketative.

<sup>14</sup> \* \* Itó lekeza iki míliki itatímo vo guni noiko míluma netalímíni amupiló ititamó nene, Ómasímo nenemú gelekiko lokogoliza víziti netá loló inogo íve. Itó lova ali líkimíki lekelegesá lígiti gakó nilíkoma, líkígisa líkígizakutí luvoluvo zemino. Itó mulutini ítemino.

<sup>15</sup> Líkígikatini ali guluvítiki ali guni íkiko Kílístó eza Guivahanítini loló o líkimino. Lá okiko netá matakumú líkígikatunú lakagata losi gelemíki ageva íaká níakumú loká nilíkitikoma, vávani oko ámina mogona lo utó moloko lo kímítune líki ali vatí iki minalo.

<sup>16</sup> Lá níiki gakó nene legesó iki keikumú gilíko lemémíko líkígikagú gakó nomíko lamaná iki lílo. Lá níko lekelikumú alívi letívi níko, Kílístogegi apíziki lamaná iki iki míliki ítamó nenémo ve nenémináa keza soza sazáinímíni mogonáini utó okiko kovoza napa hílitaze.

<sup>17</sup> Ómasímo líkipílíki nagá líkímítakumú gelekiko lamaná okiko, netá lamaná lílí níko lílí lílí líkítatamó nenémo ítekave lokomú nolúve. Itó lekeza líhíma alíkíki lílí lílí líkítatamó nenémo lemekave.

<sup>18</sup> Kílístó eza ámina oko hee lo mína ve míluma gilíke vegeaná golesa lelíkumúle loko hílimó. Eza líhímate asú ítíve loko lelíkumú gamena hámakó helekago mota asú okave. Nene Ómasiloka lelémo molanogo loló imó nene agupegí minoakeve loko apílikago hílimó. Itó Síkalahulagí minoakeve loko goha mómoká oko otímó.

<sup>19</sup> Oteko mínake nene hílíki vamoláa keza síkalahulítinigi nene nagá geisagú níatoka lemeko monó lo kímímó.

<sup>20</sup> \* Keza gozapá Noá eza sípi napa loló oko noigo Ómasímo ágikagú hulu ominatímove loko kígika ali vilígatahe loko kegeva oko mínolo noítigo gakoláa gíli ahulí ahulí ími ítemó. Lá níago, ve vená 8-ásí nene ámina sípígú ítikago, nagamílímo kelémo veletó okago hanuva mínamó.

\* 3:3: 1 Tim 2:9    \* 3:6: Apí 18:12    \* 3:7: Epe 5:25; Kolo 3:19    \* 3:10-12: Age 34:12-16    \* 3:14: Mat 5:10  
\* 3:14: Isa 8:12-13    \* 3:20: Apí 6:1-7:24

<sup>21</sup> Nenémini helegáa nene monó nagamí holoakalímo lekelémo lamaná oaká noive. Monó nagamílímo lugupémíni golotuváa nene nagamí zesá amive. Monó nagamí nohulunike Ómasi eza ligikate nagamí zelimikiko eza gele lamaná ititó minoko aleko itune loko voká loaká nounge. Monó nagamí nohuluko Izesu Kílistoni heleneikutí alémo otekamole loko lugutó vizeaká noive.

<sup>22</sup> Itó ezáa okulumakú iteko Ómasímíni agizani zamagaloka iteake mitó noigo ageló mukí itó veđená iti minamoláa zámuzagi niamoláa keza aí agahaisiuka limiki niave.

## 4

### *Ómasímíni agepagú gakató gele aleko minatune*

<sup>1</sup> Kílistó agupe míluma gelekamole liki lekeza ámina iki líl ílitatave liki zámuzá aliki amuzá mílalo. Lá níiki makolímóhe makolímóhe monokumule loko agupe míluma geleká noitítímo golesa netá alitíkumú gohá mumuzó amítive loko gele minatize.

<sup>2</sup> Itó lukugupémo mínoko aleko iti gohaluló lukugupémo amu heleaká noí netá alemiki Ómasímo gilitó molató nene gili aliki minalo.

<sup>3</sup> Amunaloka hetoka veđená keza lagaváa giliake netá matá lá iki aliki minamó neve: Mokoló netá itó golotuva netá nenémini hozaváa líl iki minake, piá nagamí níki sipaki niake, iza goulá nosá negi nagamíki vauva aliki níki lekemeni ziki eza aviligigo eza aviligigo iki, soza ómai netá gupá zi amiki minamó. Ámina netá nene lekezagi goselé lekepelemigo iliki víki niago gamena hána hána vímó neve. Nenemú gohá miní amiki lá amilo.

<sup>4</sup> Itó itína nene hetoka veđenalite golesa netalímíni agikagú minake nosánetá níki meleketakeni iki kogoliza viziki niago lekeza kezagi apiziki minake ámina netá líl amago, keza giliake, ininá niake lekelí nene alivi letivi iaká niave.

<sup>5</sup> Lá ikamóza, hele veđená itó logómulagi veđená lelí mogonataganamú goní oletatove loko ale vatí oletonoi ve Ómasílóka gakó hoza sipisi alinogo une.

<sup>6</sup> Nenemú helemoláa keza Izesuni gakó lamaná lo utó oko lo kimimó nene hele veđenalitini gapoló nivake kugupetunú lihima alikago Ómasímo keí mogonataganamú goní oketamóza, helegaloka Ómasímíni gapoló víki alévolé oko minoakakú miniki aliki itave loko ámina gakó lamaná lo kimimóma neve.

### *Ómasímíni nasahílí legesó oko ale mininake gona molatune*

<sup>7</sup> Netá matá mukí asú iti gamena mota alitokave. Nenemú lekeza likigika lukugupe gizapa iki gili koló iki Ómasílóka numuna loakakumú vávani iki minalo.

<sup>8\*</sup> Lá níiki ligika kemeaká nenémo lihima mukí eza ahulotiko eza ahulotiko oaká noimó nenazo, netá mukí kivilegeko mína netá nene likigika eza amiko eza amiko iakakumú amuzá mílalo.

<sup>9</sup> Lekeza goselé lekepelemiko veno veđená nene eza nasahílí otiko eza nasahílí otiko kílími numutiuka míliki kílími lamaná ilo.

<sup>10</sup> Lekeza Ómasímíni monolímíni zámuzá haitopaitolímíni lehizeleketató nene hoza aliki lekeza mukitoka vo alítive líki Ómasímíni nasahílí nene legesó iki ali miniki gona moloaká veđená minalo.

<sup>11</sup> Itó monó gakó li utó itamó nenete Ómasímíni gakola lamaná li utó iki li kimitaze. Itó veđená nasahílí íkitatamó nenete Ómasímo zámuzá kemekiko nenetunú nasahílí íkitataze. Lekeza némini manámíni níiki Ómasímíni agulizá vítive líki lá ilo. Izesu Kílistoni zámuzatunú aí luhuva utó itize, nenemú gonanalivagi lapaná itó gizapa olimiaká zámuzá aitoka minatímó minoloko voko míno lualól moloko minatize. Lamaná.

### *Kílistoni veđenala minunikumule líki gopoguni mílilitanigave*

<sup>12</sup> Nígika lukumu veđenáise, lekelitoka gimilikú moloaká netá agepagi netá utó noimó nene lekeza netá gosohá utó o lemekave líki hukili amilo.

<sup>13</sup> Kílistó míluma gilímó nenémini agikagú miniki mulutíkú agila guluma iko minalo. Lá iki miniki aí gonanalivagi lapanala utó o lekemekiko ámina oko mulutíkú agila guluma noiko lokogoliza viziki minalo.

<sup>14</sup> Lekeza Kílistoni agulizá ali minakumule líki aliki letiki mumusopa nizilikítikoma, gilíkiko nene lapanalímíni amelaho Ómasímíni Sikalahú nene lekelitoka lemeko minatímíni mogona lá oko utó okave líki gili minataze.

\* 4:8: Ano 10:12

<sup>15</sup> Lekelitokatí ve makolímohe makolímohe goní omíkiko nagá numukú miluma gilitimó nene apele heleakakumupe itó gumínamupe itó hokolizakumupe itó geligeli oakakumupe itó laskoli minoakakumupe loló amino.

<sup>16</sup> Itó helegaloka makó eza Kilistoni vezenala minakumule liki nagá amíkikoma nene, nenemú gelekiko avoza helemiko Kilistoni agulizaláa nene ale minoko Ómasi geké lo amitize.

<sup>17</sup> Gílinahé. Ómasi eza vezenalitini mogonataganamú gona moloketati gamena mota alitokave. Itó vezenala zuha lelitoka ámina hoza apí oko alinogo ive. Nenemú lelitoka ganatilisí napa okoko alitimó nenazo, aleloko voko Ómasímini gako lamaná gili ahuliaká nia vezenatoka voko nolutegeko nene, nanámini oketative.

<sup>18</sup> Nenemú monó gotolaú gako makó láa loko neve: Ve lamaná keza lihímáinimú goní ita gamenaló silipa oko kugutó viziko minatamó nenazo, nenemú monó gili ahuliaká itó golesa netá aliaká nia vezená keza nana itamó neve.

<sup>19</sup> Itó nenemú Ómasímo giliko lamaná onoi miluma malumámini amupiló itita vezenalite kelémo utó oaká ve Ómasi eza lokago alévolé oaká vémini agizakú nene kigikáini miliiki lamaná iki iki miliiki minataze.

## 5

### *Ómasímini sipsip iza mulusi gizapa oketatune*

<sup>1</sup> Lekelitoka monó olotiva ve niamó nene ámina oko monó olotiva ve noutímina gako lo lekemekugo, gilitaze. Neza Kilistó miluma maluma gilimó nene nogómulatamú lamaná ángutímina noluve. Itó minoko gonanalivagi lapaná utó oloko voko utó noiko nene, izá moloko alito ve neza lakagata aleko gako imane lo nolukumuze, gililo.

<sup>2</sup> \* Ómasímini sipsip iza mulusi lekeza gizapa ikitatave loko loleketonoimó nene alévolekutikopa, mulutikú lamaná ominiko gizapa lamaná ikitalo. Lá niiki moní henokanoni aleakakumú giliki negopa, ámina hozamú mulutikú ahuu ahuu lokiko iki miliiki itaze.

<sup>3</sup> Lá niiki ve napáini lilí iki lá amilo. Sipsip izatini ali goí ikitiki monokú nene likigizaka hiziki vitave liki kilími zou liki kilímiki vilo.

<sup>4</sup> Itó minoko gizapa ve napa nenémo aniteko gonanalivagi akilí alévolé oko minoakalímini hitolikimikiko, hitiki minataze.

<sup>5</sup> \* Gosohá ve lekeza ámina iki olopa vetini kagahisiuka limiki minatave loko lo nolukumuve. Lá niiki lekeza mukitoka lukugupe aliki limiki minata netalímo hoza aleaká gineganetini loló okiko ali akaliki eza gelekéle otiko eza gelekéle otiko iki minalo. Nenemú monó gotolaú gako makó láa loko neve:

Ómasi eza kugupenini aliki itiaká nia vezenalitini lukesa akeleaká noive. Itó kugupe aliki limiki mina vezená nene hize lé oketake nasahilí okimiaká noive.

<sup>6</sup> \* Nenemú Ómasímini alévolé gizapaló lukugupe aliki limiki gupá zi amilo. Lá ikiko, eza mola gamenaváa alitokiko ásigó lukugulizá ale otinogo ive.

<sup>7</sup> Ómasímo nene vatí oko gizapa oko lekelémo guni oaká noive, nenemú lekeza netá matá gena netá lakagata gululusi giliaká nia netá mukitoka nene aí agizakú milalo.

<sup>8</sup> Lekeza lakagata gili koló iki gizapa iki minalo. Gala velini Satá eza akohú galagitana oko agepa á oaká noi ve eza aí akohitohe aí akohitohe loko agepa á oloko vogá ogá oaká noive.

<sup>9</sup> Nenemú lekeza gili alévolé i miniki vasá zilo. Lá niiki likigive lakagave monokú niamó numutó namató niamoláa keza miluma maluma ámina iki giliki miniaká niave liki gililo.

<sup>10</sup> Itó Ómasi nasahilí amelaha eza Kilistotoka gímizémómave loko gonanalivagi lapaná alévolé oko minoakalíminiloka ví hilatave loko sele lo likimí ve áisi miluma maluma gamena alínipáisí nigiliko, lekelémo vevesati zámua lekemekoko lekelémo kii loko lukesavatini hize kii loleketanogo ive.

<sup>11</sup> Nenémíni zámua nene aitokagó minamó nene minoko minoloko voko mino lúaló moloko minino. Lamaná.

### *Vegená makó gekéini loketamó*

<sup>12</sup> \* Neza gako imane Sailasini nene lo ame ame nougo luhuva gizo nolikimive. Neza aikumú gulugo, nigivéneho gihila loló onoive. Neza Ómasímini nasahililámú gihila noive liki gilitave loko gako ahaváisi lo utó moloko lo lukumuve hize lé oleketatove loko lo nolukumuve. Ámina nasahilímini agikagú alévolé iki oti minalo.

<sup>13</sup> \* Papelonía numutokatí Ómasímini vejenala zuha lezagi lelémo etó i vejená keza geketini nililikitago noluve. Itó monokú alémo mulu ve Makí ezagi geketini nololeketave.

<sup>14</sup> Lekeza monokú apizi lamaná iki eza aputá viziko eza aputá viziko iki minalo.

Kilistotoka gímiziki nia vejenalita Ómasímini hulu lekilitoka mino moloko minino.

---

\* **5:13:** Apo 12:12, 13:13



## Pitani Luhuva Nampa 2

*Nónohá kimike lo kimi gakó*

<sup>1</sup> Neza Saimon Pitana Izesu Kilistoni gelekélé ve itó aposolo nénisi nene Izesu Kilistó eza Ómasile itó lugutó vizeaká ve hee loko mina ve minoakeve loko gele alévolé oaká gihiláa lehizeletamokitana oko lehizeleketa vegenalita luhuva imane gizo nolukumuve.

<sup>2</sup> Lekeza Ómasimú itó Guivahanite Izesukumú gili guni iki gililikí niviko nasahilí itó hulu nene lekelitoka miní ameko utó oloko voko minino.

*Ómasímo lelémo etó oake sele lo limi gakó*

<sup>3</sup> Izesú ezáa lapanalagi itó lamanalagi nene izá miliki alitave loko sele lo likimi ve ángoko gelekuko Ómasiloka gímizi miniki iki miliki itave loko ligikámini lukesaváa mukí nene Ómasímíni zámuzalámo lehizeletonoimóma neve.

<sup>4</sup> Lá oake, netá gihila ite minamoláa meinaváa napagi nemó alitave loko lo mololeta netá lehizelimikago nene, alekuko, nenémíni gihiláa lelitoka utó okiko, mikasiuka gumesisímíni gihila lapuluva oaká netá nene lemegesa amekinake Ómasímíni ametamenigi itunize.

<sup>5</sup> Nenemú lekeza gili alévolé iki miniaká niató amuza miliki hee liki miniakatíni nene miní amilo. Hee liki miniaká niató nene mukí netá mogonamú geleká nene miní amilo.

<sup>6</sup> Netá mogonamú geleakató nene likigika nemó lukugupe nemó gizapa oaká nene miní amilo. Nenémíni agikagú amuza milikiko, gasovagi netá utó noikoma, amanapa o minoaká nene miní amitaze. Amanapa o minoakató nene, likigika lamanaki minoaká nene miní amilo.

<sup>7</sup> Likigika lamanaki minoakató nene likigivetikinimú miluma gelekimiaká nene miní amilo. Miluma gelekimiakató nene, likigika kemeaká nene miní amilo.

<sup>8</sup> Ámina netá matá nenémo lekelitoka minoko hize hutilí noikoma, Guivahanite Izesu Kilistoni mogonamú geleakaláa gili miniki hozaváa alikiko, hutuváa loló amoko gihiláa zinogo ive.

<sup>9</sup> Itó nolu netá matá ali minamita vegenamú láa loko litunize: Keza kemenímíni agómula liko vimó neve. Golea netáini goí oko Ómasímo nagamí zeketoko kelémo lamaná imó nene kagatí molokave loko litunize.

*Guivahanímíni lapanaláa nene agómula gihilatunú ángamó*

<sup>10</sup> Nigive nagavese, lekeza nenemú Ómasímo lekelémo etó oake sele lo likimimó nenémíni gihiláa lekelitoka mino alévolé itive liki amuza milalo. Lekeza lá itamó nene goselekaselé ikiko monokutí velehí lememinigave.

<sup>11</sup> Lá iki miniko Ómasímo giligo vávani olikimikiko Guivahanite lugutó vizeaká vele Izesu Kilistóni avogisaló alévolé oko minoakalímíni agikagú nene vi hılanigave.

<sup>12</sup> Lekeza netá matá mukikumú imane mota lo lekemekuháma neve. Itó ámina gakó gihilámíni agikagú alévolé iki niminamóza, ámina gakómaló nene ale gosohá oko lo lekeme lekeme oko minanogo uve.

<sup>13-14</sup> Neza gamena hána minaminake mikasi nugupe ahulatove loko Guivahanite Izesu Kilistó lo utó oko lo nemekago gelenoumó nenazo, neza mikasi nugupegi nomininake gakó imane lo lekeme lekeme oko mininake lekelémo ote ote oko itove loko gulugo etokave.

<sup>15</sup> Nenemú helekugo, lekeza gakó nene ali gosohakosohá iki mili gililikí iki viva viva iki minata gapomú vitagá inogo uve.

<sup>16</sup> Neza Guivahanite Izesu Kilistoni zámuzalamú itó anititi gakó lo lekemekugo nene, lekeza giliko gitene gakó loló amino. Vegenalite kagata giliki ali guni iki lakutí lo lukumumó negopa, neza Guivahanímíni golivagi lapanaláa utó noigo, nezáne nogómula gihilatunú ángonoutotí lo lukumumóma neve.

<sup>17</sup> \* Nene Ómasi amelaho eza Izesuni agulizá ale olike gonanalisi lehizemikago, okulumakú lapanalagi velokatí nene imane nene nigika amu gipáne noive, aí nene ángo laga alekuve loko limimóma neve.

<sup>18</sup> Neza aposolo lugáagi áisigi apazá agokaló nouko, gakó némika loko okulumakutí lemekago gelenouháma neve.

<sup>19</sup> Itó leza nenemú Ómasímíni agepagutí gakó liaká a vetini gakó gelekuko gihiláa lamaná loló oloko iteaká noive. Nenémo livikitana oko limugusigú hize hanatokamó nenazo, lekeza nenemú lokogómulatunú ángi gisilí hiziki niko, gó lo lapaná latize. Itó sonohí napa ganakomekitana oko Izesuni lapaná nenémo likigikagú hize hanatoko minatize.

\* 1:17: Mat 17:1-5; Mak 9:2-7; Luk 9:28-35

20-21 Ómasímíni agepagutí gako nene veenalita giliki alivi hiziiki makó linamó negopa, Ómasímíni Sikalahulími kelémo vávani noigo Ómasílokati gako liki miniaká amóma nenazo, nenemú ganatilisí gako makó láa liki gili guni iki gililo: Ómasímíni agepagutí gako liaká a vete monó gotolaú luhuva gizi mila gakolímíni mogonáa nene ve makolite kezáini kigikagutí gili guni iake lamoakalímíni neve.

## 2

### *Monó lili ali ve sozámíni keí gako*

<sup>1</sup> Isilae veenatoka gako lili ali ve sozámínigi nene gozapá utó iake minamó. Lekelitoka áminagó iki monó lili ali ve sozámíni utó inigave. Keza soza monó ali utó milikiko, lekelitoka hou loaká netá itó latila oaká netá nene utó inogo ive. Itó nenegó nomive. Guivahanímo nohilike lihímváváni meina hizeketa gakokumú egamega oaká nenegí alinigave. Lá ikiko, kezáini iki miliki atímo lapuluva oaká netá nene galinali kugupeló utó inogo ive.

<sup>2</sup> Vegená nenémínáa keza mokoló netá naliko vevená mukilite ángigiki kémegetanigave. Itó keikumule liki vevená lugáate monó gihilámíni gapomú aliki letanigave.

<sup>3</sup> Lá okiko, soza monó liaká ve keza moni henokanonimú mumuzó itatímo itó kigikagutí gako utó itítímo lokogoka viziki netá matatini hanuva alinigave. Hoza lá iki alitakumú keí lihíma kimitove loko Ómasímo gozapá ale vatí oketamó nene, voko haha amive. Itó vi tolova iakáini nenémíni agepáa ale molamó nene ha neve.

<sup>4</sup> Ve nenémínáatini mogonamú láa liki gililo: Ageló lugáate netá golesa alikago Ómasímo asenini zeketamike meikú nagá zeko kehélú ahulokago, ká emane límugusi lapalapa zikú limiki niave. Neneloka goní ita gamenamú ageva iki niave.

<sup>5</sup> \* Itó gozapá netá matá mukí itó vevená nene Ómasímo asenini zeketamímóma neve. Makó Noá nene hee loko minoakalímíni gako loaká i vegi vevenala zuha 7 kezagigó asenini zekimikago, gosohá niago, vevená golesa keitoka nagamí veleko kepele gesá imóma neve.

<sup>6</sup> \* Itó Soto apatokagi Gomola apatokagi ámina oko lapuluva itave loko lokago, lokú liki mikasi amóma nene vevená golesa alikaloka utó iki mínatamó nenete ámina netalímo lelitoka utó okative liki gilítave loko nenémíni imóma neve.

<sup>7</sup> \* Itó ámina apá alémo latila inogo noike nene hokolizá ve keza mokoló netá kovoza helemigo aliki niago, hee lo mina ve Lotí eza ámina netá golesamú miluma geleko mina vema agutó vizimó.

<sup>8</sup> Lotí eza monolagi ve minoakeve loko keí holúikú noigo, keza netá golesa aliki minikago gamena gamena ángigóká geleká ike, mulunagú gele golesa oko minoaká imó.

<sup>9</sup> Nenemú Guivahanímíni mogonáa lá oko mota utó okamó nenazo, áisi nene monóiki mina vevená nene gimilegú moloaká netakutí lugutó vizeaká zámuzagi noive. Itó monóini nomi vevená nene gamena napaló goní oketatove loko nagá kimitikumú geleneive.

<sup>10</sup> Litaha kigikámú amu heleaká netá golesa ámegetiake goihá giligili iki gizapa véinitini gako gili ha gele gele iaká nia ve nene Ómasímo aleko iteko alévolé oko nagá kiminogó ive.

Ámina soza monó ve nenémínáa nenete kelegesá legemigo hokolizá iki miniaká niave. Itó lapanáiki niamoláa nene alivi letivi ikitiki miniaká niave.

<sup>11</sup> Lá niago ageló keza nene zámúza itó helisa haitolímíni alinatite Guivahanímíni agovísalo ámina soza monó liaká ve nene lihímáinimú lotuva ligikí alivi letivi iki ikitisá amamóza,

<sup>12</sup> soza monó liaká ve nenémínáa nene kigika kagata nomimó gaha nama kipiliki nia netakitana mína vevená keza netá matalímíni mogonáa gili hee liki gilinamake ámina netakumú gopa napa gako golesa liaká niave. Nenemú gaha nama tolova iaká niatímíniki tolova inigave.

<sup>13</sup> Lá iiki netá golesa galasa aliki miniaká niamómámíni meinaváa aliki miluma gilini-gave. Keza límugusigú negopa ho napa lató nene kugupémo amu heleaká noi netá golesa amúza miliki aliaká niamó nenémo kogolizánini loló o kemeaká noive. Holutikú musi netá itó golutuva netá lílí iki niago lokovoza utó oaká noive. Nosánetató nene lekezagi níki minake ali gopa napa iki gasova veenalitini suni aliaká niakumú kogoliza viziaká niave.

<sup>14</sup> Kogómulatunú mokoló netá kogómula ángoaká itó netá golesa lugáa nekumú lagaváa sipisi ali miniaká nia ve keza monokú alévolé ama vevená kimimika nilake itó moni henokanoni nenémínimú amúza mililikí nívago kigikáini loló oaká noive. Ve nenémínáate meínímíni mututoni lílí niave.

<sup>15</sup> \* Keza gapo hee lo minamó nene kemegesa amiake olíi hiziki Posoleni gipala Palámo vi gapoló ámegetiki nívave. Palámo golesa netalímíni meinaváa alinogó mumuzó imóza,

<sup>16</sup> Guivahanímo ámina lihimamú gahá amimó nene, toki iza gako lamoaká netalímo vegenalitiní gako loake soza gako lole ale ve Palámini negi netá lekesava amimó.

*Ámina lilí ali ve sozámini mogonáini*

<sup>17</sup> Soza monó liaká ve nenémináate nagamí utamó nenéminiki minake itó hepelímo límusi huhu lokago, voko aleko oko aleko oko voaká noimó nenémini iki niave. Kegepagutú gako linamó nenémini gihila utó osá amive. Ve nenémináa keza límugusi lapalapavagú anititave loko loketamó neve.

<sup>18</sup> Kezáinimú gelego iteaká noi gako ha gako liake nene, monó giliake litaha gapo izoha nahula vegená nene kogoka viziaká niave. Lá niake mokoló netatunú kogokagú milikago, anitikago, litaha kigikámo amu heleaká noi netá aliake vegená makó keí gelehugú apilitave liki lá iaká niave.

<sup>19</sup> Lukugupémo amu hili netá hanuva alinigave liki li mililikimiaká niamóza, kezáini kigikáini anuva onoitímini nagakú niake némika liaká niave. Nenémini mogonamú láa loko gelenouve: Ve makolite netá makolímini gelekeleváa minatamó keza ámina netalímini nagalagú vi hiliki minanigave.

<sup>20</sup> Gilínahe. Ve makó keza Guivahanite lugutó vizeaká ve Izesu Kilistoni mogona nene lamaná iki gilikakeve liki monóini nomi vegenalitiní golotuva netáini kemegeza aminitakutí ámina netalímo goha kovogisaloka okoko agulizaki ve goha loló okemekiko ámina netató gímizi lamaná itamó nene, gozapá miniki aliki amó nenémo komáisi golesa imóza, alika miniki aliki itamó nenémo golesa o lamaná inogo ive.

<sup>21</sup> Ve nenémináa keza hee loko voaká gapo lamaná nene ániigi lamaná amalina, golesa itigi i minaline. Itó gapo lamanató vikatitegi itó apazá gokoláa li kimikago gelemóategi goha atiginá iki gozapá litaha gapoló vitamó nene golesa o lamaná inogo ive.

<sup>22</sup> \* Ve nenémináa keitoka anozá gako láa liki liaká niamó nene alévolé okago niave: Gala eza nosáneta noake itó musi veleake ámináa nene goha noaká noive. Itó iza eza nagamikú akoake goha gohá holoaká noive.

### 3

*Guivahani atiginá iti gako*

<sup>1</sup> Nigika lukumu vegenáise, luhuva netá goha imane gizo lukumugo losi noive. Ámina luhuva lositakú nene neza ale gosohá oko lo lekemekinake mulutini alémo otekugo giliakatini nene lamanalíminigó minative loko gizokumó nene

<sup>2</sup> Izeza Ómasímini agepagutú gako liaká a ve apazá minamó nenete gozapá alika utó iti netakumú lina gako itó lekelí aposolo vegená leza Guivahanímo lo mola gakola lo lukumuhá nene gili minatave loko gizo lukumumóma neve.

<sup>3</sup> \* Ganatilisí imane gili zagiki gililo. Alika gamenama alitokiko, vegená golesa utó iiki kugupémo amu heleaká noi netató ali gikitiki aliki miniki gaktotini alivi letivi iki lilikitiki

<sup>4</sup> Láa liki linigave: Guivahani atiginá itove loko lo mola gacolímini gihiláa hí neve. Gozapá avotege ámina gako gililiki viki minake helemó. Lá okago netá matá mukí mikasi utó i gamenaló emane ámina netá minoloko iteko hanuva nemóma neve. Itó ámina okogó itína nominave liki linigave.

<sup>5</sup> \* Keza vegená lá iki giliake gako makó lá oko nemó nene gopa gili ámiagiaká niave: Ómasímini gaktó okulumá gozapá utó imó, itó mikasi ámina oko nagamikutí utó oake nagamilagi minamó neve.

<sup>6</sup> \* Itó alika ámina nagamílmogó vegená itó netá matá mukí kelémo sumizá noake kepele gesá imó neve.

<sup>7</sup> Itó okulumaki mikasigi ha niasimó nene ámina gaktó Ómasímo kelémo gikitokago lolímini mututonáa lilí iki niasive. Vegená golesa lihimáinimú goní oketati gamena utó okiko, latila itáikumú ageva iki niasimole.

<sup>8</sup> \* Nigika lukumu vegenáise, netá makó imanegi gili gopa napa amilo. Guivahani eza gamena hamokumú giligo melekeni 1000-igitana loló oaká noive. Itó melekeni 1000 nenemú giligo gamena hamokitana loló oaká noive.

<sup>9</sup> Guivahani eza gako lo mololetamó nenémini gihiláa utó itive loko ligitagani oko gamena molo hána osá amive. Vegená lugáate gilikago lá oaká noimóza, lá oko nomive. Eza ve lugáama latila itave loko gelesá amike vegená mukítoka kigika ali viligatave loko geleake lekelikumule loko geha zeko ageva oko minoaká noive.

<sup>10</sup> \* Guivahanímini gamena nene guminaló ve nenéminoko galinali utó inogo ive. Utó okiko okulumá eza anó sipisi moloko voko tolova inogo ive. Itó okulumató nego ángoko moloko oaká nouni netá mukitoka nene lolímo loko haha inogo ive. Lá noiko mikasigi itó mikasímini amupiló netá matá mukí nene lolímo lo asú inogo ive.

*Lo asú oko lo kimi gakó*

<sup>11</sup> Netá matá mukí nene nenéminoko haha o asú ititó nenazo, nenemú lekeza etó iki keké vizi miniki monokú alévolé iki miniki ali minalo.

<sup>12</sup> Lá niiki Ómasímini gamena napa atikumú lakagata losi gelemiki ageva iki govisi aliki letiki minalo. Ámina gamena alitokiko okulumá nene lolímo loko haha inogo ive. Itó okulumató nego ángoko moloko nouhá netá mukí nene ló gulumagú holokiko loko gili gili molokiko asú inogo ive.

<sup>13</sup> \* Lá onoimóza, lélisi nene okulumá gosohá itó mikasi gosohá ale utó moloko lehizele-tatove loko lo mololetakumú ageváa nounge. Itó nenegú vegenalite mini hee liki miniaká nenémo gikí o lamaná oko minanogo ive.

<sup>14</sup> Nigika lukumu vegenáise, lekeza netá nenéminámú ageva iki miniaká nianazo, aí agovisaló likigika geha zimó gizopa lo miniko lihimate nomimó minatune liki amuza milalo.

<sup>15</sup> Lá niiki Guivahanitémo gamena molo hána okikoma láa liki litaze: Lelémo lugutó viziti gamena neve. Ligiveteho ligika ameaká nouni ve Pauló eza Ómasilokatí geleakalagi minatímove loko lo lukumu netakumú luhuva gizo likimimóma neve.

<sup>16</sup> Eza mukí luhuva netá gizoaká noikú nene ámina netakumú gakó lo lekemeloko voko noimóma neve. Itó aí luhuva netalagú gakó lugáámini mogonáa genavagi nego ve negi itó keé lamamó keza ali gopánapa iaká niamó nene aí luhuva netakó nomive. Monó gotola gakó lugáa mukitoka nene ali gopánapa iki kezáini vi tolova iaká gapoló nivake lá iaká niave.

<sup>17</sup> Nigika lukumu vegenáise gakó imane lakagata aleko lo lekemekugo gilinamóma n-naze, vegená golesa keí gopánapa gakóini likigikagú lemekiko, likilími gopa ikiko monokutí limiki akikataze, gizapa iki minalo.

<sup>18</sup> Lá niiki Guivahani lugutó vizeaká vele Izesu Kilistoni nasahilí itó aí mognatagana gili kolosiki gili hee liliki viki minalo. Aí lapaná itínasa utó o lamaná okoko ámina oko minoloko voko mino lúaló moloko minino. Lamaná.

\* 3:10: Mat 24:43; Luk 12:39; 1 Tes 5:2; Ali 16:15

\* 3:13: Isa 65:17, 66:22; Ali 21:1

## Zonini Luhuva Nampa 1

*Alévolé oko mínoakalímíni agepagú gakotó mína ve*

<sup>1</sup>\* Mukí netá apí oko utó ikutí ká emane minoloko voko minamó itó lagatatanú gulunimó itó logómulatunú ángunimó itó logómulatunú ángo gísili hizeko ángunike ligizanitunú ale geleko ángunimó nene minova minova oko mínoakalímíni agepagú gakotó mína vemú luhuva imane gizo nolukumuve.

<sup>2</sup>\* Minoaká gihila utó o lamaná okago ángunitita alévolé oko minoloko voko mínoakalímíni gakola nene lo utó moloko lo lekemeaká nune. Alévolé oko minoloko voko mínoaká ve nene amelahitoka minoloko voko minake alika lelitoka utó imó.

<sup>3</sup> Nenemú netá matá ángoko geleko unimóma ámina oko lo lekemeaká nounimó nene lekeza gilíkiko ligika molo hamó oko lamaná oko apizeko minatune loko nenemú loaká nune. Itó ligika molo hamó oko lamaná oko apizeko nominuhá nene ametehitoka itó gipala Izesu Kílistotoka neve.

<sup>4</sup> Nenémínoko utó okiko, mulutegú ágila guluma o asú itive loko luhuva netá imane gizo nolukumuve.

*Ómasímíni lapanakú minoko aleko ituni gakó*

<sup>5</sup> Gakoláa nene Izesutokatí lá oko gelekuhá mave loko lo lekemeaká nune: Ómasíloka límugusi makó ma nomive. Lapaná loake molo minamó neve.

<sup>6</sup> Leza límugusigú minoko aleko inake Ómasígi ligika molo hamó oko lamaná oko apizekune loko litunimó nene sozagi linogo une. Itó netá gihiláa nene ma ale minamitune.

<sup>7</sup> Ezáa nene lapanakú noive. Ámina oko leza nene lapanakú minoko aleko itunimó nene ligika molo hamó oko vatí oko apizeko minanogo une, itó gipala Izesu Kílistoní golanímó líhíma netate monéna nagamí zekiko ligika guluvitanogo ive.

<sup>8</sup> Leza golesa netate nomive loko litunimó nene ligikate agoka vizinogo une. Itó gakó gihila gotoláa nene ligikagú ma minaminogo ive.

<sup>9</sup> Itó golesa netate lo utó molatunimó nene, Ómasímó lo mololeta netá amegesaló moloaká ve netá hee lokogó aleaká noi ve noinazo, golesa netate nagamí zeko líhimavate ale ahulo asú inogo ive.

<sup>10</sup> Golesa netá aliaká niave loko lolimiaká noinazo, leza golesa netá alesá amune loko litunimó nene Ómasímú nene sozaló veve loko lotunimó gilínogo ive. Itó aí gakoláa nene ligikagú minaminogo ive.

## 2

*Golesa netatemú goní nouko lelitoka alemo moloaká ve Izesú*

<sup>1</sup> Izegipánemata, netá golesa alikatave loko gakó imane gizo nolukumumóza, makó keza netá golesa alitamó nene, ametehitoka golesa netatemú goní nouko Izesu Kílistó eza hee loko mína vémo lelitoka alemo moloaká ve noive loko lo nolukumuve.

<sup>2</sup> Áisi nene líhimate asú itive loko gapo veletamó nene lelikumukó negopa, numutó namató vegená mukikumukive loko monéna veletamóma neve.

<sup>3</sup> Ómasímó lo hukoko li gakó nene gele alekuko, aikumú gele guni unitímíni mogonáa utó okiko, gilínogo une.

<sup>4</sup> Itó lo huka gakoláa gili alemitamó nenete Ómasímú gele guni o nune litamó nene sozaló veve loko loketatanize. Ve nenémínáatini mulúikú gakó gihiláa nomive loko litunize.

<sup>5</sup> Itó helegaloka Ómasímíni gakó ámegetiki minatamó keza kígika Ómasi amikamómámíni gihiláa utó o asú okave. Lá okago nene, Ómasíloka gímizi lamaná iakalímíni mogonáa utó okiko, ángoko gilítunize.

<sup>6</sup> Lá oko utó itikumú noluve: Makó keza Ómasíloka gímizeko nune litamó keza Izesú oko moloko imó nenémíni avevezahaló minanigave.

*Lo hukoko li gakó gosohá*

<sup>7</sup>\* Nígika lukumu vegenáise, neza lo hukoaká gakó gosohá makó lo nolukumumó negopa, lítaha mogonalokatí gili-líki víki minamóma nene, gakó li líkiminamóma nenémíni lo huka gakó lítaha gohakú lo lakagata naluve.

<sup>8</sup> Itó gako luhuva nogizumó imane lo hukoko li gako gosohá noimó nogilive. Itó límugusi mota tolova noigo, lapaná gihiláa nene utó o lamaná oko noinazo, ámina gosohá lo hukoko li gako nene Izesutoka itó lekelitoka gako gihiláa loló oaká noive.

<sup>9</sup> Itó kigivékini mukahá kipiliaká nita vejená keza nene lapanakú noune liki litamó nene, keza límugusigú niake nilave loko litune.

<sup>10</sup> Itó kigivékini kigika kimiiki nasahili ikitatamó keza nene lapanakú vatí iki minanigave. Lá niiko, golesa netakumú gala vizé vizé nenémo keitoka ma utó osá aminogo ive.

<sup>11</sup> Itó makolímohé makolímohé agivelahini mukahá apilitimó nene límugusigú minanogo ive. Itó límugusímuni gapoló vinogo ive. Eza límugusímó agikámuni agómula likokamó nenazo, lititagani okoko gapo nene ániigo hee loko ma ániiganogo ive.

<sup>12</sup> Mohóne gipáne lekeza Izesuni agulizá alinakumú lihimatini ahulolikimikamóma nenazo, nenemú gako imane gizo nolukumuve.

<sup>13</sup> Améikita lekeza minoloko voko minamó noi vemú gili guni iki gilikamóma nenazo, nenemú lekelí gacoláa imane gizo nolukumuve. Itó gosohá ve lekeza golesa netalímuni amelahnáa amuzá mili miliki aviligikamóma nenazo, nenemú gako imane gizo nolukumuve.

<sup>14</sup> Itó mohóne gipáne lekeza ametipini mogonamú gili guni iki gilikamole loko luhuva imane gizo nolukumuve. Améikita lekeza minoloko voko minamó noi vemú gili guni iki gilikamómave loko gacoláa imane gizo nolukumuve. Gosohá ve lekeza amuzaváa mílamole loko itó Ómasímuni gacoláa likigikagú nego golesa netalímuni amelahnáa aviligikamole loko gacoláa imane gizo nolukumuve.

<sup>15</sup> Mikasiuka Ómasigi nomi suni itó mikasímuni amupiló netá matá utó netó mulutini milikiko lukumu helemino. Makó keza mulúini nene mikasímuni amupiló ne netató milikiko minatimó keza kigika nene améipini amisá amave.

<sup>16</sup> Gilinahe. Mikasiuka netá matá mukí nene lugupémo mumuzó oaká noi netá itó logómulámo ániigo laga oaká netá itó ligika lugupe aleko ite ite netá nene ametehitokatí nomive. Nene mikasiukatile.

<sup>17</sup> Itó mikasi eza gumesisivagi minoko vo otolova inogo ive. Lá itimóza, Ómasímuni agikaló mini milatamó keza miniliki viki mini lualó miliki minanigave.

#### *Kilistoni gala vela napámuni gako*

<sup>18</sup> Mohóne gipáne, gamena nene mota alínipa o asú okave. Nenemú lekeza Kilistoni gala ve napa utó itíve liki lina gako mota gilinahe. Itó itína gala veva mukí utó iake miniliki vinave. Nenemú nene gamenaváa mota alínipa o lamaná okave loko gelenoune.

<sup>19</sup> Kilistoni gala ve keza utó amoláa nene lelitokatí ahulilimiake vikamoláa nene lelí ligive lagave gihila lilí iki minamamó neve. Keza ligive lagave gihila minalina nene, ma ahulilitamaline. Itó ahulilimikamole loko keza ligive gihila lilí iki minamatímuni mogona utó okave.

<sup>20</sup> Lá ikamóza, lekeza mukitó nene apazá amelaho Sikalahula hololeketamole liki gako gihila geleakalímuni lilí iki niave. Nenemú luhuva imane gizo nolukumuve.

<sup>21</sup> Lekeza gako gihila gelemave lokogopa gako gihila giliaká niamómave loko, itó soza saza mukí nene gako gihilámuni agikagutí ma utó osá amimole loko luhuva imane gizo nolukumuve.

<sup>22</sup> Soza sazalo veve nene éagininimú litune. Ve makolímohé makolímohé Izesú eza gologi oletative loko amisili ve nomive loko nolikoma, aikumú sozaló veve loko litune. Amelahiko gipalago ániigo ahulata vejenakumú nene Kilistoni gala vejenale loko litunize.

<sup>23</sup> Makó keza Ómasímuni gipala ániigo ahulatamó nene amelahnigí ániigo ahulanigave. Makó keza gipalamú ali miniki litamó keza nene amelahnigí alími kamatoka milanigave.

<sup>24</sup> Lekeza mogonalokatí emane monó gakola gililiki iki minamó nene gili zagi minalo. Monó gacoláa gili zagi minatamó nene amelahiko gipalago keitoka gímizi lamaná inigave.

<sup>25</sup> Izesú lehizeletatove loko lo mololeta netá nene alévolé lemetamenigí minoaká nene neve.

<sup>26</sup> Likigika ali gopánapa ilikitanigi nia vejenakumú gako láa loko luhuva nogizumóza,

<sup>27</sup> lekelikumú láa loko noluve: Sikalahú mololeketamó nene mulutikú minoko aleko oaká noive. Nenemú ve makolímó sozagi lamanaki nanave loko ale gizaká oko lo likimitive. Nene ma nomive. Sikalahú hololeketamó áisi gako mukí lainim-oleketoko lo lekemeaká noive. Itó aí gakola nene sozagi ma nomive. Lamanakó nenazo, nenemú Sikalahulímo lo likimi gako nene gili aliiki Kilistotoka gímiziki minalo.

<sup>28</sup> Mohóne gipáne lekeza likigika avasavagi miniko miniki Kilistó eza anititi gamenaló utó noiko agómualó lokovoza helemitive liki Kilistotoka gímiziki minalo.

<sup>29</sup> Ómasi eza hee loko noitímó noive liki gilinitamóma nene, netá ali hee liaká nia vejená mukitó keza Ómasilokatí utó amole liki gili zagitave.

## 3

*Ómasímini izegipala nominune*

<sup>1</sup> \* Gilinahe. Ameteho nene mohóneve gipáneve loletamó nene agika haitolíminoko limike lá oletamóma neve, itó leza lamaná aí izegipala nominune. Itó monóini nomi vejená keza Ómasímini mogona ánihi hee lisá amanazo, nenemú lelí mogona ánihi hee lisá amave.

<sup>2</sup> Nigika lukumu vejenáise, leza itínasa nene Ómasímini mohola gipala nounize, itó minoko nana avevezahaló utó itunimó neve. Nenémíni mogona litá oko utó o lamaná amimóza, láa loko gelenoune. Guivahani utó iti zupahé nene ametamenía ánihi gisili hizeko ánihi gatu, nenemú lezagi aí ametamenigítana minanogo une.

<sup>3</sup> Itó makó keza nenemú kagata losi gelemiki ageva iki minata vejená nene, Guivahani eza vové aveláa noinazo, ámináminoko minatune liki kigikáa alími guluvitanigave.

<sup>4</sup> Lihima netá aleaká nenémo Ómasímo lo mola gakó ahelú oaká netá nenazo, lihima netá aliaká nia vejená keza Ómasímo lo mola gakó nene avutá iaká niave.

<sup>5</sup> \* Itó lekeza Izesuni mogona giliaká niave. Eza lihimate ale olové inogo utó imó. Lá oake ezáaloka nene golesa netala ma minamimó neve.

<sup>6</sup> Nenemú makó keza Izesuki apiziki miniaká nia vejenalite golesa netá aliki minaminigave. Itó makó keza golesa netá aliki miniaká niamó nenete Izesuni mogonáa ánihi hee lisá amave.

<sup>7</sup> Mohóne gipánemata, makolímo oko lekelémo gopa itove loko nolikoma, gili amemilo. Makó keza netá ali hehe liki nalikoma, keikumú nene hee liki miniaká nia vejenale loko litunize. Itó Izesú nominatíminiki hehe liki minataze.

<sup>8</sup> Makó keza lihima netá aliki minatamó nene Satani vejenala minatave. Satá eza lihima netá nene mogonolokatí aleloko voko minamó. Itó aleko minoaká noigo, Ómasímini gipalámo Satani hozaváa nene apeleko ale ahulanogo omo anitimó neve.

<sup>9</sup> Ómasilokatí utó amó nenete Ómasímini ametameni ali minamó nenazo, keza lihima netá aliki minaminigave. Keza Ómasilokatí utó ikamole liki lihima netá aliki minaminigave.

<sup>10</sup> Ómasímini izegipala itó Satani izegipala keí mogonatagana lá oko nene utó iko ánihi gano uone. Makó hehe liki minamimó keza Ómasilokatí niave loko lamitunize. Itó makó keza kigikáini nene kigivéikini kememikoma keikumú nene ámina oko litunize.

*Ligika eza amiko eza amiko oko minatune*

<sup>11</sup> \* Monó gakó lekeza mogonolokatí gililiki iva iva niamó nene lá oko neve: Ligika eza amiko eza amiko oko minatunize.

<sup>12</sup> \* Atani gipala Kaini ámegetamitunize. Eza golesa netalímini amelahináámini gipala loló oake agunala apele hilimóma neve. Lá imó nene ezáa oko moloko imoláa golesa okagove loko, itó agunalámo oko moloko imoláa lamaná okagove loko apele hilimó neve.

<sup>13</sup> Nigive nagavese, monóini nomi vejenalite alivi galativi nililikítikoma, giliiki gosohá suni neve liki lamilo.

<sup>14</sup> \* Ligika nene ligivetegini kemeaká nounimó nenazo, nenemú helenouhakutí atiginá oko voko alévolekú vo holokuháma neve loko geleaká noune. Vejená makolite kigivéikini kigika kememitamó nene kigika hele vimó minikave.

<sup>15</sup> Itó kigivéikini mukahá kipilita vejená nene kipili hiliaká veze kigikagi niave. Itó kipili hiliaká vejená nene alévolekémetamenigi iki minamave liki lekeza giliaká niave.

<sup>16</sup> Izesú eza lelikumule loko minoko aleko imola nahulake agika limimómámini mogona ale utó molokago ánihi gokune. Nenemú leza ámina oko ligiveteginimule loko minoko aleko itunimoláa ahulatave loko loletonoimóma neve.

<sup>17</sup> Ve makolímo iza goula nosá henokanoni minumunímó vaí oko minati vémo agivelaho makó nene netá makokumú vitagá noiko ánihi goko ánihi goselé itimó nene, Ómasiloka agika ma molamive loko litunize.

<sup>18</sup> Mohóne gipáne, leza ligika nokiminake nene gaketunukó itó legepatunukó nomive. Nasahilitunú itó legepatunú ligika kemesá neve.

*Ómasímini avogísalo ligika ale hamokó molatune*

<sup>19</sup> Lá okuko, gakó gihiláámini vejenala nounitímini mogonáa utó okiko, ánihi goko gilinogo une. Itó ligikagú losi pasí noikoma Ómasímini avogísalo ligikagú hulu iko minatunize.

<sup>20</sup> Netá golesamú goní ituni gakó ligikagú nekoma, láa loko litunize: Ómasi eza ligikámini avevezahaló nomive. Eza haitolíminoko minake, netá matá gele kolosoko geleaká noinazo, lihimatemú oko ahuloletaminogo ive.

<sup>21</sup> Nígika lukumu vejenáise, netá golesamú goní ituni gakó ligikagú nomikoma, Ómasímini avogisáló lehelele vizeemiko vatí oko mínanogo une.

<sup>22</sup> Itó gakoaláa gele alekunike oko moloko oaká nouni netá nene eza gele lamaná oaká noinaze, nenemú nene aitoka netá matakumú voká lokuko lemeaká noive.

<sup>23\*</sup> Gakoaláa lo hukoko li gakó láa loko neve: Gípala Izesu Kilistoni agulizaláa gele alévolé inake loletonoimómáminoko ligika eza amiko eza amiko oko minatune.

<sup>24</sup> Lo huka gakoaláa gili alita vejená keza Ómasígi apizi lamaná iki nimiriko, Ómasi eza mulúikú minoko aleko inogo ive. Itó Sikalahú lehizeletamó áisi lo lemekago, Ómasi eza mulutegú minoko aleko oaká noive loko geleaká nune.

## 4

### *Gakó makó Ómasilokatí nehe nomihe gele hee litune*

<sup>1</sup> Nígika lukumu vejenáise, Sikalahulímo lelémo vávani igo loaká nune liki liaká nia veenalitini gakó nigiliki mukí nene Ómasilokatí neve liki gelemilo. Gakó lili ali ve sozámíni mukí utó iake hutlí ikamó nenazo, gakó makó nene Ómasilokatí nehe nomihe gele hee litune liki míli gililo.

<sup>2</sup> Ómasímini Sikalahulímo kelémo vávani okave liki lá iki ángataze. Izesu Kilistó nene lelí lugupe ale luhoake utó imó neve liki li utó míliki lita vejená nene Ómasilokatí niave loko gilitune.

<sup>3</sup> Itó makó keza Izesunimú láa liki lamikoma nene, Ómasilokatí niamave. Keza Kilistoni gala ve napámíni gakotó nilave loko gilitune. Aikumú nene mikasiuka utó itive liki li líkímíkago gílinamóma neve. Itó itína nene mota utó okave.

<sup>4</sup> Mohóne gípáne, lekeza Ómasilokatí utó iake, monó gakó lili ali veva sozámíni nene amuza míliki kiviligikamóma neve. Lekelí mulutíkuka mínoaká noi véminí zámuzalámo mikasiuka noi ve golesámíni zámuzala nene avilegeneive.

<sup>5</sup> Monó lili ali ve sozámíni keza mikasímíni amupiló netakumukó liaká nianazo, monóini nomí veenalite gakóini nene ali kagatagú míliaká niave.

<sup>6</sup> Leza nene Ómasilokatí utó unimó nenazo, Ómasímini mogona ángi hee liki ángi veenalite gakote giliaká niave. Ómasilokatí utó amamó nenete gakote gili ahuliaká niave. Gakó gihílámíni mogona itó ale gopa oaká gakoalímíni mogona lá oko utó noigo ángi guni oaká nune.

### *Ómasímini mogona nene agika lemeakalímíni neve.*

<sup>7</sup> Nígika lukumu vejenáise, ligika kemeaká suni nene Ómasilokatí nenazo, nenemú leza ligika eza amiko eza amiko oko minatunize. Makó keza kígvíékíni nene kígika kímkí nasahílí ikitatamó nene Ómasilokatí utó a vejená niave. Itó Ómasímini mogona gili hee linave.

<sup>8</sup> Ómasímini mogona nene agika lemeakalímíni nenazo, makó keza vejená makó kígvíkátunú nasahílí ikitamítamó nene, Ómasímini mogona ángi hee lamave loko litune.

<sup>9</sup> Ómasímini gípala hamó nene alévolé oko mínoaká netá nene aitotí alitune loko mikasiuka amiselekago limitímó agika limimómámíni mogona lelitoka utó o lamaná okave.

<sup>10</sup> Lígika kemeakalímíni mogonáa lá oko neve: Leza Ómasi lígika amehá negopa, áisi nene agika límíke gípala amiselekago límíke líhimate asú ití gapo veleetamó.

<sup>11</sup> Nígika lukumu vejenáise, Ómasi eza haitolímínoko agika lemekamó nenazo, nenemú leza ámina oko ligika eza amiko eza amiko oko minatune.

<sup>12\*</sup> Vegenalita Ómasi ángioká nene ma ánginamunimóza, ligika eza amiko eza amiko oaká nenegú oko moloko itunimó nene Ómasímo mulutegú minoko aleko noitímíni mogonáa ale utó inogo ive. Itó agika lemeaká noimó nenémo víhelé loko mínanogo ive.

<sup>13</sup> Áisi lelí lelémo amakuka moloaká noive. Itó lelí mulutegú minoko aleko oaká noive. Nenémíni mogona nene Sikalahula lehizeletamole loko gelenoune.

<sup>14</sup> Ameteho numutó namató vejená lugutó vizítive loko gípala amiselekago limimó nene leza logómula gihílatunú ángokunimóma neve. Itó nenemú gakó imane lo utó moloaká nune.

<sup>15</sup> Itó Izesú eza lamaná Ómasímini gípala noive liki lita vejená keza Ómasiloka gímíziki mínanigave, itó Ómasímo ámina oko mulúikú minoko aleko inogo ive.

<sup>16</sup> Ómasímo agika lemeaká noimó nene ángíko gelenoune. Itó gele seketígí oko gelekune.

\* 3:23: Zon 13:34, 15:12,17 \* 4:12: Zon 1:18



Ómasímini mogona nene agika lemeakalímini neve. Itó vejená makó kigika kimiliki viki miniki aliki ita vejená keza Ómasiloka gímiziki minanigave. Itó Ómasímo mulúikú minoko aleko inogo ive.

<sup>17</sup> Nenémínoko ligika kemeaká nouni netá nene vihelé loko minanogo ive. Lá okiko Izesú eza mikasiuka imane minoko aleko oaká imómáminoko leza minoaká nounimó nenazo, nenemú gamena napaló mulutegú hukili amiko ote hee loko minatune.

<sup>18</sup> Lelegesá itó ligika kemeaká keza apiziki minisá amasive. Ligika kemeaká netá gihilámo nene lelegesá legeaká netá ahelú inogo ive. Netá makokumú lelegesá ligitimó nene ámina netalímo miluma gilituni netá lumupiló molatihe loko lelegesá legeaká noive. Nenemú makó keza lelegesá ligiti vejenatoka kigika kemeaká netalímo vihelé loko minamive loko litune.

<sup>19</sup> Ómasímo ganá agika limimóma nenazo, nenemú ligika kemeaká nounge.

<sup>20</sup> Ómasi ligika ameká nounge liki kigivéikini mukahá kipilita vejenakumú nene sozaló veve loko litune. Mota gilinahe. Ligivetegini logómulatunú ángoaká vejená ligika kememintimó nene, Ómasi ángamoaká ve ligika amesá nomive.

<sup>21</sup> Izesú láa loko lo hukoleta gakó geleaká nounge: Ómasi kigika amiaká nia vejenalite ámina iki kigivéikini nene kigika kemeakalímini genaváa keitoka neve.

## 5

### *Mikasiuka netá apelekuko limiti mogona*

<sup>1</sup> Izesukumú nene gologí oletative loko lo mololeta veve liki gili seketigí itamó keza Ómasilokatí utó a vejená niave. Itó makó keza améipini nene kigika amítamó nene agapilamolagi kigika kimiaká niave.

<sup>2</sup> Leza Ómasi ligika ameko lo hukoleta gakó gele aleaká nounitímo Ómasímini mohola gipala ligika kemeaká noupe loko nenémíni mogona lo utó moloaká noive.

<sup>3</sup> \* Ómasi ligika amekalímini mogona nene lo huka gakó mukí gele aleakakú neve. Ómasímo lo huka gakó ámegetoaká nene genavagi nomive.

<sup>4</sup> Ómasilokatí utó unimó mukitoka leza mikasi amupiló netá golesa lisomikuko lemeaká noive. Mikasi amupiló netá golesa lisomikuko lemeaká noitímini zámuza nene agulizaláa gele alévolé oakate nene neve.

<sup>5</sup> Éage amuza miliki mikasímini amupiló netá golesa mukí lisimikiko limitive. Izesunimú Ómasímini gipala noive liki gili seketigí iki gilita vejenalitegó nenémíni inigave.

### *Ómasímo gipalámini gakola hize lé ota gakó*

<sup>6</sup> Izesu Kilistó áisi nene nagamílagi golanígi utó imole. Nagamílagigó nomive. Utó imó nene monó nagamí holamokí golani lekike hilimoki neve.

<sup>7</sup> Sikalahú eza gakó gihiláámini amelaho noinazo, Sikalahulímo nene ámina mogonamú lokago, gihila zeaká noive.

<sup>8</sup> Nenemú Sikalahú ezáa itó monó nagamí holamó nenémo itó golani lekike hilimó nenémo Izesuni mogona hizi lé itake hoza aliaká niave. Sikalahú itó nagamíla itó golaniva keza losive makole niatite Izesú nene Ómasímini gipala noive liki hamó gakó liaká niave.

<sup>9</sup> Goní ikitató nene vejenalita oko moloko imolé liki litamó itó oko moloko amimolé liki litamó nene gele seketigí itune. Lá onoimóza, Ómasímo li gakó nenémo avilegeko alévolé oko noive. Ómasi eza gipalámini gakola hize lé otamó nene láa loko neve:

<sup>10</sup> Ómasímini gipalamú gili alévolé ita vejená keza kigikatunú gelego alévolé oaká noive. Itó Ómasímini gakó gili alévolé amita vejená keza Ómasímini gipalamú li gakó gilikago hutuvagó loló onoimó nenazo, nenemú vejená nenémínáate Ómasimú sozaló veve nilamó geleneive.

<sup>11</sup> \* Itó gipalámini mogona hize lé oko gakó limó nene láa loko neve: Ómasi eza alévolé lemetameki minoaká netá ale utó molo limimó, itó alévolé oko minoakalímini mogonáa nene gipalaló neve.

<sup>12</sup> Ómasímini gipala ali gikitiki minata vejená keza alévolé kemetameni alikamó neve. Itó Ómasímini gipalaló gímizema vejená keza alévolé oko minoaká nene alemave.

### *Alévolé lemetameki minoaká gakó*

<sup>13</sup> Ómasímini gipalamú gili alévolé inamó lekeza alévolé lekemetameki minoaká nene mota alenounge liki gili seketigí iki gilitave loko luhuva imane gizo nolukumuve.

<sup>14</sup> Leza láa loko Ómasímini avogisalo gele olopá onoune: Ómasiloka netá makokumú voká lokuko nene ezáa gilitó molató noikoma gele liminogo ive.

<sup>15</sup> Itó netá nemupe manamupe voká lokuko gele liminogo ive loko gele seketigí onounimó nenazo, netá makokumú voká lotatunimó nene litá oko ale ligizakú itune loko gelenoune.

<sup>16</sup> Ve makó eza agivelaho makolimo golesa netá alekikoma ángokoko lolímini mututonáa loló oakalímini nomíkoma, ángokoko nene aikumú Ómasiloka lotino. Lokikoma, Ómasímo alévolé gapoló alémo molatize. Itó golesa netalímini nagaláa nene lolímini alévolé nagala alemitimolamú noluve. Golesa netá makolimini nagá nene lolímini nagaláa nene neve. Nenémináamú numuna hoza alitave loko lamuve.

<sup>17</sup> Netá golesa mukitoka nene lihima aleakalímini nemóza, golesa netá lugáa nene lolímini nagaláa alévolelagú lelémo molatitímini nomive.

<sup>18</sup> Leza láa loko geleaká noune: Ómasilokatí utó atite nene golesa netá aliki minamini-gave. Ómasímini gipalámo gizapa okimikiko golesa netalímini amelaho kugupeló ma ale geleminogo ive.

<sup>19</sup> Leza Ómasilokatí utó unimó neve loko, itó monóini nomi vegená mukitoka keza golesa netalímini amelahini sepenauka akiaká niave loko gelenoune.

<sup>20</sup> Itó láa lokogi gelenoune: Ómasímini gipala eza mikasiuka lemeake gele guni oakate ale utó olimikamó nenazo, Ómasi gihilámini mogona gele guni oko geleaká noune, itó Ómasi gihilaloka gímizekunimó nene gipala Izesu Kilistoní sepenauka minoko aleko oaká noune. Áisi nene Ómasi gihila itó alévolé oko minoakalímini amelahóa noive.

<sup>21</sup> Mohóne gipáne lekeza soza saza ómai netakumú gizapa i guni iki minalo.

## Zonini Luhuva Nampa 2

### *Nónohá kimike gizo kimi gakó*

<sup>1</sup> Monokú olotiva ve neza Guivahanímo alémo etó i venaki izegipalagitana mina vejená nene luhuva netá imane gizo nolukumuve. Neza nigika lekemeaká nouke gizo nolukumuve. Itó nénisigó nomive. Gakó gihiláa giliki kigikagú miliaká nia vejená mukitó kigika likimiaká niamó nene

<sup>2</sup> monó nene ligikagú noigove loko itó lezagi alévolé oko minoloko voko minatikumule loko ligika lekemeaká noune.

<sup>3</sup> Ómasi ameteho itó amelahini gipala Izesu Kilistó eza nasahilí oletoko agika molo lemeko hulu ale utó oletoko noiko, gakó gihilámini itó ligika kemeakálimini agikagú minoloko voko mino lúaló moloko minatune.

### *Kilistó lo limi monó ale gikitatune*

<sup>4</sup> Mohó izegipaka lugáa keza ameteho lo hukoko li gakó lo limimó nene gili aliake gakó gihiláa ali miniaká niamó nenémini mogona gelekuke mulúnegú lamaná geleká nouve.

<sup>5</sup> \* Itó imane vená geza Guivahanímo lo hukoko li gakó makó lo gemekugo gelezo. Gakó gosohá ma nomive. Litahama mogonalokatí emane gelelelo ova ova oko nominuhá gakó nene láa loko lo gimitoze: Ligika eza amiko eza amiko oko minatune.

<sup>6</sup> Ómasímo lo huka gakó gele aleaká nenémo ligika kemeaká netá loló onoive. Ómasímo lo hukoko li gakó mogonalokatí gililiki iva iva iki niminamó nene likigika kimiliki viki minatave loko neve.

<sup>7</sup> Gilinahe. Haitó monó alitave liki logoka viziaká ve mukí utó iake numutó namató hutilí ikave. Keza Izesu Kilistonimú nene mikasi lugupegí utó imóma neve loko loaká nouhá gakó nene zivi hitivi iaká niave. Ve nenémináa nene logoka viziaká ve itó Kilistoni gala veva nene niave.

<sup>8</sup> Monolúmini hozava alinamómámini gihiláa nene gopa olikimikatize, gizapa iki minalo. Lá niiki miniki meinava vatí iki alitaze.

<sup>9</sup> Kilistoni monó lo limimó nene ali gikitamiki aviligiki gakó makó liiki ali gopa ita vejená keza Ómasi ali kamatoka aminigave. Makó keza láa lamiki Kilistoni gakó lamaná ali minatamó nenete ametehove itó gipalave ali kamatoka inigave.

<sup>10</sup> Ve makolímohé makolímohé Kilistó lo limi gakó ale minamitímó nenémo lekelitoka gakó lainim-oleketatove nolikoma, numutikú alími milamilo. Itó alími lakamatoka milamilo.

<sup>11</sup> Ve makolímohé vejená nenémináa kelémo geha zitímó nene hoza golesa aliaká niatoka kelémo vatí noive.

### *Gekéini loketa gakó*

<sup>12</sup> Gakó lugáa mukí nemóza, luhuva gizoaká nagamitunú luhuva netakú gizo likimitove loko gelemuve. Neza lekelitoka litá oko vokugo, legepatunú logele hagele oko gelekinake mulutegú agila guluma napa itive loko gelekuve.

<sup>13</sup> Geza mohó gugunaka Ómasímo alémo etó imó aí izegipala zuhagi geketini nililikitago noluve.

\* 1:5: Zon 13:34, 15:12,17

## Zonini Luhuva Nampa 3

*Gaioni nónohá amike gizo ami gako*

<sup>1</sup>\* Monokú olotiva ve neza nigivénega gihila Gaioga geí luhuva netá imane gizo nogumuve. Neza geikumú lamaná geleaká nouve.

<sup>2</sup>Nigivénega, gigika nene monokú vatí oko nego gelekuke, ámina oko gugupeloka miluma gelemoko némini manámini netá geitoka zeloko amiko vatí oko minatane loko Ómasiloka loaká nouve.

<sup>3</sup>Geza gakó gihilámini gapolokó voaká noane. Nenemú ligive lugáa keza ake gakó gihiláa ale gikitoaká anikumú li nímikago gelekuke mulúnégú lamaná geleaká nouve.

<sup>4</sup>Monokú kelémo molokugo mohó izegipáne lilí ina vegeanalite gakó gihilámini gapoló viaká nia gakó gelekuke mulúnégú lamaná geleaká noumó nene haitolímínoko netá makolímó ma avilegeminogo ive.

*Gaió nasahilí oketakumú agepoka limó*

<sup>5</sup>Nigivénega, geza ligivetegini kelémo lamaná oaká noanimó nene alitokatí negopa, hotokatí nenegi kelémo vatí oaká animó nene vatí oko loló noanize.

<sup>6</sup>Imaneló Izesuni vegejala zuhatini kovogísalo nene gigika kemeko nasahilí okimiaká anikumú aveté iaká niave. Izesuni vegená makó geitoka nivikoma, geza Ómasímíni gakó lilí ali iaká niakumú nasahilí oketoko kimisele molokako vitamó nenémo lamaná inogo ive.

<sup>7</sup>Keza Guivahanímíni agulizalamule liki mikasinini ahuliake monóini nomi vegeinatokatí moni henokanoni makó alisá amake, monó hozaló vinamó neve.

<sup>8</sup>Leza ve nenémináa nasahilí o kemeko hize lé okimikuko, monó hozámíni hamó hozaló ve loló okuko gakó gihiláa hutilí itive loko letoinoimóma neve.

*Tiotelepeko Temetelioko keí gakó*

<sup>9</sup>Neza monó gakó lilí ali iaká nia vetini mogonáinimú nene Guivahanímíni vegejala zuhaloka luhuva alínipa makó gizumóza, Tiotelepé eza ve uvóipina minatove loko loaká noi vémo gakóne nene gele ahuloaká nouve.

<sup>10</sup>Nenemú neza vinake oko moloko noitítímíni mogonáa ale utó molanogo uve. Eza lelikumú soza like alevo letovo oaká noive. Itó nenegó nomive. Monó vegená nivago eza kelémo amatoka molamike, vegená lugáate nasahilí ikitanigi niago, gahá kemeake monó lilí ali vegenáma nene monó numúini hize lí okimiake kimisele ahuloaká noive.

<sup>11</sup>Nigivénega gihila, vegeanalite golesa netá lilí nikoma áminaló kémegetamo. Netá lamaná lilí nikoma kémegetatanize. Netá lamaná aliliki vita vegená nene Ómasilokatí utó a vegená niave. Golesa netá aliliki vitamoláa nene Ómasímíni mogona ánihi hee liki ániigama vegená niave.

<sup>12</sup>Vegená mukilite Temetelioni mogonamú nene lamanale likago gelekune. Itó monokú ai mogonáa mota utó onoiomóma neve. Neza ámina oko ve lamaná noive loko hize lé omiaká nouve. Itó aikumú soza gakó losá amumó nene mota gelenane.

*Vegená gekéini loketamó*

<sup>13</sup>Gakó lugáa mukí nemóza, luhuva gizoaká nagamitunú luhuva gizatove loko gelemuve.

<sup>14</sup>Neza geitoka mota vitove loko gele minuve. Vo anitekugo legepatunú logele hagele oko gilitíize.

<sup>15</sup>Ómasímíni hulu nene geitoka mino moloko minino. Gigive gagave keza gekeka nilligitave. Geza ámina oko ligive lagavetini gekéini noloketu gakó lo kemezo.

\* 1:1: Apo 19:29; Lom 16:23; 1 Koli 1:14

## Zutani Luhuva

*Nónohá kimike gizo kimi gakó*

<sup>1</sup>\* Neza Zutana Izesu Kilistoni gelekeleléa itó Zelusalega monó gizapa ve napa Zemusini agunala noutímina Ómasi ameteho monokú sele lo lekemeko agika lekemeaká noikú lekelémo moloko Izesu Kilistoni gizapaló lekelémo mola vegená lekelí luhuva imane gizo nolukumuve.

<sup>2</sup> Ómasímo agika hize lekemeaká itó hulu itó agika lekemeaká nene ale hutilí oleketo-loko voko miníno.

*Soza monó liaká a vetini mogonáinimú lo kimimó*

<sup>3</sup> Nígika lukumu vegenáise, neza lugutó vízeaká nene mukí vegenalita izá moloko aleaká nouni netakumú luhuva gizo líkimitove loko amuza mulumóza, monó gele vegená gele alévolé oakalímíni gakola Ómasímo lemeneimóma nene gopa okative loko lekeza mukitoka amuza miliki hozaváa alévolé iki naliki lova sava itakumú gala vízeko luhuva gizo líkimito gamenaváne alitokave.

<sup>4</sup> Nenemú lo líkimitoze, gililo. Ve lugáa monóini nomimó keza holutikú asuguná iki itiki niake Ómasi nene nasahillagi ve noikeye loko gumesisi mokoló hoza aleaká nouhakumú goní oletaminogo íve líki lí gopa niake hamokó gizapa vele Guivahanite Izesu Kilistoni nene zivi hitivi imiaká niave. Keza nene ví tolova imi tolova atímíni mogonáini gozapá nene monó gotoláú luhuva gizinamóma neve.

<sup>5</sup>\* Ómasímo lihímáinigi vegená makó nene gozapá goní oketa gakó nene lekeza gili asú inamóza, áminama ale gosohá oko noluve. Isílae vegená mulusi Izipi mikasigutí gologí okimiake, alika aikumú gili alévolé ama vegená ahulokimikago, lapuluva amóma neve.

<sup>6</sup> Itó ageló makó keza gizapa hozanini ahuliake numuní apáini ahuliake, keza gamena napaló lihímáini alita gamenámíni ageváa iki minanigi alévolé seni nagá nenémo ale gikitoake límugusitunú asapú oketamó neve.

<sup>7</sup>\* Itó Soto itó Gomola itó apá luga luga minoloko vító mina vegená keza ámináminiki gopa iki gumesisi mokoló netá itó musi netá ali utó mílikago, ló sipisi alévolé oko mínoakalímínigú ahulokimikago miniki niave. Nene ángokuko lelegesá lígitive loko némíni oketamó nenazo, nenemú lakagatú molamino.

<sup>8</sup> Itó soza monó liaká nia ve keza ámina iki vamó ángunimole líki kugupetunú musi netá aliaká niave. Lá niake kugulizaki ve alivi galativi iki lapanáiki ve ageló nene ali mumusopa ziaká niave.

<sup>9</sup>\* Agelolítini ve uvóipo Maikolí nene soza monó liaká vegítana minamíve. Eza Moseni gonosiváamú éaho alítihe líki Sataki gakotunú lova ikasike pelesa alesá zesike, Satani gakó golesa lotanogo gilimó nene gena okago, Guivahanímo gahá giminogo íve lokogó lo amimóza,

<sup>10</sup> soza monó liaká ve imane keza gili guni ama netakumú alivi letivi iki miniaká niave. Iza galagítana lílí iake kugupémo amu heleaká noi netakumú hanuva kígikatunú gíliake, gíli guni ina netalímó kelémo golesa okago lapuluva iaká niave.

<sup>11</sup>\* Agae, keza miniki nana ítamó neve. Keza Kai ví gapogú viaká niave. Itó moni henokanonimú lagaváa ali miniki soza monó loaká ve Palámíni gapogú viaká niave. Itó Kolá eza Ómasímo kelémo etó i gizapa vemú pelevesava zekamole loko lapuluva ímómáminiki hokolizá iiki lapuluva ínigave.

<sup>12</sup> Lekeza monokumule líki ali nupa iki nosánetá ninató nene ve nenémínáa keza iza nosánetakumú ahuu ahuu líki gíhúme kovoza helemimó kezáinimukó ali napa napa iki niave. Monóini nomí vegená keza nene gó zihé zihé líki límusi nene hanuva hepélímó se ahulokago voko golíni zemoko haha oaká noimó, itó za makolímó nugunugu lokó itekoko gíhíla zeaká gamenaló nene gíhíla zesá amimó nenémíniki niave. Ve nenémínáa híli vamó keza asuto ahuloakató niave.

<sup>13</sup> Age nagamí amuzavagi valahuká zeko gituhú galakalá golotuvagi utó oaká noive. Soza monó liaká ve nenémínáatini golesa netáini avozavagi nenémíni oko utó oaká noive. Sonohí lugáa keza atohímí ziaká níamó nenete gapo lelepizeminígave. Soza monó liaká ve sonohí nenémíni iki nia ve nene límugusi lapalapava alévoleléa nene Ómasímo ale vavá oketonóimóma neve.

\* 1:1: Mat 13:55; Mak 6:3 \* 1:5: Gá 12:51; Nam 14:29-30 \* 1:7: Apí 19:1-24 \* 1:9: Tan 10:13,21, 12:1; Ali 12:7; Gapo 34:6; Zak 3:2 \* 1:11: Apí 4:3-8; Nam 22:1-35; Nam 16:1-35

14\* Atatokatí utó iliki va vejená 5 utó ikago, alika ve nampa 7 Enokú utó imó. Áisi nene ámina soza monó liaká ve utó itakumú láa loko limó: Gililo. Guivahanímo apazá ageló vejenala mulusi napa tausen mukí kelémoko anogo ive.

15 Lá okoko vejená mukitoka mogonáini lo utó moloko hokolizató vejená monóini nomimoláa keí hokolizáinímini mogonáa apasoko lihimaváa kiminogo ive. Itó hokolizató ve monóini nomimó keza Ómasimú alivi letivi iki gako golesa litamómámini lihimaváa kiminogo ive loko limó neve.

16 Ve nenémináa keza géneka háneka lake gínikaha gánakaha iki kugupémo amu heleaká noi netá aliki nenegú minake kezáinimú ali nupa napa iki nimina ve keza vejená lugáate netá matá limitave liki kegepoka liki giminikú miliká aliká iaká niave.

*Kagata alike gakó loketamó*

17 Nígika lukumu vejenáise, lekeza gozapá Guivahanite Izesu Kilistoni aposolote li lekeme gakó giliki minalo.

18\* Keza nene gamena napa alitokiko, gumesisi mokoló hozáinimú amuza miliaká nia ve utó iiki monotinimú alivi letivi ilikitatave liki li kimiaká amóma neve.

19 Ve nenémináate hizi hóu liaká netá ali utó miliaká niave. Ómasímini Sikalahú mulúikú minamigo mikasigú mogonamú giliaká niave.

20 Lá iki niamóza, nígika lukumu vejenáise, lekeza apazá monotini gihiláa nenémo likigika loló okiko alévolé iliki itiki minalo. Sikalahulímo lekelémo vávani noiko numuna liki minalo.

21 Lá niiki Guivahanite Izesu Kilistó eza geha ze lekemeko alévolé oko minoaká netá lehizeleketatikumú ageva iki niminiki Ómasímo agika lekemeaká noikú minalo.

22 Monó alitupe alemitupe liake, ligítarani ivamoláamú likigika hizi kimilo.

23 Lokú hiliki haha inigi nia vejená kilimi atiginá ilo. Itó vejená lugáamú likigika hizekiko kilími vatí ilo. Lá niiki keí golotuva mogonámo lekelitoka itekativé liki lekehelele viziko gizapa iki minalo.

*Ómasi agepoka limó*

24 Itó hize lé olikimikiko, akiki otiki amiki niko gonanalivagi lapanalaló lihimavatini minamitimó niko lokogolizagi lekelémo molati ve

25 Guivahanite Izesu Kilistoni hozatunú lugutó viziti ve Ómasi hamokó aitoka gonanalivagi lapaná itó alévolé zámuza itó gizapa oaká zámuza gozapá gamena nomitó ale minamó itó itínagi ámina oko aleneimó itó minoloko voko mino lúaló moloko minanogo ive. Lamaná.

## Alika Utó Iti Netakumú Zonini Lo Ami Gakó

### *Izesú ale vesamá oko li gakó*

<sup>1</sup> Imane nene Izesu Kilistó ale vesamá oko li gakó gamena hána vamiko netá matá utó itive loko Ómasímo lo mola gakó neve. Ómasímini gelekélé vejenala zuha lo kimitive loko Izesuni lo amekago áisi agelolahini amiselekago, gelekélé veva Zonina lo nemeko nelepizekago,

<sup>2</sup> nénisi nene Ómasímini gakó itó Izesu Kilistó lo utó i gakó nene ániigo guni oko gulutíminave loko gele minuke imaneló lo utó oko luhuva nogizuve.

<sup>3</sup> Itó luhuva imane mukitó alévolé iti gamena mota alitokamó nenazo, netá matá alika utó iti gakó imane nene gatiki li kimita vejenaki itó gakó luhuva imane giliiki gili alita vejenaki Ómasímo nónohá zeketonoi vejená niave.

### *Ómasímini vejenala zuha mulusi 7 nónohá kimi gakó*

<sup>4</sup> \* Neza Zonina Asia mikasiuka Ómasímini vejenala zuha mulusi 7 niamó lekelí luhuva netá imane gizo nolukumuve. Ómasi goí oko mína ve itó ítína hanuva noi ve itó atiginá oko anogo i velokatí itó zámuzáini 7 nei Sikalahú gonanalivagi siató noi velokatí

<sup>5</sup> \* itó Izesu Kilistokatí nene nasahílí itó hulu lekelitoka mino moloko minino. Izesú áisi nene Ómasímini gakó amegesa moloko avetó oaká ve itó ganá heleakakutí oti ve itó numutó namató vejenalitini kugulizaki véini uvóipo noive. Eza agika lemeaká noike ezáa golaníatanú lihima netategutí gologí oletake

<sup>6</sup> \* Ómasi amelahini lehizemikugo minatave loko aí avogisaló guguni gizoaká ve lelémo molamó neve. Aitoka nene gonanalivagi itó zámuzalagi mino lúaló moloko minanogo ive. Lamaná.

<sup>7</sup> \* Gílináhe. Límusi amupiló noago vejená mukitó kogómulatunú ániganigave. Itó galutá hize vejená kezagi ániganigave. Itó numutó namató vejená mukí keza aí ániigiiki aí gakó gili alemakumú ive nama inigave. Ámina gakó nene lá oko utó ino. Lamaná.

<sup>8</sup> \* Guivahani Ómasi osá amosá ve eza goí oko mína ve itó ítína noi ve, itó anogo i ve áisi nene nénisigó apí oaká itó ale asú oaká amelahina nouve loko nolive.

### *Izesuni ameni ániagamó*

<sup>9</sup> Likigivetiipina Zonina lekezagi Izesukumule loko míluma maluma itó Ómasímo gizapa olimiaká itó genavagi netá geheko legesó oko ote minoaká netá izá moloko alekunike minoaká nouni ve neza Ómasímini gakó itó Izesuni agulizá lo utó oko lo kumule liki Patamo mikasi pokolagú nimisili ahuli mílikago minumóma neve.

<sup>10</sup> Guivahanímini gamenaló Sategú nene Sikalahulímo nigikámini agómula ale panava zekago nemegesaloka gakó napa pikuli nenéminoko utó imó.

<sup>11</sup> Utó oake láa loko noligo gulumó: Netá ániganogo animó nene pepagú luhuva gizokoko vejenáne zuha mulusi 7 kezaloka ahulokako Epeso numutoka itó Símilina numutoka itó Pelagamu numutoka itó Tiatila numutoka itó Saliti numutoka itó Pilatelepia numutoka itó Lautisia numutoka vitize.

<sup>12</sup> Itó neza gakó lo nimi vema ániगतove loko mino viliguke lamu liví 7 golitunú lílí amó nene áni gumó.

<sup>13</sup> \* Liví holulagú makó nego áni gumó nene ametamenia vejená lemetamenigitana noigo gineganévaa hána agisaló leme minamó. Itó apinaloka holotani golitunú lílí amó nene minamó.

<sup>14</sup> \* \* Itó gotola zopova mokoná nene límúsigitana gizopa loko minamó, itó agómula luga luga nene ló guluma nenéminoko minamó.

<sup>15</sup> \* Itó agisa luga luga nene goli gehani lokú loake velu loaká noimó nenéminoko minamó. Itó anó lupa nene nagamí lisani sipisi nenéminoko sasa loko minamó.

<sup>16</sup> Agizani zamagaloka nene sonohí 7 ale minamó. Itó agepagutí amitá makó nene amegesaloka itó agómulaloka sánevetaláa minamó nene leme minago áni gumó. Itó agómula avogisa nene ho silikakéna nenémini oko lapaná loko minamó.

\* 1:4: Gá 3:14; Ali 4:5    \* 1:5: Isa 55:4; Age 89:27; Gá 1:6    \* 1:6: Ali 5:10    \* 1:7: Tan 7:13; Zon 19:34,37; Zak 12:10; Mat 24:30    \* 1:8: Ali 22:13    \* 1:13: Tan 7:13, 10:5    \* 1:14: Tan 7:9    \* 1:14: Tan 10:6    \* 1:15: Izi 1:24; 43:2

17\* Ametamenía lá oko nego ángokuke agisagú pou loko akumó. Heleaká nenéminoko akonougo agizani zamagaloka nene numupiló moloake láa loko lo nimimó: Geza gelegesá legemino. Goí moloko itó alika moloko

18 itó alévolé amelahina neza imane nouve. Gelenape. Neza hulumóza, goha otekuke mino lúaló moloko minanogo uve. Itó heleakalímíni itó galémíni gahémíni kíí nénisi alenouve.

19 Nenemú netá nániganimó nene itína utó noimoláa itó alika utó itimoláa nenegi luhuva gizo asú ozo.

20 Itó nigizani lamagalokagú sonohí 7-a itó lamu liví 7-a golitunú lílí ago ánganimó nene asuguná netalímíni mogonáa lo gimitoze, gelezo. Sonohí 7 nene Ómasímíni vejenala zuha mulusi 7 keí gizapa níkita ve ageló vejená nenéminiki niave. Itó lamu liví 7 nene monó gele vejená mulusi 7 nenetini avevezaha niave.

## 2

### *Epeso vejenatoka gakó ahulamó*

1 Míni ameko láa loko lo nimimó: Epeso numutoka Ómasímíni vejenala zuhatini ageló nenéminoko gizapa noketa vémo gakó láa loko luhuva gizo amekako lo kimitize: Sonohí 7 agizani zamagalokagú ale mina ve lamu liví 7 golitunú lílí amó nenémíni agilíkágu vogá ogá oaká noi ve ási lekelikumú láa loko nolive:

2 Neza iki miliki iaká niamó nenémíni mogonáa itó hozalínímíni mogonáa goselé lekepelemigo legesó iki aliaká niamó nenémíni mogonáa gelenouve. Lekelisi vejená golesa galasa ángi mu kizapa iaká niave. Itó vejená lugáa lezagi aposolove liake soza líkago sozínímíni mogonáa ali utó milíkave.

3 Itó amuza miliki miniki nenikumule líki miluma malumámíni amupiló goselé lekepelemigo hulu iki miniaká niave.

4 Lá onóimóza, nénisi nene lekelikumú netá lá okomú gulugo golesa oaká noive. Lekeza gozapá líkígika nímiaká amómámíni oko gamena imanéa nene ma mináive.

5 Gozapá veletó ká mezane monokú lamaná iki mihina iki minamopa itína nene mota velehé límikave. Lekeza nenemú goha giliiki líkígika ali viligiiki gozapá gapoló goha lísiki vilo. Nenémíni amíkoma neza lekelitoka aniteko lamu livitini nene zeko lího ahulanogo uve.

6 Makó nene lekelikumú gulugo lamaná oaká noive. Lekeza Nikolaoni vejenala zuha keza netá iki miliki niamó nene mukahá kipiliaká niave. Itó neza ámina oko mukahá kepeleaká nouve.

7\* Sikalahulímo Ómasímíni vejenala zuha gakó némika loko lo nokimimó nene lakagata koló imó neneta gili vevesiki gililo. Makó keza monokú alévolé iliki víki Satani lovaváa aviligítamoláa nene alévolé oko minoakalímíni za gihila Ómasímíni zazuhagú noimó nene natave loko gele kiminogo uve, loko límó.

### *Similina vejenatoka gakó ahulamó*

8\* Itó Similina numutoka Ómasímíni vejenala zuhatini ageló nenémíni oko gizapa noketa vémo gakó láa loko luhuva gizo amekako lo kimitize: Goí moloko itó alika moloko eza heleake oti vémo lekelikumú láa loko nolive:

9 Lekeza míluma malumámíni amupiló líkílími-líki ahulílikímíkago niamó itó gohogó vejená míniaká niamó nene gelenouvé. Itó lekeza monolímíni henokanotíkí vejená niave. Itó Zuta vejená noune líki líaká niamó nenete lekelikumú alívi letívi iaká niave. Nenegi gelenoumóza, keza soza líkave. Zuta ve gihíláa negopa, Satani vejenala zuha niave.

10 Lekelítoka míluma maluma netá goha utó o líkímínogo íve. Nenemú lekelegesá legemino. Gilinahe. Satá eza gímílikú moloaká netá utó o líkímítive loko lekelítokatí lugáa nene nagá numukú kelémo molanogo íve. Lá okíko, gamena 10 oko novígo míluma gílíki mínánigave. Lekelisi monó nene ale gítíkí ali míniki hílíkíko, gonanalívagi akílíkítana oko alévolé oko minoaká nene ale hitoleketanogo uve.

11\* Sikalahulímo Ómasímíni vejenala zuha gakó némika loko lo nokimimó nene lakagata koló imó neneta gili vevesiki gililo. Makó keza monokú alévolé iliki víki Satani lovaváa aviligítamoláa nene alíka heleaká nenémo ma kelémo golesa palasa aminogo íve, loko límó.

### *Pelagamu vejenatoka gakó ahulamó*

\* 1:17: Isa 44:6, 48:12; Ali 2:8, 22:13      \* 2:7: Apí 2:9; Ali 22:2      \* 2:8: Ali 1:17      \* 2:11: Ali 20:14, 21:8



<sup>12</sup> Itó Pelagamu numutoka Ómasímini vejenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Amitá makó amegesaloka itó agómulaloka sánevetaláa minamó alenei vémo lekelikumú láa loko nolive:

<sup>13</sup> Lekeza nimina apalímini mogonáa gelenouve. Neneló Satani vejenala zuha niave. Lekeza gakónéa itó nugulizánéa ale gikitiki ali miniaká niave. Itó neneló Satá minoko aleko oaká noitó nene není gakó lo amutokó lo kemeaká i ve Atipasini apelego hili zupahé nenikumú gili alévolé amó nene ahulamamóma neve.

<sup>14</sup> \* Itó neza lekelikumú koma gulugo golesa oaká noive. Lekelí numutoka vejená lugáa niamó keza Palámini gapogú viaká niave. Palámo eza Palakani nene Isilae vejená lo kimiti gakó lo amekago áisi gala vizekago soza ómai netalímini miguhala niki minake mokoló minake golesa amó.

<sup>15</sup> Ámináminiki lekelí apatoka vejená lugáa keza Nikolaoni vejenala zuhatini mogona golesa aliake áminámini iaká niave.

<sup>16</sup> Nenemú lekeza likigika ali viligalo. Némini amikoma neza lekelitoka galinali aniteko ámina vejená nene nepegagutí nolimi amitatanú lova ale kiminogo uve.

<sup>17</sup> \* Sikalahulímo Ómasímini vejenala zuha nene gakó némika loko lo nokimimó nene lakagata koló imó neneta gili vevesiki gililo. Makó keza monokú alévolé iliki viki Satani lovváa aviligítamoláa nene halá ge mína mana nosá gihila kiminogo uve. Itó gehani mokoná nene etó etó oko kemekugo neneló kugulizá luhuva gosohá miniko gehani amelaho ezagó ámina agulizá gilinogo ive, loko limó.

#### *Tiatila vejenatoka gakó ahulamó*

<sup>18</sup> Itó Tiatila numutoka Ómasímini vejenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Ómasímini gipala agómuláa ló guluma nenéminoko noi ve agísáa goli gehani lokú loake velu velu loaká noimómáminoko noi vémo lekelikumú láa loko nolive:

<sup>19</sup> Neza iki míliki iaká niatímini mogona itó likigika kimiaká niatímini mogona itó Ómasimú gili alévolé iki minatímini mogona itó nasahilí ikimiaká niatímini mogona itó genavagi netalímini agikagú hulu iki niamó nenémini mogonáa gelenouve. Itó gozapá amuza míliki lagasó minamó itína nene goha itekave. Nenege gelekuve.

<sup>20</sup> \* Itó neza lekelikumú gulugo lá oko koma golesa onoive. Lekelisi nene Isilae vetini agulizaki vená golesa Zesepelokitana mína vená ániagi ahuliaká niago áisi Ómasímini agepagutí gakó loaká vená nouve loake, vejenáne zuha gakó lo kemeaká ike kogoka vizeake gala vizekago, gumesisi mokoló hoza aleke soza ómai netalímini miguhala aliki niaká niave.

<sup>21</sup> Itó agikáa ale viligítave loko gamena molotumóza, áisi agikáa ale viligámike mokoló netala ahulanogo gelesá amive.

<sup>22</sup> Gilinahe. Neza nenemú lokugo, avisi netá nene utó o amekiko ako minatize. Lá noike, áisigi mokoló mogona líli iaká niamó kezagitoka míluma maluma sipisi utó itize. Gígika ali viligíiki venalímini mokoló netala ahulamíkoma, nenéminoko utó o kiminogo ive.

<sup>23</sup> \* Itó ámina venalímini izegipamú lokugo, golivagi netalímo utó oko kepele gesá itize. Némini okugo, numutó namató monó gilina vejenalite nenikumú kigikámini kagatámini mogonáa ániago hehe loko ániagonane líki gili guní iki gilítaze. Neza vejená mukí iki míliki itatímini avotígila apasoko kiminogo uve, loko limó.

<sup>24</sup> Itó Tiatila numutoka vejená lugáa lekeza ámina soza gakó gili ahuliaká niave. Lá niake, gevená lugáa keza Satani mogonatagana gele hee loko gelenoune líki liaká nia vetini gakó lekeza gilísá ama vejenalita gakó lo líkimitoze, gililo. Neza genavagi netá makó nene lukumupiló molaminogo uve.

<sup>25</sup> Itó netá alinamó nene ali gikitiki ali minalo. Lá iliki níviko anititaze.

<sup>26</sup> \* Makó keza monokú alévolé iliki viki Satani lovváa aviligíiki neza oko moloko noumómáminiki iki míliki iliki viki ali lutigitamoláa nene nénisi amuza kemekugo haitopaitó mikasiuka vejenalítini ve uvóike líli iki miníkiko

<sup>27</sup> aménehitokatí amuza alumó ámina oko kemekugo aeni hánusa ali miniki gizapa iki-tataze. Lá níiki nogosanitunú mikási somo zeko lana oaká nouhá nenéminiki lá íkitanígave.

<sup>28</sup> Itó sonohí gazakomé miní ameketanogo uve.

<sup>29</sup> Sikalahulímo Ómasímini vejenala zuha gakó némika loko lo nokimimó nene lakagata koló imó neneta gili vevesiki gililo.

\* 2:14: Nam 22:5, 25:1-3      \* 2:17: Gá 16:14-15,33-34; Zon 6:48-50; Isa 62:2, 65:15      \* 2:20: 1 Kug 16:31; 2 Kug 9:22  
\* 2:23: Age 7:9; Zel 17:10; Age 62:12      \* 2:26: Age 2:8-9

## 3

*Saliti vegeatoka gako ahulamó*

<sup>1</sup> Miní ameko láa loko lo nimimó: Saliti numutoka Ómasímini vegeala zuhatini ageló nenéminoko gizapa noketa vémo gako láa loko luhuva gizo amekako lo kimitize: Ómasímini Sikalahú zámua 7 alenei Sikalahú itó sonohí 7 alenei ve nenémo lekelikumú láa loko lokave: Neza iki miliki atímimi mogonáa gelenouve. Vegená keza ángolikimikago kokogómulagi niamó geleneimóza, likigikáa nene hele vimó niave.

<sup>2</sup> Nenemú lekelisi nene mómoká iki otiiki gosohá lugáa hilinigi niamó nene kigikáa emane ale kii likitalo. Neza Ómasímini avogisaló iki miliki iaká niago ángumó nene hehe lamive.

<sup>3</sup> \* Lekeza netá matá li likimikago gilinamó nenema alími gosohá iki ali gikitiki miniki likigika ali viligalo. Ali viligiki gizapa iki minamitamó nene, lova ale likiminogo uve. Gamena nomulumó nene lekeza gelemiko guminaló ve nenéminoko litá oko anitino uve.

<sup>4</sup> Saliti numutoka nene vegeá lugáate gineganéini goihá zísá amave. Vegená nenémináate miniki gineganéini mokoná ali miniki nezagi mihina iki miniki aliki inigave. Lekeza nenémini ita avotigila iki niave.

<sup>5</sup> \* Makó keza monokú alévolé iliki viki Satani lofaváa aviligitamó nenete gineganéini mokoná lamaná kemekugo ali luhanigave. Itó kugulizá nene alévolé kemetameki nia vegealitini kugulizáini giza pukugutí gilato ahulamino uve. Neza kugulizá nene aménehini avogisaló itó ageló vegealitini kovogisaló lo utó molanogo uve.

<sup>6</sup> Sikalahulímo Ómasímini vegeala zuha gako némika loko lo nokimimó nene lakagata koló imó neneta gili vevesiki gililo.

*Pilatepia vegeatoka gako ahulamó*

<sup>7</sup> \* Itó Pilatepia numutoka Ómasímini vegeala zuhatini ageló nenémini oko gizapa noketa vémo gako láa loko luhuva gizo amekako lo kimitize: Apazá noi ve itó lokago alévolé oaká noi vémo agulizaki ve Tevití gizapa oko mina apalímimi kíi ale minake gahe segeneitó ve makolímo voko ale lí aminogo i ve eza ale lí noitó ve makolímo gahe segeminogo i vémo lekelikumú láa loko nolive:

<sup>8</sup> Neza iki miliki iaká niatímimi mogonáa gelenouve. Gilinahe. Neza lokovogisaló gahe makó segelikimikugo ve makolímo gahe geminogo ive. Lekeza amuzatini lagasóisí nemóza gopa nene gakóne ali guni iki ali minake nugulizá ahulamamó nene gelenouve.

<sup>9</sup> \* Gilinahe. Satani mulusigutí vegeá lugáa keza Zuta vegeá noute liki liaká niamó nenete soza liake Zuta ve gihíláa ma minamave. Neza keí nene gala vizekugo lekelitoka anitiki kalapusa hizi likiminigave. Lá níiki lekelikumú nene nigika lekemenou vegeá niave liki gilinigave.

<sup>10</sup> Lekeza goselekaselé amiki negeva minatave loko loleketonou gako néa nene ali guni iki ali minamó nenazo, nenemú gimíiki moloaká gamena nene numutó namató vegeatoka zeloko vitimóza, lekelitoka zeloko vokative loko nénisi nene vegegisa hizeleketoko alata mololeketanogo uve.

<sup>11</sup> Neza litá oko anitino uve. Nenemú makolímo gonanalivagi akilitini akúvasokative liki netá matá alinamó nene ale gikitiki ali minalo.

<sup>12</sup> \* Makó keza monokú alévolé iliki viki Satani lofaváa aviligitamoláa nene Ómasinémini zavusavegú lapusa nenéminoko hizekimikugo keza nenegú alévolé iki miniki goha hetoka ma olíi lememinigave. Itó kumupiló Ómasinémini agulizá luhuva, itó Ómasinémini apá nene Zulusale apá gosohá okulumakutí Ómasílokati limíti apalímimi agulizá itó neza nugulizá gosohalímimi luhuva nene kumupiló gizanogo uve.

<sup>13</sup> Sikalahulímo Ómasímini vegeala zuha gako némika loko lo nokimimó nene lakagata koló imó neneta gili vevesiki gililo.

*Lautisia vegeatoka gako ahulamó*

<sup>14</sup> Itó Lautisia numutoka Ómasímini vegeala zuhatini ageló nenémini oko gizapa noketa vémo gako láa loko luhuva gizo amekako lo kimitize: Gako gihíláa loakalímimi mogonáa noi ve itó gako lokago alévolé oaká noi ve Ómasílokati netá utó imó nenémini mogonáa noi vémo lekelikumú láa loko nolive:

<sup>15</sup> Lekeza iki miliki iaká niatímimi mogonáa gelenouve. Lekeza monokumule liki amuza miliki ali mumusí isá amave, itó amuza miliki ali geha zi asú amamoláa nene gelenouve. Geha zeko minatune líkima nene geha zikigó minatanazo.

\* 3:3: Mat 24:43-44; Luk 12:39-40; Ali 16:15

\* 3:5: Ali 20:12; Mat 10:32; Luk 12:8

\* 3:7: Isa 22:22

\* 3:9: Isa

<sup>16</sup> Lekeza vogalatikú koma mumusí otigí onoimó nianazo, negepagutí musi velelikimikugo liminigave.

<sup>17</sup> Lekeza lekezatinimú láa liki liaká niave: Ligikámini minumuni mukí lelitoka neve. Leza nana netá ma vitagá oaká noune. Netá matakumú makó vitagá osá amune liki liaká niamóza, lekeza keé lamamó mogonalini gelemake ve ámemenáa gohogó veená likatiká ivamó zapakó miniaká niave. Nenemagi nene lekeza gili hee liki gilisá amave.

<sup>18</sup> Nenemú lakagata aleko lo lekemekugo gililo. Lekeza nenitokatí goli gehani vové avetoko minamó meinaváa iteko minamó nene meina hizikiki, lamaná henotiki veená minanigave. Itó ginigane mokoná meina hiziki ali luhiiki, lukugupe zapakó minatimini avoza ali hitataze. Itó lokogómulámini netupaváa meinava hiziiki lokogómulaloka hilikiko goloutatize.

<sup>19</sup>\* Neza nigika kemeaká nou veená nene aséito zeko kelémo hehe loaká noumó nenazo, nenemú lekeza amuza miliki likigika ali viligalo.

<sup>20</sup> Gilinahe. Neza likigikámini gahe amegesaloka otenouke hoko-hoko loaká nouve. Makó keza gakóne imane giliiki gahe siginimikiko, keí numukú itinogo uve. Iteko kezagi noko minanogo une.

<sup>21</sup> Neza amuza moloko Satani lovaváa avilegekuke, améneho nene gonanalivagi siató minoaká noitó minoaká nouve. Makó keza monokú alévolé iliki viki Satani lovaváa aviligitamoláa nene áminámini oko nénisi nene alesa molokugo, neni gonanalivagi siató nougo, namatoka makó minanigave.

<sup>22</sup> Sikalahulímo Ómasímini veenalala zuha gakó némika loko lo nokimimó nene lakagata koló imó neneta gili vevesiki gililo.

## 4

### *Okulumakú Ómasi agepoka liaká nia gakó*

<sup>1</sup> Neza netá nenéminoko ánikokuke, okulumatoka ánigumó nene gahe makó koló onoigo ánigumó. Ánikokugo nene gakó ganá utó igo gulumó nene, pikuli nenéminoko utó ike láa loko lo nimimó: Geza imaneló iteko noako netá matá alika utó itimó nene gelepizekugo ánigatanize.

<sup>2</sup> Loko noli agepagi Sikalahulímo nigikáne ale viligokago okulumakú gonanalivagi siá makó minató ve makó noigo ánigumó.

<sup>3</sup>\* Eza ametamenía meinava iteko mina gehani agulizá zasipa gehani nenémini oko, itó koniliani gehani golohá nenéminoko lapetapé oko minamó. Lolovaloka nene hugepavalámo ametamenía nene gihisigó nenéminoko lúvize távize oko nego ánigumó.

<sup>4</sup> Itó gonanalivagi siá napa hizi vigiki nene gonanalivagi siá lugáa 24 nego ánigumó. Siá nenémini amupiló nene monokú olotiva ve 24 keza giniganéini mokonakó ali luhiake miniliki vamó, itó gotóitó nene akilí gonanalivagi golitunú lilí amó nene hitinago ánigumó.

<sup>5</sup>\* Itó gonanalivagi siá napatotí nene gó melevezá oko gó pou pou loko anó sipisivagi minamó. Itó gonanalivagi siá avogisaloka nene ló liví 7 loko minamó nene Ómasímini Sikalahú zámuzala 7 alenei Sikalahulímini liví minamó.

<sup>6</sup>\* Itó gonanalivagi holomámini avogisaloka nene kalasi lagáminitunú lilí amó nene age nagamikitana oko minake gesá oko minamó.

Itó gonanalivagi siá napa agilika luga luga nene netá alévolé losive losive miniliki vi minamó. Keza kogómulaloka itó kemegealoka kogómula vái oko minamó.

<sup>7</sup> Makó eza laizon akohú gala gelevimó, makó nene pulumaká akaleváagitana ametameki, makó eza avogisáa veená ametamenigi, itó makó eza nama luipá agokéna ale talalo minamó nenémini ametameki minamó.

<sup>8</sup>\* Netá alévoleláa losive losive nene kogokéna 6, itó kogokéna veveláa itó amuná kogómula minamó, itó límugusi zeko gó loko sele liki lía liki nama liaká niave:

Guivahani Ómasi zámuzala ale asú oko aleaká noi ve eza goí oko mina ve, itó itína hanuva noi ve itó minoko anogo noi ve etó oko keké vizeko noive.

<sup>9</sup> Itó alévolé netá losive losive keza gonanalivagi siató mino lúaló moloko minoaká noi ve alévolé oko minoaká amelahini agulizaláa ali otiki agepoka liki kogoliza vizi amiki niago,

<sup>10</sup> monokú olotiva ve 24 keza gonanalivagi siá minoaká noitoka alévolé oko minoaká amelahini amatoka gupá zi ameke agulizá ali otiki siámámini amakuka gonanalivagi akilíni nene akúvasi nimilake láa liki liaká niave:

\* 3:19: Hip 12:6 \* 4:3: Izi 1:26-28 \* 4:5: Ali 8:5; 11:19; 16:18; 1:4 \* 4:6: Izi 1:22 \* 4:6: Izi 1:5-10, 10:14

\* 4:8: Isa 6:2-3; Izi 1:18, 10:12

11 Guivahani Ómasile géisi nene netá mukí ale utó molanimó, itó geí gakotó netá matá utó o asú oake minoaká noinazo, vegenalita gonanalivagi gugulizató itó zámuzakaló ali otiki ali utó iko minati avotigila oko noane.

## 5

### *Ómasímini sipsip akalevámó pepa asaivagi alimó*

1\* Itó gonanalivagi siató minoaká noi vémo agizani zamagaloka ali gakina pepa makó aleneigo ánimómó. Itó ámina pepa nene amegesaloka itó agómulaloka luhuva nego ánimómó. Itó huma 7-atunú ali gilitiki líli amó.

2 Itó amuzavagi ageló makó ánimómó áisi nene gakó napagutí láa loko limó: Hí ve hehe loko minatímó pepa nenémíni humaváa akagá iko lamaná itímó neve.

3 Loko lokago, okulumakukahe itó mikasiukahe itó mikasi agikagú emanehe makolímó oteko pepa nene humaváa akagá okoko ángamítímó itó.

4 Lá okago, pepa nene akagá okoko ángitati avotigila oko mina ve makó nomigo, mulúnegú golesa okago ive umó.

5\* Ive nougo, monokú olotiva ve makolímó láa loko lo nimimó: Ive amo. Ánigozo. Zutani mulusigutí akohú gala laizonigitana mina ve eza Tevitini agapilamola nenémó Satani lovaváa avilegeake pepa nene huma 7-atunú ali lakolí amo nene akagá itímó neve.

6\* Loko noligo, neza nogómula ahulo moloko gonanalivagi siá minató netá alévoleláa losive losive itó monokú olotiva ve keí holúikú sipsip iza akaleva makó apilivi givi amó ametameki nego ánimómó. Sipivaláa 7 minámó, itó agómuláa ámina oko 7 minámó nene Ómasímini zámuzala 7 alenei Sikalahú nene amiselekago, mikasi nekisa vokisauka minoloko vonoimó aí avevezahaló minámó.

7 Itó akalevámó vike gonanalivagi siató mina vemámini agizani zamagalokatí pepa asaivagi nene alimó.

8\* Pepa asaivagi alekago, alévolé oko minoaká netá losive losive itó monokú olotiva ve 24 keza sipsip iza akalevamámini amakuka gupá zi amemó. Lá iake, keza nama litive líli ziaaká netá napa nene ali minake, itó lape makó nene golitunú líli amokí nene kízigakú etó etó iki ali minámó. Anuvavagi paulá Ómasiloka gizo ameakakumú nene lapegú vái o minámó nenémó monó gele vegenalite Ómasiloka liaká niatímíni avevezaha neve.

9\* Nama gosohá makó láa líli lamó neve:

Geza gipilikago helenike geí golanikatanún vegená mukí nene

mukító nagaki itó mukító konokí itó mukító kugupegi itó mukító mikasigú vegená

meina hizeko gologí okimikanike Ómasí noitoka kelémo molokanimole.

10\* Ómasí ametehini gelekélé itatave loko

aí avogisaló guguni gizoaká ve kelémo molanimó neve.

Kelémo molokako mikasiuka gizapa líli miniki kugulizaki minanigave.

Lá onoinazo, pepa humaváa akagá itani avotigila oko noane, líli lamóma neve.

11\* Goha nogómula ahulo moloko ánimómó nene ageló mukilitini kepegagutí gakó mukí gulumó. Nampáini nene 100 milióni itó tausen tausen minámó. Keza nene gonanalivagi holomaló itó netá alévolé oko minoaká netá losive losive itó monokú olotiva ve minatoka hízi vego líli minake,

12 gakó napagutí nama láa líli lamó:

Sipsip akaleva imane goí líli apilí hilinámó nenémó

zámuzá itó henoní itó gele vevesoaká itó amuzá aliti lelegitó itó vegená mukilité agepoka líli aí agulizá ali otikiko,

aí lapaná utó oko minati avotigila oko noive.

13 Líli líkago, neza mukí okulumakuka ne netá itó mikasigú ne netá itó mikasi emane amunagú ne netá itó age nagamí agikagú ne netá mikasi háitopaitokú nia netá nenete láa líli nama nilago gulumó:

Gonanalivagi siató minoaká noi veló itó sipsip akaleva noitoka

kepegoka itó kugulizá ale oteaká itó keí lapaná utó oaká itó zámuzá

keitoka minoloko voko mino lúaló moloko minanogo ive.

14 Líli líkago, netá alévolé oko minoaká netá losive losive keza konotó aliki lamanale líkago, monokú olotiva ve keza kalapusa hízi amiki gupá zi amemó.

\* 5:1: Izi 2:9-10; Isa 29:11 \* 5:5: Apí 29:9; Isa 11:1,10 \* 5:6: Isa 53:7; Zak 4:10 \* 5:8: Age 141:2 \* 5:9: Age 33:3, 98:1 \* 5:10: Gá 19:6; Ali 1:6 \* 5:11: Tan 7:10

## 6

*Sipsip akalevámo pepa humaváa 6 akagá imó*

<sup>1</sup>Itó neza nogómula ahulo moloko áñigumó nene, sipsip akalevámo pepa humaváa 7-agutí makó nene akagá imó. Akagá noigo, alévolé oko minoaká netá 4 keitokatí makó eza gó galaketoko sele loko limó: Ano.

<sup>2</sup>\* Loko lokago, áñigumó nene, hosi iza mokoná makó ago, amupiló ve makó minamó eza gimisiva itó gonanalivagi akilí ali amikago aleneike lovagú netá avilegemo vike netá mukí aviliginogo novigo áñigumó.

<sup>3</sup>Itó sipsip akaleva eza pepa humaváa nampa 2 nene akagá okago, alévolé oko minoaká netá nampa 2 áisi ano loko sele lokago,

<sup>4</sup>\* hosi iza golohá makó utó oake amó. Amupiló nene ve makó minamó nenémo mikasigú hulu ale olové okimikiko, vegená keza eza apele ahulokiko eza apele ahulokiko itave loko nenémini zámua amemó. Itó lova napa ale utó itimó nenémini zámua itó sopoló hána nenegi amikago ale minamó.

<sup>5</sup>\* Itó sipsip akaleva nenémo pepa humaváa nampa 3 nene akagá okago, netá alévolé oko minoaká nampa 3 áisi ano loko sele lokago, neza nogómula ahulo moloko áñigumó. Nánigugo, hosi iza anupá makó amó. Ve makó amupiló minamó eza sigeli makó ale minamó.

<sup>6</sup>Itó netá alévolé oko minoaká keí holúikutí vegená konokitana utó oake, láa loko ligo gulumó: Mukí netalímini meinava mota iteko nenazo, laisi kapu 4 nenémini meinaváa 2 kina, itó polisi kapu 12 nenémini meinaváa ámina oko nemóza, olivi nogoza itó vain nagá nene vauna hizemilo loko limó.

<sup>7</sup>Itó sipsip akaleva nenémo pepa humaváa nampa 4 nene akagá igo, alévolé oko minoaká netá nampa 4 nenémo ano loko sele lokago,

<sup>8</sup>\* nogómula ahulo moloko nánigugo, hosi iza makó agupéa goni agupe lamó nene ago, áñigumó. Itó amupiló mina vémini agulizá nene heleakalímo itó amegesaló ámegetoko a vémini agulizá nene galegú lemeakalímo, itó mikasigú vegená lakani losive losive hizi hóu líki niago, mulusi makó nene lova itó gaúna napa itó vegená mukitó kivise gesá oaká netá itó zauka gaha akohú netá nene utó iki gevená lapuluva ikitatave loko nenémini zámua kemekago ali minasimó.

<sup>9</sup>Itó sipsip akaleva nenémo pepa humaváa nampa 5 akagá okago áñigumó nene Ómasímini gakó ali minake li hutilí akumule líki kipili hele vegenalitini kemeni nene guguni gizoaká itámini sepekuka niago, áñigumó.

<sup>10</sup>Keza gakó gamoga giki sele lake láa líki lamó: Apazá Guivahani gihila geza gamena napama ale hána okane. Geza golanitémini lihima monóini nomi vegematoka noimó nene nanahé apasatane.

<sup>11</sup>Líki líkago, mokoná gó hána etó etó iki kimi asú iake, láa líki li kememó: Gelekelé izegipa líkigive lugáa ámina iki kipili hilitamó keí nampáini vaí ititó neze, líkavasú viziki ageva kománeta minalo líki lamó.

<sup>12</sup>\* Itó netá lá oko áñigumó: Sipsip akaleva eza pepa humaváa nampa 6 nene akagá okago, imimá napa imó. Lá noigo, ho nene gónupa o asú oake, ikani nene golani loló imó.

<sup>13</sup>\* Itó sonohí keza hepelímo naligo gohuna zámimi gihila legemó zimómáminiki okulumatokatí mikasiuka lígimi zizi amó.

<sup>14</sup>\* Itó okuluma eza nene usí pepa likeaká nouhámámini oko vímegeake, voko haha imó. Itó agoka itó mikasi pokola keza mukitó numuni apáini ahuliake haitotoka viká viká amó.

<sup>15</sup>\* Nenéminoko utó noigo, mikasigú gamani ve napa itó gizapa ve itó amitini ve napa itó henóiki ve itó amuza ve itó vegená lugáa mukitoka íti minamó itó limi minamó gelekelé vegená itó hanuva vegená keza geha mulikú itó agokaló gehani napámini amegesauka halá giki minamó.

<sup>16</sup>\* Lá iki niake, agokagi itó gehani napagi sele li kemeke láa líki lamó: Limiki zi hitilitamave. Gonanalivagi siató minoaká noi vémini avogisaló utó o amekatunize. Itó sipsip akalevamámo mukahá olimikatize.

<sup>17</sup>\* Mukaháinímini gamena napa utó okanazo, avogisaló éaho alévolé oko minatimó neve, líki lamó.

## 7

*Isilae vegená 144 tausen kovogisaló Ómasímini anosa minamó*

\* 6:2: Zak 1:8, 6:3,6    \* 6:4: Zak 1:8, 6:2    \* 6:5: Zak 6:2,6    \* 6:8: Izi 14:21    \* 6:12: Ali 11:13; Zoe 2:10,31  
\* 6:13: Isa 34:4    \* 6:14: Ali 16:20    \* 6:15: Isa 2:19-21    \* 6:16: Hos 10:8; Luk 23:30    \* 6:17: Zoe 2:11; Mal 3:2

1 \* Lá okago, neza nogómula ahulo moloko ageló losive losive ánimú. Keza mikasi nekisa losive losiveló miniliki vinago ánimú. Mikasiló hepé losive losive ali minamó nene mikasiukahe itó age nagamikú ahe itó veletoka hepé makó alemitive liki ali minamó.

2 Itó ho noititokatí ageló makó noitigo ánimú. Eza alévolé oko minoaká Ómasímini anosa ale minamó. Áisi nene ageló losive losivema mikasiuka itó age nagamikuka vauna alita zámuza kemeneimoláa sele lo kimike láa loko limó:

3 \* Lekeza mikasiuka itó age nagamikuka itó veletoka litá iki vauna hizemilo. Leza goí oko Ómasímini vejenala zuhatini golihító nene anosa molokimikuko neze.

4 Loko lokago, vejená golihító Ómasímini anosa minamó keí nampáinimú lo nemekago lá oko gulumó: Isilae vejenalitini mulusi haitopaitó mukikutí 144 tausen nene kovogisalo Ómasímini anosa minamó.

5 Zutani mulusigutí 12 tausen nene anosavagi minamó. Lupeni mulusigutí 12 tausen, Kateni mulusigutí 12 tausen,

6 Aseloni mulusigutí ámina oko 12 tausen, Napatalini mulusigutí 12 tausen, Manaseni mulusigutí 12 tausen,

7 Simeoni mulusigutí 12 tausen, Livaini mulusigutí 12 tausen, Isakaloni mulusigutí 12 tausen,

8 Zepuloni mulusigutí 12 tausen, Zoseheni mulusigutí ámina oko 12 tausen, Pezamini mulusigutí ámina oko 12 tausen nenémináate Ómasímini anosa nene golihító minamó.

#### *Haitopaitó mikasiukatí mulusi napa napa mina gakó*

9 Lá okago, nogómula ahulo moloko ánimú nene, numutó namatotí vejená nene mukitó kugupegi itó mukí nagaki itó mukitó konoki vejená mulusi napa napa nene ve makolímó gatoko gato asú amosalímíni keza gonanalivagi sialímíni avogisalo itó sipsip iza akalevámíni amatoka niago, ánimú. Keza nene gineganéini mokoná ali luhiake itó geké litanigi kigizakú nene kokonasi agila letiki ali minamó.

10 Ali minake, gakó napagutí láa liki lamó: Lugutó vizeaká netá nene gonanalivagi siató minoaká noi Ómasile aitokatí itó sipsip akaleva aitokatí neve.

11 Itó ageló mukí itó monokú olotiva ve itó alévolé oko minoaká netá losive losive keza gonanalivagi siá alímí vigiake gonanalivagi sialímíni amatoka kogoka hizinake Ómasímini agulizá ali oteke láa liki lamó:

12 Lamaná. Nónohá zeaká itó aí lapaná itó gele vevesoaká itó agepoka loo loo itó agulizaláa ale oteaká itó helisa itó amuza nene Ómasileloka minoloko voko mino lúaló moloko minanogo ive. Lamaná.

13 Liki li nahulago, monokú olotiva ve makolímó loká onetake limó: Ginegane mokonaki ali luhiaká niamoláa nene éage niave, itó hitokatí niave.

14 \* Loko loká onimikago, gakó láa loko lo amumó: Gugulizaki venemaka, géisi gelenanimole. Lo nememane. Loko lokugo, eza limó: Keza gopoguni sipisi molokimiakalímíni agikagutí kegepagi amóma nene. Gineganéini nene sipsip akalevamámíni golanitunú nagamí ziki ali mokoná linamole.

15 Nenemú keza Ómasímini gonanalivagi siá amatoka miniki únaká neteká monó zagusavéagú gelekéle itiki miniaká niave. Lá niago, gonanalivagi siató minoaká noi vemámo gizapa oketoko minanogo ive.

16 \* Lá noiko, nosánetakumú gaúnáini ma heleminigave, itó nagamikumú kiviseminogo ive. Itó homámohe itó netá makolímó kugupéini loko vímegeminogo ive.

17 \* Siá hululáaló sipsip akaleva noimó áisi nene gizapa venini minanogo ive. Lá oko minova minova oakalímíni nagamí hinipinímálo kelémo-loko vinogo ive. Lá okiko, Ómasímó kogómula nogozáa gílato asú inogo ive, loko lo nimimó.

## 8

### *Pepa humaváa nampa 7 akagá imó*

1 Lá okago, sipsip akaleva eza pepa humaváa nampa 7 akagá okago, okulumakú mukí netá matá mómoká iki konó milamago, hapu aowa oko vimó.

2 Nene asú noigo ageló 7 Ómasímini amatoka oti miniaká niamó nene pikuli 7 kemekago ali minímíni inago ánimú.

3 \* Itó ageló makolímó lape makó golitunú lilí amó nene aleloko ake, guguni gizoaká ita amatoka ote minamó. Neneloka anuvavagi paulá lamaná mukí nene Ómasiloka gizative

\* 7:1: Zel 49:36; Tan 7:2      \* 7:3: Izi 9:4,6      \* 7:14: Tan 12:1; Mat 24:21; Mak 13:19      \* 7:16: Isa 49:10      \* 7:17:

liki alimi amikago, gonanalivagi siá avogisaloka nene guguni gizoaká ita golutunú lílí a netalímíni amupiló anuvavagi paulá gizoake monó gele vegeanalite Ómasiloka numuna liaká niamó neneló miní ameketamó.

<sup>4</sup> Lá noigo, agelolímíni agizakutí lokila anuvavagi nenémo monó gele vegeaná kéisi Ómasiloka liaká nia netató nene miní amekimikago, Ómasiloka itimó.

<sup>5</sup> \* Ageló eza némini oake, guguni gizoaká italotí ló luluha aleake, lapevagú molo vaí oake, mikasigú ale tulu lo ahulokago limimó. Nolimigo, gó galaké galaké anó sipisigi nolike, gó melezá melezá oko nominago, imimá napa imó.

*Ageló 7 keza pikulí huhu lamó*

<sup>6</sup> Lá noigo, ageló 7 keza pikuli ali minamó nenete pikuli huhu linigi ali vatí iake minamó.

<sup>7</sup> \* Lá okago, ageló nampa 1 áisi nene pikuli huhu lokago, golini óvisopa gihilagi loki itó golanigi ali gopa amó nenémo mikasigú zimó. Nozigo, mikasiuka lakani híze hóu lo losive makole noigo, lakani makokú nene za mukí lolímo lamó, itó lakani lugáa nene gihisi mukí lolímo lo asú imó.

<sup>8</sup> Itó ageló nampa 2 áisi pikuli huhu lokago, agoka napagitana netá ló gulumavagi age nagamikú apate-loko limimó. Lemekago, age nagamí híze hóu lo losive makole okago, makokú nene golani loló imó.

<sup>9</sup> Lá okago, age nagamikú haitopaitó netá híze hóu lo losive makole okago, makokú mina netá matá nene híli gesá amó, itó nagamikú sipi mukí nene atigimí vamó.

<sup>10</sup> \* Itó ageló nampa 3 áisi pikuli huhu lokago, sonohí napa makó nene okulumakutí atoheake limimó nene, liví nenéminoko guluma oake nagamí lugáagú limimó.

<sup>11</sup> \* Sonohí agulizaláa nene ekesalagive. Nagamí nene híze hóu lo losive makole okago, makó nene ekesá o asú okago, ámina nagamí na vegeaná nene ekesalámo kepelekago, mukí híli gesá amó.

<sup>12</sup> \* Híli gesá niago, ageló nampa 4 áisi nene pikuli huhu lokago, ho ikani itó sonohí nenetini lapanáini híze hóu lo losive makole okago, makolímíni lapaná nene asú imó. Lapanáini koma noigo, gó soza moloko gó lamó. Itó holugú ámina oko ikani sonohí soza moloko lapaná lomo vimó.

<sup>13</sup> Itó neza nogómula ahuloko nama gosúveha napa makó ánigumó. Ánigumó nene ká vozane veletó gasa geko minake, gakó napa líke láa loko sele limó: Agae, agae, agae. Ageló losive makoletini pikuli ha neve. Nene huhu litató nene mikasigú vegeaná keza nanámini itamó neve loko lígo, gulumó.

## 9

<sup>1</sup> Itó ageló nampa 5 áisi nene pikuli huhu lokago, ageló makó sonohikitana minamó eza okulumatokatí lutegeake, mikasigú nolimigo ánigumó. Itó aseva nomi galémíni gaheváa sigitive loko nenémíni kíí amikago ale minamó.

<sup>2</sup> \* Itó galémíni gaheva nosigigo, lokila napa itimó nene gihisi vitú okuko lokila iteaká noimó nenéminoko galegutí itimó. Lokilámo nene iteko ho agómualaló itó vogalaló ká mezane ze hitamó.

<sup>3</sup> \* Ze nohitago, lokilámini agikagutí ganú nene mikasigú lemémó. Kegepáa nene gámukelímíni agepáa nenémíni oko minamó.

<sup>4</sup> \* Keza mikasigú gihisi zazuha itó zagila tagila nene vauna alemítave loko lo hukoketamó. Ómasímíni anosa kovogisaló minami vegeaná nene lova ali kimitave loko loketamó.

<sup>5</sup> Itó kipilikiko hilitave loko nomi. Hanuva ikani ligizani lugaloka asú igo nenémíni agikagú akohú nikipiliko, miluma maluma giliki minatave loko gele kimimó. Gámukelímo lepelekago, miluma maluma geleaká nounimó nenémíniki miluma gilitave loko gele kimimó.

<sup>6</sup> \* Ámina gamenaló vegeaná keza lá iti netakumú hilitave liki hilita gapomú vitagá itaha itaha, helemínigave. Heleaká nene sele litaha litaha, gopa ma helemínigave.

<sup>7</sup> \* Itó ganúmate hosi iza kemetamenigi minamó nene gala ve keza lovaló vinigi hosi iza ali vavá ikimiake aliki viaká nia kemetamenigi minake gotóitoka akilí golutunú lílí amó gele ví netá nene minamó. Itó kovogisáa nene vegeaná logoka legepagitana,

<sup>8</sup> \* itó zopováini nene hána hána nene vená lugáatini zopovagitana, itó kegepáa nene laizon akohú galámíni agepagitana,

\* 8:5: Liv 16:12; Gá 19:16; Ali 11:19, 16:18

\* 8:7: Gá 9:23-25; Izi 38:22

\* 8:10: Isa 14:12

\* 8:11: Zel 9:15

\* 8:12: Isa 13:10; Izi 32:7; Zoe 2:10, 3:15

\* 9:2: Apí 19:28

\* 9:3: Gá 10:12-15

\* 9:4: Izi 9:4

\* 9:6: Hio 3:21;

<sup>9</sup>\* itó apítoka nene sioti aenitunú lílí amó gelevi netá minago, áinigumó. Itó kogokénagutí anó molamó nene hosi iza mukí keza lolaló vinigi gelelehá oaká kaligi lolu liake konó napa miliaká niamó nenémini oko minamó.

<sup>10</sup> Kagasáa gámukelímíni agasagitana oko, kegepáa nene kagasauka minamó. Nenetunú vejená ikani ligizani lugaloka asú igo nenémini agikagú akohú kipiliki minanigave.

<sup>11</sup> Itó ageló makó eza aseva nomí galezá oaká noimó nenémo kugulizaki venini noive, agulizá nene Hipulu vejenalitíni gakokutí Apaton, itó Kiliki vejenalitíni gakokutí Apolion, itó lelí gakokutí nene vauna aleakató ve.

<sup>12</sup> Agae, genavagi miluma netá makó nene asú okamóza, lositá nene hanuva neve, loko limó.

<sup>13</sup>\* Lá okago, ageló nampa 6 áisi nene pikuli huhu lokago, guguni gizoaká ita golitunú lílí amó Ómasímíni avogisaló minoaká nemómámíni sipiva losive losive nenelotí ve makolímíni anó lupa makolímó iteake,

<sup>14</sup> ageló nampa 6 nene láa loko lo amimó: Zupaletis nagamí napaló ageló losive losive nagá zekimikamóma nene gologí oketozo.

<sup>15</sup> Loko lokago, ageló losive losive keza ámina kilisimasiló itó ámina ikató ámina gamenaló itó ámina aowa ahaváisi nene mikasigú vejená hízi hóu li losive makole iiki niko, mulusi makó nene kipili gesá itave loko kegeva iki minamoláa nene gologí oketamó.

<sup>16</sup> Itó ami ve hosi izatíni kemegezaló mina vetíni napáini 200 milionive liki lago, gulumó.

<sup>17</sup> Vegenaki hosi izagi keí kemetameni nene, neza vamokitana áinigumó nene lá iki minamó: Apítoka siotigitana netá aenitunú lílí amó nene golohá itó gumugumusi itó gihuká nenémini iki luhiki minamó. Itó hosi izatíni gotóini nene laizon akohú galámíni gotola nenéminoko noigo, kegepagutí nene loki itó lokilagi itó gihuká gehani ló nolago limimó.

<sup>18</sup> Hosi izámíni agepagutí nene loki itó lokilagi itó gihuká gehani ló nolago limimó nenémo mikasiuka vejená híze hóu lo losive makole oake noigo, mulusi makó nene kepele gesá imó.

<sup>19</sup> Ámina hosi izatíni zámuzáini nene kegepagú itó kagasaloka minamó. Kagasa nene gosihá nenéminoko gotóinigi noigo, nenetunú vejená miluma netá lílí i kimiaká niave.

<sup>20</sup>\* Itó ámina vejená mukitoka kivise asú iti netalímó vejená lugáa kepele helemo novigo, lugáa asenini zeketamoláa keza kigikáa ali viligamake, keza soza netá lílí iake ali miní miní amó nene ali ahulamamó. Soza ómai netá golitunú itó silivatunú itó aenitunú itó gehanitunú itó zatunú lílí a netá áinigoko geleaká nomimoláa itó gapo moloko vamoakalímíni nene miní amiki gupá zi kimiki minamó.

<sup>21</sup> Lá iki minake vejená kepele heleaká itó soza lusa geaká itó gumesisi mokoló netá itó gumina nene ahulamamóma neve.

## 10

### *Ageló makolímó pepa koma ale gakinakutí ale atalo minamó*

<sup>1</sup> Itó amuzavagi ageló makóma okulumakutí limigo áinigumó nene agupeloka límusi leto voko minamó, itó gototaló nene hugepa lo minamó, itó avogisaló nene ho silikakéna ahuloko minamó. Itó agisa luga luga nene lapusagitana oko ló guluma oko minamó.

<sup>2</sup> Agizakú nene pepa koma makó ale minake nene ale gakinakutí ale atalo minamó. Agisa sogalokatí nene age nagamí amupiló liso minamó. Agisa zamagalokatí nene mikasiloka liso minamó.

<sup>3</sup> Lá oko noi ke laizon akohú galámo anó sipisi molamó nenémini oko gakó napagutí sele litó nene gó galaké 7 nenete konó milamó.

<sup>4</sup> Konó milikago, gelekuke gakóini nene luhuva gizanogo nougo, okulumakutí anó lupa makó galinali nenitoka láa loko limimó: Gó galaké 7 keza gakó lamó nene, luhuva gizo molamo. Hanuva gigikagú minino.

<sup>5</sup>\* Loko lokago age nagamí amupiló itó mikasiloka liso mina agelómámo agizani zamagaloka nene okulumatoka ale otimó.

<sup>6</sup> Ale otike mino lúaló moloko alévolé oko minanogo noi vémo okulumatoka itó mikasiuka itó age nagamikú netá matala ale utó molo asú i ve Ómasímíni agulizató gakó láa loko lo hukamó: Gamena makó ageva minaminogo une.

<sup>7</sup> Ageló nampa 7 áisi pikuli huhu lokiko anó napa molanogo ive. Nene zupahé Ómasímíni agepagutí gakó liaká ve keza gelekelé itiki mina vejená nene emane Ómasímo asuguná gakó lo kimimómámíni gihiláa utó o asú oko utó inogo ive.



<sup>8</sup> \* Loko noligo, okulumakutí anó lupa goí oko gulumóma ámina oko goha utó oake, láa loko lo nimimó: Geza voko age nagamí amupiló itó mikasiló lisoko noi agelómámini agizakutí luhuva netá ale gakinakutí ale atalo minamóma nene alezo.

<sup>9</sup> Loko lokago, neza ageló noitoka voko pepa koma ale minamó nene nimitive loko lokugo, láa loko lo nimimó: Alekoko nozo. Nokako, ale gegepaló nomolako nene, himoni nogozamáminoko laga givisitimóza, gigikauka ekesá inogo ive.

<sup>10</sup> Loko loake, pepa nene nemekago numó. Nokuke, negepaló nene himoni nogozamáminoko oake, laga imóza, no mikilí okugo, nigikauka ekesá imó.

<sup>11</sup> Lá okago, geza vejená mulusi mukí kugupe haitopaitoki itó gakóini haitopaitó itó kugulizaki ve haitopaitó keí sala gakó makó neveni goha lozo loko lo nimimó.

## 11

### *Ómasímini gakola li utó utó ve lositosini gakó*

<sup>1</sup> \* Itó ageló makolímó molo geleaká nogosani hánusagitana makó nemeake, láa loko lo nimimó: Geza oteko Ómasímini zagusavegi guguni gizoaká itagi molo geleko agikagú Ómasi pupá zí amiki nia vejenáma gatozo.

<sup>2</sup> \* Itó zagusavémini apaláa nene molo geleko ániagamoko hanuva ahuloikozo. Nene hetoka vejená keile loko hize huko ahulonoimó neze. Keza neneló apazá apáne Zelusalega nene ikani 42 nenémini agikagú lisi lana iki minatamó neve.

<sup>3</sup> Itó neza gakóne li utó utó ve lositá lokimikugo, ginigane litaha ali luhuike vejená nene gakóne li kimi kimi iki niminisiko, ikani 42 goloko hilinogo ive.

<sup>4</sup> \* Keza olivi za lositáma itó liví lositáma mikasímini Guivahanímini avogisaló nimirasimó nene gakóne li utó utó ve lositámámini avevezahaló niasive.

<sup>5</sup> Ve makolímóhe makolímóhe ámina ve lova ale kimitimó nene, kegepagutí vele limiti lolimó liki vimiginigave. Nenéminoko ve makolímóhe makolímóhe lova ale kimitimó nene, ezáa lapuluva inogo ive.

<sup>6</sup> \* Goliniló gizapa itái zámuza kemeneimó nenazo, Ómasímini gakola li kimiki niminisiko, golini zeminogo ive. Itó likisiko, mukí nagamí hinipinilímó golani loló inogo ive. Nenémini zámuza kemeneimóma neve. Itó mikasigú vejenatoka kivise asú iti netá haitopaitolímíni utó itive liki likisiko, utó inogo ive.

<sup>7</sup> \* Itó monó litái gamenaló asú okiko, aseva nomi galegutí akohú netá golvagi netá itinogo ive. Iteko lova ale kemeko kivilegeko kepelekiko hilingasive.

<sup>8</sup> Hilikisiko, vejená keza gonosímini ahulikiko, taoní napámini gapoló aki minanigasive. Guivahaniníni nene gozapá ámina apatú zohota zaló apilikago hilimóma neve. Apá nenémini agulizaláa anoza gakokutí Sotove itó Izipive liki liaká niave.

<sup>9</sup> Lá okiko, numutó namató gevená lugáa kemetameni haitopaitoki itó haitopaitó nagaki itó gakóini haitopaitoki nene gonosiváa gamena losive makole itó nekisáagi nenegú ánikigiki minanigave. Lá niiko, lugáate gale zeketatune liki likiko, géneka li kiminigave.

<sup>10</sup> Itó ámina monó lili ali ve nenetosa mikasiuka vejená nene miluma netá sipisi kimiaká asimó nenazo, helesikumú kogoliza viziki iza lulú giki ali helega helega inigave.

<sup>11</sup> \* Itó gamena losive makole itó nekisáa oko vokiko, Ómasilokatí gosohá minoaká netá ale utó moloaká sikalahú nenémo gonosíki nene lemekiko, mómoká iki otinigasive. Otikisiko, vejená keza ángiiki kehelele goha vizekiko, gakó laminigave.

<sup>12</sup> Lá okiko, okulumatotí anó lupa napa makó láa loko limitive: Kee, imaneloka itilizó. Loko lokiko, gala velini keza ánginiko, límusímó asapú okimikiko okulumakú itinigasive.

<sup>13</sup> \* Itó okulumakú nitisiko, áminasitó imimá napa nene itive. Noiko, ámina numutoka apá hamó golesa okiko, apá lugáa 9 ha minative. Itó imimalímó vejená 7 tausen kepelekiko, hili gesá inigave. Itó gosohá minatamoláa keza kelegesá legekiko, Ómasi okulumá amelahini lapaná ali otinigave.

<sup>14</sup> Agae, genavagi miluma netá lositá nene mota utó okamóza, hamó nene mota utó inogo inae.

### *Pikuli nampa 7 huhu lamó*

<sup>15</sup> \* Lá okago, ageló nampa 7 áisi pikuli huhu lokago, okulumakú nene konó lupa napa lake láa liki lamó: Itína nene numutó namató kugulizaki vetini gizapa okimiaká zámuza nene Guivahanitémini itó gologí oketative loko lo moloketa vémini agizakú noigo, eza gizapa oketoko kugulizaki venini minoloko voko mino lúaló moloko minanogo ive.

\* 10:8: Izi 2:8-3:3 \* 11:1: Izi 40:3; Zak 2:1-2 \* 11:2: Luk 21:24 \* 11:4: Zak 4:3,11-14 \* 11:6: Gá 7:17-19; 1 Sam 4:8 \* 11:7: Tan 7:7,21; Ali 13:5-7, 17:8 \* 11:11: Izi 37:10 \* 11:13: Ali 6:12, 16:18 \* 11:15: Gá 15:18; Tan 2:44, 7:14

<sup>16</sup> Liki likago, monokú olotiva ve 24 Ómasímíni avogisaló gonanalivagi siató mina vete lemeke gupá zeke Ómasi láa liki agepoka lamó:

<sup>17</sup> Guivahani Ómasi osá amosá ve neneka,  
geza minanimó itó itínagi nominane.

Amuzaka napa ale atalokanike gugulizaki minoko  
gizapa okimiaká hozaga apí oko ale utó nomolanikumú gegepoka nolune.

<sup>18</sup> \* Mukí numutó namató veđená kizapaló golesa molamó neve.

Mesaha oketatani gamena alitokago,

hele veđenalitini lihimamú goní oketatani gamena utó okave.

Itó gelekéle izegipaka geí gegepagutí gako liaká a ve

itó monó gele veđená lugáa itó geí zámuzamú gili olopá iki niamó iti minamó itó limi minamó

keza meinaváini kimitani gamena alitokave.

Itó mikasiuka netá ali gopa iaká nia veđená kelémo lapuluva itani gamenaváagi mota alitokave.

<sup>19</sup> \* Liki agepoka likago, okulumauka Ómasímíni zagusave koló okago, lo múnahéaká gakolímíni pokisi nene zagusave agikagú utó imó. Itó gó melevezá itó konó lupa napa itó gó galaké itó imimá itó golini óvisopa gihila napa limimó.

## 12

*Vená makoki gosihá sipisimagi keí gako*

<sup>1</sup> Lá okago, okulumató anosa napa lá oko utó imó: Vená makó minamó eza agupeló ho silikakéna luho minamó. Itó agisa amunauka nene ikani milimikago minamó. Itó gotolaloka nene sonohí 12-atunú lilí ita akilí hitamó.

<sup>2</sup> Itó eza izegipa agatupagi minoko izegipala getanogo miluma geleko gopaga loko minamó.

<sup>3</sup> \* Itó lá oko noigo, okulumatoka anosa makó lá oko utó imó: Gosihá sipisi makó minamó nene ametamenia golohá loko minamó, itó gotoláa 7, itó sipiváa nene 10, itó gotola minoloko vitó vitó nene kugulizaki vetini akilí makó hitimikago minamó.

<sup>4</sup> \* Lá onoi gosihalímo okulumatoka iteko minake agasatunú sonohí nene hize hou lo losive makole oko hizeko atohe ahulo ahulo igo, mulusi makó nene mikasiuka lemémó. Itó gosihá sipisi eza lá oake, venalímo izegipa getokiko mikilí itove loake voko amatoka gizapa oko minamó.

<sup>5</sup> \* Itó izegipala getokago nene, numutó namató veđená aeni hánusatunú gizapa oketative loko lo molotamó. Itó ámina gipa getokago nene, ipá iki aliki itiki Ómasímíni amatoka gonanalivagi holomámíni amakuka ahulitamó.

<sup>6</sup> Lá okago vená eza golisi vike mikasi gomopalaló ikani 42 nenémíni agikagú nasahilí nitiko minative loko Ómasímó ale vatí ota apatoka voko minamó.

<sup>7</sup> \* Lá okago, okulumatoka lova napa utó imó. Agelolitini gizapa ve Maikolí itó izegipa agunamotamola keza sipisi gosihá nene amiseleko apilitune liake lova ali utó amó. Itó helegaloka sipisi gosihá nene izegipa agunamotamolagi ámina iki gimisi magé iki minamó.

<sup>8</sup> Itó lá ikamóza, gosihagegi nene keé liki lova aviligítamoláa amigo, okulumakutí kimsiliake gahe gikitamó.

<sup>9</sup> \* Lá amó nene amepa gosihá napa eza gozapá ká emane amunalokatí mina ve Satá eza nene numutó namató ve kogoka vizé vizé oaká i vema ahelú i ahulikago, mikasigú limimó. Ezagi izegipala zuhagi monéna kehelú i ahulikago lemémó.

<sup>10</sup> \* Lá niago, okulumató gako napa láa loko utó noigo gulumó: Ligive lagavetini galanáikumú Ómasímíni avogisaló gamena gamena únaká neteká goní okimiaká noi vema nene okulumatokatí ahelú i ahulikago lemekanazo, Ómasilémo lugutó vizeaká itó aí alévolé itó aí gasova itó gologí oletative loko lo mololeta vevámíni gizapa oaká zamuza nene utó o lamaná okave.

<sup>11</sup> Keza sipsip iza akalevamámíni golanitunú itó goselé kepeleko kelegesá legemigo Ómasímíni gako liaká atunú amuza miliake aviligítakómoma neve. Lá iki miniki alikínimú gelemake, itó lapuluva itupe liki gilisá amamóma neve.

\* 11:18: Age 115:13 \* 11:19: Ali 8:5, 16:18,21 \* 12:3: Tan 7:7 \* 12:4: Tan 8:10 \* 12:5: Isa 66:7; Age 2:9  
\* 12:7: Zut 9 \* 12:9: Apí 3:1; Luk 10:18 \* 12:10: Hio 1:9-11; Zak 3:1

<sup>12</sup> Nenemú okulumá agika itó nenegú mina vegealita lokogoliza vizilo. Itó mikasiuka itó age nagamikuka niamoláa agae, lekeza nana itamó neve. Imane Satá eza gamenaváa mota asú inogo ive loko geleneike izapaló golesa molago lekelitoka núane nolimive.

<sup>13</sup> Lá okago, gosihá sipisima ahulimikago, mikasigú lemeko minakumú geleake, izegipa geta venáma agizató alinogo ámegetoko vimó.

<sup>14</sup> \* Lá okago ámina vená nene nama gosúveha sipisímuni agokéna lositá ali amikago, mikasi gomopalaló minoko aleko oaká itoka gosihá sipisimú golisi voko halá gimó. Neneloka nasahilí itiki niko, kilisimasi losive makolegi hapumagi vinogo ive.

<sup>15</sup> Lá noiko, vená nene golisi okago, gosihá sipisi eza amegesaloka agepagutí nagamí nene vele ahulokago, ámina nagamillimo vele lemeake veleko vimó nene ámina vená alémoko vinogo nenémuni imó.

<sup>16</sup> Lá inogo noigo, mikasímo vená agutó vizike agepa aká okago, gosihá sipisi nenémo vili nagamí nene mikasi agepagú leme asú imó.

<sup>17</sup> Leme asú okago, gosihá sipisi eza venámamú izapaló molokago, ámina venalímuni izegipa agunamotamola Ómasímo lo huka gakó nene gili aleke Izesuni gakó goselé kepelemigo li utó miliki liaká a vegená nene lova ale kiminogo vimó.

<sup>18</sup> Novike, age nagamí getatoka lemeko minamó.

## 13

### *Akohú gala lositá keí gakó*

<sup>1</sup> \* Noigo, neza ánitugoka age nagamikutí nene hela netá napa makó itimó. Eza nene sipivaláa 10 itó gotoláa 7 itó gotoláa minoloko vitó vitó nene kugulizaki vetini akilí minamó. Itó gotolaló agulizá minamó nene Ómasi aleko letoko loaká gakó minamó.

<sup>2</sup> \* Hela netá napa ánigumó eza ametamenía nene pusi sipisímámini oko, agizanía nene peá galámuni agizani nenémuni oko, itó agepa nene laizon akohú gala agepamáminoko minamó. Itó gosihá sipisi nenémo ezáa zámua itó ezáa gonanalivagi siá itó ezáa guivahani loló oko minoaká zámua nene amimó.

<sup>3</sup> Hela netalímuni gotoláa makó agómuni minake hele minamó gelekago ánigumó. Itó nenémo agómuni ha omikago lamaná imó. Lá okago nenemú numutó namató vegealite sigaga liake hela netá napama ámegetiki vamó.

<sup>4</sup> Lá niake gosihá sipisímámo guivahani loló oko minoaká zámua amekamómave liki geké vaké liki gosiháma gupá zi amemó. Lá niake akohú netá amepa netáma ámina iki alími napa ake láa liki lamó: Hela netá napa makó ezagitana minamive. Itó makó éaho lova ale amitimó neve.

<sup>5</sup> \* Liki likago, agepe alimi iti iti gakó, itó Ómasi alevo letovo otoko litive loko agepáa gúmusi molomikamó. Itó ikani 42 nenémuni agikagú mikasiuka gizapa oko minative loko zámua amimó.

<sup>6</sup> Itó nenemú Ómasi eza noimó agulizala nemó itó minoaká apala nemó keza okulumakú miniaká niamoláagi apí oko alevo galatovo oko loketoko minamó.

<sup>7</sup> \* Itó Ómasímuni vegená lova ale kemekoko kiviligitive loko gele amekago, némini oaká imó. Itó numutó namató vegená kugupe haitopaitó itó gakóini haitopaitó itó mulusi haitopaitó mukilitini agulizaki ve loló oko minative loko amuza ale amimó.

<sup>8</sup> \* Lá okiko mikasigú vegená mukí keza hela netá napama gupá zi amiki agepoka litanigave. Itó sipsip akaleva apili hele vémo gozapá mikasi utó ami gamenaló alévolé kemetameki nia vegealitiní kugulizáini nene puku makokú luhuva gizo molokago mina vegealitegó nene hela netáma nene nenémuni itaminigave.

<sup>9</sup> Lakagata hee lo minamó neneta gakó imane gili gumi iki gililo:

<sup>10</sup> \* Makó keza kalapusi numukú minatave loko lonoimóma nene kalapusi numukú ahulikitataze. Makó eza sopolotunú ve makó apele helekíkoma ámináminiki sopolotunú ámina ve apili hilitaze. Ómasímuni apazá vegená keza ámina zupahé nene siti viziki gili alévolé iki minatakumule.

<sup>11</sup> Itó mikasi agikagutí hela netá napa makó itigo ánigumó. Eza sipsip iza nenéminoko sipivala lositá minamó. Anó lupa nene gosihá sipisi nenéminoko minamó.

<sup>12</sup> Lá noike goí oko iti akohú netalímuni zámuzagi minake aí avogisaló hoza aleko minamó. Lá noike, mikasigú numutó namató vegená lokimikago, goí oko iti hela netá agómuni minake hilitotí mómoká oko oti ve nene gupá zi amiki agepoka liaká niave.

\* 12:14: Tan 7:25, 12:7 \* 13:1: Ali 17:3,7-12 \* 13:2: Tan 7:4-6 \* 13:5: Tan 7:8,25, 11:36 \* 13:7: Tan 7:21  
\* 13:8: Age 69:28; Ali 3:5, 17:8, 20:12, 21:27 \* 13:10: Zel 15:2, 43:11

<sup>13</sup> Itó hela netá napa alika utó imó nenémo haitopaitó golivagi netá aleaká noive. Lá noike haitó suni napa makó lá oko alimó: Áisi lokago, mikasigú vegená mukitoka áninagano, okulumakutí ló nene mikasiuka limimó.

<sup>14</sup> Alévolé suni nenéminoko loló itive loko gele amekago, goí oko utó i hela netalímini avogisalo loló ike mikasigú vegená kigika ale gopánapa oaká noive. Lá noike mikasiuka vegená lokimikago, hela netá napama amunaló emane sopolotunú apili hilikago goha oti netalímini vogunahana nene lilí amó.

<sup>15</sup> Vogunahana nene lilí iake, milikago noigo, alika utó i hela netá napa eza gele amimómave loko vogunahana alémo otekago, gakó loaká noive. Gakó lokago, vegená keza kalapusa hizi amemó. Amamoláa nene kipilí helemó.

<sup>16</sup> Itó aí gaketó nene vegená mukitó iti minamó limi minamó henóiki itó itó kugulizaki itó gelekeléini nene kigizani zamagaloka itó golihítoka anosa makó gizi asú inigave.

<sup>17</sup> Lá ikiko hela netá napa nenémini anosa nene agulizá luhuvahe itó agulizalámini nampavahe ali minisá amamoláa keza netá matá meina hizeaká itó salimoaká gapo hizi lí ikitanigave.

<sup>18</sup> Nene anosámini mogonamú silipa iki gili vevesatave. Vegená makó keza gakó giliaká vegená niikima, hela netá napamámini nampavalámini mogonáa ali utó miliki gilitaze. Nampaváa nene ve makolímini agulizalímini napaváa nene 666 nenéminoko neve.

## 14

### *Vegená 144 tausen gologí oketamó keí nama*

<sup>1</sup> \* Lá okago, neza nogómula ahulo moloko ánigumó nene sipsip iza akalevama Zelusale numutoka Zaion agokaló oteneigo ánigumó. Ezagi vegená 144 tausen ámina agokaló alegesá iki minamó nene golihítoka ezáa agulizá luhuva itó amelahini agulizá luhuva gizikago ánigumó.

<sup>2</sup> Lá niago okulumatokatí anó lupa gulumó nene nagamí lisani sipisímámini oko sasa loko itó gó pou pou loko limimó. Lá noigo, anó lupa gulumó nene vegená mukilite musiki ziaká netá napatunú nizego anó moloaká noitíminoko nego gulumó.

<sup>3</sup> Lá noigo, gonanalivagi sialímini amatoka nene netá alévoleláa losive losive itó monokú olotiva vetini kovogisalo nama gosohá makó liki miniaká amó. Ámina nama nene vegenalita gelesá avevezaha oko minamimó. Vegená 144 tausen nene numutó namató vegenatokatí meina hizeko gologí oketa vegená kéisigó gilitatíminoko neve.

<sup>4</sup> Keza nene venaki mokoló netá lilí amake kigika gizopa lo minamoláa sipsip akaleva noitoka ámegetiki viaká niamoláa keza numutó namató vegená lugáalokatí Ómasímini amatoka itó sipsip akalevámímini amatoka miniaká niamoláagó apí oko kelémo molamoláa niave.

<sup>5</sup> Keza nene galanáini nomi vegená nianazo, kegepaukatí soza gakó makó oló lemémimóma neve.

### *Ageló losive makoletini gakó*

<sup>6</sup> Ageló makó nene ká vozane veletó letoko novigo ánigumó nene, gakó lamaná alévoleláa minova minova oaká gakó nene mukí mikasiuka vegená kugupe haitopaitó itó konóini haitopaitó itó haitopaitó nagá lo utó oko lo kimitove loko mohona noigo ánigumó.

<sup>7</sup> Áisi nene gakó napagutí sele loko láa loko limó: Vegená gona moloketati gamena mota alitokanazo, Ómasi golivala gilitiki aí agulizá ali otilo. Okulumaki itó mikasigi itó age nagamí itó hanuva nagamí goihá nagamiki kelémo utó i ve Ómasi nene agepoka liki minalo.

<sup>8</sup> \* Loko loake novigo, amegesaloka ageló makó oake láa loko sele limó: Papelonia apá napama mota tui loko vokave. Ámina apá amelage numutó namató vegená alévolé vain nagamí nalo nalo liki gala vizeaká netá aliki mokomú gala viziki miniaká atímo tui loko vokave.

<sup>9</sup> Loko loake novigo, amegesaloka ageló makolímo oake gakó napa like láa loko limó; Makó keza hela netá napamahe itó vogunahanahe kalapusa hizi amitamó itó golihító aí anosa ali milatamó itó kigizakú aí agulizá luhuva gizatamó nenete

<sup>10</sup> \* vain nagamikitana oko Ómasímini mukahá nemó hanuva nagamiki ale mukahá amoko gopa napa oketati lapevagutí kemekiko natave. Lá ikiko apazá ageló itó sipsip iza akaleva keí kovogisalo loki itó gihuká gehani ló lokiko, áminagú limiki niiki miluma napa giliki minanigave.

<sup>11</sup> \* Itó miluma gililiki va vegená nenémináa niviko, lova lova oko minanogo ive. Itó nenémini lokilaváa iteloko voko mino lúaló moloko minanogo ive. Nenemú hela netá

\* 14:1: Izi 9:4; Ali 7:3      \* 14:8: Isa 21:9; Zel 51:8; Ali 18:2      \* 14:10: Isa 51:17; Izi 38:22; Ali 19:20      \* 14:11: Isa 34:10

napamahe itó vogunahanahe kalapusa hizi amiaká nia veđená niamó itó agulizalámíni anosa ali miniaká nia veđená nene milumámo ma ahuloketoko vaminogo ive. Itó kavasú viziki itó geha ziki ma aminigave. Gamena gamena milumámo ze lemeko miniko, gililiki viki minanigave.

<sup>12</sup> Loko limó nenazo, nenémo Ómasímo lo huka gakó itó Izesuni monó ali gilitiki amegesaló miliaká nia veđená Ómasímíni apazá veđenala keza nene alévolé iki minatakumú sele lo lemeaká noive.

<sup>13</sup> Lá okago, okulumatokatí gakó makó láa loko limigo gulumó: Imane gamenaloí veletoka Guivahaniloka gímiziki miniki hilita veđená keza mulúikú lamaná gilinigave loko luhuva gizozo. Loko lokago, Sikalahulímo láa loko limó: Lamaná. Keza iki miliki iaká amómámíni gihiláa kémegetoko vinogo inazo, hozanini miliiki mini gilinigave.

*Mikasiuka hozámíni gihiláa alíti gakó*

<sup>14</sup> Goha áñigumó nene límúsi mokoná galinali utó imó nene límúsi amupiló ve makó minamó eza ametamená veđenakitana oko, itó gotolaloka nene kugulizaki vetini akilí golitunú lilí amó nene hitoake minamó. Itó agizakuka nene nosáneté hukoaká amitá sánevetaláa makó ale minamó.

<sup>15</sup> \* Lá noigo, okulumakú monó zavusavegutí ageló makolímo lemeake límúsi amupiló mina vema gakó napagutí láa loko lo amimó: Mikasigú hozámíni gihiláa mota utó o asú okaze. Itó hukoko ale molatani gamenaváa mota alitokaze. Nenemú geza amitakatunú hozagámíni gihiláa huko molozo.

<sup>16</sup> Loko lokago, límúsi amupiló mina vémo amitala ale zohota oko zeake mikasigú gihiláa hukoko ale gesá imó.

<sup>17</sup> Lá noigo, ageló makolímo okulumakuka monó zavusavegutí olío lemeake ezagi ámina oko amitá sánevetaláa ale minamó.

<sup>18</sup> Aleko noago, agivelaho makó nenémo okulumakuka zavusavémíni guguni gizoaká italó minatotí amó. Eza lolímíni gizapaváa nenémo agivelaho amitá sánevetaláa ale mina ve nene gakó napagutí láa loko lo amimó: Gihiláa guzá lo asú okamó nenazo, geza amitakatunú mikasigú vain nagalímíni gihila huko asú ozo.

<sup>19</sup> Loko lokago, ageló agivelaho nene amitáma ale zohota oko zeake, mikasiuka vain gihiláa huko asú imó. Huko asú oake Ómasímíni mukahalímíni mí zeko liliká zeaká gehanímíni agikagú ahulokimikago limi asú amó.

<sup>20</sup> \* Lá ikago, numuni apá heláaloka mí ziki mili lí ikago, áminagutí Ómasímo mukahá oketa veđenalitíni golani nene nagamikítana oko lemeko minamó. Lemeko ohuni molago, 2 mitaló iteko velemó zimó. Itó ohuni molatímíni hánáa nene 320 kilomita mololoko voko minago áñigumó.

## 15

*Ageló 7 keza veđená mukí kivise asú iti netá 7 ali minamó*

<sup>1</sup> Lá okago, okulumató haitó luhuva golivagi makó utó igo áñigumó nene ageló 7 keza veđená mukí kivise asú iti netá 7 ali minamó. Ámina netá nene miní ameko utó noiko, Ómasímíni mukahá omo asú oko anogo ive loko lo molamó.

<sup>2</sup> Itó age nagamí makó áñigumó nene, kalasitunú lilí a netá ló gulumavagi ali gopa napa iki lilí amó gele minamó nego, áñigumó. Itó hela netá napama ezagi itó vogunahanavagi itó agulizalámíni nampava nene alévolé iki avilegemoláa keza kalasitunú age nagamí lilí amómámíni agilikaloka Ómasímíni musiki zeaká netá napa ali mina veđená nene áñigumó.

<sup>3</sup> \* Keza Ómasímíni gelekelé veva Moseni itó sipsip akalevámíni nama láa liki lamó:

Kee, Ómasi Guivahani osá amosá velemaka, oko moloko animó nene iteko neve.

Itó golivagi netá aleaká noane.

Numutó namató veđenalitíni Guivahani geza gapoka nene lamaná itó gihila lamaná neve.

<sup>4</sup> \* Geza hamolika apazá keké vizeko noane.

Nenemú numutó namató veđená geitoka iki kalapusi hizi giminigave.

Geza hehe loko aleko oko moloko ani netá nene utó o lamaná okamó nenazo, Guivahani geza éaho golivaga gelegetamitive,

itó éaho gugulizaka ale napa amitive.

<sup>5</sup> \* Liki likago, neza nogómula ahulo moloko áñigumó nene okulumakú monó zavusavémíni gaheváa koló igo áñigumó.

<sup>6</sup> Koló noigo, ageló 7 keza vešená mukí kivise asú iti netá 7 ali minamoláa zavusavegutí lemémó. Keza ginegane mokoná ali luhiake apítoka nene golitunú lílí a holotani ali zemó.

<sup>7</sup> Itó alévolé oko minoaká netá losive losivemagutí makolímo ageló 7 nene lape 7 golitunú lílí amó nene keme asú okago ali minamó. Ámina lape agikagú nene Ómasi mino lúaló moloko minoaká vémini mukahá vaí o minamó.

<sup>8</sup>\* Itó monó zavusave napa agikagú nene Ómasímini lapanalagutí itó zámuzalagutí lokila vaí oake molo minamó. Itó ageló 7 keza vešená mukí kivise asú iti netá 7 velesá ali utó míli asú amago, zagusavegú itiaká gapováa nene míli lí ikago itemamó.

## 16

### *Lapegutí lekikago Ómasímini mukahá lími gakó*

<sup>1</sup> Lá okago, monó zavusave agikagutí gakó napagutí ageló 7 láa loko lo nokimigo gulumó: Lekeza víki lape 7 nene aliki lekikiko, Ómasímini mukahá nene mikasigú limitive.

<sup>2</sup>\* Loko lokago ageló nampa 1 áisi nene voko lapeva ale lepekago, mikasigú limimó. Limike, vešená keza hela netá napámíni anosa ali minamoláa itó aí vogunahana kalapusa hízi amiaká amolaloka gánatísi napa utó oake, kagavuki itó mílumavagí utó imó.

<sup>3</sup> Lá okago ageló nampa 2 áisi nene lapevagutí netá ale lekekago, age nagamikú holokago, age nagamí nene gonositíni golanigítana loló noigo, age nagamikú netá nene híli gesá amó.

<sup>4</sup>\* Híli gesá niago, ageló nampa 3 áisi voko lapevagutí netá leke ahulokago, mukí nagamí napagú itó mukí nagamí hínipíníkú limimó. Lemekago golani nagamí loló o asú imó.

<sup>5</sup> Loló o asú okago, ageló makó nagamító gizapa ahulomíkago noítímo láa loko Ómasi lo namigo gulumó: Apazá keké vízeko minanitíka goí oko minanimó itó itína noanimó geza golesa netá lá oko líhímáinímíni meinava kemeaká ani netá nene ale gopa okogí nomímó mota utó okave.

<sup>6</sup> Geí apazá vešená itó gegepagutí gakó líaká a vetíni golani lekemómámíni lelegí oko golani kemekako ninamó nene hee lokave. Golesa netá alinamómámíni meinaváa hee loko kemekane.

<sup>7</sup> Loko noligo, guguni gizoaká italotí agelolímíni agepagutí gakó láa loko ligo gulumó: Guivahani Ómasi osá amosá ve geza lamaná oko ale hee lokogó líhima apasoaká noane.

<sup>8</sup> Loko lokago ageló nampa 4 áisi lapevagutí netá aleko leke ahulokago, hogú ve holative loko gele amekago ho nenémo vešená lovo vímegevo imó.

<sup>9</sup> Lá okago, vešená keza hómíni mumusikasilámo lovo vímegevo igo, Ómasímini gakotó vešená mukí kivise asú iti netá nenémínoko ale utó í vémini agulizala alívi letívi íki lamóza, kígikáini ali viligamamó. Itó Ómasímini lapaná ali otemamó.

<sup>10</sup>\* Itó ageló nampa 5 áisi lapevagutí netá nene hela netá napámíni gonanalívagi siató lepekago limimó. Lemekago, eza gizapa oko mína mikasiuka nene límugusi lapa-lapa zeko minamó. Nego, vešená keza míluma sípisi gílíki genezáini akohíkí kígitíake minamó.

<sup>11</sup> Itó mílumaváinímí itó kagavúinímí okulumakú Ómasi alívi letívi amóza, kígikáini ali vilígíki íki mílíki a netá golesa ahulamamó.

<sup>12</sup>\* Lá okago ageló nampa 6 áisi nene lapevagutí netá nene leke ahulokago, nagamí napa agulizá Zupaletísi loko nekú lemekago, ho noítitokatí kugulizáki ve napa anítita gapováa koló itíve loko ámina nagamí nene utó asú imó.

<sup>13</sup> Lá okago, neza ánigonougo, gosíhá sípísímámíni agepagutí, itó hela netá napamámíni agepagutí, itó soza saza monó lole ale vemámíni agepagutí holosi golesa losive makole gízalá gíli va netá ítemó.

<sup>14</sup> Keza nene Satani gekelelé ízegípalatíni holosi nenete alévolé suni alítave loko nenémíni zámúza ali mínake numutó namató kugulizáki ve napa gala vízikago, Ómasi osá amosá vémini gamena napaló ali nupa íki lova hízinígave.

<sup>15</sup>\* Gílnahe. Neza gumínaló ve nenémínoko galínali anítinogo uve. Nenémú vešená makó kugupe zapakó minatító okugo kovoza helekatinazo, kígikáa gosohákí míníkí kígikámíni gineganéváa gizapa íki minatamó keza kogoliza vízinígave loko Guivahanímó nolíve.

<sup>16</sup>\* Itó holosi keza lova hízitune líki míkasi makó agulizaláa Hipulu gakokutí Alamage-toníve líki latoka kugulizáki ve napa nene kílmí nupa í asú amó.

\* 15:8: 1 Kug 8:10-11; Isa 6:4      \* 16:2: Gá 9:10      \* 16:4: Gá 7:17-21; Age 78:44      \* 16:10: Gá 10:21-22      \* 16:12: Isa 11:15      \* 16:15: Mat 24:43; Luk 12:39; Ali 3:3      \* 16:16: Zak 12:11

<sup>17</sup> Itó ageló nampa 7 áisi lapevagutí netá nene vogalaló ká melane leke ahulokago limimó. Nolimigo, monó zavusavegú gonanalivagi siatoti gamena imane mota asú okave loko gakó napagutí anó lupa lemekago gulumó.

<sup>18</sup> \* Lá okago, gó melevezá itó gó galaké itó anó sipisi nenémo moloake nominago, imimá sipisi noigo ángumó nene veđená ganatilisi mikasiuka utó atoti imimá napa makó nenéminoko utó igo ángamuhatímuni utó imó.

<sup>19</sup> \* Lá noigo, Papelonía apá nene zevo hutilí ovo noigo hou lo losive makole imó. Itó numutó namató veđenalitini apá napa nene tui loko vimó. Itó Papelonía apá napámuni amelagini keikumú Ómasi eza gele minake vain nagamikítana oko mukahá okimiti lapegutí kemeko namó.

<sup>20</sup> \* Lá okago mikasi pokola nemó itó agoka nemó mukí vo tolova o asú imó.

<sup>21</sup> \* Itó okumatotí golini óvisopa gihila napa napa gehani monuni nenémini okómo lemeko veđená zevo ategevo imó. Noigo, óvisopa gihila nenémo vauva aleko zevo ategevo oko kipilikumú Ómasi alivi galativi amó.

## 17

### *Mokoló venakitana apá napámuni gakó*

<sup>1</sup> \* Lá okago, ageló 7 keza lape 7-a ali minamó keitokatí makolímó nenitoka oake, láa loko lo nimimó: Mokoló venakitana apá napama nagamí amupiló nemómámuni lihima alinogo ize. Okako, gelepizugo, ángatane.

<sup>2</sup> \* Numutó namató kugulizaki ve napa ezagi mokoló mihina iaká amó. Itó numutó namató veđená nenete keza ámina venatokatí nene vain nagamikítana oko mokova mikilí iake, matúini gopa oaká noimó.

<sup>3</sup> Nene ángatane loko lo nemekago, nigika ale viligokago, mikasi gomopalaló nelémoko vimó. Neneloka vená makó ángumó nene hela netá napa golohá makolímuni amupiló minamó. Ámina hela netalímuni agupeló agulizá mukí minamó nene Ómasi aleko letoko loaká gakó haitopaitolímuni gizikago minamó. Itó ámina netalímuni gotoláa 7-a itó sipiváa 10-a minamó.

<sup>4</sup> \* Itó vená eza gineganeváa nene okohu gó golohá lovimó ale akolo minamó. Itó gonanaliváa nene goli gehanigi meinava iteko mina netá ale guni oko akalamó. Itó agizakú lape makó golutunú lilí amó ale minamó nene, mokovámuni golutuváa ulínaka itó netá golesa vai oko minamó.

<sup>5</sup> Itó golihilaló asuguná agulizá Papelonía apá napa numutó namató mokómini itó golutuva netalímuni izolahináa nénisi nene nouve liki luhuva gizikago minamó.

<sup>6</sup> Itó vená eza Ómasímuni apazá veđenala itó Izesutoka gímiziki minamómave liki kipili hele veđenalitini golani nake nake, matuna gopa okago nego, ángumó.

Ángokuke, ininá golesa nouke nagata gululusi gulumó.

<sup>7</sup> Lá nougo, agelolímó láa loko loká onetamó: Nanamú ininá noane. Neza ámina venalímuni mogona itó hela netá napámo agohí geneimó nenémini mogona, itó hela netá napámuni gotola 7-a itó sipivala 10-a nenémini mogona itínasa lo utó oko lo gimitoze, gelezo.

<sup>8</sup> \* Geza hela netá ánganimó nene gozapá agómulagi minamó itína nene noamíve. Alike nene aseva nomi galegutí atiginá oko itekoko voko minoko voko golesa o lamaná inogo ive. Itó eza gozapá minamó itó itína nene noaminazo, atiginá oko okiko mikasiuka veđená keza ángiiki sigaga litanigave. Mikasi utó amitokatí emane alévolé kemetameki nia veđenalitini kugulizámini giza pukugú kugulizá gizi milama veđenalite nenémini inigave.

<sup>9</sup> Itó itína kigika koló omina veđenalitegó ámina anozámuni mogona giliakató neve. Gotola 7 keza ámina venámámo ase hízeko nomina agoka 7 nenetini avevezaha neve.

<sup>10</sup> Itó agoka 7 nene kugulizaki ve napa 7-atini avevezaha niave. Keikutí kugulizaki ve 5 keza haha ikamóza, makó nene itína hanuva noive. Makó nene minoko utó okoko gamena ahavásí minative loko lotonoimóma neve.

<sup>11</sup> Hela netá napa gozapá minamó itó itína gamena nene noamimó áisi nene kugulizaki ve napa 7 keitoka miní amekiko, nampáini nene 8 inogo ive. Lá okiko, eza minoko lapuluva oakakú nene vo holanogo ive.

<sup>12</sup> \* Itó sipiva 10-a ánganimó nene kugulizaki ve napa 10 keí avevezaha niave. Keza gizapa oaká zámuza velesá alinamamóma neve. Kugulizaki ve minata zámuza nene apí iki hela netámagi gamena alínipáisí alinigave.

\* 16:18: Ali 8:5, 11:13

\* 16:19: Isa 51:17

\* 16:20: Ali 6:14

\* 16:21: Gá 9:23; Ali 11:19

\* 17:1: Zel 51:13

\* 17:2: Isa 23:17; Zel 51:7

\* 17:4: Zel 51:7

\* 17:8: Tan 7:7; Ali 11:7; Age 69:28; Ali 13:8

\* 17:12: Tan 7:24

<sup>13</sup> Keza geleakáini hamó minokiko, hela netá napamámini gelekeleléa itiki gizapa oaká zámuzáini nene aí agizakú milanigave.

<sup>14</sup> Lá niiki Ómasímini sipsip akaleva nene lova ali amiki minanigave. Lá niko sipsip iza akaleva áisi nene guivahanitini ve uvóipo itó kugulizaki vetini ve uvóipo noinazo, eza nene amuza moloko kehelú inogo ive. Lá noiko, áisi nene kelémo etó okoko alesa molo kemekiko, aitoka alévolé iki gímize vegená nene ezagi apiziki minanigave.

<sup>15</sup> Loko loake, láa loko miní ameko lo nimimó: Nagamí napa nene mokoló vená eza agilikaloka noigo ániganimó nenémo numutó namató vegená kugupe haitopaitó itó mulusi haitopaitó itó haitopaitó konoki vegenalitini avevezaha noive.

<sup>16</sup> Itó sipivala 10 ániganimó nene kugulizaki ve napa 10-agi itó hela netá napamagi nene mokoló venáma mukahá apiliiki ahelú ikiko, agupe zapakó minoko helekiko, mémela nikiko, lumáa nene lolímo lanogo ive.

<sup>17</sup> Lá itimó nene, hanuva ma aminogo ive. Ómasímo kigikagú ale vávani okiko, eza agata gilimoláa nene gili aliiki kigika hamó nominiko, gizapa oaká zámuzáini nene hela netámámini agizakú mili asú iiki aí gelekelela minanigave. Lá niko, Ómasímini gako nene alévolé inogo ive.

<sup>18</sup> Itó vená makó ániganimó nene numuni apá napámini avevezaha noive. Ámina apá nenémo nene numutó namató kugulizaki vetini apá gotola loló okiko gelekelé itiki minatave loko nenémini zamuza aleneive, loko limó.

## 18

### *Papelonía apá tui loko vi gako*

<sup>1</sup> Lá okago ageló makó okulumakutí limigo ánigumó. Eza helisalámo alévolé oko minamó, itó lapanalámo mikasiuka hize sata igo ánigumó.

<sup>2\*</sup> Eza gako napa like láa loko limó: Papelonía apá napama tui loko vokave. Vokago holosi haitopaitolímímini numuni apá loló oko nominave. Mota gaha nama golesatini numuni apá loló oko nominave.

<sup>3\*</sup> Mukí numutó namató vegenalite alévolé vain nagamikitana oko mokova mikilí iaká amóma neve. Numutó namató kugulizaki ve napa keza ámina mokoló venaki ámina netá aliki miniaká amóma neve. Numutó namató pisinisi hoza aliaká vete ámina hozámini moni aliake henóiki vegená lilí amóma neve.

<sup>4\*</sup> Loko lokago, okulumakutí gako napa makó láa loko limigo gulumó: Vegenáne zuha lekeza ámina numuni apá nene ahuliiki golisi amave. Neneló miniki ámina apalímímini lihima netala alími vatí ikiko vegená mukí kivise asú iti netala lekelitoka zeloko vokatize.

<sup>5\*</sup> Ámina apalímímini lihima netala nene amupiló amupiló oko iteko okulumá ze gilitimó noive. Itó imane Ómasímo lihimavalamú agatí molamive.

<sup>6\*</sup> Nenemú netá golesa lilí ilikitató apasiiki nenéa aviligiki amupiló amupiló iki apasikitalo. Nenémini helegáa ekesá netá lekeza natave loko alí vavá ilikitamó nene aliki itiki amupiló amupiló iki kimilo.

<sup>7\*</sup> Kugupéini aliki itiki minake lagámini amupiló minake, meleetakeni ali miniaká amóma neve. Nenémini helegáa miluma itó mulúini githiná oaká netá nene ali utó i kimilo. Ámina apá nenémo agikatunú nene neza imane nugulizaki vená napa nouve. Neza getó minamuve. Miluma gelemoko lagámini amupiló minoloko voko minanogo ive.

<sup>8</sup> Loko loaká imó nenazo, gamena hamó zupahé ámina apatoka vegená mukí kivise asú iti netá mukí utó o amitize. Guivahani Ómasi eza amuzalagímó lihimavaláa napasotató nene heleaká netá itó mulúini githiná oaká netá itó gaúna heleaká netá utó okiko, ámina apató lolímo lo asú inogo ive, loko limó.

<sup>9\*</sup> Itó numutó namató kugulizaki ve napa ámina venaki mokoló mihina iake ámina apató ló gehani giziki nake meleetakeni ake miniaká amó keza ló lokilaváa itekiko, ániigiiki ive nama iki miluma gilinigave.

<sup>10</sup> Lá niiko, genavagi netá geleko haha imómámini mogona ániigiiki kehelele vizekiko, hotó miniki agae, agae, Papelonía apá napama lihimakámini meinaváa galinalí anitegimikave líki linigave.

<sup>11\*</sup> Itó numutó namató pisinisi hoza aliaká ve keza lelí henonite nene eáho itína meina hizitimó neve líki ámina iki miluma gili amitaze.

<sup>12\*</sup> Keí henokanoni nene lá iki salimiaká amó: Goli gehani itó silivá gehani itó meinava

\* 18:2: Ali 14:8; Isa 13:21; Zel 50:39 \* 18:3: Ali 14:8 \* 18:4: Isa 48:20; Zel 50:8, 51:6,45 \* 18:5: Apí 18:20-21; Zel 51:9 \* 18:6: Age 137:8; Zel 50:29 \* 18:7: Isa 47:7-9 \* 18:9: Izi 26:16-17 \* 18:11: Izi 27:31,36 \* 18:12: Izi 27:12,13,22



iteko mina gehani haitopaitolímíni, itó meinava iteko mina lulú, itó kugupeló netá gonanalivagi muki mokoná itó okohugó itó golohá itó za lamaná haitopaitolímíni itó elepani iza sipivatunú ali lolohalo a netá itó zasiha lónohanitunú, itó kapatunú itó aenitunú itó gala gehanitunú ali guni iki lilí ina netá,

<sup>13</sup> itó silogoheni anuva haitopaitolímíni itó anuvavagi paulá guguni gizoakakamú itó lokila anuvavagi iteaká i netá itó anuvavagi netupa lamaná itó vain nagamí itó gilisima itó polisima laisima itó sipsip iza itó pulumaká iza itó hosi iza itó hosi izate geলেখá oaká kali netá lamaná mukí itó megusa izegipa itó veenalitini kemeni salimiaká amóma neve.

<sup>14</sup> Itó pisinisi hoza aliaká ve keza láa liki litave: Minumunikama ángo geলেখé oko minoaká animó nene haha o asú okave. Itó golivaka hizi netá mota gololohá okave. Itó gonanaligama voko haha okamó nenazo, nana oko goha alitanimó neve liki litave.

<sup>15</sup> \* Itó ámina apatoka netá nenémináa salimiki moni henokanoni ali nupa iaká a veená keza genavagi netá geleko haha imó nene ángiiki hotó oti miniki ive nama ikitiki miluma gilikitiki

<sup>16</sup> agae, agae. Numuni apá napamave. Gineganega luhuvagi mokoná okohu golohá ale luhoaká amimómave. Itó gonanalivagi netá haitopaitolímíni meinava iteko minamó nenémini amupiló minoaká animómave.

<sup>17</sup> \* Lá animóza, imane henokanokama galinali lapuluva noinae liki linigave.

Itó nagamikú sipi amelage itó áminagú veno veená itó sipigú hozaváa aliaká ve itó age nagamikú pisinisi hoza aliaká a ve keza ámina iki ló lokilaváa itekiko ángiiki hotó miniki

<sup>18</sup> \* miluma gilikitiki ive iki numuni apá napama nenémináa makó hitoka netive.

<sup>19</sup> \* Liki liiki goihá lánéhá iki ive nama iki miniki láa liki litave: Agae, agae. Apá napamave. Age nagamikú sipi amelage ámina apalímíni netá matalalotí henokanóinigi lilí iaká a veená keza galinali gámekokó pizekave liki linigave.

<sup>20</sup> \* Ámina apá napámíni lihimaivaláa lekelitoka minamó nene Ómasímo itína apasokamómave liki okulumakú niamó itó Ómasímíni apazá veenalita itó aposolo itó Ómasímíni agepagutí gakó liaká ve niamó lekeza lokogoliza viziki mulutikú lamaná gililo.

<sup>21</sup> \* Loko agelolímo li gakó nenéminoko utó okago, ageló alévoleláa makolímó gehani napa makó geheko oake age nagamikú hize ahulokago limimó. Nolimigo, láa loko limó: Papelonía apá napa ámina oko amuza moloko ahelú o ahulokíko, voko haha o lamaná inogo ive.

<sup>22</sup> \* Itó musiki ziki voká ziki kita ziki hololopani huhu liki pikuli ziki miniaká a veenalitini konó lupa nene ámina apatoka goha makó utó aminogo ive. Itó kigizanitunú luhuva miliki netá ali utó miliaká amoláa nene ámina apatoka goha minaminigave. Itó hoza gaza nenémini hoko-hoko haka-hakáa nene utó aminogo ive.

<sup>23</sup> \* Itó mota gámekokó pizinogo ive. Livilímíni lapanaláa nene keitoka makó utó aminogo ive. Itó izoha alimi nimilíko ve vená keza gakó litamó nenémini konó lupa ámina oko ámina apakú makó utó aminogo ive. Nene ámina apakú pisinisi hoza aliaká véa numutó namató ve napa lilí iki miniaká amóma neve. Itó keí gipe lakegusanímó numutó namató veená kigikáini ale gopa imó.

<sup>24</sup> \* Itó Ómasímíni agepagutí gakó liaká a ve itó Izesuni apazá veená itó numutó namató monó alinakumule liki kipili hele veenalitini golanímíni meinaváa nene ámina apá napaloka minanazo, nenemú nene nenémini otanogo ive, loko agelolímó limó neve.

## 19

<sup>1</sup> Lá okago neza okulumakutí veená mulusi sipisi keí konó lupa napa gulumó. Keza láa liki lamó: Haleluia. Ómasi agepoka lilo. Lugutó vizeaká itó gonanalivagi lapaná itó zámuzala helisalagi minamó nene Ómasímíni mututoni neve.

<sup>2</sup> \* Áisi nene lihimatémíni meinaváa kemeaká hoza alekago gihiláa lelegí oko utó okave. Mokoló vená napa eza numutó namató ve mokoló mogona apí o kímike kelémo lapuluva oaká i venámámíni lihima nekisáa apasamó. Lá noike geলেখé veenalita zuha kipili helemómámíni golanímíni lihima aitoka minamó nene apasokave liki lamó.

<sup>3</sup> \* Liki liake Ómasi agepoka lilo liki goha liki goha liki apá napamaló ló lokilaváa iteva iteva oko mino lúaló moloko minanogo ive liki lamó.

\* 18:15: Izi 27:31,36 \* 18:17: Izi 27:26-30 \* 18:18: Izi 27:32 \* 18:19: Izi 27:30-34 \* 18:20: Gapo 32:43; Zel 51:48 \* 18:21: Zel 51:63-64; Izi 26:21 \* 18:22: Isa 24:8; Izi 26:13 \* 18:23: Zel 7:34, 25:10 \* 18:24: Zel 51:49 \* 19:2: Gapo 32:43 \* 19:3: Isa 34:10

<sup>4</sup> Itó monokú olotiva ve 24 itó alévolé oko minoaká netá 4-a keza kalapusa hiziki Ómasi gonanalivagi siató noi ve agepoka lake lamanale, Ómasi agepoka lilo liki lamó.

*Ómasímini sipsip akaleva nene vená alemo ami gakó*

<sup>5</sup> \* Lá okago, gonanalivagi siá minatokatí anó lupa makó láa loko utó imó: Ómasímini gelekelé vevenala zuha lekeza nene agepoka lilo. Limi minamó iti minamó golivala giliki miniaká niamó neneta, agepoka lilo.

<sup>6</sup> \* Liki likago, neza vevená mulusi nenetini konó lupa goha gulumó nene nagamí lisani napamáminoko sasa loko itó gó pou pou loko nominago, gakó napa láa loko utó imó: Guivahani Ómasile osá amosá ve eza agulizaki vete loló oko gizapa olimiaká hozava utó o lamaná noize, Ómasi agepoka lilo.

<sup>7</sup> Ómasímini sipsip akaleva nene vená alemo amiti gamena alitokave, itó vevenala zuha keza aí vená lílí inígi ali vatí ikamó nenazo, nenemú leza logoliza vizeko mulutegú lamaná geleko agulizá ale otitune.

<sup>8</sup> Keza mokoná ginegane vové avé loko minamó ali akalatave loko gele kemeneimóma neve. Liki lamó nene Ómasímini apazá vevenala keza vevesiki iki miliki iaká amó nenémo góini loló onoikumú linamó neve.

<sup>9</sup> \* Gakó láa loko utó okago, agelolímo gakó makó láa loko lo nimimó: Geza lá oko luhuva gizozo: Ómasímini sipsip iza akaleva nene vená alemo amiti gamenaló nosá lagámini natave loko alesa molo likimi vevenala zuhalita mulutikú lamaná gililo. Loko loake, láa loko limó: Gakó lo nogumumó nene Ómasímini gakó gihiláa lamaná nene lo nogumuve.

<sup>10</sup> Loko lo nemekago, nalapusa hizekoko gupá ze amitove loko nougo, óe, lá amó loake, láa loko limó: Némínamo. Neza gelekelé ve gigivekahina gigive gagave Izesú lo utó i gakola ali gikitiki ali miniaká nia vevenalitini kígivéipina nouve. Ómasígó gupá ze amezo. Izesú lo utó i gakó nenémo Ómasímini agepagutí liaká a ve kelémo vávani igo alika utó iti netakumú liaká amóma neve, loko limó.

*Gizopa hosi iza amegesaló mina vémini gakó*

<sup>11</sup> \* Lá okago, neza nogómula ahulo moloko ánígumó nene okulumá koló okago, hosi iza gizopa makó nego ánígumó. Ámina hosi izámíni amupíló mina vémini agulizala nene litokó minoaká itó gakó gihiláa loaká ve eza lihimámini meinava kemeaká hoza itó lovavagi hozava ale gopa amoko ale hee lokogó aleaká noive.

<sup>12</sup> \* Agómula gihiláa nene ló guluma oko minamó. Itó gotolaloka nene kugulizaki ve napatíni akilí mukí hitoake minamó. Itó agulizá luhuváa minamó nene ezáagó gatoko geleaká noive.

<sup>13</sup> Ginegane hána nene golani hilimikago minamó itó agulizá nene Ómasímini agepagú gatokó mína veve liki milamó.

<sup>14</sup> Eza novígo, okulumakutí gimisígi ve mulusi napa mukí gineganéini mokoná vové aveláa luhí minake, hosi iza mokonalitini kemegezaló itiki miniake ámegetiki vamó.

<sup>15</sup> \* Agepagutí nene sopolo hána sánevetaláa makó ite minamó. Nenetunú nene numutó namató vevená kepeleko kiviligitíve, itó aeni hánusa makó ale minoko gizapa oketanogo ive, itó Ómasi osá amosá vémini mukahá golesa ale utó moloko lihimáini apasoaká hoza alinogo ive.

<sup>16</sup> Gineganeló itó humailaló agulizá luhuva nene kugulizaki vetini agulizaki ve itó guivahanitini guivahaníve loko gizokago minamó.

<sup>17</sup> \* Lá okago, neza nogómula ahulo moloko ageló makó homámini lapanató oteneigo ánígumó. Mukí nama nene vogalaló vigá igá niago, mukitoka gakó napagutí sele lo kimíke limó: Ómasímo ló gehani napa nogizaze, iki alegesá ilo.

<sup>18</sup> Lá níiki kugulizaki ve napatíni kugupe mémeláini itó ami gizapa vetini kugupe mémeláini itó ve alévoleláa keí kugupe mémela itó hosi izatini itó lova véinitini kugupe mémela itó ve mukilitini gelekelé ízegipáini itó nagakú minamake hanuva minamoláa iti minamó limi mína vevenalitini kugupe mémeláini nataze loko limó.

<sup>19</sup> Lá okago, neza hela netá napama itó numutó namató vetini kugulizaki véini itó ízegipa kugunamotámíni iki alegesá íake niago ánígumó. Keza nene hosi iza gizopámini amegesaló mína vegi ízegipala agunamotamolagi lova ale kimitune liki anitemó.

\* 19:5: Age 115:13 \* 19:6: Izi 1:24 \* 19:9: Mat 22:2-3 \* 19:11: Age 96:13; Isa 11:4 \* 19:12: Tan 10:6  
\* 19:15: Age 2:9; Isa 63:3; Ali 14:20 \* 19:17: Izi 39:17-20

20 \* Itó hela netá napamagi itó gako lole ale ve sozámíni eza nene akohú netámámini avogisalo alévolé suni haitopaitolímíni ali vegi nene kigizató alemó. Ámina gako lole ale ve sozámíni nenémo amunaló emane hela netalímíni agulizá luhuva ali minamoláa itó vogunahanaló kalapusa hiziki agepoka liaká amoláa nene ámina alévolé suni alike kígika ale gopa oketamóma neve. Ezagi hela netá napagi kogómulagi niasigo kelémoake lolagi nagamilagú gihuká gehani ló loko noikú ahulokímikago lemesimó.

21 Limikasisigo, kugunamotamoláa nene hosi iza gizopámíni amegesaló mina vémini agepagutí sopolo hána sánevetaláa nenémo kepele gesá imó. Lá okago, mukí nama nenete aniteke kugupe mémeláinía niki niki kagatupa imó.

## 20

### *Kilisimasi 1000 nenémini gakola*

1 Lá okago, okulumakutí ageló makó limigo ánígumó nene aseva nomi galémíni kí itó seni nagá napa makó nene aǵizakú aleneigo ánígumó.

2 \* Áisi nene gosihá sipisi gozapá ká emane amunaukatí mina ve Satani nene agisa agizató aleake kilisimasi 1 tausen nene nagá numukú minative loko lotamó.

3 Lomiake, galegú hize ahulokago limimó. Lemekago, gaheváa nene alévolé oko geake humatunú moloko alémo kii limó nene, numutó namató vejená kígika goha ale gopa oketamoko hanuva minoloko voko kilisimasi 1 tausen ale ahulokiko, gologí omikiko nene, itekoko gamena alínipásí minative loko lotamó.

4 \* Itó neza gonanalivagi siá mukí nego ánígumó nene netá golesamú livi hukivi hoza alitave loko loketa vejená nene áminaló minimi nivago ánígumó. Itó Izesuni agulizala li utó miliki Ómasímíni gakola kelegesá legemigo ali gikitinago, luváini hukimi va vejenalitini kemeni ánígumó. Keza hela netá napama itó vogunahanaló kalapusa hiziki agepoka lisá amamoláa itó aí anosa nene golihító ali milamamoláa itó ali kigizakú milamamoláa ánígumó. Keza luváini huginakutí goha otiki miniki Kilistogegi kugulizaki vete aliaká hoza aliki miniko, kilisimasi 1 tausen vinogo ive.

5 Hililiki va vejená lugáa keza otemake kilisimasi 1 tausen nene asú itive liki ageva iki ha minamó. Helenosakutí oteaká ánígumó nene oteaká nampa 1 neve.

6 Ámina hilinakutí oteaká netató miní amiaká nia vejená keza Ómasímíni apazá vejená niakumú mulúikú lamaná giliaká niave. Vegená nenémináa keza heleaká nampa 2 nenémo kugupelotí poposá vizinogo ive. Keza Ómasímíni itó Kilistoni guguni giziaká vejenala líl iki minanigave. Lá niiki Izesuki kugulizaki ve hoza aliliki niviko kilisimasi 1 tausen oko vinogo ive.

### *Satá monéna lapuluva iti gako*

7 Itó kilisimasi 1 tausen asú noiko, Satani nene nagá numukutí gologí imikiko, goha itinogo ive.

8 \* Iteoko numutó namató mikasi nekisa vokisauka Gogo mikasiukatí itó Magogo mikasiukatí vejená kígika ale gopa okimioko kelémo negi hizeoko vejená gala viziko, lova ali utó inigi alegesá inigave. Keza nampáini nene getani nenéminiki gatoko gato asú amoakalímíni nitave.

9 Vegená nenémináate mikasiuka hutilí iki Ómasímíni apazá vejenala nitatoka itó Ómasímo amu heleaká noi apá Zelusalega viki gohoni milanigi ali viginigave. Lá niko, Ómasímo okulumakutí ló amiselekiko livi lúnivi inigave.

10 Lá ikiko, Satá nene amunaló vejená kogoka vizi ve nene hela lolímíni ohunagú gihuká gehani ló loko minakú ahelú i ahulikiko limitimó nene hela netá napamagi itó soza gako lole ale vegi áminagú emane amunaló limiki minasitotí ageva iki minasikú liminogo ive. Keza nene gasovagi neté gihikimikiko, gamena gamena únaká neteká miluma giliki mini lúaló miliki minanigave.

### *Gonanalivagi siá mokonalímíni avogisalo goní ita gako*

11 \* Itó gonanalivagi siá sipisi mokoná makó ánígumó. Itó amupiló mina vémini avogisa ánígumó nene okulumaki mikasigi keza aí avogisalatí golisi ikasike goha utó amasimó.

12 Lá niasigo, hele vejená iti minamó limi minamoláa gonanalivagi siató Ómasímíni avogisalo otinago ánígumó. Lá niago siató mina vémo puku mukí ale ataloko minamó. Makó ale atalago ánígumó nene alévolé kemetameki nia vejenalitini kugulizá gizo mola puku minamó. Itó hiliki vamoláa keza goí iki hanuva minake iki miliki amómámini mognamú ámina pukugú gizi milinató nene goní oketamó.

<sup>13</sup> Itó ámina gamenaló age nagamikú hiliki va vege naki kelémo atiginá imó. Itó he-leakalímíni itó galegú lemeakalímíni agikagú hiliki va vege naki kelémo atiginá imó. Itó hiliki vamoláa mukitoka keza iki miliki iaká a mogona lotuva legeko nenémíni helegáa apasoko kimimó.

<sup>14</sup> Lá okago hele vege naki galegú minamolagi nene lolagi nagamí ohukú kehelú o ahulokago lemémó. Nenémo heleaká nampa 2 loló onoive.

<sup>15</sup> Itó vege ná makó nene alévolé kemetameki nia vege naitini kugulizá luhuva gizo mola pukugú minami vege ná nene lolagi nagamí ohukú kehelú o ahulokago limiki minamó.

## 21

### *Okulumá gosohá itó mikasi gosohá utó itive*

<sup>1</sup>\* Itó okulumá lithagi itó mikasi lithagi keza viki haha ikasigo itó age nagamí ámina oko voko haha okago okulumá gosohaki mikasi gosohaki ánígumó.

<sup>2</sup>\* Itó apazá apá Zelusale numuni apá gosohá nene okulumakutí Ómasilikatí nolimigo ánígumó nene ve makotó vená alimí aminigi gonanalisi imikago minamó nenémíni nego ánígumó.

<sup>3</sup>\* Itó gonanalivagi siatotí anó lupa sipía makó láa loko gulumó: Ánigalo. Ómasímíni numuni apá nene vege naitini kovogisaló utó noive. Áisi nene holúikú minoko aleko noiko keza vege nala zuha lilí iki minanigave. Ezáa keitoka mino moloko nooko Ómasíni minanogo ive.

<sup>4</sup>\* Eza kogómula nogoza gilatoketanogo ive. Heleaká itó miluma geleaká itó ive nama oaká itó lagavú geaká nene asú okiko ma goha utó aminogo ive. Litaha netá nenémíniá nene voko haha inogo ive, loko limó.

<sup>5</sup> Itó gonanalivagi siató noi vemámo láa loko lo nimimó: Gililo. Neza netá mukí nene gosohá ale utó nomuluve. Loko loake, geza imane netakumú luhuva gizo molozo. Gakó gihila imane lokugo alévolé oakalímíni neve.

<sup>6</sup>\* Loko loake, láa loko lo nimimó: Ale lamaná o asú okuve. Neza goí moloko alika moloko netá apí oaká itó ale lutegeaká amelahina nouve. Makó keza nagamikumú kivisekikoma, nenitokatí alévolé kemetameki minoakalímíni nagamí nene hinipinikutí ihiiki niliki viki minatave loko hanuva kiminogo uve.

<sup>7</sup>\* Makó keza monokú alévolé iliki viki Satani lovaváa aviligitamó nenete netá imane mili alinigave. Itó nénisi nene Ómasíni loló oko nougo, kéisi nene izegipáne lilí iki minanigave.

<sup>8</sup> Lá onoinóza, gasovagi netakumú golisi gele vege ná itó monó gili ahuliaká nia vege ná itó golotuva netá aliaká nia vege ná itó kipili hiliaká nia vege ná itó mokoló vege ná itó gipe lakegusató vege ná itó soza ómai netá gupá zi amiaká nia vege ná itó soza gakotó vege ná mukí nene ámina netá ali miniaká nia vege naitini numuni apá nene lolagi nagamí ohunagú gihuká gehani ló loko nekú minatave loko lonoinómó neve. Nenémo nene heleaká nampa 2 loló onoive, loko lo nimimó.

### *Zelusale apá gosohá utó iti gakó*

<sup>9</sup> Itó ageló 7 keza lapéinigú vege ná mukí kivise asú iti netá 7 vaí okago ali minakutí makolomo nenitoka ake láa loko lo nimimó: Ano Ómasímíni sipsip akalevamámíni alemo amiti vená gelepizitoze.

<sup>10</sup>\* Loko lokago, nigikáne ale noviligago agoka napa hána hána makotó nelémoko itike apazá apá Zelusalega nene Ómasilikatí okulumakutí nolimigo nelepizigo ánígumó.

<sup>11</sup> Ómasímíni gonanalivagi lapaná neneló noigo, ámina apalímíni avogisa nenémo gehani meinava iteko minamó agulizá zasipa gehani nenémíni oko avogisámo hanato minamó.

<sup>12</sup>\* Gehani geisa napa hána nene numuni apá ale vigeke mína geisámíni gatenia 12-a minamó. Itó gateni hamopamotó nene ageló makó minamó. Itó gatetó nene isilae vege ná mulusi 12 keí kugulizá nene luhuva gizi milikago nego ánígumó.

<sup>13</sup> Ho noititoka gateni losive makole itó ezegaloka gateni ámina oko losive makole itó emegaloka gateni ámina oko losive makole itó ho nolimitoka ámina oko gateni losive makole neve.

<sup>14</sup> Ámina geisámíni lukesaváa nene 12 minomo vonoive. Itó lukesaváa 12 nenémíni amupiló Ómasímíni sipsip akalevamámíni aposolo 12 keí kugulizá gizo molokago minomo vimó.

\* 21:1: 2 Pit 3:13; Isa 52:1; Ali 3:12 \* 21:2: Isa 61:10 \* 21:3: Izi 37:27 \* 21:4: Isa 25:8, 35:10, 65:19 \* 21:6: Isa 55:1 \* 21:7: 2 Sam 7:14 \* 21:10: Izi 40:2 \* 21:12: Izi 48:30-35

15\* Láa loko lo nimi ageló nenémo hánusaváa makó golitunú lílí ikago ale minamó nene numuni apá itó gatenaváa itó geisaváa molo geleaká hánusa minamó.

16 Ámina apá gohaláa tovoimoláa itó zohota vimoláa nene hamó lelegitokó nego, agelolímo hánusavatunú molo geleko ániámó nene 2400 kilomita nego ániámó. Itó tovoimoláa itó zohota vimoláa itó hána itimoláa nene hamó lelegitó neve.

17 Itó geisámíni hána imoláa molo gelekago 66 mita nenémíni oko minamó. Vegenalita molo geleaká netá nene agelolímo ale mínake molo giligo ániámó.

18\* Numuni apalímíni geisa nene mokoná gehani agulizá zasipa gehani nenetunukó gekago minamó. Itó ámina apá nene goli gehani vové avé loakalímíni kalasi nenémínoko hanato mina netatunú lílí ikago minamó.

19 Ámina numuni apalímíni lukesaváa nene meinava ite mína gehani haitopaitolímíni alí votamó. Lukesaváa nampa 1 nene mokoná gehani agulizá zasipa gehanítunú lílí amó. Itó lukesaváa nampa 2 nene gumugumusi gehani agulizá sapaia gehanítunú lílí amó. Lukesaváa nampa 3 nene agulizá agate gehanítunú lílí amó. Lukesaváa nampa 4 nene gihisigó gehani agulizá emalali gehanítunú lílí amó.

20 Lukesava nampa 5 nene mokoná gehani agulizá satoníkisi gehanítunú lílí amó. Lukesaváa nampa 6 nene golohá gehani agulizá koniliani gehanítunú lílí amó. Lukesaváa nampa 7 nene gihuká gehani agulizá kilisalaíti gehanítunú lílí amó. Lukesava nampa 8 nene gihisigó gehani agulizá pelilo gehanítunú lílí amó. Lukesaváa nampa 9 nene gihuká gehani agulizá topasi gehanítunú lílí amó. Lukesaváa nampa 10 nene gihisigó gehani agulizá kilisopelesi gehanítunú lílí amó. Lukesaváa nampa 11 nene mikasi guhí gelevi gehani agulizá haiasíni gehanítunú lílí amó. Lukesaváa nampa 12 nene golohá gehani agulizá ametisi gehanítunú lílí amó.

21 Itó gatenía 12 nene mokoná pesekú 12 meinaváa iteko minamolátunú lílí amó. Gateni hamopamó nene pesekú hamopamó sipisitunukó lílí amó. Itó numuni apalímíni gapováa nene goli gehani vové avetoakalímíni lílí ikago kalasi nenémínoko hanato minamó.

22 Guivahani Ómasi osá amosá ve áisi itó aí sipsip akaleva nenémo monó zavusave napa loló onoiómó nenazo, ámina apatoka monó numuni nomigo ániámó.

23\* Itó ámina apatoka Ómasímíni gonanalivagi lapaná nenémo hize hanatatize, itó aí sipsip akaleva nenémo líví loló okoko mínanogo inazo, neneló ikani ho lapanáini hize hanatati hozaváa nomive.

24\* Numutó namató vegená keza ámina apalímíni lapanalagú mihina inigave. Itó numutó namató kugulizaki ve napa keza gonanalisi netáini nene áminalokagó alilíki vinigave.

25\* Ámina apá nene límugusi zeko gó loko ma aminogo ive. Lá onoinaze, ámina taonímíni gateni nene holisakámámínoko koló oko mínanogo ive.

26 Numutó namató vegenalítíni gonanalivagi netá meinava iteko mína netá nene ámina taonigú alilíki anitinigave.

27\* Golotuva netá makó nene áminagú iteminogo ive. Itó kovoza netá makó alita vegená itó soza gakó lí mínata vegená keza ámina apakú ví hilaminigave. Ómasímíni sipsip akaleva nenémo alévolé kemetameki nia vegenalítíni kugulizá nene pukugú gizo molokago mína vegenakó ví hilanigave.

## 22

1\* Itó agelómámo mínova mínova oakalímíni nagamí napa makó nelepizigo ániámó nene agómula golouto mína nagamí nene Ómasi itó sipsip akaleva keí gonanalivagi siatokatí lomoko novike,

2\* ámina apalímíni gapo holukú lomoko vimó. Itó nagamí helega helega alévolé lemetsaméni ale utó oaká za noimó nenémíni gihiláa haitopaitolímíni 12 nene ikani gola zupa zupa gihila zeko guzá loaká noive. Numutó namató vegená keza ámina agiláa nene níki zoki lamaná inigave.

3 Ámina apakú nene usilagi netá mínaminogo ive. Ómasi eza itó aí sipsip akaleva keí gonanalivagi siá nenegú utó okiko, gelekelé izegipala keza gupá zi aminigave.

4 Itó af agoka agepa ániigi minanigave. Itó agulizalímíni luhuváa nene golihító mínanogo ive.

5\* Itó Guivahani Ómasi ezáa nene lapaná kemekiko ali minatamó nenazo, ámina apató nene límugusi ma zemínogo ive. Itó lamu líví ahe itó hómíni lapanalahe nenémíni hozaváa

\* 21:15: Izi 40:3 \* 21:18: Isa 54:11-12 \* 21:23: Isa 60:19-20 \* 21:24: Isa 60:3 \* 21:25: Isa 60:11 \* 21:27: Isa 52:1 \* 22:1: Izi 47:1 \* 22:2: Apí 2:9 \* 22:5: Isa 60:19; Tan 7:18

ma utó aminogo ive. Itó apá amelage keza kugulizaki ve lilí iki gizapa okimiaká hoza aliki mini lúaló miliki minanigave.

*Izesú atiginá iti gakó*

<sup>6</sup> Itó agelómámo láa loko lo nimimó: Gakó imane gakó gihila itó lokugo alévolé oakalímíni neve. Guivahani Ómasímo eza agepagutí gakó liaká ve ale kegepagú moloaká i ve áisi nene agelola amiselekago, gamena hána amiko utó itive loko lonoi netá nene gelekelé veva lekeza gilitave loko lo gemeko nogelegizigo ánígane.

<sup>7</sup> Izesú nene gelenape. Neza litá oko núane vinogo uve. Itó makó keza imane pukugú alika utó iti gakó gizo molamó nene legesó iki gizapa iki ali minata vegealite kogoliza vizinigave loko nolive.

<sup>8</sup> Itó neza Zonina netá imane ánígoko gele asú umó. Gele asú okugo, netá imane nelepizi agelolímíni agisauka voko lipizekuke gupá ze aminogo nougo,

<sup>9</sup> eza óe loake láa loko lo nimimó: Néminamo. Neza gelekelé ve gigivekahina nouve. Itó Ómasímíni agepagutí gakó liaká nia vetini kígivéipina nouve. Itó imane pukugú gakó legesó iki ali minata vegealitimíni kígivéipina nouve. Geza Ómasigó gupá ze amezo.

<sup>10</sup> Loko loake, láa loko lo nimimó: Gakó nene gihila ziti gamenaváa mota alitokaze, nenemú geza puku imanegú alika utó iti netalímíni gakó nene ali halá gemo.

<sup>11</sup> \* Nenemú golesa netá aliaká nia vegeaná keza alikigó minataze. Itó kígikáini golotuva lovímó keza ámináminikigó minataze. Itó monokú hee liki mininatite nene hee likigó miniliki viki minataze. Itó apazá niamoláa nene ámina iki apazá keké viziki miniliki viki minataze, loko lo nimimó.

<sup>12</sup> \* Izesú láa loko limó: Gelenape. Neza litá oko vinogo uve. Vinake nene lihimatini meinava apasoko likimitove loko aleko vinogo uve. Vegená iki miliki amómámíni meinaváa lelegí oko etó etó oko kiminogo uve.

<sup>13</sup> \* Neza goí moloko alika moloaká ve lolováa itó mogonáa apí oaká itó ale asú oaká amelahina nouve.

<sup>14</sup> \* Gineganéini nagamí ziki ali vové avé liaká nia vegeanakumú gulugo lagámíni oaká noive. Keza nene lokimikugo alévolé lekemetameni ale utó oaká zámíni gihila nataze, itó imane apalímíni gatekú itítaze.

<sup>15</sup> Gipe lakegusató vegeaná itó mokoló vegeaná itó kipili hiliaká nia vegeaná itó soza ómai netató gupá zi amiaká nia vegeaná itó sozaló vegeaná nené numuni apá númaseloka minanigave.

<sup>16</sup> Neza Izesuna agelóne amiselekugo eza nene vegeáne zuha mulusi milató milató lekeza nene gakó imane lo utó moloko lo likimitize. Neza nene Tevitini agapilamola itó aí nagalagutí nouve, itó sonohí gazakomé lapanalagi ve nouve, loko limó.

<sup>17</sup> \* Ómasímíni Sikalahulímo itó aí sipsip akalevámíni venakitana mina vegealite ano liki liaká niave. Itó makó keza gakó imane giliiki ámina iki ano liki linigave. Minova minova oakalímíni nagamikumú likivisekikoma, imanelokatí iki ihiki nataze. Natune likima iki imanelokatí nagamí nene meinava nomimó hanuva nataze, alo.

<sup>18</sup> \* Imane pukugú alika utó iti netalímíni gakó luhuva gizonoumó nene gatiki gilita vegeaná lekeza lakagata aleko ehe loko noluze, gililo. Makó kezáini kagatatunú giliki imane gizo nomulu gakotó makó miní amiki milata vegeaná nene Ómasímo vegeaná mukí kivise asú iti netá imane pukugú gizo mulu netató miní ameketanogo ize, ehe.

<sup>19</sup> Itó makó keza imane pukugú alika utó iti netalímíni gakokutí makó huki ahulata vegeatoka Ómasímo alévolé kemetameni ale utó oaká zámíni gihiláa itó apazá apala nene moseketanogo ive. Ámina netalímíni gakó nene imane pukugú gizo molokugo neve.

<sup>20</sup> Imane lo utó mola gakó hize lé oaká ve áisi nene Oo, mota núane vinogo uve loko nolive. Lamaná. Guivahani Izesú geza ano.

<sup>21</sup> Guivahani Izesuni nasahilí nenémo lekelitoka mino moloko minino.